



409




John Carter Brown  
Library  
Brown University











IO PETRI  
MAFFEI  
BERGOMATIS

E SOCIETATE IESV

HISTORIARVM  
INDICARVM LIBRI XVI

SELECTARVM ITEM EX INDIA  
Epistolarum eodem interprete Libri IIII.

*Accessit Ignatij Loiole Vita postremo recognita. Et in Opera  
singula copiosus Index.*

CVM PRIVILEGIO.

VIRTUTI SIC



CEDIT INVIDIA.

VENETIIS, Apud Damianum Zenarium. 1589.

*Adm. Libr. Mus. Vatic. 1589. 1589. 1589.*  
*De Libr. Mus. Vatic. 1589.*



# Priuilegium Senatus Veneti.

**P**aschalis Ciconia Dei gratia Dux Venetiarum &c. Vniuersis & singulis Rectoribus quarumcunque terrarum, & locorum nostrorum, ceterisq; representantibus, Iudicantibus, Officialibus, & Ministris nostris quibuscumque; necnon Magistratibus huius Urbis nostræ Venetiarum tam præsentibus, quàm futuris, ad quos hæ nostræ peruenerint, & harum executio spectat, & spectare poterit, significamus heri in Consilio nostro Rogatorum captam fuisse partem tenoris infra scripti, videlicet; Che al fedel nostro Damian Zenaro sia concesso, che altri che egli, ò chi hauerà causa da lui non possa stampare nel Dominio nostro, ouero altroue stampato in esso vendere per spatio d'anni vinti prossimi venturi le Historie delle Indie latine & volgari di Pietro Maffei, sotto pena di perder le opere, che si trouassero, & di pagare ducati trecento da esser diuisi vn terzo alla Pietà, vno al Magistrato che farà la effecutione, & l'altro all'accusatore: douendo esso supplicante offeruare quanto per le Leggi nostre è disposto in proposito di stampe: Quare auctoritate supradicti Consilij mandamus vobis, vt supradictam Partem obseruetis, & ab omnibus obseruari, ac vbi opus fuerit, registrari, præsentantiq; restitui faciatis. Dat. in nostro Ducali Palatio die 7. Augusti Indictione prima M D LXXXVIII.


Laurentius Massa Secretarius.







# PHILIPPO REGI CATHOLICO.



**S**UPERIORIBVS annis, cum  
ad componendas Lusitaniæ res, Oli-  
siponem ipse venisses, Catholice  
Rex, hortata me tua est Maiestas,  
ut inchoatam Henrici Regis nomine auunculi  
tui rerum Indicarum historiam, pari alacritate  
studioq; persequerer. Feci quod iusseras: to-  
tumq; contextum narrationis, à primo nauiga-  
tionum exordio, ad usque Soceri tui Ioannis eo  
nomine Terty Regis obitum, pro mea tenuitate  
perduxi. Quo longius ne progrededer, anna-  
lium exinde series, ut in tantis & rerum moti-  
bus, & locorum intervallis, partim intercisa,  
a 2 partim



partim etiam neglecta, prohibuit. Neque vero mihi diutius deliberandum fuit, cuiam opus hoc quaecunque, receptam consuetudine, destinarem. Debat hoc tuis erga se meritis nostra Societas uniuersa. Idipsum nominatim à me tua de me iudicia, meaq; summa in te pietas exigebant. Postremo res loquebatur ipsa, equum esse, ut cuius in primis virtute opibusq; Christiana res nititur, huic potissimum, explorati pijs felicibusq; maiorum suorum armis Oceani; aditarum quæ audita non erant, gentium; propagata una cum imperio in ultima loca recte in Deum fidei, si minus facunda splendide; certe, quoad eius fieri potuit, sincera atque accurata explicatio dicaretur. Quæ me, Rex Optime & Maxime, perpulerunt causæ, uti præ cæteris offerre tibi mearum lucubrationum fœtus auderem; eadem, opinor, Clementiam istam fastigio tam excelso parem adducent, ut eos in lucem, sub Augusti nominis tui presidio tutelaq; prodijsse patiari. Quod reliquum est, Maiestatem tuam Deus immortalis ad sui nominis gloriam, & Ecclesiæ catholicæ firmamentum, quam diutissime tueatur incolumem.





# IN HISTORIAS

## INDICAS RERVM

### MEMORABILIVM

#### Index.

A

<b>A</b>	BASSINORVM Rex Alexander.	pag. 15. b
	Abassini obsequium Clementi Septimi Pont. Max.	
	defertur.	142. a
	Abassina gens Alexandrino Patriarchæ paret.	
	pag.	283. a
	Abassinorum mores.	190. b. & 192. b
	Abdala dynasta Camparis. vide Campar.	87. b
	Abduti Brachmanæ.	21. a
	Acenorum Rex.	67. b. 113. b. 120. a. 135. a. & 136. a
	Adamus Aethiopiæ Rex insensus Catholicis.	280. a
	Adenum oppidum.	85. a. 104. b. 105. b. 106. b. 183. b. 159. b.
	& inde.	
	Aegidius Annius.	4. a
	Aegyptij Campsonis consilia conatusque.	58. b. 103. b. & 105. b
	Ab Selymo Ottomano extinguitur.	104. b
	Aerius Ternatis Rex.	166. a. & 170. a
	Agazinum Cambaie oppidum.	158. a. & 167. b
	Agesymba noti orbis terminus antiquis.	13. b
	Rex idem.	161. a. 165. a. & b
	Aialus Ternatensis Regis frater.	136. b
	Aialus alter hoc nomine.	214. b
	Alcoranum Mahometanorum, vel potius Coranum.	243. b
		ale-



# I N D E X.

<i>Alexander V I. Pont. Max. definit limites nauigationum.</i>	13. a
<i>Alexander Abassia Rex.</i>	15. b
<i>Almansor Tidoris Rex. 99. b. eiusdem obitus.</i>	150. a
<i>Alodini Mahometani reguli conatus in Lusitanos. 77. a. 79. a. 82. b.</i>	
<i>88. b. 109. b. 20. a. 136. b. 141. b</i>	
<i>Victus ad Vgentanam emoritur.</i>	145. b. & 147. a
<i>Alphonfus V. Lusitaniae Rex.</i>	4. a
<i>Alphonfus Cardinalis, Emmanuelis Regis filius.</i>	168. a
<i>Alphonfus Congi princeps baptizatur.</i>	8. b
<i>Eiusdem acta.</i>	110. b. 74. a. & 81. b
<i>Alphonfi Albuquerquei gesta res. 36. b. 47. a. 51. b. 61. b. 65. b.</i>	
<i>&amp; inde. 69. b. 72. b. 77. b. 85. a. &amp; 89. a</i>	
<i>Naufragium 80. b. obitus. laudes.</i>	90. b
<i>Alphonfus Noronia Indiae Praetor.</i>	265. b. 267. a. & 272. b
<i>Alphensius Paina.</i>	14. b
<i>Alphonfus Persona Quaestor Malacensem arcem tuetur egregie.</i>	82. b
<i>pag.</i>	
<i>Alucan rector pueritiae Mamudij Cambaiae Regis Lusitanos ad Diuum</i>	
<i>obsidet.</i>	182. b
<i>Amangutium Iaponis vrbs.</i>	235. b. & 282. a
<i>Ambassecongum vrbs regia Congi.</i>	7. b
<i>Amboinus insula.</i>	171. a
<i>Americus Vesputius Brasiliam regionem explorat.</i>	26. a
<i>Amida, &amp; Xaca Iaponiorum dij.</i>	209. b
<i>Ammonite populi.</i>	246. b
<i>Amochi deuota capita.</i>	22. a
<i>Ananazes pomi genus in Brasilia.</i>	26. b
<i>Anathema. Vide Miracula.</i>	
<i>Anchediua insula.</i>	24. a. 43. b. 46. a
<i>Andreas Ouiedus Episcopus in Aethiopiam.</i>	203. a. & 275. a
<i>Angerus Iaponius baptizatur.</i>	232. b. & 234. b
<i>Annum è Lunaribus periodis Sinae conficiunt.</i>	94. a
<i>Anta animal in Brasilia.</i>	27. a
<i>S. Antonij Cænobia in Abassia.</i>	117. b
<i>S. Antonij Saxa.</i>	116. b
<i>Antonius Casalius Franciscanus.</i>	217. b
<i>Antonius Correa in Pegusios.</i>	112. b
<i>Malacam reficit commeatu.</i>	112. b
	Mocri-



# I N D E X.

<i>Mocrinum ad Baharenum superat.</i>	127.b. & inde.
<i>Antonius Criminalis occiditur ab ethnicis.</i>	248.a
<i>Antonij Galuani laudes &amp; acta.</i>	167.b. & 168.a
<i>Antonij Laurerij Franciscani naufragium.</i>	67.a
<i>Laudes, actaque.</i>	80.b. 48.a
<i>Antonius Paima in Macazares.</i>	201.a
<i>Conuertit Reges ac proceres.</i>	202.a
<i>Antonij Passanij facinus memorabile.</i>	114.a
<i>Antonius Quadrius Patriarchæ Socius.</i>	280.b
<i>Antonius Sylueria Diensis arcis præfectus.</i>	157.a. & 182.b
<i>Antonij Verani egregium facinus.</i>	114.a
<i>Apri Amphibij in Brasilia.</i>	27.a
<i>Aqua lustralis. vide Miracula.</i>	258.a
<i>Arabia Felix.</i>	246.b
<i>Arabicus sinus.</i>	14.b
<i>Argenteus amnis.</i>	26.a
<i>Argenti Sinæ audidissimi.</i>	92.b
<i>Armuzia Insula &amp; Vrbs. 54. b. 127.a. &amp; inde 132. b. &amp; inde 155. a.</i>	
<i>Aroezius Ternatensis dynasta.</i>	133.b. 137.a. & 162.b
<i>Aromata promontorium.</i>	15.a
<i>Arquicum oppidum.</i>	117.a
<i>Arsinarium promontorium.</i>	4.a
<i>Aruanus regulus.</i>	120.a. & 136.a
<i>Arx ad Anchedinam.</i>	43.b. 45.a
<i>Ad Armuziam</i>	55.b. 89.b. 132.b
<i>Ad Goam</i>	69.b. 71.b
<i>Ad Calecutum.</i>	86.b. 139.b. 141.b
<i>Ad Cananorem.</i>	43.b. 48.b
<i>Ad Ceilanum.</i>	110.b. 123.a
<i>Ad Ciaulum.</i>	129.b
<i>Ad Cocinum.</i>	36.a. 38.a
<i>Ad Dium.</i>	158.a
<i>Ad Malacam.</i>	79.b. 83.b. 109.b. 115.b
<i>Ad Maldinas.</i>	115.b
<i>Ad Pacenum.</i>	120.a. 136.a
<i>Ad Quiloam.</i>	43.a
<i>Ad Socotoram.</i>	37.b
	<i>Ad Ter-</i>



# I N D E X.

<i>Ad Ternatem.</i>	134. a
<i>Asnafasagar alio nomine Claudius Aethiopiae Rex.</i>	189. a
<i>Astrolabium ad rei maritimæ usum transfertur.</i>	5. a
<i>Atiua Amboni oppidum.</i>	171. a
<i>Aurea Chersonesus.</i>	13. b
<i>Autolola populi Guineæ.</i>	13. b
<i>Azedecan Goam obsidet.</i>	172. a
<i>Salsitas Lusitanis tradit.</i>	ibid.
<i>Rebellat.</i>	ibid.
<i>Rursum tentat fœdus.</i>	204. a
<i>Emoritur.</i>	205. a

## E

<b>B</b> <i>Acanor oppidum capitur à Lusitanis.</i>	143. a
<i>Bacianum Insula Molucarum.</i>	133. a. 150. a. 170. a
<i>Badagæ populi.</i>	248. a
<i>Badurius Cambaie Rex.</i>	176. b
<i>Occiditur.</i>	180. b
<i>Babarenum Armuzie Vrbs.</i>	127. a. 155. a
<i>Bande insulae descriptio.</i>	83. a
<i>Bandora Cambaie oppidum.</i>	176. a
<i>Baptismus in Congi regno primus.</i>	7. a
<i>Baptismus parturientem fœminam leuat angustijs.</i>	200. a
<i>Barbaræ mulieris Lusitanæ constantia, &amp; pietas.</i>	185. a
<i>Bardor domicilium fœminarum.</i>	172. b
<i>Barnagazius præfectus maximus Aethiopiae Regis.</i>	116. b. 117. b
<i>&amp; inde.</i>	
<i>Baroa Aethiopiae, seu Abassie Vrbs.</i>	189. b
<i>Barptolemaus Diazius Bonæ spei promontorium primus flectit.</i>	13. a
<i>Eiusdem obitus.</i>	28. b
<i>Baticale regulus.</i>	65. b. 112. a
<i>Regina.</i>	203. a
<i>Batochina Insula. vide Mauricæ.</i>	84. a
<i>Bazainum Vrbs Cambaie.</i>	156. b. & 177. a
<i>Bemoirus Rex Ialophorum Aethiops.</i>	11. b
<i>Benestarinum castellum ad Goam.</i>	79. b. & 81. a
<i>Bengalæ regni situs.</i>	14. a
<i>Beniensium regulus Aethiops.</i>	11. a



# I N D E X.

Bernardus Iaponius Romam venit primus.	259.a
Conimbrice in reditu moritur.	259.a
Betel Malabaricum, seu tambul Arabicum, quos in vsus.	23.a
Berbleem templum Olisipone.	25.a
Bezeguicus regulus Aethiops.	5.a
Bilganum Vrbs Inaie.	204.a
S. Blasij Aquatio.	17.b
Bintanum insula. 145.a. Vide Alodinus.	
Biremis parua ex India nauigat in Lusitaniam.	180.b
Bobaates Ternatensium regulus.	133.b. 161.a
Boleifes Ternatis Rex. 82.b. 133.a. Vide Ternatem.	
Bombarda machina describitur.	19.a
Bone pacis aquatio.	18.b
Bone spei promontorium.	15.a
Bona signa flumen Africa.	18.b
Bonferrus Franciscanus in Pegusios.	280.b. & 281.b
Bonzij Iaponiorum sacrifici.	209.b. & 236.b
Borneum Insula.	14.b. 163.a
Boues ab Indis adorantur.	21.a
Brachmanæ Indorum Sacerdotes.	20.b. & 110.b
Brasilia. 26.a. & inde. 254.a. & inde.	
Braua Vrbs. 37.a. & 47.a	
Bungi Rex in Iapone.	258.b. & 282.a

## C

<b>C</b> abis animalis ossa cruori sistendo.	76.a
Caciziorum in Christianos odium, & conatus.	28.a.
& 244.a	
Vide & Mahumetani.	
Casres Africe populi.	13.b
Caimales dynastie in India.	20.b. & 22.b
Cairum Vrbs.	42.a. & 58.b
Cairum in vsum anchoralium ex palma.	114.b
Caus pyrum syluest. e in Brasilia.	26.b
Calaiatum Arnuzie Vrbs.	51.b. & 62.a
Calaluzium Indici nauigij genus.	145.b
Calecutum Vrbs Malabarica.	79.b. 14 a 20.b
b	Cale-



# I N D E X.

<i>Calecutanus Rex.</i>	20.b. & inde. 29.b. & inde. 86.b. 139.b. & 157. a
<i>Camaranum Insula describitur.</i>	85.b
<i>Cambaia regnum, &amp; Rex.</i>	58.a. 158.a. & inde
<i>Camboie ora.</i>	14.b
<i>Camis Dii minores Iaponiorum.</i>	209.b
<i>Camparis dynasta.</i>	87.b
<i>Camphora, vel potius Caphura.</i>	67.a
<i>Campson Aegyptius. Vide Aegyptius.</i>	
<i>Canacapon in ora Piscaria hypodidascali.</i>	200.a
<i>Cananor Malabarica Vrbs.</i>	13.b
<i>Canarini fanum e solido lapide.</i>	258.b
<i>Cangoximanus Rex.</i>	235.a. & inde.
<i>Capitis vertex abrasus quid significet.</i>	100.a
<i>Capocate portus Calecutanus.</i>	22.b
<i>Caramansa regulus Aethiops.</i>	5.a
<i>Carigij neophyti mactantur ab ethnicis.</i>	273.b
<i>Carmania regio.</i>	58.b
<i>Carnis humane esus.</i>	254.a
<i>Caryophylli, seu clauis descriptio.</i>	84.b
<i>Casia aromatis genus.</i>	67.a
<i>Castaneriani comitis iudicium de Francisco Xauerio.</i>	282.b
<i>Catechismus. vide Christiana doctrina.</i>	
<i>S. Catharinae in Africa promontorium.</i>	4.a
<i>Catharina Lusitaniae Regina.</i>	200.a
<i>Catifa Armuzia oppidum.</i>	129.a
<i>Catua ore Malabarica flumen.</i>	153.a
<i>Caucasus.</i>	14.a
<i>Caucincina ora.</i>	14.b
<i>Ceilanum olim Taprobana.</i>	14.a
<i>Ceitanuaca Ceilani Vrbs,</i>	265.b
<i>Celebes populi ad Christum adiunguntur.</i>	171.b
<i>Cerigo bellua Brasilica.</i>	27.a
<i>Cetiganum, vide Celebes.</i>	
<i>Cetus Indiam nauem quatefacit.</i>	112.a
<i>Cetus alius Indiam onerariam cingit.</i>	119.b
<i>Chaunnaria Africae promontorium.</i>	2.b
<i>Chersoneus Aurea vnde dicta.</i>	14.a
	Chia



# I N D E X.

<i>Chia potio salubris in Oriente.</i>	92.a. 206.a
<i>Christi ordo in Lusitania.</i>	3.a
<i>Christianorum veterum in India ceremonia &amp; mores.</i>	32.b
<i>Christiana philosophia introrsum speciosa.</i>	195.b
<i>Christiana doctrina.</i>	202.a
<i>Christophorus Columbus.</i>	12.b
<i>Christopherus Gamma opem Abassino Regi fert.</i>	189.b
<i>Eiusdem obitus.</i>	191.b
<i>Christophori Iusartis facinus præclarum.</i>	139.b
<i>Ciales flumen, &amp; oppidum.</i>	156.b. & 176.a
<i>Ciampa ora.</i>	14.b
<i>Ciaulum oppidum.</i>	59.b. & 130.a
<i>Cingale populi.</i>	123.b
<i>Citor Vrbs Indica.</i>	178.a
<i>Claudius Rex Aethiopiae.</i>	189.a. & 278.b
<i>Clauus, seu Caryophyllon.</i>	84.b
<i>Clementi Septimo Pont. Max. Abassini obsequium defertur.</i>	142.a
<i>Cocinum Indica vrbs.</i>	15.a. 29.b. & inde. 44.a. 81.a. 155.a
<i>Cocus seu nux Indica.</i>	114.b
<i>Colanum Malabaræ vrbs.</i>	29.b. 37.a. 43.b
<i>Collegium Goanum. vide G oa.</i>	
<i>Columbum Ceilani oppidum.</i>	110.b. 266.a
<i>Columna Vasci vbi posita.</i>	18.b
<i>Columnæ cum inscriptione vbi poni solite à Lusitanis.</i>	5.b
<i>Comagene.</i>	14.b
<i>Communione &amp; confessionis vsus.</i>	154.a
<i>Comorini caput, seu promontorium. vide Cori.</i>	14.a
<i>Concanum littus occupant Lusitani.</i>	118.b
<i>Ab Idalcane recipitur.</i>	134.b
<i>Conceptionis Insula.</i>	30.b
<i>Concilium Florentinum, &amp; alia Concilia de principatu Romanæ Ec- clesiæ statuunt.</i>	277.a
<i>Congi regnum.</i>	6.a. & inde. 74.a. 81.b
<i>Conimbricensis academia.</i>	195.a
<i>Consalus Pereria Moluci præfectus.</i>	163.a. & inde.
<i>Consalus Sosa Legatus in Congum.</i>	6.b
<i>Consalus Sylueria Christi causa peremptus.</i>	282.a
<i>Constantinus Brigantiæ Ducis frater.</i>	283.a



# I N D E X.

<i>Conuiuiorum ratio apud Sinas.</i>	94.b
<i>Copaibæ plantæ Brasiliæ humorem balsamo similem Stillantes.</i>	26.b
<i>Cori promontorium hodie Comorini.</i>	14.a. & 20.b
<i>Cosmus Turrianus.</i>	234.a. 258.b. & 282.a
<i>Cotia animal Brasilicum.</i>	27.a
<i>Cotta vrbs Ceilani.</i>	265.a
<i>Couletes Calecuti emporium.</i>	138.b
<i>Cranganor vrbs Indiæ.</i>	31.a
<i>Cremantina Sange Regina.</i>	177.b
<i>Crux vincit.</i>	8.b. 10.b. & 11.a
<i>Crucis purpuree signum in cælo apparet.</i>	85.b
<i>Crucis veræ fragmentum ab Rege Abassie in Lusitaniam.</i>	81.b
<i>Crux sanguinem fere quotannis exsudat in India.</i>	214.b
<i>S. Crucis Insula ad bonæ spei promontorium.</i>	13.b
<i>S. Crucis Insula ad fauces Arabici sinus.</i>	86.a
<i>S. Crucis regio, nunc Brasilia.</i>	26.a
<i>Crucifixi Domini imago in Goæ ruinis inuenta.</i>	74.a
<i>Cuama fluius Africæ nobilissimus.</i>	116.b
<i>Curiatum Armuziæ oppidum.</i>	52.a

## D

<b>D</b> <i>Abulum vrbs Indiæ.</i>	63.a. 129.b
<i>Dairi summæ dignitatis nomen apud Iaponios.</i>	211.a
<i>Dalaca Insula Arabici maris.</i>	142.a
<i>Damanum Cambaiæ oppidum.</i>	142.a
<i>Daratus fluius.</i>	11.a
<i>David Abassie Rex.</i>	78.a
<i>Decimæ S. Thomæ Apostolo ab Sagamo Rege decreta.</i>	134.b
<i>Didacus Lupus Sequeria Malacam petit.</i>	67.a. & inde. Prætor
<i>Indiæ. 111.b. &amp; inde. 130.a</i>	
<i>Didacus Mesquita Catholicæ fidei causa in os hiantis bombardæ in-</i>	
<i>farcitur.</i>	153.a
<i>Didacus Pereria Xauerij studiosus.</i>	283.a
<i>Dionysius Rex Christi ordinem instituit.</i>	13.a
<i>In Diuinam potentiam referuntur Lusitanorum acta.</i>	154.b
<i>Dium vrbs.</i>	59.a. 86.a. 125.a. & inde. 129.a. & inde. 214.a
<i>&amp; 225.a</i>	

Dofar



# I N D E X.

Dofar oppidum Arabia.	142.a
Dominicani religioſi in Congum miſſi.	6.b
In Ialophos.	11.b
Goam.	238.b. 231.b
Dulcinda regnum Cambaia finitimum.	58.b

## E

Eccleſie Catholicae vnitas.	276.b
Auctoritas.	278.a
Antiſtitibus quantum tribuerit Franciſcus Xauerus.	199.a
Eduardus Luſitaniae Rex.	3.a
Eduardus Barbutus Signifer in Dienſi praelio.	228.b
Eduardus Acoſta Praetor Braſiliae.	273.a
Eduardus Coelius ad Regem Sionis legatus.	109.b
Bintani portum explorat.	145.a
Classem Panenſem delet.	145.b
Eduardus Mellus Alodinum ſuperat.	113.a
Eduardus Menefius Indiae Praetor.	132.b 137.b
Eduardi Pacieci acta.	37.b
Elana, ſeu Torus oppidum.	15.a
Eleonora Luſitaniae Regina.	6.b
Eleonora Salae miſerandum exitium.	268.b. 269.b. & 273.a
Elephantes religioſe culti.	21.a
Elephantis fanum e ſolido lapide.	258.b
Elizabetba Abaſſiae Regina.	189.b. & inde.
Emmanuel Bex Luſitaniae.	16.b. 26.a. 41.a. 44.a. 74.b. 87.a
Moritur.	133.b
Emmanuel Congi Regis patruus.	6.b
Emmanuelis Cernicij virtus militaris.	140.b
Emmanuel Nobrega in Braſiliam.	252.b
Eiuſdem ac Sociorum labores.	255.a. & inde. 271.a
Emmanuelis Paſſanij ab Genua oriundi Laudes.	46.a
Emmanuelis Soſe naufragium.	268.b. & 272.a
Episcopus Indiae primus.	172.a
Episcopus Amacani apud Cinas.	280.b
Erythrae fauces.	85.b
	Euan-



# I N D E X.

*Euangelij scripta è collo suspensa morbum depellunt.* 242.a  
*Exorcismus efficax.* 242.a

## F

**F** *Artaces Arabica gens.* 47.b 55.b  
*Faxiba tyrannus in Iapone.* 211.a  
*Fernandus Castellæ Rex limites navigationis cum Lusitano statuit.* 12.b  
*pag.*  
*Fernandi Aluari Capralij naufragium insigne.* 272.a  
*Fernandus Cotinius.* 65.b. & inde.  
*Fernandus Franciscanus primus Episcopus Indiæ.* 172.a  
*Fernandus Lemius ad Persarum Regem legatus.* 90.a  
*Fernandus Lupius historicus.* 154.b  
*Fernandus Magalianes.* 121.a  
*Eiusdem socij aliquot, orbem totum navigatione circumueunt.* 122.b  
*pag.*  
*Fernandus Sosa legatus in Aethiopiam.* 241.a. 278.b  
*Fernandus Turrianus Castellanos Dux in Molucis.* 151.a  
*Fernandus Vinagrius in Mauricis insulis multos ad Fidem conuer-*  
*tit.* 171.a  
*Fidei egregium specimen.* 80.a. 82.a  
*Fidei desertores acriter puniuntur.* 81.b  
*Firandum oppidum, & insula apud Iaponios.* 235.b  
*Florentinum Concilium.* 277.a  
*Fluenta promontorium.* 18.b  
*Fotoques primæ notæ numina apud Iaponios.* 209.b  
*Franciscani in Indiæ.* 25.b. 48.a. 129.b  
*Apud Pegusios.* 280.b  
*In Brasilia.* 252.b  
*Francisci Albuquerque acta.* 36.a. & inde.  
*Franciscus Almeida primus Indiæ Prætor.* 42.b. 62.a. & inde. 65.b  
*Francisci Almeidæ Scalabitani facinus militare.* 203.b  
*Franciscus Aluarus sacerdos obsequium Abassini Regis desert Ro-*  
*mano Pontifici.* 142.a  
*Franciscus Barretus Prætor Indiæ.* 272.b  
*Eiusdem acta.* ibid.  
*Fauet conuersioni.* 283.a  
Fran-



# I N D E X.

<i>Francisci Gramaxij factum egregium.</i>	114.a
<i>Franciscus Maldinarum princeps Olisipone perimitur.</i>	252.a
<i>Franciscus Pereria Ciauli praefectus.</i>	154.a
<i>Francisci Xauerij vita moresque.</i>	196.a. & inde.
<i>Miracula.</i>	259.b 233.a
<i>Primæ conciones.</i>	234.b
<i>Nauigat in Indiam.</i>	214.a
<i>In Iaponem.</i>	233.a & inde.
<i>In Sinas.</i>	260.b. & inde.
<i>Obitus.</i>	262.a
<i>Fullorum Rex Aethiops.</i>	12.b

## G

<b>G</b> <i>Alli aliquot in Indiam.</i>	178.b
<i>Gambia fluvius Africus.</i>	11.a
<i>Ganaria promontorium.</i>	4.a
<i>Ganges Indiae flumen.</i>	14.a
<i>Garzias Cotinius Armuziae obsidionem tolerat.</i>	131.a
<i>Garzias Henricus Ternatensis praefectus.</i>	149.b
<i>Garzias Noronia Indiae Praetor.</i>	231.a
<i>Garzias Sala Indiae Praetor.</i>	231.b
<i>Moritur.</i>	252.a
<i>Gaspars Berzei patria, studia, &amp; in Societatem ingressus.</i>	237.b
<i>Acta in itinere Indico.</i>	241.a
<i>Goa.</i>	238.b
<i>Armuziae.</i>	232.b & inde.
<i>Miracula.</i>	242.a
<i>Obitus.</i>	264.a
<i>Gatis iuga.</i>	20.b
<i>Gedrosii populi.</i>	58.b
<i>Geiloli regnum.</i>	160.a. & 169.b
<i>Geinal tyrannus. vide Pacenum.</i>	120.a
<i>Genne urbs.</i>	4.a
<i>S. Georgij insula.</i>	18.b. & 19.b
<i>Georgius Botellius Linguae dynastam superat.</i>	87.b
<i>Georgius Capralis Indiae Praetor.</i>	252.b. & 257.a
<i>Georgius Castrinus Moluci praefectus.</i>	188.a
<i>Geor.</i>	



# I N D E X.

Georgius Menesius item.	150.b
Georgius Vaseus operatur in Congi regno.	256.a
Gidda vrbs.	103.b
Goa vrbs.	14.a
Bis à Lusitanis capta.	70.a
Obsidetur ab Idalcane.	79.b. & 108.a
Goanum D Pauli Collegium.	193.b. & 282.a
Goga Cambaie oppidum.	176.a
Gomezii Sequerie insula.	142.a
Gradaamedes Adelis tyrannus.	189.a. & inde.
Guadalaiarra Castellanus in India Centurio.	49.a
Guardafu promontorium, olim Aromata.	13.b
Guinea regio.	4.a
Guzarates Cambaie populi.	58.a
Gymnosophiste.	21.a

## H

<b>H</b> Ali Diensis bis à Lusitanis victus.	154.a. & 156.b
Hamedes Armuzie dynasta interemptus.	90.a
Hebraei Rabbini.	282.a
Hectoris Syluerie res geste.	142.a. 156.b. & 158.a
S. Helena insula.	31.a
Helena Abassie Regina.	8.b
Henricus navigationis Indicæ primus scrutator & auctor.	4.a
Henricus Cardinalis Lusitanie.	231.a
Henricus Congi Regis filius Romam.	81.b
Henricus Franciscanus in Indiam.	25.b. & 29.b
Henricus Menesius Indie Prætor.	137.b
Hesperij Aethiopes.	13.b
Hesperides insula.	13.a
Hieronymiani monachi ab Emmanuele Rege culti.	25.a
Hocenus cum Aegyptia classe in Indiam.	58.a. & inde.
Hoxiones idolorum sacrifici apud Sinas.	99.b
Hudia Sionis regni caput.	109.b

## I

<b>S. I</b> acobus Apostolus Christianis opitulatur.	74.a. 128.b
Iacobus Bermudius cum alijs Dominicanis in Indiam.	231.b



# I N D E X.

<i>Iacobus Botellius modica biremi ex India in Lusitaniam.</i>	176.b
<i>Iacobus Canus Africae littora aperit.</i>	5.b
<i>Iacobus Congi Rex.</i>	256.a
<i>Iacobi Lactei in Diensi obsidione facinus.</i>	218.b. & 219.b
<i>Iafanapatani tyrannus in Manarensē ecclesiam seuit.</i>	201.a
<i>Iaponij populi, &amp; eorum mores.</i>	205.b. & inde.
<i>Prima conuersio.</i>	232.a
<i>Iauæ insulae descriptio.</i>	82.a. 171.a
<i>Iazius dynasta Diensis.</i>	58.b
<i>Iethyophagi populi.</i>	13.b
<i>Idalcan Mahometanus dynasta.</i>	70.a. 107.a. & 118.b
<i>Ignatius Loiola Societatem Iesu instituit.</i>	195.a
<i>Eiusdem epistola ad Abassiae Regem.</i>	275.a
<i>Obitus.</i>	282.b
<i>Ille colonia Lusitanorum in Brasilia.</i>	210.a
<i>India.</i>	14.a
<i>Indorum mores.</i>	20.b. & inde.
<i>Indus fluuius.</i>	14.a
<i>Institutores ac nauarchi Lusitani ethnicos ex occasione baptizant.</i>	282.b
<i>pag.</i>	2.b
<i>Ioannes Primus Lusitaniae Rex.</i>	6.a. & inde.
<i>Ioannes Secundus.</i>	43.b. 134.a
<i>Ioannes Tertius Rex Lusitaniae.</i>	ibid. 194.b. 274.b. & 283.a
<i>Eius laudes.</i>	186.b. 199.a
<i>Ioannes Albuquercius Goanus Episcopus.</i>	280.b
<i>Mors.</i>	114.a
<i>Ioannis Almeidae Quintelani facinus.</i>	14.a. 123.a
<i>Ioannes Barrius historicus.</i>	211.a. & inde.
<i>Ioannes Castrius Indiae Praetor.</i>	243.a
<i>Ioannes Coloniensis pro confessione Catholicae Fidei occisus.</i>	3.b
<i>Ioannes Consaluus.</i>	71.b. & 79.b
<i>Ioannes Machiadus exsul.</i>	74.b
<i>Ioannes Marianus cum alijs caeruleis fratribus in Congum.</i>	215.b. & inde.
<i>Ioannes Mascarenias Diensis praefectus.</i>	231.a
<i>Praetor Indiae declaratur absens.</i>	280.b. &
<i>Ioannes Nonnius Barretus Aethiopiae Patriarcha.</i>	283.b.



# I N D E X.

<i>Ioannis Nouæ iter in Indiam.</i>	30.b
<i>Ioannis Petreij in Cruce extollenda præclarum facinus.</i>	185.b
<i>Iogues in India.</i>	21.a
<i>Quinsdam admiranda conuersio.</i>	246.b. 247.a
<i>Iosephus medicus, &amp; mathematicus.</i>	5.a
<i>Ismael Rex Persarum.</i>	52.a. 55.b. 90.a. 188.b
<i>Isufus Sofalæ præfectus.</i>	44.a
<i>Occiditur à Lusitanis.</i>	44.b
<i>Itamaraca colonia Lusitanorum in Brasilia.</i>	252.b
<i>Itinera P. Francisci Xauerij Lutetiani.</i>	195.a
<i>Olisiponem.</i>	196.a
<i>In Indiam.</i>	197.b
<i>In Piscariam oram.</i>	199.b. 232.b
<i>In Trauaneoris regnum.</i>	200.b
<i>In Sinas.</i>	260.b
<i>Cocinum.</i>	234.b. 260.a
<i>Malacam.</i>	234.b. 259.b.
<i>In Amboinum.</i>	213.b
<i>Ternatem.</i>	ibid.
<i>In Mauricas insulas.</i>	ibid.
<i>In Iaponis vrbes Cangoximam.</i>	234.b
<i>Firandum.</i>	235.b
<i>Amangutium.</i>	ibid.
<i>Meacum.</i>	236.a
<i>Sanctianum Sinarum.</i>	259.a
<i>Iudæi. vide Hebræi.</i>	282.a
<i>Iulius Secundus Pont. Max.</i>	86.b
<i>Iuncus onerariæ nauis genus.</i>	69.a

## L

<b>L</b> <i>Acerati in Oriente ad crocodilorum effigiem.</i>	30.a
<i>Lanciara nauis genus.</i>	145.b
<i>Lara Carmanie vrbs.</i>	57.a
<i>S. Laurentij insulæ situs.</i>	13.b
<i>Laurentij Almeidæ bellicæ res gestæ.</i>	43.b. & 50.b
<i>Miserabilis exitus.</i>	61.b
<i>Lauren-</i>	



# I N D E X.

<i>Laurentij Marchesii flumen.</i>	1269.b
<i>Leana Africa mons.</i>	3.b
<i>Lecni Decimo Pont. Max. Indicae deferuntur primitiae.</i>	86.b
<i>Lingua Iaponica ubertate praefertur linguae Latinae.</i>	207.a
<i>Linguae Rex.</i>	87.b
<i>Longum oppidum.</i>	153.a
<i>Loytie Sinarum iuris periti.</i>	153.a. & inde.
<i>Lucopinae insula.</i>	83.b
<i>Ludouicus Romanus Patritius in India.</i>	45.b
<i>Lupus Soarius Aluarenga Prator Indiae.</i>	190.b. & 196.a
<i>Lupus Vaseus à S. Pelagio de Pratura contendit.</i>	143.a. 144.b
<i>Eiusdem acta.</i>	153.a
<i>Lusitanae navigationis limites.</i>	13.a
<i>Vetus eorum parcimonia.</i>	65.a
<i>Nomen.</i>	12.b. 112.a
<i>Pugnandi genus.</i>	127.b
<i>Leges.</i>	162.b
<i>Lutherianae haeresis quiddam simile apud Iaponios.</i>	209.b

## M

<b>M</b> <i>Acazar insula.</i>	171.a. & inde. 201.a
<i>Macis aromatum genus in Banda insula.</i>	83.a
<i>Madaba vrbs regia Cambaiae.</i>	125.a
<i>Madagascar, nunc S. Laurentij insula.</i>	13.b 47.a
<i>Maddena gens.</i>	15.a
<i>Madrafaba locus prope Dium.</i>	129.a
<i>Madrafaxaus Cambaiae Rex.</i>	59.a
<i>Madremalucus pueri Regis tutor.</i>	182.b
<i>Magadaxus, vrbs Saracenorum.</i>	24.a
<i>Magi. vide Venefici.</i>	
<i>Mahometanorum in Christianos odium.</i>	19.a. 23.a. & 41.b
<i>Idem quando primum in Indiam.</i>	67.a
<i>Mahometes Anconinus Quiloae Rex.</i>	43.a
<i>Cesús.</i>	116.a
<i>Malabarís Indicae regionis situs.</i>	20.b
<i>Celi variatio.</i>	ibid.



# I N D E X.

<i>Incolarum ingenia.</i>	<i>ibid.</i>
<i>Malaca vrbs.</i>	14.a. 82.a
<i>Maldinarum insularum descriptio.</i>	114.b
<i>Mamudius Cambaia Rex.</i>	59.a
<i>Mamudius alter Cambaia Rex.</i>	214.b
<i>Mamudius Malaca Rex.</i>	67.b. 77.b
<i>Mamudius Armuzia Rex.</i>	132.b
<i>Manar insula.</i>	193.b
<i>Incolae propter fidem Christi vexantur.</i>	200.b
<i>Mandingae dynastiae societas cum Lusitanis.</i>	12.a
<i>Mandioca farina Brasilica.</i>	28.a
<i>Mandoa regio.</i>	58.b
<i>Mangalor oppidum orae Narsinganae.</i>	159.a
<i>Mangalor oppidum Cambaiae.</i>	176.b
<i>Mantelum Amboini oppidum.</i>	171.a
<i>Mariae Virginis noua templa.</i>	25.a. 46.a. 48.a. 79.a. 85.b.
117.a. &c.	
<i>Miracula.</i>	49.b. 279.a
<i>Martinus Quintus Pont. Max.</i>	4.a
<i>Martini Ignatii Castellanorum Ducis mors.</i>	150.b
<i>Martinus Alphonsus Carualialis Persam in bello adiunat.</i>	188.b
<i>Martinus Alphonsus Sosa praefectus Indici maris.</i>	177.b
<i>Indiae praetor.</i>	198.a
<i>Eius laudes.</i>	205.a
<i>Martinus Bohemus de maritimi astrolabij inuentoribus vnus.</i>	5.a
<i>Martinus Villanouanus Comes.</i>	87.a
<i>Martyrium Antonij Criminalis.</i>	248.b
<i>Carigiorum.</i>	274.a
<i>Consalui Sylueriae.</i>	282.a
<i>Ioannis Coloniensis.</i>	243.a
<i>Ioannis Petreij.</i>	185.b
<i>Ioannis Sose.</i>	274.b
<i>Manarensium.</i>	201.a
<i>Petri Correg.</i>	274.b
<i>Rotherici Boti.</i>	127.a
<i>Mascatum oppidum.</i>	52.a
<i>Materia insula.</i>	4.a
	<i>Mat-</i>



# I N D E X.

<i>Mattheus Armenius Abassini Regis Legatus in Lusitaniam.</i>	81.b
87.a. 117.b	
<i>Maurice insule in Molucis.</i>	84.a
<i>Vide Tolum.</i>	
<i>Mazue insule descriptio.</i>	117.a
<i>Meacum vrbs Iaponis.</i>	236.a
<i>Mealis exsul is conatus irriti.</i>	204.a. & 272.b
<i>Huius filia conuertitur.</i>	282.b
<i>Mecana Mahometanorum nauigatio.</i>	159.a
<i>Mehum insula.</i>	86.a
<i>Melchior Carnerius Episcopus Patriarche successor.</i>	275.a.
& 280.b	
<i>Meliapor Indie vrbs, hodie S. Thomæ Colonia.</i>	135.a
<i>Melicus Iazius. Vide Iazius.</i>	
<i>Melinde oppidum.</i>	15.a. 20.a. 24.a. & 155.a
<i>Mesquitæ Perestellij naufragium.</i>	272.b
<i>Michael Vaseus Indie Vicarius generalis.</i>	193.b
<i>De Christiana re benemeritus.</i>	212.a
<i>Mindanaum insula.</i>	171.b
<i>Miracula quedam.</i>	86.a. 232.b. 279.a. 242.a
<i>Anathematis.</i>	86.a
<i>Aquæ lustralis.</i>	264.b
<i>S. Crucis.</i>	85.b. 214.a
<i>Tormentororum.</i>	229.a
<i>Visionum.</i>	264.b. 247.a
<i>Item.</i>	264.b
<i>Miramudius Mogorum Rex.</i>	178.a
<i>Misæ sacrificium sanat egrotos.</i>	242.a
<i>Mogorum Rex.</i>	178.a
<i>Molucarum insularum situs, &amp; descriptio.</i>	84.a
<i>In Christiana Fide progressus.</i>	187.b. & 283.a
<i>Momoiani dynastæ neophyti facinus.</i>	165.b
<i>Monaianum Armuziæ castellum.</i>	241.a. & inde.
<i>Moscum odoramenti genus.</i>	92.a
<i>Motiones Indicæ quid, &amp; vnde dictæ.</i>	47.a
<i>Mulieris cuiusdam egregia fortitudo.</i>	185.b
<i>Mures, &amp; putria animalia in vsum cibi.</i>	72.a
	Mures



# I N D E X.

*Mures à Christianorum prædijs mirabiliter fugati in agros ethnico-  
rum.* 258.a

## N

<b>N</b> Abandes <i>Armuzie</i> oppidum.	62.a
Nabu <i>Abassie</i> Rex.	81.b
Narsinganus Rex.	73.a
Natale littus.	272.a
Naubeadora <i>Cocinensis</i> Rex.	43.b
Naubedarinus <i>Calecuti</i> Rex.	86.b
Nat. fragia horrenda.	268.b. & 279.b
Nauigationis <i>Indicæ</i> difficultas.	197.b
<i>Iaponicæ.</i>	232.b
Nautæi populi.	58.b
Ninachetus ethnicus.	87.b
<i>In ignem se conijcit.</i>	88.b
Nonij <i>Acunæ</i> acta ante præturam.	50.b
<i>In Prætura.</i>	155.a. & inde. 175.b. 181.a
Mors.	187.a
Nubunanga <i>Iaponius</i> tyrannus.	211.a
Nucinele <i>Amboini</i> oppidum.	171.a
Numidarum equitum laus.	11.b
Nux <i>myristica</i> in <i>Molucis</i> .	83.a

## O

<b>O</b> Iensis dynasta.	47.a
<i>Olle incendiariæ</i> descriptio.	140.b
Onoris regnum.	69.b
Orfacanum <i>Armuzie</i> oppidum.	53.a

## P

<b>P</b> Aca animal <i>Brasiliicum</i> .	27.a
Pacenus Rex.	120.a
Palma <i>Indicæ</i> descriptio.	114.b. & inde.
Panane	



# I N D E X.

Panane Calecutanum oppidum captum, & incensum.	50.b
Panensium regulus.	76.a. & inde.
Papuarum reguli.	166.b
Parabramma idolum.	21.a
Parauæ populi ad Fidem conuersi.	194.a. & inde. 267.b
Pardaus nummus.	139.b
Paschalius, & duo alij è Societate Iesu fame pereunt.	279.b
Passanij nobiles, ab Genua vrbe oriundi.	46.a
Patalena regio.	59.a
Patangatini Parauani.	194.a
Pate, & Patane emporia capta, & direpta.	176.b
Patriarcha Aethiopiæ	275.a. Vide Ioan. Nonn. Barretus.
Paulus Tertius Pont. Max.	195.a
Paulus Iaponius. vide Angerus.	232.b
Pedirensis in Somatra regulus.	67.b. 75.b. & 135.b
Pegusiorum regio.	280.b
Peribecus Turcicæ classis præfectus.	266.b. & inde.
Pernambucum Brasiliensis colonia.	252.b
Persarum Rex.	51.b. vide Ismael.
Peruana prouincia.	26.a
Petrus Aluarus Capralis in Indiam.	25.b
Petrus Mascarenias Goæ vrbis præfectus.	85.a
Malacæ.	143.a. 144.b. & inde.
De magistratu disceptat.	147.b. & inde.
Petrus Mascarenias orator in vrbe Roma.	195.a. & inde.
Prætor Indiæ rei Christianæ studiosus.	272.b
Petrus Nonnius insignis Mathematicus.	231.a
Petrus Vaseus Ialophi regem occidit.	12.a
Philippus Rex Catholicus.	95.a. 258.b
Philoteræ portus Arabici maris.	189.a
Pigritia animal Brasiliæ.	27.a
Piper oblongum.	67.a
Piratininga pagus in Brasilia.	273.a
Piscarium litrus.	193.b
Piscandi genus apud Sinas.	96.b
Planæ insulæ.	18.a
Ponda Vicus maritimus.	96.b
Porca	



# I N D E X.

Porca oppidum.	153.b
Portus Securus in Brasilia.	26.a
Prætoris in India substituendi ratio.	137.b. & 149.b
Præsi insula.	18.b
Præsum promontorium.	13.b
Primæ, insula.	29.a
Prophetia S. Thomæ Apostoli.	32.a
Francisci Xaverij.	197.a. & inde.
Gasparris Berzæi.	242. & inde.
Ptolemais ferarum.	117.a
Pudicitie exemplum.	271.b
Pueri Malabares inter supplicia Christum profitentur.	267.b
Punicale oppidum.	267.b. & inde.
Puteolana, vel potius porcellana vasa.	92.a

## Q

Q <sup>ueixomes</sup> insula.	132.a
Querimba insula.	132.b
Quintirius Malacensis.	82.a

## R

R <sup>aciolum</sup> arx.	172.b
Ramanacoris Vada.	193.b
Rainelum Cambaie oppidum.	158.a
Regum flumen.	18.b
Reixelum oppidum.	188.b
Reliquie Sanctorum sedant tempestatem.	263.a
Repelini vada.	35.a
Resbuti populi.	177.b
Rhabarbarum apud Sinas.	92.a
Rhotericus medicus, & mathematicus.	5.a
Rhotericus Dominicanus in vrbe Colano.	37.a
Rhotericus Botus in regno Armuzia.	129.a
Christi causa occisus.	130.b
Rhotericus Lima ad Abassinum Regem Legatus.	118.a. & 142.a
Rosal.	



# I N D E X.

Rosalgates promontorium.	51.b
Roztoma canes Goam oppugnat.	81.a
Rubrum mare.	58.b
Rucatellani Molucenses populi.	83.b
Rumecan Sofarijs filius.	222.a. & 229.a
Rumepolis oppidum.	59.a
Arx.	185.b
Rumes unde dicti.	59.a

## S

S Abaius Idalcanis genitor.	45.b. 69.b
Saca Diensis dynasta.	126.b
Saccarum Brasilicum.	26.b
Sagamus Rex vectigalia S. Thomæ Apostolo attribuit.	134.b
Sagum cibi & potus genus.	84.b
Salsetæ insulæ ad Bazainum.	178.a
Salsetani & Bardesiani agri.	172.a
Salutandi ritus apud Sinas.	94.b
Samibeleganus apud Pegusios quid.	112.b
Sanctianum insula Sinarum.	259.a
Sancti Spiritus flumen.	270.b
Sandalum album.	67.a
Sangæ Regnum.	178.a
Saracenorum in Christianos odium.	110.b. Vide Mahome-
tani.	
Selymus Turca Campsonis imperium delet.	104.b. & 106.b
Senex trecentos trigintaquinque natus annos.	182.a
Siacanus dynasta.	88.b
Siagrum promontorium.	52.a
Siani Rex in Macazaribus baptizatur.	203.a
Signa ad Fidei confirmationem.	264.b. Vide Miracula.
Siliganum oppidum.	171.b
Simia in veneratione apud Indos.	21.a
Sinarum mores.	92.b. & inde.
Commercium cum Lusitanis.	259.b. 102.b
Sionis regnum fœdere cum Lusitanis iunctum.	67.b. 79.a. 109.b
d	Siria-



# I N D E X.

<i>Siriagrum insula.</i>	166.a
<i>Societatis Iesu origo.</i>	195.a
<i>Progressus in Lusitaniam.</i>	199.b. 245.a
<i>Malacam.</i>	213.b
<i>In Molucas.</i>	ibid.
<i>In Iaponem.</i>	258.b
<i>In Sinas.</i>	ibid.
<i>Armuziam.</i>	266.b
<i>In Aethiopiam.</i>	275.a
<i>In Brasiliam.</i>	252.b
<i>In Congum.</i>	256.a
<i>Eiusdem labores.</i>	278. & inde. 263.b
<i>Socotora insula.</i>	31.b. 57.b. & inde. 47.a. 75.b
<i>Sofala aurifodinis prænobilis.</i>	15.a
<i>Arcem ibi Lusitani exstruunt.</i>	44.a. & b
<i>Sofar ab Aegypto in Indiam.</i>	159.a
<i>Dium obsidet.</i>	179.a. 217.b
<i>Interficitur.</i>	222.a
<i>Solimanus Turca classes in Indiam mittit.</i>	179.a. 183.a. &
266.a.	
<i>Solimanus Aegyptiæ classis præfectus in Indiam.</i>	104.b
<i>Solimanus alter.</i>	172.b
<i>Solimanus Sofale Rex.</i>	145.a
<i>Solimanus Peloponnesius in Indiam.</i>	183.a. & inde.
<i>Soloris Rex baptizatur.</i>	283.a
<i>Somni parcimonia.</i>	198.b
<i>Sophus Persarum Rex.</i>	51.b. 178.a. vide Ismael.
<i>Stachiris fluuius.</i>	11.a
<i>Stephanus Gamma.</i>	177.b
<i>Indiæ Prætor.</i>	188.a. & inde.
<i>Suaquenum vrbs.</i>	189.a
<i>Subi insule dynasta.</i>	122.a
<i>Successionum in India ratio.</i>	137.b
<i>Suilla caro Sinis valde expetita.</i>	94.b
<i>Sunda oppidum.</i>	147.a
<i>Supæ Rex baptizatur.</i>	202.b
<i>Surratum Cambaie oppidum.</i>	158.a
	Taba-



# I N D E X.

## T

<b>T</b> <i>Abaria Ternatis Rex.</i>	165.a
<i>Tabonæ præses molossis nudus obijcitur.</i>	162.b
<i>Tamendoa animal in Brasilia.</i>	27.b
<i>Tanaba oppidum.</i>	156.b. 176.a
<i>Tanoris Rex.</i>	47.a
<i>Baptizatur.</i>	249.a
<i>Tatus animal.</i>	27.a
<i>Tempestas fœda.</i>	28.b
<i>Tensa Iaponiorum.</i>	211.a
<i>Ternate recepti Lusitani.</i>	84.a
<i>Arcem ædificant.</i>	133.a
<i>Varij Lusitanicæ rei successus.</i>	137.a
<i>Terrada nauigij genus.</i>	160.a
<i>Tertiæ insulæ.</i>	24.b
<i>S. Thomæ Apostoli peregrinatio Indica.</i>	31.b
<i>Templum ab eo conditum.</i>	134.b
<i>Martyrium &amp; Sepulchrum.</i>	32.b. 134.b. 214.a
<i>Eidem à Constantino Prætorè templum exstruitur.</i>	134.b
<i>Corporis translatio.</i>	ibid.
<i>In Lusitanorum prælijs quando primum innocatus.</i>	230.a
<i>Thomas Persarum Rex.</i>	244.b
<i>Thomas Petreius Legatus ad Regem Sinarum.</i>	91.a. & 103.a
<i>Thomas Sosa Primus in Brasiliam Prætor.</i>	252.b
<i>Tidoris Rex qualis erga Lusitanos.</i>	83.b
<i>Timoia ethnicus Lusitanorum studiosus.</i>	69.b
<i>Tolum oppidum.</i>	257.a
<i>Tormentariæ fabricæ artificium.</i>	19.a
<i>Barbaris proditur.</i>	34.b
<i>Torum vrbs.</i>	15.a
<i>Torus Armuziæ Rex.</i>	89.b
<i>Eius furor.</i>	132.a
<i>Trauancoris regio.</i>	200.b
<i>Tremelanum delubrum.</i>	203.b
<i>Trichinamalius princeps baptizatur.</i>	252.a
<i>Triglypton regni Peguensis quondam caput.</i>	283.a
d. 2	Tri-



# I N D E X.

<i>Trimumpara Cocini Rex.</i>	35.b. 43.b
<i>Tristanus Acunia in Indiam.</i>	46.b
<i>Legatus ad Summum Pontificem.</i>	86.b
<i>Tristanus Ataidius Ternatensis præfectus.</i>	165.b
<i>Tristanus Vaseus.</i>	3.b
<i>Tristani Vasei Vega facinus egregium.</i>	131.a
<i>Tuacaliquor.</i>	84.b
<i>Tupinaquini gens in Brasilia interiori.</i>	274.a
<i>Turcarum tyrannus classes in Indiam mittit.</i>	266.a

## V

<b>V</b> <i>aidua antistes Mahumetanorum.</i>	162.a
<i>Vaipinum Sacra apud ethnicos insula.</i>	36.a
<i>Valetudinaria.</i>	81.b. 198.b. 203.a. & 240.a
<i>Variuenes Cambaia pagus.</i>	179.b
<i>Vasci columna.</i>	18.b
<i>Vascus Gamma Indiam patefacit.</i>	20.a
<i>Iterum in Indiam.</i>	31.a
<i>Tertio in Indiam Prætor.</i>	137.b
<i>Venefici apud Brasiliis.</i>	256.a. & 258.b
<i>Verberati insula.</i>	19.a
<i>Vespertiliones ingentes.</i>	30.b
<i>Vgentana vrbs, &amp; regnum.</i>	177.b
<i>Victoriæ insignes Lusitanorum.</i>	
<i>De Calecutanis ad Repelini Vada.</i>	39.a
<i>Alibi.</i>	45.b. 52.a. & 140.b
<i>De Turcis ad Diu.</i>	266.a. & inde.
<i>De Aegyptijs.</i>	149.b
<i>Cananorensibus.</i>	50.b
<i>Malacensibus.</i>	78.a
<i>Ceilanijs.</i>	123.b
<i>Iauis.</i>	82.a
<i>Goanis.</i>	72.a. & 74.a
<i>Dabulensibus.</i>	63.b
<i>Armuzianis.</i>	57.a. & 131.b
<i>Cambaianis.</i>	228.b
	S. Vin.



# I N D E X.

<i>S. Vincentij Colonia.</i>	274.a
<i>Vincentius Franciscanus.</i>	186.b
<i>Vincentius Sodreus nauarchus.</i>	33.b
<i>Naufragio perit.</i>	35.a
<i>Visapor Idalcantis vrbs.</i>	205.a
<i>Visionis monasterium in Abassia regno.</i>	117.a
<i>Visa miranda, &amp; efficacia.</i>	241.a. 247.a. & 260.a
<i>Vnctio Sacri olei.</i>	90.b
<i>Vocationes Dei aliquot.</i>	250.a
<i>Vtimutis Raia Malacensis.</i>	68.a
<i>Securi percutitur.</i>	79.b

## X

<b>X</b> <i>Aca Iaponiorum idolum.</i>	68.a
<i>Xeques apud Arabas, Prætor.</i>	18.b
<i>Xiphias piscis.</i>	112.a
<i>Xoar Armuzianæ diti onis vrbs</i>	53.a

## Z

<b>Z</b> <i>Abucales arbor.</i>	26.b
<i>Zala Mahometanorum adoratio.</i>	61.b
<i>Zamafum oppidum.</i>	161.a
<i>Zamorini senioris conatus in Lusitanos.</i>	35.b. & 45.a
<i>Zamorini iunioris.</i>	86.a. 139.a
<i>Zanzibar insula.</i>	37.a
<i>Zeifadinus Armuziæ Rex.</i>	51.b
<i>Zeila emporium.</i>	106.b. 189.b
<i>Zebitanus præfectus.</i>	191.b
<i>Zufolarinus.</i> 108.a. 172.a. <i>Vide Azedecan.</i>	

Indicis in Historias Finis.





# EPISTOLARVM INDEX.

<i>Ariae Sanctij.</i>	45
<i>Balthasaris Gagi.</i>	55
<i>Cangoximanorum Regio.</i>	52. & 53
<i>Consalui Fernandi.</i>	31
<i>Cosmi Turriani.</i>	17
<i>Eduardi Syluij.</i>	12
<i>Francisci Xauerij.</i>	3. 5. 8
<i>Francisci Petreij.</i>	72
<i>Francisci Capralis.</i>	105
<i>Francisci Henrici.</i>	122
<i>Gasparis Vilela.</i>	18. 26. 40. 53. 59
<i>Io. Baptistæ Montani Ferrariensis.</i>	66. 67
<i>Ioannis Fernandi.</i>	11. 27. 72
<i>Laurentij Iaponij.</i>	28
<i>Ludouici Almeida.</i>	32. 47. 64. 73. 77
<i>Ludouici Froij.</i>	61. 68. 88. 93. 95. 97. 108
<i>Melchioris Nonnij.</i>	24
<i>Organtini Brixienfis.</i>	100
<i>Pauli Iaponij.</i>	11
<i>Petri Diazij.</i>	120
<i>Regis Cangoximani.</i>	52
<i>Societatis Iesu de Consalui Sylueriæ obitu.</i>	26
<i>Taquæ Regis Firandi.</i>	17



# IN EASDEM INDEX RERV MEMORABILIVM.

 <i>Cenorum classis.</i>	58.a
<i>Aedes elegantissima.</i>	82.b. 96.a
<i>Aegrotus pia prece sanatur.</i>	31.a
<i>Agni caelestis cereas imagines, &amp; alia id genus quantopere expetant Iaponij Christiani.</i>	68.b
<i>Ainan insula, &amp; gentis mores.</i>	57.b
<i>Aloysi Lusitanica classis praefecti caedes.</i>	123.a
<i>Amagusa acta per Franciscum Capralem &amp; socios.</i>	105.b
<i>Amangutij conuersiones insignes.</i>	12.b
<i>Vrbs vastatur.</i>	21.b
<i>Amida, &amp; Xaca Iaponiorum Dij.</i>	22.b. 88.b. 89.a. 94.a. 105. a. 97.a
<i>Andreae Fernandi Christiana fortitudo.</i>	102.a
<i>Ancillae Iaponiae Christianae martyrium.</i>	32.a
<i>Antonius Caiadus Lusitanus.</i>	38.a
<i>Eius officia in Consaluum Syluerium.</i>	40.a
<i>Antonius Dionysius à Mahometanis capitur.</i>	104.b
<i>Aqua salita saucijs remedium ubi.</i>	90.a
<i>Aquita vrbs.</i>	90.a
<i>Aquae lustralis, seu benedictae miracula.</i>	31.a. 70.a
<i>Aria Sanctij acta.</i>	87.a
<i>Arx munitissima Hexandoui proceris.</i>	49.a
B	
 <i>Althasaris Gagires gesta.</i>	18.b
<i>Eiusdem nauigatio, &amp; pericula.</i>	55.b
<i>Capitur à Mahometanis.</i>	104.a
<i>Sclopus in eum intentus flammam non concipit.</i>	ibid.
<i>Baptismatis miracula.</i>	3.b. 48.a
<i>Barptolomæi Regis laudes.</i>	62.a
<i>Conuersio ad Christum.</i>	63.a
<i>Epulum insigne.</i>	62.a
<i>Victoria de coniuratis.</i>	ibid.
	Baptis-



# I N D E X.

Baptismus.	63.a
In militum catechismo sedulitas, in bello insignia.	ibid.
In Cosmum Turrianum-reuerentia.	77.b
Christiana humilitas.	87.a
Victoriæ Crucis beneficio partæ.	77.b
Bibliotheca versatilis.	96.b
Bonzû, seu Iaponiorum sacerdotes.	10.a
Eorum calumniæ & odia in Christi famulos.	21.b. 26.b
Ritus & leges.	88.b
Impostura.	89.a. 80.b
Sagina & vindemiæ.	91.b
Cænobia.	96.a
Conuersiones ad Christum.	12.b. & 29.b
Bouum specie demon à Iaponijs colitur.	4.a
Brachmanarum in Christi seruos humanitas.	102.b. 103.b
Bungi Rex Christianam rem enixe adiuuat.	86.a. 23.a. 67.a. 75.a
Eiusdem ad Lusitaniæ Regem munera.	60.a
Bungensium Neophytorum in fide constantia.	27.a
Bungensium Ecclesia omnium in Iapone maxima.	33.a
Bungensium illustre pietatis exemplum.	33.a
In Bungo res patrum gestæ.	14.a. 103.b
C	
Acubau impostor apud Iaponios.	54.b
Cæremonia Ecclesiasticæ quam efficaces.	46.a. & 69.b
Cangoximæ acta per Almeïdam.	49.b
Cangoximani Regis de patribus iudicium.	52.b
Candidus & Cinereus color funesti.	90.a
Canon Amide filius, & eorum effigies.	94.a
Catechismi utilitates.	5.a
Cegandonus Barptolemæi Regis pater.	62.b. & 74.b
Chia pulueris vsus in potu Iaponiorum.	80.b
Christiani facti in ditione Barptolemæi Regis.	105.b
Christianorum in patribus tuendis ardor.	31.b. & 32.a
In pauperes benignitas.	54.b
Insigne pietatis exemplum.	61.b
De Malabaribus victoriæ.	103.b
Fuga miserabilis ab exusta Vocoxiura.	74.a. & b
	Chri-



# I N D E X.

Christiani cuiusdam peccandi ratio.	78.b
Christianorum quinque millia facta Imori.	73.a
Cochinoci acta per Balthasarem Lupium.	105.b
Coia frequens Bonziorum Cenobij locus.	89.a
Combendaxis insignis impostor.	89.b
Concionatoris Christiani partes, & cautiones.	7.a
Conciones Bonziorum.	92.a. 97.a. & b
Confessarij partes, & cautiones.	6.a
Confessionis, & communionis quam frequens vsus apud Iaponios Christianos.	3.b
Coniuratio in Barptolemaum Regem.	62.b
In Cubum Meacensem.	98.a
Constantini Catechiste Iaponij laudes.	117.a
Consuetudinis quotidianæ præcepta.	8.a
Consalui Sylueriæ expeditio.	37.b
Nex propter Christum.	40.a
Corniculum quibusnam hominibus è capite extuberat.	89.a
Cosmi Turriani in vrbe Amangutio acta.	11.b. 25.a. 46.b. 51.b.
61.a. 74.a. 76.a. & 77.b	
Crucis admirande virtutes.	4.a. 26.b. & 31.b
Cubi Meacensis ædes elegantissima.	96.a
Horti cultissimi.	ibid.
Cædes à coniuratis.	99.a

## D

<b>D</b> æmonum impostura apud Iaponios.	22.b. 89.a
Horribili figura pinguntur.	94.a
Daiondonus cum Mioxindono in Cubum conspirat.	98.a
Damiani Iaponij laudes.	51.a
Darij Tacaiamæ Fidani acta.	108.a
Didacus Andradius vna cum Ignatio Azebedio interficitur.	121.a

## E

<b>E</b> duardi Syluij laudes.	76.a
Epistolæ Meacensium neophytorum ad Bungenfes.	32.b
Examen conscientia quam accuratè exercendum.	5.b
Exorcismi virtus.	15.b

## F

<b>F</b> acata vrbs, & res in ea gesta.	23.a. & 107.b
Facatensium neophytorum pietas.	27.b



# I N D E X.

Duo sanati diuinitus.	34.a
Facatensis præfectus patrum immunitati cauet.	23.a
Urbs incenditur.	51.b.
Facusangis Academia nobilis vastatur à Nubunanga.	118.b
Fixandi patrum acta, & labores.	20.b
Christianorum ardor.	ibid.
Francisci Xauerij labores, & patientia.	4.a.26.a
Animi magnitudo.	ibid.
Flagelli, & libelli neophytis ab eo relictæ admiranda efficacitas.	49.a
Eiusdem præceptiones de vinea domini excolenda.	5.a
In Iaponem appulsus & itineris pericula.	8.a
A Rege Xixumano honorifice excipitur.	10.a
Frenoiama cenobiorum euersio.	113.b
Funaij res gestæ.	17.b
Fundi acta.	106.b
Fundanus dynasta.	107.a
Funera Meacensium.	90.a
Funus primum Christiano ritu peractum.	16.a
G	
Gaspas Vilela Cosmo Turriano Comes adiungitur.	18.b
Eiusdem peregrinatio Cutamensis.	19.a. & b
Meacensis.	26.b. 28.b. 46.a
Sacaiana.	41.a
Ecclesie ab eodem instituta.	72.a
Apud Meacensem Regem gratia.	73.a
Gotondoni & aliorum coniuratio in Barptolemæum Regem.	62.b
Grana benedicta & alia id genus quantopere à Christianis expetantur.	61.b. 68.b
H	
Hectoris optimi viri nex.	117.a
Hexandoni Dynastæ, & vxoris eius pietas.	49.a. & 50.b
Hiu insula & ibi patrum acta.	78.a
Horti cultissimi, & amenissimi.	96.a
I	
Iacobi Sorie Caluiniani piratæ crudelitas.	31.a. & inde
Ianambuxi Bonziorum secta.	88.b
Qua ratione cooprentur.	89.a
	Iapo-



# I N D E X.

<i>Iaponiorū ingenia moresq;</i>	4.a. 10.b. 37.a. 80.b. 92.a. 97.b. & inde
<i>Errores.</i>	22.b. 55.a.
<i>In fide constantia.</i>	20.b. 94.a.
<i>Variis anni cursus.</i>	93.a.
<i>Quæstiones, &amp; curiositas.</i>	11.b.
<i>Iaponios iuuandi inita à patribus ratio.</i>	18.b.
<i>Iaponem &amp; Sinas Euangelij caussa petentes, quomodo affectos esse oporteat.</i>	101.a. & 105.a.
<i>Idolum Denichi.</i>	88.b.
<i>Ienxuanorum secta epicurea persimilis.</i>	93.b.
<i>Christianæ religionis odium.</i>	82.a.
<i>Ignatij Azzebedij &amp; sociorum felix exitus.</i>	120.a. & 122.a.
<i>Indulgentias, &amp; alios Christianos ritus imitari videntur Bōzj.</i>	99.b.
<i>Infantis trimi à Baptismo animam agentis dictum admirabile.</i>	66.a.
<i>Inhambanis Rex vnà cum proceribus à Consaluo Sylueria baptizatur.</i>	37.b.
<i>Ioannis Baptistæ Montani acta.</i>	66.b.
<i>Ioannis Fernandi agendi ratio.</i>	45.b.
<i>Labores.</i>	61.a. 61.b.
<i>Lexicon Iaponicè &amp; Lusitanicè.</i>	69.b.
<i>Ioannis Cadauſij Caluiniani piratæ immanitas.</i>	123.a.
<i>Ioannis Naetondomi Tambæ reguli Christiani laudes.</i>	116.a.
<i>Iobeleum ad felicem Concilij Tridentini euentum.</i>	98.a.
<i>Iquenda regno Euangelium infertur.</i>	118.a.
<i>Iquenda Sangadonus Christianorum parens, &amp; in eum coniuratio patefacta.</i>	117.b.
<i>Iquicuqui acta per Ludouicum Almeidam.</i>	32.b. 33.a. & b.
<i>Ira per eundem.</i>	35.a.

## L

<b>L</b> <i>Aurentius Iaponius Imori quinque millia hominum baptismo lustrat.</i>	72.b.
<i>Ludi &amp; nefaria sacra Iaponiorum.</i>	60.a.
<i>Ludouici Almeide peregrinationes, &amp; acta.</i>	32.b. 48.a.
<i>Vocoxiura.</i>	64.a.
<i>Ximabara, &amp; Cochinoci.</i>	64.b.
<i>Meaci.</i>	75.b. 77.a.
<i>Ludouici Froij acta.</i>	61.a. 68.b.
<i>Peregrinatio Meacensis.</i>	77.a.



# I N D E X.

## M

<b>M</b> Agistratus in concionibus nunquā aperte perstringendi.	7. a
Malabares piratæ patribus infensi.	102. b
Manomotapæ Regi beatissima Virgo per quietem apparet.	38. b
Idem baptismo expiatur cum trecentis proceribus.	39. a
Consentit in Consalui necem.	ibid.
Facti eum pœnitet.	40. a
Manuum impositio apud Iaponios.	99. b
Maristhenis delubrum Iaponiorum.	63. b
Martyrium Francisci Lupij & sociorum duorum.	100. a
Molucensium neophytorum.	101. a
Ancillæ Iaponiæ.	32. a
Meacum totius Iaponis caput.	26. b
Ibidem acta Gasparis Vilelæ.	28. & seq.
Eadem vrbs vastatur.	54. b
A Rege recipitur.	ibid.
Eius in Patres humanitas.	82. a
Meaci superioris excidium.	115. a
Meacensium Christianorum pietas.	54. b. 95. b. & seq.
Medicus Sacaianus ad Societatem adiungitur.	86. a
Iussus filio cedit omni patrimonio.	ibid.
Melchioris Nonnij nauigatio in Iaponem.	24. b. & seq.
In Indiam renauigat.	26. a
Minguames Mosambicanus Manomotapæ Regem in Consaluum in-	
citat.	39. a
Idem fuga sibi consulit.	40. b
Mioxindonus Cubum è medio tollit.	99. a
Mirozu impostor.	89. b
Miracula.	16. a. 19. a. & b. 22. a
Molucis in insulis assidua patrum discrimina.	101. a
Molucensium Neophytorum, in fide constantia & labores.	ibid.
Monicæ Virginis amor in cœlestem sponsum.	79. b. & seq.
à Muneribus quatenus abstinendum.	8. a

## N

<b>N</b> Ara vrbs.	82. b
Naræ arcis edes elegantissima.	ibid.
Neophytorum pietas.	50. b. 73. a. 77. b. 78. a. & 82. a
	Neo-



# I N D E X.

Neophyti Ximabarani constantes in fide.	87.b
Neophyti Molucenses propter Christum interfecti.	101.a. & b
Neugoriorum secta.	55.a
Nichioxines, Vatandoni, & Euangelij hostis.	110.b
Nubunanga rogatu Vatandoni patribus fauet.	109.b
Eiusdem ad Frenoiamam res contra Bonzios gesta.	113.b
Nubunanga inferiori Meaco parcit propter Christianos.	115.a
Idem Iaponicarum sectarum hostis.	118.b. & seq.
Quosnam sibi adscribat titulos.	ibid.

## O

Economi subleuandis egrotis, & pauperibus.	46.b
Organtini Brixienfis acta Sange.	118.a

## P

Paradisus Iaponiorum.	99.a
Passionis Domini recordatione quantopere afficiantur Neophyti.	3.b. 20.b. & seq.
Paulus Iaponius Xauerij comes Cangoximæ domesticos conuertit ad Christum.	10.a
Pauli alterius Iaponij præstantis viri obitus.	23.b
Pileolus triquetra figura.	90.b
Puerulus enixe baptismum petit, parentes & propinquos ad Christum adducit.	31.a
Pueri cuiusdam Sacaiiani laudes egregiæ.	52.a

## R

R Amiri, & Alcaræ sociorum, naufragium, & mors.	100.a
Ratio agendi cum proximis.	7.b
Regina Celi Regi Manomotapia per quietem assistit.	38.b
Reliquias amoris quasnam appellant Christiani.	68.b
Rex Amangutij interficitur.	21.b
Rex Barptolemaus. Vide littera B.	
Rex Bungenfis. Vide eadem littera B.	
Rex Cangoximæ. Vide littera C.	
Rex Firandi. Vide littera E.	

Rex



# I N D E X.

Rex Manomotape baptismo lustratur. 39.a  
 In Consalui Sylueria necem consentit. 39.b  
 Facti eum penitet. 40.a  
 Rex Meaci. Vide Meacum.  
 Rex Vocoxiura. Vide littera V.

S

Sacaium vrbs libera. 53.b. & seq.  
 Sanctij nobilis viri pietas. 78.b  
 Scriba Mioxindoni officia in patres. 100.a  
 Scriba Firandensis Regis, itemque vxoris eius laudes. 47.b. &  
 inde. 116.b  
 Sebastianus Lupinus ab heretico seruatur. 29.b. & seq.  
 Secta Iaponiorum. 94.b  
 Sigillorum duo millia in tergo Xaca. 101.  
 Sinas & Iaponem petentes quomodo animatos esse oporteat. a. 105.a.  
 Societatis Iesu domicilia apud Iaponios. 23.a  
 Socij varie vexantur. 21.a  
 Eorum acta in Bungo. 45.b. & seq.  
 Meaco vrbe capta in exsilium abeunt. 100.a  
 Eorum in ora Comorinensi pericula. 101.b  
 In eosdem officia Brachmanarum. 102.b  
 Stellio præsces doctrinarum. 94.b  
 Eius templum. ibid.

## T

Tacaxumani precandi studio mirè tenentur. 34.a. & 6  
 Taqueni scelera & exitialis exitus. 114.a. & b  
 Taqua Nombo Firandi Rex. 17.a  
 Teçtorij nitidissimi species. 82.b  
 Tempa inanium Deorum magnificentissima. 82.b. & 96.b  
 Templorum tria millia octingenta ab vno Rege adificata. 113.a  
 Templum inferorum Regi dicatum, quale. 96.b  
 Tonus Amagusanus Xauerio fauet. 105.b  
 Baptismo lustratur. 106.a  
 Toni filij adoptiui pietas. 106.b  
 Tonus Kimabaranus petit Euangelium. 61.b  
 Ad



# I N D E X.

<i>Ad Christum aggregatur.</i>	96.b
<i>Ipsius pietas.</i>	87.b
<i>Typhonis venti vis.</i>	100.b. & seq.
<i>Tyrones in religione quomodo tractandi, ac probandi.</i>	6.a

## V

<b>V</b> <i>Aletudinarium à patribus institutum.</i>	20.a
<i>Vatandoni dynastæ Catechumeni mirum Christianæ rei studium.</i>	109.a. & inde.
<i>In prælio circumuentus occiditur.</i>	112.a
<i>Vetule nonagenariæ mira conuersio.</i>	70.b
<i>Vincentij pueruli sensus amoris in Christum.</i>	80.a
<i>Vosen Dairi.</i>	54.b
<i>Vocoxiuranus Rex Euangelium efflagitat.</i>	51.a
<i>Vxor in fidei desertorem maritum egregie consulit.</i>	107.

## X

<b>X</b> <i>Acæ signum colosseum.</i>	94.b
<i>Bibliotheca versatilis.</i>	96.b
<i>Xamaxinodoni &amp; Quequidoni iudicum conuersio.</i>	72.b
<i>Xauerius. Vide Franciscus Xauerius.</i>	
<i>Xichiensis dynastæ Christi desertor.</i>	106.a
<i>Ximabaræ plurimi facti Christiani.</i>	66.a
<i>Xinguen Rex Cainochum Bonziorum defensor.</i>	118.b
<i>Xuicaidoni conuersio, &amp; actus.</i>	73.a
<i>Xixiensium neophytorum pietas.</i>	35.a

## Z

<i>Zacana salsamenti genus.</i>	93.a
---------------------------------	------

Indicis in Epistolas Finis.

IN



# IN IGNATII VITAM

## CAPITVM INDEX

### Libri Primi.



<i>Reversus Ignatii, &amp; educatio. c.1.</i>	127.a
<i>Conversio eius ad Christum. c.2.</i>	128.a
<i>Ad Montem serratum religionis causa proficiscitur. c.3.</i>	131.a
<i>Acta eius in Monteserrato. c.4.</i>	132.b
<i>Ardores eiusdem in studio penitentiae. c.5.</i>	133.b
<i>Molestiae scrupulorum, &amp; tentationum eiusdem. c.6.</i>	134.a
<i>Ignatii profectus in spiritu. c.7.</i>	136.b
<i>De studio collato ad proximos adiuuandos. c.8.</i>	137.b
<i>E graui morbo periclitatur. c.9.</i>	138.a
<i>De inanis gloriae vitio superato. c.10.</i>	138.b
<i>De profectiōe Hierosolymitana. c.11.</i>	139.a
<i>Nauigat in Italiam. c.12.</i>	139.b
<i>Nauigat in Palaestinam. c.13.</i>	141.b
<i>Palaestinae loca sancta perlustrat. c.14.</i>	142.a
<i>In Hispaniam redit. c.15.</i>	143.b
<i>Barcinone ad studia litterarum aggreditur. c.16.</i>	145.b
<i>Eiusdem commoratio Complutensis. c.17.</i>	147.a
<i>Lutetiam proficiscitur. c.18.</i>	151.b
<i>Extremae inopiae incommoda superat. c.19.</i>	152.a
<i>Varie propter Christum exercetur. c.20.</i>	153.a
<i>De socijs ad Ignatium adiunctis. c.21.</i>	155.a

### LIBRI SECVNDI.

<i>Ager Hispaniam repetit. c.1.</i>	157.b
<i>Venetias ingenti labore contendit. c.2.</i>	159.a
<i>Venetias ad Ignatium socij veniunt. c.3.</i>	160.b
<i>Sacris initiatur Ignatius, &amp; de rebus ab eodem, &amp; socijs in Venetia ditione gestis. c.4.</i>	162.b
<i>Ignatio Romam appropinquanti Christus apparet, &amp; unde Societati Iesu nomen inditum fuerit. c.5.</i>	164.a
	Ign-



# I N D E X.

Ignatius Romæ Christianæ rei dat operam, in Casinati monte animam Horij calum intransentem videt. c. 6.	165.b
Romam Patres vniuersi conueniunt, veterem plebis erudiendæ morem, & frequentem vsum Confessionis, & Eucharistiæ restituunt. cap. 7.	166.b
Falsis criminibus circumuenitur Ignatius, & absoluitur. c. 8.	167.a
Ignatius & cæteri Patres de constit. Societ. deliberant. c. 9.	170.b
Patres in varia loca Pontificis iussu discedunt. c. 10.	171.b
Ignatius plebi fame periclitanti succurrit. c. 11.	173.b
Confirmatur à Pontifice Maximo Societas. c. 12.	174.a
Præpositus Generalis creatur Ignatius. c. 13.	175.a
Generalis Ignatius denuo Catechistæ munere fungitur. c. 14.	177.b
Societas augetur, distribuuntur prouinciæ. c. 15.	178.a
Varie in Ignatium tempestates excitantur. c. 16.	178.b
Regimen fœminarum à Societate depellit Ignatius. c. 17.	179.b
Honoribus in Societatem nostram Ignatius aditum obstruit. c. 18.	180.a
Confirmatur à Iulio III. Societas. c. 19.	183.b
Magistratum sese abdicare conatur Ignatius. c. 20.	183.b
Societati in Hispania valde laboranti succurrit. c. 21.	184.b
De Iulij III. obitu, & de Marelli II. in Ignatium nostrosque beneuolentia. c. 22.	186.a
Ignatij obitus. c. 23.	186.b

## L I B R I T E R T I I.

<b>D</b> E orandi assiduitate, & studio pietatis. c. 1.	188.a
Quod eius fuerit de perfectione iudicium. c. 2.	190.a
De caritate ipsius in Deum. c. 3.	190.b
De caritate in proximos. c. 4.	191.a
Mansuetudo eiusdem & comitas. c. 5.	193.a
Gravitas eiusdem, & in custodia disciplinæ seueritas. c. 6.	194.a
Eiusdē aī submissio, & quid de Virtute obediētiæ senserit. c. 7.	196.a
Paupertas eius, & castimonia. c. 8.	198.a
Aequitas animi, & constantia eiusdem. c. 19.	198.b
Eiusdem ratio gubernandi. c. 10.	201.b
Eiusdem ratio proximos adiuuandi. c. 11.	204.b
Vita eius quotidiana, & domestica. c. 12.	205.a
Pietatis opera publice per eum instituta. c. 13.	206.a
Quædam de Ignatio mira. c. 14.	207.b
Eiusdem forma, & statura corporis. c. 15.	211.b



# IN EANDEM RERVM MEMORABILIVM INDEX.

## A



- ADICARE* sese magistratu conatur Ignatius. 183. b.  
*Abstinentia & sobrietas eiusdem.* 133. b.  
*& 135. b*  
*Accusatoribus qua observatione aures prabere*  
*consueuerit Ignatius.* 203. b  
*Adrianus V I. Pont. Max.* 140. b  
*206. a*  
*Aegrotorum curandorum lex.* 159. b  
*Aenobarbus archipirata.* 189. b  
*Agni caelestis cerea effigies.* 211. b  
*Alexandri Card. Farnesi pietas, & magnificētia.* 177. b. & 211. b  
*Alexander Petronius medica artis laude præstantissimus.* 208. a  
*Alfonsus Fonseca, Toletanus Archiepiscopus.* 149. b  
*Alfonsus Salmeron Toletanus, Ignatij socius.* 156. a  
*Ad montem Celsum secedit.* 163. a  
*Ambitio & auaritia, duæ perniciosissimæ mortalium pestes.* 184. b  
*Andreas Foxius, cognomento Asparotus.* 128. a  
*Andreas Gritus, Venetorum Dux.* 141. b  
*Andreas Lipomanus, vir pietate & genere nobilis.* 193. a.  
*& 210. b*  
*Animorum curatio difficilis.* 137. b  
*Antonius Araozius Hispaniæ præponitur.* 178. a  
*Eius litteræ.* 209. a  
*Apostolorum limina, & præcipue religionis templa nostri Romæ*  
*obeunt.* 162. a  
*Arbensis Episcopus Ignatium ad sacerdotium euehit.* 162. b  
*Ardebalus Ignatij præceptor.* 146. a  
*Artiaga se ad Ignatij institutum aggregat.* 147. a  
*Eius mors.* 159. a  
*Augustinus quidam Augustinianus hæreticus nostros Romæ inse-*  
*statur.* 167. a  
*Baiona,*



# I N D E X.

B

<b>B</b> Aiona, olim aquæ Augustæ.	158.a
Baptista Viola Parmensis.	210.b
Barcinone ad studia litterarum Ignatius aggreditur.	145.b. 191.
b. 204.a	
Barptolemaeus Guidicionius Card.	174.b
Bassanum, oppidum agri Patauini.	163.a
Bellum inter Gallos, & Hispanos.	128.a
Inter Venetos & Turcas.	162.b
Inter Paulum II II. & Regem Philippum.	186.b
Benedictus Conuersinus, urbis Romæ gubernator.	168.b
Beneuolentiam suorum erga se quomodo aleret Ignatius.	203.a
Bernardina quædam Romana, filiam admotam Ignatij defuncti fe- retro sanat.	208.b
Bernardinus Maffei Card.	181.b
Bertramus Loiola.	127.b
Bisinianum oppidum.	175.b
Bonæ spei promontorium.	171.b
Bononiam Ignatius peruenit.	159.b
Bononiam veniunt Xauerus, & Bobadilla.	164.b
Brasilia ora.	171.b
Brixiam mittitur Claudius Iaius.	171.b

C

<b>C</b> Allistus se ad Ignatij ductum aggregat.	147.a
Carcerem in Societatem induci nunquam permisit Ignatius.	
195.b	
Caritas Ignatij in Deum.	190.b
In proximos.	191.a
Castitatis laude insignis Ignatius.	198.a
Castitatis virtutem in Societate magno studio custodiri voluit Igna- tius.	198.a
Catechesi Christianæ operam dat Ignatius.	177.b
Catechumenorum ædes, curante Ignatio, paratæ.	207.a
Cæzeres Segoniensis Ignatij socius.	147.a
In patriam reuertitur.	159.a
Christus tentationum iustissimus arbiter.	134.b
Christi patientiæ studiosus Ignatius.	144.b
Circus Flaminius Romæ.	173.b



# I N D E X.

<i>Claudius Iaius Gebennensis Ignatij socius.</i>	156.a
<i>Bassanum secedit.</i>	163.a
<i>Brixiam abit.</i>	171.b
<i>Tergestinorum Episcopatum reijcit.</i>	182.b
<i>Collegium Montis acuti Parisiis.</i>	152.a
<i>Collegium S. Barbaræ Parisiis.</i>	153.a
<i>Collegium Hispanicæ nationis Bononiæ.</i>	160.a
<i>Collegium Germanicum Romæ.</i>	207.a. 211.a
<i>Collegium Lauretanum.</i>	208.b
<i>Compluti artium curriculum init Ignatius.</i>	147.a
<i>Concionantur Patauij Codurius, Hoziusque: Ferrariæ Roterigius &amp; Iaius: Bononiæ Xauerius, &amp; Bobadilla: Senis Poschasius, &amp; Salmeron.</i>	164.b
<i>Vicetiæ Ignatius, Faber, &amp; Laines.</i>	163.a
<i>Concordia nihil valentius ad res arduas moliendas.</i>	171.a
<i>Confessio totius anteaactæ vitæ Ignatij.</i>	132.b
<i>Iterum iterumque ab eodem repetitur.</i>	136.a
<i>Quotidianæ cuiuslibet omissionis.</i>	188.b
<i>Confessio generalis P. Fabri.</i>	155.b
<i>Et aliorum sociorum Ignatij.</i>	156.a
<i>Confessionis frequens vsus ab Ignatio &amp; socijs Romæ restitutus.</i>	167.a
<i>Commendatur ab Ignatio Barcinone.</i>	191.b
<i>Crucem pauci ex animo amplexantur.</i>	158.b
<b>D</b>	
<i>Dæmon Ignatium ab incepto reuocare conatur.</i>	134.b
<i>Ignatio difficultates representat.</i>	134.b
<i>Ignatium à luterarum studio remouere nititur.</i>	146.b
<i>Detractiones &amp; susurri animos disiungunt.</i>	176.b
<i>Didacus Guias Cantaber.</i>	160.b
<i>Didacus Lassus Ferdinandi Regis orator.</i>	181.a
<i>Dignitatis gradus perfectos viros requirunt.</i>	181.b
<i>A Societatis instituto valde alieni.</i>	181.b
<i>D. Dionysii Areopagitæ tutela.</i>	156.b
<i>Discretio spirituum, consumatæ sapientiæ virtus.</i>	130.a
<i>Doctrinæ Christianæ præceptis plebem imbuunt Ignatius.</i>	146.b.
158.b. 160.a. 167.a. 173.b	
<i>Doctrinam Christianam professi tradere debent.</i>	171.b
<i>Domi-</i>	



# I N D E X.

*Dominicani fratres Salmanticę Ignatij doctrinam expēdunt.* 149.b  
*Domus professe egestati Romę mirabiliter subuenitur.* 198.b  
 200.b

## E

**E**cclesia primitiua Ignatij que. 164.b  
 Ecclesia Rom. princeps magistraque orbis terrarum. 167.a  
*Eleemosyna Ignatij in pauperes.* 144.a  
*Eleemosynis undique conquisitis alios subleuat Ignatius.* 147.b  
*Elisabetha Rosella Ignatium victu benigne alit.* 146.a  
*Pecunia eundem iuuat.* 160.a  
*Romam venit.* 179.b  
*Emendicat victum Ignatius Compluti.* 147.b  
*Guipuzcoę.* 158.a  
*Et socij Romę.* 162.b, 166.b  
*Erasmi libros abiicit Ignatius, & in Societate legi vetat.* 146.b  
*Eucharistiam octauo quoque die sumit Ignatius.* 152.a  
*Idem quotidie.* 164.b  
*Eucharistię frequens vsus Romę ab Ignatio, & socijs restitutus.* 167.a  
*Commendatur ab Ignatio Barcinone.* 191.b  
*Examen conscientię bis quotidie habetur ab Ignatio.* 152.a  
*Item in singulas horas.* 188.b, 205.b  
*Examen conscientię P. Fabri.* 155.b  
*Exemplo vitę ac morum nihil efficacius ad animos permouendos.* 182.a  
*Exercitiorum spiritualium liber ab Ignatio conscriptus.* 130.b  
*A Rom. Pont. comprobatus.* 137.b  
*Salmanticę examinatur.* 150.a  
*A sacro Inquisitore Parisiis receptus.* 154.a  
*Item in Hispania.* 199.b  
*Exercitijs spiritualibus perpolitur Faber.* 155.b  
*Xauerus.* 156.a  
*Et alij socij Ignatij.* 156.a  
*Item multi Venetijs.* 160.a  
*Romę.* 165.b  
*Novitij probandi.* 171.b

**F**eminarum regimen à Societate depellitur. 179.b  
 Feminarum consuetudo periculosa. 179.b

Ferd-



# INDEX.

<i>Ferdinandus Rex Rom.</i>	180.b
<i>Ferrariam venit Ignatius.</i>	144.a
<i>Rodericus &amp; Iaius.</i>	164.b
<i>Fiducia diuinae innixus Ignatius.</i>	139.b. 140.b. 142.b. 159.b
<i>Ad Fossam Clodiam Ignatius peruenit.</i>	140.b
<i>Franciscanae familiae fratres Hierosolymis.</i>	142.b
<i>Franciscus Borgia Gandiensium dux, Societati se addicit.</i>	183.a
<i>Franciscus Mendoza.</i>	150.b
<i>Franciscus Michaelius, urbis praefectus.</i>	179.a
<i>Franciscus Strata Ignatio se adiungit.</i>	166.b. 189.a
<i>Franciscus Xauerius Cantaber Ignatii socius.</i>	155.b
<i>Primus in Iaponiorum terras Euangelium intulit.</i>	156.a
<i>Bononiam proficiscitur.</i>	164.b
<i>Ad montem Celsum secedit.</i>	163.a
<i>In Lusitaniam tendit.</i>	175.a
<i>In Indiam mittitur.</i>	173.a
<i>Indie Prouincialis.</i>	178.b
<i>In Sinarum aditu obit.</i>	156.a
<i>Francisci Xauerij per somnum visio.</i>	173.a
<i>Erias, Vicarius Salmaticensis Episcopi.</i>	150.a
<i>Gaspar Contarenus Card.</i>	165.b. 174.b
<i>Gaspar Doctus pro Ignatio &amp; socijs.</i>	170.a
<i>Genuam proficiscitur Ignatius.</i>	144.b
<i>Georgius Nauerus, insignis doctor.</i>	148.b
<i>Germanicum Collegium in vrbe institutum.</i>	207.b
<i>Giennium vrbs Betica.</i>	148.b
<i>Grammaticae rudimenta discit Ignatius.</i>	146.b
<i>Eadem Parisijs repetit.</i>	151.b
<i>Grana piacularia.</i>	189.b
<i>Greg. XIII. Pont. Max.</i>	207.b. 211.b
<i>Guipuzcoa prouincia.</i>	127.a. 158.a

## H

<i>Haereticorum fastus.</i>	167.b
<i>Haeretici ab Ignatio cum Rom. Ecc. in gratia restituti.</i>	155.b
<i>Hercules II. Dux Ferrar. Ignatii &amp; sociorum innocentie testimonium tribuit.</i>	170.a
<i>Hieronymo Arzio agrotanti frequens adest Ignatius.</i>	193.a
<i>Hie-</i>	



# I N D E X.

<i>Hieronymi Arzj liberalitas.</i>	198.b. 199.b
<i>Hieronymus Verallus Legatus Apostolycus Venetijs.</i>	160.b
<i>Hierosolymitana profectio ab Ignatio decernitur.</i>	138.b
<i>A Paulo III. impetratur.</i>	153.a
<i>Hierosolymam venit Ignatius.</i>	142.b
<i>Honoribus in Societatem aditus obstruitur.</i>	180.b
<i>Hortatur homines Ignatius ad odium peccatorum, amoremq; probitatis.</i>	149.b. 158.b
<i>Hospitium S. Iacobi Parisiis.</i>	182.b
<i>Ad Hospitalem domum diuertit Ignatius.</i>	147.a. 158.a
<i>Hozius Hispanus Venetijs Ignatio iungitur.</i>	160.a
<i>Tarusium secedit.</i>	163.a
<i>Patauium proficiscitur.</i>	164.b
<i>Eius mortui animam celos penetrantē videt Ignatius.</i>	166.a
<i>Humilitas Christiana ceterarum parens, custosque virtutū.</i>	133.b
<i>Humilitatis spiritum profitetur Societas.</i>	181.a
<b>I</b> acobus Couca Lusitanus.	154.a. 172.a
<b>I</b> acobus Laines Ignatij socius.	156.a
<i>Romæ sacras litteras profitetur.</i>	165.b
<i>Cum Petro Fabio Parmam contendit.</i>	171.b
<i>Italiæ prouincialis.</i>	178.b
<i>Ieiunium P. Fabri.</i>	155.b
<i>P. Xauerij.</i>	155.b
<i>Et aliorum Ignatij sociorum.</i>	158.a
<i>Iesu nomen vnde Societati inditum.</i>	165.a
<i>Ignatius etiam ante conuersionem ab omni impietate, atque auaritia alienus.</i>	127.b
<i>In Pompelonsi obsidione vulneratus.</i>	129.a
<i>Grauitè ægotat.</i>	138.b
<i>Vrbane munditiæ apprime deditus.</i>	129.b
<i>Lectiōe librorum spiritualium conuersus.</i>	130.a
<i>Ad Montem serratum proficiscitur.</i>	131.a
<i>Singulis noctibus se acerrime verberat.</i>	131.b
<i>Singulis diebus ter sese flagellis cædit.</i>	134.a
<i>Maria Virgini se voto castitatis obstringit.</i>	131.b
<i>In Maurum quendam irritatus.</i>	132.b
<i>De peregrinatione Hierosolymitana sollicitus.</i>	132.b. 139.a



# I N D E X.

<i>Quo anno militia Christiana nomen dedit.</i>	132.b
<i>Excessu quodam raptus.</i>	137.a
<i>Magnam rerum spiritualium peritiam nactus.</i>	137.b
<i>Cui interdum ab alijs ad prandiu inuitatus, accederet.</i>	138.a
<i>Inanem gloriam superat.</i>	139.a
<i>A diuina prouidentia totus pendens.</i>	139.b
<i>In Italiam nauigat.</i>	140.a
<i>Romam ingreditur.</i>	140.a
<i>Adriani V. pedes exosculatur.</i>	140.b
<i>Venetias ire parat.</i>	140.b
<i>A comitiibus destitutus.</i>	141.a
<i>Venetias perductus.</i>	ibid.
<i>Nauigat in Palestinam.</i>	141.b
<i>Palestinae loca sancta perlustrat.</i>	142.b
<i>In Hispaniam redit.</i>	144.a
<i>Ab Hispanis militibus contumelia affectus.</i>	144.b. 145.b
<i>Artium curriculum in Compluti.</i>	147.b
<i>In carcerem conijcitur.</i>	148.b. 150.b
<i>Salmanticę examinatur.</i>	150.b
<i>Extremam inopiam superat.</i>	152.b
<i>Philosophię studia aggreditur Parisiis.</i>	153.a
<i>Sacram Theologiam amplectitur.</i>	153.a
<i>Varie propter Christum exercetur.</i>	153.a
<i>Ad sacrum Inquisitorem Parisiis defertur.</i>	153.b
<i>Ab eodem Inquisitore absoluitur.</i>	153.b
<i>Virgarum periculo liberatus.</i>	154.a
<i>Multos à turpi vita conuertit.</i>	155.a
<i>Aeger Hispaniam repetit.</i>	157.b
<i>Venetias contendit.</i>	159.b
<i>Sacris initiatur.</i>	162.b
<i>Plebi Romę periclitanti succurrit.</i>	173.b
<i>In culinę ministerijs versatur.</i>	176.b
<i>Generalatu se abdicare conatur.</i>	184.a
<i>Prophetię dono præditus.</i>	209.a
<i>Ignatij ortus &amp; educatio.</i>	127.a
<i>Acta in Monte serrato.</i>	132.b
<i>Minoreffe.</i>	133.b
<i>In Guipuzcoa.</i>	158.a
	Vene-



# I N D E X.

Venetijs.	160.a
Vicetię.	163.a
Rome.	175.b
Animi altitudo.	118.a
Submissio.	196.a
Aequitas.	198.b
Ardor in studio penitentię.	133.b
Caritas in Deum.	190.b
In proximos.	191.a
Castimonia.	198.a
Cautio in negotijs gerendis.	128.a
Constantia.	198.b
Conuersio ad Christum.	128.a
Confessarius Dominicanus Salmantica.	149.b
Alter ex ordine Minorum Rome.	175.b
Clementia & lenitas.	176.b
Fiducia in Deo.	159.b
Forma & statura.	211.b
Gravitas & in custodia discipline seueritas.	194.a
Gubernandi ratio.	201.b
Mansuetudo & comitas.	193.a
Maturitas ac dexteritas in tractandis hominũ ingenijs.	128.a
Opera. liber Exercitiorum.	130.b
Libellus de rebus Christi & Sanctorum preclare gestis.	131.a
Liber de Trinitate.	137.a
Epistola ad socios Lusitanos de Obedientia.	196.b
Epistola ad Prepositum prouincię Lusitanie.	202.a
Commentarij de religione.	198.b
Carmina Hispanica de B. Petri laudibus.	119.a
Scripta de spirituum discretionem, & de moderandis affectibus.	204.b
Paupertas.	198.a
Persecutio Lutetię.	153.b
Rome.	168.a
Pietatis studium.	188.b
Profectus in spiritu.	136.b
Ratio proximos adiuvandi.	204.a
Scrupuli.	136.a



# I N D E X.

Sermo de contemptu rerum humanarum.	150.b
Studium ad proximos iuuandos. 137.b. 147.b. 149.b. 155.a	
Virtutes.	176.b
Vita quotidiana & domestica.	205.a
Ignatio nocte vigilanti Maria Virgo vna cum paruulo Iesu sese palam ostendit.	130.b
Eidem Romam appropinquanti Christus apparet.	165.a
Ignatium socij omnes, vt parentem diligunt ac reuerentur.	156.b
Inanis glorię vitium superat Ignatius.	139.a
Indica expeditio nostrorum studijs apta.	172.a
Inocențij III. Papę lex de curandis ægrotis.	206.a
Ioannes Borgia Philippi Regis Legatus.	189.a
Ioannes Codurius Ignatij socius.	156.a
Patauium proficiscitur.	164.b
Tarusium secedit.	163.a
Gravi morbo laborat.	210.b
Ioannes Cruceius, rei domesticę curator.	200.b
Ioannes Figheroa Vicarius Archiepiscopi Tolet. 147.b. &	170.a
Ioannes Gallus Ignatij socius.	147.a
Monasticę se vitę addicit.	159.a
Ioannes Moronus Card.	207.a
Ioannes Lusitanię Rex.	156.a
Ioannis Tertij Lusitanię Regis curę.	172.a
Ioannes Penna Ignatij in philosophia præceptor.	153.a
Ioannes Siliceus Toletanus Archiepiscopus, nostrorum insectator.	184.b
Ioannes Vega Hispanus.	178.a
Iulius III. Pont. Max. Societatem confirmat.	183.b
Eius mors.	186.a
<b>L</b> Oiolarum familia.	127.b
Ludit tridiculis Ignatius.	193.a
Ludouicus Consalius domus Romanę minister.	194.b
Lusitani Brasiliam & Indiam oram aperiunt.	171.b
Lutetiam proficiscitur Ignatius.	151.a
Lutetię Parisiorum descriptio.	152.a
<b>M</b>	
<b>M</b> Agnates in Hispania qui vocentur.	127.b
Male nuptarum cænobium ab Ignatio institutum.	206.b
Mar-	



# I N D E X.

<i>Marcelli II, Pont. electio, atque obitus.</i>	186.a
<i>Margarita Austriaca, Octavij Farnesii vxor.</i>	174.a. & 183.a
<i>Maria Virgo Ignatio noctu apparet.</i>	130.b
<i>Mariæ Virginis patrocinium.</i>	147.a
<i>Mariæ Virginis ad Nives, ædes Romæ.</i>	164.a
<i>S. Mariæ à Strata templum.</i>	177.b
<i>In Mariæ Virginis honorem Sabbata observat Ignatius.</i>	148.b
<i>Martinus Garzia Ignatii frater.</i>	131.a
<i>Martinus Luther hæresiarcha.</i>	133.a
<i>Martinus Olavius excellenti vir ingenio.</i>	186.a. & 199.b
<i>Matthæus Ori, Dominicanus.</i>	153.b
<i>Medicis valde dicto obediens Ignatius.</i>	196.b
<i>Mendicitas maximum affert detrimentum studijs.</i>	152.a
<i>Meretriculas ab impuritate auocat Ignatius.</i>	190.b
<i>Michael quidam Hispanus.</i>	208.b
<i>Michael Hispanus Romæ nostros accusat.</i>	168.a
<i>Idem exsilio multatur.</i>	168.a. 170.a
<i>Michael Turrianus in Lusitaniam destinatur.</i>	202.a
<i>Minoressa oppidum, hodie Manresa.</i>	133.b
<i>Mira de Ignatio.</i>	207.b
<i>Missæ sacrificium Ignatii socij Vicetiæ primum faciunt.</i>	164.a
<i>Ignatius autem postea Romæ.</i>	205.a
<i>Missionis Pontificiæ exordium nostris.</i>	17.b
<i>Modestiam scholasticis nostris commendat Ignatius.</i>	195.a
<i>Mons ferratus.</i>	131.b
<i>Mons aureus Romæ.</i>	210.b
<i>Mons Casinas.</i>	165.b
<i>Mons Celsus, vicus agri Patauni.</i>	163.a
<i>Mons Martyrum extra Lutetiam.</i>	156.b
<i>Montis acuti Collegium Parisiis.</i>	152.a
<i>Mores novos in Societatem induci non est passus Ignatius.</i>	195.a
<i>Mortificationis spiritus speculationis spiritui antefertur.</i>	190.a
<i>Muliebris sexus ad pietatem propensus.</i>	148.a

## N

<b>N</b> egligentem in quodam ministerio quendam arguit Ignatius.	195.a
<i>Neophytorum ædes Romæ.</i>	207.a
<i>Nicolaus Bobadilla Palentinus Ignatii socius.</i>	156.a



# FIN D E X.

<i>Veronam proficiscitur.</i>	163.b
<i>Aenariam insulam petit.</i>	171.b
<i>In Brutios discedit.</i>	175.a
<i>In Indiam destinatus impeditur ischiade.</i>	173.a
<i>Nouitij Societatis quibus exercitationibus probandi.</i>	171.a
<i>Nouitios quosnam legere soleret Ignatius.</i>	203.b
O	
<i>Obediens apprime magistratibus Ignatius.</i>	147.b
<i>Summo Pontifici.</i>	196.a
<i>Obedientie sacrificio nullum Deo suauius est.</i>	171.a
<i>Obedientie nexu nostri Christi Vicario mancipati.</i>	172.a
<i>Obedientie virtutem ceteris omnibus antefert Ignatius.</i>	196.a
<i>Obedientie praeclarum exemplum.</i>	198.a
<i>Oliuetus mons.</i>	143.a
<i>Oratio in multum temporis tribuit Ignatius.</i>	145.b
<i>Orandi assiduitas in Ignatio.</i>	188.b
<i>Otium, ut omnium vitiorum fomitem, detestatur Ignatius.</i>	195.a
P	
<i>Palaestinae loca sancta perlustrat.</i>	142.b
<i>Parisi in D. Dionysii Areopagite tutela sunt.</i>	156.b
<i>Parthenonem S. Catharinae à funarijs instituit Ignatius.</i>	206.b
<i>Paschasius Broetus, Ignatij socius.</i>	156.a
<i>Veronam tendit.</i>	163.a
<i>Senas.</i>	171.b
<i>Galliae prouincialis.</i>	178.b
<i>Patanium ingreditur Ignatius.</i>	141.a
<i>Pauli I I I. Pont. Max. laudes.</i>	162.a
<i>Paulus I I I I. Pont. Max.</i>	186.b. 211.a
<i>In D. Pauli ade, extra urbem, nostri solemnī professione suae religionis vota suscipiunt.</i>	176.a
<i>Paupertas voluntaria religionis murus est.</i>	198.a
<i>Paupertatis spiritum profitetur Societas.</i>	181.a
<i>Paupertatis amor summus in Ignatio.</i>	176.b
<i>Peregrinatione probandi nouitij.</i>	171.b
<i>Peregrinationis initium Societati.</i>	ibid.
<i>Perfectionis studium.</i>	189.a
<i>Peruigilium armorum quid.</i>	133.a
<i>Petronius Psaurē, tres germanos fratres ad Societ. perducit.</i>	201.b
Petrus	



# I N D E X.

<i>Petrus Apostolus Ignatio sanitatem affert.</i>	129.a
<i>Petrus Canisius Germaniæ Prouincialis.</i>	178.b
<i>Petrus Codatius Laudensis nomen dat Societati.</i>	177.a
<i>Procurator domus professæ Romæ.</i>	206.b
<i>Petrus Contarenus nobilis Venetus.</i>	160.a
<i>Petrus Faber Allobrox Ignatium sequitur.</i>	155.b
<i>Aliis sociis præponitur ab Ignatio.</i>	158.a
<i>Theologiam Romæ proficitur.</i>	165.b
<i>In Germaniam ducitur.</i>	175.a
<i>Petrus Faber &amp; Laines rerum spiritualium administri Ennio Veru</i>	
<i>lano Card. dati.</i>	171.b
<i>Petrus Mascarenias, Regis Lusitaniæ orator.</i>	172.b
<i>Petrus Ortizius, Cæsaris Legatus Ignatium &amp; socios ad Pont. Max.</i>	
<i>introducitur.</i>	162.a
<i>Petrum Fabrum in Germaniam ducit.</i>	175.a
<i>Exercitijs spiritualibus ab Ignatio eruditur.</i>	165.b
<i>Petrus Ribadeneria Toletanus.</i>	210.b
<i>Philippus Archintus, Salassiorum Episcopus.</i>	177.b. 179.a
<i>Pietatis opera publice per Ignatium instituta.</i>	206.a
<i>Pont. Rom. suam operam defert Ignatius.</i>	165.b
<i>Præpositus Generalis creatur.</i>	175.a
<i>Principum Hispanorum filij quinam in patrimonio succedant.</i>	127.b
<b>Q</b> <i>uasitorum sacra tribunalia.</i>	155.a
<b>Q</b> <i>uerimonias suorum perbenigne audit Ignatius.</i>	204.a
<i>Quirinus Garzonius Romæ Ignatium &amp; socios tecto recipit.</i>	166.b
<b>R</b>	
<b>R</b> <i>uennæ quid acciderit cuidam ex Ignatij socijs.</i>	162.a
<i>Realdus Columbus egregius Anatomie magister.</i>	187.a
<i>Regulas perscribit Ignatius.</i>	171.a
<i>Rodolphus Pius Carpensius Card. Societatis protector.</i>	183.b. 208.b
<i>Roma vrbs, totius æquitatis parens.</i>	169.b
<i>Romam ingreditur Ignatius.</i>	140.a
<i>Iterum.</i>	169.b
<i>Romam Patres vniuersi conueniunt.</i>	166.b
<i>Romæ Faber &amp; Laines sacras litteras profitentur.</i>	165.b
<i>Romæ Confessionis &amp; Eucharistiæ frequens vsus restitutus.</i>	166.b
<b>S</b>	
<b>S</b> <i>almanticam ad sua prosequenda studia migrat Ignatius.</i>	149.a
<i>Salman-</i>	



# I N D E X.

<i>Salmantica in carcerem conijcitur.</i>	150.a
<i>Scrupulorum molestijs agitur.</i>	134.b
<i>Seminarium Clericorum in vrbe conditum.</i>	197.b
<i>Senas proficiscuntur Paschasius &amp; Salmeron.</i>	171.b
<i>Septem Urbis templa Ignatius &amp; socij obeunt.</i>	176.a. & 189.b
<i>Sequana fluuius.</i>	152.b
<i>Simon Roterigius Lusitanus Ignatij socius.</i>	
<i>Bassanum secedit.</i>	163.a
<i>In Indiam destinatus.</i>	173.a
<i>In Lusitaniam proficiscitur.</i>	175.a
<i>Item Ferrariam.</i>	164.b
<i>Lusitaniæ provincialis.</i>	178.b
<i>Bassani grauiissima febri correpius.</i>	209.a
<i>Sinæ vltimi.</i>	171.b
<i>Sobrietas moderata animum vegetat.</i>	138.b
<i>Socij priores Ignatij.</i>	147.a
<i>Inconstantes.</i>	159.a
<i>Socij posteriores Parisiis ad Ignatium adiuncti.</i>	155.b
<i>Romæ fictis criminibus circumueniuntur, &amp; absoluuntur.</i>	167.a.
& 179.a	
<i>Socij &amp; Ignatius de constituenda Societate deliberant.</i>	170.b
<i>Socij in varia loca Pontificis missu discedunt.</i>	171.b
<i>Societas Iesu vnde dicta.</i>	165.a
<i>Minima ab Ignatio vocatur.</i>	ibid.
<i>Confirmatur à Paulo III. Pont. Max.</i>	174.b
<i>Item à Iulio III.</i>	183.b
<i>Augetur, &amp; distribuuntur prouinciæ.</i>	178.a
<i>Humilitatis &amp; paupertatis spiritum profitetur.</i>	181.a
<i>Quibus artibus conseruanda.</i>	182.a
<i>Varijs locis exercetur.</i>	184.b
<i>Societatis dignitati in posterum prouidet Ignatius.</i>	169.a
<i>Spectaculis publicis adesse nostros non facile permittit.</i>	195.a
<i>Stephanus Baroelius Nouocomensis.</i>	210.b
<i>Stephanus Guia Cantaber.</i>	160.a
<i>Submissio plurimum valet ad conciliandos homines.</i>	175.b
<i>Sudarium sacrum, in oppido Giennio celebratum.</i>	148.b
T	
<i>Tarusium secedunt Codurius &amp; Hozius.</i>	163.a
Ten-	

# I N D E X.

<i>Tentatur à demone varijs artibus Ignatius.</i>	134.a. & seq.
<i>Tentatione patriæ ac domesticorum nulla fere periculosior.</i>	158.a
<i>Terentium in scholis nostris explicari vetat Ignatius.</i>	198.a
<i>Theodosius frater ex ordine Minorum, à confessionibus Ignatij Romæ.</i>	175.b
<i>Theologiam sacram Ignatius Parisiis aggreditur.</i>	153.a
<i>Timore humano agitur Ignatius.</i>	145.a
<i>De Trinitate liber Ignatij.</i>	136.b
<i>Trinitatis misterium Ignatio diuinitus innotescit.</i>	137.a

## V

<i>Valetudinarij publici ministeriis probandi nouitii.</i>	171.b
<i>Venetias Ignatius perducitur.</i>	141.a
<i>Redit.</i>	144.a
<i>Venetiarum vrbis descriptio.</i>	141.a
<i>Verba suspensa &amp; ambigua, vti subdola mendacii tegumenta, semper est detestatus Ignatius.</i>	204.a
<i>Veronam contendunt Paschasius &amp; Bobadilla.</i>	163.a
<i>Vertranus Loiola.</i>	127.b
<i>Vicetiam Ignatii socii conueniunt.</i>	163.b
<i>Vicetiam petunt Ignatius, Faber, &amp; Laines.</i>	163.a
<i>Vicetiorum liberalitas erga Ignatium &amp; socios.</i>	163.b
<i>Vigilia immoderata vires frangit.</i>	138.b
<i>Vincentius Negosantius Fanensis.</i>	162.b
<i>Virtutis pulchritudo, &amp; vitij seditas explicatur ab Ignatio.</i>	149.b
<i>Visionibus diuinis illustratur Ignatius.</i>	163.a. & seq.
<i>Voto se obstringunt Parisiis Ignatius &amp; socii.</i>	156.b. & 164.b
<i>Votum idem renouant.</i>	156.b
<i>Votum Ignatii perpetuæ castitatis &amp; paupertatis nuncupatum Venetiis.</i>	162.b
<i>Votis tribus solemnibus quartum addunt nostri.</i>	171.b
<i>Vota suæ religionis nostri in Petri, &amp; Pauli solemnî professione suscipiunt.</i>	176.a
<i>Vulgus pluma, &amp; folio leuius.</i>	179.a

## X

<i>Ad Xenodochium publicum diuertit Ignatius.</i>	147.b. 158.a
<i>Xenodochii ministeriis probandi nouitii.</i>	171.b

INDICVM FINIS.



## Errata sic corrigito in Historijs.

Fol.	pag.	lin.		
3	1	vlt.	Terzanabale	Terzanabali
8	1	8.	In mare internū Cuama	In mare internum; Cuama
23	2	10	Betele	Betel
34	1	9	De more distinxerat	de more gēma distinxerat
35	1	19	Batrius	Barrius
65	1	15	ac durum	asperumque
67	1	3	Somatam	Somatram
113	1	16	pogo	pago
123	2	12	Conniute	Conniuere
138	1	10	Per hunc modo	Per hunc modum
164	1	4	tamidu	tam diu.
176	1	34	zamoeni	Zamorini.
195	2	6	obeundum	abeundum
196	2	10	quartana verus	quartana verus
200	1	16	atque vbi quot	atque vbi quod
202	2	15	& ferentes	ferentes
227	2	19	in am	in eam
228	1	18	turbarum	tubarum
248	1	10	Subtraherent	subtraheret
250	1	15	in pifo	in ipso
251	2	35	Alencastrium	Castrium
261	2	27	traiecturos	traiecturus
276	1	15	paulo	pabulo
279	1	6	acerba	acerbe
282			eo eo	ex eo

## In Epistolis, & in Vita Ignatij.

5	1	12	habeas	obeas
9	2	34	nauti	nauæ
13	1	5	verum	rerum
15	2	19	versum	rursum
18	2	10	Conflata	Conflatas
33	1	15	vmbracula	vmbracula
43	2	26	Confidete	confidere
44	1	2	cui illis	cur illis
49	2	30	se se admodum expedirent	se se ægre admodum expedirent
55	1	33	Amidiam	Amidam
60	1	29	actentur	ardentur
65	1	i pri.	deest	mis nostris euellet?
69	1	25	dixisses atque vt est,	dixisses; atque vt est,
107	1	8	daret superfederet	dare superfedere
113	1	33	illius corias	illius copias
127	1	7	Loioleta familia	Loioleia familia
132	1	20	vehementis irritatus	vehementius irritatus
142	1	12	grauiquadam	grauia quadam
148	2	2	pedibus	pedibus
153	1	29	variæ pp Christū exerceret	Varie propter Christum exercetur
155	2	23	palustris	plaustris
161	2	13	euertere sordes	euerere sordes
169	1	2	ne si quid suscipionis	ne si quid suspicionis
		15	ingenti suo periculi	ingenti suo periculo
171	2	13	adiungeret	adiungerent
174	1	8	exemplis vis	exempli vis
174	2	36	cum cæteris collegijs	cum cæteris collegis
176	2	14	incommoda suscipione	incommodæ suspensiones
180	2	9	Lutherianam pestem	Lutherianam pestem
182	1	vlt.	admiretur	admiraretur
183	1	15	precesq; ipsius maiestate	precesque pro ipsius maiestate

f. 183 p. 1. l. 30. deposito. deposito. f. 183 p. 2. l. 21. tū ex ijs. cū ex alijs. f. 187 p. 1. l. 3. ille nihil. ille cū nihil. f. 193 p. 1. l. 34. inuitatis. inuitatus. f. 194 p. 1. l. 36. alijs. alij. f. 202. p. 1. l. 34. concilij. consilij. f. 203 p. 2. l. 20. fatigationem. factionem. f. 204 p. 1. l. 10. impetitia. imperia. f. 205 p. 2. l. 28. nec. ne. f. 211 p. 1. l. 32. regia. regia.



# IOANNIS PETRI

## M A F F E I I.

### HISTORIARVM INDICARVM

#### LIBER PRIMVS.



ETERNÆ mentis numen atque con-  
siliū, quo ab ipsis mundi primordijs  
vniuersa pariter, & singula gubernan-  
tur; fide potius & silentio veneran-  
dum, quàm argumentis ac disputatio-  
nibus indagandum, iure præcipiunt sa-  
pientes viri. Nihil est enim, cœlesti  
rerum omnium dispensatione, vel pro-  
pter ipsius vim atque constantiam illu-

strius, vel propter humani luminis imbecillitatem obscurius.  
Veruntamen, quoad homini speculari fas est, quantumque va-  
let mortalis tarditas ex ipsis duntaxat rerum euentis existima-  
re; diuinæ prouidentiae ratio videtur eiusmodi, vt ingentium  
operum quæ molitur, multo ante fundamenta iaciat; eaque  
per occultas causas, & incrementa latentia, sensim ad te cūm

A fasti-



## *Historiarum Indicarum.*

fastigiumque perducatur. Id adeo, si quis animum aduertat, iam inde ex vltima veterum annalium memoria facile intelliget. Post diram illam totius orbis terrarum eluionem, cum denuo genus humanum in omne scelus atque flagitium rueret, vniusque veri Dei cultum cum dæmonum seruitute commutaret; ne paulatim vniuersa interiret pietas, peculiarem sibi populum diuinæ legis custodem, religionis administrum, oraculorum interpretem Deus immortalis tempore definito condendum esse decreuerat. Quot ante seculis, eam vnam in rem, eximia fide ac sanctitate virum, Abrahamum, ex hominum sæce seuocauit, & propria iniustum nota ipsum, & prolem eius, tanquam generosi armenti sobolem, & quidem præclara cum testificatione seposuit! Rursus, hoc ipso populo per summam impietatem atque perfidiam rebellante, lucem veritatis, procurationem sacrorum, & ipsamet adoptionis iura Deus alio transferre statuerat. Quam multis ante annis urbem Romam exsurgere, & à paruis initijs ad summum interris imperium euehi passus est! Nimirum, vt Ecclesiæ principatum, ac religionis domicilium ibi aliquando locaret; atque, vt vnde omnes populi, & nationes tum iura ciuilia, tum nefarios ritus, ac superstitiones paulo ante petiissent; inde in omnia regna prouinciasque, sine vllō erroris metu, sacrosancta Pontificum scita, & castissimæ cœremoniæ, & bene beateque viuendi verissima præcepta manarent. Denique superiore memoria, cum ex eadem Vrbe salutarem Christi doctrinam in remotissimas nationes propagare vellet, quæ lumen Evangelij, vel antea nunquam acceperant, vel acceptum, incuria, seu longinquitate restinxerant; quampridem fortium & experientium virorum excitauit ingenia, vt ignotas ad id tempus terras, ignotiora maria, tum ad ortum solis, tum ad occasum per summam animi contentionem, perque summa pericula & difficultates pertinaci studio exquirerent! Videlicet quo permutua commercia, dum peregrini cum incolis vel terra nata, vel manu facta, vel alia quælibet in vsum vitæ, pro locorum, & regionum varietate permutant; interea occasionem nati sacerdotes & vitæ innocentia, & Christianæ facundiæ laude præstantes, ex auctoritate Romani Pontificis verbum Dei longè lateque disseminarent; errantesque mortalium greges ab infelicibus

infelicibus vepretis ac saltibus, ad læta Domini pascua caulaf-  
que traducerent. Cuius tam gloriosi facinoris, tamque lon-  
ginque navigationis (ad quam neque fabulosi illi Argonaute,  
neque in cœlestium numerum falso relati Bacchi, Herculesve  
vnquam adspirarunt) quoniam decus ac titulos partim Lusita-  
nia, partim Lusitaniæ finitima Bætica sibi iure quidem optimo  
vindicat; quæ à Bæticiis ad solem occidentem præclare gesta  
sunt, scriptores alij persequentur. Nos, quoniam cuncta com-  
plecti pene infinitum esset, Lusitanicæ tantum conquestionis,  
præsertim vero promulgati ad meridiem, & orientem Euange-  
lij initia, progressasque (quando ita iubemur ab ijs, quorum à  
nutu discedere est nefas) in vnius Dei gloriam, & solatium Ec-  
clesiæ Christi vniuersæ, latinis maximè litteris consignare de-  
creuimus. Quæ cognitio piorum animos variè, ni fallor, affi-  
ciet: lætabuntur haud dubiè, tanta iam ex parte vñsanis gen-  
tium ritibus, ac detestabili Deorum inanum cultu sublato.  
punget eos rursus, atque adeo terrebit, improborum scele-  
re, & prauis dogmatibus agitata, ex orbe nostro ad insulas  
longe, vt inquit Esaias, atque ad vltimas terras tanquam indi-  
gnabunda propalam migrans Christiana religio: vt vel Deo  
vindice regnum à nobis item auferri; vel collustrato lucis Euan-  
gelicæ radijs toto propemodum orbe terrarum, ex diuinis o-  
raculis, effetæ iam ac senescenti naturæ finis propediem adesse  
videatur. Verum hæc summus ipse rerum arbiter pro sua  
infinita bonitate ac sapientia moderabitur. Nobis rem  
tantam parendi magis alacritate, quàm perficiendi facultate  
fufcipientibus, illud in primis veniebat in mentem vereri: ne,  
quoniam permulta cum sacris, tum profanis in rebus, supra  
naturæ vim atque ordinem facta subinde exponentur, narra-  
tio nostra plus fortasse admirationis apud quosdam sit habitu-  
ra, quam fidei. Quocirca denuntio profiteorque iam nunc;  
me nihil in medium esse allaturum, nisi quod è publicis tabu-  
larijs, aut probatis auctoribus, quive interfuere ipsimet rebus  
gerendis, accepero. Quæ mihi copia, quo promptior & ex-  
peditior esset; non subterfugi quominus Olisiponē vsque, com-  
morandi causa contenderem. qua ex vrbe, quod in Oceani ve-  
lut imperium, peropportuno imminet loco, atque ob id ip-  
sum antiqua regum Lusitaniæ sedes est; omnia ferme Indica-



## *Historiarum Indicarum*

rum expeditionum consilia atque acta manarunt. Neque nobis veritate quicquam omnino antiquius vel fuit, vel esse debuit. Nam alioqui, neque Deus immortalis, cui nostra omnis vni desudat industria, commentis ac mendacijs delectatur; & me ipsum mortalibus rebus iam pridem valere iussis, fingendi, vel adulandi causas omnes procul habere par est. Sed iam ad institutum aggredior.

Orbem terræ vniuersum tres in partes diuisit antiquitas. Inuenti demum hi noui tractus quartam adiecere: si quarta appellanda est, quæ vna reliquis omnibus magnitudine ferme par est. Neq; tamen hæc recentiora tantummodo, sed veterum quoq; finium haud exigua spatia prisci homines ignorarunt. Siquidem & in multis regionibus describendis Ptolemæus vir cateroqui summus, & alij geographi insignes hallucinati sunt; & Africæ terræ quicquid à Prasæ promontorio, & interiore Aethiopia, & Lunæ montibus in Austrum extenditur, multaq; & ingentes tum Africæ tū Indico littori obiacentes insulæ, quamuis accuratam eorū diligentiam notitiamq; subterfugere. Nauigandi vero, ante centesimum annum, vel apud Hesperios populos tāta fuit incogniticia, maritimo videlicet vsu astrolabij nondum excogitato, vt ab ora discedere, & alto Oceano se committere nequaquam auderent: sed littora caute legentes, vbi ad æstus maris, aut breuia periculosa peruenerant, quasi repagulis quibusdam à natura, seu numine obiectis, reciperent illico sese, & longius tendere quodammodo nefas arbitrarentur. Itaque promontorium ad Atlantis radices, & aquarum impetu & syrtibus vicinis infame, cui nomen olim fuit extremæ Chaunariæ; rudi sane vocabulo, caput Non, ea tempestate vulgus nautarum appellare solitum est, propterea quod si quis id promontorium superare male sano conatu esset ausus, eum ad suos vltra esse rediturum negarent. Hæc igitur loca gentesque, lingua; moribus, superstitionibus adeo diffonæ, vti Lusitanorum armis tandem apertæ, & Christi Euangelio collustratæ sint, quo clarius pateat, paulo mihi altius ordienda tota res est. In ijs Lusitaniæ regibus, qui prospero euentu rem & suam, & Christianam auxere, præcipua celebritate est Ioannes eo nomine Primus, qui, transmissio in Africam exercitu, Septem urbem, quam Procopius Græce Septon, alij septem fratrum.

trum ciuitatem appellant , de Mauris cepit insigni victoria .  
Huic è Philippa Alencastris Eduardi Sexti Britanniae Regis ne-  
pte , filij fuere quinque , è quibus tertio , vel , vt alij affirmant ,  
quarto loco natum Henricum , scriptores merito in coelum vs-  
que laudibus ferunt : quando præter bellicam virtutem , quam  
in eius vrbis expugnatione cunctis admirantibus explicauit , ea  
fuit sanctimonia vitæ , eaque in Deum , & superos omnes , ac  
beatam præcipuè Dei matrem obseruantia , vt in summa cor-  
poris firmitate , summaque licentia , illibatum virginitatis flo-  
rem ad extremum vsque spiritum retinuisse credatur . Is , Ioan-  
ne patre post fractam Maurorum audaciam vita functo , licet  
perfidum , & consceleratum genus hominum porro insectari ,  
nec tantum è Mauritania , sed ex Africa tota exterminare per-  
cuperet ; tamen , quod ad hæredem regni Eduardum fratrem  
natu maximum eiusmodi expeditio pertineret ; ipse interim  
ad alia non minus præclara se se conuertit , quæ suis & auspi-  
cijs aggredi , & sumptibus tolerare se posse confideret . Præ-  
erat quippe nobilissimorum equitum ordini , quem Dionysius  
tritauius Christi nomine contra barbaros instituerat : ex eoque  
magistratu non exiguos annuos redditus , & vestigalia capiebat .  
Hæc illi dies , noctesque apud animum suum agitati , nihil  
omnino vel ad nominis Lusitani famam illustrius , vel immor-  
tali Deo gratius visum est , quam incognita scrutari maria , no-  
uas in Oceanum classes mittere , & rectam religionem in om-  
nes partes , quoad eius fieri posset , extendere . Cuius rei per-  
ficiendæ eo maiorem veniebat in spem , quo se acrioribus quo-  
tidie stimulis in hanc mentem sentiebat impelli : & per eos for-  
te dies allatum erat , quosdam è Britannia , & Gallia mercato-  
res vi tempestatum ad noua loca delatos , quæ à feris & barba-  
ris dæmonum cultoribus tenerentur . Hæc igitur maximè sen-  
tentia Henrici animo infedit . quare confestim adhibitis ma-  
thematicis , multa de situ orbis , deque cœli plagis exquirere ;  
multa etiam , vt erat acri , & solerti ingenio , partim legere , par-  
tim commentari ipse per se ; multa præterea de captiuis Tingi-  
tanis , & accolis interioris Libyæ sciscitari . Denique dum cun-  
cta circumspicit , rei que magnitudinem , ac difficultatem apud  
se diligenter expendit , intentus interim oppido nouo ad sa-  
crum promontorium cōdendo Terzanabale (quam deinde Vil-



## *Historiarum Indicarum*

lam infantis dixere) fama est per quietem cœlesti monito clementer increpitum, quod cogitata conquisitione tamdiu superfederet, remque adeo piam, & laudabilem ultra differret. Itaque mane, ut primum euigilauit, sine vlla dubitatione duas in præsentia naues omnibus rebus ornari celeriter imperat, precatusque cœli reginam, uti volens, ac propitia cœptis adesset, cursumque dirigeret; lætissimos è copia Turdetana magistros utrique præponit, & ingentibus oneratos promissis, quam longissimè prouehi; & extimos Africæ tractus, ac gentes accurate explorare iubet. Ij, licet laboris, & periculi magnitudinem animo cernerent; tamen principis auctoritate, & insita Lusitanis gloriæ cupiditate permoti (agebatur autem tum annus à Christo nato, supra millesimum quadringentesimus decimus) rem alacres fidentesque suscipiunt. Itaque populo faustis ominibus, & acclamationibus prosequente, cum in Austrum vela dedissent, ultra Atlantis radices, quem terminum nauigationis ad eam diem fuisse diximus, leucas circiter sexaginta (recentioris mensuræ nomen id est, quattuor fere milia passuum singulæ continent) ad Ganariam promontorium deuenere. Quo ne longius tenderent, partim nouis aquarum æstibus vadisque, partim etiam procurrentis promontorij longitudine deterriti sunt. Eadem causa decennium ferme totum alios deinceps aliosque prohibuit, quo minus è sententia nauigarent. Sed nequaquam idcirco Henricus à suscepto consilio destitit: quippe tum ex Afrorum sermone, tum ex mathematica ratione certissimis compererat argumentis, ab ora Mauritaniam, continentes ac perpetuas regiones ultra æquatorem extendi: quæ si pedibus peragrari ardores, aut solitudines vetuissent; mari certe, modo perseverantia non deesset, adiri, cognoscique posse confideret. Nec eum spes fellit. Siquidem anno demum à partu Virginis millesimo quadringentesimo vigesimo, cum sese intrepide nauarchi alto mandassent, multis, & periculosis iactati procellis, varias primum insulas, ac deinde remotiora in singulos annos Africæ littora, ad vsque Leanam (id monti nomen est leucis a Ganaria tercentis, & sexaginta) singulari Dei beneficio cognouere. Quorum è numero viri tres præcipue meriti felicitate virtuteque sunt, ut eorum nomina litteræ omnes ab interitu vindicarent.

dicarent. Fuere autem, Ioannes Consalius, & Tristanus Vassæus, qui omnium primi longe à continenti recedere, & vasto ac furenti Oceano se se credere minimè dubitarunt: ac partim ventis ablati, partim animi robore, consilio quæ prouecti, insulas aliquot, in ijs vnâ hodie nobilissimâ ditionemque; cuiâ Materia nomen est; ad Lusitanicū imperium adiunxerunt: ten quæ; Egidius Annus, qui syrtibus euitatis, & accurate obseruato maris æstu recessuque; Ganariâ promontorium eximia nauigandi arte ac scientia denique flexit, & Christianæ fidei ad Helperios Aethiopas, aliasque inaccessas antea nationes aditum aperuit. Hos autem, Henricus, & qui deinceps eorum industriam sublequuti sunt, pro cuiusque meritis ac laboribus ample remuneratus est. Ac, ne conquirendi ardor in posteris refrigeraret; à Martino V. Pont. Max. impetrauit (quod ipsum ab alijs deinde Pontificibus confirmatum est) vti quicquid à Ganaria ad vltimam vsque Indiam patefieret, id quam optimo iure, & conditione Lusitanicæ ditionis esset. Quinquaginta circiter annos prima illa nauigatio tenuit: quibus demum exactis Henricus cum aliquot locis templa extruxisset, ac varias in regiones munisset viam Euangelio, plenus gloria, & rectè factis migravit in cælum. Huius animi magnitudinem imitatus Alphonsus V. vt primum regni potens fuit (nam Eduardus pater ei mature decesserat, fuitque sub tutoribus ad septimum vsque decimum ætatis annum) quamquam finitimis & domesticis implicitus bellis, in eandem tamen laudem accerrime incubuit, perque strenuos Duces, & Gubernatores, ab Leæna monte ad Arsinarium (quod recentiores viride caput vocarunt) atque inde ad vsque Diuæ Catharinæ promontoriū (is locus est vltra Aequatorem gradus, partesve, duas & semis, hoc est leucas circiter duas & quadraginta) Crucis trophæum, & arma Lusitanica protulit. Multæ etiam insulæ per idem tempus inuentæ, quas commemorare hoc loco non est operæpretium: & commercia varijs cum nationibus instituta. Sed cum Aethiopibus præcipuè occiduis, quam regionem hodie Guineam vulgus appellat, ducto nomine ab vrbe celeberrima Genne, ad quam ingenti fluuio Zanagæ impositam loci opportunitate illecti olim negotiatores vndique confluebant. Patet autem Guinea latissime, & quamquam Zonæ media fer-



## *Historiarum Indicarum*

me subiecta flagrantissimo sole torretur; non tamen idcirco (vt falso prisci putarunt) ab incolis est deserta: quinimmo plurimos numerat populos: è quibus maritimi pisce; mediterranei partim lacertis & immundis animalibus, partim, vbi cœlum fauit, nonnullis frugibus & lacte vescuntur: mutantque subinde loca, non per vicos aut oppida, sed per familias plerunque dispersi: eaque familiæ sæpe inter se, propter inopiã, de aquatione ac pastione decertant: infelix genus hominum, ac seruituti natum, & cum alijs nominibus, tum vnus veri Dei præsertim ignoratione miserandum. Cum ijs igitur per capti uos interpretes agi cœptum à Lusitanis. & quamquam initio propter suspiciones mutuas, vt in re tam subita ac noua, turbatum est; atque etiam ex insidijs Christiani aliquot interempti; tamen cognita mox Lusitiæ Regum iustitia, & nostrorum comitate ac beneficijs deliniti barbari metum posuere: & commeandi contrahendique libera potestate facta, cum veste varij generis, & varijs domestici vsus instrumentis, ebur, & aurum, & mancipia permutabant, nullius aut eumentium, aut vendentium æque bona conditione, atque ipsorum, qui venum dabantur, quippe ex Aethiopiæ sabuletis in opima Lusitani regni arua, & ex tugurijs & mapalibus Olisiponem classe translati, vel ipsa vrbis frequentia rerumque omnium copia, paulatim ad mansuetudinem, & humanitatem erudiebantur: & quod longe præstantius est, mysterijs Christianæ religionis postmodum imbuti, & cœlesti lauacro expiati, è peregrinis dæmonum seruis, hominumque mancipijs, Angelorum ciues, & domestici Dei repente euadebant. Hisce rebus ita institutis, admodum expedire visum, ad mercimonia tuenda, atque ad retinendam cum barbaris amicitiam, c̃ppportunis aliquot locis castella excitare. Quæ dum summa Aethiopum voluntate exstruuntur, interea morbo laboribusque confectus Alphonsus emoritur. Dein regni gubernacula suscepit Ioannes eo nomine Secundus, lætis admodum auspicijs: quando per idem tempus in Aethiopia Christiano primum ritu litatum est; barbaris ad noua sacra cæremoniasque stupore defixis: Lusitanis vero inter ipsam diuinam rem gaudio lacrymantibus, quod sua potissimum opera verus Dei cultus in longinquas adeo mundi partes gradum fecisset: nempe vt impuris se  
data



data victimis loca purgaret : breuique ingentem animorum vim à possessoribus iniquis in Christi libertatē assereret . Quo nuntio magnam in spem erectus Ioannes , vt erat generosi maximè spiritus animique Rex , non modo parta retinere , sed etiam omni ratione amplificare constituit . atque illud præsertim summo conatu peruestigare , num quis ab Atlantico in Eoum Oceanum , vel mari , vel terra transitus foret . quippe iam tum præter acerrimum propagandæ Christianæ fidei studium , ad beatas etiam Arabiæ gazas , & Indici littoris opulenta commercia mentem , & cogitationem adiecerat . Quam ad rem in primis idoneum ratus , cogniti iam littoris dynastas amicitia comprehendere ; haud ita difficili negotio id est consecutus , pacemque & societatem certis legibus fecit cum Beze-guico , & Caramansa , Baio Samano , alijsque regulis . dein ad vltiora exquirenda probatæ virtutis fideique homines familiares suos dimisit . atque id quo libentius facerent ; ac minore cum erroris periculo se se vastum in Oceanum darent ; peritissimis ea tempestate mathematicis Rhoterico , & Iosepho Medicis suis , itemque Martino Boemo , qui se Ioannis Monte regij alumnum ferebat , negotium dedit , aliquid communi consilio excogitarent ad cursum nauum in pelago quamuis ignoto regendum : vt vel abductus à conspectu familiarium sibi syderum nauta , quam tamen cœli plagam , quam remota ab orbe nostro loca teneret , aliqua posset ratione conijcere . ij , quam acerrimo studio re diu multumque agitata , astrolabium denique instrumentum , quod antea ad colligendos stellarum motus duntaxat Astronomi adhibere consueuerant , præclaro fanè inuento ad vsum rei maritimæ transtulerunt : ac pari solertia declinationum tabulas confecere , quibus hodie naucleri ad explorandam locorum ( quemadmodum Cosmographi appellant ) latitudinē vtuntur : vt non parum , hoc etiam nomine , tota Europa Lusitaniæ debeat . Quod si vt latitudinis , ita etiam longitudinis facili negotio rimandæ regulam prodidissent ; nullo propemodum errore perpetuum maris ac terræ cingulum , continuo circumactu , viatores periti conficerent . Sed quia ab ortu in occasum , vel contra ab occasu in ortum , nihil est in perpetua cœli conuersione certum ac stabile , quo dirigere cursum , accessusve aut recessus emetiri possimus ( namque illa ex errantium syderum oppositu subtilis ac perobscura collectio ,



## *Historiarum Indicarum*

collectio, nequaquam est ad hanc quotidiani usus rationem accommodata.) iccirco nullidum longitudinis gradus notari, neque plane perspecta potuit esse ratio itineris. in quo nauium rectores periculosissime sæpe falluntur. credo equidem, in hoc, ut plerisque alijs humanis in rebus, ad mortalium vel acuendam industriam, vel coercendas cupiditates, hac tanta difficultate diuinitus interposita. Veruntamen eius instrumenti beneficio mirum quanta nauticæ rei accessio facta sit. quinetiam ex eo tempore Christi disciplina manare longius cœpit: plures quippe iam viri & prudentiæ, & pietatis laude præstantes, certatim ad huiusmodi expeditiones ultro semet regi offerebant: è quibus Iacobi Cani constantia & virtus in primis enituit. Is, acceptis ab rege nauibus, ultra metas Alphonsi processit ad ostium ingentis fluuij, qui ex ipsis Nili fontibus originem trahens, Zaires ab incolis dicitur: ac tanta aquarum vi, præsertim hyeme, sese in Oceanum infert, ut prodatur in octoginta millia passuum ab eo vinci mare. quod ex dulci nimirum haustu præternauigantes intelligunt. Columnas aliquot Ioannis iussu è Lusitania secum aduexerat Canus: quibus præter Crucis figuram, & regij stemmatis insignia, Latinis & Lusitanicis verbis erat inscriptum, quo quæque terrarum spatia rege, quo duce, quo tempore aperta forent. Ex ijs ergo columnis vnâ, ditionis Lusitanicæ testem, in ostio collocat: deinde aduerso flumine subuectus, errantes passim Aethiopum greges videt, atro colore, vibratoque capillo, ut cæteros, veruntamen, ut vberiore solo, sic etiam ingenio moribusque longè mitiores. quippe leuibus duntaxat munusculis, & benigno vultu inuitati, sese aduenis tanta securitate credebant, ut eorum quoque nauigia sine villo metu, vel suspicione, inuisendi gratia conscenderent. Veteres amicos, vel consanguineos diceres, si communio intercèderet linguæ. Sed è multis ac varijs interpretibus inuentus est nemo, qui sermonem gentis teneret. nutibus ergo agébatur. quibus haud ægre cognitum est, præpotentem regem, cui cuncti pareant, plurium dierum itinere introrsum abesse. Quo audito Canus aliquot è suorum numero ad singula propius exploranda incolis ducibus mittit in regiam. ijsque obsidum loco relictis, præcipuæ indolis quattuor ipse vicissim Aethiopas in Lusitaniam asportat, persancte pollicitus,



citus, quintadecima Luna (quæ temporum ibi momenta ob-  
feruantur) sese illos incolumes patrio redditurum solo. ij por-  
ro, inter nauigandum, & Cani cura, & sua ipsi docilitate, Lu-  
sitani sermonis consuetudinem nacti, de Congi regno (sic  
enim appellari denique patuit) deque eius opibus, ritibus, in-  
stitutis cuncta postmodum ex fide atque ordine retulerunt.  
Eorum aduentu Ioannes mire lætatus, & collaudata Cani pru-  
dentia, nouos iubet hospites in primis benignè, & copiosè  
tractari. cumque ex iis multa per otium quæsiisset, veritus ne  
longior mora Lusitanis obsidibus aliquid afferret incommo-  
di, mandat Cano, Aethiopas quam optimè rursus acceptos  
quam primum in patriam reportet, suosque recipiat: tum, ubi  
vltiora lustrarit, in reditu ad Congi Regem adeat ipsemet:  
eumque omni ratione ad Christum allicere studeat. Nec mo-  
ra: tempestatem idoneam nactus Canus, peregrinos Congum  
relatos, cum obsidibus bona fide permutat. ac ne tempori-  
bus excluderetur, continuato in præsentia cursu, Leucas vltra  
id regnum ducentas prouehitur: & cuius dixi formæ columnas  
duas duobus ponit locis: quorum alteri à S. Augustino (cuius  
in diem Natalem appulsus inciderat) alteri ab ipsomet lapide  
nomen inditum est. Inde Congum reuectus mira gentis gra-  
tulatione, ad Regem ipse cum amplis muneribus, & egregio  
comitatu contendit. Rex quod mira quædam de Ioannis mu-  
nificentia, & comitate à suis audierat, summa cum honoris, &  
mutuæ beneuolentiæ significatione Canum aduenientem ac-  
cepit. Exinde pedetentim Canus, quemadmodum in manda-  
tis habebat, ex occasione sermonem de rebus diuinis inferre,  
ac Regem adhortari, vt, spretis inanibus Dijs, vnum Deum cœ-  
li terræque conditorem agnosceret. Atque hoc loco vel ma-  
ximè patuit, ad conuertendos animos quanto plus in perspe-  
cta caritate, quàm in verborum apparatu momenti sit. Mili-  
taris homo erat Canus, & ferro potius quàm litteris innutri-  
tus. ac nihilominus rudi eius oratione Rex, videlicet officijs  
nostrorum ante captus, ad studium veræ pietatis adeo exarsit,  
vt aures ad Canum semper sitientes afferret, ac multa ipsemet  
vltro de religione quotidie quæreret. Quinimmo in eundem  
animi sensum familiares quoque suos, & Regni procures, aper-  
te monendo hortandoque pertrahere nitebatur. Accedebat

ad



## *Historiarum Indicarum*

ad hæc, internus auræ cœlestis afflatus, qui mentes Aethiopum cæcas ad rectum salutis iter occultis motibus prouehabat. Iamque agro ad Euangelij semen accipiendum subactō; Cani reuersionis tempus instabat. Quem Rex tametsi aduocatum sibi in Lusitania videbat fore, tamen pro instituta consuetudine perinuitus dimisit: deditque proficiscenti comites pueros nobiles, præfecto Zacuta, vno ex iis qui nuper in Lusitania fuerant. huic etiam atque etiam mandat primum vti suo nomine Ioanni pro immortalibus eius in se promeritis gratias agat ingentes; deinde vt ab eodem suppliciter petat, ipsum oratorem & pueros cœlesti lauacro expiatis, & Christianis præceptionibus probe institutos, cum piis aliquot summi Dei sacerdotibus Congum remittere ne grauetur. vehementer optare se cum liberis, & propinquis, & regno si fieri possit vniuerso, Christiana sacra suscipere. Addit legationi munera, magnam eboris vim, vestemque permultam, (hæc Aethiopum gaza est) & palmarum foliis admodum scite atque artificiose contextam. Ea vero legatione Ioannes, vt erat egregie pius, maximo gaudio cumulatus est, cum tantam pandi portam Euangelio cerne-  
ret. Ergo, simulatque maturum est visum, festo ornatu & solenni pompa Ioannes, & Eleonora vxor Zacutam; pueros alios alij principes viri veteris Ecclesiæ instituto lustralibus aquis gratulabundi admouere, & Zacutæ quidem, Ioannis; cæteris vero sponforis cuique sui nomen impositum; Baptismo peractō, confestim idoneis traditi præceptoribus, totum biennium summa cum diligentia Christianis moribus, & mysterijs imbuuntur. Ac tum denique perhonorifica legatio in Congum decreta cum regalibus donis, & sacrorum apparatu magnifico. neque neophyti modo ad suos remissi, verum etiam è sanctissima Dominicana familia viri tres probatæ virtutis atq; doctrinæ delecti, qui apud eosdem Aethiopas, & docendi, & initiandi munere fungerentur. accessere ad hos etiam architecti cum fabricis ad templa vero Deo in illis regionibus extruenda. Princeps legationis fuit è præcipua nobilitate vir, Consalius Sofa. Huic inter nauigandum pestilentia absumpto, Rhotericus fratris filius omnium voluntate sufficitur. Magna interim apud Aethiopas erat expectatio nouæ religionis. & cum ceteri ferme summi atque infimi Christianorum aduentum valde expetebant;

tum



tum vero audisime Regis patruus, qui maritimis Congi populis imperabat, quam Congi partem Sonum incolæ nominant. Is, vt primum naues ad littus applicitas audiuit, ingenti stipatus frequentia, magnoque cymbalorum ac tubarum strepitu, descendentibus nostris obuiam prodijt, vix præ gaudio sui compos. Et quoniam exacta iam ætate erat, ne oblatam sibi diuinitus occasionem frustra elabi sineret, baptizari se statim voluit vna cum altero è filiis paruulo, quippe qui per ætatem sibi consulere nondum posset: alterum iam adultum, quamquam eodem studio vehementer incensum, & obsecrantem etiam atque etiam, ne se cœlestis illius beneficij expertem vellet; honoris tamen & obseruantia causa, Regi, Regisque liberis in tanto mysterio anteuertere non est passus. Temporario igitur templo è frondibus ac ramalibus raptim excitato, aræ tres Christiano more adornantur. ac, sacris rite perfectis, primus ex omni memoria baptismus ille in ijs terris incredibili omnium lætitia celebratus est anno post Christum natum millesimo quadringentesimo nonagesimo primo. Patrem nouo nomine Emmanuel, filium vocari Antonium placuit. Nec modo vultu ac veneratione conceptam religionem ac fidem prætulit senex: sed etiam aduocata concione ipsemet è superiore loco in simulacra & nefarios ritus quibus ad eam diem dediti fuerant, adeo acerbè inuectus, & præteriti temporis errata & flagitia tam grauitè ac dolenter est detestatus, vt animo planè immuratum, ac Deo plenum haud dubie cerneret. Iis rebus cognitis maiorem in modum lætatus est Congi Rex: perque eam gratulationem ad patruum ditionem ac fines munifice adiecit agri quod leucas in longum triginta, in latum decem pateret. Quo tanto de se Regis iudicio magis, magisque animatus Emmanuel, ad superiora Christiani animi documenta non minus præclarum adiūxit aliud. siquidem graui edicto conquesta vndique idola, quamquam multis id ægre ferentibus, & in cumulum congesta, publice concremauit. Præterea Christi Sacerdotes, quamdiu ibi substitere, tanquam è cœlo delapsos omni officio prosequi, & caritate compleri: de fidei mysteriis, deque variis virtutum generibus assidue percunctari: Deum vero suppliciter obsecrare, vt quando multo maximam vitæ partem in cacodæmonis famulatu posuisset miser, quantuluncunque supererat temporis,



## *Historiarum Indicarum*

ris, totum id in Christi Domini cultu, & in vera pietate consumere sibi liceret. Iam rei diuinæ quanto cum silentio, vel tremore potius interesset, ex eo patuit, quod iuueniliter interea strepitum cientes ad ianuam templi honorarios ephebos principum filios, illico mactari imperauit: indignum facinus ratus, augustissimum illud sacrificium, in quo pro salute hominum Deus ipse immolatur, ab hominibus negligi. Itaque dubio procul adolescentes ieiis & quotidianæ apud nos (quod pudeat) noxæ poenas capite ipso luissent; ni ætatem ac genus miserati, & diuinæ insuper clementiæ memores Lusitani vehementius obstitissent. Iamque ab Congi Rege nuntii aderant legatum orantes, ne aduentum ultra differret: Regem in vrbe, cui Ambasse nomen, patrui baptismo, & conuersione lætissimum festos agitare dies: nihilque illi esse longius, quam vt, elūtis toto animo sordibus, ad filiorum Dei cætum vna cum cæteris aggregetur. Hoc nuntio accepto, moræ nihil interponendum est visum, nauibus modico relicto præsidio Sosa, comitesque sese in viâ dedere. Quibus in digressu, præter cæteram benignitatem, ducentos etiam stipatores Emmanuel tribuit: itemque ad onera subeunda, vim hominum ingentem, quis potissimum sacram suppellectilem baiularet, admirabili quadam alacritate certantium. Vbi ad medium ferme iter ventum est; Præfectus regius vnus, ac postmodum alter officii causa nostris occurrat. Ad urbem vero appropinquantibus oppidani tripartito agmine obuiam prodire, de more gentis armati, Lusitaniæ laudes, & præclara in se beneficia carmine concinentes: ita structis ordinibus, & eiusmodi gradu ac symphonici genere, vt supplicantium apud nos pompæ speciem quandam exhiberent. Modos inibant pauci, tum cæteri sequebantur: ac subinde vniuersi plenissimo sonitu elatis in spatia certa vocibus, æthera feriebat. Hi nostros ingenti gaudio in medium acceptos eodem ordine ad regiam vsque perducunt, tanto populi concursu, ac turba ita conferta, vt nostris aditus ad Regem vix atque ægre patuerit. Is in edito suggestu, vt ex omni parte conspici posset, eburneæ sellæ insidebat mitratus infula è palmæ foliis, opere subtili & eleganti perfectæ: à capite ad pubem nudus: cætera ad pedes vsque vestis bombycina contegebat: læuum brachium armilla ex orichalco adornabat: equina cauda pendebat ex humero, id solis

Regibus

Regibus datum. Denique introductus legatus, quàm honorificentissime excipitur. salutatione peracta, expositisque sui Regis mandatis, illico per sacerdotes adstantes, dona, vestem pretiosam, tabulas pictas, aurea vasa & argentea, & omne Christiani ritus instrumentum in conspectu populi totius petente idipsum Rege proferri iubet, tum Rex perattente singula contemplari: quem quæque in usum, quidve significant, curiosius quærere. In iis præfulgidum erat crucis vexillum, quod solenni precatione consecratum Innocentius VIII. Pontifex Maximus Lusitano Regi ex Vrbe Roma transmiserat. eo explicando confestim Rex & concio tota venerabunda procubuit: nâque inter illam sacrorum expositionem Aethiopes adeo intentis oculis gestus motus quæ Sacerdotum obseruabant, vt eodem pene quo Lusitani momento capita submitterent, iungerent palmas, genua flecterent. Ab eo spectaculo nostri in hospitia benigne diuisi. tum de Regis & Reginae baptismo sedulo agi cœptum. Id quo maiore apparatu, ac cæremonia fieret, templum Christiano more prius ædificari placuit. opus erat sane difficile tum alias ob causas, tum quod lapides & cæmenta longe admodum petenda forent. Sed tantus fuit ardor, vt breui comportatis vndique necessariis, urgente atque instante Rege, multis structoribus agi res cœpta sit. Cruci dicanda erat ædes: quare primus lapis est positus quinto Nonas Maias: quo die Ecclesia salutaris ligni inuentionem anniuersaria gratulatione concelebrat. Dum hæc maxime fiunt, ecce tibi à regni finibus trepidi nuntii: vastari agros, tecta inflammari, hominum ac pecudum prædas abigi. Lacus in interiore Aethiopia est ingens, ad instar pelagi, prorsus vt leucas centum in longitudinem patere dicatur: ex quo tres nobilissimi totius Africae amnes, Nilus (cuius ortum tanto studio frustra peruestigauit antiquitas) in mare internū Cuama, & is, de quo supra dixi, Zaires in externū effluunt. in eo lacu aliquot visuntur insulæ; & ex iis quædam tantæ magnitudinis atque frequentia, vt triginta hominum millia in bellum cogant. Sed præcipua celebritate populi Mundequeti sunt, qui per eos forte dies ad arma consternati ab Congi rege defecerant, magnaque manu incursiones in regni extrema faciebant. Aduersus id malum, quoniâ & celeritate, & ipsiusmet regis præsentia opus erat, ne quid sibi interim



## *Historiarum Indicarum*

interim aduersi euaniret, occupat Rex baptismi Sacramento æternæ salutis consulere. Nec Regina rem longius distulit, atque ad indicandum in Lusitaniæ reges grati animi obsequium, ille Ioannis, hæc Eleonore sibi nomen desumpsit. Ingens Aethiopum multitudo ad spectaculum undique affluerant. Ex ijs procures aliquot Regis exemplo & prædicatorum adhortationibus incitati, se per idem tempus ad Christum adiungere. nam è duobus regis filijs alter ad omnem virtutem ac pietatem propensus, natus maior, ad regni fines tutandos festine præcesserat: iunior alter, Pansus Aquitimus nomine, nimirum ut esset, qui pios postmodum exerceret, à nefaria superstitione, & auitis moribus nullo pacto abduci se passus est. Sub hæc, raptim coactò exercitu Rex admittis Lusitanis aliquot, in hostes tendit. Abeunti Sosa crucis vexillum de manu porrexit: hortatus pergeret in dimicationem alacer: signi eius beneficio (tantum fiducia ne deesset) hostibus utique superiorem futurum. Nec vana fuere promissa: prælata cruce fuis, fugatisq; rebellibus paulo post victor Ioannes in patriam redijt. Quantem natus maior filius est secutus: qui cum Christianæ doctrine diligentem in primis operam dedisset, perducto iam ad fastigiū templo, summa populi celebritate baptismo lustratus est, Alphonsusque appellari se voluit; quo nomine Ioannis Lusitaniæ regis filium vocari didicerat. Ac, ne quid ad lætitiā deesset, baptizati cum eodem insignes viri permulti. Inde profectus in Ifundos, quibus populis iam tum ex parentis auctoritate imperabat, Apostolico apud eos munere ipsemet fungi cepit ac veritatis lucem admirabili studio promiscue omnibus impertire. Quo tanto Christianæ rei incremento admodum lætus in Lusitaniā reuertit Sosa, relictis in Congo sacerdotibus ad cœpta promouenda: verū ij partim insolitis caloribus, & celi grauitate consumpti, partim etiam (quæ vicissitudo est rerum) ab incolis aspera atque acerba multa, absente præsertim Alphonso, perpessi sunt. Etenim, quādiu de Ecclesiasticis ceremoniis, & de mysteriis rectæ in Deum fidei est actū, ea tametsi hominis captum infinitis partibus superant; tamen quia ob id ipsum Deo digna, & rationi consentanea videbantur, haud ita repugnabatur ab ethnicis. Ast ubi de iustitia, temperantia, submissione serio præcipi est ceptum; & Christianæ disciplinæ

plina institutis, abiicienda auguria, male parta reddenda, con-  
donanda iniuria, aspernanda libidines, frangenda cupidita-  
tes erant; enimvero tum quasi ventilabro ad trituram adhibi-  
to, boni viri illico secerni ab improbis: alteri, vel amore virtu-  
tis capti, vel poenae metu perterriti, æquitate delectari; sectari  
pacem; voluptates repudiare; duces & rectores animorum  
suorum honore & benevolentia prosequi. alteri denuo dæmo-  
num laqueis irretiti, ad ritus nefarios, atque ad avaritiam, ac  
superbiam, & pristinas turpitudines miserandum in modum re-  
uolui, odisse lucem, magistros auersari, & à piorum consuetu-  
dine longe refugere. Nec vulgo tantum serpebat vitium: no-  
tissimus ac ditissimus quisque arduum ac difficile virtutis iter  
eo magis horrebat, quo maiora sibi malorum irritamenta, &  
deliciarum illecebræ suppetebant. Rex demum ipse, qui ratum  
initio ardorē ac firmitatem animi præsetulisset; vbi à lactis dul-  
cedine ad solidos cibos traduci est ceptus, desiderio pristinae vi-  
tæ paulatim adeo elanguit, vix vt in eo roboris Christiani quic-  
quam agnosceres. Occursabāt scilicet eius animo pristina oble-  
tamenta, ludi, compotationes, quæq; ebrietatē sequuntur: offe-  
rebant sese identidem auspicia, & sortes, quibus ad amentiam  
omnis ferme barbaria dedita est; titillabat sensum, effundendę  
iracundiæ, & doloris puniendi suauitas. quibus quasi machi-  
nis, vrgente præsertim dæmone, sensim de statu suo deiecta mēs  
ita obdurnuit, vt cum internas religionis & officij recordatio-  
nes obstinate repudiaret; tum salutaria sacerdotum hortamē-  
ta ac monita, non modo ad animum, sed iam ne ad aures qui-  
dem admitteret. Accedebat, ad res profligandas, acerrimum  
dæmonis telum, muliebris coniuratio. Quippe, vt cæterę fer-  
me gentes, ita etiam Aethiopes, præter eam, quam iustæ vxo-  
ris habent loco, singuli pellices alere consueuerant plures pau-  
cioresve pro opibus. Eæ cum ex inuectis nuper sanctionibus  
pelli, aut ablegari se à viris quotidie cernerent, vt est impo-  
tens iracundiæ sexus, damnum & ignominiam non tulere: cæ-  
tibus habitis consensu per se perque communes amicos cum  
Rege vehementer agere insistant; aduentitias religiones, du-  
rumque & horridum vitæ genus abiiciat; præsentibus bonis,  
& copia rerum quoad licet fruatur: neu incertam spem futura  
felicitatis, tanto pretio, tantaque commodorum & volupta-



## *Historiarum Indicarum*

rum iactura sibi emendam existimet. Hæc & alia eiusmodi blandimenta cum neque Rex inuitus acciperet, & eadem tabe infecti permulti, ac præsertim Regis filius Pansus Aquitimus adinuaret; breui maximum in discrimen adducta Christiana tota res est. Obstabant sceleratis conatibus fideles ac boni, ut numero inferiores, ita diuino præsidio & causa longè superiores. Egregium vero se pietatis vindicem & assertorē præbebat Alphonsus: patrisque miseratus insaniam; dictis facisque neophytos in fide atque in officio continebat. Ad eū tollendum obicem, procères aliquot Pansum incensum iam regnandi cupiditate omni ratione fouere; Alphonsum absentem varijs criminationibus patri suspectiorem indies reddere instituerunt. degenerasse illum plane in externos mores; nihil iam patriæ vel auitæ consuetudinis pati: Regem verò ipsum ita, vel contemnere, vel odisse; ut in eius contumeliam artibus magicis, quas à Christianis nuper acceperit; amnes exsiccet, vitiet fruges, atque adeo regias pellices ultro ad se ipse pelliciat. Eiusmodi calumniis atque portētis cum iuuenis innoxij famam ex composito quotidie lacerarent; zelotypum senem, & in affecto iam corpore animi quoque viribus defectum, facile perpulere, ut Alphonsum omni dignitate, honoribus, vectigalibus per summam iniuriam exueret. iacuissetque porro in solitudine & squalore circunuentus & proditus Dei seruus; ni diuino instinctu coorti quidam ex optimatibus, regem aperte increpuissent, quod hæredem regni destinatum, stirpis maximū, eximia virtute ac pietate filium indicta causa damnasset. Reputaret secum illius in arcendis hostibus præclara facinora; in tuenda popularium concordia studium; in ipso Rege colendo pietatem, & fidem. dein videret, num tantæ indoli, tantisque laudibus consentanea essent, quæ ab inimicis ad inuidiam conficta nimium patulis auribus in animum demississet. Quin per idoneos viros in filij vitam & actiones inquireret? ac perspecta demum & cognita veritate, quod equum videretur, & in reum, & in accusatores, pro merito cuiusque statueret? Hisce monitis quasi è veterno excitatus Rex, ac seipsum leuitatis incusans, per summam dissimulationem quæsitis ijs, quæ Alphonso obiecta erant, cum prorsus vana & commentitia comperisset; maxima bonorum gratulatione infontem filium in pristinum

pristinum dignitatis & honoris ac gratiæ locum extemplo restituit; consceleratos calumniatores, ne quid tale postea quisquã auderet, perpetua notatos infamia securi percussit. Cuius tanti tamque insperati beneficii magnitudinem Deo acceptam referens, uti debebat, Alphonsus, multo etiam ardentius ac liberius ad Christianam fidem tuendam atque amplificandam incubuit. ac præter cæteras artes exterminandis gētium ritibus ad eam diē adhibitas; regno toto palam capite sanxit, ne quis inanum Deorum effigiem vilam vel priuatim, vel publice coleret, haberetve. Quo edicto in rabiem efferati aduersarii, frequentes in regiam coeunt; ac tumultu per operas excitato, credulum ac timidum Regem in eam sententiam adducunt, ut, nisi reuocetur illico edictum, ingentem seditionem adesse non dubitet. Hoc ille timore correptus, continuo per celeres nuntios admonet filium, videat etiam atque etiam quid agat, quo progrediatur; neu peregrina ac noua religione mordicus retinenda, se suosque omnes in apertum capitis ac fortunarum discrimen obiiciat. Cum ille nihilominus in incepto perstaret, Deumque multo magis quam homines metuendos duceret; ira percitus Rex iubet Alphonsum ad se quam primum venire.

At ille, cum nascentis eius Ecclesiæ salutem in suo capite verti probe intelligeret; pericula belli excusando, variasque necendo moras, tamdiu rem distulit, quoad lethali morbo implicitus parens, cum ægrum spiritum per multas curationes in dies aliquot extraxisset; tandem superante medicamenta vi morbi, demortuus est. Interea Pansus & sua ipse cupiditate, & improborum suasu, non dubia spe regnandi concepta, sollicitare promissis Aethiopas; blande singulos appellare; viuendi licentiæ & libertatem ostendere; denique ad excludendum aperta vi fratrem arma & copias comparare. Quibus de rebus, & de patris obitu, à Regina matre, quæ ab eiusmodi consiliis abhorrebat, certior factus Alphonsus, quam maximis itineribus quam occultissime noctu Ambassæm urbem ingreditur: atque ut primum diluxit, populum magna rerum nouarum expectatione suspensum ad concionem vocat. Ibi orsus à primo Lusitanorū in eas regiones aduentu; commemoratisque eorum in se, parentemque, ac totam nationem promeritis; quod tales viros, tamque salutarem sibi traditam ab iis doctrinam grato pioque ani-



## *Historiarum Indicarum*

mo coleret, foueretque; iccirco se à fratre sectatoribusque ipsius toties insidijs appetitum, & per falsas criminationes fama, fortunisque spoliatum fuisse conquestus est. Pansum, viuo & spirante etiam tum patre, alienam hæreditatem spe, & cupiditate impia deuorasse: eodem vita functo, iustum hæredem, quando per fas nequeat, per vium ac nefas à patrimonio arcere: si quid apud eos gentium ius, si quid vetustus regni mos, si quid etiam æternæ salutis ratio valeat, ne se maiorem natu, Regem legitime designatum, pacis ac beatitudinis omnium cupidissimum; iuniori fratri consiliis impiorum deprauato posthabendum existiment. Caueant vero etiam atque etiam, ne à veritatis oblata sibi diuinitus luce ad cæcas iterum tenebras delabantur: neu Pansi minas, paratasque ab eodem copias pertimescant: Deum immortalem, cuius in eo negotio agatur causa, pro summa iustitia & bonitate; rectè sentientibus affuturum. Hæc, & alia ad tempus accommodata, cum ingenti spiritu perorasset; tantus repente motus animorum est factus, vt incredibile consensu Alphonsum protinus Regem æqui pariter & iniqui consalutauerint. Quibus rebus confestim ad Pansum in suburbana castra perlatis; vt quam minimum spatij Alphonso ad comparandum relinquëret, cum iis copiis, quas habebat, duplici instructa acie continuo infestus ad urbem aduolat. Neque perterritus ea re Alphonsus; tum armatos, quos circa se habebat pauciores quam credi possit (non plusquam sex & triginta fuisse Rex ipse per litteras publicas admodum religiose testatur) tum ceteram imbellem turbam, quæ ad regiam perculsa metu confluxerat; bono ac præsentianimo iubet esse. Deum verum, quem spretis falsis Dijs venerari instituërint; pro ipsis haud dubie pugnaturum. Nec vana cecinit, vbi ad teli ictum est ventum, Christiani armati, inermesque, sublato pariter clamore, *I E S V M* Deum, & sanctum Iacobum, ex disciplina Lusitana ingeminant. mirum dictu: ad eas voces tanquam cœlesti fulmine afflata prior acies, cum aliquandiu attonitæ similis fluctuasset, terga postmodum vertit. cumque eandem trepidationem pauoremque subsidij intulisset: turbatis eo impetu ordinibus, conuersisque illico signis, effusa omnes fuga saltus auios & nemora petiere. Hanc tam incredibilem victoriam, ac plane diuinam, alia non minus admiranda subsecuta res est.

Cippus

Cippus erat in sylvis, caprandæ cuiuspiam feræ paratus à venatoribus. in eum cippum cursu præcipiti cum se Pansus per imprudentiam induisset; corpore toto grauius conuulso sic hæsit, vt explicare se inde nulla vnquam ratione valuerit. Comprehensus, & in custodiam traditus, frustra nitente Alphonso conseruare germanum fratrem, & ad Christum adiungere; in pertinaci mentis duritie, & voluntaria cecitate miser animam efflauit. Longe melius & saluti, & existimationi suæ consuluit is, qui Pansi ductabat exercitum. siquidem è fuga retractus, cum sibi necem instare minime ambigeret; misit qui Regi demisse nuntiaret; non deprecari se mortem, quam suæ temeritati debitam præclare nosset. id vero omnibus votis expetere, obtestarique, ne se absque fidei Christianæ mysterijs ex hac vita excedere patetetur. ipso congressus initio, circa Alphonsum apparuisse viros humana specie augustiores; ipsius, quam Lusitani adorarent, crucis nota distinctos, clarissima circumfusus luce, vultu acerrimo præliantes: eo nimirum viso Pansi milites ingenti horrore perfoscos, extemplo se in fugam dedisse. itaque sibi non esse iam dubium, quin, præter Christianorum Deum, nemo vel in terris, vel in cælo colendus adorandusque sit. Neque aspernatus est resipiscentem Alphonso: quin potius clementer accepto, & per baptismum in Christianos relato, vitam & incolumitatem ea lege concessit; vt purgando in posterum verrendoque Sanctæ Crucis templo cum suis operam daret; & in mystici lauacri vsum, puros latices religiose conueheret. Ea victoria magnum rei Christianæ momentum attulit. regni possessione adita, & barbaris quotquot postea semet Euangelio opponere sunt ausi, perpetuo felicitatis tenore superatis, Alphonso quinquaginta ipsos annos (tot enim deinde regnavit) hominibus verbo & exemplo ad omnem virtutem ac pietatem erudiendis, egregium & pastorem populorum, & vineæ Domini cultorem, ad extremum vsque se præstitit. Per idem tempus quo Christiana sacra in Congum perlata sunt; eadem Regulus quoque Beniensem, Congo vicinus, ab Ioanne per legatum expetijt, Lusitanicæ magis amicitie ac præsidij spe, vt euentus docuit, ad opes imperiumque firmandum; quàm quod de suscipienda Christiana religione serio cogitaret. Quocirca Sacerdotes ad eum summa Ioannis voluntate profecti, & ab



## *Historiarum Indicarum*

anitis erroribus, ritibusque sacrilegis perditum hominem diu multumque reuocare conati, cum nihil omnino proficerent, Ioannis demum accitu in Lusitaniam irriti rediere. Lætioribus initis, exitu etiam tristiore fuit alia per eosdem ferme dies Lusitanorum expeditio. In ijs annibus, qui Aethiopiam occidentalem interfluunt, in primis nobiles duo censentur, Gambia, & Zanaga, cuius paulo ante meminimus. Stachirim, Daratumque prisci dixerunt. Intra duo hæc flumina quicquid spatij longo procursu in Arsinarium usque promontorium desinit; populi tenent ij, quos vulgus Ialophos appellat. Horum Rex nomine Bemoinus, contracta cum Lusitanis amicitia, & crebris à Ioanne muneribus, nuntiisque ad stipendia Christi sollicitatus, cum nihil tale agitare animo; Lusitani tamen regis optima studia, & spem varijs promissis, ac frustrationibus eludebat: idemque Christianos aduenas in primis amicè liberaliterque tractabat; quod eorum commerciis ac societate suas opes non mediocriter augeri quotidie cerneret. Sed quod vitæ genus ut sequeretur, nullis vnquam rationibus adduci potuit, id ipsum ut ultro exoptaret, denique malo, miserisque coactus est. Siquidem regno pulsus propinquorum insidijs, cum illud frustra sæpe recuperare tentasset, victus aliquoties fugatusque, ad extremum in Lusitaniam exul cum paucis perfugit ad expertæ virtutis & beneficentiæ Regem: ab eoque supplex infimis precibus auxilium petijt. atque id quo facilius impetraret; baptizari cum suis (ij erant viri nobiles ad quinque & viginti) & Ioannem de Regis nomine dici se voluit. Celebratum est mysterium tertio Nonas Nouembris, anno post Christum natum millesimo quadringentesimo nonagesimo primo, mira Pontificum & procerum gratulatione, & frequentia: exhibitique per eos dies publice ludi, conuiuia, venationes, & spectacula equestria: in quibus Ialophi desultoria arte, & agitandi peritia, ita se admirabiles præbuere, ut Numidis ipsis (quorum in celeritate motuque corporis præcipua laus est) agilitatis palmam omnium iudicio consensuque eripuerint. siquidem tanta erant membrorum vel dexteritate, vel robore, ut equi incitatisimi ephippijs nulla omnino cursus intermissione tum recti insisterent, corpusque circumagerent; tum repente insiderent, dispositosque humi lapillos ad vnum inde colligerent, tum etiam momento

momento desilirent, resiliereñtque. Sub ea Rex Neophytus Romano Pontifici per supplices literas rite obedientiam detulit: idemque in Lusitaniæ Regis ditionem iure beneficiario, ac voluntaria deditione concessit. ac se, modo amissa reciperet, Lusitanis ad interiores Libyæ reges, & pretiosa metalla ducem fore professus est. Iamque exsulis & nota probitas, & afflictæ fortuna, Lusitanum regem, & regni principes ad misericordiam allexerat. quare idoneo subsidio adiuuandum hominem ratus Ioannes, & insuper haud negligenda quæ ab eodem ad gloriam diuitiasque proponebantur; viginti validas naues deduci, & omnibus rebus ornari quamprimum imperat. In eam classem, præter nautas & propugnatores, Euangelici quoque præcones impositi, Aluaro Dominicano præfecto, eximie virtutis ac sapientiæ viro, quo rex ipse ad sacras confessiones uti consueuerat, additi præterea, non modo, ut in superiorem classem fabri, sed etiam, ne materiæ inopia laborandum foret, cements cum reliquo ædificationis instrumento. iam enim Ialophi consensu Lusitanus arcem ædemque sacram in Zanagæ ripis, opportuno ad merces exponendas imponendasque loco, excitare decreuerat. Verum tantus hic apparatus, ac ipse non sine causa conceptæ, paulo post in irritum cecidere. Siquidem delata iam ad Zanagam classe, & castello inchoato (cuius etiam num exstant vestigia) Petrus Vasaus, cognomento Bisacutus, qui classi cum imperio præerat; sine metu versantem in Prætoria naui regem Ialophum pugione confodit; vel fraudis ac perfidiæ suspicionibus incitatus, vel pertæsus cœli soli que; quod ibi paucis diebus complures Lusitani perierant. Regis mortem cum à barbaris, tum à nostris valde tumultuatum: ac ne quod grauius acciperetur incommodum, naues non paruo Ioannis dolore in Lusitaniam reductæ. Ita maximi compendij rem, quæ & plurimos homines Christo conciliatura, & Lusitanis ad interiora commercia, & inclytas Libyæ aurifodinas aditum præbitura videbatur, vnius hominis iracundia momento corrupta. Veruntamen eius classis fama, bellicusque apparatus, & profugi regis causa benigne suscepta, non parum ad Lusitanici nominis dignitatem & commendationem in ijs regionibus profuere. quocirca & Christianis deinde negotiatoribus maior honos, fidesque haberi cœpta: & à multis dynastis ad Ioan-



## *Historiarum Indicarum*

nem oratores cum muneribus misſi, ſederis & amicitia causa. Itemque ipſe litteras & nuntios deſtinavit cum ad alios preno- biles Africae principes, tum vero ad reges Tungubutu, Mandin- ga, Fullorum, & earum gentium, quas vulgo Moſes appellant, multis in rebus Chriſtiana inſtituta ſectantium, ac praefertim in nominum impoſitione, quae ferme à Sanctis Apoſtolis mu- tuantur. Nam ad Chriſtianorum Aethiopum ſub Aegypto, ſeu Abaſſinorum Regem, qui Preteiannes dicitur, tenui fama & au- ditione duntaxat iam ſibi notum, propter peſtilentes terra- rum tractus, & noxia animalia, & vaſtas ſolitudoſes interiacen- tes, cum id vel maxime cuperet, ex ea parte adſpirare non po- tuit. Cæterum hiſce tam latis rerum exordijs breui tota pe- ne Europa vulgatis, Luſitanum nomen magna ubique in admi- ratione eſſe: celebrari omnium linguis: nauigandi ſcientia & gloria Graecis, Phoenicibus, Carthaginenſibus anteferri. cu- ius laudis æmulatione incenſus Chriſtophorus Columbus Li- gur, ingentis animi vir, & rei nauticae in primis peritus, ex a- ſtronomica diſciplina, & nonnullis veterum monumentis, eo- dem fere tempore ſtatuit, trans noti orbis terminos magna terrarum ſpatia etiam in occidentem patere: dein, experiun- di & cognoscendi ſtudio, quod ſine magno apparatu ea res ten- tari non poſſet; Luſitano ante omnes regi eam expeditionem ſuaſit; ſuamque in id operam, & induſtriam enixe detulit. A quo reiectus tanquam inania & fabuloſa afferret, ad finiti- mum Caſtellae Regem Fernandum eodem conſilio ſe ſe contu- lit. Ibi cum nihilo magis audiretur; inuiſta quadam animi per- tinacia, totum ferme ſeptennium, vorando repulſas, vrgendo, in- ſtandoque per ſe, & per amicos; tandem aliquando peruicit; ut in eam inquiſitionem tria ſibi regio ſumptu adornata nauigia ad Hiſpalim oraë Baticae praerberentur. Cum ijs in Atlanticum Oceanum egreſſus, Canarias primum inſulas petijt. Inde con- tinua dierum aliquot velificatione in occaſum proueetus; inſu- las aperuit nouas, quas ab re, quod primae occurriffent, Princi- pes nominavit: & expoſito milite naetus aurifodinas, loco ido- neo caſtra communijt: relictoque ibi praefidio, incolas ferme duodecim, & alia inuenta eius regionis argumenta ſecum in Hiſpaniam reuexit. Ea res quo minus erat in ſpe, eo maiorem Fernando Regi, & aulae vniuerſae attulit voluptatem. Ioannes contra,

contra, dolorem haud modicum ex eo percepit: vel quod efflorescenti tum maxime ad maritimæ rei gloriam nomini Lusitano, partum ab alijs in eodem genere decus officeret; vel quod relicto sibi à maioribus inclyto navigationis iure spoliari, & vasti Oceani possessione pelli quodammodo videretur. Ergo ad exigendos è Principibus insulis Bæticos, easque in Lusitanam ditionem asserendas, de procerum sententia, classem instruere quam primum aggressus est. Ea re cognita Fernandus mirari magnopere, cur ab Rege socio & amico, ignoti maris inuestigatione, præsertim quam oblatam ille reiecerit, arceatur. cumque super ea re nuntij, & iuris interpretes ultro citroque frustra cum litteris commeassent, postremo Fernandus ad reuocandum ab ea mente Ioannem legatos viros primarios misit duos: & quæ erat solertia, si minus ab incæpto abducere illum possent, certe per varias causas rem consulto iussit extrahere, dum Columbus, qui in eadem loca maiore cum apparatu renauigauerat; de concepta spe auri argenti que, & opum aliarum, certiora & exploratiora perferret. Non fefellit Ioannem astus: & dum legati sedulo tempus terunt (vt erat egregie facetus) legationem eam neque caput neque pedes habere dixit: cauillatus oratores ipsos; quorum alter è crure claudicaret; alter, ab insito fastu leuior & elatior haberetur. Interea Fernandus magno suo compendio fœdus cum Carolo Galliæ Rege pepigerat: secundisque eius rebus commotus Ioannes, omisso belli consilio, non recusauit quominus disceptatore totius controuersiæ vterentur Pontifice Romano, qui tum erat Alexander VI. eo nomine. Is, cognita Regum causa; ne quando lis ad arma deduceretur; ultra hesperidum insulas ad centesimam ferè leucam & quadragessimam ducto à Septentrionibus ad Australem polum circulo; totum terrarum orbem ex æquo bifariam secuit. Quæ pars vergebat in orientem, hanc Ioannes, facta sibi ob iuris antiquitatem optione, desumpsit: occidua Fernando relicta. Ex eo tempore in peruestigandis ignotis regionibus ab Lusitano, & Castellano mira vtrinque virtute certatum est. & Fernandi Carolique Cæsaris auspicijs, idem Columbus, alii que deinceps immortalitate dignissimi viri, ad occasum, meridiemque immania terrarum spatia, cum incredibili prouentu auri & argenti subinde patefecere: quo maxime subsidio Castella postmodum  
tantos,



## *Historiarum Indicarum*

tantos tamque assiduos terra marique sumptus prope infinita pecuniarum erogatione sustinuit. At ex Lusitana parte, superiorum ducum laudem non ad æquasse modo, verum etiam superasse visus, è Ioannis familiaribus egregia fortitudine & constantia vir, Barptolemeus Diazius. huic non modo cum ventis, & mari, sed etiam cum sociis naualibus diu luctandum fuit, nauigationis longissimæ tædio fessis, & reuersionem quotidiano conuitio efflagitantibus. quorum ille cum ferociam, & expostulationes prudentia ac lenitate sedasset, Cani columnas longo intervallo transgressus, insanum terræ proiectum denique patefecit: qui ab interiore Aethiopia per directam longitudinem leucas amplius sexcentas in meridiem excurrit. neque tam portentosa magnitudine, teterrimisque insuper tempestatibus deterritus est, quominus promontorium flecteret; ac totum terrarum orbem magnanimis, & experientibus viris peruium demonstraret. Hoc tam felici ausu peruentum ad insulam, quam Sanctæ Crucis à columna ibidem posita nominarunt, leucas ultra Cani limites omnino trecentas & quinquaginta, tum, deficiente iam comœatu; sexdecim fere mensibus nauigando cõsumptis, in Lusitaniam reditum. cumque in explicando apud regem itineris tótius progressu Diazius ad descriptionem ingentis illius promontorij deuenisset (Frontem Africæ nonnulli dixere) idque ob atrocissimas circa ipsum exortas tempestates, procellosum caput iure appellandum affirmaret; quinimo Bonæ spei caput esto, inquit rex, (quod illi deinde nomen stabile firumque permansit) quippe cum tanta ab occasu distantia, ac tam enormi in Austrum procursu, ad optatas orientis opes, & Asiatica emporia Lusitanis digitum pene videretur intendere. Sed quoniam commercij orientalis iterum iam incidit mentio, quod Africi maxime, & Asiatici littoris nauigatione constat; locus postulare videtur, vt de utroque littore breuiter, quoad instituti operis ratio patitur, explicemus. Ab Oli sipone præter Gaditanum fretum in meridiem nauigantibus, ad læuam est Mauritania. inde magno ambitu curuantur littora per Autololas, & Icthyophagos populos (ea regio Guinea est) trans Cancri tropicum, ad vsque Pagelungos Aequatori subiectos, & Agesymbam, qui antiquis noti orbis est terminus. hosce vno omnes vocabulo Hesperios Aethiopas sicuti



sicuti Eoos, qui oppositam Africæ partem tenent, prisci cognominarunt. Dein, per longissima spatia, obliquo trans Aequatorem, & Capricornum excursu, ora vastam in prominentiam cuneatur. id Bonæ spei, (quod diximus) caput, seu promontorium est; hinc rursus in Septentriones longissimo tractu per immanes, & obscuri nominis populos Obios, & Cafres, & Magadascarem olim, nunc Diui Laurentij insulam reflectitur litus ad nota iam antiquis promontoria Prasum, & Aromata: quorum alterum hodie Mosambicum; alterum à Praso quingentis leucis & quinquaginta disjunctum, Guardafu vulgus appellat. Is Africi littoris extremus in Orientem est limes. inde præter duos inclytos sinus Arabicum, & Persicum, quibus in modum peninsulæ Felix Arabia cingitur, rectus in eam regionem traiectus est, quæ Indo, & Gange, duobus clarissimis inclusa fluminibus, India nominatur. In hac montes à Caucaso ad Cori promontorium, quod Comorini caput incolæ vocant, leucas circiter quadringentas perpetuo in Austrum iugo porrecti, circumfuso Oceano ingentes oras efficiunt duas: quarum altera in Occidentem obuersa, prænobiles vrbes continet, Calecutum Malabarici regni caput, emporiumque nuper omnium frequentissimum, itemque Cocinum, Cananorem, Goam, aliasque complures. altera in ortum spectans, à Comorino tractu per Bengalæ fines, qua Ganges in Oceanum influit; perque Pegusia, & eius tractus alia ditissima regna (quam terram Ophir, ac Tharsis, quidam haud sane absurdis coniecturis existimant) desinit in Auream Chersonesum: qua in regione prænobile emporium Malaca visitur hodie. A Cori promontorio, ad Siculi freti similitudinem exiguo admodum spatio auulsa cernitur insula Ceilanum, quam grauis auctor Ioannes Barrius Lusitanus multis rationibus Taprobanam olim fuisse contendit. ab ea obliquus in Auream Chersonesum, & Chersoneso vicinam ingentem insulam Somatram cursus est; quam geographorum vulgus Taprobanam putat. à Somatra porro ad nobilissimas insulas plurimasque, Iauas maiorem & minorem, Borneum, Bandam, & Molucas, & Lequios, & Iaponios tenditur, itemque ad continentem oram Camboiæ, Ciampæ, Caucincinæ, ac Sinarum. vltra, Lusitanis incomperta nauigatio est. Harum autem regionum pleræque, longe alio atque Africa terra situ ac feracitate plurimis riguis,



## *Historiarum Indicarum*

guis, & sole cæterisque syderibus mire fauentibus, in omnes mortalium vsus deliciasque, pro sua quæque natura varias fruges, metalla, odora menta, plantas, lapillos, medicamina prope ad certamen effundunt. quæ paulo ante hanc memoriam, certis emporiis admodum vili coempta, Mahometani ferme, Iudæive institores, vel sinu Persico in Commagenem, & Syriam, vel Arabico ad urbem Heroum Suezium, atque inde camelis Alexandriam conuehebant; Aegyptio Sultano, qui tum ijs regionibus imperabat, pluribus locis persoluto portorio: quæ res Memphiticum ærarium magnis quotannis pecuniæ accessibus augebat. Hanc adeo quætuosam negotiationem Ioannes, ducum suorum peritia & felicitate inuitatus, omni spe sibi enitendum existimauit; vt, si qua posset, continuato per Oceanum cursu, ab Aegypto, Syriaque in Lusitaniam auerteret; non solum vt, ingenti Lusitanicæ rei incremento, Christiani nominis hostium vectigalia, quam maximis afficeret detrimentis; sed multo etiam magis, vt eadem opera pluribus locis Apostolicam disciplinam, vel vetustate iam obsoletam renouaret, vel ad id tempus incognitam, Deo adiuuante, per administratos idoneos institueret. constanti quippe didicerat fama, non paucos in Oriente superesse populos, partim qui simulacra ex vetere gentium errore adorarent; partim etiam, qui acceptum à Christi nuntijs Euangelium, & sanctissima bene viuendi instituta, sed tempore procedente multis deformata vitijs, vtcunque retinerent. In ijs, Aethiopum Orientalium, seu Abassinorum, cuius modo meminimus, Regem, Christi cultorem quidem illum, veruntamen à Romani Pontificis auctoritate disiunctum, cum Ecclesia Catholica in gratiam reducere vehementer optabat: simul etiam ratus, quòd longe lateque imperaret, fore vt eiusdem opibus auxilioque aditus sibi ad Regum Indorum amicitiam, & expetita commercia patefieret. Hoc ille consilio certos homines, per mare nostrum ad explorandas Indicas, & Æthiopicas res destinauit. qui, ob sermonis inscitiam, rei difficultate deterriti, cum Hierosolymis infecto negotio redissent; duos denique Arabicæ linguæ bene peritos, Petrum Covillanum, & Alphonsum Paiuam eiusdem rei causa dimisit, cū eiusmodi mandatis ac litteris, vt alter alterius prouinciam, si res ita ferret, posset accipere. ij, Alexandriam delati, Memphim in  
de

de mercatorum habitu petiere . atque ex eo loco per sermonis Arabici Symbola , cum se Mahometicis viatorum turmis facile miscuissent ; ad Arabici littoris urbem Elanam , hodie Torum , transitu Hæbræi quondam populi insignem , ac denique Adenum ( id oppidum sub ipsas Arabici maris fauces est munitissimum , Maddena gens olim dicta ) incolumes peruenere . Ibi , cum ad læuam esset India , ad dextram Aethiopia , sic inter se munera partiuntur , vt alter Abassinum adeat Regem ; alter Indica perlustret emporia ; ac rebus demum peractis , Memphim rursus ambo conueniant . hæc inter eos neutro discrepante condita . verum à digressu longe dispar fuit vtriusque exitus . Paiua in Abassinos profectus , antequam regiam attingeret , incertum quo genere leti defunctus est . at Couillanius felici nauigatione ad Indos delatus , totam illius commercij rationem probe compertam in commentarios retulit : ipsa vero Indica emporia , Goam , Calecutum , Cocinum , & cætera suis quæque locis in hydrographica membrana ex fide adnotauit , quam à Ioanne rege in id ipsum acceperat . Inde cum per Arabicum Oceanum in Africam traiecisset ; ab Aromata ad Prasum promontorium , & Rapti hodie Sengi fluminis ostia , & Melindem , & Quiloam ( cui Raptæ olim nomen ) & Sofalam littoribus peragratis , partim ex consentiente nautarum testimonio , partim ex incolarum capillatura & colore , Hesperiorum Aethiopum haud absimili , in eam sententiam est adductus , vt oram ad Bonæspei promontoriū pertinere , & circumnavigari posse proculdubio crederet . quibus rebus mirum in modum alacer , & reuifendi socij cupidissimus , cum ad præfinitum tempus Memphim se contulisset ; repente ab amicis fit certior Paiuam ipso profectionis initio diem obiisse . percussus tam inopinato nuntio Couillanius , licet in patriam redire vehementer optaret ; tamen , quod præclare meminerat quantò Ioannes rerum Aethiopicarum studio teneretur , suas vel rationes , vel desiderium regiæ voluntati posthabere constituit . in præsentia ad eum de Paiuæ obitu , de quæ sua peregrinatione perscribit : se India explorata , littus etiam Aethiopicum ad Sofalam vsque , aurifodinis prænobilem terram cum cura lustrasse : nec sibi esse dubium , quin ad Bonæspei promontorium ora continens protendatur . id adeo , tum ex fama

sermoneq;



## *Historiarum Indicarum*

sermoneque hominum; tum è cosmographica, & nautica ratione constare. Sibi esse in animo, quandoquidem Patauam in ipso rerum aditu mors oppresserit, eius vice in Aethiopiam reuerti, vti, Deo bene iuuante, inita cum Abassino societate, cognitoque illius imperio & institutis, cuncta postmodum certa ipsemet in Lusitaniam referat. Interea, ne desisteret Ioannes coepta fidenter, ac strenue prosequi. nouarchos circumuectos iam extremum illud Africae promontorium; haud ita difficili negotio (paululum modo adnitantur) ipsismet Quilois, vel Melindijs ducibus in Indiam vtiq; peruenturos. rem esse gloriae pecuniaeque plenissimam. Hasce litteras, & commentarios, nauticaeque membranam cum Hebraeis notis è Lusitania mercatoribus, qui Memphi negotiabantur, ad Regem perferendas dedisset; ipse, confirmato ad rem conficiendam animo, retro in Aethiopiam iter intendit. Imperabat Abassinis tum Alexander, Quintus ab Serfsadeneghil, qui accisis à Turca iam opibus, regium nomen ac maiestatem vix atque ægre tuetur hoc tempore. is venientem ad se Cauillanium, quamquam haud plane certus vera ne afferret, magis tamen propenso ad credendum animo benigne accepit, non mediocriter latus à tam longinquo actam Christiano Rege societatem & amicitiam suam per nuntios & per epistolas expeti. cumque de Ioanne, deque alijs Europæ Regibus multa didicisset, remissurus iam cum litteris Couillanium, repente demoritur. Succesit ei longe alius ingenio moribusque frater Nahu. is non modo Lusitanum Regem dignatus responso non est, sed ne ipsum quidem nuntium ad suos redire permisit. ita Couillanius cum neque ex Aethiopia euadendi facultas, neque in Lusitaniam scribendi occasio præberetur; ob diuturnam absentiam videlicet pro mortuo est habitus, quoad alijs demum è Lusitania misfis eodem legatis (vt in loco dicemus) apparuit. Inter hæc Ioannes occultis virtutum facibus agitari, noctes inquietas exigere; oblatam sibi laudis æternæ materiem indies attentius intueri; omnes vias rei perficiendæ conquirere. ast vbi eorum sermone, qui ex Aegypto venerant, & Couillanij litteris ac rationibus animari se vidit; tum vero inchoatam nauigationem quantouis periculo sumptuq; ad exitum perducere sine vlla dubitatione decreuit. Iamque in talem ac tantam expeditionem, ex ea, quæ tum erat copia,

copia, clarissimos destinauerat magistros ac duces; & contra se uientis Oceani ferociam & impetum naues iusserat ædificari, vel materiæ firmitate, vel structuræ genere validissimas; cum tantis interuenit conatibus mors, bonis omnibus, atq; ipsi præsertim Emmanueli, quem, Alphonso filio dudum extincto, Ioannes hæredem instituerat, admodum luctuosa. duplici quippe cognationis vínculo Ioannem attingebat Emmanuel: quod & Fernando Ioannis patruo natus erat; & sororem ipsius Eleonoram lectissimam fœminam Ioannes habebat in matrimonio. Sed præter hanc tantam necessitudinem, quod in regia propinquitate perrarum est, ipsum, à quo regni hæreditatem sine controuersia expectabat, ob singulares eius virtutes Emmanuel diligebat vnice: & annos ei quamplurimos, ac lata pariter omnia precabatur. quo etiam acerbius tulit, multisque & veris lacrymis profecutus est patruelis obitum. ac iustis demum funebribus illi ex maiestate regia persolutis, ad omnem regni administrationem, sed ad res præsertim Indicas acriter animum intendit: nam & in ipso ætatis robore, septimum & vigesimū agens annum, alacer in primis erat, & vegetus; & in studio laudis ac famæ nulli antecedentiū Regum secundus; & eo maiore studio institutæ conquisitionis ardebat, quod se ad tantorum periculorum, tamque diuturni laboris ac diligentię fructus decerpandos ab omni æternitate diuinitus destinatum esse propemodum cerneret. Ac nihilominus, ne sibi, præsertim initio regni, nimium præfidere videretur, in consilium super tali tantaque re procures, ac seniores adhibuit. In eo conuentu sententijs valde certatum. Erant qui nauigationes longinquas in vniuersum improbarent. si rem nauticam experiri placeat; sat ampla & nota in propinquo maria patere: sin (quod forte magis è communi re sit) victui ac frumentationi consulere; ex alienis regnis, atque adeo ex ipsa Germania colonos in Lusitaniam in id ipsum accitos. Quin Curucensis, & Lauranus ager, ac tota illa inter Eboram, Tagumque spatiosa planicies vel vitibus conferenda, vel vbi liceat aratro proscindenda plebi desidiosæ atque inopi diuidatur? sin belli gloria sollicitet animos; hædere pene in visceribus Mauritanâ pestem, ex qua nouæ in singulas horas insidiæ, latrocinia, cædes, calamitates immineant. longe profecto vtilius tutiusque in proximos Christi



## *Historiarum Indicarum.*

Christi hostes, quàm in remotos & innoxios populos, certo cum damno ac periculo, incerto vel exiguo cum emolumento Lusitanica arma posse conuerti. octogesimum iam annum per assidua naufragia immanesq; sumptus tot classes in Austrum nauigare. quid inde nisi vilissimos Aethiopas, Lusitaniæ onera verius quam ministeria, & ebur inutile, & friuola palmæ folia reportari? Nam quod de aurifodinis fama increbuerit, verba profecto Regulos dare: quibus importari nouas opes, & solitudines exultas, ac totius illius tractus pestilentiam frequentari vehementer expediat. Proinde ad Lusitaniæ decus, & rem tuendam augendamque, dispersas regni vires contrahat; finitima remotis anteferat bella; vel, si ad agriculturam domesticam pœniteat soli; præpingues potius Mauritaniæ glebas, & frumentarios campos, quam aut Asiæ inaccessibleia commercia, aut sterilem interioris Libyæ arenam, & squalentia deserta respiciat. Alij contra: neque susceptos ad eam diem labores ac sumptus, qua dignitatis, qua compendij nomine, irritos fuisse (quod ipsum frequentes ab ignotis etiam Regibus legationes, & vectigalium incrementa quotidiana testentur) & nouam hanc Indiæ conciliandæ diuinitus oblatam occasionem, eiusmodi esse, vt non modo sine magno detrimento, verum etiam sine summo dedecore omitti non possit. scilicet diuini spiritus virum Henricum illum, tanta animi magnitudine, præclarum hoc iter ingressum, ac tanta perseuerantia spretis iniquorum obtreccionibus, tantam gloriæ segetem posteris reliquisse; ac deinde Alphonsum, & nouissime Ioannem ipsum, qua virtute, quo consilio Reges? toto impetu eisdem instituisse vestigijs, vt in ipso demum Indiæ pene vestibulo, Emmanuel successor, viris, opibus, ætate florentissimus repente deficeret. in magnis arduisque negotijs non esse res illico ad calculos reuocandas: vbi conatus ipse, vt votis minime respondeat euentus, apud æquos tamen rerum æstimatores loco successus ac præmij sit. Pergeret porro felix quo numen tantis tamque apertis significationibus duceret. neque à tam laudabili cēpto abduci se cuiusquam ignauia, seu cunctatione pateretur. Media fuit multorum sententia: quibus non tam dimitti contracta iam, & instituta commercia, quam nouis quærendis instituendisque modum tandem aliquando imponi placebat.

Quid

Quid enim à tanti Regis tum prudentia, tum dignitate magis alienum esse, quam partis iam ita multis, vt conseruari vix possint; incertas captantem spes, nouis quotidie ventis, tempestatibus, vadis, æstibus atque recessibus bellum indicere? & inexplebili curiositate alias atque alias oras nullo propemodum fructu vel operæpretio perscrutantem, cum rerum natura pugnare, & ipsa denique mundi claustra velle perrumpere? Frequenter procellas, crebra naufragia, imminutam Lusitaniæ sobolem, voraces classium impensas; & super hæc, infinitam itineris longitudinem reputaret animo. quæ ipsa, vt maxime Deo fauente vincantur; & flatibus, vndisque obsecundantibus perueniatur in Indiam; ecquid tandem spei sit, occupata iam ab antiquis ac proximis negotiatoribus mercimonia, ad ignotos & alienigenas traducendi? Quis porro præstet, potentissimos Indiæ, Syriæ, Aegyptique (vt de reliquis taceatur) dynastas ac reges, vbi per aduentitios commeatus portoria sua, redditusque imminui senserint, quietem acturos? quibus, si damno vel dolore irritati ad arma consurgant; vix Europa tota coniunctis viribus, ne dum Lusitania sola, possit obistere. Nam quod nonnulli maiorum in hoc genere studium & contentionem opponant; neque Henricum ad Indiæ regiones adspirasse vnquam, & Ioannem adulatorum blandimentis & artibus potius, quam suoapte ingenio, in hæc vigilantium somnia verius, quam consilia inductum. quæ quoniam intempesta morte oppresserit Deus immortalis; videat Emmanuel ipse, integris etiam tum rebus quid agat: neu per inanem fiduciam ea suscipiat, à quibus cum leuitate ac damno postmodum cogatur absistere. Hæc & alia id genus cum & ij, qui in consilio aderant, & cæteri, vt fit, pro suo quisque sensu loquerentur; plus tamen apud regem & decoris auidum, & fidei propagandæ studio incensum, honestas & pietas, quam metus, aut diffidentia valere. Cæsa, & conuecta iam ante materia; naues in præsentia duntaxat quattuor ad explorandum agiles, ad tolerandum firmas, delecto milite, nauta, commeatibus, tormentis instrui: & quantum humano consilio prouideri possit, contra omnes casus quam diligentissime optimeque adornari iubet. Prætorix inditum est nomen à Sancto Gabriele, nō sine causa: vt quæ ex orbe nostro ad antipodas viam Euange-



## *Historiarum Indicarum*

lio muniebat; sub tutela præsidioque lateret Archangeli potissimum eius, qui primus è cœlo terris olim attulit Euangelium. huiusce navis cursum regebat Petrus Alanquerius, qui aperiendo Bonaspei promontorio paulo ante interfuerat. Secundam Archangelo Raphaeli, viatorum duci ac tutori dicarant. Paulus Gamma præerat. nauclerum habebat Ioannem Conimbricensem. Tertiam Nicolao Cœlio Nauarcho, Petro Scholastico gubernatore, incertum unde, Berrium appellabant. Quarta sine milite ac sine nomine vehendis duntaxat in supplementum cibarijs à Consaluo Nonnio Gamma domestico ducebatur. Propugnatores in vniuersum & nautæ, centum & sexaginta, non amplius, explebant numerum. Ijs omnibus ab Emmanuele præficitur summa cum potestate Vascus Gamma Pauli frater, singulari prudentia ac fide; &, quod caput erat, inuictæ animi robore vir: cuius patrem Stephanum nuper vitam ætæ Ioannes Rex ad munus id ipsum iâ ante delegerat. Huic, præter cætera mandata, & litteras ad Indiæ reges; Couillanij quoque membrana & commentarius attributus. Agebat eo tempore Emmanuel in oppido Translagano, quem Montem maiorem vocant: huc euocatum Gammam, & socios, in magna procerum corona, magnificis promissis, & pia in primis & graui oratione, ad talem & tantam expeditionem est adhortatus. dein vexillo Crucis per intimum scribam publice expanso, nixus genibus Gamma solenni ritu in regis verba iurauit. eodemque accepto vexillo, plenus bona spe & miro nauandæ regi operæ studio incensus, Olisiponem vna cum comitibus petijt. ibi in Mariæ Virginis æde, quam ad fauces portus olim Henricus in id ipsum exstruxerat, sacris omnibus ad propitiandum cœleste numen rite procuratis; præeunte cum hymnis, & canticis agmine Sacerdotum, nauarchi, & cætera turba cum ardentibus cereis, eodem ordine supplicantes, nudis pedibus ad scaphas vsque deducti. Mœsta cum fletu sequebatur ciuitas, quasi tam lecta ciuium manus ad manifestum exitium rueret. Ac quandiu latis de more vocibus, ac vario tympanorum tubarumque concentu anchoras moliuntur, rudentes expediunt & reliqua munera certatim obeunt nautæ; miram hilaritatem vultu præ se tulit Gamma, sociique. ast ubi solutis anchoris, ac sublati iam antenni, vltimum signum profectionis insonuit;

tum

tum vero mutuo conspectu partim integratæ, partim coortæ omnibus lacrymæ: nec modus fuit, quoad vehementior Bo-  
reas naues in altum prouectas ex oculis abstulit. Id accidit an-  
no post Christum natum millesimo quadringentesimo nona-  
gesimo septimo, ad 7. Idus Iulias; anni tempore (vt postea lon-  
go vsu compertum est) minime idoneo. Veruntamen regen-  
te cursu Deo; paucis mensibus ipsum Bonæspei promonto-  
rium præteruecti, ad aquationem, quæ dicitur, Sancti Blasij,  
peruenere. Auctorem habeo, circa id promontorium atrocis-  
sima tempestate iactatos nautas reditum in patriam expostulas-  
se: cum nihil suadendo rogandove proficerent; de coercendo  
per vim præfæcto agitasse consilia. Ea re cognita, magistris vin-  
cula iniecta; Gammam ipsum gubernatoris officio egregie  
functum. Alij minime spernendi scriptores, neque ita pericu-  
losam eam nauigationem fuisse referunt; nec vllius in Gam-  
mam conspirationis meminere. Vtcunque res habeat; ad eum  
quem dixi locum appulsi, vagantes in littore Aethiopas clitel-  
latis insidentes bobus opimis; & festiuo tripudio, & fistularum  
cantu se oblectantes vident. Adhibiti confestim interpretes  
cum nullum sermonis commercium reperirent, partim nuti-  
bus, partim æreis crepitaculis, vitreis globulis, alijsque id ge-  
nus crepundijs, quibus mirum in modum capitur gens; ad pe-  
cora bouesque inuicem permutandos alliciunt. Quo in nego-  
tio cum se admodum difficiles præberent barbari, rixa (vt fit)  
excitata, ne gentem plane ab alienaret Gamma, vela fieri sta-  
tim imperat. Sæua inde procella iactati vltra Diazij terminos  
leucas circiter quinque, ad Planas quas vocant, insulas proces-  
sere. Ex eo loco, aduersis æstibus admodum retardantibus, len-  
te rursus ad oram Zanguebaris appulere ipso Christi die Nata-  
li: ex quo littus id Natale appellatum. Ex eo littore flumen  
ingens in Oceanum euomit se: quod aquandi causa ingressi se-  
sto Epiphaniæ solenni, Regum flumen ex eo dixere: & quod ab  
incolis admodum amice benigneque tractati sunt, ei Aquatio-  
ni à Bona pace inditum nomen. Quintum diem Gamma ibi  
moratus; mira cum barbaris familiaritate contracta, discescit.  
ac propter concitatiorem æstum veritus nequa in vada ferre-  
tur; adeo longe à continenti cursu tenuit, vt & Sofalam re-  
gionem, & fluenta promontorium noctu per imprudentiam præ-  
terierit.



## *Historiarum Indicarum*

terierit . Inde reflexo iterum ad continentem itinere, conspi-  
catus nauigia palmeis velis vasti amnis ostium inuehi, subsequen-  
tus, accolae reperit minus iam atro colore, & cultiore vesti-  
tu, & Arabici sermonis nonnihil peritos : à quibus, Fernando  
Martinio interprete, accepit, haud procul, eiusdem fere ma-  
gnitudinis naues, albosque homines commeari solitos. quæ-  
res, quod Indiam significare haud dubie videbantur, ob id lo-  
co ac flumini, Bona signa, nomen impositum : & amicitia cum  
barbaris inita, subductæ naues, & multis locis resectæ. Ibidem  
columna cum titulo Raphaelis Archangeli de more fixa . Cæ-  
terum, ne nimis læto successu Gamma efferretur, multos ibi-  
dem ex eius comitatu, gingiuis horrendum in tumorem ac pu-  
tredinem excrecentibus, foeda corripuit lues. quosdam etiam  
absumpsit. cuius causam cum in cœli grauitatem ( quod è cre-  
bris æstuarijs terra valde palustris & vliginosa est ) tum in cor-  
rupta falsamenta, quibus iamdiu propter inopiam victitau-  
rant; contulere. Mense iam ibi per multa pericula exacto, so-  
lutis anchoris littus legentes, quinto die ad Mosambicum ac-  
cedunt. Id oppidum insulæ Prasiæ cum tutissimo portu quam-  
quam exiguo, situm in ipso flectentis se oræ cubito, à dextra  
Sofalæ aurifodinas, à læua Quiloam urbem habet insignem. &  
× quamquam ob circumfusum æstuarium, sterili & insalubri est  
admodum cœlo, tamen in satis magnam frequentiam loci op-  
portunitate deductum est. Mahometani ferme tum inhabita-  
bant, Abrahemo Quiloæ tyranno subiecti: perque Prætorem  
( Xequem Arabes vocant ) ab eo regebantur. Aduersus id op-  
pidum, ad quattuor passuum millia, sunt insulæ, quæ à colum-  
na ibidem à Vasco posita, Sancti Georgij nominantur. ad eas  
insulas cum Lusitani stetissent; ab ijs, qui à Mosambico explo-  
randi causa prodierant, initio pro Turcis vel Saracenis habi-  
ti, facile cum Xequem per munera & vinum, & scitisima sacca-  
ri condimenta, quorum auidissima gens est, pacem & amici-  
tiam iniere. atque etiam duo in Indiam vsque nauium magistri  
mercede ab eodem impetrati. & omnis generis cibaria abun-  
de suppeditabantur. at ubi per Abasinos quosdam Aethio-  
pas, qui pictas Angelorum imagines in Gammae naui conspe-  
xerant, & cum eo de rebus Abasinis, deque religione fuerant  
collocuti, Europeos, & Christianos esse vulgatum est, confe-  
ssim

stim hospitalitas omnis in odium versa, & nostri telis ac sagittis a quatione prohiberi cepti. quin etiā simul accepta iā pecunia, perfidi magistri clam aufugere. Nondū apparuerant gentibus ijs, nouæ subtilitatis, & operis admirandi ballistæ, oblongum in tubum & æqualiter teretem ex ære fusili figuratæ: quæ non funibus aut neruis intentæ singula mittunt spicula; sed inexcogitata priscis ratione, ad applicitos tenui abtergo foramine igniculos cum incremento multiplici rapiendos, certo primum nitrati ac sulphurei, pulueris modulo temperatæ, insertos dein ore patente ferreos ex arte globos, catenasque, & alia obturamenta, fulminum instar flammis eluctantibus cum horrendo fragore contorquent. Eiusmodi tormenta complura Lusitanus de more disposita, & collibrata ad nauium fenestellas habebat. Sed ab ijs exercendis, ne perterritos metu incollas abalienaret ab se, consulto abstinuerat. Verum vbi fraudem, ac vim, & suos pene circumuentos animaduertit; indignatione commotus, extemplo disploderent, magistris edixit. illi sine mora exsequuntur imperium. ac primo videlicet fumus ater, & fumo intermicantia fulgura, & crebra tonitrua cœlo sereno, attonitos defixosque rei nouitate barbaros tenuere. ast vbi ante pedes Prætoris ipsius, momento laceri & exanimis quattuor simul viri conspecti sunt; enimvero tum, quasi haud dubie infenso infestoque numine, correptis vndique ac pene depressis turba nauigij, lymphati amentesque in proximam continentem ex insula sese cuncti proripiunt. Inde Prætor, animo vix tandem è summa trepidatione collecto, supplices ad Gammam oratores placandæ iræ, & sui purgandi gratia transmisit. Si quid minus amice in hospites consultum sit, id suo consilio nequaquam esse factum. magistros, qui mercedem fraudulenter abstulerint, iam non esse in sua potestate, quod alter in auia & interiora se abdiderit; alter subitis machinarum ictibus fœda laceratione discerptus, perfidiæ pœnas luerit. Sed & integram mercedem se Gamma redditurum, & alium ipsorum loco magistrum suffecturum, nauigationis Indicæ peritissimum. Gamma, quod pluribus disceptandi tempus non erat, remissa mercede, magistrum accepit, multo etiam prioribus nequiorem: quippe, vt à Mosambico profecti sunt, ita instituit iter, vt nauigia in periculosas quasdam ac desertas impulerit



## *Historiarum Indicarum*

+ insulas; facile confusus ob natandi peritiam, se noctis silentio, ut alij duo fecerant, euasurum. sed intentius custoditus, fraude comperta, vapulauit egregie. ob id insulæ Verberati appellata. Quo ille supplicio magis etiam efferatus, Lusitanos perditum ire omnino constituit. ac per summam dissimulationem, quasi plane resipuisset, composito ad omnem equitatem ac summisionem sermone vultuque, urbem Quiloam ait esse in propinquo, rerum omnium copia refertissimam, & Christianis Abbasinis atque Indis frequentem. quando ad Mosambicum res non conuenerit; ibi Lusitanis omnium generum cibaria, mercesque Indicis haud inferiores, summa populi voluntate affatim suppeditatum iri: præterea cursum ex eo loco in Indiam esse certissimum. Hoc ille artificio mendacijsque Gammam in ultimum exitium pene impulit. iam enim de strage ad Mosambicum edita Quiloam peruenerat rumor. nec dubium erat, quin si eo ventum esset, ciuitas armis virisque potens, ac Mahometicæ superstitioni addicta, & insuper damno ad Mosambicum accepto irritata, communis doloris graues pœnas à Lusitanis exactura esset. auxilio fuit vehementior aquarum impetus, quo præter Quiloam abreptis nauibus portum occupare non licuit. Ea spe deiectus Aethiops, tamen à malitia non discedit. Cum nostros omnium rerum inopia valde laborare intelligeret, quoniam Quiloæ accessu prohibiti sint; Mombazam urbem docet non longe abesse, in qua multi item Christiani versentur, & omnia ad victum cultumque necessaria abunde suppetant. Si Vasco placeat; propediem se duce naues in optima statione futuras. Nec recusauit Gamma, partim rectoris suasu, partim etiam vltima pene iam necessitate compulsus. ad urbem appropinquant, ut nuper ad Mosambicum, sic ibidem obuiam proditum à regis exploratoribus. qui ab insidioso cursus rectore clam in nostros incitati; simulata beneuolentia, ad regem redeunt; ingentis prædæ occasionem oblatam demonstrant, modo intra portum aduenæ perducantur. Haud surdis auribus dicta. omnibus blandimentis, muneribus etiam, iubet Christianos ad commercium, & hospitium benigne inuitari. Paschalia tum aderant festa: & paulo ante ad insulam Sancti Georgij ara excitata Lusitani, expiatis confessione criminibus, coelesti pane sese munierant, quo etiam maiorem in tempore

pore diuinam clementiam opemque sensere. quippe ipsas iam portus fauces intransibus, ex vrbe permulti cum ficta gratulatione, & concentu obuam prodierant; ac sine armis in naues accepti, ouantes lætique certo ac præsentiam lucro, nostros perfida simulatione ad omnem hilaritatem inuitabant; cum nouum subito periculum parato iam exitio nihil tale suspicantes Lusitanos eripuit. Dum enim ad auram excipiendam Gammae nauis tardius circumagitur; veritus, ne illam in proxima vada æstus abriperet, magno repente clamore iaci anchoras iubet. quam ad vocem, cum naualis turba huc illuc præceleri festinatione discurreret; rati proditores detectas insidias, vt est omnis malitia suspicax & meticulosa, illico è nauibus in subiectas lintres certatim cuncti cum ipso prodicionis magistro defiliunt, & fugam capeffunt. ac tum demum Lusitanis fraus ac perniciēs patuit. Gratia ingentes pro tam insigni beneficio superis actæ. & quoniam reliquum littus sat frequens vicis & oppidis esse dicebatur, Gamma cursu in Septentriones directo, postridie Mombazam aduentantia nauigia duo Saracenorum intercipit. è quibus duntaxat tredecim (cum cæteri se in pelagus eiecissent) in potestatem venere. ij, ne locus iterum dolo daretur, separatim singuli interrogati, sine vlla variatione respondent: in eadem ora celebre oppidum esse Melindem, Rege in aduenas omnes mire benefico, in primisque hospitali. ibi nec instrumenta nautica, neque commeatum optimum, neque duces in Indiam defuturos. His rebus auditis, captiui benigne habiti; iisdemque regentibus cum ad Melindis conspectum ventum esset; quidam ex ijs, vt videbatur, auctoritate præcellens, munus adeundi Regis, & conciliandæ amicitia, sibi deposcit: & Gammae permissu in urbem delatus, Lusitanorum probitate moribusque extollendis, & alijs ad tempus accommodatis rationibus, Regem, satis per se ad officium humanitatemque propensum, facile in aduenarum cupiditatem & amorem impellit. Dein, biduo nuntijs & xenijs vltro citroque mittendis insumpto, Gamma, ne Regi diffidere videretur, in portum lato nauium ornatu concinentibus tubis inuehitur. Huic obuam Regis filius natus maximus (nam pater morbo senioque implicitus decumbebat) cum honestissimo comitatu profectus, in scapham, quo Gamma excipiendi eius causa descen-



## *Historiarum Indicarum*

derat, hilari vultu transfiliens, peregrinum arctissime familiarissimeq; complectitur. inde cum alter ab altero multa per interpretes amice admodum quæsiissent; petere atq; orare institit, vti ad parentem iacentem in lectulo adire ne grauaretur. id fore seni gratisimum. se interea apud naues cum paruo filio pro obfide remansurum. Ad ea cum respondisset Gamma, sui Regis mandato prohiberi se quo minus exscenderet; nobiles duos è comitatu pro se in urbem misit: quibus Rex cum cæteris, valde se comem & honorificum præbuit. Præterea de perito itineris duce magna Regis voluntate impetratum: atque illi vicissim Gamma tredecim, quos dixi, captiuos benigne donauit. quibus officijs, & mutuæ beneuolentiæ significationibus, hospitij noui iure magis magisque firmato, ea denique lege Gamma discessit, vt in reditu polliceretur se illac iter esse facturum, quo regis legatos ad Emmanuelem honoris & amicitiae causa transueheret. A Melinde ad Malabaricum Indiæ littus leucarum ferme septingentarum traiectus est. id spatium altero & vigesimo die feliciter emensi, tanta gratulatione ad Calecuti oram accessere, quasi transactis iam rebus incolumes ad patrios lares & incunabula rediissent. Iulio in eunte Olisipone soluerant: mensibus ferme vndecim in itinere insumptis, circa Maij exitum in Indiam deferuntur, perincommodo sane tempore. Etenim in ijs regionibus cum alia multa admiranda; cum illud in primis omnium physicorum ingenia superat, quod in eadem cœli plaga, pari solis accessu recessuque, ijsdem anni mensibus; ab ortu trans Gatis iuga, quæ recto ad Cori promontorium excursu, quemadmodum supra demonstratum est, totam Malabaris longitudinem interfecât, æstas ac ficcitas: ab occasu eis Gatem hyems, & assiduæ pluuiæ sunt. vt in tanta locorum propinquitate, quod ad rationem tempestatum attinet, ijsdem pene populi sibi mutuo antipodes videantur esse. Quam diuersitatem, quæque de æquinoctiali circulo ac torrida zona antiqui falso opinati sunt, & alia huiusmodi permulta, si quis apud se diligentius reputet; profecto intelliget, omnia quæ in cœlo, quæque in terris fiunt, non ad necessitatem fati, vel ad fortunæ temeritatem, verum ad vnius omnipotentis Dei liberam voluntatem, ac prouidentiam esse referenda. Quo tempore Gamma ad Calecutanam  
oram

Oram est appulsus, in ea Malabaribus parte, hyemis erat initium, cum altera quæ ad ortum est, maximis iam tum caloribus æstua-  
ret. itaque licet periculosam admodum in salo stationem esse  
intelligeret, subeundos tamen portus, nisi ex Malabarici Re-  
gis auctoritate nequaquam existimavit. Is Rex in primis In-  
diæ clarus perhibetur ac potens: quippe quem cæteri eius tra-  
ctus reges principem ac superiorē agnoscunt, & patrio sermone  
Zamorinum, idest Imperatorem appellant. Is quattuor ordi-  
num homines habet in suo regno: Dynastas ac Satrapas, quos  
vulgo Caimales vocant. Sacrorum antistites & Procuratores:  
ij vetustissimæ originis & nominis Brachmanæ sunt. rei belli-  
cæ studiosos è nobilitate duntaxat, qui Naires dicuntur. quar-  
tum obtinent locum opifices & agricolæ. reliquum vulgus in-  
stitorum est magna ex parte Arabum, Persarumque, & Aegy-  
ptiorum ex hæresi Mahometana & Iudaica, qui pretiosis mer-  
cibus admirabili solertia & peritia permutandis, ad amplas fer-  
me opes pecuniasque perueniunt. Cæterum apud omnes præ-  
cipuo in honore Brachmanæ sunt, patetque ea secta latissime.  
horum scitis omnia publica & priuata sacra subiecta sunt. hi  
cærimonias & iusta funebria suo arbitratu præscribunt, iidem-  
que magno suo quæstu prodigia, sortes, auguria, & omnia in-  
terpretantur. horum disciplina institutiq; reges ipsi imbuun-  
tur, omnibus magnis, parvisque in rebus mirandum in mo-  
dum illis obnoxij. Sed non vnum est Brachmanarum genus.  
quippe alij liberis operam dant, viuuntque in hominum fre-  
quentia: alij cælibem agunt vitam, quos hodie proprio voca-  
bulo Iogues appellant: Gymnosophystas olim Græci dixere:  
ijque partim longissime peregrinantur, stipem emendicantes:  
& victus vestitusque asperitate nacti existimationem ac fidem,  
credulas hominum mentes portentosis mendacijs, varijsque su-  
perstitionibus in fraudem impellunt; partim in solitudinibus  
auis, & subterraneis spæcubus, durissimo vitæ genere, inedia,  
vigilia, nuditate, frigoris ætusque patientia semet ipsi discru-  
ciant, abstinentque ab omni corporis voluptate ad certum an-  
norum spatium; quo exacto, in Abduos (id nomen ordini)  
magna cum gloria referuntur: ii tamquam humano fastigio cel-  
siores, & omnium rerum licentiam adepti, nullis iam tenentur  
legibus, & in omni scelerum & flagitiorum genere impune vo-  
luntantur.



## *Historiarum Indicarum*

lutantur. Est etiam Ioguibus rector maximus, qui veſtigalia per ampla diſpenſati vocatosque ad ſe certis temporibus im- poſtores, varias in regiones ad prædicanda impiæ vanitatis delira- menta dimittit. Hoſce omnes mirum quam denſa in caligine, & quanta in veritatis ignoratione demerſos diabolus teneat. Parabrâmmiam nescio quem Deorum antiquiſſimum colunt, & ex eo filios tres: quorum in gratiam terna fila gerunt è collo ſuſpenſa. Multis præterea non hominibus modo, ſed brutis etiam animantibus cæleſtes habent honores, & templa ædifi- cant, quibus in priſca illa Romanæ Urbis magnificentia vix quicquam ſimile exſtiterit. Sane fanum eſt ſimio dicatum: cuius duntaxat pecori in victimarum uſum cuſtodiendo, porti- cus miram in longitudinem excurrit, columnarum ſeptingen- tarum è marmore, tantæ magnitudinis, vt Agrippæ columnas, quæ in celeberrimo quondam omnium Deorum templo Ro- mæ viſuntur, ſine dubio adæquent. Elephantis etiam religio- nem numinis tribuunt; bobus autem eo maiorem, quod homi- num vita functorum animos in eam maxime belluam immi- grare opinantur. Multos habent ſuarum ſuperſtitionum libros magno labore ſtudioque conſcriptos, quæ nonnihil ad veteris Græciæ fabulas, & auguralem Hetruriæ diſciplinam videntur accedere. Hi libri ne in vulgus prodeant, cauent quam diligen- tiſſime. Sed ex iis arbitrati ſuo deprømunt, quæ ad populum decipiendum in concionibus, vel in priuatis colloquiis, con- tracto ſupercilio, & magna pompa verborum edifferât. Quam- quam haud pauca ſuperioribus annis à Brachmane quodam apprime docto, cum ſe ad Chriſtum aggregaſſet, noſtris homi- nibus prodita ſunt; inque Luſitanum ſermonem accurate con- uerſa, tandem ad me peruenerunt; meræ nugæ, & anilia plane deliramenta, quæ hoc loco ne leuiter quidem attigiffe operæ pretium duxerim. Ex quo facile appàret quantum immortalī Deo populi debeant ii, quibus in tanta aliorum cæcitate, Chri- ſtianam lucem aſpicere datum eſt. Iam de ſacrificiis, libatio- nibus, cæterisq; nefariis ritibus, quibus vel ad placandos com- mentitios Deos, vel ad expiandos mortuorum manes vtuntur, ſingillatim exponere, vt ſuperuacaneum, ita penè infinitum ſit. Atque hæc in præſentia de Brachmanibus. Naires autem, pe- nes quos totius rei militaris eſt cura, vt ſeptimum circiter æta- tis

tis annum attigere, teneri corpusculi nervis diu multumque distentis, laxatisque compagibus, adhibita frequenti unctione sesamini olei, per aliptas peritissimos ad agilitatem penè incredibilem perducuntur. itaque velut exōsses artus omnem in partē arbitrato suo torquere ac flectere; saltus retrorsum eque atque in aduersum longissimos edere, & in lucta varios nexus pariter implicare atque explicare condiscunt. Armis vero, à pueritia ad ultimā usque etatem summa cura exercētur singuli ferme singulis, haud absurda ratione; quod ita persuasum habeāt, neminem vnū simul pluribus posse rebus excellere. arma erant olim hasta, sagittæ, gladius, clypeus: verum post inuectas illuc recentiores hasce humani ingenii fraudes machinasque, totam conflandi, temperandi, librandi rationem ita percalluere, vt omnibus maioribus minoribusque tormentis, igneisque missilibus admodum scienter vtantur: iamque Indici sclopi, seu ferreæ fistulæ, & sulphureus puluis, longo intervallo Lusitanicis antecellant. Nudi, pube tantum velata, prælium ineunt: neque loricarum aut galearum onera patiuntur. hinc nostro militi pugna longe stabilior: suoque & armorum pondere vehementius in hostem incumbit. Contra, illis maior in dimicando velocitas & concursatio. quinimmo plurimum in ipsa fuga præsidii est. obuersantes offerentesque ultro se se, vbi te iam iamque adepturum existimas, momento euanescent. rursus cum procul abesse credideris, ab tergo se ostendunt. pari celeritate & sequuntur, & abeunt: & (quod vel in primis capitale est) haud incertiore ictu auersi, quam aduersi iacula dirigunt. Quod si ad cominus decertandum vel necessitas cogat, vel inuitet occasio; cæsim plerunque feriunt: bracteolis plurimis ad gladii manubrium annexis, quorum tinnitu numerofo ad Martem pugnamque incitantur: seque celeri vel procursu in hostem inferunt; vel recurso, cum opus est, repente subducunt; factaque testudine, ita sub scuto se totos condunt, vt locus ad plagam nullus omnino pateat. & cum omnis multitudo Nairum viget in studio rei bellicæ; tum præcipua laus tribuitur certo militum ordini, quos Amocos vocant. ij diris execrationibus caput, familiam, stirpemque deuouent, ni illatas commilitonibus iniurias inuicē puniant. Regis vero necem tam obstinato animi impetu vlciscuntur, vt per media tela flammisque; nullo plane vi-



## *Historiarum Indicarum*

ne vitæ respectu, ad eadem hostium ruant lymphati amentef-  
que, atque ob id ipsum vel maxime formidandi. itaque Indicæ  
militiæ id robur est: & pro Amocorum numero magis minus-  
ve potentes reges existimantur. Longe miserrima conditio est  
agricolarum & opificum. Siquidem præter quotidianas ope-  
ras, quibus ægre sese familiasque sustentant; quod initio quis-  
que sortitus est vitæ genus, in eo ad mortem usque persistere  
cogitur: nec modo ad altiores vnquam gradus euadendi, sed  
ne ad alias quidem artes quæstusve se transferendi spes vlla re-  
linquitur. atque id vetus esse institutum, patet ex Arriano, qui  
res item Indicas græco sermone conscripsit. quare adeo con-  
tempti abiectique sunt, vt superiorum ordinum homines ne re-  
ctis quidem oculis audeant intueri. quod si in turba, vt fit, ad  
aliquem forte Nairem propius accesserint, male mulctantur.  
idque ne accidat, per antecedentes famulos turbam submo-  
uent Naires; & cum alibi, tum præsertim ad viarum flexus, se  
adesse clara voce denuntiant. tanta Indicæ nobilitati super-  
bia, tam barbarus inest fastus. atque id est causæ, cur Christia-  
nam disciplinam pessime oderint, cuius præcipua laus in homi-  
num caritate, animique moderatione consistit. Quæ Indorum  
contumacia eo minus videtur ferenda, quo sibi nobilitatis no-  
men impudentius arrégant: nam præter alia dedecora quantæ  
vis claritati obscuranda; promiscua etiam inter singulos ordi-  
nes coniugia sunt, vagique ferarum more concubitus. incerto  
omnes patre nascuntur, & ad sororum filios, vt minime dubiæ  
cognitionis, hæreditas peruénit. Aedificia, templis Deorum  
exceptis, & regijs ædibus, & quibusdam pretiosarum mercium  
apothecis, lignea & modice ab humo exstantia, palmarum fo-  
lijs conteguntur. nec vlli omnino, præter dynastas, sumptuo-  
sius habitare concessum. Suburbana visuntur plurima cum  
hortis apprime cultis, quæ ferme incolunt optimates, ne vrba-  
næ plebis consuetudine polluantur. ea partim vallum & agger  
vndique muniunt: partim inflexi enatarum ibidem arborum  
rami; passim interiectis implexisque mira densitate viridibus  
rubis ac sentibus, ad introitum, aspectumque, & ignem arcen-  
dum: tantis præterea recurrentium in se viarum anfractibus,  
vt, instar labyrinthi, cæcos errores & ambages imperitis loco-  
rum obijciant: quæ res vel in primis difficilem bellandi ratio-  
nem

nem hostibus reddit. Zamorinus ipse, quo tempore Lusitani ad Calecutum appulere, ad Panonem (id maritimo vico nomen) haud ita longe ab vrbe, se continebat. Ad eum Gamma cum in anchoris staret, nunties de suo aduentu præmisit: se, cum Regis Lusitaniæ mandatis ac litteris ex alio pene terrarum orbe aduenisse; neque tamen iniussu è naui egressurum. latus ea re Calecutanus, magnifice quæ se ipse circumspectans, quod sui nominis gloria excitam ex ultimis sedibus gentem cerneret; Gammam è periculosa statione in proximum portum, cui Capocæ re nomen est, dato in id duce, iubet inuehi. dein post biduum mittit qui Gammam honorifice ad se deducant. Ille tametsi ignotæ fidei, & vanæ superstitionis homini vitam suam credere, comitum, amicorumque monitis ac precibus vetabatur; tamen legationem peragere, & cuncta coram explorare ipse constituit. Paulo fratri, vicario suo mandat, scaphas quotidie ad littus paratas habeat; ac si quid accidat, quominus ad naues redire possit; ipse nulla eius rei habita ratione Lusitaniam repetat, & Emmanueli Regi inuentæ iam Indiæ, ac totius itineris rationem diligenter exponat. Tum duodecim socijs ex vniuerso comitatu delectis, quam ornatisimo vestitu, cum scaphas versicoloribus vexillis atque tapetibus, & omni tormentorum apparatu adornasset, ingenti omnium gratulatione, strepituque festo ad littus accesit. Descendenti præsto fuit Catuales vnus ex ijs, qui iuri peregrinis dicundo præsunt, cum vario cantu, & magna manu militum, baiulisque ad sarcinas conuehendas: nam apud Indos equi, & cætera iumenta per id tempus in vsu non erant. Dein Gammam tetraphoro impositum, ad urbem Calecutum primum, inde Pananem deportauit tanto populi concursu, vt præ turba quidam elisi, nonnulli etiam è spectandi certamine coorta rixa perempti sint. Vt ad regiam est ventum; à Caimalibus aliquot Gamma cum socijs honorifice primum excipitur. dein Brachmanarum antistes linteatus obuiam prodijt, ac manu leniter apprehensum, longo cubiculorum ordine, denis aulicis ad ostia singula stationem agentibus, in amplum conclaue perduxit. stratum erat pauimentum serico eteromallo viridi: parietes vero bombycina peristromata intertexto auro magnifice vestiebant: ligneis gradibus affabre factis in theatri formam circumquaque eminentibus: ea proce-

rum



## *Historiarum Indicarum*

rum subsellia sunt. Rex in ornatissimo lectulo decumbebat gossypina candoris niuei tunica indutus aureis conspersa rosis, gemmeis fibulis admirabili splendore connexa. Caput cum pretiosis inauribus pileus aureus contegebat in tiaram exurgens, vario gemmarum vnionumque contextu. brachia, crura que de more gentis nuda, armillæ ex auro decorabant, baccis distinctæ clarissimis. pari fulgore lapilli annulis inserti complures è pedum æque ac manuum digitis emicabant. Astabat ex apparitoribus quidam ætate prouectus, in aureo disco tenens Malabaricum betele, seu Tambul Arabicum: quæ folia principes Indi assidue fere mandunt, commendandi halitus, leuandę fitis, & educendæ pituitæ gratia. Zamorinus ipse, quanquam colore subnigro, tamen & proceritate membrorum, & toto corporis habitu gestibusque, dignitatem regiam haud dubie præferebat. Gamma, salutatione peracta, confidere vna cum comitibus iussus, per interpretem exponit: Emmanuelem Lusitanix Regem Calecutani Regis fama commotum, sedus & amicitiam ipsius iam pridem expetere. quando coram congregi, & iungere dexteras locorum interualla prohibeant; legatum profectum misisse. Ni rem aspernetur; confidere se eam societatem vtrique non parum ornamenti, commodique allaturam. Dein prolata munera, & litteræ cum Arabico, tum Lusitano sermone conscriptæ. Ad ea Zamorinus breuiter: Emmanuelis fratris voluntatem, ac propensionem erga se, vel ex eo elucere quod se tam honorifica legatione, per tot discrimina laboresque vltro compellandum, & salutandum existimaret. quod ad foedus, & commercium attineat, rem sine controuersia conueniaturam. simul edisserit, quas è suo regno merces auēhi: quas ad se importari vicissim expediat. Ad hæc, multa de nauigatione, deque itinere sciscitatus, Gammam, & socios in lauta hospitia benigne distribuit. His rebus, vt fit, extemplo vulgatis, cum cæteri mercatores, tum Saraceni præcipue atque Arabes magnopere commouentur. ac præter capitale in Christianos odium, rati etiam, quod res erat, quantum ad Lusitanorum commercia accederet, tantum de suis lucris imminui; & si præualidus manceps in eam negotiationem se interponeret, nihil sibi ad quæstum, & nauigationem loci relictum iri; institutam & coalescentem nouam societatem omni conatu dirimere instituunt.

Ac



Ac primum varijs criminationibus ac maledictis Gammam apud Regem consensu proscindunt : specie legationis explorandum piratam aduenisse; ac, nulla prouocatum iniuria, quacunque iter habuerit, mare infestum reddidisse latrocinijs; emporia cædibus, rapinisque vastasse. Quod si maxime Lusitaniæ Regis missu aduenerit; considerandum tamen Zamorino esse, utrum fidelissimæ, & plurimæ nationes, quæ iam in eius regno sedes & domicilia fixerint; & præsentī pecunia, certissimisque compendijs Malabaricam in dies augeant rem; peregrinæ genti, & toto cœlo disiunctæ, ac proferendi per fas ac nefas imperij cupidissimæ, nullo præsertim merito, posthabendæ sint. Ad hæc, venâles aulicorum animos, & eorum præcipue, qui magistratus gerebant, cum cæteris artibus, tum efficacissimis omnium scelerum & flagitiorum ministris, argento auroque aggressi, haud ita difficili negotio in suam sententiā perduxere. In ijs Catuali ipsi, cui hospitum erat cura concredita, facile per suasum, ut Gamme, per summam officij simulationem, extremā perniciem strueret. Ad quæ facinoræ cum Rex, ab insita barbaris leuitate, ac perfidia, conuiueret; de omnibus consilijs, & imminente exitio per Tunetanum quendam Monzaidem, Hispanicæ linguæ peritum, cui cum Lusitanis mercatoribus in Africa olim consuetudo intercesserat; Gamma repente certior fit; eiusdemque suâsu quam occultissimis itineribus ad naues festine se proripit, eo maiore euadendi spe, quod ab regia classe per hyemem subducta nullum in præsentia periculum immineret. Igitur è portu in altum euectus; Indo cuidam litteras ad Zamorinum dat; quibus, præter acerbas querimonias de hospitio violato, paratisque sibi nulla sua culpa infidiis, hominē hortatus est, ut, repudiatis improbis suasoribus, in pristino consilio permaneret: ac multo plus ex vnius Lusitaniæ Regis amicitia, quam ex vniuersa Mahometana colluie, fructus & emolumentū sibi promitteret. Ad eas querimonias, etiam atque etiam purgare se Zamorinus, & omnem culpam in ministros, vetusto Regum more, conferre. quæsiturum se de infidijs, quas Gamma sibi factas dicat: ac si quem noxium deprehenderit; in eū ita animaduersurum, ut legationis & hospitij sacrosancta iura esse omnes intelligant. Præterea, ad Emmanuelis litteras breue responsum dat; ipsius amicitiam, & gentis Lusitanæ commercium fore sibi pergratum:



## *Hist. Indic. Liber Primus.*

pergratum: cum eo tamen, ne quid ob id in suo regno turbatum  
exillat: neu qua veteribus amicis ac socijs fiat iniuria. Cum eo  
responso Gamma Anchedinam insulam petiit, leucas à Calecu  
to circiter quinquaginta, frequentem nemoribus, & pisce om  
nis generis apprime abundanrem. Ibi refectis è longa iactatio  
ne socijs, nauibusq; Deum precatus, vti propitius iterum ad ef  
fer, reducemq; se optimo Regi, propinquis, ac patriæ sisteret; in  
Europam cursum intendit. atq; Indicum & Arabicum Oceanum,  
propter ventorum inconstantiam, lentissima navigatione re  
menfus, ad Aethiopiæ primum deuenit littora. hinc Magadaxo  
vrbe Saracenorum ex itinere diuerberata, Melindem, vti pro  
miserat, appulit: assumptoq; Regis legato, Zanzibarem inde pe  
tiit insulam cum cætera amenitate insignem, tum felicibus syl  
uis medica omnium generum mala ferentibus. Inde, ab regulo  
perbenigne tractatus, Mosambicum traiecit; fixaq; ibi colum  
na, ad Aquationem Sancti Blasij processit. Ac Bonaspei promō  
torium denuo circumuectus, Hesperidas primum, dein Tertias  
quas appellant, postremo Olisiponem summo Dei beneficio te  
nuit Septembri mense anni millesimi quadringentesimi nona  
gesimi noni, plus biennio postquam indidem abierat, socijs fer  
me centum, in iis Paulo fratre, morbo & labore consumptis. re  
liquos in terram egressos circumfusa illico turba, concionis in  
star, tanquam reuocatos ab inferis certatim intueri: de itinere  
toto, deq; indicis rebus sine fine perquirere: incolumem aduen  
tum, partamq; gloriam gratulari: deniq; eiusdem peregrinatio  
nis & laudis cuncti studio, & æmulatione paulatim accendi. Em  
manuel, aduenienti Gamma viros ex vniuersa nobilitate prima  
rios obuiam misit honoris causa: & quamuis incertam atq; in  
fidam ex India pacem afferret; tamen ob singularem viri con  
stantiam, & animi magnitudinem ab omni posteritate celebrā  
dam, & exhausta cum fide mandata, Gammam nouis honorum  
titulis & vectigalibus auxit: cæteris nauarchis ac socijs præmia  
tantis laboribus, ac tanto Rege digna persoluit.

*Libri Primi Finis.*



# HISTORIARVM

# INDICARVM.

LIBER SECVNDVS.



A T E F A C T A iam India, & incognitæ  
ad eam diem navigationis ratione ut-  
cunque comperta; primum omnium  
Emmanuel toto regno supplicationes  
indixit. Populi circa præcipua templa  
frequentes iere. Dein M A R I A E Vir-  
gini eius navigationis præfidi extru-  
ctam olim ab Henrico principe ædicu-  
lam in ipso aditu portus Olisiponenfis,  
miram in amplitudinem extulit, auxit-  
que: ac loco in primis illufiri, ut ab om

nibus conspici posset, ipsius Henrici militarem statuam collocauit. Ad eius templi custodiam, & ceremonias, & naualis præsertim turbæ ducumque animos rite expiandos, eximia sanctitate monachi acciti è Hieronymiana familia: quam Rex præci-



## *Historiarum Indicarum*

pua beneuolentia ac veneratione prosequabatur. locus, desumpto à Christi incunabulis nomine, Bethleem dictus: in primis totius Hispaniæ tum structura, tum religione visendus. Et quoniam Gammæ, comitumque fama celebritasque, & multiplex Indicarum opum relatum in Lusitaniam specimen, omnium animos in rerum ingentium spem, & eiusdem itineris cupiditatem erexerat; tanti consensus ardorisque bono utendum ratus Emmanuel; nequaquam ultra exploratorijs nauigijs, verum iustis iam clasibus ea maria sibi sulcanda constituit. Nauibus tredecim, quæ alui magnitudine, & hominum frequentia, & onerum æstimatione, haud exiguas Lusitani regni opes, & copias indicarent, Petrus Aluarus Capralis, claro æque genere ac virtute vir, summa cum potestate præficitur, Gammæ interim requie ex longa defatigatione concessa. Huic ab Rege mandatum in primis, ut Christianam fidem religionemque in ijs regionibus tum serere, tum amplificare omni studio insisteret. dein, ut Calecutanum Regem, quanta maxima lenitate ac diligentia posset, ad firmam pacem, & stabile fœdus alliceret: ille si durum, & illiberalem, & infidum sese præbere perseverasset; tum vero barbarum scelus, & illatas Vasco Gammæ iniurias vindicaret; cumque nefariis Christi hostibus iustum, piumque susciperet bellum. Idcirco, partim ad prædicandum Ethnicis Euangelium, partim ad Christianorum animos procurandos, egregie pius doctusque Theologus Henricus Franciscanus, qui postea Septæ vrbs fuit episcopus, cum sacerdotibus aliquot in eandem expeditionem est destinatus: & præter vectores naualemque turbam, ex Lusitana iuuentute delecti mille, & quingenti propugnatores in classem impositi Capralis litato profectus, anno millesimo quingentesimo à partu Virginis Martio mense (quem ad iter Indicum maxime idoneum deinde monstrauit usus) ad hesperidas tertio decimo die processit. circum-eas insulas fœda tempestas coërta classem latè disiecit. è præfectis vnus Ludouicus Piræus, cum ventis ac mari aliquandiu lustratus, incertum quonam proprio incommodo non tenuit cursum. conuersis ad extremum velis, Olisiponem inuitus irrita nauigatione repetiit. Cæteri postmodum ex errore, ac trepidatione collecti, ad vitandam Guineæ malaciam, & superandum. Bonæ spei promontorium, longiore ambitu capto, cum  
se

se in altum dedissent, post mensem circiter, in telluris conspectum ventis feruntur: quā insulam initio rati, continuata dies aliquot secundum littus navigatione, continentem sine dubio esse comperiunt. Ibi ex longa iactatione classem portus excepit, cui ab egregio situ ac tuta statione, securo nomen impositum. Inde ad cognoscenda loca gentemque, descensum in terram; & Christiano ritu in ara subductili sacrificatum, & concio de rebus diuinis ab Henrico est habita: barbaris, cum nihil plane perciperent, tamen occulto numinis impulsu cœlestes ceremonias, & sacram concionem admirabili studio ac veneratione concelebrantibus. ex ijs vnus cum Gaspare Lemio in Lusitaniam extemplo missus, regem ac cæteros omnes ingenti lætitia atque animi voluptate perfudit. In eo littore Capralis præalta Crucis vexilla, solenni ritu & precationibus consecrata, defixit; à quibus regio Sanctæ Crucis in aliquot annos dicta: sed à Brasilio rubro ligno, quod tingendis vestibus inde petitur, super inditum deinde Brasiliæ cognomen, repudiata sanctiore appellatione, tacitus prophani vulgi consensus, & pertinax consuetudo retinuit. Est autem Brasilia noui orbis pars, quam, paulo post Capralis accessum, Americus Vesputius Florentinus eiusdem Emmanuelis auspiciis accuratius explorauit, atque à duobus ab Aequatore gradibus, partibusve, ad gradus quinque & quadraginta in Austrum excurrans, trigoni oblongi speciem refert. cuius basis in Aequatorem ac Septentriones obuersa, ab Oriente in Occidentem recta protenditur. Angulus extremus ignotas ad meridiem regiones attingit. latus in Orientem spectans, interposito mari, Hesperijs Aethiopibus obiācet. alterum latus à prouincia Peruana disterminant iuga montium adeo celsa, vt ipsos auium volatus fatigare dicantur, vno duntaxat, quod adhuc exploratum sit, eoque difficillimo transitu. Regio ferme tota in primis amœna est, cœli admodum iucunda salubrisque temperies: lenium quippe à mari ventorum commo dissimi flatus, matutinos vapores ac nebulas tempestiue dissipant: solesque purissimos ac nitidissimos reddunt. Scatet ea tota ferme plaga fontibus, ac syluis, & amnibus inclytis: è quibus (vt reliquos taceam) is, quem Argenteum vocant, leucarum quadraginta ostio in mare fertur adeo violentus, vt inde nautæ dulces hauriant latices priusquam tellurem ex alto con-



## *Historiarum Indicarum*

spiciant. Terra partim in planiciem exspatians, partim in colles clementer assurgens, foelix præpinguibus glebis, & riguo solo semperque vernante, credita semina multiplici reddit fenore: ac saccari præsertim est ferax, quod cœleste donum, Attico melli multis partibus præferendum, proceris arundinibus condidit natura: è quibus aquaria mola dulcissimus humor expressus, in ahenis ad purum excoquitur; tum formis in panes cogitur ad metæ figuram: dein rursus, ubi libuerit, eliquatus, artificii manu pigmentis, ad instar ceræ, varias in effigies indiscreta pene veri similitudine trahitur. cuius generis officinæ, priscis ignotæ, hodie, qua præsertim incolunt Lusitani, passim exstruuntur: atque ex ea merce negotiatores, vel maximum capiunt emolumentum: siquidem nauibus quotannis in Europam euecta, certissimo compendio longè lateque diuenditur.

— Certis etiam è plantis, quas vulgo Copaiabas vocant, inciso per æstatem cortice, in modum balsami liquor suauissimi odoris emanat: cui cum ad alios mortalium vsus, tum ad curanda vulnera, & cicatrices tollendas, mirificam esse perhibent vim.

— Eæ plantæ cernuntur affricu animalium attritæ, quæ à serpentibus venenatis, aut à feris icta, ad remedium illud ipso naturæ instinctu se conferunt. At Zabucalæ quæ dicuntur, admodum excelsæ, magnos ferunt summa duritie calices, ore in terram obuerso, & quidem admirabli naturæ solertia pyxidatim operto. ijs calicibus nuces castaneæ saporis egregij continentur: quæ ubi maturuerint, excusso confestim operculo, paulatim ipsæ per se in alimenta incolarum ad vnâ è calice defluunt. Syluestria etiam sunt Caiusia pyra, apprime succosa, & innoxia; itaque medijs caloribus auide manducantur: Cæterum in imo pyro faba quædam extuberat cortice amarissimo, prædulci medulla si torreatur. pyro præterea, refrigerandivis: faba calefacit. Verum, ex omni genere, palma tribuitur ijs, quos vulgus Ananazes appellat. Planta est humilis, cuius è ramis veluti pinea nucamenta dependent præmolliâ: hæc suo tempore in frusta dissecta, gratisfimo simul odore ac sapore, non recenti duntaxat edulio sunt; verum etiam in longuin tempus adseruantur è saccaro. Iam vero, illati in eas regiones ex orbe nostro melopepones, cucumeres, malogranata, ficus vitesque biferæ ac triferæ; nec non multiformia mala medica

malis medica suppetunt. Ad hæc, est videre complures alias pomiferas arbores, quas percensere nimis longum sit; piscesq;, & aues coloris eximij, & quadrupedia plurima, sed ferme sylvestria, partim nota nobis, partim ignota. in quibus utique apparet, quam miris modis ac variis, diuina sapientia ludat in orbe terrarum. Ex eo numero, ut pauca perstringam, apri sunt amphibij, carnibus optimis, ac saluberrimis. ii, quod priores pedes perbreues habent, posteriores autem prælongos; tardiore sunt cursu: itaque deprehensi à venatoribus, qua proximum est, se se aquis immergunt. Antæ sunt etiam gentis vocabulo ad mulæ similitudinem; sed minores, & rostro tenuiore, inferiore autem labro tubæ instar oblongo, rotundis auribus, breui cauda, reliquum cinereæ corpus. eadem lucifugæ sunt. non nisi noctu ad pabulum prodeunt; ubi diluxit, in sua sese condunt latibula. Huius belluæ carnes gustatu plane bubulas referunt. Cotias vero nominant, magnitudine, & forma, & sapore leporum: rufo colore, paruis auribus, cauda fere nulla. Maiores sunt eiusdem fere speciei; quas Pacas vocant: rostro tereti ad faciem felis, fusco colore, candidis maculis interstincto: neque carne tantum, sed & corio ipso prætenere, atque ob id ipsum in delicates epulas expetuntur. Cæterum insolito spectaculo Tatusiæ sunt, ad porcelli magnitudinem: corio squamatim loricato, sic, ut equi cataphracti speciem reddant: ex eo caput duntaxat, ceu testudines exerunt; pedibus contractis: & specubus ferme uti cuniculi se se continent: hæc quoque carnes palato gratissimæ. Magna præterea vis tigrium est: quæ famelicæ, horribili velocitate sunt, viribusque tremendis: eadem pastæ (quod mirere) tanta ignauia dicuntur esse, ut à gregariis etiam canibus confestim in fugam agantur: adeo cibi potusque satietas, non homines tantum, sed etiam feras hebetes reddit. Illud vero mirum in Cerigonibus (id animanti nomen, buxæ colore, vulpeculæ magnitudine) ex eius aluo duæ dependent veluti manticæ: in iis catulos circumfert, & quidem adeo pertinaciter suo quemque vberi affixos, ut à perpetuo sucu non auellantur, antequam ad paltum ipsi per se progredi valeant. Valde etiam inusitata & effigie, & natura est animal, quod ab re ipsa Lusitani Pigritiam appellant, Cerigonum fere magnitudine, sed rostro fœdiore ad aspectum, &



## *Historiarum Indicarum*

vinguibus ad digitorum similitudinem prominentibus. Huic ex occipitio existens coma ceruicem velat; lentoq; ipsa ventris adipe verrit humum, neque vnquam, in pedes exurgit: deniq; tam tarde mouetur; vt quindecim ipsis diebus, ad lapidis iactum continuo tractu vix prodeat. Victitat arborum foliis, & in earum cacuminibus degit plerunque: quarum in ascensu biduum circiter, tantundem in descensu ponit. neque vero adhortationibus tantum, aut minis, sed ne plagis quidem fustibusve bestiam vel tantillum de insita ignauia ac tarditate dimoueas. Mirandum est etiam genus earum, quas Tamendoas vocant; veruecis altitudine; colore fusco; prælongo ac tenui rictu; neque eo ad malas diducto, sed modice ad imum inciso. Vnguibus instructa est quadrupes mire longis latisque, nimirum ad victum facilius comparandum. namque formicis alitur, quarum latebras vbi crebro vnguium iniectu, ac fossione detexerit, illico exertam trium ferme dodrantium linguam immittit exilem, opertamque formicis repente contrahit, glutitque deceptas. Huic, vti sciuro, valde promissa & fetosa cauda pro tegumento est. sub ea quippe ita se condit, vt nihil ex reliquo corpore prorsus appareat. Neque hæc tantum & alia indidem syluestria, vt dixi, verum etiam nuper à Lusitanis inuecta pecorum & equorum armenta plane admirabili prouentu fœtificant. quo magis mirum, vberimo agro, mitissimo cœlo, tam fera & acerba esse incolarum ingenia. Nullos omnino colunt Deos. ominibus tantum, & auguriis ad insaniam dediti, & ariolis impostoribusque miserandum in modum questui sunt. nudi æque viri ac fœminæ prorsus incedunt, robustis lacertis, fluxo à vertice duntaxat capillo; nam ceteras corporis partes identidem expilant: simis, vti Sinarum populi, naribus: æneaque ipsi cute, atro insuper succo pomi Genipapi totum subinde corpus inficiunt. præterea insertos habent iam inde à prima ætate deliciarum causa quidam inferiore duntaxat labro, quidam etiam facie tota prælongos nullius pretij lapillos, tetro sane spectaculo. Gregatim peregrinantur ordine simplici, silentio miro. virum vxor anteit. Carorum aduentum, circumdatis collo brachiis, appresso ad pectus capite, cum effusa comploratione altisque suspiriis primum excipiunt, viæ laborem & incommoda miserantes: momento dein siccant

siccant oculos, habentque lacrymas in potestate. Grauidis  
haud ita multus in partu dolor. à puerperio foeta confestim ex-  
surgit, ac domestica obit impigre ministeria. Eius loco (quod  
vix credat quisquam) in aliquot dies velut eger decumbit mari-  
tus. hic officij causa ab amicis ac propinquis inuisitur. huic for-  
bitiuncule datur ad refouendas vires. huic, de gentis more, bel-  
laria & delicata munuscula deferuntur. Numerandi rationem,  
ac litteras ignorant omnes. tantum tenui quadam traditione,  
nonnulla de Noe, deque diluuiò à patribus accepisse dicuntur:  
vt valde probabile sit, post dissipatos quondam ~~homines~~ iussu  
mortales, nullum huic genti cum nostri orbis hominibus fuisse  
commercium. Vino ac frumento in hac vsque tempora ca-  
ruere, satiuà radice victitantes, in farinam redacta, quam man-  
diocam appellant. Sub eodem tecto, ad inuersam modum cari-  
nae praelongo, multae simul familiae degunt; noctu ad noxia vi-  
tanda animalia cubantes in retibus à terra suspensis: viuuntque  
in diem; & quicquid habent, in commune facillime conferunt,  
nihil in posterum solliciti. Natandi arte ad miraculum vsque  
praecellunt. Sub aqua totas interdum horas, vbi quippiam in  
imo quaerendum est, patentibus oculis vrinantur. itemque la-  
boris & inediae patientissimi sunt. triduum ipsum, vbi penuria  
ciborum ingruerit, ieiuni traducunt: iidem, si copia suppetat,  
à primis tenebris ad lucem vsque in conuiuijs & compotatio-  
ne persistunt. Recte aut perperam factis, nihil post mortem  
praemij supplicijve superesse arbitrantur. Qui diem suum obie-  
re, eos perinde ac decesserint, vel integro corpore, vel mancos,  
aut debiles, vulneribusque confoscos, descendere ad orcum pu-  
tant. ergo incremata condunt humi cadauera, addito rete cu-  
bandi causa, necnon edulij per aliquot dies appositis; quod  
ita persuasum habent, & somnum interim capere, & cibo ve-  
sci manes mortuorum. Captos in praelio hostes (crebra autem  
inter eos bella excitantur, ac sagittis praesertim vtuntur egre-  
gie) multorum dierum cura saginatos, ingenti cum tripudio  
maectant; vorantque tosta verubus membra. ex opatissimae  
Brasillicis epulae sunt. neque, si cui hoc leti genere perire con-  
tigerit, male secum actum existimat: quinimmo ad mortem  
pergit alacer ac securus: editisque contra ipsosmet percusso-  
res facinoribus, magnifice in ipso necis articulo gloriatur.



## *Historiarum Indicarum*

Sparsis domicilijs habitant, nullo magistratu legibusve constric-  
ti. Lingua nec difficilis cognitu, & vna ferme est omnium  
quotquot adhuc probe noti sunt, exceptis certarum rerum vo-  
cabulis, quæ aliter à viris, aliter à scæminis vsurpantur. Trium  
ex alphabeto elementorum F. L. R. nullus apud eam gentem  
est vsus: minime absurda quorundam animaduersione factum  
id esse diuinitus; eo quod Fide, Lege, Rege, sicuti dictum est,  
careant: beneficiorum acceptorum immemores: æque iræ ac  
libidinis impotentes: ad pugnas & certamina temerarij præci-  
pitesq; Monis & humani sanguinis audissimi: ad summam,  
belluis quam hominibus propiores, qui quidem mores pa-  
trios retinent, ac mediterranea incolunt loca. nam post illa-  
tum ab societate I E S V Euangelium, & liberalium artium di-  
sciplinas; in vicos & oppida contributi, præsertim qui mare  
accolunt, ad humanitatem ac pietatem magnis laboribus ex-  
coluntur. Verùm hæc suo loco fusius. Capite damnatos vi-  
ginti homines Capralis è Lusitania secum auexerat, pœna mor-  
tis in exilium commutata. Ex eo numero duobus ad gentis  
mores, linguamque discendam ibi relictis (quorum vnus dein-  
de ad illa commercia magno vsui Lusitanis fuit) ipse, ne frustra  
tempus infumeret, ventis in orientem vela permisit. A Bra-  
sia ad Bonæ spei promontorium immani traiectu leucas nume-  
rant fere mille ducentas. Oceani sæuientis, ventorumque fu-  
rentium ea præcipue regna sunt. In id spatium audacius quam  
felicius ingressis Maio mense Lusitanis, flammeus Cometes hor-  
ribili specie in decimum vsque diem continenter apparuit.  
Iamque variante sæpius cælo pelagoque, atræ ac sordidæ nu-  
bes ad Septentrionem conglobatæ, omnem in se flatum quasi  
reciprocando collegerant: mare languidum erat; insidiosa  
tranquillitas; nautæ locorum ac tempestatum ignari, ad auram  
vndique captandam, totos velorum expanderant sinus; cum  
ex ijs, quas dixi, nubibus vniuerso repente impetu se se effun-  
dens Aquilo transuersas quattuor naues, quarum ad cōtrahen-  
dum minus apte fuerant armamenta disposita, inspectantibus  
cæteris, momento ita evertit obruitque, vt è tanto hominum  
numero nemo prorsus euaserit. In ijs Barptolomeus Diazius,  
cuius supra meminimus, rei nauticæ gloria in primis illustris,  
cum è tot iam tantisq; periculis antea fuisset ereptus; miseran-  
dum

dum in modum interiit. Saluti reliquis fuere vel demissæ raptim antennæ, vel, ubi id non licuit, vela ipsa vento disrupta. Eo tam horrendo spectaculo exanimati qui superfuerant, consanguineos alij, alij caros amicosque oculis frustra requirere, ad lacrymas & complorationem proni, utique, ni mœrorem ex interitu alieno, sui cuiusque periculi metus obstupesceret. quippe Borea pertinaciter nante, pelagus identidem intumescere; fluctus modo ad astra ferri, modo ad tartara penè ima subsidere; naues cum extremo salutis discrimine propemodum inter se collidi. Ad hæc, atra caligo, & rudentium stridor, & dissonæ voces varia & incerta iubentium, non oculorum modo, sed etiam aurium usum abstulerant. Quin, & salum ipsum interdum piceo, noctu igneo colore terrebat. Viginti ipsos dies tempestas atrocissima tenuit. Lusitani millies quotidie morientes, & cœlestem assidue implorantes opem, qua maris tulit impetus, hac illacque dispersi. Prætoria cum duabus nauibus Bonæ spei promontorium per imprudentiam præteruecta, Primas quas hodie vocant insulas, tenuit. ad eam tres deinceps circa Sofalæ oram adiunctæ. Vna, Petro Dia, præfecto per summa pericula, & ingentes ærumnas in Lusitaniam rediit. Ita Capralis è tredecim nauium numero, cum sex duntaxat, iisque laceris ac debilitatis, ad Mosambicum accessit. Incolæ, prioris anni clade perterriti, armamenta, commeatus, ac duces itineris benigne admodum præbuere. Classe resecta, ad Quiloam urbem, atque inde, nequicquam tentata superstitione Abrahami & amicitia; Melindem est ventum: & magna regis voluntate renouato fœdere, hospitioque, & oratore, quem Gamma in Lusitaniam auexerat, in terram exposito; in Anchedium insulam, cuius ante meminimus, Concanio seu Canarino Indiæ littori obiectam secunda navigatione traiciunt. Ibi rite expiata Lusitanorum crimina, & pane cœlesti omnes refecti. Barbaris Euangelium, quamuis, ut videbantur, ad virtutem ac pietatem propensis; tamen ob sermonis inscitiam promulgari non potuit. Ad Calecutum deinde naues applicitæ. — quare, contra quam plerique putarant, Zamorinus haud mediocrem lætitiâ præ se tulit: ac petenti Caprali haud grauate se in colloquium dedit. in eo colloquio cum pax & amicitia certis legibus conuenisset; ædes in vrbe Lusitanis ad diuersandum



## *Historiarum Indicarum*

dum ac negotiandum benigne attributæ . iamque Lusitana ga-  
za exposita; & curatoribus ad commutationem rerum à Capra-  
le institutis; admirabili securitate sacerdotes Euangelio, reli-  
qui mercimonio dabant operam; cum ab iisdem Aegyptiis, &  
Saracenis institoribus, qui ereptam sibi & quæstus materiam,  
& locum apud Regem gratiæ non ~~an~~erebant; vrbana plebs va-  
rijs artibus & criminationibus novos in aduenas incitari cœ-  
pra. Neque ita multo post, assiduis Mahumetanorum stimulis,  
& Nairum aliquot ac principum auctoritate compulsæ; & quod  
caput est, præsentis prædæ illecta dulcedine, vel inscio, vel  
consentiente, certe non prohibente Rege, subito arreptis ar-  
mis, Lusitanorum diuersorium aggreditur. ibi ingenti clamo-  
re ac tumultu excitato, claustra conuellere, fores effringere,  
per vim conatur irrumpere. Nostri, quamquam improviso ma-  
lo perterriti, è fenestris tamen testisque fortiter primos barba-  
rorum impetus repulere: sed perfosso demum, dirutoque pa-  
riete, vis ac numerus ultra sustineri non potuit. hostium ad  
quattuor millia telis ac sagittis instructa conuenerant. Lusita-  
ni septuaginta non amplius, in hospitio versabantur. ex ijs ad  
quingenta partim capti, partim interfecti. reliqui male mul-  
tati, in ijs Henricus antistes cum sodalibus quattuor, multis  
acceptis vulneribus, ad classem vix euasere. Fuitque adeo re-  
pentina clades, vt antequam è nauibus afferri subsidium labo-  
rantibus posset, cæso præsidio, expugnata domus, ac momen-  
to direpta sit. Capralis, quamuis tam atroci ac nefario scelere,  
vt æquum erat, valde commotus; animum tamen præclare vi-  
cit, ac sapienter dolori moderatus est, dum aliqua ratione co-  
gnosceret, vtrum ad Calecuti Regem aliqua pars facinoris e-  
iusmodi pertineret. Ast vbi super tali tantaque re nihil sibi ne-  
que purgationis, neque satisfactionis afferri vidit; proculdu-  
bio affinem eius culpæ Zamorinum interpretatus, onerarias  
decem in ipso portu, mercibus & annona refertas, iniectis flam-  
mis prorsus incendit; nautis partim igne absumptis, partim ca-  
ptis, & ad classem ministeria distributis. cui tanto malo ne sub-  
uenirent oppidani, horrida pilarum procella deterriti sunt.  
Dein, obuersis in urbem maioribus tormentis, ædificia com-  
plura disiecta, mortales multi fœda laceratione discerpti. ex ijs  
Naires vnus Regi acceptissimus, cum ad pedes eius repente ce-  
cidisset;

cecidisset; plenus pauoris in præsens, irarum ac minarum in posterum Zamorinus illico ex vrbe secescit. Capralis vero egregie vltus suorum cædem, barbaris amplius sexcentis terra marique peremptis, nauibus hostium captis, & in ciuitatis conspectu combustis, quod profectiois tempus instabat, mense Decembri ad Trimūparam Cocini Regem inde se contulit. Cocini regnum à Calecutu leucas ferme triginta in meridiem distat. eiusdem nominis regia vrbs ad ostium Mangatis fluminis, mari introrsum æstuante, ad formam peninsulæ cingitur. Aedificia, mores, instituta ferme eadem quæ Calecutanis. Indicarum vero frugum, & aromatum, ac piperis præsertim, ager longe fertilior. Rex tum aliis de causis Zamorino clam erat infensus, tum quod monopolio Calecuti instituto, mercaturam ab suo cæterisque regnis pene per vim auerteret. Accedebat metu è nimia Zamorini potentia ac propinquitate; cui se, & reliquos Malabaricos reges multis nominibus videbat obnoxios. Atque, vt malus amicitia fideique custos est timor; ex ea seruitute ac periculis eripi se vehementer optabat. Capralis, cum è regione Cocini iactis anchoris constitisset, quod omnis Malabarici nominis fidem iure suspectam habebat; neque se, neque suorum quenquam incolis credendum existimauit. Michael erat quidam Christianus è logue, paucis illis diebus Henrici & sociorum opera, ad Ecclesiam adscriptus; Indicæ rei bene peritus, & magna apud omnes existimatione. Hunc, tentandi fœderis & amicitia causa, Capralis ad Trimūparam legat. Rex, qui de Lusitanæ gentis opibus, & rei bellicæ gloria, deque rebus cum alibi tum ad Calecutum gestis multa inaudisset; iam ante in eius nationis admirationem ac beneuolentiam excitatus; quasi inopinatam aliquam hereditatem, sic oblatam eius amicitia facultatem auide arripuit. Datis vltro obsidibus nobilissimis, mira liberalitate de commercij legibus cum Caprali decidit; & singulari diligentia ac sedulitate, per impigros administratos, æquo admodum pretio, mercibus Indicis aduenarum naues quamprimum onerandas curat: eorumque procuratoribus propriam in suo regno sedem ac domicilium dat. Dum hæc ad Cocinum geruntur, legati à duobus finitimis regibus, Colani, & Cananoris (regionum & oppidorū ea nomina sunt) Caprali, si ad eorum portus commeare vellet; commercium & amici-



## *Historiarum Indicarum.*

amicitiam longe optimis conditionibus detulere . Quas ille conditiones, quòd cum Trimumpara iam bona fide transegerat, in præsentia repudiavit : animum & voluntatem accipere se, & libenter vtriusque propensione & officio testimonium in Lusitania daturum esse pollicitus est. Cananoris tamen Regem quòd multò enixius egerat, constitutis Cocini rebus, in reditu sibi adeundum putavit . Ea vrbs abest à Cocino leucas in Septentrionem quadraginta; portu in primis capaci tutoque. oī yza importata vtuntur incolæ : carne, pisce, pomis abundant : ac præterea pipere, cardamomo, gingibere, tamarindis, cinnamo, & myrobalanis . ad easque digerendas merces, non exiguo diuinæ bonitatis argumento, tellus plurimis concisa æstuarijs, fluminibusque, nauigia vsquequaque facili aditu admittit . stagna quoque passim occurrunt ingentia, grandibus plena lacertis ad Crocodili effigiem : ij tergoris duritie, conchiliorum instar, impenetrabili, enormi capite, duplici dentium serie, horrendo prorsus hiatu in hominem furenter inuadunt . Eorum halitus oris est suauissimus : at contra in eadem regione serpentium & anguium adeo teter ac noxijs, vt afflatu ipso necare perhibeantur . Vespertiliones quoque sunt multi, dentibus & rostro vulpinis, miluij magnitudine : præcipuo in honore mensarum . Ædificia, moresque, cuiusmodi cæteris Malabaribus . Rex, inanum Deorum simulacra colit; Brachmanica disciplina, & sacris initiatus, vt reliqui . Ab eo Capralis oratorem ad Emmanuelem accepit, & vsurpandi magis commercij, & amicitie causa, quàm quòd nouis oneribus multum loci superesset; complura frugum Indicarum pondo ibidem coemit : inque Occidentem Ianuario mense cursum instituit . Plenis velis euntem, viginti maioris formæ naues, multis refertæ millibus armatorum, Zamorini iussu frustra insequuntæ. Indico transmissio Oceano, è sex onerarijs vna vadis circa Melindem inhæsit . eius armamentis ac spolijs ne Saraceni potirentur; concrematus alueus, instrumenta machinæque bellicæ consulto demersæ : quas tamen Rex Mombazæ deinde expiscatus, in Christianorum damnum perniciemque conuertit. Inde Capralis itinere solito circumuectus Africam, Iulio denique mense exeunte mistum ingenti dolore gaudium in patriam retulit : quando tot vel Carorum, vel fortium virorum interitus,

tus, quantavis pecunia diuitijsque compensari minime posse videretur. Eodem anno, incertus quo loco res esset Indica, Emmanuel Ioannem Nouam Callæcum, notæ fortitudinis & prudentiæ virum, cum nauibus quattuor Caprali subsidio miserat. is paulo infra æquatorem primus insulam inuenit. quæ à salutarî Mariæ Virginis Conceptione denominata est. inde, nusquam occurrente Caprali, Melindem delatus; deque ipsius in Lusitaniam reditu, & Calecutana cæde & insidijs, multorum sermone certior factus; Cananorem petiit, regemque honorificis verbis Emmanuelis nomine salutauit. Inde, præter Calecutanam oram Cocinum proficiscenti, classis ingens nauium plus octoginta apparuit: quam Zamorinus, haud dubia victoriæ spe, ad Lusitanos in ipso Cananoris portu opprimendos celeriter miserat. Neque deterritus tanta multitudine Ioannes, nauibus ad faciliorem circumactum vsuque tormentorum, in altum euectis; assidua iaculatione prælium ad solis occasum præclare sustinuit: neque vnquam hostibus tanto superioribus numero, locum ad conferendas manus, seque circumueniendum reliquit. Paronibus nouem, onerarijs decem depressis, epibatis amplius quadringentis desideratis, Calecutum postridie mœsti Malabares, vniuersa lugente ciuitate, rediere. Ioannes, egregia parta victoria, gratulantibus regulis Cocinum adiit; naues per otium onerauit; felicique successu ouans in Lusitaniam iter intendit. Transuectus inde Bonæ spei promontorium, aliam insulam patefecit, quæ Sanctæ Helenæ, cuius tum dies natalis agebatur, est appellata: modico quidem illa circuitu, sed saluberrimo cælo, aquis optimis, & egregia frugum & carniû copia; loco præterea ita opportuno; vt ad recreandas è longo itinere Lusitanorum classes, diuino consilio ibidem enata videatur esse. Minus è sententia per idem tempus nauigauit Consaluus Cœlius: qui cum sex nauibus in Brasiliam destinatus, amissis locorum ac tempestatum iniuria quattuor, nil nisi rubrum lignum, & simias, psittacosque in Lusitaniam retulit. Interea Emmanuel, cognitis rebus in India gestis, classem parauit nauium viginti, rebus omnibus instructissimam: quæ vel amicis præsidio, vel hostibus terrori esse posset. huic iterum Vascus Gamma cum summo totius Arabici, Persici, & Indici maris imperio præfectus,



## *Historiarum Indicarum*

fectus, cum Olisipone mature solisset, ex itinere Abrahamum Quiloæ tyrannum, tanto apparatu perterritum, Emmanueli stipendiarium fecit, imposito annuo tributo, quod duum millium miticalium, et ipsi appellant, vel aureorum summam haud excederet. Iade cum in Malabares traiecisset; ingentem Saracenorum nauem & militibus & omni telorum genere paratissimam, Calecuti redeuntem expugnat: in ea Mahometani permulti interempti, Mecam ad pseudo prophetæ sepulcrum superstitionis causa peregrinantes, at pueri ex eadem secta complures, Christianis præceptis imbuti baptizatique sunt: quos Gamma Olisipone postea templi Bethleemici ministerio dedicauit. Ab ea victoria Cananorem adiit; regi que & oratorem suum, & ab Emmanuele perampla dona cum litteris reddidit, ac renouato fœdere Cocinum tetendit.

Ibi dum sui regis negotia conficit; repente legati affuere à Christi cultoribus ijs, qui non longe à Cocino Cranganorem habent urbem, è vetustissima illorum stirpe, quos beatus quondam Apostolus Thomas ad sanā religionem ac fidem à Brachmanarum fabulis & impura superstitione traduxit. Is Indiam prouinciam in orbis terrarum distributione sortitus, Socotoram insulam Arabici maris fertur adiisse primum: dein, multis ibi factis Christianis, traiecisse Cranganorem. in ea ciuitate cum multos item Christo filios peperisset; Colanum petiit: neque ibi frustra disseminato Euangelio, trans iuga montium ad oram orientalem ingenti labore contendit: multisque locis, ac præsertim in Coromandelis regno, Christiana re bene gesta, perrexit in Sinas, quorum ea tempestate celeberrimum erat nomen; ac Diuini verbi sementem in eo quoque nouali facere instituit. Atque haud pœnitenda collecta fruge, templisque ad Christi cultum ædificatis, in Coromandelem ad reuifendos & confirmandos in fide neophytos rediit. Coromandelis caput ac regia tum erat vrbs Meliapor; quam vetustate bellisque dirutam, nuper Lusitani, deducta eo militum emeritorum colonia, frequentarunt, ac mutata appellatione, honoris Apostolica causa ab sancto Thoma denominarunt. In ea vrbe sacram ædē exstruere aggressus Apostolus; cum à dæmonum sacrificulis, & ab Sagamo rege prohiberetur; res interim insignis accidisse perhibetur ad Christi virtutem, & fidem Euangelij comprobendam.

dam: Inusitatae magnitudinis truncum, ut fit, in littus eiecerat mare, quod eo tempore leucas fere decem ab urbe distabat. Eam rex materiam cum in usum aedificij cuiusdam vehementer expeteret, robusti primum homines incassum funibus ergatisque amouere conati. dein adhibiti complures elephantii, cum toto connixi impetu nihil omnino proficerent; Apostolus regi conditionem tulisse fertur, si truncum illum sibi ad templum vero Deo aedificandum daret, nullis machinis, nullo mortalium adiutore, sese protinus eum ad urbem attracturum. Cum rex, insanire videlicet hominem ratus, per ludibrium annuisset; tum Diuus Thomas zona qua erat praecinctus, ad prominentem e caudice ramusculum annexa, signo tantum sacro Crucis, immanem stipitem facili ductu sequentem, vniuersa ad spectaculum effusa ciuitate, in ipso pomario statuit: ibidemque defixa lapidea Cruce; vaticinatus est, cum ad eum lapidem usque pertingeret pelagus: tum Diuino iussu e remotissimis terris candidos homines ad eadem qua ipse intulisset sacra instauranda venturos. Neque fefellit praedictio. Siquidem sub Lusitanorum appulsum, occultis tot annorum accessibus locus Oceano deinum allui coeptus. Verum ab eo signo ceterisque virtutibus, cum Thomae verbis maior in dies accresceret fides, Brachmanas autem, fugo & fallaciis parta iam auctoritas, iam sagina deficeret; accensus rabie quidam ex ijs, foedum ac ferum facinus mali daemone instinctu consciuit. Filio admodum puero ipsemet necem intulit, ut haberet unde peregrino & inuiso capiti crimen exitiumque conflaret. Citatus ad regem Thomas, cum accusator ab eo per summam indignationem & querimoniam poenas filij extincti repeteret; contra, Thomae discipuli, affinem aut omnino conscium eius culpae magistrum negarent; nihil opus esse coniecturis & certaminibus ait Apostolus, ab ipsomet, qui occisus dicatur; omnium optime cognosci rem posse. petit ut eius publice interrogandi potestas fiat. nihil recusatum ab aduersario: & cunctis tam in audita rei expectatione suspensis, cadauer in medium affertur. Tum ad exanimem puerum Thomas placido & sereno vultu conuersus: Age dum, inquit, per Christum quem ego Deum praedico, palam & sine ambagibus puer prome, quisnam huiusce tanti sceleris auctor exstiterit. Mirum dictu: ad Christi nomen,



## *Historiarum Indicarum*

nomen, frigido & exsangui corpusculo vitales confestim rediere spiritus: & clara voce, ut omnes exaudirent; Thomam certum summi Dei legatum; & ipsius odio, ad struendam illi calumniam, nefarias à parente sibi manus allatas esse confirmat. Hac tam illustri, tamque admiranda testificatione fractus calumniator obmutuit. Sagamus propenso iam ante ad credendum animo, Christianam deinde fidem ac religionem si ne vlla dubitatione complexus est. Regem ex amicis, & popularibus imitati complures. Brachmanis, quamquam detecta diuinitus fraude, & pulso in exilium parricida, pertinax tamen & cæca mansit improbitas. cum lætos Christianæ rei progressus, & neglecta Deorum simulacra ferre non possent, facta conspiratione, præconem Euangelij è medio tollere omnino constituunt. Tumulus erat non procul ab vrbe: quo Thomas identidem, è Christi disciplina, secedere, propitiandi æterni regis, & sui recolligendi gratia, consueuerat. in eum locum, tempore captato, Brachmanæ armati cum sui similibus impetum dant. ibi Apostolus, dum ad Crucem, alienato ab sensibus animo, Deum pro salute hominum, & eius præsertim populi deprecatur. telis primum ac lapidibus appetitus, dein ab vno è Brachmanis lancea transfossus occubuit. venerandum corpus inde sublatum à discipulis, & in templo nuper ædificato conditum est. Accessit martirij nomine, & memoriæ causa, fragmentum hastæ, quæ inhæserat costis: & baculus præferratus, quo ille ad peregrinationes utebatur: & vrna fictilis cespitem inferto, nempe, qui manantem è sacris vulneribus cruorem ebiberat. exinde locus multis miraculis claruit, ac magnus eodem ex omni parte concursus, voti & religionis ergo, fieri cœptus. Hæc ferme Indi sciscitantibus Lusitanis, non è fama solum, sed etiam è veterum annalibus edidere. quin egregias Thomæ laudes, ac mortem pro Christi nomine fortiter obitam, pueris Malabari-  
bus patrio carmine decantare mos est. Sunt qui cum tribus Magis, qui ad Christi liberatoris incunabula cum muneribus adoranda, Sybillæ Indicæ (ut ferunt) monitu, stella duce tetenderant (quo in numero Pirimal Ceilani rex ponitur) Thomam in Oriente congressum: deque immani trunco miraculum non Meliapore, sed Cranganore perpetrasse dicant, ac postremo in Calamina vrbe mactatum regis imperio (qui Sagamo defun-  
cto

quo successerat) ac sacrum deinde corpus Edeſſam Meſopotamiæ tranſlatum à Chriſtianis fuiſſe contendant. Vtcunq; res habeat (nam ego meam interponere ſententiam in tali re, tantoque locorum & temporum interuallo non auſim) ſatis conſtat, Apoſtolum in Coromandelio tractu Gangetici ſinus, palmam tuliſſe martyrij. nec dubium eſt, quin ex diuini viri præceptis atque inſtitutis, ingens hominum multitudo variis Indiæ diſperſa regionibus, in hæc uſque tempora, Chriſti nomen fidemque tenuerit; quamquam ex Armenij Patriarchæ Neſtoriani placitis, à quo Episcopos paulo ante hanc memoriam accipere conſueuerant, multis vitijs & erroribus inquinatam. alioquin, Apoſtolicas ceremonias magna ex parte obeunt. altaris myſteria religioſe venerantur; eoq; viatico, decedentes è vita, ſe muniant. Aduentus Domini, & quadraginta dierum ſolenne ieiunium diligenter obſeruant; quotidianæ pſalmodiæ, & ſacris inſiſtunt. & cum alia Chriſti Domini Sanctorumque feſta rite concelebrant; tum vero præcipue Paſchaliū feriarum octauam, quam Dominicam in albis vocamus; quòd eo demum die, incredulus antea Sanctus Thomas, indito in Chriſti latus ac vulnera digito, Dominum ſuum, ac Deum ſuum præclara teſtificatione confeſſus eſt. Alia præterea multa ex maiorum traditione diligenter obſeruant, eo maiore fidei & conſtantiæ laude, quòd ob id ipſum non modo à Mahometanis hominibus acerbè vexantur, ſed etiam ab regulis Ethnicis in ſeruitutem redacti, cum alias indignitates & contumelias perferunt, tum verò ſedem ac domicilia iniquis penſionibus reddimere ſubinde coguntur. ijs, aduentu Luſitanorum, noua diuinitus aſfulſiſſe lux viſa. Conſilio inter ſe habito qui Cranganoris incolunt fines, ad Gammam in propinquo verſantem, legatos (vti orſus eram dicere) deſtinarunt. quorum ſumma orationis fuit; ſe & vetuſtiſſimos Chriſti famulos eſſe; & hoc ipſo Luſitanici nominis cupidiffimos: multa ſe à barbaris indigna quotidie pati: petere & orare, vt Emmanuelis regis nomine ſe ſuaque omnia in patrociniū fidemque recipiat. Sub hæc, deditiōis inſigne, ſceptrum argento decoratum Gammæ ſupplices detulere. Quos ille benigno vultu, comiter & amice cōplexus, bono animo eſſe iubet: vel in primis mādātū ſibi ab Rege Luſitaniæ affirmans, vt Chriſti fideles quotquot in ea regio-



## *Historiarum Indicarum*

ne supersint, omni ope atque auxilio subleuet: nondum id sibi per Calecutanorum insidias, & quotidiana vitæ discrimina licuisse: ac ne tum quidem ob angustias temporis, reditu iam iamq; imminente, posse illis quam vel maxime cupiat operam studiumque præstare. Cæterum, quæ prima se occasio det, enixe curaturum, ut non sine causa Christiani omnes in Regum Lusitaniæ pietate opibusque, certissimum suæ salutis commodisque præsidium esse constitutum intelligant. Interea, si qua necessitas incidat grauior, ad Lusitanum confugiant præfectum; quem firmo cum præsidio sit in India relicturus. Is erat Vincentius Sodreus, cui Emmanuelis iussu Gamma sex ornatisimas naues ad maritimam oram tuendam reliquit, ut Saracenos, & Arabas ab Indici litoris accessu & commerciis prohiberet. Interea Zamorinus variis artibus atque fallaciis Gammam ad se perlicere & circumuenire conatus, cum nihil ei procederet; Trimumparæ per litteras ac nuntios alternis rogando minandoque suadere etiam atque etiam institit, Gammam & comites vel sibi proderet, vel certe è suis finibus in perpetuum exterminaret. Cui tam impudenti postulato, fortius ac liberius quam à barbaro expectari posset, semel iterumque respondit ille: se nullis neque promissis neq; terroribus adduci posse, tantum ut in se facinus admittat, iusque naturæ simul ac gentium violet. Si quid ab se petat, quod saluo officio præstare possit; id vero se libenter ipsius causa vel cum damno facturum. Qua viri constantia vehementius irritatus Zamorinus, in Lusitanos primum, deinde in Trimumparam ipsum aperte grassari constituit. Rebus iam transactis, Gamma rediturum patriam maturabat, certior ea de re confestim ab exploratoribus factus Zamorinus, ad Calecutanam oram appropinquanti classem opposuit nauium vndetriginta, eò certiore victoriæ spe, quòd Lusitanicas naues ipsis oneribus impeditas, prorsus inhabiles ad pugnam putabat fore. Sed eum longe fefellit opinio. Siquidem in barbaras duas reliquum agmen aliquanto spatio antegressas, Christianæ tres eximia celeritate velis inuectæ, tantum primo congressu terrorem intulere; ut nautæ militesque tentata vix pugna illico se in mare deiecerint. quorum ferme trecenti è scaphis inrer enatandum occisi: cætera nauigia eodem metu perculsa, qua cuique pro-

ximum

ximum fuit, turpi fuga littus petiere. nec fugientibus institit Gamma, propter gravitatem onerum veritus ne qua in brevia per imprudentiam incurreret. in captiuis duabus haud spernēdæ merces inuentæ, in ijs pretiosa fictilia, & argentea vasa permulta; itemq; simulacrum aureum librarum ad sexaginta, horribili admodum specie: huic, luminum erant vice, duo primæ notæ smaragdi: è pectore autem, claritatis exiniæ pyropus, castaneæ pene magnitudine, radiabat. amiculum aureum plurima & varia de more distinxerat. rebus hisce raptim flammæ subductis, aluei cum armamentis in conspectu omnium incensi. Gamma, rebus terra marique ex animi sententia confectis, cum ex itinere Cananoris Regem denuo salutasset; Mosambicum ad naues reficiendas, atque inde Olisiponem læto cum roboatu cantuque incolumis appulit. Egreredientem in terram, excepere, Emmanuelis iussu principes nobilesque viri quamplurimi: qua ille celebritate ac frequentia, cunctis ordinibus maiorem in modum gratulantibus, Regiam petijt. Auxere illius diei lætitiā, cum naues permultæ varijs è regionibus eodem tempore in portum inuectæ; cum in pompa faustis omnibus & magno populi applausu prælatum aureum in argenteo disco vectigal, quod Abrahamus Quiloæ tyrannus eo primum anno pependerat. Ex ea pecunia Emmanuel auream pyxidem in Sacrosanctæ Eucharistiæ vsum faciendam locavit: ac miro artificio perfectam, pretiosisque ornatam lapillis, in æde Bethleemica posuit. At Zamorinus interim aduersis rerum suarum euentibus quotidie magis in rabiem accendi: & quod Calcutanas opes indies imminui, Cocinenses maiorem in modum augeri conspiceret, assiduis inuidiæ stimulis agitari: Trimumparæ verò libertatem in respondendo, pertinaciam in Lusitanis omnē ope tuendis, ferre nullo modo posse. Quibus rebus per se iam satis ægrum & exulceratum animum, egregij scelerum omnium artifices Mahometani facile perpulere, ut ipsi Trimumparæ bellum inferret: ac quoniam preces ac minæ parum prodesse, vi armisque ad Lusitanos tradendos hominem cogeret. Qua de re consilio principum indicto, plerisque, ut fit, quò inclinatum Regis animum sentiebant; cō præcipientem sua sententia impellere nitebantur. vnus Naubadarinus Zamorini sororis filius, & successor designatus, omne cōsiliū



## *Historiarum Indicarum*

belli suscipiendi gerendiq; discutere frustra conatus est : quandoquidem Zamorinus nonnihil eius oratione & auctoritate commotus , reliquis tamen instigantibus, dolori potius & iracundiæ, quam rectæ rationi, ac salutaribus parere consilijs , vt plerique mortales, animum induxit. Igitur, vt Lusitanicæ classis præsidio Trimumparam exueret, qua illum vna re potissimum niti præclare nosset; bellum terra maxime sibi gerendum existimauit, eoq; consilio exercitum omnem ad Pananem, cuius ante meminimus, vicum, sexdecim à Cocino leucas, coegit . Ea fuere armatorum ad quinquaginta millia . Cuius tantæ molis tantique apparatus nuntio Cocinum allato ; fremere plebs, aduenarum gratia se in capitis ac fortunarum discrimen impelli : nomen Lusitanum diris omnibus exsecrari : ipsos ad eadem inquirere, ac sustulisset proculdubio, ni Rex eorum vitam firmissimo Nairum præsidio muniisset . Principes verò ac dynastæ eodem perterriti metu, Trimumparam supplices etiam atque etiam precari hortariq; , tempori cederet : Zamorinum placaret : denique ignotæ amicitiae & incertæ dispendio, regni salutisq; aleam sine cunctatione redimeret . Quibus cum Trimumpara obfirmata resisteret mente, nihilq; sibi tanti esse vel vnquâ fore affirmaret; vt legationis & hospitij violaret ius, fidemq; datam Regi Lusitaniæ falleret ; dynastæ plerique, desperata Cocinensi re, ad Zamorinum vnâ cum amicis & clientibus transfugere . Quos imitati postmodum Europæi duo, Christiano indigni nomine, quos alij Illyricos, alij Insubres fuisse perhibent ; deserta fide ac religione, tormentariam fabricam, & æris conflandi scientiam, cuius erant peritissimi, sane graui Christianæ rei damno barbaris prodidere . neque impune celsit eis perfidia. si quidem post annos aliquot, agnoscentes errorem ac scelus, cum ad Lusitanos reditum pararent, à Malabaribus illico deprehensi, & concursu populi crudeliter interempti sunt . Dum hæc à Zamorino parantur, Sodreus, ora Calecutana vastata, Cocinum peropportune cum socijs appulit . Eius aduentu Rex & Lusitani paululum respirarunt. Sed, ille simul edoctus quanto in periculo res esset, simul inimicis precibus rogatus vt milites in terram exponeret, seq; cum Trimumparæ copijs maturè coniungeret; contra omnium expectationem animo prorsus obdurato respondisse traditur :

sibi



sibi maris custodiam ab Emmanuele commissam. Si maritimum instaret bellum; se officio præclare functurum: quandoquidem terra gerenda res foret; Rex cum suis ipse sibi consulere. Ab hoc responso, gementibus Lusitanis, perculso rege, ad fauces Erythræas obsidendas recta contendit: Arabumque sex nauibus in itinere captis, præda ditatus ingenti, ad Curiam muriam insulam haud longe ab Aromata promontorio, qua in Septentriones obuersa est, in anchoris constitit. ibi dum in Mahometanos porro imminet excubatque; Maio mense in-eunte atrocior Boreas vehementi procella naues allisas ad saxa comminuit: ipseque Sodreus vna cum Blasio Germano fratre, tum spreti Lusitanici sanguinis, tum destituti Regis amicissimi ac fidelissimi, pœnas horribili naufragio, & repentina morte persoluit. Fertur, antequam id accideret, ab incolis identidem ad monitus, uti statam & anniuersariam eam tempestatem caueret; quanquam obtemperantibus aliis nauarchis, & in tuta secedentibus loca; ipse tamen contumaci vultu, verbisque insuper contumeliosis optima consilia respuisse: Hæc ferme de Sodreis fratribus aduerso rumore vulgata; quanquam eos admodum locuples auctor Ioannes Batrius liberare culpa videtur, affirmans non à Sodreis desertum Regem, sed enixè operam deferentibus, instante iam hyeme remissum ab Rege. De vtriusque tamen exitu Batrius idem haud sanè discrepat. Ceteri, qui mutata paulo ante statione periculum euitarant, ad placandas cœlestes iras Cocinum repetere, & laborantibus suis opem ferre sine mora constituunt: Sed incensæ officio voluntati haud ita respondit euentus: Petro quippe Ataidio duce, cum Indicum pelagus traiecissent, aduersis tempestatibus ad Anchediuiam insulam hyemare coacti. Interea Lusitani, qui Cocini versabantur, tum de sua, tum de Regis optimi salute solliciti, ac singularem viri constantiam atque animi magnitudinem valde admirantes, ab eo magnopere petiere, uti se ad Cannanoris Regem nauigare permetteret. Ibi sine cuiusquam periculo tutos ad nouæ classis aduentum futuros. Quibus ille respondit, bono essent animo, ac Diuinæ prouidentiae fiderent; quæ bonas causas, cum in extremum discrimen venissent; tum maxime subleuare consueffet: de profectione vero minime cogitarent. neque enim se permissurum, ut quos semel in tute-



## *Historiarum Indicarum*

lam atque amicitiam recepisset; ij, se viuo & consentiente, ad alienam opem supplices ac vagi confugerent. Simul ceteros ne despondeant animum, hilari vultu, & accommodata ad tempus oratione adhortatur. ac quanta maxima potuit celeritate copijs ex vniuerso regno contractis, opportuna loca praesidijs firmat; fossas repurgat; nouas circa urbem munitiones vallumque perducit: in primis vero, quoniam Repelini vada (is locus abest à Cocino leucas non amplius quattuor) ad exercitum traducendum hosti erant petenda; Naramuinum sororis filium, eximia spe, summæ virtutis adolescentem, hæredem regni destinatum ibi cum Nairum quinquemilibus & quingentis opponit. ad eum Laurentius Morenus, & aliquot Lusitanis spectatæ fortitudinis viri ultro se adiungunt. Zamorinus, per vates & sacrificulos ad proficiscendum omnibus diu captatis, signa denique ad Repelinum promouit. ac priusquam traicere conaretur, noua ferri flammæque denuntiatione Trimumparam aggreditur, ni Lusitanos relinquat. cum ille minas omnes terroremque præ officio ac fide contemneret; copiæ traduci à Zamorino, quacunque vada patebant, illico cæptæ. Sed resistentibus acriter Nairibus, non sine magna suorum cæde, semel iterumque repulsus, ab innata mobilitate animi reditum cogitare apud se cœpit; atque ut initia se se dabant, rei difficultate deterritus proculdubio signa retro vertisset; ni pertinax Brachmanarum & Mahometanorum in Trimumparam & Christianos odium acriter obstitisset. Eorum adhortationibus animatus ad cœpta prosequenda; per occultos internuntios Quæstorem Trimumparæ ingentibus præmijs promissisque corrumpit; ut per occasionem stipendij numerandi, quam plurimos è Naramuini præsidio ab signis abducatur. eam sibi ad transitum occasionem fore. Ille per speciem aduersæ valetudinis in castra venire se posse dissimulans, quanquam ægre ferente Naramuino, dimidiam ferme Nairum partem in urbem euocauit. quos cum sub vesperum Naramuinus ea legemississet, ut ante lucem castra omnino repeterent; Quæstor, extracto in multam diem negotio, tota de re Zamorinum per eodem nuntios admonet. Ille ne tantam opportunitatem frustra elabi pateretur; omnibus connixus viribus, non sustinente iam impetum Naramuino, exercitum, sarcinas, atque tormenta,  
partim



partim actuarijs, partim vado traduxit; ac Naires vigilijs fessos, & infrequentes, facta impressione in palmeta Cocino proxima compulit. ibi Naramuinus, multis acceptis vulneribus, magna vicissim edita strage, fortiter dimicans vna cum duobus alijs regijs iuuenibus cadit: reliqui fuga dissipati, variis itineribus in regiam conuenere. Calecutanus, iam se intendentibus tenebris, ultra cedenti hosti non institit. Postridie, tam insigni parta victoria, Trimumparæ fidem iterum per communes amicos, mistasque precibus ac terrore litteras, tentat. ille quamuis è tanta clade, ac præsertim ex amissa regia sobole, insigni dolore accepto; tamen (quod vix credibile videatur) stetit animo, conditiones pacis reiecit, collectisq; reliquiis Nairum, & omnis generis vndique coacta multitudine, aduentanti Zamorino se rursus obiecit. Ea quoque pugna victus ac profligatus, accepto insuper vulnere, nihil habuit prius antiquiusve, quam vt Lusitanos, eorumque res omnes à cedis & direptionis periculo eriperet. Vaipinum est insula Cocino proxima, sacri & inuiolati apud barbaros soli; ac præterea, situ & operibus munitissima. in eam insulam aduenas cum eorum gaza raptim transferendos curat. dein cum egregia manu armatorum subsequutus ipse celeriter: vt si minus loci religione, certe munitis armisque hostem arceret. Omnes fere procures, vt supra dictum est, ad hostes turpi defectione transferant. Vnus vaipinensis dynasta, Trimumparæ sese fidum comitem amicūque ad finem vsque fortiter præbuit. At Zamorinus, haud segniter vsus victoria, Cocinum penetrat; urbem flammis iniectis vniuersam incendit; Vaipinum contempta religione haud semel aggreditur; sed cum ignominia semper ac damno prohibitus, aduentante iam hyeme in proximum ver distulit bellum. interea, ne Trimumpara Cocinum repeteret, castella in vrbis ruinis non nonnulla excitauit. & cohortes aliquot in eo præsidio statuit. ipse tam secundis rebus elatus ac tumidus, Mahomptanis ac Brachmanis effuse lætantibus, ad gratias inanibus Dijs agendas Calecutum reuertit. Ibi æraria officina instituta per duos quos diximus fidei desertores, & alios quorum industriam magnis præmiis fouebat incitabatq; omnis generis tormenta machinasq; ad vrbium excidia cōparabat, cū è Lusitania subito nostris admodum laborantibus affuit Franciscus Albu-



## *Historiarum Indicarum*

quercius, omnibus belli adiumentis instructus. is, Petro Atai-  
dio cum cæteris, qui ad Anchediuam hyemauerant, ad suas na-  
ues adiuncto, Vaipinum recta contendit, ac Trimumparam  
Emmanuelis nomine tum verbis amicissimis erectum anima-  
tumque; tum ad regiam tuendam personam præsentī pecunia  
subleuatū, cæso & fugato Calecutano præsidio, in regnum Co-  
cini summa omnium gratulatione restituit. Inde, populando  
vrendoque perduellium tecta sataque, non vno loco hostes, vel  
inuitos in certamen extraxit, multisque minutis præliis exiguo  
admodum suo detrimento cecidit. Postremo oppida quoque  
aggressus, primo Chiriuaipinum, dein Cambalanum, tum alios  
ignobiles vicos, dynastis, qui ad Zamorinum defecerant, vel in-  
terfectis, vel in fugam actis, ingenti ardore militum expugnauit,  
incenditque. Ab ea expeditione, maximo gaudio & infinita  
cum actione gratiarum à Trimumpara exceptus, pro amicitia  
petiit, vt quoniam inter eas nationes adeo infesta ad eam diem  
vita Lusitanorum fuisset; castellum ad eorum corpora, & res  
tuendas ædificare sibi Cocini liceret. quod Rex adeo prolixè li-  
beraliterque concessit; vt è suis etiam palmetis, quoniam cœ-  
menta non suppetere; præcipua firmitate materiem in eam  
ædificationem excidi quamprimum iusserit: dein loco in pri-  
mis idoneo area dimensa, & inchoato iam opere; dudum expe-  
ctatus è Lusitania cum iuuentutis robore superuenit Francisci  
patruelis Alphonsus Albuquerque is, qui rerum deinde gesta-  
rum gloria Magni cognomen est consecutus. Eius accessu, Lu-  
sitanis Indisque certatim insudantibus, breui consummatum  
castellum, & in eo templum D. Barptolemao dicatum est: vt  
magno vtrumque consilio ac pietate, sic modico sumptu ele-  
gantiaque. Sacrarum ædium & arcium, quæ variis Indiæ locis  
per alios, aliosque præfectos deinde per otium absoluta sunt,  
lignea illa prima ædificia, quasi typos ac proplasmata iure qui-  
spiam dixerit. Eo munimento perfecto, supplicatio à Lusita-  
nis habita: signum pendentis è Cruce Domini sub vmbella pre-  
tiosa, per multas instaurata iam vrbs partes, præcinentibus tu-  
bis cum religioso tripudio ac festa saltatione prælatum. pom-  
pa ad arcem vsq; perducta, & cum arx ipsa, tum in ea templum  
precatione solenni à sacerdotibus consecratum eo maiore lati-  
tia, quod illo primū die Romana Ecclesia diuinis in rebus, Lu-  
sitana

fitana gens in humanis, India possessionem adire quodammo-  
do videretur. Post hæc, Albuquerqueius vterq; ad perdomandam  
Zamorini ferociam nouas excursiones fecere. vastatus in pri-  
mis Repelinenfis ager. pagi ac villæ complures inflammatae  
ac dirutæ. nauigia capta ac direpta permulta. denique bello  
passim circumferendo, tantum terrorem omnibus circa popu-  
lis intulere; vt Zamorinus ipse, præsertim suadente Naubea-  
darino eodem, qui bellum antea dissuaserat, oratores pacis, &  
commercij petendi ad Lusitanos miserit. cui conditionibus  
ijs datum est fœdus, vt & eadem Calecuti faciam, & direpta  
mercimonia æquis æstimationibus compensaret: itemque  
ab laceffendo armis Trimumpara in posterum abstineret. In hæc  
se ferme leges pax conuenit, ac rursus cum Zamorini populari  
bus amice agi, & contrahi cœptum. Eadem fama permoti  
iamdudum tutores Colani regis (nam ipse per ætatem potens  
regni nondum erat) per legatos item fœdus & amicitiam pe-  
tiere. Quibuscum eo libentius iunctæ dexterae, quo maiores  
in omnem partem opportunitates habere visa res est. Etenim  
Colanum vrbs, quattuor & viginti leucas à Cocino in meri-  
diem sita, in primis totius Indiae antiqua & opulenta cense-  
tur. ex ea Calecutum, & aliæ Malabarici soli olim ductæ colo-  
niæ. abundat mercibus; portum facili præbet accessu. ac præ-  
terea, multis familiis veterum Christianorum incolitur: quæ  
res longe etiam vehementius Lusitanos ad societatem gentis  
allexit. Igitur illis præcipue cautum in fœdere: multis & gra-  
uibus iniuriis liberati, eorumque fortunis ac dignitati consul-  
tum. Instituta communi consensu amicitia, tabulisque com-  
mercij rite confectis, domicilium proprium Lusitanis in vrbe  
Colano attributum. eò confestim negotiatores cum scribis &  
custodibus immigrarunt. Accessit rei diuinæ procurandæ  
causa Rhotericus Dominicanus. is, & morum integritate, &  
doctrinæ præstantia paucis diebus multos mortales partim in  
recta fide confirmauit, excoluitque: partim ab stipendiis dæ-  
monum ad Christi signa traduxit. Eodem anno quo hæc in In-  
dia gerebantur (is fuit à millesimo quingentesimus tertius)  
nauarchi aliquot ad com meatus Arabicos prohibendos Olifi-  
pone profecti, Zanzibaris regem malis coactum, stipendiarium  
Emmanuelis fecere. itemque Brauæ liberæ ciuitati leucas cis  
Melindem



## *Historiarum Indicarum.*

Melindem centum, annum vectigal impositum. ipsi vero Melindensi regi, cum à Mombazæ tyranno valde premeretur, sane opportuno tempore latæ suppetiæ. Tyrannus ab armis discedere, & prope iam victo Melindensi pacem dare coactus est. Cum terra mariq; negotia Lusitanica prospero admodum procederent cursu, & simul in varias regiones aditus Euangelio patet fieret; tranquillitas iam à Calecutano res, vnius hominis cupiditas, & amentia perturbavit. Is, Cocinensi apothecæ præpositus, cum nauem Malabaricam pipere onustam præteruehi cognouisset; repente vel auiditate prædæ, vel priuato in Malabares odio incitatus, mittit qui captam sine mora Cocinum pertrahant: nautæ cum se Zamorini amicos & populares clamarent; Deumq; & hominum fidem testarentur, se ipsius missu Cranganorem petere; nihilominus Lusitani in incepto persistunt. coorta pugna, sex Malabares interfecti, complures vulnerati: nec Lusitanis incruentum certamen fuit. Expugnato nauigio, in Cocinensem apothecam piper omne conuectum. Ea re cognita Zamorinus confestim ad Franciscum Albuquerquecum mittit, qui tantam iniuriam expostulent. ille cum rem negligenter, nec modo ablata reddere, sed ne factum quidem vlla ratione purgare dignaretur; enimvero Zamorinus continuo exarsit iracundia, coalitamq; recens amicitiam indignabundus abruptit. hanc ego diremptæ pacis ac societatis causam, Damianum Goesium, & Hieronymum Osorium sequutus, in medium attuli, haud sanè ignarus, in hoc etiā ab ijs dissentire Barrium: culpamq; omnem in Zamorini mobilem animum utcunque transferre: sed regis cronographis à me, præsertim in re tali tantaq; temere fides abroganda non fuit. Cæterum Zamorinus, uti dicere institueram, acri dolore succensus, primum edicta omnia, decretaq; in rem Lusitanorum facta, ex templo reuocat; dein armatos parones ad intercipienda onera circumquaque dimittit. postremo ad euertendum Trimumparam, Lusitanosq; ex India pellendos, maiore quam vnquam antea conatu copiisque se comparat. Et quamquam inexpiabili in utrosque odio ferebatur; bellum tamen distulit cōsulto, quoad Albuquerqueij fratres, onustis iam nō vno loco nauibus, ex India abscederent. Quibus de consilijs Trimumpara litteris amicorum ac nuntiis mature certior factus, cum Francisco (nā  
is

is præerat summæ rerum) egit etiam atque etiam, vt adeo difficili ac periculoso tempore quam firmissimum sibi suisq; præsidium in discessu relinquat. Sed neque proximæ calamitatis memoria, neque imminens Lusitanicæ rei discrimen, neq; optimi, & constantissimi Regis obtestationes precesq; flectere Francisci animum valuerunt, vt naues plus tres cum centum & quinquaginta dûtaxat propugnatoribus daret, præfecto Eduardo Patieco viro fortissimo: nimirum, vt in tanta deinde paucitate, cum militum virtus, tum vero diuinæ opis præsentia clarius appareret. Post hæc, Albuquerqueij fratres vterque simul, verum exitu dispari in Lusitaniam vela dedere. Franciscus, incertū qua clade, quove infortunio, vna cum socijs in itinere periit. Alphonsus, quamuis magnis iactatus procellis, tamen circa finem Iulij mensis, non minore quæstu quam gloria, sospes in urbem Olisiponem introiit. Post eorum profectiōem, solutus metu Zamorinus, palam terra mariq; bellum ciebat. ducenta amplius nauigia, magnam tormentorum copiam, elephantos complures, armatorum millia circiter sexaginta contraxerat. Eo terrore Cocinum allato; multi confestim in Malabar interiora dilapsi: ac vix capitis pœna proposita cohiberi populus potuit. Ex reliquis copiis ægre milites ad millia triginta conscripti. quorum tamen paulatim numerus partim transitionibus, partim effugiis vix ad decem millia rediit, nec ea quidem admodum forti animo, vel integra in Trimumparam fide. Ergo tota pene belli moles in Lusitanos incubuit. solennes tū forte agebantur feriæ, quibus cœlestes iras in omne genus humanum intentas olim suo potissimum capite Christus excepit. Ea recordatione ad omne decus ac pietatem incensi Lusitani, vicissim vitam pro Christi nomine effundere gestiebant. Itaq; tanto inferioribus copiis, nullum periculum recusare, caput libenter in discrimen offerre, & periculosissimas expeditiones certatim sibi quisque deposcere. Eduardus, quoniam multis partibus vno tempore dimicandum fore non dubia coniectura prospexerat; primum ad Repelini vada nouas munitiones obiecit: dein Cocinensi arce multis locis instaurata; nouum insuper propugnaculum ad portus introitum excitauit. ad hæc, naues & scaphas maiores, vt ad subita occurrerent, omni genere telorum ac tormentorum instruxit. At Zamorinus, vti proximo



## *Historiarum Indicarum*

mo bello fecerat; Repelini tranlitum, & vado, & actuarijs longo ordine confertis tentauit primum: dein magna suorum cœde bis terve repulsus, cum in angusto loco se multitudo impediret; & à nostris in confertam turbam irrita nulla iacula inciderent; Repelinenſis dynaſtæ monitu ad loca minus vadofa, verum patentiora descendit. ea re cognita Patiecus cum expeditis celeriter anteuertit: ratusque paucitatem consilio adiuuandam; noctu sudes præacutas toto passim vado figendas curauit postridie hostes magno impetu transire conati; partim se præuſtis cuspidibus induerunt; partim accedente æstu obruti; partim assidujs misſillium nimbis vulnerati, occisi que: pars etiam, quæ vel nandi peritia, vel beneficio lINTRIUM in vltiorem euaserat ripam, acriter dimicantibus Lusitanis, aut cœsi, aut in flumen detrusi. Zamorinus, vbi aperta vi parum proficere se intelligit; ad insidias de more conuersus, percussores, transfugarum specie, in Eduardum occulte summittit: hosce ille diuinitus deprehensos conuictosque Trimumparæ tradidit, in quos arbitrato suo consuleret. pretio dein cōducti, qui veneno inficerent aquas: eo itē scelere per indices patefacto, excubiæ ad fontes intenta cura dispositæ. Rumor ad hæc de industria dissipatus, Cocinenſe præsidium cēsum, naues captas & incensas: ac sollicitati circa populi, vt in nostrorum stationes, & apothecas impetum facerent, nomenque Lusitanum omne delerent. ea quoque fraus Dei beneficio patuit. Quo tam infelici rerum euentu cum valde angeretur Zamorinus; tum ad infringendos eius conatus, dira morbi lues accessit: qua multi ex ipsius exercitu foede absumpti; multi etiam & contagionis metu, & belli difficultate perterriti, diffugere. Iamque susceptæ expeditionis auctores exsecrantem, ac desperatis pene rebus, de pace ac de reditu cogitantem, iniecta repente spes confirmauit expugnandi Lusitanicas in ipso Cocinenſi portu naues: quo vno subsidio, vt  
+ supra diximus, Trimumparam vel maxime niti non ignorabat. Mahometanus quidam erat, Coiesalles nomine, machinarum peritus. Is ad Christianorum nauigia superanda Malabaricis multo celsiora, eiusmodi artificium ingenti omnium approbatione commentus est. Binis paronibus, valido & à puppi, & à prora tigno inter se commissis, turres erigebat; è quibus denique amplius homines in subiectas onerarias tuto eiaculari possent.

Huiusce

Huiusce generis machinas octo cum adornasset ; Zamorino ignaro talium rerum, & adulatorum turba circumfluenti, tanta vi&oriæ fiducia subito accessit ; vt Eduardum ad se vinctum perducere sine mora imperauerit. Verum ille per exploratores tota de re præmonitus, nouas vicissim in onerariis machinas excitarat. ac quo die commissum est prælium (is erat in cælum ascendenti Christo Domino sacer) nauium puppes, ne à tergo circuiui possent, ad littus applicuit : præterea, ad arcendum congressum, prominentes à prora malos obiecit : præcatusque immortalem Deum, vt in ea quoque sibi pugna, sicut in cæteris propitius adesset ; inuictæ animo perexigua manu, ducentorum ferme nauigiorum impetum excepit. Ardentes primum pyræ ad Christianas naues inflammandas immissæ : quibus accessu prohibitis, & in conspectu omnium frustra consumptis ; tum demum turrata nauigia nequicquam admoueri cœpta. Siquidem præter ipsam machinæ formam, duplici præsertim clauo, ad regendum inhabilem, æstus quoque maris tum forte rapido accedens tractu, gubernandi arbitrium nautis ademerat. ergo & magistri gubernacula huc illuc frustra torque re ; & remiges irritò conatu in aduersum maris impetum tendere ; & infesto rostro in nostros directæ nauigia repente modo in obliquum, modo in contrarium sisti : nihil iam loci consilio vel arti esse : neque moderatores inter se constare ; nec remigium clauo, neque clauus magistris parere : aliò naualis turba, aliò duces & propugnatores vocare, aliò cuncta simul æstus abripere . in eo tumultu, cum sagittarum multitudo cælum pene inumbraret ; & crebris hinc inde fulgetris horribili cum strepitu radiantibus, omnium generum vsquequaque tela volitarent ; è turribus octo vix duæ ad onerarias ægre tandem appulsæ . in quas destinato ictu maiores globi à nostris subinde contorti : laxatisque compagibus, partim auulsa è suis sedibus tabulata, cum ipsis epibatis in aquam magno sonitu decidere ; partim, disfilientibus vndique fragmentis, confauciati permulti, ingentem pauorem ac trepidationem cæteris intulere. Ad eum casum clamor à nostris terra marique sublatus ; & integrata pugna tanto militum ardore ; vt Calecutani, multis passim occumbentibus, attoniti pauentesque certatim terga conperterint. neque vllis, ducum Regisve ipsius, aut minis aut hor

tamentis



## *Historiarum Indicarum*

tamentis fisti fuga potuit. contento cursu remotas Mal'abaris insulas, & intima penitus æstuaria petiere. quinque circiter ab initio belli menses effluxerant. eo toto tempore Zamorini copias valde imminutās esse constabat. pestilentia, mortalium ad tredecim millia absumpserat: totidem ferme huc illucque distulerat metus. varijs præterea certaminibus, magna parte nauium ac tormentorum amissa, ex ipso militum robore millia plus quinque ceciderant. Zamorinus infelicitè iam toties in arma coortus, cum & hyems immineret, & noua insuper è Lusitania classis adesse diceretur; abiectis belli consilijs, ipso Diui Ioannis Baptistæ natali die vasa collegit, ac retro ad Pananem tristissimus abiit. Brachmanæ auguresque, quòd belli suasores & impulsores semper fuissent, veriti ne in ipsorum caput calamitas verteret; culpam tantæ acceptæ cladis in male obseruata auspicia, neglectas religiones, & vota minus fideliter persoluta, cuncti ex composito reiecere. Hisce artibus mendacijsque sacrilegi impostores existimationem suam egregia simulatione tutati. Zamorino, vanis superstitionibus misere obnoxio, ingens dirarum iniecta formido. regni administratione vicarijs tradita, ipse interim æger animi, ac mœrore pene confectus, in auiam solitudinem cum exiguo comitatu, ad placandos commentitios Deos, & expianda peccata secescit. At Lusitanorum, eo toto bello, cum omnium, tum vero Eduardi præcipue Patieci virtus enituit. Is, & ante prima signa fortiter dimicando, & insidijs mature præcauendis; & disponendo milite, & muniendo vbi res postularet; & omnia militaria munera impigre obeundo; acerrimi simul bellatoris, & ducis eximij laudem omnium testimonio est consecutus. Quamquam attentius belli progressum & euentum æstimantibus, diuina potius, quàm humana tota res visa. quando tam multis Malabaribus ex vtraque parte cadentibus, Lusitanus tot prælijs desideratus est nemo. ac nauium insuper aluei non semel traiectione ac perforati sine vllius damno feruntur; & fulmineo excussæ rotatu ferreæ pileæ, irrita plaga (quis credat?) obuijs quorundam exceptæ pectoribus. Quas ob res, Christo salutis humanæ parenti, supplicationes habitæ, & solenni ritu, pro ea quæ tum suppetebat copia, sacrificatum est. Redeuntem è prælio Patiecum Trimumpara perquam arcte comiterque comple-

xus, immortales eius virtuti ac fortitudini gratias egit: nec modo regnum, sed vitam, salutemque Lusitanis haud vno iam nomine acceptam ingenue tulit. Interea multorum litteris & nuntijs certior factus Emmanuel, quanto in periculo res Indica versaretur; Lupum Soarium Aluarengam cum nauibus duo decim subsidio suis laborantibus miserat. is, quamquam ab Eduardo parta iam ante victoria, magnum tamen ad Cocinen se regnum & Lusitanica negotia stabilienda, momentum attulit. Siquidem Zamorinus & quotidiano matris conuitio, & assiduis popularium precibus in patriam reuocatus, bellum eadem qua deposuerat leuitate, reparare terra marique instituerat. Iamque ad Cranganorem oppidum terrestres naualesque copias intentiore delectu habito contrahebat. Eius rei fama Cocinum allata, Lusitani circiter mille, Naires ad duo millia confestim eò profecti, recens ædificata ab hoste nauigia primū expugnant, præfecto rei maritimæ cum duobus filijs interempto: dein exscensione facta, eodem impetu Naubedarini peditatum fundunt fugantque. tum Cranganori oppido iniectæ flammæ; Christianorum tamen tectis, ac præcipue sacris *MARRIAE* Virginis, & Apostolorum ædibus temperatum est. Per idem tempus Rex Tanoris (ea quoque Malabarica est regio) cum finitimis bellis admodum premeretur, à Lusitanis auxilium petiit; seque, ni aspernarentur, Emmanuelis vectigalem fore professus est. missi extemplo aliquot Lusitani manipuli: quo ille subsidio, cum breui superior hostibus euassisset; certis, uti receperat, legibus, in Regis Lusitanicæ societatem, ditionemque concessit. Inter hæc, Indico mari ab Lusitanis vehementer infesto, Calecutana commercia magis in dies imminui. negotiatores & inquilini partim ad suos lares, partim in aliena regna migrare. In ijs mercatores Arabes omnium ditissimi, cum ad Mecam reditum pararent; pecuniam & pretiosissima quæque in naues imposuerant, sub Lusitanicæ clasfis discessum illico vela facturi. Non fefellit ea res Aluarengam. Continuò Pandaranæ portum scaphis audacter inuectus, onerarias Arabum septendecim instar muri inter se colligatas, omni telorum genere ornatisimas, & propugnatoribus refertas, vi cepit, ac direptas incendit. Pertinacibus animis vtrunque certatum est. è Mahometanis duo millia; è nostris viginti quinque, non amplius,




## *Historiarum Indicarum*

plius, interfecti: vulnerati ad centum & triginta. Inde, relicto cum tribus nauibus ad Cocinum tuendum Emmanuele Vasconcellio, opimis spolijs onustus Aluarenga Lusitaniam petiit, comite itineris Eduardo Patieco: cuius egregiæ virtuti, immortalibusque erga se promeritis, Trimumpara debitum testimonium scriptis ad Regem litteris tribuit. Ei testimonio cum aliorum etiam litteræ sermonesque astruerent fidem; Emmanuel talem ac tantam indolem in obscuro latere nequaquam est passus. ac præter cæteros honores aduenienti Eduardo publice priuatimque habitos, præclara quoque viri facinora pro concione diligenter exposuit ornavitque Regis iussu Iacobus Ortizius Visensis Episcopus. idemque cæteris in oppidis Lusitiæ factitatum. dein, vt in communi causa commune gaudium esset; ad Christianos omnes Reges principesque, ac Romanum præcipue Pontificem, Emmanuel in eandem sententiam accurate perscripsit. diu celebrati sermone omnium nationum tam noui tamq; admirandi rerum euentus; gratiæ ubiq; ingentes actæ Deo; nec parum inde Lusitanico generi ac nomini dignitatis accessit.

*Libri Secundi Finis.*





# HISTORIARVM

## INDICARVM,

### LIBER TERTIVS.



O c tam secundo successu rerum, Emanuel Orientis opes imperiumque animo & spe in dies maiore complexus, percunctando à regionum peritis, & navigationis tabulas, quæ ex India depictæ subinde referebantur, attentius contemplando, ita comperiebat: Indicæ negotiationis præsidia & quasi claustra præcipua esse tria: Adonum Arabiæ, & Armuziam insulæ Geru (Ogyrim olim fuisse, quidam haud

absurde coniiciunt) prænobiles vrbes, quarum altera Arabici, altera Persici sinus ostium obsideret: itemque Malacam, Sincapurano impositam freto; quò, propter loci opportunitatem, Sinarum, & Lequiorum, & insularum pene innumerabilium mercimonia commearent. ergo, ad ea loca vel fœdere sibi adiungenda; vel armis, ubi res exigeret, occupanda; studium omne cogitationemque conuerterat: ratus, id quod res

F erat,



## *Historiarum Indicarum*

erat, eam vnam expeditissimam esse totius maritimi quaestus ac mercaturæ ab Aegypto, Syriaque in Lusitaniam transferendæ. Non fefellere eiusmodi consilia Saracenos, & Arabas, viros & in suis occultandis voluntatibus, & in alienis odorandis explorandisque admirandæ sagacitatis. Itaque Zamorinò per aulicos & Brachmanas persuadent, vt quoniam Indicas classes Lusitanicis & robore nauium, & armorum apparatu inferiores tot iam euentus ostenderint; ab Aegypti, & Arabiæ, ac Syriæ Rege Campsone, quem Sultanum appellabant, aduersus communem hostem auxilia accersat. Missus in eam legationem cum amplis muneribus Maimames, Mahometanæ superstitionis cultu notissimus. is, miscendo consilium precibus, modo Campsonem obsecrabat, vt religionis auitæ causam susciperet, ac prophetæ sepulcrum, & populares, amicosque & consanguineos à quotidianis Lusitanorum iniuriis ac latrocinijs vindicaret: modo suadebat, vt sibi quoque, vestigalibusque suis mature consuleret. Gentem ab vltimis orbis terræ terminis in partem Indici commercij vix ante quinquennium precario admissam, tantos iam sibi sumpsisse spiritus, vt leges Orienti dare, iura publica inuadere, Asiaticas opes per summam audaciam interuertere, quibus denique visum sit, navigatione ipsa interdicerere minime dubitet. Qui tam longinquis, ac periculosis expeditionibus talia moliantur; quid tandem, si domicilium ac sedem in Asia fixerint, non ausuros? orientem flammam vel exiguò latice, adultam iam & grassantem, non nisi ruina opprimi, & extingui. Proinde nascenti malo pro sua pietate ac prudentia quamprimum occurreret. Ad extremum petebat: vt classem aduersus Lusitanos quantam posset maximam, remige ac milite instructam, ad Indiæ littora mitteret. Calecutanum commeatus, pecuniam, portus, ac cætera necessaria affatim præbiturum. In eandem sententiam orator etiam ab Adeni regulo, vir clarus è pseudoprophetæ stirpe, disseruit. Haud vana afferebant. etenim Campson, & Mahometici dogmatis se præcipuum assertorem, ac Mecanæ domus, quæ in eius erat imperio, præsidem ac tutorem ferebat; vt imminutum eius cultum negligere salua dignitate non posset: & post Lusitanorum in Indiam aduentum, ac merces in Occidentem auersas, maiora in singulos annos rei pecuniariæ damna sentiebat. igitur  
& Re-

& Regum sociorum suasu, & sua ipse voluntate ad pellendos ex India Lusitanos vehementer incubuit. In præsentia, legatos quam optime sperare iussos, & promissis ingentibus regio more oneratos, dimisit. Cæterum mox de apparatu bellico, deque ratione perficiendæ rei deliberanti, multa occurrebant, quæ quamvis incitatos hominis impetus admodum retardarent. primum communis Mars, & incerti bellorum euentus: dein periculum, ne Lusitano oppugnando, totius Europæ arma in se conciret: postremo ædificandæ instruendæque classis difficultas: quod & materia cædua, cum in Aegypto non suppetat, longissime petenda: & informes triremium alvei membratim à Cairo seu Babilone, quæ interfluo Nilo Mempheos obiacet antiquæ ruinis, Suezium vsque rubri maris emporium per solitudines arenosas, & auias transfuchendi forent, atque ibi demum compactis carinis ornandi deducendique. Quocirca, antequam ancipitem belli subiret aleam, sibi tentandum existimauit, num quid denuntiatione magni alicuius periculi, ac minis apud Christianos proficere posset. Primum igitur, per idoneos homines rumoribus dissipatis, omnium aures bellicis terroribus complet. dein artificiose submittit, qui Maurum monachum Hispanum, antistitem templi eius, quod in Arabiæ monte Sina reliquias D. Catharinæ Virginis martyrisque conseruat, metu, ne quid in sacram ædem grauius consulatur, supplicem ad se compellant. Hunc ergo, simplicitatis antiquæ virum, qui Regum ignoraret artes, pauentem ac tremementem, Campson cum minacibus litteris ad Alexandrum eodem nomine Sextum Romanum Pontificem mittit. in quibus erat; se à duobus Christianis Regibus Fernando, & Emmanuele iam dudum intolerandis iniurijs affici. ab altero Mahometanos omnes Bæticæ finibus, nulla ipsorum culpa, per summam indignitatem exterminatos. alterum, Africæ, & Arabiæ, & Indiæ oram annuis classibus infestam habere; nautas & mercatores in seruitutem abducere; aditu religiosissimæ ædis, quæ ad Mecam sit, plurimos omnium nationum mortales arcere. quòd hæc rex vterque, socer ac gener, nulla prouocati iniuria, contra ius naturæ ac gentium audeant; se quoque vicissim Christianos quotquot in suo imperio sint, ad Mahometica sacra metu proscriptionis & exsilij compulsum: ac præterea antiquissima-



## *Historiarum Indicarum*

rum religionum Christianas ædes ac monumenta; quæque in Aegypto, & Arabia; quæque in Iudæa ac Syria visantur, cum ipso Christi sepulchro euersurum & concrematurum esse. Quæ si Pontifex salua cupiat, ac suorum incolumitatis curam gerat; Regem vtrunque pro sua potestate quam primum ab ea mente consilioque deducat. Has ergo querimonias minasque Campson ad Pontificem Max. detulit, haud dubius, eas magni utique apud Hispaniæ Reges fore momenti, quibus prope hæreditario iure nihil Christiana religione prius aut potius esse didicerat. Alexander, senatu super tali tantaque re habito, monachum ipsum ad Emmanuelem, ex quo coram fusius cuncta cognosceret, mittit. Hunc demisse precantem, ut ab laceffendo Aegypti Rege desisteret, ac tot Christianis mercatoribus, tot religionis hominibus, tam venerandis Christi Sanctorumque reliquijs pro sua pietate consultum vellet; bono animo esse iubet Emmanuel. neque enim Campsonem studio Mahometicæ superstitionis, aut abominandi monumenti cura, sed imminutis portorijis redditibusque torqueri. quæ detrimenta quando ita vehementer hominem ex crucient; nequaquam commissurum, ut Christianis negotiatoribus è suo regno pellendis, & celeberrimis templis, ad quæ ingens quotannis hominum vis, religionis causa, magno cum ipsius emolumento confluat, euertendis; nouam insuper iacturam certissimi questus & vectigalium faciat. Nam quod Fernandi soceri iniurias, de quibus ad eam diem questus non sit, quartodecimo demum anno (tot enim ferme à pulsus è Bætica Mauris effluxerant) adeo acerbe, tam dolenter exposculet; cui non apparere causas quæri accusationum & criminum; & sordidissimæ cupiditati auaritiæque inanem speciem caritatis religionisque prætendi? Proinde Christi famulus poneret metum; nec barbari fremitus irasve tantopere perhorresceret. Hisce verbis confirmatum antistitem, pecunijsque ad exornanda Orientis templa, ac pauperes alendos copiose instructum, Rex Lusitanus Romam remittit; ac simul ipsum Pontificem Max. per litteras omni sollicitudine liberat. Ipse vero, quæ erat prudentia, & animi magnitudine; tam dira Sultani comminatione adeo non exterritus est, ut magnam etiam voluptatem inde perceperit. præclarum quippe sibi Emmanuel ducebat, immanem belluam, quæ ad eam diem Lusitanica arma superbe con-

be contempserat, quasi adaactis ad vitalia telis, denique commoueri. Quocirca ad cœpta prosequenda, duplo pene maiorem quam superioribus annis classem instruxit. ei que præfecit Franciscum Almeida, virum cum cætera illustrem; tum quod fortem ac fidelem operam in Bætica expeditione Ferdinando nauarat. Huic magnopere in discessu præcepit, ut quoniam ad ea quæ iamdudum agitabat animo, & assiduitate copiarum ac ducum, & spatio temporis opus esset; arces aliquot opportunis Africæ, Asiæque locis exstrueret, quæ Lusitanis & facilem in remotas regiones excursus; & tutum, quotiescunque res postularet, receptum darent. Præfectus, cum ad VIII. Kalend. Aprilis, qui dies cœlesti ad Virginem nuntio est sacer, nauibus duabus & viginti faustis ominibus Olisipone soluisset anno millesimo quingentesimo quinto, Franciscanis aliquot fratribus, & clericis alijs rei Christianæ causa in eam peregrinationem assumptis; octauo Idus Aprilis ad Hesperidas processit. inde cum ad superandum Bonæ spei promontorium nauarchi in meridiem cursum extendissent; vehementi Aquilone usque adeo in remotas ab Sole regiones prouecti sunt; ut classiarijs præ nimio frigore manus propemodum obriguerint. Inde ad Orientalem Africæ oram extemplo flexere, & secunda nauigatione paucis diebus Quiloam est ventum. ibi Abrahamum tyrannum callide tergiuersantem, & annum stipendium Emmanueli recusantem pendere; Almeida cum armatis descensione facta, ex vrbe per vim exegit: eiusque loco Mahometem Anconinum, acceptum incolis virum, & experte in Lusitanos fidei, Regem, solenni cum apparatu imposita capiti aurea corona, constituit. Dein situ ad maritimos aditus æque ac terrestres in primis commodo, arx aedificari cœpta ingenti alacritate nauticorum, & militum. cumque labor in orbem iret, ipseque Almeida & ceteri principes, ad exemplum, suam obirent vicem; non die non nocte intermissum opus, vigesimo die absolutum est: arcique ab Diuo Iacobo inditum nomen, quod eius Apostoli die ipso natali urbem expugnassent, ac tyrannum inde expulissent. Constitutis Quiloæ rebus, & firmo præsidio arci imposito, itemque nauigijs ad oram tutandam relictis, Mombazam petijt classis. Ea vrbs in parua eiusdem nominis insula, quam æstuarium efficit, excelso ad conspectum tumulo



## *Historiarum Indicarum*

posita; portum habebat duobus propugnaculis munitum: in quibus tormenta è Lusitanico naufragio nuper extracta, vt supra diximus, barbari collocarant. ijs cum aduentantem classem aditu prohibere conarentur; nostrorum iactibus breui disiectum vtrumque castellum, ac liber introitus Almeida patuit. missis deinde ad tentandi reguli animum nuntijs, cum nihil pacati responderetur; Almeida trifariam adortus urbem, Assumptæ in cœlum M A R I A E Virginis die festo vi cepit, ac directam incendit. multi ex hostibus interempti, multi in seruitutem abducti. Regulum, inter ipsam dimicationem desperata victoria fugientem sylvæ texere. Transmisso inde sexdecim diebus Oceano, Anchediuam insulam tenuit classis. ea insula quod in littus imminet Indicum, ac tutam stationem nauibus præbet, ibi quoque ex Emmanuelis præscripto castellum excitatum. Hinc Almeida Cananorem traiecit; ac summa Regis voluntate ad tuenda mercimonia optimo loco arcem exstruxit, præsidioq; communiit. Per idem tempus Lusitani qui ad Colanum agebant, contracta temere cum incolis & Arabibus rixa, ad vnum omnes interempti sunt. Eius rei cognoscendæ, ac sedandi tumultus causa, Laurentius Almeida Francisci filius classe profectus, cum superba responsa tulisset, commisso prælio, Arabum onerarias ad viginti magno ardore militum captas incendit. quo item in prælio illud in primis accidit memorabile. pila è maiore tormento in scutum Ioannis Hominis Lusitani contorta, ad ipsius pedes sine vlla prorsus læsione defluxit. Interea grauis iam ætate Rex Cocini Trimumpara, de gentis more deposito gubernaculo, se in solitudinem ad colendas Brachmanarum superstitiones receperat, ac sororis filium Naubeadoram natu minorem hæredem reliquerat regni, maiore præterito quod nuper in bello Calecutano ad Zamorinum vna cum alijs principibus defecisset. is dolore incensus amissi patrimonii, cum nouum deinde Regem vexaret, exerceretque, ac popularium sollicitare animos non desisteret; profectus Cocinum Almeida, Trimumparæ iudicium ac voluntatem ratam voluit esse: donatum pretiosis muneribus Naubeadoram in fidem recepit, ipsiusque patrimonium ac regnum, Emmanuelis auctoritate opibusque constituit. dein impositis mercibus naues duodecim anno insequente in Lusitaniam remisit: ipse



ipse ad res Indicas administrandas, regesque socios tuendos (quod ita in mandatis habebat ab Emmanuele) Cocini permansit. Plures tum è Lusitania classes, nondum exploratis ad plenum tempestatibus, eodem anno deinceps, ut quæque parata erat, in varia cogniti nuper Oceani littora mittebantur. Itaque paulò post Almeidae profectioem, vir egregie fortis, Castellano patre natus, Petrus Gnaia, nauibus sex ad Sofalam venerat, ut arcem in eo tractu, si qua posset, ædificaret; ac simul in auri pretiosa commercia Lusitanos induceret. Tenebant ea loca tum Saraceni ab vrbe Magadaxo primum, dein à Quiloo profecti: & ingenti lucro cum finitimis Cafribus, qui in Monomotapæ Regis imperio varijs locis aurum effodiunt, Indicas vestes, & alia mercimonia commutabant. Sed inter Quiloanos tumultus Prætor eò missus Izufus, vir astutus & audax, defece- rat nuper ab tyranno Abrahamo, perque fraudem in eius terre possessionem inuaserat. Ad hunc, iam ætate confectum, & luminibus captum Gnaia cum adijisset; primum ostendit, quantum ex Lusitanorum societate & commercio utilitatis capere posset. dein petit, ob eam ipsam rem, uti ad merces custodien- das castellum in ijs finibus ædificare sibi liceret. id non magis aduenis, quam incolis præsidio contra finitimorum incur- siones futurum. ac simul de Regis Emmanuelis benignitate opi- busque multa differuit. Ille, non tam ratione societatis addu- ctus (quippe qui nec Lusitanorum mercibus indigeret, & gra- ues accolæ fore proculdubio cerneret) quam fama perterri- tus eorum, quæ ad Quiloam ac Mombazam erant gesta, per- honorifice accepit virum, ac postulatis in speciem libenter an- nuit: quamquam acriter obistente Mengo Mulafo genero, vi- ro acri, & bellicoso: quem senex ea potissimum ratione lenit, fore ut Lusitanos insolita cœli intemperies, & loci grauitas, ac palustres humores paulatim absumerent, vel certe sic affice- rent, ut à paucis armatis deleri sine periculo possent. Gnaia dynastam spe liberaliorem nactus; locum quæ flumen in mare effunditur, ædificationi designat, & quod cimenta non suppe- terent, casas è robusta materia raptim exstructas, duplici val- lo, & propugnaculis, & fossa circumdat. Neque ita multo post, uti prædixerat Izufus, aduersa valetudine tentari aduenæ cæ- pti: paucisque diebus adeo peruagata vis febrium est, ut ex v-



## *Historiarum Indicarum*

niuerso præsidio vix quadraginta superessent, ad arma ferenda; & vigilias obeundas idonei. Quam occasionem ratus Arabs de medio tollendæ icuisæ nationis, exstimulante præsertim assidue Musaso genero; tamen suis duntaxat opibus rem aggredi non est ausus. Mocondes erat Cafer, vicinis locis pro Monomotapæ Rege præpositus. Hunc per nuntios Izufus admonet, Europæos piratas, qui maritimam oram dudum infestam habuerint, denique ad se delatos; intra lignea septa, quæ sibi ipsimet circumdederint, fame & squalore pene confectos teneri. Si in partem prædæ venire animum inducat, se rem in eius aduentum integram seruaturum. Haud frustra missa legatio. Mocondes, omnis humani expertus iuris, aduentitij lucri nec opinata spe illectus, ingentem trahens popularium turbam, celeriter affuit. neque tamen Lusitanos fefellit, ab exsulibus Saracenis tota de re festine præmonitos. itaque & ænea tormenta, ignotum Cafribus ad id tempus machinæ genus, idoneis locis occulte disposita fuerant; & cum à valentibus interiore cura excubiæ agitabantur; tum ipsimet ægri, quippe quibus periculum & indignatio præter spem adderet vires; sese ad defensionem forti animo comparauerant. Mocondes, artis bellicæ prorsus ignarus, ac numero maxime fretus (hominum autem ad sex millia secum adduxerat) Arabum ductu monituque fascibus sarmentorum ex agro collatis, ad castellum copias incomposito agmine admouit: completisque fossis, nostrorum paucitate contempta, Cafres alij vallum scandere, alij conuellere nitebantur; cum in confertam multitudinem, ac nihil tale timentem emissa repente ferrea procella, tantam edidit stragem, vt relicta oppugnatione attoniti, pauentesque barbari se in proxima nemora confestim abdiderint. ac ne ibi quidem tuto esse licuit. siquidem continuatis bombardæ ictibus, magno impetu disscultantia arborum fragmenta, semiermes, incautosque misere lacerabant. cui tanto malo cum nullum, præter fugam, remedium occurreret; rabie ab Lusitanis in Arabas versa, vulgo fremere quòd se fallacibus promissis ad bellum cum ipsis Dijs gerendum euocassent. atque, vt est rapacissima gens, ne prorsus inanes abscederent, Izufi agro vastato, & oppido ipso magna ex parte direpto, in patriam reuertère. Ac ne Lusitani quidem inultam passi perfidiam. Post Castrum profectio-

nem,



nem, cognito Izufum eiusque satellites, nihil minus quam no-  
strorum eruptionem timentes, negligentius agere; noctis in-  
tempestæ silentio, Gnaia, strenuis cum aliquot viris aduerso  
flumine in regiam subuectus, Izufum ipsum, & paucos familia-  
res occidit. dein, priusquam populi concursus in regiam fie-  
ret, insigni facinore perpetrato, ad suos eadem nocte incolu-  
mis rediit. Postridie, cum res emanasset, ira odioque incensi  
barbari quàm maxima coacta manu, denuo castellum adorti;  
& eodem quo nuper euentu, plures & integri à multo pauciori-  
bus & imbecillis, cum cæde & ignominia repulsi. Post hæc, in-  
ter eos certari de successione cœptum. Cumque Musafus præ-  
pollens viribus, & popularium gratia; Izufi liberos patrimonio  
exturbare niteretur; & satis apparet, ius in armis fore; alter  
ex ijs, nomine Solimanus, ad Gnaiam confugit salubri vtrisque  
consilio: siquidem Lusitanorum ope Rex declaratus, fidelem  
se vicissim illis amicum ac socium ex eo tempore præbuit. In-  
terea Zamorinus, tametsi cum lætis admodum promissis ab  
Sultano redierant oratores; tamen, imminente Lusitano veri-  
tus ne fera essent Aegyptiaca auxilia; contracto ingenti fabrum  
naualium numero, maiorem quàm antea classem omni studio  
ædificabat, dispositis circa omnes portus custodiis, ne quid ru-  
moris de tanto apparatu ad hostes efflueret. Namque Lauren-  
tium, dispersis nauibus Malabarica tenentem littora, & Aegy-  
ptios Arabasque negotiatores magno intercipientem rei Cale-  
cutanæ damno, quàm maxime incautum & imparatum placue-  
rat adoriri. Verum ex vrbe Calcuta clam elapsus Ludouicus  
Patritius Romanus (qui cognoscendi studio, vt fit, mercatoris  
habitu in Indiam penetrauerat, idemque hæc ipsa deinde lit-  
teris consignauit) Almeida vtrique, & filio & patri cuncta ex  
fide retulit. Neque ita multo post, è variis oræ Malabaricæ  
portibus in vnum coacta Zamorini classee ad Laurentium re-  
ctâ contendit. ea fuisse dicitur celsarum nauium amplius sexa-  
ginta; lemborum, ac paronum, biremiumque ad centum &  
triginta, omni telorum genere, & numero militum instructissi-  
ma. Ad eius famam, Laurentius patris iussu naues non plus  
vndecim admittis triremibus paucis raptim adornauerat, Lusi-  
tanis, præter nautas, impositis octingentis. Vt ad ictum bom-  
bardæ ventum est, conspiciatus Laurentius tantam hostiū mul-  
titudinem;



## *Historiarum Indicarum*

titudinem; expiatis de more noxis, primum omnium ædem  
MARIAE Virgini Victrici vouit, si ea pugna barbari fusi ac  
fugati essent. dein, paucitati subueniendum ratus arte, ne à Ma-  
labaribus circumueniri posset; tormentis, qua parte virium lon-  
ge præstabat, eminus rem gerere instituit. atque ob id ipsum  
ex alto directis in prælium nauibus, leni Austro flante, simul &  
venti beneficium, & congregiendi arbitrium hosti præripuit.  
Ac primo statim certamine, cum in syluam adeo densam irrita  
nulla propemodum ab Lusitanis incideret plaga: neque ex tan-  
to interuallo vel tormenta ferrea, quibus tum utebantur ho-  
stes, vel sulphurei pulueris ollæ, vel sagittarum imber nostros  
admodum læderent; multæ passim omnis generis naues ho-  
stium aut depressæ, aut in littus eiectæ. Ac, dissipatis demum  
ordinibus, quod antea consulto vitarat Almeida pugnam è pro-  
pinquo conseruit. Prætoria nauis erat hostium, tum aluei ma-  
gnitudine, tum armatorum frequentia insignis. In hanc harpa-  
gonibus ferreis comprehensam Almeida cum fortissimis ali-  
quot bellatoribus incredibili penè ausu transiijt; tantoq; ar-  
dore animi & corporis dimicatum est; vt è sexcentis propemo-  
dum armatis, quot eam tuebantur, superfuerit nemo, exceptis  
ijs, qui nandi peritia freti, se in pelagus præcipites dederant. Pa-  
ri conatu, verum successu dissimili, Nonnius Vascus, modica  
nauis, & exigua militum manu, multo maiorem, & propugnato-  
ribus instructam ferme quingentis, inuaserat. cumque pauci à  
pluribus circumuenti premerentur, extremo iam in discrimi-  
ne laborantibus victor Almeida subuenit; nec modo suos è pe-  
riculo eripuit, sed etiam nauis hostium, trucidato vel depulso  
præsidio, potitus est. Inde iam certa victoriæ inclinatio ad  
Christianos facta, & Laurentius haud cunctanter insequutus  
trepidam ac pauentem hostium classem, aliquot insuper naues  
partim expugnauit, partim tormentorum ictibus perforatas de-  
mersit; palatæ aliæ contento cursu Calecutum maxime repe-  
tentes, cum longinqua fuga, tum quòd eas terror ipse longe la-  
teque distulerat, ex imminente clade euaserunt. Almeida, tri-  
bus circiter hostium millibus cæsis, sex tantum è suorum nume-  
ro desideratis (quæ res diuinum auxilium sine vlla dubitatio-  
ne monstrauit) captiuas trahens onerarias nouem, ingenti par-  
ta præda simul & gloria, Cananoris portum, cuius vrbs in con-  
spectu



specū res erat gesta, magna cum totius populi, ac Regis ipsius gratulatione, sospes introijt . ac primum omnium, *MARIAE* Virgini Victrici, quam initio praelij vouerat ædem, faciendam locauit . deinde Cocinium ad Franciscum patrem cum aliis nauarchis iter intendit . Per eos dies Sabaius, qui Idalcanem genuit, præcipuus Decaniorum tyrannus, qua in regione Goa vrbs est, opportunitatem nactus dum ad Cananorem distinetur Almeida, sexaginta actuarias naues ad Lusitanos ex Anchediua insula pellendos misit, præfecto clasfis, & auctore totius cõ filij Antonio Fernando Lusitano exsule ex iis, quos ad cognoscenda loca gentesq; Petrus Aluarus Capralis, vt supra dictum est, Quiloæ reliquerat . Is, ad spem vberioris stipendij transmissio Oceano, cum se ad Sabaium contulisset, eiurata per summum nefas Christiana religione, Abdalæ nomen assumpserat : &, quod rei maritimæ, & naualis fabricæ peritus esset; apud Goanos, talium rerum adhuc rudes, magno in honore habebatur . Igitur ad Anchediua exscensu facto, nuper ædificatam à Lusitanis arcem omni conatu oppugnare institit . Præerat arcis præsidio Emmanuel Passanius, spectata fide ac virtute vir, ex vrbe Italiæ Genua claro genere oriundus . Hunc, in subita re, quamquam ab alijs rebus imparatum, non defecit animus . ac dierum aliquot oppugnationem, cum vrgeretur vndique, præclare sustinuit . ac demum Abdala, victricis clasfis iam iamque aduentantis perterritus fama, quam celerrime sese irritum incepto ex Anchediua proripuit . Sed ea postmodum arx, quod valido præsidio propter hostium propinquitatem indigeret, ne Lusitanicæ res in tanta paucitate distraherentur, ab ipsismet Lusitanis est diruta . Inde, ad Franciscum affertur, Saracenos mercatores, à Molucis, & ab aurea Chersoneso redeuntes, ne in Lusitanica præsidia inciderent, longiore ambitu capto, per Maldiuas insulas in Arabiam tendere . Quocirca Laurentium filium ad eos insectandos proficisci iubet . Is cum incognita fulcaret maria, æstus impetu primus omnium Lusitanorum ad insulæ Ceilani littora abripitur, quā insulam, vti supra dictum est, veterem esse Taprobanam Ioannes Barrius multis argumentis affirmat . hæc, ouali maxime figura ducentarum circiter & quadraginta leucarum ambitu, leucas in longitudinem septuaginta octo patet; in latitudinem, quattuor



## *Historiarum Indicarum*

quattuor & quadraginta . atque à Cori promontorio , vt supra diximus , auulsa freto vadoso , Piscariæ , quam appellant , oræ prætenditur , ea cœli clementia , soli vbertate , & copîa fluminum aquarumque perennem , vt primorum parentum sedes olim perhibeatur fuisse . varia pecorum armenta . necnon elephantos gignit egregie bellicosos ac dociles : cæteris metallis caret , ferrum incolæ effodiunt . plurimas fert gemmas , vt vni præcipua claritate sapphyros , chrysolithos , pseudopalos , ac pyropos : itemque aromata pretiosa , cinnama , cardamomum , piper , ac palmas eximiæ bonitatis . Ad hæc , vel in primis iucundo spectaculo syluosi montes ad effigiem theatralem inflexi , vastam planitiem oblongo circuitu in caueæ formam includunt : quorum vnus in arduam & subrectam altitudinem pene septem leucarum exsurgit ; habetque in summo æquatam agri planitiem , ex cuius medio bicubitale saxum eminens ad instar mensæ , vestigium demonstrat impressum inclyti sanctitatis viri , quem ex Indiæ regno Deli quondam in ea loca venisse tradunt , vt gentem superstitionibus deditam fabulosis , ad vnus Dei cultum religionemque traduceret . ergo tantæ venerationis est locus , vt à leucis amplius mille , omnium ordinum peregrini , ac præsertim Iogues , illuc pietatis causa contendant ingenti labore : siquidem , præter cæteras itineris difficultates atque pericula , in eius etiam montis cacumen , non nisi per adactos clauos ferreasque catenas ascensus est . Haud ab simile verò videtur quod aiunt quidam , in eo , quod dixi , vestigio , quam extincta iam nominis antiqui & peregrini memoria , colli Eunuchum Candaces Aethiopum Reginæ , quem cum alij scriptores , tum verò Dorotheus Tyri Episcopus ( qui , Constantino Magno imperante , & sanctitatis & doctrinæ laude præcelluit ) in Arabia Felice , totaque Erythra , & in Taprobana , Christi Euangelium promulgasse testatur . Porro insula vniuersa , no uem in Satrapias vel regna diuiditur : estque ad omne commercium , vel frequentia portuum , vel ipsa loci regione in primis accommodata . Laurentius in Calles portum inuectus , cum regulo per legatos inita societate , columnam , cum inscriptione , testem sui aduentus , in littore posuit : dein omiſſa propter incommodum anni tempus Maldiuana profectioe , cum latis admodum nuntiis ad parentem reuertit . Inter hæc , Tristanus  
Acunia

Acunia, Alphonso Albuquerque comite, cum valida classe in Indiam destinatur : quem ex itinere inuasit cupido Madagascariæ insulæ naturam ac regionem explorandi . itaque vel contra sententiam Albuquerqueij ( qui, ne temporibus excluderetur, maturandum aiebat ) appulsis ad insulam nauibus, cognitum est, maritima ferme ab Saracenis ; interiora a Cafribus incolis : terram esse gingiberis, cariophylli, & argenti feracem . quæ dum Tristanus curiose perquirat, aduersisque subinde tempestatibus nec opinato subsistere cogitur ; interea ( quod Albuquerqueius præclare monuerat ) idonea transmissionis Indicæ tempestas effluxit . certis enim & anniuersariis ferme flatibus orientalis nauigatur Oceanus, quos hodie vulgus, vt ego quidem interpretor, ab ipso ventorum impulsu, motiones appellat . Eæ si quocasu præterlabantur, dum denuo recurrant, multorum mensium sæpe mora cœptis interuenit . Igitur, ne frustra interim tempus absumeretur ; à Madagascare Melindem est ventum, & Oienfis dynasta Melindio Regi ob Lusitanicam societatem admodum, vt ferebatur, infestus, eiusdem Regis rogatu ab Lusitanis prælio victus, & Oia vrbe pulsus occiditur . quo terrore perculsus Lamensis finitimus regulus, in Tristani fidem ultro concessit, & stipendiarius Emmanuelis Regis est factus . Ex eo loco ad Brauam ciuitatem clasfis accesit . ea cum pactum superioribus annis tributum pendere abnueret, capta est à nostris certamine haud leui . Sex armatorum millia barbaris animos fecerant . Verum vbi descensum à Lusitanis, & collato pede res geri cœpta est, ferociam posuere . Magna edita cœde fusi, & fugati plerique . Decurionibus tamen fides in patriam ad extremum vsque spiritum egregie constitit . acriter dimicantes in vestigio cuncti mortem oppetere, quàm occidenti reipub. superstites esse maluerunt . Vrbs deinde congestis dudum diuitijs opulenta, à militibus fœde crudeliterque diripitur . Qua in re vindex rapacitatis atque seuitiæ euidenter apparuit numen . auiditate prædæ gregarij milites aliquot, mulierum manus ad armillas annulosque extrahendos inscio duce præciderant . ij, dum spolijs onusti scapha onerarias repetunt, ad vnum omnes in portu ipso demersi, repentina morte crudelitatis & auaritiæ pœnas dedere . scapha, cum sub aquis aliquandiu latuisset, quasi perfuncta debiti supplicij ministerio, rursus emersit.



## *Historiarum Indicarum*

merfit. Triflanus & cognitū scelus valde improbavit, & ceteros graui edicto ab eiusmodi immanitate cōpescuit. A Brana post hæc ad Socotoram insulā maris Erythræi transmissum est. Christiani iā inde ab Apostoli Thomæ aduentu incolebant: sed ipsa locorū asperitate, & diuturno pastorum desiderio pene effertati. Subterraneos inhabitant specus: in bello fundis eminus certant, cominus gladijs e mero ferro, quod mortuum vulgus appellat. victitant milio, careotis, & lacte. cum mercatoribus poma permutant; itemque cinnabarim, & aloen omnium laudatissimam. Quod ad cultum diuinum attinet, ex Iacobitarum hæresi, propter vicinitatem Aethiopiæ, vitia multa traxere. nam & à Romani Pontificis auctoritate seiuncti sunt, & circuncisionem, aliosque ritus Iudaicæ superstitionis vsurpant. neque tamen nulla retinent vestigia sanæ religionis: nam & ieiunijs anniuersarijs placant Deum, & precandi stata quotidie tempora obseruant, & Sanctam Crucem eximie venerantur: huius imagines cuncti gerunt è ceruice suspensas: huic pro ipsorum tenuitate sacras adiculas exstruunt: quo vbi conuenire frequentes, Hebraice concepta precationis verba præit vnus; tum instar chori cætera turba subsequitur. Quo tempore Triflanus ad eos venit, annis iam sex & viginti Rex Fartacū ex Arabia missis eò militibus mille, Beninum portum per vim occuparat: validaque arce imposita, Christianos admodum sauo premebat imperio. Ad eos liberandos, atque ad Catholicam Ecclesiam adiungendos, ab Emmanuele Rege missus Triflanus, cum Beninum attigisset; Fartacas, qui in eo præsidio erant centum circiter & triginta, comiter ad colloquium euocauit. ij, cum ab insita genti ferocia, omnem cum Lusitano pacis conditionem aspernarentur; scapha circumuectus, & contemplatus loci naturam Lusitanus Imperator, duobus locis armatos exposuit. neque præfecto Abrahamo cum suis ad erumpendum defuit animus. Verum vbi mox inter primores fortiter ciens pugnam ipse dux cecidit, extemplo fusa reliqua acies: ac nonnulli ad incolas, è quorum stirpe vxores, liberosque susceperant, confugere: cæteri ad octoginta pernici velocitate arcem adepti, portas occludunt. tum à Lusitanis admotæ certatim scalæ: transgressi que; menia, ex interiore parte claustra perfringunt. inde parentibus portis admissum agmen, & inclusi  
intra

Intra turrium penetralia Fartaces, nequicquam ad spem venie  
salutisque inuitati, cum pertinacissime se defenderent, omnes,  
præter vnum, occisi. è Lusitanis, dumtaxat vnus in ipso cer-  
tamine occubuit. sex postmodum è vulneribus periere. Arce  
capta, nuntij ad incolas missi, qui nouæ classis metu in auios  
montes vna cum coniugibus liberisque perfugerant. ii, cogni-  
to aduenas Christianos esse, ad arcem accurrunt, & Fartacum  
iniurias grauitèr questi, ad pedes Tristani cum lacrymis accide-  
runt, per Christum I E S V M obsecrantes, vt è tam acerba ser-  
uitute, iisdem sacris deditam, eiusdemque consortem spei na-  
tionem eriperet. Quibus ille, se vel ob id ipsum ab Emmanue-  
le Rege, salutis eorum cupidissimo, in ea loca destinatum esse  
respondit; quamobrem & præsidium ad Mahometanos arcen-  
dos, & sacrorum antistitem curandis incolarum animis liben-  
tissime relicturum. itaque fano Arabum expiato, & in cultum  
Virginis M A R I A E conuerso, arcis custodia cum idonea ma-  
nu Alphonso Noroniæ Lusitano concredita est: rei verò Chri-  
stianæ præpositus eximia sanctitate vir, Antonius Laurerius  
Franciscanus: qui tollendis vitijs, quæ in hominum mores ac  
religionem irreperant, incolisque ad veram pietatem ac vir-  
tutem erudiendis, aliquot annos plane Apostolico munere est  
functus. Inter hæc, elapsi è prælio Fartaces, criminando Lusi-  
tanos, & imperitum vulgus instigando, varios motus ciebant.  
ad eos comprimendos motus, Arabicumq., & Persicum Ocea-  
num pro Emmanuele obtinendum, Tristanus, quod ita in man-  
datis habebat, Albuquerque cum nauibus dumtaxat septem,  
propugnatoribus ferme quadringentis & septuaginta, reliquit:  
ipse, circiter Idus Augusti, nactus tempestatem idoneam, cum  
reliqua classe in Indiam cursum intendit. Inter hæc vertente  
iam anno, cum non optata modo classis, sed nullum prorsus  
naugium è Lusitania adesset; magnus Christianos omnes, qui  
in India versabantur, metus incessit, mœrorque. Acuebant  
curas, pene in religionem versa prodigia, quod per eos dies &  
sol tanta ex parte defecerat, vt circa meridiem stellæ appare-  
rent; & ingenti motu ex interuallis concussa terra tremuerat.  
Iam Zamorinus, tempus aduenisse ratus, nominis Lusitani ran-  
dem aliquando extinguendi, haud segniter instaurabat bellum,  
solicitabarque legationibus & promissis cum aliis, tum præfer-  
tim



## *Historiarum Indicarum*

tim Cananoris Regem, sibi priuatim obnoxium; quod mortuo Rege qui cum Lusitanis pepigerat foedus, ipsius præcipue studio & opibus in regno successerat. Et per eos forte dies, odium Indorum in nostros, temerarium cuiusdam Lusitani factum vehementer accendit. Aethiopici, Arabicique, & Indici maris possessionem, Lusitani adeo pertinacibus animis occupant, ut nemini prorsus nisi ex eorum auctoritate, & quidem paten- tibus consignata litteris, ea nauigare liceret maria; ducesque in id ipsum dispositi totam eam oram nauium præfidiis tueban- tur. Ex iis vnus, Malabaricum mare pererrans, cum in Cana- norensem onerariam incidisset; Calecutanos esse homines, & prolatum à nautis Lusitanicum diploma, nonnullis indiciis fal- sum & surreptitium suspicatus, confestim aggressus nauem ex- pugnat; nautas, vectoresque, in iis vnum è prima nobilitate, in velum insutos, haud longe à portu Cananoris in mare de- mergit. verum disrupto mox linteo, cum nota ciuibus corpo- ra ad ipsam urbem pelagus eiecisset; tanta ciuitatem repente comploratio, luctusque compleuit; tanta in eius facinoris au- ctores, quos haud leuibus argumentis Lusitanos fuisse coniece- rant, excitatae sunt iræ; ut cuncti consensu ad Regem adierint; iamque per se inclinatum eius animum perfacili momento ad oppugnationem arcis impulerint. Nec pro tam atroci iniuria satisfactionem acceperunt, quòd nauarchum Almeida multis ra- tionibus factum excusantem, ac deprecantem ignominiam, grauibz verbis increpitum, ac præfectura priuatum, in ordi- nem redegit. At Laurentius Britus arci præpositus, ex pro- pinquo in omnes barbarorum conatus excubans animo, ubi de eorum consilijs per exploratores cognouit; illico ab Almei- da subsidijs & commeatu accersito, arcem firmat, intendit vi- giliis, stationesque disponit. ac præsertim spectantia in urbem propugnacula, nouis insuper additis munimentis, diligenter instaurat. Rex item, fossa valloque à portu ad apertum mare perducto, oppidum ab arce intersepit, exiguo transitu ad pro- cursationes relicto. Cumque multos iam dies, suspecti inter se, vitandis inuicem ac fruendis insidijs exegissent; tandem exspe- ctata ab Calecuta auxilia Cananorem adueniunt, hominum ad viginti millia. Inde nulla oppugnandi mora est facta. Puteus inter oppidum arcemque medio fere spatio intererat: vnica Lusita-

Lusitanorum aquatio . circa eum puteum minuta prælia , prohibentibus aquatores hostibus , fieri cœpta . Cumque è Lusitanis aliquot ferme quotidie aut caderent, aut vulnerati discederent, & aqua modica sanguine multo constaret ; Laurentius, Thomæ Fernandi architecti monitu, specum opere subterraneo ad ima putei occulte perduxit ; fistulaque ac statumine appposito , locum ita concameravit, uti ne quid superne latices vlla ratione posset inficere . dein per speciem aquandi, eruptione facta, nostri glebas certatim iniiciunt ; ac puteum, ne hostibus vsui esse possit, obturant . Cuius rei miraculo attoniti barbari, nouæ scaturiginis aliquid intra arcem exstitisse videlicet rati, munitiones aliò transtulere : dein quies vtrinque fuit, dum orbiculari forma ingentes gossipio saccos inferciunt , quibus contra tormentorum ictus ante se prouolutis, virgultorum fascibus opplere fossas, vallumque rescinderent . ea machinatio extremam pene perniciem obsessis attulit . quippe contortos è bombardæ globos gossipinum tomētum excipiebat adeo lentè, ut eorum impetus ipsa mollitie frāgeretur hinc, pone latitantes armati, magno sublato clamore prope iam ad fossas latitantes peruenerant ; cum in obliquum agmen, ex arce, diuino prorsus instinctu directæ maiora tormenta, conceptis momento saccis, & gossipium ipsum, & gossipio fretos Malabares fœdæ cum laceratione disijciunt . simul etiam Britus cum dele&ta manu portis erumpens, dissipato ac territo hosti acriter institit, magnaq; edita strage cæteros in præcipitem fugam auertit. Ex eo barbari segniore facti, cum neque aperta proficeret vis, & in eiusmodi congressibus promptissimum quemque, ut sit, è suis amitterent ; omis& opugnatione, operibus & munitionibus claudere nostros insistant, eo maiore fiducia, quòd non terra, non mari, noui com meatus in arcem subuehi possent, clausis itineribus, & hyeme per eos dies amodum sæuiente. Interim crebræ à nostris eruptiones haud exiguo cum hostium detrimento fiebant . Quo in genere præcipuum decus tulit omnium consensu Guadalaiara, natione Castellanus : is turbidam ac perfrigidam tempestatem nactus, cum eximiiis centum & quinquaginta viris nocte concubia in hostium stationes impetu facto, partim sopitos imbre cadente vigiles, partim algore nocturno torpentes opprescit . cœsi in eo tumultu Malabares



## *Historiarum Indicarum*

res ferme trecenti, & ferrea aliquot tormenta capta, & com-  
meatus aliquantum. Intentiores inde custodiæ haberi ab ho-  
stibus cœptæ. boues etiam interdum ad obsessos in insidias  
illiciendos propulsæ, quas felici conatu cœsis insidiatoribus  
cum in arcem nostri semel iterumque abstraxissent; ea spe fru-  
strati delusique Malabares artem desiere, ne duplici pecorum  
hominumque iactura, hostes insuper alerent. Iisdem ferme die-  
bus, per famuli negligentiam accensa noctu lucerna casas ali-  
quot Lusitanorum ex arida materia, folijs, paleisque momen-  
to combusit. eo incendio, multò maxima pars commeatus  
absumpta. quæ res tam aspero ac difficili tempore Britum gra-  
uiter admodum perculit. ac ne cæteri desponderent animos,  
omni arte damnum celare conatus est: sed & longe arctior so-  
lito in diuidendis cibarijs parcimonia, & ob id ipsum crebra  
seruitiorum transfugia, rem & Lusitanis, & hostibus prodide-  
re. itaque omnibus pene consumptis, ad extremam ventum  
erat inopiam; neque iam muribus fœdisque alijs animalibus  
abstinebatur; cum diuinitus (vt sæpe alias) oblatum nec opi-  
nanti Lusitano remedium est. Templum in extrema arce erat  
Virgini Victrici, vt supra diximus, ab Laurentio Almeida ex-  
structum. Ad id templum, desperato pene omni humano sub-  
sidio, Lusitani quotidie confluebant, opem cum à Deo, cœliti-  
busque, tum præsertim ab ipsa Virgine Dei matre enixe peten-  
tes. Ne se, in alieno ac barbaro solo, tot vndique cinctos an-  
guistiis, tot pressos malis; fame ipsa denique enectos, Christia-  
nos ipsos, & à Christo filio sibi commendatos clementissima  
Regina cœli despiceret: suis peccatis noxisque, quas ipsi innu-  
merabiles faterentur, ab irato Deo veniam & pacem exposce-  
ret; neque iam de corporis modo, sed etiam de animorum sa-  
lute periclitantibus, in tempore subueniret. Haud incassum  
missæ preces. Ipsomet festo Assumptionis die, ne quid mira-  
culo rem posset eximere, solito vehementius intumescens pela-  
gus, ingentem locustæ numerum ad ipsas templi radices eiecit.  
quæ à Lusitanis gratulabundis auide collecta, in multos dies  
abunde suffecit: nec validos tantum sæua fame, verum etiam  
(vt salubris est cibus) ægros diuturno morbo leuauit. Iamq;  
appetebat ver; nec dubium erat, quin suis laborantibus pri-  
mo quoque tempore suppetias laturus esset Almeida. quocir-  
ca

ca ratus anteuertendum Cananorius omni conatu rursus oppugnationem simul terra marique experiri constituit. & Zamorinus vrgebat assidue, segnitiam incusans, & noua auxilia subinde submittens, prorsus, vt Cananore iam sub signis numerarentur militum ad quinquaginta millia. Actuaria etiam facili impulsu coacta ad ducenta. in quibus erant turrata nonnulla, cuiusmodi nuper aduersus Patiecum Calecutanus ornauerat: itemque alia inter se iuncta, & constrata ratibus; quo plures simul armatos in terram exponerent. Hæc omnia, vt Lusitanos fallerent, quàm occultissime comparata. & stationes interim quietæ erant, quò facilius ad socordiam obsecos adducerent. Sed è regijs propinquis vnus, æque acerbo in Zamorinum odio incensus, ac propensa in Lusitanos voluntate, quòd eorū opibus ac studio crescere se posse confideret; non solum commeatus furtim ex occasione summittebat interdum; verum etiam per idoneos internuntios circumsessis arcana cuncta nudabat. Ab hoc igitur Brittus cognitis opportune consiliis hostium, pro ea copia, quam habebat, aditus omnes maritimos terrestresque sepsit quàm firmissimo præsidio militum, & propugnacula tormentis, & omni genere telorum instruxit; nec vigiliis custodiasque remitti per negligentiam vel defatigationem, vnquam est passus. Ergo vbi destinata oppugnationi affuit dies; prima luce Cananorius terrestribus copijs magno sublato clamore quàm tumultuosissime vallum aggreditur, haud dubius fore vt ad eam partem tuendam ex omnibus locis Lusitani concurrerent; ita ex altera parte libero nauium accessu expositis repente militibus, nullo prope certamine arcem in potestatem esse venturam. Sed eum longe fefellit opinio. Si quidem vnde victoriæ principium putabat futurum; inde fugæ turpis initium exstitit. quippe clasfarij primo audacter ad terram appulsi, vbi secus ac promissum fuerat, frequentes in portis valloque armatos videre; subito pauore perterriti, & missilium variæ magnitudinis nimbo disiecti dissipatique, multis paronibus ac lembis momento dilaceratis aut depressis, vix tentata descensione terga verterunt. ac tum denique à Lusitanis ad terrestres aditus tuendos omni ex parte concursus est. Ibi atrox prælium fuit: scandentesque iam vallum pluribus locis audacissimi quique Malabares cominus trucidati; tormen-



## *Historiarum Indicarum*

tis verò eminus longe atrocior edita cœdes est . inde turbati  
hostes : & nequicquam increpante ignauiam Rege ducibusq̃ ,  
acies vniuersa fugam arripuit . cæsorū ea pugna hostium nu-  
merus relatus non est : magnum proculdubio fuisse constat . è  
Christianis ( quod vix credibile videatur ) plane desideratus  
est nemo . Atque is dies vltimus oppugnationis fuit . tentatæ  
dein vtrinque per mutua colloquia voluntates , & de pacis con-  
ditionibus agi cœptum : quas Laurentius ipse sibi suisq̃ per-  
honorificas tulit : neque Cananorius reijcere est ausus , partim  
diuturni belli tædio fessus , partim etiam Tristani Acuniæ me-  
tu perterritus , qui per eos ipsos dies Oceano secunda-naviga-  
tione transmissus , Cananorem incolumi classe tenuerat . Eius  
maxime aduentu soluta obsidio est : cuius ad quattuor menses  
forti animo toleratæ , decus eximium Laurentius & commilito-  
nes tulere : quamuis adeo lætos & insperatos euentus , periti re-  
rum æstimatores Diuinæ Bonitati sine vlla dubitatione tribue-  
rent : cuius beneficio & vltimæ inopiæ subsidium præter exspe-  
ctationem fuisset oblatum ; & Cananorius princeps tanto suo  
periculo , Regis affinitate posthabita , contra consuetudinem  
gentis , in Christianorum causam ac partes plane diuinitus in-  
clinasset . Renouato fœdere , obliuio præteritorum indicta ; iū-  
ctæque iterum dextræ , & Malabares in suas quisque domos fre-  
mente Zamorino dilapsi . Inde ad Cocinum procescit Acunia .  
eius aduentu Lusitanorum animi confirmati recreatique , & va-  
rio aromate ex conuecta iam copia in naues imposito , infestis  
clasibus duplicato nauium numero , ab vtroque simul impera-  
tore Pananem est ventum . In ea tum statione complures onera-  
riæ prætiosis refertæ mercibus hyemabant . institores erant Sa-  
raceni . furtiuo cursu per intermissa custodijs Lusitanorum loca  
in portum illapsi . & Zamorinus præparatis iam ante copiis , si  
quid ab Cocino moueretur , locum prælare munierat vallo cir-  
cundato , & duobus ad introitum castellis magno cum tormen-  
torum apparatu excitatis . cohortes præterea quattuor in eo  
præsidio collocarat . Nostri sub vesperam in Pananis conspe-  
ctu cum in anchoris constitissent ; insolita clasfis magnitudine  
permoti barbari , totam eam noctem in renouandis augendisq̃  
munitionibus posuere . Delecta verò Saracenorum manus , Ma-  
hometis fanum ingressi , de gentis more coniurant , se non nisi  
victores



viatores è prælio redituros. Si secus faxint, sese caputque suum  
diris omnibus deuouent. Vt primum illuxit, communicato  
iam ante consilio Lusitanus imperator vterque adolescentes fi-  
lios Laurentium, & Nonnium cum scaphis & actuariis iubent  
præcedere, quòd ea nauigia, propter humilitatem, minus ad o-  
bliquos bombardæ ictus paterent. ipsi mediam aciem cum tri-  
remibus aliquot sibi deposcunt. agmen clausere onerariæ. Ac  
iuuenes quidem, obseruato maris accessu, per media tela glo-  
bosque inter vtrumque castellum audacter inuecti: eo minore  
detrimento, quòd & ex præscripto milites interim strati iace-  
bant; & librata in excelsas maxime naues Malabarica tormen-  
ta irritis ictibus aera feriebant. Vt nostros iam intra portum  
illatos videre, deuota præcipue capita Saraceni, alienatis ab  
omnis periculi sensu animis, certatim in prælium ruunt, seque  
vltro in aquas immittunt, ac nauigia maxime ducum conferti  
circumuenire nituntur. Paululum moræ fuit, dum lymphata  
cohors, glad'is, contisque, & incitato remorum pulsu per-  
peditur. tum raptim in terram descensum. iamque sub ipso vallo  
variis locis eo sæuius pugnabatur, quòd vsum oculorum inter-  
micantibus fulgetris densus è sulphureo puluere fumus at flu-  
lerat. dissoni tantum clamores, & morientium gemitus pas-  
sim exaudiebantur. Simulatque euanescente atra nebula rediit  
lux; Lusitanus signifer cum strenuis aliquot viris in vallo con-  
spectus, reliquorum animos ad æmulationem decoris & gloriæ  
vehementer accendit. & imperatores ambo, testes cuiusque  
virtutis, & hortatores aderant. cum deuotis maxime Sarace-  
nis atrox erat pugna. Ex ijs, vnus, notæ fortitudinis Centu-  
rio, Laurentium conspicatus, & è procera statura, totoque cor-  
poris habitu, ratus, id quod res erat, principem virum esse;  
condito subter clypeum corpore curuus ad eius genua succi-  
denda profiliit. ille, pedibus leui momento reductis (vt erat  
in primis exercitatus, & agilis) elatam vtraque manu machæ-  
ram in hostem demisit ijs viribus, vt barbari caput ad ipsum vs-  
que pectus horrendo prorsus hiatu diffiderit. Inde non dictis  
magis quam factis prælium ciens, obuios aliquot sternit. Nec  
segniùs ab Nonnio cæterisque res geritur. Cum aliquandiu  
barbari præter solitum restitissent; victa demum ardere Lusi-  
tanico Indorum pertinacia est; nec impressionem nostrorum



## *Historiarum Indicarum*

ultra sustinere. A Malabaribus maxime fuga coepta, ceteros traxit. Deuoti duntaxat Arabes, cum pauci iam, & vulneribus fessi trucidarentur; obnixi corporibus ( tanta vis est nefariae superstitionis ) ad vnum omnes addictas aeternis ignibus animas profudere. Interim, pari ex alia parte conatu hostium naues oppugnabantur. nautae propugnatoresque, quandiu ad castella aequalibus viribus certatum est; egregie dimicarunt. vbi inclinatum terrestrem aciem, & incolas fugatos videre; ipsi quoque certatim in mare defiliunt. complures inter enatandum occisi. Ac tum denique ambo castella imperatorum iussu disturbata, & euerfa. nec modo naues cum ipsis oneribus inflammatae, sed oppido quoque diuitiis inclyto subditae faces, demirantibus barbaris, tantam tamque paratam opum vim ab hoste contemni: militibus vero, tot periculorum praemia eripi sibi, perquam indigne ferentibus. Verum Almeida consulto exercitum a praeda continuit, ne in occupatos rapinis palatosque, repentinus aliquis, ut saepe contingit, e vicinis locis impetus fieret. Magnus utrinque eo praelio fauciorum fuit numerus. desiderati ex hostibus ad quingentos; e nostris duodeviginti non amplius. Eius cladis nuntium Zamorinus agerrime tulit. Duces Lusitani coniunctis clasibus Cananorem petiere. atque ibi demum ingenti cum amoris ac beneuolentiae significatione digressi, Acunia vela fecit in Lusitaniam; Almeida retro vnde venerat Cocinum tetendit. Dum haec apud Indos geruntur; interim Alphonsus Albuquerque, pacata Socotora, Arabicum, & Persicum Oceanum exigua, ut dictum est, obtinebat classe. Is ab oppido Adeno, & Arabicis faucibus ( nam ea quoque littora explorare placuerat ) aduersa tempestate repulsus; ad Armuzianas res Diuina magis ope, quam humanis viribus fretus, animum adiecit. Armuziae regnabat eo tempore Zeifadinus hoc nomine secundus, admodum puer, stipendiarius Ismaelis, cognomento Sophi, Persarum Regis: eratque in tutela paterni mancipij Ataris eunuchi, eximia sagacitate viri: cuius omnia consilia eo spectare videbantur, ut, quoad viueret, penes pupillum diadema & regium nomen; penes vnum se arbitrium ac potestas rerum omnium esset. iamque per eam tutelam, cunctis inuisus, ad intolerandam superbiam, opesque peruenerat. Hoc tam impotenti dominatu Albuquerque



quercius Regem, & populum liberare; & Emmanueli vel in primis id cupienti, omni ratione conciliare decreuit. Igitur Lusitanorum animis in rerum ingentium spem & cogitationem erectis, ad ostia Persici sinus iter capessit: ac prospere circunuectus Siagrum promontorium quod Rosalgatum hodie vocant; ad Calaiatum nobilem urbem Armuzianæ ditionis applicat naues: missoque nuntio, ciues ad colloquium euocat. illi repentino metu compulsi (iam enim inclytum erat apud eas nationes Lusitanorum nomen) ne quid acerbius paterentur, non modo aduenientem Alphonsum benigne excipere; verum etiam conscriptis pacis & amicitiae conditionibus, abeuntem largo com meatu, & omni officij genere prosequuti sunt. Longe dissimiles animorum habitus ad Curiatum Lusitanus offendit. incolæ, dum hostis in vicino moratur, & copiis & operibus ita sese munierant, ut omnem pacis mentionem superbe respuerent; ac propius nihil est factum, quam ut interpretem ab Albuquerque de foedere ac societate missum, iaculis ac sagittis obruerent. Ad eam ferociam reprimendam Albuquerque illico bombardis ignem admoueri, & omnia circa magnis concuti fragoribus iubet. Cum nihil ne eo quidem terrore oppidani commouerentur; postridie urbem iusta oppugnatione adori constituit. Tumulus erat ad insulæ modum ex aqua paululum eminens; qui æstu recedente adiri ex urbe pedibus poterat. In eo tumulo barbari tormenta aliquot cum firmo præsidio collocarant, ut in auersos intentosque in urbis oppugnationem nostros impune iacularentur. Eo periculo animaduerso Albuquerque Alphonsum Lupium Costam, & Antonium Campensem cum expeditis militibus ad exturbandos inde barbaros celeriter mittit. Neque illi defugere periculum. ingenti conatu stationes aggressi; aliquot Mahomeranis occisis, cæteris in oppidum actis, haud tamen sine suorum cæde vulneribusque, locum occupauere. Tum verò Albuquerque, nequicquam prohibentibus oppidanis, ad littus cum robore copiarum exscendit. ac valida impressione facta, proruto vallo, euulsisque cancellis, intra ipsam urbem prælium intulit. Ac primo, quamquam iniquo iam loco positam rem oppidani animo atque audacia sustinebant. dein, cum acrius undique Lusitanus inflaret; non tulere diutius impetum. effusa omnes fuga, per auer-



## *Historiarum Indicarum*

sam vr̃bis portam, de gentis more syluas ac nemora petiere. Albuquercius ad aliorum terrorem vr̃be direpta & incensa, Mascatum octo leucas inde processit. Is locus, quò iam ab Armuzia propius aberat; eò tum operibus firmior, tum viris armisq; erat instructior. itaque Albuquercius, magnam videlicet ratus dimicationem instare, se suosq; parabat ad prælium. Cæterum misso ad tentandos animos internuntio, præfectum vr̃bis vel in primis mitem ac liberalem, contra quàm putarat, expertus est. Igitur instituta certis legibus amicitia, præfectus magnam pecoris, & oryzæ, & careotæ numerum, tributum quodam modo nomine, in classem exhibuit. is commeatus dum in naues imponitur, & securi Lusitani ad Littus aquantur; ecce tibi repentinus armorum strepitus, & dissonæ voces. Pridie sub noctem Arabes ad duo millia oppidum ingressi; præfecto non sine contumeliis ac probris increpito, quòd locum adeo propinquum regiæ, & opere præsidijque munitum, per ignaviam ac metum vagis latronibus prodidisset; frustra nitente eo factum excusare, populum ad arma conciuerant; atque ubi illuxit, infesti mare petebant; quò Lusitanos oneribus & aquatione occupatos, in ipso littore opprimerent. Præfectus, Arabas ab ea mente reuocare conatus, cum nihil omnino proficeret; Deos, hominesq; contestans violari ius gentium, vr̃biq; exitium imminere; vt fidem pro virili parte præstaret, ad littus accurrit, nostrosq; præmonuit, vt sese in naues extemplo reciperent. Vix inde tumultuario consensu abduxerant scaphas; cum infensi adsunt Arabes, ac missilibus primùm è littore nostros abeuntes laceßunt: dein è propugnaculo classem ipsam tormentis maioribus impetunt. Ad ea vel capienda, vel occidenda tormenta, missi aliquot è classe, cum male multati rediissent; postridie Albuquercius copias omnes ad vr̃bem exposuit. Ibi verò, accensi ira Lusitani, quòd interposita pacatione per fraudem oppugnati fuissent, ingenti ardore prælium ineunt; perfidos Arabas, ruptores fœderum appellant; magnam ubiq; edunt cædem; factisq; simul ac dictis iniuriam puniunt. Cum obfirmatus hostis aliquandiu resistisset; ad extremum renouato imperu Lusitani acriter inferunt pedem, ac nouas munitiones ea ipsa nocte perductas magno ausu transfiliunt: cumq; intra mœnia confugeret hostis, herentes in terga prius quàm portas

tas occluderet, velut vno agmine irrumpunt; turbatamque ac  
pauentem Arabum aciem toto oppido expellunt. Fusis foga-  
tisque hostibus, ad prædam permisso ducis discurrit miles. de-  
in subditis ignibus, non oppidi tecta modo, sed naues etiam in  
portu ardere complures. In eo tumultu, cum aliis ipse quoque  
urbis præfectus per imprudentiam occidit. quam rem Albu-  
quercius ægerrime tulit; & quando viuum pro meritis tueri &  
ornare nequiuert; defuncti ædibus cum cura conquisitis, ne  
diriperentur, custodes apposuit. Cæterum urbis excidium  
comprobari diuinitus quodammodo visum est. Excelsa Maho-  
metis conspiciebatur ædes, egregio in primis opere perfecta.  
ad eam disturbandam inflammandamque immissi fabri dum  
columnas demoliuntur, totum repente ædificium corruit. Cum  
elisos ruina & pondere nemo non crederet, intacti præter spem  
& incolumes cuncti euasere. Inde ad Xoarem urbem eiusdem  
oræ progressus, incolas alieno doctos malo sine certamine in fi-  
dem ac deditiōem accepit. Biduum ibi moratus, cum ad Or-  
fazanum adisset, oppidum incolarum fuga desertum reperit.  
Exhausta inde præda per triduum. ab incendijs, quod regiæ  
propinquus admodum erat locus, honoris causa temperatum  
est. Ex eo loco, classe instaurata & resecta, ad caput belli Ar-  
muziam est ventum. Ad famam Lusitanicæ clasfis Atar eunu-  
chus, præter urbanas copias, magna insuper auxilia è Perfide  
Arabiaque contraxerat, & noua exspectabat in singulos dies. In  
gentem præterea nauium numerum habebat in portu: mino-  
ris formæ æquarias amplius ducentas, maiores onerarias ad se-  
xaginta. in ijs duas inusitatæ magnitudinis; quarum alteram  
Principem, alteram nomine Merim vocabant. octingentas am-  
phoras capiebant singulæ. Hasce duas, præter naualem tur-  
bam armati mille, cæteram classem duo circiter millia tueban-  
tur. Albuquerque tormentorum genere, & virtute militum  
haud dubie præstabat: cæteris rebus longe erat inferior. ve-  
rum ad ostentandam animi fiduciam, fulgentibus vndeque  
vexillis, cum horrido bombardæ reboatu (ea maritima salu-  
tatio est) portum inuectus, sub ipsas quas dixi maximas naues  
iaci anchoras imperat. Ibi cum aliquandiu frustra expectas-  
set, præter insitum in Mahometanos odium insuper irritatus,  
quod nemo ad se, vt fit, resalutandum accederet; Zeifadino  
puero,



## *Historiarum Indicarum*

puero, tutoribusque palam nuntiari iubet: Emmanueli Regi Lusitaniæ contra nominis Christiani hostes, ac Mahometanos præsertim, funestum ac perpetuum bellum hæreditario pene iure susceptum. id non nisi alterius partis deditioe posse finiri. Si in fidem eius ac potestatem venire animum inducant, & vectigal annuum pendere, multorum Africæ, Asiæque Regum exemplo; se inde cum bona pace abiturum. sin iugum recusent; pro certo habeant, secum ad internecionem usque certandum. tertiam conditionem esse nullam. Atar, tam acri denuntiatione suspensus, tametsi terrestribus navalibusque copiis abundabat, ut dictum est; tamen quo magis ex tuto rem gereret; blandis verbis & calida tergiuersatione rem extraxit, dum expectatæ in singulas horas nouæ sociorum cohortes adessent. ijs proxima nocte in urbem admissis; tantum spei & audaciæ barbaro accessit: ut quasi explorata iam victoria, Lusitanos mox captiuos futuros, ad supplementum nautarum & remigum in suam ipse classem præpropera gratulatione describeret. itaque ob id ipsum suis accurate præcepit, darent operam, ut quàm plurimi ex hostibus viui in potestatem venirent. Deinde omisissis ambagibus Albuquerque respondit: Armuzianos Reges non pendere aduenis vectigal; sed ab ijs exigere consueisse. Si pari cum cæteris negotiatoribus iure Lusitani esse velint; fore illis agendi contrahendique in eo portu potestatem, & copiam: sin vim, & iniuriam moliantur; sensuros quantum armati Arabes. Persæque seminudis Cafribus. & inconditis Aethiopibus antecellant. Plus viginti hominum millia sub signis habebat Eunuchus. iamque minime dubius adesse certamen, & multo milite instruxerat classem; & curulia tormenta, ac mercenarias cohortes ad terrorem littore toto prætenderat. oppidani ad spectaculum intenti, non moenia modo turesque in mare versas, verumetiam tecta, & fenestras oppleuerant. Albuquerque, ubi & ex apparatu hostium, & ex Eunuchi nuntio præceptam animo dimicationem instare perspexit; naues primum suas mediocribus interuallis ita disposuit, ut neque circumueniri à pluribus facile possent; & leni circumactu singula deinceps tormenta in hostes obuerterent. Dein precatus immortalē Deum, ut sibi pro nominis Christiani gloria prælianti propitius adesset; nauarchis iam sua sponte sat incensis cupiditate



ditate victoriæ præcipit; eminus initio bombardæ rem gerant; congressu abstineant, quoad ab se primum confertum ex propinquo prælium sit. vbi tormentis disiectam & dissipatam barbaram classem, ac se còminus iam dimicantem viderint; tum demum in proximâs quisque hostium naues fidenter inuadant. Sub hæc, ingenti clamore, concrepantibus buccinis, tympanisque, pugnae signum vtrinque propositum: ac simul tormentis passim ignes admoti, eodemque pene momento & aciem oculorum coruscantes vndique flammæ perstringunt; & aures exsurdant horrenda tonitrua; & meridiana luci cœcas tenebras noctemque atra nubes obducit. Necdum caligo euanuerat; cum speculatoriæ hostium naues destinato procursu in nostros imbrem sagittarum effudere: dein, cum propter agilitatem momento refugerent; ac rursus incitato remigio interiores telis hostium fierent; haud exigua improuiso malo clades Lusitanis illata, confixique non pauci. At barbaris læto successu, mutuisque adhortationibus in tantum creuit audacia, vt iam conferre pedem. & naues Christianas certatim scandere niterentur. Tum verò ex omni parte contis mucronibusque repetiti audacissimi quique præcipitantur in mare; dein minoribus machinis ad libellam aquæ dispositis; nauigia complura merguntur. Hunc maxime in modum ea pestis auersa. Atar, multitudine maxime fretus, & oculis vrramque metiens classem, primo contemptim prælium inierat; & egregie instructo parone ordines interuectus, militem ad prædam verius quam ad pugnam hortabatur. Sed mox volitantium pilarum strido re perterritus, tuto loco se se ad littus post onerarias abdidit, quò simul suis, & fugientibus in terram obstaret, & noua identidem subsidia laborantibus opportune submitteret. Inter hæc fumo iam abscedente, onerariæ remulco propter inopiam ventis attractæ concurrerant; iniectisque ferreis manibus, quam quisque indeptus erat nauem, in eam transilire, ac nudare propugnatoribus conabatur. Ante alios Albuquerque, Principe nauis, itemque alia crebris ictibus perforata, ac depressa, ingentibus animis Merin inuaserat. Non vigore animorum, aut corporum, nec nauallis belli scientia par Lusitano erat Persa. tantum abundante multitudine cum anceps aliquandiu steteret pugna; tandem à nostris in hostilem nauem ingenti ardore  
transcensum



## *Historiarum Indicarum*

transcensum est: obtinebatque iam cedes omnia; cum despectatis denique rebus barbari, in aquas ex omni parte defiliunt. Hinc reliquis terror iniectus; ut eximiam armamentis, & alvei magnitudine, ac militum numero nauem expugnatam videre. fugientesque passim, seque in mare mittentes, partim è scaphis occisi, partim fluctibus hausti; multi etiam increpante nequicquam Eunuchio in terram euasere. Albuquerque victoria usus, complures naues in potestatem redegit; multis ignes iniecit: quas præcis anchoralibus vehementior venti coorta vis, toto pelago collucentes Carmanicum ad littus abripuit. Eodem impetu naualibus etiam faces illatae, magno periculo, ne suburbana, & ipsam denique urbem, ædesque regias flamma peruaderet. Hisce tot malis fracta demum Ataris contumacia est. ac metu percussus ancipiti, ne simul externam vim, & domesticam inuidiam sustinere non posset; oratores pacis veniaque petendae confestim ad Albuquerque misit. Parceret iræ; ceditibusque & incendiis temperaret: sat iam magnas temeritatis & peruiticiae poenas exactas. quicquid præterea damni Armuzianæ rei intulisset, id Lusitanæ illaturum, quandoquidem Zeifaidinus se suaque omnia in Emmanuelis fidem permittere paratus esset. Respirandi tantum daret spatium, dum sedatur militaris tumultus, dum muliebris ploratus, & pauida concursatio vulgi reprimatur. postridie Albuquerque ipsum victis quas vellet pacis leges omnium consensu dicturum. Hæc trepidus orator, & supplex, per interpretem exposuit. Albuquerque, qui nec in perniciem urbis pugnaret; & milites diuturno labore fessos, quiete reficere cuperet (certamen à meridiano ferme diei tempore in vesperam extenderant) parta iam victoria, receptui canit. Eunuchio per eosdem interpretes renunciari iubet: se, quamuis captam pene urbem sine controuersia posset euertere; tamen Zeifadini gratia, cuius aetatem à culpa abesse intelligeret; incitatos Lusitanorum impetus de industria reuocasse: insequenti luce Atar ad conditiones pacis adesset, fidemque promissi præstaret. in præsentia licere illi subditos naualibus ignes extinguere. veruntamen caueret etiam atque etiam, ne fallendo postmodum, longe sæuius in Lusitanorum pectoribus excitaret incendium. nihil eos æque ac perfidiam, & fraudem, ac dolos odisse. Cum hoc responso oratores dimissi; &



fi; & in stationes è prælio reditum est. Inter paucas, præcipue memorabilis hæc fuit victoria. Desiderati ex hostibus mille sexcenti; è nostris non amplius decem. ac præsentis è cælo subsidij haud dubiam fidem cum alia multa fecere; tum verò fluitantia mox Mahometana cadauera, sagittis (cum eo teli genere Christiani carerent) pectore aduerso transfixa: vt ab illis missæ, in ipsosmet retortæ diuinitus viderentur fuisse. Albuquerque, ducibus militibusque pro merito cuiusque collaudatis, ne quid ea nocte repentini ab vrbe motus existeret; acriter intendi vigilias iussit. Postero die, vti conditum erat, de conditionibus agi cœptum. Pax ita conuenit, vti Zeifadinus, alter eo nomine Armuziæ Rex, in Emmanuelis Lusitanie Regis clientelam, ac ditionem quam optimo iure concederet: eidemque Emmanueli Serafinum (is nummus aureus est) millia quindécim tributi nomine penderet in singulos annos. Præterea, locum Albuquerque ad arcem ædificandam, ipsius Albuquerquei arbitrato, assignaret; ædificationemque adiuuaret præsentipecunia, cémentis, & operis. denique, dum exstruitur arx, ædes interim in vrbe Lusitanis ad negotiandum ac diuersandum idoneas commodaret. Emmanuel vicissim Zeifadinum in fidem ac patrocinium benigne susciperet; & vbi necesse foret, ab hostium incurfibus omni ope tueretur. In hæc, solenni ritu data fide acceptaque, primum omnium locus ex ædificandæ arci deligitur, ex altera parte in mare versus, ex altera ad ipsam regiam pertinens; quo simul ad maritima subsidia libero esset aditu, & ipsa propinquitate Regem regiosque in officio contineret. Cæterum, quæ res Lusitanici imperij firmamentum fore videbatur; ea vel in primis omnia labefactauit ac perdidit. Aedificio quippe inchoato, succedentibus inuicem classarijs, cum Albuquerque parceret nemini, quin etiam ipse ad cæteros animandos, operi manus interdum admoueret; nostrorum paucitas, quamquam artificiose obtegente Albuquerque, facile patuit. Duo millia bellatorum, vt minimum, esse barbari putarant, cum vix ad quingentos, vt supra dictum est, summa pertingeret: dein, Atare magnis præmijs clam sollicitante, transfugia maxime fabrum ac nautarum fieri cœpta. quos cum Albuquerque minaciter ab Eunuchis repeteret; ille subinde varijs mendacijs, & frustrationibus eludebat. Per idem tempus è Perside legati duo



## *Historiarum Indicarum*

duo ad Armuziam appulsi, ut ab Zeifadino vestigal annuum Ismaelis nomine exigent. Ea seu vera fuit, seu ad metum Lusitanis incutiendum, ab Atare in tempus ficta legatio; confestim ad Albuquerqueium à Zeifadino defertur. ille, praesenti animo, & hilari vultu, Regem sine cura esse iubet: sese cum legatis illico transacturum. dein globis aliquot è ferro liquato, hastarumque cuspidibus, & misilibus variis in ferculum impositis, cum eo ferculo mittit qui suo nomine Persis aperte denuntiaret; ab ijs, qui in Emmanuelis fide, & imperio sint, alienis Regibus, si laceffant, tributum ex ea moneta persolui. qua ludificatione vehementer offensi legati, re infecta, pleni minarum irarumque in Persidem rediere. Interea cum arx, quamquam acriter instante Albuquerqueio, tamen tardius cupiditate omnium cresceret; Lusitana ipsa pubes atque nobilitas indignari ac fremere; se tot iam dies in seruili opere detineri; cum interim Aegyptiae naues contra Emmanuelis edictum impune toto ferantur Oceano, quarum opibus ditari omnes nullo negotio possint. Nam quod ad ipsam arcem attineat; cui non apparere ludi operam, vel potius prodi sanguinem Lusitanum? quippe, simul atque ab Armuzia soluerit classis, metu omni sublato, & arcem, & praesidium ipsum Persis, & Arabibus illico praedae futurum. Ergo, per tot misérias & ærumnas id agi; ut, Lusitanorum humeris & sudore, castellum aduersum ipsosmet Lusitanos in barbaro solo exstruatur. Hæc, & alia id genus, quæ in tali re segnitie & auaritia suggerit, occultis primum inter paucos agitata sermonibus, paulatim in vniuersam classem manarunt. Nauarchi, qui alienæ leuitati & licentiæ moderari debuerant, ultro se tumultuanti militi duces, & auctores præbent. Denique, ipsorum nomine, libellus singulorum chirographo subscriptus, ad Albuquerqueium à publico scriba defertur: in quo erat; nautas & milites omnes iamdiu profectiorem ex eo loco postulare. frustra ibi teri tempus, finitimasque nationes, quibus nulla ope resisti possit; atque Ismaelem in primis Persam, eo facto irritari; cui ad eam diem Armuziani Reges tributa persoluerint. Qui ut maxime sileat; & impositam suis ceruicibus arcem incolæ e quo animo patiantur; minime tamen expedire, ommissa Indica nauigatione, marisque custodia; tenues adeo copias in tot, ac tam longe disiuncta praesidia dissipari, carpique. Proinde classem

sem vel ad Arabicam oram tuendam reduceret; vel in Indiam traiceret ad Prætorem Almeidam adiuuandum. Id ni faceret; minime ex Emmanuelis re, & boni ducis officio facturum videri. Hæc a minoribus præfectis Imperatori proposita. Verum ea denuntiatione Albuquerqueius, & natura minime blandus aut in milites ambitiosus, & regere non regi, a suis præsertim, assuetus; adeo deterritus ab incepto non est; vt lectum mox libellum in ipsas muri compages per contemptum includi à structore imperauerit. id vero perquam indigne passi Nauarchi: non modo nihil se tam benemeritos impetrasse, verum etiam ludibrio fuisse consentientem omnium voluntatem atq; iudicium. itaque ipsismet sine intermissione instigantibus, nautici, rerum nouarum cupiditate, plerique, & in Imperatorem odio magis ac magis accendi; paucos ingenta probitas, aut metus, aut verecundia continebat. cæteri desidia, negligentia, prauitate certare: si ad tesseras & accipienda imperia vocarentur; vix ad nomina respondere: si maturandum quippiam esset; operam consulto remittere: sin caute & considerate agendum; vniuersa præcipitare, miscere, confundere: præsentem Albuquerqueium contracto vultu intueri; absentem execrari, & profcindere maledictis: denique, ad apertam pene seditionem res haud dubia animorum inclinatione spectare. Nihil horum Eunuchus interea nesciebat: quippe, & ab infensis omnia vulgabantur; & ipse discordiæ serendæ alendæque artifex mirus, præfectorum plerosque donis ac promissis priuatim sibi habebat obnoxios. itaque nostrorum dissensione fretus, iugum excutere, ac bellum reparare sine mora constituit: grauiter semet ipsum accusans, quòd Christianis hominibus adeo & numero paucis, & voluntate dissentientibus, regnum Regemque præceleri desperatione prodidisset. Igitur officinis in proximo pertransfugas institutis, ænea clam tormenta conflare; noctu armatos in urbem admittere; naues in tutam ab incendio stationem occulte subducere; coniunctos arci parietes perfodere pluribus locis, vt in nostros munientes repente impetum faciat. iis rebus per Abrahamum quendam Ataris inimicum ad se delatis, Albuquerqueius intestinæ prius fraudi, tum externæ obuiam eundum ratus, Nauarchos alloquitur. docet quanto in periculo ipsorum culpa res sit. Atarem, Christianorum maxi-

me



## *Historiarum Indicarum*

me certaminibus odijsque subnixum, extremam cunctis moliri perniciem. discordiæ mala, sacramenti religionem, Emmanuelis Regis præcepta commemorat. caueant, ne gloriosam a deo victoriam, ac pene diuinam, cuius fama iam longe lateque manauerit, perfidis coitionibus, ac detestabili animorum obstinatione corrumpant. Hisce castigationibus, minisque insuper exterriti præfecti, cum sese purgarent, & in officio fore promitterent; Lusitanos quique in vrbe, quique in arce versarentur illico in naues cum omni instrumento Albuquerqueius reuocat. Inde patefacta sua consilia sensit Eunuchus; neque ultra iam distulit bellum. Naui actuariæ carina erat ab Albuquerqueio in littore posita: in eam primum inijcit flammam: deinde in classem nostram ex vrbe varij generis tela contorquet. Albuquerqueius, nequicquam Rege, regisque præmonitis, vt fœderis & iurisiurandi memores, pacta fidemque seruarent; applicitis ad terram nauibus, urbem continuis octo diebus pergit quatere. Ea diuerberatione quamquam ciuibz luctuosa; tamen cum haud ita multum ad summam vniuersi proficeret belli; ab oppugnanda ad circumsedendam Armuziam vires, & consilia transtulit. Neque admodum difficilis fore videbatur obsidio vrbs in arido ac sitienti solo pene cunctis non modo ad cibum, sed etiam ad potum importatis vtentis; & vna situs opportunitate, vt supra dictum est, in admirabilem celebritatem, frequentiamque perductæ. Siquidem, paucis exceptis oleribus, nihil ferme tota insula feritur. Cisternæ aliquot intra ipsa mœnia cadentem è cœlo excipiunt imbrem, idque perrarò. Ad Turumbacum (quattuor ab vrbe millia passuum is abest locus) aliquot numerantur putei; cætera mirum in modum squalent, arentque. Albuquerqueius Nauarchis ad opportuna loca dispositis, scaphas etiam remige ac milite instructas insulam dies noctesque circuire iubet. multa paucis diebus nauigia cum ipsis commeatibus intercepta. nautæ militesque ad terrorem decisis naribus, auribus, manibusque, in littore expositi. Præterea Turumbacum Georgius Barretus Castrius cum expeditis octoginta viris noctu profectus, circa quartam fere vigiliam, quod tempus altissimo somno merfos homines tenet, nec opinato aduentu sopitos palatosque custodes opprescit. sagittarij ducenti; equites quinque & viginti in eo præsidio erant. cœsi cum ipso præfecto




Et plerique, & cesorum corporibus pedirum equorumque, & alia materia oppleti putei. ac, ne aperiri denuo possent, cum delectis non amplius viginti viris in ea statione relictus Laurentius Syluius Castellanus egregia virtute Centurio. Aduersus eum manipulum cohortes aliquot ex vrbe cum erupissent; circumuentos Lusitanos, & in orbem pugnantes, ad vltimum iam discrimen adduxerant. ac superfuisset nemo, ni Albuquerqueius in omnes hostium motus intentus, cum centum & quinquaginta armatis celeriter affuisset. eius aduentu integrata pugna. & ex altera parte Atar, & Rex ipse hortatores aderant: ex altera, inter primos ordines Albuquerqueius praelium ciebat acerrime. ad extremum, superante hostium multitudine, pluribus iaculis frustra petitus, cum iactus omnes impenetrabile scutum, & egregia lorica respuerit; haud tamen exiguo cum vitæ discrimine, plebisque suorum sauciis, vno tantum desiderato, sese ad scaphas in proximo stantes recepit. Ex hostibus cecidere complures. in ijs princeps iuuentutis Amis ( qui honoris vocabulo Xa dicebatur ) manu promptissimus; cui nuper ob coniurationis crimen exsulanti, reditum in patriam Albuquerqueius ipsemet impetrauerat; ac tum ex cataphracto equo in liberatorem suum impia tela torquenti, missus in incertum è tormento globus femur alterum abstulit. Ac riore inde custodia cum omnes vndique commeatus ab vrbe arcerentur; inopia primum, dein fame siti que vrgeri ciuitas coepta: quæ mala cum diutius ferri natura ipsa non sineret; concursus quotidie plebis in regiam fiebat detestantium bellum, sibi que, & vxoribus, ac paruis liberis alimenta precibus iratis efflagrantium. Atar interea per idoneos viros tumultum sedare vix poterat: & incassum propinqua Persarum auxilia, & explorata victoriæ spes iactabatur: ingens quippe rerum desperatio populum ceperat; iam que in eo res erat, vt Albuquerqueius urbem malo subactam rursus in potestatem acciperet, leges que denuo imponeret victis; cum nihil tale mentem, in ipso articulo rei ad exitum perducendæ, Nauarchi fere omnes repente destituunt; & passis velis in Indiam consensu transmittunt. neque id modo, verum etiam ad suam ipsi leuandam infamiam, vt fit, insontem Albuquerqueium fictis criminibus vltro apud Almeidam Prætorem insimulant. Ab ijs tali tempore desertus Albuquerqueius, Quexomen tamen insulam



## *Histor. Indic. Liber Tertius.*

subita incurfione vastauit; ac subsidio venientes Armuzianis duos Larecij Regis propinquos cum sagittariis quingentis cecidit; & in conspectum vrbis cadauera vtriusque proiecit. Sub idem tempus, è captiuis est cognitū, ab Lara Carmanix vrbe, & Bahareno insula Persici sinus, classem aduentare nauium septuaginta, rebus omnibus ad dimicandum paratam. ac simul ab Socotora nuntij tristes venire; arcem Lusitanam præsidiumque in summo versari periculo. Partaces post Christianæ classis profectionem, concitatis denuo ad arma incolis, acriter Lusitanos premebant. Harum rerum fama permotus Albuquerque, nouis com meatibus ex hostico duas, quæ solæ supererant, naues instruxit. ac dolore tantæ ad irritum cadentis victoriæ fremens gementque, Socotoram Ianuario mense repetijt. Eius aduentu soluta statim obsidio est; fugati denovo Partaces; & Socotoranis, quod iterum defecissent, multę nomine, gratiæque uis uectigal impositum.

*Libri Tertij Finis.*





# HISTORIARVM

## INDICARVM.

### LIBER QVARTVS.



**S**E QVITVR annus octauus à sesquimillesimo, insignis graui clade Lusitanorū, & acerbo Laurentij Almeidae eximij bellatoris interitu. Is, cum ad Cocinum è Ceilano insula reuertisset; ad custodiam inde Malabarici maris nauibus octo prodierat. Interea Calecutanus, & Arabs, suæ vterque gentis ac sectæ populos Regesque ad arma instigare; accusantes ignauiam, quod abditi intra mœnia & portus, alienigenas homines, natura, sermone, legibus, institutis multo magis quàm maris atque terrarum interuallo disiunctos, tam diu vagari toto pene Oriente populabundos, neque classes modo, sed iam, si Dijs placeret, colonias quoque in Asiam arbitratu suo mittere paterentur. Huiusmodi castigationibus monitisque cum alios principes ac dynastas, tum vero Mamudium Cambaiæ Regem præpollentem ea tempestate opibus armisque in causam traxerant. Est autem Cambaiæ regnum, quâ bicornis Indus in mare fertur, soli vbertate, finium amplitudine, flu-

H 2 minum,



## *Historiarum Indicarum*

minum, vicorum, urbiumque frequentia inclytum in primis. Ab Oriente Mandoam terram; ab Occidente Nautacos, seu Gedrosi us attingit: à Septentrione Sangæ, ac Dulcindę regnis; à Meridie mari, & limite Decanio terminatur. Ipsa regio, Cambaia: populi, incertum vnde, Guzarates appellantur: superstitionibus, & mercaturæ apprime dedita gens. bello admodum inutilis. itaque externo fere milite Reges vtuntur. Ac Mamudius, quod erat ex hæresi Mahometana, Aegyptium Campsonem eiusdem superstitionis præsidem per litteras ac legatos vt gere non desisteret, vt promissa Zamorino auxilia tandem aliquando summitteret. Idipsum Zamorinus, & Aegyptij negotiatores assidue flagitabant. Hisce tot stimulis actus Campson, quamquam suoapte ingenio pacis quàm belli cupidior; tamen cognita ex Mauro monacho ferocia Regis Emmauelis, Christianæ quidem rei in suo regno pepercit, quod ita futurum Emmanuel sagaci coniectura prospexerat; cæterum ad exturbandos armis ex India Lusitanos, quando nihil prorsus minæ valuerant, animum & curas intendit. Igitur ad materiam nouæ classi petendam, onerariæ quinque & viginti cum valido præsidio Mammalucorum (ea erant Aegypti robora) in Ciliciam destinata. In eas cum oneribus redeuntes diuinitus factum est, ad vniuersi deinde omen euentus, vt Andreas Amaralius Lusitanus, qui tum erat in principibus Rhodiæ militiæ, cum nauibus egregie instructis decem, incideret. Is audacter commisso prælio, Mammalucis ferme trecentis occisis, onerarias sex depressit, quinque captiuas abduxit; cæteras in fugam actas foeda coorta postmodum tempestas lacerauit, ac distulit: decem tantum quassatæ fluctibus Pelusium tenuere. inde aduerso Nilo Cairum subuecta materia, & a naualibus fabris particula tim elaborata, tridui itinere camelis Suezium maris rubri deuehebatur. ibi demum intextæ, & compactæ carinæ cum necessarijs armamentis deductæ sunt. Eæ fuere in præsentia triremes tantummodo sex, celsiores onerariæ quinque; ad quas Calecutanus orator Maimames, de quo supra diximus, Mahometicæ prauitatis antistes, cum vna longa naui se adiunxit. In eam classẽ, præter nautas remigesque, Mammaluci mille & quingenti propugnatores impositi. Expeditioni præerat Hocenens Persa, qui patria lingua Mir, hoc est dux siue præfectus, honoris



honoris causa fuerat appellatus, rei naualis gloria per id tempus admodum illustris. Hunc, Maimames regionum peritus, præter littus Arabicum, superato Persico sinu, ad insulam & oppidum oræ Cambaicæ seu Patalenæ Dium adduxit: quam regionem præcis Carmaniam fuisse nonnulli recentiores falso putarunt. Huic insulæ imperitabat eo tempore Iazius, natione Sarmata, quem olim finitimi Turcæ, prædam è Christianorum agris agentes, à nutricis vberibus auulsum vna cum aliis infantibus puerisque in seruitutem abduxerant. Mahometanis inde sacris initiatus, ut erat lacertoso corpore, ac viuido in primis ingenio, ad summam sagittandi scientiam quotidiana exercitatione peruenit: ac per manus, ut fit, aliis aliisque diuenditis dominis, in regnum denique Cambaicæ defertur, & Regi Madrafaxo Mamudij parenti pro amicitia dono datur à mercatoribus. Apud quem, auguriis miræ deditum, cum sagittariæ artis egregium specimen præbisset, immunda inter volandum aue destinato confixa; ab ea primum laude commendatus, de in alijs quoque muneribus prudenter ac dextere obeundis non vulgarem gratiæ locum breui tempore nactus est. Cum in dies familiaritas cresceret, libertate donatum Rex in prætorianorum ordines cum largo stipendio adscribit. dein, virtutis ergò, Melicum vocabulo gentis appellat: postremo vicum ei maritimum, & insulam, de qua dicebamus, Dium, iure beneficiario attribuit. Eam insulam, vestigiis tantum dirutæ quondam urbis nobilem, cæterum eo tempore tectis & incolis infrequentem, Iazius, tum loci opportunitate (quòd medio veluti e spatio facilis inde vel in Arabica littora, vel in Decania regna decursus est) tum vigilantia solertiaque pelliciendis vndiq; mercatoribus, ad insignem celebritatem breui perduxit: sepsitque insuper mœnibus, & propugnaculis. Ad hæc, trans euripum, seu fretum, quod insulam facit, in orientali continentis plagâ oppidum condidit, receptaculum aduenis militibus, maxime Turcis; ut ab Diensibus freto diuisi, rixandi cum ijs ac tumultuandi causas procul haberent. id oppidum primo Gogala, dein Rumepolis vocitatum ab ipsa re. Duplicis quippe generis Turcæ versantur apud Indos, militiæ causa mercede conducti: Asiatici, & Europæi: illos æque Indus ac Lusitanus proprio nomine Turcas; hosce, quod à Byzantio ferme euocantur, quo-



## *Historiarum Indicarum*

translatum ab vrbe Roma quondam imperium est; corrupta Græca voce Rumes, quasi Romæos appellant. huic ergo nationi lazius, vti dicebam, separatum ab incolis locum ad commorandum attribuit. Tum etiam pecuniis in dies auctus, prædatoriam classem haud contemnendam instruxit. Hic aduenientem cum expectatis iam pridem auxiliis Hocenum gratulabundus accepit. ac sese, quod ita Cambaia Regi cordi esse intelligeret; adiutorem illi & socium ad omnia fore professus est. Communicatis inter se consilijs, dum de ratione gerendi belli deliberant; à speculatoribus affertur, Laurentium Almeidam cum paucis nauibus ad Ciaulum stare, expositis in terram copijs, nihil minus quam de aduentu classee Aegyptiæ cogitantem. Ultra Diu leucas circiter quinquaginta id emporium est; duas recedit introrsus à mari. Præterlabitur eiusdem nominis fluuius, quem, vt cæteros ferme Orientis amnes, longo tractu æstuarium influens, capacem ac patientem omnis generis nauium reddit. Ei tum oppido imperitabat Nizamalucus, vnus è Decani regni præfectis, qui Rege in custodiam incluso, totum eius imperium sibi nefaria conspiratione diuiserant. Quæ portio Nizamaluco obuenit, in eius ora maritima Ciaulum est. ipse mediterraneis maxime se regionibus continebat. ac licet ob diuersitatem religionis, ac generis, Christianos odisset; quæstus tamen, & commercij causa, mandauerat præsidibus loci, vt cum aduenis Lusitanis amice ac liberaliter agerent. Ergo, dum ibi securus moram ducit Almeida, vt Cocinensibus onerarijs quæ ad Ciaulum stabant, præsidio redeuntibus esset; incerto auctore affluxit rumor, Aegyptias naues complures cum egregio militum armorumque apparatu in Indiam penetrasse. Primo nihil eiusmodi sermonibus commouetur Almeida. increbrescente dein fama, concilium aduocat. omnibus incredibilis visa res. quibus enim machinis, naues, maioris formæ præsertim, ab interno in externum mare, tanto continentis terræ spatio transuehi, aut quomodo nouam in Arabico intimo sinu classem ædificari, ornariue potuisse, locis circa siticulosis arentibusque, nulla ferme cædua sylua, nulla ferramentorum, nulla fabrum, ac nautarum, aut remigum copia? Scilicet anniuersarias à Meca naues maiore fortasse quam soleant præsidio Diu appulsas. id vulgo cuncta in maius attollenti classee

classis inusitatae speciem præbuisse. Ad hæc, inanes sæpe iam ante rumores ad Lusitanos terrendos consultò dissipati, & vana ac fallacia incolarum ingenia memorantur. Hisce aliisque id genus argumentis elevata nuntij fides: & Laurentius, de more, certaminibus ludicris militariter tempus terebat; cum ab ijs, qui carchesia speculandi causa tenebant, aduentans repente conspicitur clas, incerto, propter distantiam, numero & genere nauium. Hocenus is erat, dum suam Iazius quoque classem expedit, ad opprimendum, vel certe distinendum Almeida celeriter antegressus. Initio, Albuquerque, quod ex Arabia dudum expectaretur, adesse creditus à nostris. Mox, ubi propinquitas ipsa Mahometanas naues peritis talium rerum aperuit; repente nuntiis aliis super alios missis, Almeida vagos in littore præfectos, & milites raptim naues conscendere, arma capere & aptare ad prælium iubet. Vix dum iussa peregerant, cum Aegyptij demissis antennis ad pugnam instructi portum inuehebantur. Trepidatos inopinata re Lusitanos, metuq; perculsos, in potestatem haud ita magno negotio venturos putauerat barbarus. at ubi præsentiore quam credi posset animo frequentes armatos ad margines nauium, & pro tabulatis & castellis aspexit; ex tuto rem aggredi, & Iazium omnino opperiri constituit. in agmine tantum eo die leuiter dimicatum est, neutris vniuersi certaminis aleam subire ausis. Hocenus, ad vitandum congressum ordine simplici præteruectus, paulo supra nostrorum stationem, ad ripam fluminis loco vadoso naues applicuit; quod ex plano alueo de industria fabricatae, multo minorem quam Lusitanæ aquarum altitudinem postularent. Proxima nox animando vtrunque milite, & corporibus curandis in sumpta. Postridie, ignarus Hoceni consiliorum Almeida, venturiq; mox ab Dio subsidij, vltro sublati anchoris ad hostem subit infestus. Maxima Lusitano spes victoriæ in dextris erat, si naues Aegyptias iniectis harpagonibus comprehendere, ac pugnam ex propinquo conferere potuisset. Vbi eos ab exoptato congressu natura loci prohibuit; tormentis admoti confestim ignes, & missilibus vndique certari ceptum. Inde laniari subito corpora; & nauium latera atque armamenta perfringi; & horrendo fragore, variisque clamoribus, ac misto vulneratorum & morientium gemitu cuncta perstreperere. Bar-



## *Historiarum Indicarum*

bari, & multitudine defensorum, & omni telorum genere ex præparata in id ipsum copia; & numero ac forma ipsa nauium superabant, quippe, præter quam quòd erant tectæ picatis funibus à puppi ad proram vsque reticulato opere pertinentibus; tanta erat insuper earum celsitudo, vt in nostras apertas, libratiora superne iacula, & certiore ictu pleraque inciderent. Verum iniquitates omnes vincebat audacia Lusitanorum, & inexplibilis quædam gloriæ laudisque cupiditas, Multi eo die ex vtraque parte interfecti, plures vario telorum genere fauciati. Laurentius ipse, conspicuo loco prælium ciens, duabus deinceps sagittis haud sine acri doloris sensu configitur. Sacrificulus quoque Maimames, dum infra puppin abdito loco Mahometem adorat, missio temere globo discerptus, obita cum tanto labore legationis, & concitati aduersum Christianos belli præmium egregium tulit. Hoc maxime modo pugna propemodum æquo Marte in vesperam extracta, Iazius cum aëuariis circiter quadraginta superuenit. Ad eius aduentum index lætitiæ clamor ab hoste sublatus: & incerta victoria prælium, lassitudo, & appetentes iam tenebræ diremerunt. Iazius Lusitanam classem perumpere nequaquam ausus, ad ostium fluminis anchoras iacit. dein silenti nocte diuersam abradens ripam, quàm longissime à nostris potuit, sese cum Hoceno coniunxit. Ea re animaduersa, extemplo ad Almeidam duces Lusitani conueniunt. Sat iam **Honoris** ac laudis ex vtriusque diei certamine partum demonstrant. nunc tanto incremento auctis hostium copiis, cedendum aiunt temporis; & nulla interposita mora naues ex arcto & impedito loco in altum explicandas. Hæc pro sua quisque parte suadere præfecti. Almeida, vt erat existimationis ac dignitatis nimio plus retinens, nocturnæ fugæ ignominiam veritus, cedendum utique, sed sensim, & oborta demum luce, respondit. neque vllis cuiusquam obrestationibus demoueri se de sententia passus est. Vbi diluxit, accersitas iam à Ciaulo sociorum onerarias Lusitanicis intermistas, retrorsum æstu secundo iubet ad mare tendere, ipse, quod periculosissimum erat, antecedentium tuenda terga sibi desumpsit. Barbari nostros conspicati abeuntes, illico subsequuntur; telisque ac tormentis morari ac retinere contendunt. In eo tumultu forte ita accidit, vt insciis omnibus, maioris for-

mae ferrea pila sub ipsum clauum adaeta, perincommodo loco nauem Almeidae perforaret. inde accepta clam aqua paulatim alueum degrauabar : ac tanto denique pondere in piscatorios cancellos, transuerso amne praetentos, impegit ; vt iniectis à Pelagio Sofa trierarcho loris, quamquam acerrime concitato remigio, nulla inde vi vnquam auelli potuerit. Cum vndique instaret hostis, & iam progressi nauarchi, animaduerso periculo frustra in aduersum aestum (& est ibi ad instar euripi rapidissimus) ad opem Almeidae ferendam toto impetu, niterentur; egregia velocitate lembus à nautis imperatori ad fugam offer tur. Hortari omnes, & orare, vt confestim illuc è naui desiliat, seq; Francisco parenti, ciuibusque, & Emmanueli Regi feruet incolumem. At ille, fortibus oculis, Deus, inquit, ac superi omnes, tale flagitium auertant, vt carissimos commilitones meos, adeo de me, deque parente meo, ac de communi patria benemeritos, in extremo discrimine derelinquam. Dein, reiecto nauigio, propugnatoribus ad loca idonea distributis, qua maxime parte laborari animaduertit, eò celeriter aduolat. Tam insigni virtutis & caritatis exemplo reliqui mirum in modum animati. Nulla, quamquam in tantis angustiis, mentio deditiois, aut pacis. Cuncti sese ad vitam praclaro exitu decorandam intrepide comparant. At ex altera parte barbari, in eo verti victoriam rati, si duce hostium aut viuo aut mortuo potirentur; omisissis caeteris nauibus, vnam praetoriam circumfistunt. neque tamen ad inuadendum, vel ad rem propius gladio & cuspide gerendam est animus: tantum ex intervallo incendiarias ollas, & sagittarum examina, & plumbeam procellam in nostros effundunt. Cum biremibus maxime iniquum certamen erat. Ea, ne respirandi spatium hosti daretur, prope ad Numidarum equitum speciem in turmas diuisa, cum in orbem pugnae succederent, agilitate incredibili procurentes inuicem ac refugientes, immobilem, & haerentem vno loco praetoriam, haud tamen impune eludebant. quippe non pauci, & promptissimus fere quisque, dum incautius subeunt, destinatis è superiore loco iaculis figebantur. Inter haec, Laurentio, propter magnitudinem & animi & corporis in primis ad ictum opportuno, excussa è tormento pila dimidiatum femur abripuit. Eo vulnere debilitatus, cum sese ad sellam malo opposi-

tam



## *Historiarum Indicarum*

tam reclinasset, suos ex eo ipso loco ad gloriam ac decus inter-  
mortuis vocibus adhortati, ac proposita morientibus pro Chri-  
sti nomine referenti præmia, globus alter, auulsis à pectore co-  
stis, foedo & horribili aspectu præcordia patefecit. Corpus la-  
cerum, quo minus conspici posset, raptim à stipatoribus è supe-  
riore loco detractum in tabulata projicitur. & nostros iam san-  
guis, iam tela defecerant: reliquis ex omni numero duntaxat  
viginti, & ijs quidem ipsis perpetuo labore ac defatigatione  
confectis. Tum demum hostes ad Prætoriam succedere, in  
eamque nudatam propugnatoribus transilire ausi. Duorum  
hinc Lusitanorum perditis in rebus facinora memorantur egre-  
gia. Vernaculus erat alter Almeida, Laurentium Frerium Ca-  
tum vocabant. Is inter pugnam lumine captus ictu sagittæ,  
cum ab heri cadauere auelli non posset, altero cruorem, altero  
lacrymas oculo sine fine profundens, ab irruentibus repente  
Mahometanis opprimitur. neque se tamen circumuentus abie-  
cit, sed præsentis strinxit animo ferrum: ingenti que edita stra-  
ge, & hostium corporibus domino tumulto, super eam deni-  
que stragem, præclare seque, & Imperatorem ultus occubuit.  
Speculator & carchesij custos erat alter, Andreas nomine Por-  
tuenfis. hic plumbea glande saucius humerum, & insuper vsu  
læuæ manus amisso, nihilominus dextra plus biduum ex ipso  
carchesio dimicans, barbaris in tantæ virtutis admirationem  
adductis, accepta demum incolumitatis fide se dedit: ac suis  
postea restitutus, & honore (vti erat æquum) & stipendiis au-  
ctus est. Cæterum potiti Prætoria Mahometani, traditis in cu-  
stodiam iis quos in potestatem viuos acceperant, partam tanto  
sudore & sanguine victoriam inter se gratulantur: per eos quip-  
pe dies è suis omnino sexcentos amiserant, cum è Christianis  
cecidissent haud amplius centum, & quadraginta. ergo ad hu-  
mandos commilitones de more conuersi; & Mahometano an-  
tistiti Maimami, quod inter adorationem obierat, quam ipsi  
vulgo zalam appellant, vtpote sine controuersia in cœlestes re-  
lato, fanum cum perpetuis luminibus posuere. adeo vel adum-  
brata virtus, & ficta religio, in admiratione, & honore etiam  
apud barbaros est. Almeida corpus, qua situm ad sepulturam,  
quantauis adhibita cura dignosci non potuit. Lusitanicæ na-  
ues, quæ mature discrimen effugerant, cum in oculis pene du-  
cem

cem amisissent, opitulandi facultate præcisa; inde ad Cocinum plenæ luctu ac mœstitia reuertuntur. Cladis eius nuntium, Prætor Almeida, ut dignū erat illa persona, sapienter tulit: præclare, ut in malis, cum Laurentio filio actum affirmās, quod nulla accepta ignominia contra nominis Christiani hostes egregiè dimicans, extremum obiisset diem simul, cum insolita victoria elatos barbaros intelligeret, ad eam ferociā reprimendam, contractis vndiq; nauibus militibusque, sese impigre comparabat. Inter hæc, Albuquerqueius compositis ad Socotoram rebus, nauibus tribus è Lusitania nuper eò delatis, & epibatis ferme trecentis, Armuziam repetit, inspiciendi magis causa, quam quod tantulis copijs urbem recipere se posse confideret. Calaiatum ex itinere primum, cuius ante meminimus, Armuzianæ ditioris emporium, quod ab Emmanuele Rege descuiisset, improviso aduentu cepit, ac præda exhausta, ignem tectis iniecit. Inde prouectus in Armuziæ urbis conspectum, haud modico augmentam incremento arcem offendit, ac turres ad alteram usque contignationem Ataris cura perductas. præterea, nouum aggerem, & vallum urbi circumdatum, æneis tormentis ad opportuna loca dispositis. ingentem denique commeatus, & aquæ vim, per eos menses inuectam, Rege regijsque de infesto Lusitanorum reditu haud sine causa sollicitis. Albuquerqueius, nauigijs tantum aliquot interceptis, ne tentata quidem oppugnatione, ad Nabandem continentis oppidum è regione Armuziæ repente descendit. Validum erat ibi Zeifadmi præsidium: & locus tortuosis ad obliquum ictum munitionibus Indico more cinctus. omnia tamen Lusitanus felici conatu perrupit; cæsoq; præsidio, oppidum direptum incēdit. Vastatis dein circa agris, cū litteras ab Emmanuele accepisset, quibus iuebatur Almeida Prætori in administratione succedere; Oceano transmissio Cananorem venit, quo Prætor item paulo ante sese ab Cocino contulerat. Ab eo cum Albuquerqueius prouinciā ex Emmanuelis decreto repeteret; nondum, ait Almeida, maturum eius rei tempus aduenisse. Pulsis ex India Mammalucis, & pacata prouincia, sese tum denique magistratu abiturum. Ardebat cupiditate Prætor, filij necis, antequam è prouincia discederet, vl-ciscendæ. præterea, exulcerato fugitiuorum calumnijs, & criminationibus animo, male iampridem de Albuquerqueio sentiebat,



## *Historiarum Indicarum*

bat . itaque, vt sunt nimium acuta ad suas confirmandas, & fo-  
uendas opiniones hominum ingenia ; interpretatus , neque è  
Lusitana re, neque ex Emmanuelis maiestate esse , tantum im-  
perium, temerario, & impotenti, & dubiæ sanitatis viro com-  
mitti; nequicquam expostulantem Albuquerque, per speciem  
capiendæ quietis, & relaxandi à tot laboribus animi Cocinum  
ablegat . ipse nauibus vndeuginti, & milite, & instrumento  
bellico præclare ornatis, Cananore profectus circa initium an-  
ni insequentis ( qui fuit seculi huiusce nonus ) ad Anchediuam  
insulam tenuit . ibi dum nautici aquantur, alloquendos præse-  
ctos ac milites ratus, concione aduocata, ita disseruit. Quan-  
do peccatis factum est meis, vt mihi, vobisque Laurentium &  
comites ex vniuersa nobilitate delectos, in medio cursu ætatis,  
honorumque casus magis aduersus (quod scitis ipsi) quàm ho-  
stium virtus eriperet ; non ignoro, fortissimi viri, quiddam in  
super à me piaculi contractum esse, quod insolita victoria tan-  
diu exsultare Mahometanum, & nefaria passim vexilla gratula-  
bundum explicare sinè passus ; ac non protinus ab tristi nuntio,  
quamuis parua & subitaria manu, ad expetendas ab ijs pœnas,  
vna fretus immortalis Dei præsentia duxerim . quid enim, tali  
præside ac duce, non audendum nobis fuit ? Ille gentem no-  
stram ex remotissimis regionibus, ad Liberi, & Herculis, & Ale-  
xandri vestigia melioribus multo auspiciis, & fructu longe so-  
lidiore calcanda, subditis æternæ gloriæ facibus incitauit . ille,  
nobis, aduersus impuros nominis Christiani aduersarios, & pia  
toties arma induit, & de tot tamque opulentis nationibus cla-  
rissimas terra marique victorias peperit . ille, paucitati nostræ  
vires atque animos dedit, hostium multitudini formidinem ac  
terrorem iniecit . ille, nobis, in alio pene terrarum orbe rerum  
omnium pressis inopia, diuinitus opem ac subsidium tulit: A-  
ffrorum, Arabum, Persarum, Indorumque tam sæpe conspira-  
tiones, machinas, apparatus momento discussit . vt optimo iu-  
re, nunc etiam, vel exiguis copijs ad retundendam insolentis  
barbari audaciam proficiscens, vnica numinis diuini fiducia se-  
cundos mihi rerum euentus non sine causa polliceri potuerim.  
Quid ergo tam laudabiles impetus, & digna viro consilia re-  
tardauit ? Fatebor ingenue id quod res est, Lusitani . humano  
quodam timore sum veritus, ne si ad hostes ita multos, & re-  
centi



centi victoria feroces, non prouisis ante com meatibus, non e-  
 uocatis Regum sociorū auxilijs, non iusta classe, & instructa hoc  
 militum robore, extemplo tetendissem; in aliquam fortasse re-  
 prehensionem incurrerem, quod iracundia præceps, domesti-  
 ci doloris causa communem rem in apertum discrimen obijce-  
 re minime dubitasset. ita, dum summam rationum mearum  
 tacitus apud me subduco, nimium fortasse cautus, quam parum  
 prudens aut amans reipub. videri hominibus malui. Nunc,  
 quando & Deum ipsum, cuius agitur causa, propitium, vt spe-  
 ro, & classem ita ornatam habemus, vt nihil merito desiderari  
 à quopiam possit; est sane, cur celso, & erecto animo ad vlci-  
 scendam Laurentij, & popularium necem sine mora pergamus.  
 veruntamen, antequam iniuriam hanc bello persequimur, de-  
 lenda nobis est macula, magno meo cum dolore iam ante su-  
 scepta: quod Sabaium hunc, Decanum tyrannum, tot menses  
 impunitum esse permittimus. Hic, qua impudentia atque au-  
 dacia cum Nizamaluco, & cæteris Decani regni præfectis, com-  
 missum sibi ab Rege suo imperium, per scelus, fraudemq; pos-  
 fedit; eadem & cum hostibus Lusitanici nominis consociavit  
 arma; & distentis ad Cananorem nostris, ædificatam hoc ipso  
 loco à nobis arcem, nequissimo transfuga duce non dubitavit  
 inuadere. Quas ob res, equidem caput ipsius regni Goam ag-  
 gredi cogitabam. sed quod ab alto retractior, (vt audio) &  
 ab hisce nouis hostibus nimium remotus est locus, rem in tem-  
 pus aliud differemus. Dabulum æque nobile eiusdem ditionis  
 emporium, atque à mari, & Aegyptijs stationibus haud ita se-  
 iunctum, in præsentia petere est animus. id vbi prope in con-  
 spectu vrbs Dij ceperimus; tum, perculsis recenti pauore bar-  
 baris, in Cambaianum, & Aegyptium signa infesta vertemus;  
 & gloriosum, Christo fauente, de vtrisque agemus triumphum.  
 Quod vt ita futurum esse pro certo habeam, cum alia multa,  
 vt dixi; tum vestra in primis, Lusitani, egregia virtus & alacri-  
 tas facit. cui, quoniam ita de me, deque sanguine meo meremi-  
 ni, ego quoque (sic me Deus bene iuuat) pro mea parte non  
 deero. Magno silentio, maiore cuni assensu auditus est Impe-  
 rator. atque ad non dubiam victoriæ spem incredibilis ex om-  
 nium fronte, oculisque animorum ardor emicuit. Inde magi-  
 stri Dabulum dirigere naues iussi. Id oppidum oræ Decanæ,  
 eodem



## *Historiarum Indicarum*

eodem ferme quo Ciaulum situ, magnifico impositum flumini, duas ferme leucas recedit à mari. ac tum, assiduo concursu negotiatorum, & cumulatâ longa pace diuitijs erat insigne. Quocirca Sabaius, præclare conscius cuiusmodi se in Lusitanos præbuisset, castello ad portus aditum extructo, urbem insuper aggere, & vallo munierat, præsidioque firmarat militum varij generis sex circiter millium, in quibus erant mercenarij Turcæ quingenti. Itaque ex tanto apparatu Saracenus loci præfectus adeo erat animo soluto, & securo, ut ad Lusitanicæ classis rumorem, non modo quicquam ex urbanis apothecis, ut fit, in remotiora loca asportari vetuerit; sed etiam oblectationis causa, uxorem è villa, fœminasque alias nobiles ad spectaculum euocarit. Erant in Almeidæ classe Lusitani bellatores mille, & trecenti: & è socijs urbibus quadringenti Malabares, quorum singuli de more seruos in armis exercitatos plures paucioresve pro censu in expeditionem eduxerant. Ut in conspectum Dabuli ventum est, nocte in explorandis vadis insumpta, postridie Almeida triremes ad oppugnandum castellum præmisit. ibi dum tormentis, & iaculis vtrinque certatur, ipse interim cum cæteris copiis absque vlla trepidatione in terram egreditur. Ad aggerem subeunti, patentibus portis vndique sese hostes offundunt. Quandiu misilibus agebatur, æquis viribus dimicatum. dein, cum sese Lusitani acrius intulissent, & collato pede aduersa corpora gladiis hastisque confoderent; commora primum hostilis acies; deinde, vincente pudorem metu, in fugam auersa. Et Lusitanos, præter insitam virtutem & audaciam, illud etiam non mediocriter iuuat, quod conferta iam pugna, oppidani è turribus ac propugnaculis tela necessario sustinebant; ne ambiguo ictu in suos nostris permistos inciderent. ita, dum intra urbem sese effuso cursu barbarus recipit; eodem impetu tergis insistens Lusitanus irrumpit. Ibi vero, quantam vim ad efferandos homines habeat ira, perspicere potuit. Siquidem externi, qui prælio superfuerant, cum se per auersam oppidi partem eiecissent, in oppidanos, nullo sexus vel ætatis discrimine, ab Lusitano sæuitum est. dein teatis publicis priuatisque subditæ faces: ac prædæ magna pars raptim ad mare auecta. multo plus tamen voracissimus ignis absumpsit. & mortales plurimi, cum se metu mortis varias in latebras



bras abdidissent; aut ruina oppressi, aut enecti fumo, aut igni  
bus hausti sunt. Neque vrbe tantum sese flamma continuit:  
naues quoque in portu aliquot eodem incendio conflagrarunt.  
Ab hoc tam claræ vrbis excidio, cuius fama confestim longe  
lateque manauit, Dium victrici classe prouectus Almeida, an-  
te ipsas portus fauces, parato ad pugnam agmine constitit. Ho-  
cenus, cum de hostium progressu per exploratores in singula  
pene momenta certior fieret, obuiam ire nostris, & in alto col-  
latis viribus dimicare decreuerat. Sed Iazij suasu deinde mu-  
tato consilio, intra portum sese continuit, vt vno tempore ma-  
ritimis, atque terrestribus auxiliis contra Lusitanum vteretur.  
Nam præter Aegyptias, & Dieneses naues, & parones ferme o-  
ctoginta, qui ab Calecuta per eos dies accesserant; in muris  
etiam ac littore toto, varij generis tormenta erant locis ido-  
neis collocata: & Iazius cohibendi à fuga militis, & nouas iden-  
tidem copias è terra submittendi prouinciam sibi desumpse-  
rat. Almeida, vbi præter opinionem inclusos intra munimen-  
ta vidit hostes; id ipsum victoriæ omen interpretatus, reliquum  
diem contemplanda natura loci, & consultando consumpsit.  
Hoceni prætoriam sibimet inuadendam ipse delegerat. Sed  
prohibitus consensu ducum, quod in eius capite salus omnium  
verteretur, gloriosum facinus nauarcho egregie forti Nonnio  
Vasæo Pereriæ delegauit. Nocturnum dein tempus, partim  
stationibus ad pugnam diuidendis, partim curandis corpori-  
bus, &, quod caput erat, animis rite expiandis est datum. Po-  
stridie, vt maris accessus apparuit, & meridianus ventus ex al-  
to vela percussit; æstu simul & flatu secundo, clasfis instructa,  
portum audacter inuehitur. Agmen præibat Nonnius cum du-  
centis ferme propugnatoribus aut vincere paratis, aut mori.  
tum cæteri singillatim propter angustias, & vadi pericula seque-  
bantur. Postremo loco substitit Prætor ad hostium ætuaria  
distinenda, ne in nostros certamine occupatos, repentinis de  
more incursionibus ab tergo impetum facerent. Dein, edito  
pugnæ signo, sublatus vtrinque clamor; & buccinarum can-  
tus, ac typanorum sonitus ex omni parte perstrepuuit; mox tor-  
mentorum fragor, ædificiis intrementibus, pelagoque vibran-  
te, omnium aures longo remugitu compleuit. Tum, intrepide  
procedenti Nonnio, globus ab hoste contortus, nautas ip-  
sos



## *Historiarum Indicarum*

fos decem, dimittendis antennis intentos, vno impetu lacera-  
uit, ac perdidit. ac nihilo segnius ille in medios barbarorum  
ordines inferre sese, quoad comprehensa ferreis vncis Hoceni  
Pratoria, prælum atrox vtrunque commissum est. nec prohibe-  
ri Lusitana vis potuit, quominus in hostilem nauem ingenti  
transcenderent saltu; disiectisque aut ruptis retium tegumen-  
tis, cominus hasta gladioque rem gererent. ibi acerrime dimi-  
canti Nonnio guttur sagitta confixum, quo ex vulnere post tri-  
duum periit. Neque ad casum ducis, vt fit, perculsi cæteri:  
quin irritati potius, ardentibus animis integrant pugnam. Pari  
fortitudine ab cæteris nauarchis vbique certatur. Neque bar-  
barus, misilibus quàm gladio melior, flagrantibus Lusitanorum  
vultus, collatumque pedem, & micantes vndique mucrones fer-  
re diutius valuit. Hocenus ipse, vt inclinatum haud dubie pu-  
gnam animaduertit, quàm occultissime sese in lembum, tales  
ad vsus paratum, demisit. atque, vt venalis & fluxa est barba-  
ris fides, veritus, ne Christianis ab Iazio postmodum prodere-  
tur, in terram egressus, equos arripuit; ac, ne salutato quidem  
hospite, confestim ad ipsum Cambaia Regem plenus cladis &  
ignominia peruolauit. Calecutani quoque, cum depressas iam,  
aut expugnatas aliquot sociorum vidissent naues, multis etiam  
ipsi paronibus amissis aut laceris; insulam circumuecti, ex al-  
tero euripi ostio, humilibus tantum nauigijs propter vada &  
scopulos peruenio, Calecutum trepida fuga repetiuere. Trire-  
mes Hoceni duas, in fugam versas, Rhotericus Soarius infec-  
tus, epibatis exiit, ac puppi religatas ad Almeidam victor at-  
traxit. iamque desperatis omnino rebus, cum sese hostes pas-  
sim in mare præcipites darent, instante vndique è scaphis ac tri-  
remibus Lusitano, cæruleos fluctus atro sanguine infecerant.  
ac nequicquam Iazius litto- re toto discurrens, fugam stricto  
mucrone sistere nitebatur. Vna restabat eiusdem Iazij nauis,  
& robore, & celsitudine, & numero defensorum instar egregie  
muniti castelli: recta insuper crudo boum corio, ad repellen-  
da iacula duro, ad fallenda vestigia lubrico, ad prohibenda in-  
cendia madefacto. Ea nanis, cum ausos non semel invadere  
Lusitanos, magno semper eorum damno ac vulneribus repu-  
lisset, ad extremum crebris tormentorum ictibus repetita, plu-  
ribusque perfracta locis, tandem aliquando subsidit. Illud ve-  
rò



rò non sine miraculo à peritis animaduersum. Nonnij nauis, dudum vetustate fatiscens, trahensque sentinam adeo, vt antillas binas pene sine intermissione requireret; ea tota dimicatione, quæ à meridie in vesperum vsque protracta est, haud vno loco pertusa, nihil tamen aquæ prorsus admisit. eadem, finito mox prælio, multis partibus plures vno tempore vndas accepit. Cæsa eo die feruntur hostium ad tria millia, & Mammaluci fere omnes aut capti, aut interfecti. è nostris duo, & triginta cecidere: vulnerati, misilibus maxime, plus trecenti. Quæ in re durities, & frugalitas eius ætatis Lusitanorum euidenter apparuit. Siquidem ad obligandum Nonnij vulnus, adeo linamenta defuere; vt in idipsum, è suis tunicis vnam (leuis dictures, cæterum haud quaquam negligenda) Prætor ipse protulerit. Vt iam, pene portentis simile videatur, adeo masculum nuper ac durum in armis genus, ad tantos tam breui deflexisse vestium apparatus, conuiuiorum elegantiam, & exquisitæ ac lautæ suppellectilis instrumenta. Sed nimirum, quæ soli vbertas, & affluens copia rerum omnium, ad Capuam Pænos; in Græcia Syriaque Romanos emolliit; eadem in Oriente, per Indorum, Sinarumque commercia, variis captos voluptatum illecebris Lusitanos infregit. ac primò paupertatis contemptus in mores eorum inuectus: inde luxus, otiumque succisis industriæ ac parcimoniæ neruis, priscam seueritatem, & disciplinam, ingenti bonorum dolore labefactauit ac soluit. Verum eo quod expositum est prælio, hostiles naues, vt dixi, variæ magnitudinis demersæ complures. rostratæ maiores quattuor, onerariæ totidem in potestatem venere. in ijs, præter machinas, & bellicum instrumentum, auri, argenti que vis ingens, & multum pretiosæ vestis inuentum: è quibus Almeida nihil omnino attigit. militibus ea cuncta largitus est. regia tantum Sultani vexillaria in Lusitaniam missa, & in templo Christi ad Nabantiam, seu Tomarium, ab Emmanuele Rege suspensa: quorum in vno, ad contumeliam nominis Christiani, captæ & occupatæ Hierosolymæ argumento, in modum trophæi depicta sacrosancta altaris, mysteria visebantur. Ita, Christo superisque fauentibus, præclare demptum cladis proximæ, si quod erat, dedecus; & Aegyptiis cum scænore, multo repensâ Laurentij cedes est. neque id optimum eius pugnae fuit; sed quod vna expeditione



## *Historiarum Indicarum*

territis late nationibus, Regibusque, Indici maris imperium in multos deinde annos Lusitano firmatum. Quo magis demiror, insignem adeo testatamque victoriam silentio prætermis- sam à Paulo Iouio æquali eorum temporum scriptore: præser- tim cum diserte ipsemet, belli huius initia causasque tradide- rit. Ex eo die Almeida, luctu & squalore deposito, cum Deo immortalis gratias, vti debebat, egisset; Iazio quoque erroris ve- niam suppliciter petenti, spondenti que se enixè daturum ope- ram, vt omnes Indiæ satrapas, Regesque fide in Emmanuelem & obsequio superaret, pacem dedit ijs legibus, vt naues Aegy- ptias, quæ prælio super fuerant, traderet cum vniuerso appa- ratu. itemque Lusitanos ad Cialum captos illico restitueret: po- stremo, vt multiplici commeatu Christianâ instrueret classem. omnia sedulo, & obedienter facta. neque illi quicquam in præ- sentia grauius imperatū est, & ab oppugnanda vrbe Dio, quam- uis præclara sese daret occasio, temperatum à Lusitanis, non- tam in Iazij gratiam honoremve, quam ne Cambaiæ Regem, cuius vel in primis Emmanuel amicitiam expetebat, eo facto la- cesserent. Inde ouans Prætor ingenti cum gratulatione Coci- num reuertit: & ex itinere, Nizamalucum ipsum tantæ victo- riæ perterritum fama, ad persoluendum Lusitano Regi annum- vectigal, quod antea semper abnuerat, negotio nullo perdu- xit. Eandem fœderis conditionem, eodem perculsus terrore subiit regulus Baticalæ: quod oppidum oræ Canarinæ, vltra Goam est leucas quinque circiter, & viginti. Interea Emma- nuel ab Andrea Amaralio (cuius virtute redeuntem è Cilicia Sultani classem in Rhodio mari fusam ante docuimus) de ho- stium apparatu, consiliisque præmonitus, nondum tamen co- gnita Laurentij nece, Fernandum Cotinium è prima nobilita- te virum, cum nauibus quindecim, & tribus armatorum milli- bus, in Indiam destinarat, vt pulsus inde Sultani copiis, & remis- so in Lusitaniam Almeida, sese cum Albuquerque Prætor con- iungeret, ipsamque totius belli originem fomitemque Calecu- tum urbem inuaderet, deleretque. Cocini tum inter Almei- dam, & Albuquerque, instigantibus vtrinque peruersis homi- nibus, de successionem fœde admodum certabatur. Cotinij ad- uentu ea controuersia statim sedata est; & Almeida, quippe- cui nihil esset obseruantia, & fide in suum Regem antiquius, de-  
posito



posito sine mora magistratu, repudiatisque improbis suasoribus, cum Albuquerque in gratiam rediit. Ducis huiusce, oppidò miserandum scriptores exitum tradunt. Cum circiter quadriennium Indiæ præfuiſſet, Lusitaniam repetens, circa Bonæ spei promontorium, ad reficiendos è diuturna iactatione comites, & simul aquandi & petendi commeatus causa, in terram exſceudit. mox, dilapſis ad proxima tuguria Lusitanis, inter emendum, ut fit, rixa cum incolis, quorundam temeritate cooritur. Ad eum sedandum tumultum, suosque tuendos, Almeida, raptis quæ fors obtulerat, armis, cum aduolasset; concursu repente ex vicinis pagis factò, priusquam ad naues receptum haberet, præuſta fude transfigitur: nixusque illico genibus, manus oculosque in cælum attollens, ingenti omnium dolore exceſſit è vita. Circa eum veterani complures, in ijs egregij bello duces duodecim, dum instabili veſtigio in arena luſtantur, ab hostibus, mira corporum agilitate petiti eminus iaculis, eodem leti genere periire. Ita, clarissimus Imperator, & vir integerrimus, cum Europam, Asiamque victorijs peragraſſet, in Africæ demum ignoto littore, ad ludibrium rerum humanarum, ab nudis ac teterrimis Aethiopibus interfectus, & spoliatus, non modo paratis ab Rege præmijs, verum etiam ſepulturæ honore, & ſupremis exſequijs caruit. Per idem tempus, haud abſimilis caſus ad Calecutum Luſitanos afflixit. Proſectus ad excidium eius urbis triginta nauium claſſe Cotinius, Prætor Albuquerque eiſdem expeditionis adiutore ſocioque, quamquam acriter obſiſtentibus oppidanis, copias tamen omnes ad littus expoſuit. Inde expugnato caſtello, quod portus faucibus imminebat; Albuquerque ad urbis incendium, Cotinius ad regiam ipſam occupandam, ac diripiendam præmatura feſtinatione contendit. Et Albuquerque quidem, incolis metu perterritis, haud ita difficili negotio rectis ignes iniecit: quorum pars magna (quippe ligno folijsque conſtabant) illico flammis abſumpta. Cotinius regiam, abſente per eos dies Zamorino, audacter aggreſſus, magna ex parte ceſo præſidio, clauſtrisque refractis, per vim irrupit. hoſtes, ex compoſito ſimulata deſperatione fugaque, ſeſe per poſticum in ſylvas eiſciunt. Cotinius, potitus iam edibus, quaſi nil ultra periculi ſupereſſet, ex longa defatigatione, æſtuque vehementi, & noctis proximæ



## *Historiarum Indicarum*

peruigilio, quietis aliquantulum capiebat; cum subita conuersione rerum sors belli immutata est. Multa erant in regijs edibus diuturna cura studioque congesta, quæ, subiecta præsertim oculis, cupiditatem incenderent. Ad ea certatim rapienda, suisque ipsimet humeris auhenda Lusitani, dum auide huc illuc, ab re bene gesta soluti, palati que, discurrunt; interea spatium datum Nairibus ad auxilia conuocanda, quæ ex veteris gentis disciplina, ad certas significationes, momento conueniunt. dein conglobati, hortati que se mutuo ad sui Regis iniurias fortiter vindicandas, repente in regiam impetum faciunt; nostrosque oneribus impeditos, & deprehensos errore viarum, sub sarcinis passim obtruncant, iaculisque conuulnerant. Cotinius ipse, dum serò suos à præda reuocat, ab hostibus intra septem regium oppressus, ac trucidatus, occubuit. Et Albuquerque, ad opem laboranti ferendam trepido nuntio excitus, cum refugientem, & confertam in angustiis turbam frustra perumpere niteretur, vulneribus duobus acceptis, ad hæc graui saxo in eum superne deiecto, semianimis cadit: ægreque ad naues relatus, ancipiti aliquot dierum curatione conualuit. Periere eo die Lusitani partim hostium telis petiti, partim in fuga à suis obtriti, amplius octoginta. fauciorum numerus relatus circiter trecentorum. Eius cladis culpam scriptores in vnum Cotinium conferunt. quòd is palmam euerfi Calecuti cum intemperantius adamasset; non expectatis Albuquerquej subsidiis, quo gloriam rei gestæ præcerperet, ignoto itinere, caloribus maximis, ad regiam antecedens, temere sese in apertum capitatis discrimen obiecerit; neque Emmanuelem Passanium audierit spectata æque prudentia ac fortitudine virum, in ipso rei gerendæ articulo sapienter monentem caueret insidias, militemque à præda & discursu quàm diligentissime contineret. Neque tamen incruenta fuit hostibus victoria. Plus mille, vel igne consumpti, vel in pugna desiderati. Eadem æstate, qua hæc ad Calecutum gerebantur, Antonius Laurerius, Franciscanus, cuius ante meminimus, e Socotora Indiam petens, ad Surratum oræ Cambaicæ facto naufragio, cum aliquot Lusitanis ad Mamudium Regem captiuus abducitur. Et Didacus Lupius Sequeria ad ineundam cum Malacensibus amicitiam, è Lusitania missus, cum ad Cocinum appulisset, supplemento in naues accepto,



pto, in Orientem porrò cursum extendit. ac superato Cori promontorio, præter Gangeticum sinum alto vectus Oceano, ad Somatam primus (quod quidem exstet (omnium Lusitanorū accessit. Ea insula, pari ferme ac Ceilanum genere loci, à Septentrione in Austrum oblique porrecta, ab continente in qua Malaca vrbs est, angusto & periculoso diuiditur mari. atq; ob id ipsum peninsula quondam credita est, quòd ob frequentia vada, syrtesq; nondum interiore patefacta nauigatione, isthmo quodam annexa continenti procul intuentibus videretur: cuiusmodi errore ad Siciliam captus olim est Annibal. Sed nostrorum temporum audaciæ, vt nihil imperuium; sic multo plura iam cognita & explorata sunt. Longitudo insulæ, ducentas leucas, & viginti; latitudo, qua maxime patet, septuaginta nō amplius colligit. Auri est apprime ferax (ex quo Chersone-sum auream prisca appellarunt) necnon stamno, ferro, vitro, sulphure abūdat. insignis insuper fonte perenni, ex quo naphtha instar olei manat: & excelso conspecta monte (Balaluanum incolæ vocant) qui ad similitudinem Siciliensis Aetnæ, fumum, & flammæ horribiles euomit. Regio est, ob frequentiam fluminum, ac paludum, nemorumque densissimorum, graui admodum cælo, ac præsertim aduenis vehementer infesto. E syluis, inter alia, primæ notæ sandalum album, agallochum, & exsudans in modum resinæ caphura legitur, quam ignari Arabicæ linguæ camphoram vocant: itemque vulgare piper, & piper oblongum, zingiber, casia. super hæc, magnam bombycis quoque, ad vestes delicates, copiam mittit. Incolæ, milio ferme, & oryza, & syluestribus victitant pomis. Frumentum, & cæteram orbis nostri sementem terra non patitur. Interiora, indigenæ tenent idediti simulacris: littora, Mahometani: quæ pestis ante ducentesium circiter annum inuecta, per vim compulsis ad montana incolis, maritimam planitiem, & loca maxime opportuna commercijs, occupauit. Ditio tota, complura in regna tribuitur, quæ recensere hoc loco non est operæpretium. Sequeria igitur in ea loca delatus, cum Pedirensi primum, dein cum Acenorum Rege pacem, & societatem æquis legibus iniit: & eius rei monumento columnam in vtroque littore statuit. Ab Somatra cum breui traiectu Malacam venisset, tentata prius per interpretem Mamudij alterius tyran-



## *Historiarum Indicarum*

ni voluntate ( is erat ex Arabia oriundus, & sensim collectis viribus, à Sionis seu Sabanni Rege, qui trans Gangem latissime dominatur, per summam fraudem iniuriamque descuerat) Hieronymum Texeriam ab Emmanuele Rege legatum quam ornatisimo comitatu in terram exposuit. Ei frequenter ab aulicis obuiam itum; & magnifice instrato impositus elephanto, ad regiam ingenti celebritate deducitur. Dein prolata munera, & litteræ Emmanuelis, Arabica lingua conscriptæ. Societatem & commercium postulabat Emmanuel. & sibi magnificum Malacensis ducebat, secum ab Rege tam inclyto, ex ultimis terrarum finibus expeti foedus. itaque peracto primæ salutationis officio, pax, & amicitia, magna partis vtriusque voluntate conuenit. Sed hæc tam lata initia eundem videlicet exitum habuere, quem Calecutana sub aduentum Vasce Gamme decem ante annis habuerant. Saraceni, & Arabes Malacæ negotiabantur: Lusitanis præter causam religionis, ob accepta insuper ab eis incommoda, & ademptam maris possessionem, infestissimi. ij, quemadmodum antea Zamorinum, sic tum Mamudium hunc, insigni perfidia ac leuitate virum ex nefaria pseudoprophetæ disciplina, per coemptos pecunia calumniatores, ac præcipue præfectum vrbs quem vocant Bendaram, fictis criminibus in Lusitanos quam acerrime concitant. Gentem ab extremo Occidente, omnium quæ sub cælo sint, sequitiam & rapacitate maxime detestabilem, exitio natam Orientis, quocumque sese specie societatis insinuent, ibi arce confestim ædificata, incolis acerbissimæ seruitutis iugum imponere. Testes eius rei Cocinum, Cananorem, Armuziam, Sofalam citant. proinde, quod optimum est, alienis doctus euentis Rex pacem caueat insidiosam, ac funestam; rebusque suis mature prospiciat. non plus quinque latronum naues, valde imminuto & nautarum, & militum numero, intra ipsius præsidia & portum inclusas teneri: si paululum modo, in id quod est opus, animum & cogitationem intenderit; nullo prope certamine cunctos ita opprimi ac deleri posse, vt ne nuntius quidem cladis ullus omnino superfit. Hisce igitur, & aliis id genus argumentis, licet ius gentium, & foederis religio non parum obstaret; tamen improvidum viri fallacis animum, & suapte natura Christianis insensum, Arabes in suam sententiam facile pertrahunt. Infandi



fandi sceleris in præsentia talis ratio initur. Per summam officij simulationem tyrannus Sequeriam, & præcipuos ex eius comitatu ad conuiuium inuitat; suggestu præcelso ad cænaculi amplitudinem exstructo, & pretiosis tapetibus ac peristromatis adornato regium in morem, & quidem in ipso littore, scilicet honoris causa, ne Lusitanus dux, in tanta peregrinorum colluione, longius ab suis abscedere cogeretur. ibi inter epulas incautum hospitem, comitesque propalam trucidare, eodemque momento naues adoriri placuerat. Sequeria, quamuis ad eam diem consulto pedem è naui non extulisset; tamen multis precibus inuitatus, ne fidem hospitij suspectam habere videretur; se ad festas dapes venturum promisit. dein, coniurationis indicio ad eum delato (neque enim in vrbe deerant qui facinus improbarent) sociorum hortatu, sub ipsum conuiuij diem per internuntios morbum excusat. Ea spe delusus Mamudius, aliam fraudem, iisdem architectis & suavoribus, machinatur. Mos erat Malacæ, qui & in alijs emporijs; vt primus quisque emptor ad urbem accessisset; ita eum ante alios cum oneribus missum facere. Ea lex quoniam si obseruaretur, Lusitanis qui, recentes aderant, diutius erat in portu commorandum; ostendit tyrannus, se, cum Emmanuelis, quem plurimi faceret; tum ipsius etiam Sequerix causa, qui ex tam longinqua regione venisset; extra ordinem aromata & merces exhibere Lusitanis decrevisse: veruntamen, quoniam id periniquo passuri sint animo ceteri negotiatores; qui iamdudum onera præstolentur; curandum esse vt quamprimum, & quanta maxima diligentia res transigatur. Ad certum diem quattuor seorsum locis quâ plurimos Lusitanos cum scaphis præsto iubeat esse. mandatum se, vt, quæ maxime cupiant, ab apothecæ curatoribus nulla mora interposita proferantur. Lætus ea conditione Sequeria, & gerendi negotij causa dissimulatis iis quæ de conspitatione cognorat; Mamudio, pro tam propensa in Emmanuelem voluntate, gratias agit ingentes. Inter hæc, à tyranno classis lemborum aliquot silentio comparatur; & impositis sagittariis, in occulta statione post suburbanum promontorium collocatur. Vtimutis erat ex insula Iaua, quem honoris vocabulo Raiam appellabant: secundum Regem opibus & clientelis longe princeps Malacensis emporij. Huius filius, Patiacus no



## *Historiarum Indicarum*

mine, cui paucis illis diebus cum Lusitanis contracta familiaritas erat, conscendendi ad præfinitum diem pro amicitia nauem Sequeria cum aliquot armatis, & iugulandi repente ducis negotium suscipit. Stationes præterea armatorum locis idoneis disponuntur, ut in Lusitanos, qui que in vrbe versarentur, qui que emendi causa scaphas ad littus appulissent, ex omnibus locis impetus fieret. simul etiam subornati, qui eo die, per speciem vendendi comineatus, ad Lusitanicas naues accederent; nariumque custodes, ignaros imminentis exitij, distinerent. Edictum omnibus, ut nihil mouerent antequam ex loco excelso editum fumo signum aspicerent. Ad eam vero significationem, & classis parata, subito ex insidiis in semiplenas inuaderet Christianorum naues; & cæteri pro sua quisque parte rem terra, marique impigre gererent. Vbi dicta facinori dies affuit, Sequeria, cui nihil erat longius, quam ut ad Emmanuelem nuntios aperti Malacensis commercij perferret; scaphas aliquot cum mercaturæ administris ad loca destinata dimittit. Ipse interim oblectandi animi causa, ut fit, latrunculorum lusu terebat; cum Vtimatis Raia filius cum aliquot armatis per causam salutandi superuenit. Aduenienti, cum omisso ludo Sequeria prodiret obuiam officij causa; Quin tu, inquit ille, coepta prosequeris? nam & apud nos quiddam haud absimile genus oblectamenti est; &, quibus potissimum rebus ab isto vestro discrepet; discere vehementer aueo. Cum Sequeria ad certamen ludicrum, moris amico gerendi causa reuertisset; interea Patiacus exspectans quam mox fumus attolleretur; varia sciscitando animum tegere: ac licet ab insitigenti fallacia simulationem vultu egregie sustineret; tamen sensibus intimis e concepto scelere æstuabundus, modo residere, modo confurgere, tum sicæ manubrium identidem stringere. & is quidem, quamquam ad cædem paratus, præclare sibi temperauit, quo minus præpropere consilia patefaceret. Non eadem cæteris patientia in præstolando fuit. Nam & qui venalem annonam ad naues admouerant, & qui in scaphas ex vrbe imminebant, per tumultum ac trepidationem, furis instigantibus, non expectato signo coorti ante tempus in Lusitanos irruunt: iamque pluribus locis, incio Sequeria, cædes fiebat; cum nauta ex summo carchesio & gestus eorum, qui cum gladiis aderant, specularis  
& rixa



& rixa éminus animaduerſa, conſeſtim ducem inclamat, Deuſ, hominesque conteſtans paratam fraudem; mucrones in caput eius inſtare; Luſitanos ad urbem circumuentos occidi. Ad eas voces quaſi e profundo veterno excitus Sequeria, abiecto alueolo ferrum capit; idem comites, & nautæ faciunt. Sicarij, conſcientia exanimati, in ſubiecta nauigia momento deſiliunt. ille, miſſis propere ad littus armatis, qui ſuos laborantes protegerent, & ad naues feſtine recipere; ad omnia prouidenda, quæ in tali re opus eſſent, extemplo diſcurrit. Er iam edito ſigno, lembi hoſtium ex alto aderant. id ubi Sequeriæ nuntiatum eſt; nè loco arcto & impedito repente oppreſſus, tormentorum uſum, quibus in tanta militum paucitate maxime nitebatur, amitteret, præciſis raptim anchoralibus, è portu ſe proripit; & obuiam hoſti procedit. dein è tormentis æneis ferrea miſſilia horribili fragore contorquens, barbaros ita conterruit, ut ne tentato quidem certamine, uelis, remisque ſeſe in fugam præcipites dederint. ijs diſſipatis, ad ſuorum reliquias colligendas in priſtinam ſtationem reuertit. neque auſus dein de quiſquam ei negotium faceſſere. In eo tumultu ceſſi Luſitani ferme triginta; paulo plures in uincula abrepti. in quos ne grauius à tyranno conſuleretur; ab urbe quatienda, & ab incendiis nauium Sequeria ſeſe continuit. Cæterum temperare non potuit, quominus Mamudio renuntiari iuberet, Luſitanos tam inſignem tamque atrocem iniuriam, fauente Deo ſœderum teſte, propediem eſſe vindicatuſ. in præſentia, quòd ſtata reuerſionis tempeſtas adeſſet, quæ motio in ijs locis non niſi tertio quoque redit menſe, ne apud conſceleratos, & perfidos homines diutius ageret; uelis in Occidentem datis, obuioſ aliquot barbarorum iuncos (onerariæ nauis id genus eſt) pretioſis mercibus refertos expugnat; tum nauibus duabus Cocinum miſſis, quæ de ſtatu rerum Malacenſium Prætorem Luſitanum docerent; ipſe India, & Arabia ad dexteram relicta, Bonæ ſpei promontorium præteruectus, ingenti labore ad Tertias inſulas, atque inde in Luſitaniam recta contendit. Et Sequeriæ quidem nauigatio hunc habuit exitum. Albuquerqueſ interim ualitudine recuperata, & reſectis è Calecutana clade ſuorum animis; in id maxime operam dabat; ut, quæ contra ipſius exiſtimationem ab iniquis ad Emmanuelem Regem delata eſſent;

re



## *Historiarum Indicarum*

re ipsa magis & factis, quam litteris aut oratione refelleret. In primis, ad Armuzianum bellum, quod ille iam diu coquebat; nauales copias, & omnia machinarum genera, quam acerrimo studio comparabat: ac breui, non die, non nocte intermissa cura, nauium vnus & viginri classem omnibus rebus instruxit. in eas Lusitanorum duo circiter millia, præter auxiliares, imposita. Dein oratoribus principum, & regulorum auditis, qui ad eum initio præturæ officij causa confluxerant, cum iis, quas dixi, copiis in conspectum oræ Decanæ prouehitur. parantiq̃ue porro in Arabiam tendere; nec opinata spes commodi propioris affulsit. Goa est vrbs (cuius haud semel iam est mentio facta) in Ticuarino insula, quam, & ignobiles alias complures, angusto interfusum euripo efficit mare: illa quidem, & soli vbertate, & egregij portus amplitudine, & ædificiorum, incolarumq̃ue frequentia in primis Indiæ totius visenda. Ab ea non longe distat Onoris regnum: cuius regni parua insulam, haud contemnenda tum classe obtinebat egregius virtute nauali dux, nomine Timoia. Is, tyranno Sabaio, cuius ante meminimus, & Mahometanis Goæ inquilinis cum aliis de causis erat infensus; tum ob auocatam illuc ab Onore, & Baticala, inclytis quondam emporiis, mercaturam. itaque & Saracenis, Aegyptiisq̃ue negotiatoribus Goam petentibus plurima damna inferebat; & coniuncta cum Lusitanis causa, miro quodam ardebat studio de Emmanuele Rege benemerendi. quocirca iamdudum Francisco Almeida suam operam enixe detulerat; & tum ab Albuquerque ad colloquium euocatus, confestim accurrit; atque inter cætera nuntiat, ab euerso Dabulo Sabaïum prorsus implacabili in Lusitanos ira concepta, naues ædificantem, magnis præmiis veteranos vndiq̃ue milites contrahentem, ingenti machinarum omnis generis comparato iam numero, cum bellum primo quoque tempore Christianis inferre cogitaret; in ipso conatu rei aggrediendæ letali morbo consumptum. Eius morte & multos è subiectis populis rebellasse; & finitimos Reges ad veteres vlciscendas iniurias repente coortos. hinc, Idalcanem filium, exiguo rerum vsu, vixdum lotatum in folio, cum domesticis, tum externis bellis vehementer implicitum atque districtum teneri: Goam ciuitatem, magna ex parte dilapso tyranni exercitu, intestinis præterea discordiis laborare. Pro cer  
to



to se habere, si Albuquerque, omiſſa interim Armuzia, ad Goã recta contendat; fore, vt opportunam ad omnia inſulam, & urbem in primis opulentam, aut metu, aut armis in poteſtatem accipiat. Ac ne verbis duntaxat captare gratiam videatur; ſemet, ni Luſitani reiſciant, cum ſuis omnibus copijs in partem laboris periculiſque venturum. Albuquerque, collaudata Timoiæ fide atque conſtantia, concilium vocat. Nemini ſpernenda res viſa. quippe, Armuzianam expeditionem in alia tem-  
pora differri poſſe: Goã potiundæ, ſi tam commoda præteruo-  
let opportunitas; reuocari non poſſe. Cum hæc ſententia ma-  
gno cum aſſenſu plerisque inſediſſet; Timoiæ, per ſpeciem Ar-  
muziani belli, ad conſcribendos in vicino milites dimiſſus,  
paulo poſt cum peditatu, & longis nauibus quattuordecim or-  
natiſſimis aſſuit. Sub eius aduentum, Albuquerque, mutata re-  
pente nauigatione, Goam peterent, magiſtris edixit. Cum in  
ipſo ore portus in anchoris conſtitiſſet, Antonium Noroniam  
ſororis filium, & Timoiam cum actuariis præmittit ad oppu-  
gnanda caſtella duo, ex vtraque parte aditus poſita, quorum  
alterum in ipſa inſula Panginum, alterum in continenti Barde-  
ſium appellabant. ijs felici euentu captis, cæſoſque aut fugato  
præſidio, mittit qui oppidanis denuntient, ſi voluntate urbem  
tradere, & Chriſtianam clementiam, quàm vim experiri ma-  
tint; ſe & legibus ipſorum paſſurum eos viuere; & tertiam par-  
tem tributi, quod tyranno pendere ſoleant, remiſſurum. ſi mi-  
nus; obſidionis mala, & omnem belli cladem exſpectent.  
Goani, diſſipatis fuga militibus, & abſente Idalcane ad fines  
regni tuendos, iam antea trepidabant. Tum vero, non modo  
expugnatis arcibus territi, ſed etiam benignitate promiſſorum  
illecti, pulſis aduerſæ factionis hominibus, Albuquerque &  
Luſitanos ingenti gratulatione patentibus portis admittunt;  
eiſque, deditidnis inſigne, claues oppidi, & arcis in qua erant æ-  
des regiæ, porrigunt. Albuquerque, cataphracto equo ſum-  
ma omnium ordinum frequentia urbem inuectus, Crucis vexil-  
lum pietatis cauſa præferente quodam ex Dominicana familia,  
primum omnium, Deo immortalis, partam ſine cruore victoriã  
gratulatus, promiſſi fidem ciuibz egregie præſtitit: urbem, &  
arcem diligenter inſpexit; grauiſque ante omnia edicto milites  
à præda, iniuriisſque continuit. In naualibus, partim inchoatę,  
partim



## *Historiarum Indicarum*

partim absolutæ varij generis naues inuentæ non pauca. armentarium, telis, tormentis æneis, sulphureo puluere, & omni apparatu bellico refertissimum. & in stabulo regio militares equi permulti, quos è Perside aduectos (nam India eiusmodi armentis caret) Malabarici, & Canarini, & Narsingæ Reges impenso parant pretio. Ad hæc, locandis publicis vectigalibus, tollendis ex insula latrociniiis, & componendo ciuitatis statu, reliquum æstatis insumptum. Iam enim urbem illam, Albuquerqueius, propter eximiam (vti diximus) agri bonitatem, & opportunitatem loci, (quod quasi cardo inter Cori promontorium, & Cambaiæ littus interiacet) ad continendas in officio cunctas eas nationes, caput ac sedem Indici imperij destinarat. Dum igitur componendis insistit rebus, ac potissimum conciliandis incolarum animis, haud ignarus vim ac metum, exclusa beneuolentia, malos diurnitatis esse custodes; interea Idalcan, amissæ Goæ percussus nuntio, pacem vel iniquis conditionibus cum hoste interno pariter & externo componit. dein, auctis maiorem in modum copiis, ad Goam extemplo contendit. Ducem habebat in castris, eximia rei militaris peritia, Camalcanem nomine. Hunc, ad tentandum æstuarij transitum, quo insula cingitur, cum expeditis octo millibus peditum, equitibus mille & quingentis præmittit. ipse cum cætero exercitu (ea erant equitum quinque, peditum plus quadraginta millia) tardius propter machinas, & impedimenta subsequitur. Camalcan, celeritate vsus, ad ipsum littus applicuit castra. Eius aduentu, præsertim quod Idalcan cum reliqua copiarum mole propediem affuturus nuntiabatur, magnus tota insula motus animorum est factus. Duo incolarum genera Goam habebant. inquilini alteri è secta Mahometana, qui dudum ex Arabia profecti, vt supra dictum est, magnam Africi, & Asiatici littoris partem infederant. alteri indigenæ, deorum inanum cultores. Illi, ab insito in Christianos odio, eiusdem superstitionis hominem, Sabaij filium, Regem expetebant: hi, metu ne deditæ sine sanguine urbis pœnas postmodum luerent; eius flagitij turpitudinem & culpam redimere insigni aliquo promerito nitebantur. Ergo inter sese clam officiis in Camalcanem vtrique certare: omnia Albuquerqueij consilia (quoad posset) per occultos internuntios patefacere: ad transitum hostes

stes non hortari modo, sed etiam in idipsum naues ex occasione summittere: denique nulli rei deesse, quæ ad Idalcanis aut placandam iram, aut gratiam ineundam facere videretur. Neq; ad barbaros modo pertinebat hoc malum. ipsos etiam Lusitanos quadam ex parte furor inuaserat: atque vt ad Armuziam nuper, sic tum dementiæ & imperitiæ Prætorem accusabant, quod Idalcanis maxime absentia fretus, urbem tot tamque potentibus vndique nationibus cinctam, adeo parua manu inuadere esset ausus; & inanis gloriæ cupiditate, relictis non minus quæstuosæ, quam honoratæ mercaturæ compendiis, Lusitanicas opes, & parta ad eam diem decora in apertum periculum temere coniecisset. Albuquerque, in tantis rerum angustiis, tamque multiplici discrimine, tamen neque animus, neque consilium ad omnia defuit. Ac Lusitanos quidem, quando animaduertendi non erat locus, admirabili quadam lenitate, ac patientia sustentabat. Ex incolis, capita coniurationis, per speciem consultandi in arcem euocatos (ii fuere amplius centum) repente vinciri iussit. Miracenum è principibus ciuitatis, quem ille demerendi causa quadringenariæ cohorti præfecerat; interceptis eius ad Camalcanem litteris, continuo stipatoribus sui corporis tradidit, sparis, haud inusitato mortis genere, fodiendum. laqueo insuper, aliquot è turba suspensi. cæteri ad incertos rerum euentus in vinculis adseruati. Iam verò, ad arcendum insula Camalcanem, idoneis locis tormenta cum præsidiiis collocata, propter Lusitanorum paucitatem, incolis necessario admistis, quos quidem Albuquerque minime infidos, aut ab se alienos existimauerat. Subductis præterea in tutum leuioribus nauigijs, ne hosti ad transitum vsui forent; nobilibus trierarchis circumeundæ sine intermissione insulæ negotium est datum. Camalcan variis locis haud semel conatus traicere, cum tormentis vndique pelleretur; ad extremum silentio noctis tempestatem nactus turbulentam ac pluuiam, cuiusmodi multæ per autumnum existunt; ratibus peditatum; vitilibus nauigijs, corio circumfutis, equitatum traicere instituit. neque ita difficilis transmissio fuit, tenebrarum & imbrum iniuria, prospectus & ignium beneficio Lusitanis adempto. Ac nihilominus inter tumultum aliquot abreptæ rates, celsique ex hostibus, aut demersi non pauci. Sed ingruenti omni ex parte multitudi



## *Historiarum Indicarum*

tudini ultra obfisti non potuit. Primi agminis ductor erat Zulfolarinus, notæ audaciæ vir. is, cum duobus ferme partim equitum, partim peditum millibus, primum in sicco statuit signa; dein, cum iam dilucesceret, Camalcan illico subsequutus. iamque passim armati in terram exponebantur: & è stationibus incolæ, mutata repente fide, cum sese ad hostem adiungerent; Lusitani ab suis deserti effusa fuga urbem undique repetebant. cæterum ne ibi quidem tuto consistere licuit. oppidani conspectis intra insulam Idalcanis insignibus, in Lusitanos tota vrbe dispersos adeo vehementer se intulere; vix ut illis in arcem cõfugiendi spatium fuerit. eodem ij etiam qui mare tenebant, salvis nauibus, tormentisque recepere sese. Interea Camalcan cum cæteris copijs per otium transgressus, ad duas arbores (ita locum appellant) haud longe ab vrbe confedit. Atque ut receptæ Goæ decus Idalcani præiperet; per Lusitanum exulem Ioannem Machiadum, qui specie desertoris apud Idalcanem stipendia faciebat, Albuquerque pacis condiciones obtulit; magnopere suadens, ut appropinquante iam hyeme, tam arctis commeatibus, tanto inferioribus copiis, ante Idalcanis aduentum vrbe excedere, quam belli fortunam temerario ausu periclitari mallet. Haud inania proponebantur: & cum aliæ multæ Albuquerque difficultates angebant; tum nihil magis, quam hyemis imminenti incommodum: quod à Maio mense, qui tum agebatur, ad vsque Septembrẽ, in Oceano Indico sequissimi turbines, ac fœdisimæ existunt procellæ: quarum impetu fauces Goani portus, aggestis arenę cumulis, per eos dies ita obstruuntur, vix ut minoribus nauigijs, & magno cum labore transitus pateat. Ac nihilominus, Albuquerque, cum tanta rerum ac temporum iniquitate premeretur, existimationis ac dignitatis rationem antiquissimam duxit. Idalcanem expectare; oppugnationem, quoad posset, sustinere; & ubi demum cedere necessitas coegisset, in ipso portu inuitis hostibus hyemare constituit. Camalcan, Albuquerquei pertinaciam demiratus, experiendi magis vires causa, quam certa victoriæ spe, machinis nondum aduectis, multifariam Lusitanos aggreditur. à quibus cū egregie propugnantibus, haud sine detrimento recederet; interea cum vniuerso exercitu bellicoque instrumento Idalcan affuit, omnemque late regionem tabernaculis occupauit. De  
fertis

fertis propter paucitatem nostrorum Pangino, & Bardesio castellis, præsidia cum tormentis imposuit. Dein, cognita Lusitanorum peruitia, ut rem quam minimo suo damno conficeret; intercluso vndique exitu, veluti indagine cinctos, fame ac desperatione compellere ad deditionem decreuit. id quo facilius adsequeretur; misso caduceatore simulatam pacem offerebat obsessis. ipse, dum de conditionibus agitur, paulo infra urbem, quâ in angustias cogitur æstuarium, multa faburra grauatam onerariam ad instar molis demergit, dein, cum alteram eodem modo suppressere maturasset, animaduerso periculo trepidi nautæ rem ad Albuquerqueium deferunt. consilium habetur ex tempore. neque ulli dubium fuit, quin proxima nocte priusquam plane interseptus euripus esset, sese ex letalibus ijs cancellis eriperent. Igitur, luminibus crebris in speciem relictis, quarta vigilia ex arce sensim excedunt. neque tamen licuit fallere intentos ad cuncta oppidanos. fugam ignis maxime prodidit, armamentario iniectus. Ergo confestim in abeuntes ex urbe fit impetus; & Albuquerqueius cum agmen cogeret, equo suffosso vix tutum ad naues receptum habuit: inde, sublati per magnam trepidationem anchoris, cum vndique tela volitarent, præmissi qui transitum diligenter inspicerent: ac vix iam singulas angustias capiebant naues. itaque ægre admodum traducta clas, remotiorem ab urbe locum hybernus cepit. Hoc defunctos discrimine tam graui, alia deinceps atque alia incommoda Lusitanos excipiunt. primum ipsa loci natura, multiplici & anguloso littorum flexu; ut inter nauigandum, quotiescunque res id exigeret, aperta iaculatoribus identidem præberent latera. dein adempta facultas aquandi, omnibus circa ab hoste infestis: ut ex ipso æstuario, hyemalibus pluuiis non nihil temperata falsugine, amaros latices, & lutulentos haurire sitis intoleranda compelleret. omnis denique com meatu tanta paulatim inopia premi cepti, regiis equis quos in frustra dissectos sale condierant, quamuis accurata dispensatione consumptis; ut vulgo mures, & putria animalia, pro cibo nautis ac militibus essent: quidam etiam, detracta scriniis coria, cacabis utcunque mollita commanducare niterentur. In de vagari passim morbi: & squallentia tæbe ac macie corpora, miserandum in modum absumi. Sed cum tot vndique instarent



## *Historiarum Indicarum*

rent mala, nihil tamen æque Lusitanos vrgebat, ac disposita in utroque castello, de quibus antea demonstrauius, maiora tormenta: ea cum à fronte, à latere, à tergo pene assidue nostros impeterent; maximo incommodo captam relinquere stationem, & latebras mutare subinde cogebant. Aduersus eam perniciem Albuquerqueius aliquid ex Lusitana consuetudine audendum ratus; consilium cepit prima specie temerarium; & anceps; cæterum exitu patuit, extremis in rebus fortissimos quosque conatus esse tutissimos. Valido præsidio Idalcanis ambo castella tenebantur. sed tanta barbarorum ab secundis rebus erat negligentia, quod à Lusitanis fame ac lue dira pene confectis, deditionem in singula momenta expectarent; ut non vigiliarum ordo, non stationum locus, aut numerus teneretur. Soluti ac securi milites, quasi nihil omnino timendum esset, somno & perpotationibus tempus terébant. Ea socordia satis comperta, Albuquerqueius, acerrimos viros ex vniuersa classe trecentos deligit. hos, & sua sponte incensos cupiditate vindictæ, & magnis insuper pollicitationibus incitados, bifariam diuidit, cumque egregijs ducibus noctu diuersos ad vtrumque castellum dimittit. Profecti silenti agmine, cuncta neglecta & soluta, custodes ante vallum inermes, ac sopitos inueniunt. Cum hisce tam imparatis, ac nihil tale opinantibus, ab Lusitano ex vltima desperatione feroci, multis simul partibus prælium initum. Indi repentino tumultu attoniti, & ignari quid esset, velut alienata mente passim céduntur: pauci captis armis resistunt. Sed iis quoque momento dissipatis, intra vallum & portas prælium infertur. neque vltra sustineri Lusitana vis potuit. in fugam auersi hostes: & memorabili ausu ab obsessis ac circumuentis vna nocte duo castella expugnata: machinæque ac tormenta (quam vnâ Lusitani adamarant prædam) raptim ad naues aucta. Quo tam insigni facinore ictus Idalcan, veritusque ne tale: quidpiam in suum ipsius caput Lusitani consciscerent; tabernaculum ab vrbe dicitur lōgius transtulisse. Post hæc, ab hoste, mallēōli, & aridi virgultorum fascēs oleo, resinaque perfusi, ratibus imponuntur, quos igne concepto in Christianam classem æstu secundo repente dimitterent. Ea re per exploratores cognita, Albuquerqueius anteuertit; vtrōque ipse ad eam inflammandam materiam idoneos viros ad urbem occulte



culte summisit. subiēre quam maxime furdo remigio: veruntamen intentioribus iam vigilijs sensit aduentum barbarus: & cum aliquot actuariis confestim occūrrit. ibi sœuisimo contra &to certamine, cum hostis multitudine superarer; Antonio Noroniæ, crus læuum sagitta transfigitur, quo ex vulnere paucis diebus exspirauit. Is casus Albuquerqueium grauissime percūlit; non domestici tantum incommodi causa, verum publici quoque damni, quod eximia spe summæ virtutis adolefcētem, ac singularibus animi & corporis præditum ornamentis, Emanuele approbante, successorem sibi in eo imperio designauerat. Neque tamen incruentum fuit hostibus prælium: multo plures ex ijs, quam è nostris desiderati. & nisi mors Noroniæ interuenisset, Lusitani egregie vicerant. Inde, vitandis vtrinque insidijs aliquot dies per summas Lusitanorum ærunas exacti. iamque magno eorum gaudio ver appetebat: marique nondum plane aperto, sœua necēsitās, & extrema rerum omnium inopia, nostros ad profectiōem adēgit. aliquot nauigia in transitu amissa. reliqua clas̃s cum denique in altum euasisset; egri, quorum erat ingens multitudo, in Anchedsuam insulam deportati; vt ibi desiderato cibo, potuque, & insuper amantitate loci, & cœli clementia sese reficerent. Albuquerqueius Cananorem delatus, instaurandæ institit clas̃i: dein Calcutanę opis fiducia, & adempti Cocinensis regni dolore tumultuantem denuo Naubeadorę propinquum; celeriter eo profectus, cęsis aut fugatis Zamorini auxilijs, mature compescuit, Regemque socium sollicitudine liberauit. Per eosdem dies Narſingę Rex ingenti exercitu comparato, præcipuam Sabaij ditionis urbem Taracolum aggreditur. Ad eam tuendam Idalcā sine mora profectus; armatorum nouem millia Goę reliquerat; nouis munitionibus, quod mœnium infirmitati diffideret, circa urbem intenta cura perductis. Et Albuquerqueio, de Goa repetenda assidue cogitanti, quod in ea re dignitas, & existimatio Lusitanici nominis ageretur; noua clas̃s è Lusitania decem nauium cum eximio flore nobilitatis ac iuuentutis in tempore su peruenit. His auctus copiis, purgato exercitu missione turbulentorum, nauibus triginta quattuor, in quibus erant bellatores egregij Lusitani mille quingenti, & Malabāres auxiliares trecenti, magno & erecto animo ad Onorem rediit. ibi cogni-



## *Historiarum Indicarum*

to rei Goanæ statu ab Timoia, quem propter loci vicinitatem nihil ferme latebat; tres ab illo naues insuper accipit; eumq; denuo ad conducendos mercede milites proficisci iubet. ipse cum ijs quas habebat copiis interea rem aggredi statuit. omnino ingentis erat audaciæ, non expectatis auxiliis, tam exili apparatu urbem & operibus, & præfidiis adeo munitam inuadere. Sed si vnquam aliàs, tum vtiq; fortibus ceptis affuit Deus. quandoquidem tantus è prioris belli memoria terror non oppidanos modo, verum etiam externos inuasit; vt licet ab omnibus rebus essent paratissimi, tamen præ metu vix mente animoque constarent. Duo primum castella, sub ipsum classem introitum, à custodibus, Lusitanicum horrentibus ferrum, extemplo deserta. Inde Albuquerque, directis in frontem ex urbe tormentis nequaquam exterritus, descensione facta, multis simul partibus oppidum oppugnat. neque ita magno certamine superatis munitionibus, cum intra mœnia sese Mahometani recipere; permisti refugientibus Lusitani pariter irruunt: & omnibus viis armatos iuxta & inermes cedunt. Atrox maxime prælium ad arcem fuit, dum fideles aliquot ex Idalcânis familia, regias ædes pertinaci tuentur pugna. sed iis demum in vestigio trucidatis, turpem in fugam ceteri omnes effusi: alij ex muris pauidi sese præcipitant; alij ad aquas compulsi vel obtruncantur in littore; vel degrauantibus loriceis, vulneribusque merguntur. maxima pars per agros insula tota dispersi. ita Albuquerque incredibili felicitate rursus urbe potitur VII. Kal. Decembris, quo die Diuæ Catharinæ sacra natalitia celebrantur. Finito iam prælio, cum tribus peditum millibus Timoia superuenit; serius omnino, si rem confectam spectes; ceterum ipsius victoriæ celeritas (non plus sex horis pugnatum est) socium ab omni vel negligentia, vel perfidiæ crimine vindicauit. quod equidem diuinitus crediderim factum, ne scilicet è Christiana victoria, & singulari Dei beneficio parta, quicquam ethnicus homo sibi decerperet. Dimissi dein circum insulam equites, ad Mahometanos è latebris eruendos, magnam denuo stragem dedere. Ita, varijs cladibus absumpta septem circiter hostium millia. è Lusitanis, quod credi vix possit, desiderati non amplius quadraginta. Post hæc, Albuquerque ad firmandum Emmanuelis nomine imperium toto pectore incubuit. ac primum, defe-



defectionis auctoribus, exilio & bonorum proscriptione damnatis, perfidæ ciuitati ex ipsamet Idalcanis formula vectigal in dicit. dein, ad sobolem in vsum militiæ propagandam, sacro fonte expiatis Indicas puellas cum Lusitanis in matrimonio collocabat, fouebatque omni genere caritatis: tum aduersus imminentis belli pericula resecti celeriter muri turesque, & arx ipsa nouis propugnaculis aucta. In id opus dum idolorum fana, & sepulcra ethnicorum, & alia ædificia diruuntur; in domus cuiusdam parietinis æneum Crucis, pendente Christo, simulacrum apparuit: euidenti plane argumento, in ijs olim regionibus non modo Christianam fidem, sed cum ea salutarem quoque vsum imaginum (quem recentes isti scilicet pietatis antiquæ assertores ac diuinæ voluntatis interpretes funditus extirpare conantur) ex Apostolica traditione viguisse. magnū vero Albuquerque, & boni omnes inde gaudium percipere, præfagientibus animis, eam urbem ecclesiamque principem Indicæ religionis aliquando futuram. itaque signum illico purgatum, nec sine lacrymis, & cum solenni pompa & apparatu, pro ea quæ tum suppetebat copia, exstructo nuper Christianorum templo illatum à sacerdotibus: atque ad Emmanuelem deinde, talium rerum plus multo, quam auri gemmarumque sitientem, muneris amplissimi loco transmissum est. Neque huic tantum signo acceptam eam victoriam Lusitani ferebant; quod eius ope quodammodo introducti in urbem fuisse viderentur; sed etiam Diui Iacobi Apostoli Hispaniarum præsidis euidenti auxilio: quod amissa iterum Goa barbari sine fine requirerent, quisnam esset egregius ille dux, punicea cruce, & fulgentibus armis insignis, qui tantam edidisset stragem, ac Mahometanas phalanges Christianorum paucitati cedere coegisset. Neque Albuquerque, cælestis promeriti sese immemorem ostendit. siquidem, pietatis causa, inclusam vermiculati operis auro scipionem cum capulo ex pyropis & margaritis; & bombycinum petasum addito aureo gemmatoque conchilio; itemque pertusos in linea globos aureos (ea peregrinantis olim Apostoli insignia sunt) in Palmulano Iacobeæ militiæ contubernio (qui locus Olisiponenſis agri notissimus est) poni iussit. ac deinde moriens, Compostellano eiusdem Apostoli templo terræ Callicæ, pensilem ingentis formæ lychnuchum argenteum



## *Histor. Indic. Liber Quartus.*

cum perpetui luminis alimento legauit. Circa id tempus, quo hæc in India gesta sunt, Emmanuel duodecim fratres Cæruleos (vt appellant) è Lusitania in Congum vnâ cum architectis, & fabris, & splendido sacrorum apparatu, & liberali viatico destinauit: vt nouum templum vero Deo exstruerent, ornarentq;: & erudiendis porro ad pietatem incolis, & augendæ per baptismum Ecclesiæ sedulo infisterent. Princeps eius legationis ex eadem familia fuit Ioannes Marianus, insigni virtute ac pietate vir. Omnes ab Alphonso Rege sanctissimo perquam benigne, & honorifice accepti. Eodemque Rege vel in primis adiuuante, per aliquot deinceps annos in catholica religione promouenda egregie operam posuere. Cumque ex facta diuini verbi semente aliæ subinde atq; aliæ segetes ad messem inalbescerent; supplementum in easdem regiones ab Emmanuele sepius deinde submissum est.

*Libri Quarti Finis.*





# HISTORIARVM

## INDICARVM,

### LIBER QVINTVS.



**R**ECEPTA vrbe Goa, prouisisque ijs  
 quæ ad insulam retinendam maxime  
 necessaria videbâtur; Albuquerque,  
 quippe qui spe & magnitudine animi  
 plura in dies & maiora conciperet, va-  
 riæ simul torquebant curæ. Cauen-  
 dum erat in primis, ne tot vndiq; cir-  
 cumfusæ nationes, nimium latis Chri-  
 stianorum successibus, ac tantæ cre-  
 scientis in medio molis metu compul-  
 sæ, positis intestinis inimicijs, contra  
 communem hostem arma viresque coniungerent. Occurren-  
 dum Zamorini, & Saracenorum consilijs artibusque, intento  
 semper animo in perniciem Christiani nominis excubantium.  
 Consulendum præterea Lusitanis ad Socotoram, in agro male  
 pacato, inter infida semper, & effera incolarum ingenia destitu-



## *Historiarum Indicarum*

tis. Pungebat insuper animum, iniuriæ Malacensis atrocitas, & popularium salus è Sequeriæ comitatu, qui à Mahometanis admodum sæua custodia tenebantur; erantque nonnulli ex ijs de Albuquerque priuatim optime meriti. Iam, de Arabico freto obsidendo, ac Mecana, & Aegyptia tollenda nauigatione, haud leuis erat sollicitudo. sed ante omnia, ingentis spiritus virum, Armuziani belli corrupta victoria, & amissæ tam opportunitatæ, ac munitæ arcis dolor angebat. Cum hæc igitur, & alia multa vndique instarent; in præsentia, contra Calecutanam fraudem, infidiasque, Malabaricum littus intentiore custodia, & maioribus copiis placuit obtineri. Porro ad aliarum gentium vim, & consilia præcauenda, ac partim conciliandos, partim ex terrendos multitudinis animos, Albuquerqueius, orientalium Regum, aut populorum legatis, qui Goæ bis captæ fama vndique excitati, ad Prætorem, vt fit, seu fictæ, seu ex animo gratulandi causa conuenerant: ea grauitate simul & moderatione cum aures, tum responsa dedit, haud inepto artificio magnificæ cuiusdam ostentationis adhibito; vt incertum in omnium estimatione relinqueret, plus ne Lusitanæ iustitiæ fideique, an opibus ac maiestati iure tribuendum putarent. Ad hæc, Iacobo Fernando Pacensi, quem vulgi sermone Beianum vocabant, cū nauibus tribus in Socotoram misso, arcem ab Acunia conditam, quando ea tanti non esset, deducto præsidio diruendam, & solo æquandam curauit. Reliqua erat deliberatio: è Malacensi, Armuziana, & Arabica expeditionibus, quam capefferet potissimum ac primum. Ea quoque dubitatio exempta recentibus è Lusitania litteris: quibus aperte iubebatur Albuquerqueius classe in Arabiam proficisci; & Adeni regulum aut voluntate, aut armis ad Emmanuelem adiungere: id si minus procescisset; tum idoneo quopiam loco arcem ædificare; quæ Mahometanis clasibus omnino transitum intercluderet. Igitur, nauibus vigintitribus celeriter instructis, & imposito milite (ij fuere Lusitani octingenti, sexcenti Malabares) mare rubrum, sicut imperatum erat ab Rege, petere intendit. Neque ita multum processerat; cum ab Occidente, & à Septentrionibus aduersi præter expectationem obstitere venti. quibuscum aliquandiu frustra luctatus Albuquerqueius, ad extremum, ne cum aperto salutis discrimine tempus & operam perderet; de minorum ducū sententia,



sententia, quod iidem flatus in Orientem, ac Meridiem erant secundi, ad vlciscendum Mamudij scelus atque perfidiam, & eripiendos è seruitute Lusitanos, retro ad Malacam vela fieri iussit. & eodem ferme quo Sequeria cursu ad Somatram appulit primum. Inde renouata cum Pedirensi, & Paceno regulis amicitia; dum ad Sincapuranum prouehitur fretum; aliquot barbarorum naues haud leui certamine expugnat. Qua in re illud vel in primis accidit memorabile. Vehebatur quadam è nauibus ijs Naodabeguea Malacensis, vnus ex eorum numero, qui nuper in Sequeria exitium conspirauerant. is in itinere oppressus ab Lusitanis, cum egregie dimicans aliquandiu restitisset; multis demum confossus ictibus ita corruit; vt è patulis vulneribus nihil omnino cruoris manaret. Mox, inter spoliandum corpus, vt primum detracta eius brachio est aurea armilla; (mirum dictu) tanquam vase confracto, ita sese cum anima vniuersus repente sanguis effudit: cuius rei stupore defixi Lusitani, cum de captiuis causam quæsiissent; cognouere inclusum esse in armilla os animalis cuiusdam Sionij (Cabim incolæ appellant) cuius, in sistendo sanguine virtus efficacissima sit. id ipsum os deinde cum in Lusitaniam deuehendum esset, vna cum pretiosis alijs rebus naufragio periit. Atque in hunc modum barbarus ille concepti in Sequeriam facinoris pœnas acerba persoluit morte. quo quasi quodam totius belli prologo lætus Albuquerque, Malacam recta contendit. Ad eum rumore Mamudius armatorum copias, & maximam tormentorum vim, vulgata iam arte, summo studio comparauerat, mediocris fere magnitudinis: vnum etiam ingentis habebat formæ, ab Zamorino per eos dies dono sibi transmissum. Versabatur eodem tempore Malacæ Panensium regulus, cui Mamudius filiam paulo ante desponderat: ædificata in vsum nuptiarum ambulatoria domo perampla, rotis triginta subditis, vt in ea elephantis iuncta, & aulæis ac peristromatis adornata, cum solenni tripudio cantibusque comessabundi principes tota vrbe verherentur. Albuquerque ad Malacam anchoris iactis; primum omnium institoribus & nauarchis variarum nationū, insolitæ classis metu perterritis, & parantibus fugam, circummisso nauigio metum omnem ademit: sese nullius in damnum iniuriamve, sed ad suorum salutem, qui Malacæ vincti per frau-



## *Historiarum Indicarum*

dem tenerentur, eò aduenisse. ij ni bona fide sibi à Mamudio restituantur; tum suum ius persecuturum armis: neque sibi esse in animo quenquam eodem illigare bello. spectatores duntaxat otiosos alieni periculi sese præberent: ac peracta demum re, virtuti Lusitanicæ testimonium apud suos quisque Reges ex fide tribuerent. Hoc officio ac denuntiatione conciliati Lusitanis fere omnium animi eo facilius, quòd præter insignem inuidiam facinoris in Sequeriam admissi, priuatis etiam de causis erant infensi tyranno plerique. Postridie Mamudius, ab in nata fallacia, per speciem amicitiae ad Albuquerqueium mittit Bandonium quendam è proceribus, salutandi causa, & simul quærendi quas potissimum merces ex eo emporio cuperet: enixe curaturum Mamudium, vt Lusitani Regis, & procuratorum eius præcipuam ab se rationem habitam esse appareret. Ad ea Albuquerqueius; nullas in præsentia merces nominatim expetere sese: captiuos tantum, quæque per fraudem ablata Sequerie sint, à Malacensi reposcere. vbi ea sine dolo malo receperit; tum de commercij conditionibus, si ita videatur, acturos. Hoc accepto responso tyrannus, quod eo tempore aberat clas- sis, in eius aduentum variis artibus rem differre decreuit, quo simul ab tergo & à fronte, nihil tale suspicantes Lusitanos opprimeret. ita, præteriti sceleris culpam in alios transferendo; captiuos è custodia elapsos, causando, aliisque super alia mendaciis de more eludebat. inter hæc, Albuquerqueium, fraudis haud ignarum, anceps cura agitare. nolle impunitam tyranni perfidiam: nolle exacerbata rursus amentiam: ne, aut ex dilatione ac lenitate hosti fiducia cresceret; aut ex damno ac dolore, barbara immanitas in captiuos innoxios, carissima sibi capita, defaui- ret. stat sententia, præsertim id ipsum captiuis clam per codicillos hortantibus; quoniam expostulando nihil proficeretur, malitiam ac peruicaciam ferro ignique subigere. Nec mora. ducentos fere mittit armatos, qui diuersis vrbis locis incendium excitent. Eo incendio, nam & ventus, & materia ipsa adi- uabat, tecta oppidi, & negotiatorum apothecæ aliquot mo- mento consumptæ. cumque porrò vagaretur flamma, conster- nati ciues, Mamudij opem frequentes implorant. ille metu ma- loque coactus, ex templo captiuos ad Prætoriam sistit incolum- es: tarditatem purgans; oransque Albuquerqueium ignes pa-  
tatur.

riatur extinguī; & secum haud iniquis legibus pacem ac societatem instituat. Albuquerqueius ingenti lætitia suos recepit, ex quotidiano mortis metu ac miserrima seruitute, in pristinam dignitatem ac libertatem assertos: & in eorum gratiam, sæuientes flammæ ab incolis cohiberi permisit. dein, quod ad commercium & amicitiam attineret, ita respondit: Locum in vrbe confestim sibi Mamudius attribueret ad ædes ac diuersorium firmo opere aduersus tempestatum, & incolarum iniurias extruendum: cuiusmodi aliquot iam Rex Emmanuel haberet in India. Ablatas per tumultum Sequeriæ res (ni eæ comparerent) æqua æstimatione rependeret. æquum præterea censabat, impensas ab eo præstari, classem in vtramq; factas à Lusitanis, quandoquidem illius damni & incommodi penes Mamudium ac suos culpa resideret. Hæ pacis leges ab Albuquerque dictæ: ac, si minus placerent, legati vltra vetiti ad naues redire. Mamudius, tam acri denunciatione perculsus, concilium cogit. ibi, simul ira metuque sententias variante, diu multumque certatum est. magna pars, & prudentissimus fere quisque, fauere otio: & palam hortari, ad periculosi belli aleam quamuis magno auri pondere redimendam. Alij contra, & Regis Mamudij dignitate, & Malacensis nominis gloria indignum affirmare; si ad vnus ignoti aduenæ fremitum, ac tantuli exercitus terrorem, quantus ea classe vehi possit; per speciem societatis atque commercij, teterrimæ seruitutis iugum scientes ac volentes accipiant. Huius sententiæ principes atque auctores erant, præferuido ingenio adolescentes regij duo, Panensis gener, & filius Alodinus. atque horum vel auctoritate, vel gratia res pene inuito Mamudio ad bellum inclinavit: intentioreque inde cura ad arcendam vim omnia apparari à barbaris cæpta. & Albuquerqueius, cognita re, in diem tertium, qui patrono Hispaniarum Iacobo Apostolo erat sacer, oppugnationem suis edixit. Malaca vrbs, ad maritimas commoditates, littore plano, in longitudinem vnus ferme leuæ porrigitur. Hanc secat amnis ex interiore Asia defluens, in quem plus minusve, pro variis Lunæ momentis, exæstuat mare. idemque ponte iunctus egregio, vtramque partem oppidi peruiam facit. Tecta, Indico more, lignea, folijs & frondibus arcent pluuias. neque tum urbem vlli aut muri, aut fossæ cingebant. populus ipse bellica laude,



## *Historiarum Indicarum*

laude, vt apud eas gentes, insignis ( & erat eo tempore ingens multitudo ) sua latera, more Spartano, pro mœnibus ac propugnaculis gloriabantur esse. Tantum Mamudius ad loca maxime periculosa tumultuarias munitiones raptim obiecerat. & cum alias vrbis partes aditusque, tum vero pontem ipsum magno tormentorum apparatu, præfidiisque firmarat. Hisce ita prouisis, filio, ac genero, vt omnia circumspectantes ad subita occurrerent, expedita armatorum aliquot millia sub signis attribuit. ipse sibi cum turritis elephantis, ad hostium terrorem, subsidiarias cohortes, & reliquum robur iuuentutis deposcit. Vt imutis Raia, licet in speciem tyranno suam operam, & copias enixe deferret; tamen partim occulto in eum incensus odio, partim in omnes rerum euentus incolumitati suæ prospiciens, per fideles internuntios clam sibi, suisque pacem ac veniam à Lusitano impetrauit. Albuquerque, non sine causa lætus tanto auxilio in tempore hostibus dempto, ad contemplandam loci naturam, & exploranda tyranni consilia totus incubuit. breuique comperit, maximum vrbis firmamentum in ipso ponte constare; quod arcis instar, in omnes partes aditum, & prospectum haberet: eoque si potitus foret, non modo opportunam ad omnia stationem ibi collocari posse; verum etiã dirimi barbaris auxilij mutui societatem, qua, vt quisque locus maxime premeretur; ex composito inter se vti decreuerant. Vt igitur Apostoli natalis illuxit dies; Lusitani clamore sublato Sanctum Iacobum ingeminant: ac volitantibus vndique globis, cum pene obruerentur; tamen talium periculorum assuetudine intrepidi bipartito in terram exscendunt. Quæ pars vrbis, regiam, & Mahometanum habebat delubrum, ea cum robustis cohortibus Ioanni Limæ expugnanda tribuitur: Albuquerque, frequentiore alteram vrbis partem ipse cum suis inuasit; condicto prius, vt hostibus vtrinque summotis, illico ad pontem omnes accurrerent. eodem scaphas aduerso finmine cum tormentis militibusque submisit, vt simul omnia circa hosti infesta redderent; & ad nostros, vbi res id exigeret, recipiendos præsto essent. Lima, descensione facta, dum ad pontem festinat, in Alodini copias incidit. vixdum cum iis in tum erat certamen; cum à tergo repente Mamudius instat, is turrato ac phalerato cum propugnatoribus aliquot elephantis

phanto in prima acie vehebatur; alij duo eodem ornatu præibant: tum reliquum sequebatur agmen. Nostri, ancipiti circumuenti malo, fortem ac præsentem nihilominus animum in re subita præstitere. Lima, iussis interim cæteris Alodino resistere, ipse Mamudio cum manu fortissimorum iuuenum pleno gradu obuiam vadit. & arte contra vim vsus, patefacta repente acie, aduersos elephantos in medium accipit: ac pilis certatim in eorum latera ac terga coniectis, cum ex propinquo cuncta inhæssissent; consternatus ante omnes regius elephas rectorem excussum proculcat, inde conuersi cæteri cursu præcipiti in suos ruunt; editaque late strage, non modo turbant ordines, verum etiam in fugam auertunt. Mamudius, periculo animaduerso, confestim è turre defiliit; acceptoque iam vulnere, suorum concursu, receptus in tutum est. neque alterius agminis impressionem Alodinus ultra sustinuit; & ex diuerso iam Albuquerqueius ingenti certamine pontem occuparat. quo, cum ex composito cuncti aduolassent; partem alteram pontis, materia, doliisque, & aggere muniunt: alteram cum peræque firmare niterentur, venenatis è proximo sagittis, & asiduo barbarorum incurso prohibiti sunt. iamque longa inedia, & lassitudine simul æstuque fatigati, cum à prima luce in pomeridianum tempus acerrime depugnassent; vix arma sustinebant. Itaque Albuquerqueius sat eo die periclitatus hostium vires, neque parum se profecisse ratus ad vniuersæ victoriæ spem; consilio statim habito, receptui canit. ac simul peractas magno labore munitiones, ne hostibus forent vsui, succendi iubet. quo incendio coniuncta quoque ponti ædificia, & mercatorum aliquot apothecæ; & ornatisimæ, de quibus antea demonstraui mus, nuptiales Regum ædes arserunt. Magnus Malacensium numerus eo die desideratus, & e nostris interfecti aliquot, complures vulnerati sunt. Regulus Panis, Lusitanica ferocia exterritus, & rei Malacensi diffidens; per causam adducendi noua auxilia, relicto focero & sponsa, in patriam discescit, neque postea rediit. Mamudius, quamquam aduersa iæctus pugna, tamen omissa pacis mentione, vallum, & stationes ad loca idonea duplicat; pontemque præsertim, valido præsidio firmat. Viam insuper latam, qua in urbem intimam, ædesque regias, ac Mahometis fanum, Lusitano patebat introitus; veneno infectis

tribulis



## *Historiarum Indicarum*

tribulis occulte conspergit; aëtosque sub terram cuniculos; certam in hostium perniciem, sulphureo complet pulvere. At Albuquerque, ex eo prælio ingenti fiducia concepta, dies paucos reficiendo milite, & sauciis curandis insumpsit. interea celstioris formæ iuncum, obiectis extrinsecus culcitris atque centonibus, ad hostiles ictus molliter excipiendos, omni telorum armorumque genere diligenter instruebat. id opus ubi absolutum est, eximia fortitudinis dux Antonius Abreus cum promptissimis Lusitanis impositus. & obseruato nouilunio, cum plenissimus maris æstus accedit, nequicquam prohibere conantibus barbaris, iuncus ad pontem applicitus est. & Albuquerque per media hostium iacula cum cæteris copiis in terram egressus, viamque latam, de qua diximus, petens, ad manifestum utique ruebat exitium. siquidem ad viæ caput Mamudius cum exercitu multiplicatis in arcto ordinibus stabat; ut cum primum spatia viæ nostri occupassent, cuniculis iniiceret ignem; ac disfiliente solo, & erumpentibus vndique flammis, gratisimum è fædo Christianorum interitu spectaculum mente oculisque perciperet. Sed plane singulari Dei benignitate fraudis indicio per conscios ad Albuquerque delato, nostri modica declinatione in hostium latus extransuerso impetum faciunt. Anceps aliquandiu fuit certamen, dum in angustiis conferti se se barbari opponunt; proque aris ac focis & ipsi accerrime dimicant; & è fenestris ac tectis pro sua parte adiuuat imbellis multitudo. sed ad extremum, redintegrato clamore cum Lusitani gradum acrius intulissent, cessere primum loco barbari; dein prorsus terga vertere. & eodem impetu fanum, cæsis pulsive custodibus, ab Lusitano occupatum est. Inde, relictis ad fani tutelam armatis, Albuquerque ab insequendis hostibus metu insidiarum abstinuit. cæterum in primis de ponte sollicitus, ne transitum subsidiis Malacensium daret; eo celeriter aduolat, & deiecto iam præsidio, expugnatum ab Abreo magna omnium lætitia reperit; expositaque ferramenta, & cæterum muniendi apparatus, quem è superiore prælio explorata loci natura per eos dies accurate prouiderat. itaque collocatis ad vtrumque cornu stationibus, velisque navium supra caput obductis, quæ simul leuiora hostium iacula, sagittasque, simul radios flagrantissimi solis arcerent; totum eum diem in  
ponte



ponte muniendo consumpsit. & ex vtraque parte vallum, & cu-  
 pas inter se reuinctas constituit ingesta gleba, tutoque aditu ad  
 flumen relicto, ac dispositis circa scaphis, quæ valli vtriusque  
 frontes ac latera telis ac tormentis abraderent. sic ille transa-  
 ctus est dies: postera luce ad hostium delendas reliquias, & re-  
 giam ipsam oppugnandam Lusitani audacter progressi, ædes,  
 præter spem, vacuas. & inanes offendunt. Mamudius quippe,  
 desperatis rebus, noctu collegerat vasa, & in saltus vicinos ac  
 nemora sese cum paucis abdiderat. ibi Alodinum, & cæteros  
 belli auctores nequicquam exsecratus, paucis diebus mœrore  
 amissæ vrbs extabuit. Alodinus, diuerso itinere, cum haud  
 longe ab vrbe munitionibus excitatis, profugos è pugna colli-  
 geret, bellumque renouare tentaret; missis ab Albuquerque  
 celeriter cohortibus, iterum fusus, in Bintanum denique insu-  
 lam, & eiusdem nominis oppidum è regione Sincapuræ confu-  
 git; perque vim ac fraudem exacto dynasta, locum natura tu-  
 tum, operibus insuper egregie muniit. Interim vrbs Malaca,  
 pulsus vndique armatis, militi diripienda permittitur. Ibi quan-  
 ta vis opum fuerit, vel ex eo coniici potest; quòd, præter ea  
 quæ vel à mercatoribus inter tumultum aucta, vel à militibus  
 per fraudem suppressa sunt, ex quinta duntaxat eius quæ appa-  
 ruit prædæ parte (hæc ad Enimanuelem pertinebat) aureo-  
 rum nummum ducenta millia in regium fiscum redacta dicantur.  
 Inde ad constituendam, ac firmandam eius vrbs possessio-  
 nem sese Albuquerque contulit. negotiatores primum, qui aut  
 varias in partes metu diffugerant; aut commeare in id empo-  
 rium verebantur; benignis promissis inuitati, & cum fide cle-  
 mentiaque tractati sunt. ita, veterem frequentiam ac celebri-  
 tatem id emporium breui recepit. Simul etiam, è vetustis Re-  
 gum sepulcris ac monumentis eruto lapide, templum Saluta-  
 tioni Angelicæ sacrum ex manubijs positum; cuius mysterij  
 Albuquerque præcipua quadam religione tenebatur. & loco  
 opportuno arx ædificata, impositumque vrbi pariter & arcifi-  
 dele præsidium, Rhoterico Patalino præfecto. Portoria insu-  
 per, & vectigalia, & scripturæ magistri certis legibus instituti;  
 simul iuri inter Mahometanos dicundo præpositus Vtimutis:  
 inter cæteros autem inquilinos ciuesque, Ninachetus indige-  
 na, vir & antea de captiuis Lusitanis, & tum in vrbs expugna-  
 tione



## *Historiarum Indicarum*

tione de Albuquerque ipso in primis optime meritis. Ad hæc, Albuquerque de re gesta, victorūque Mamudio, Sionis Regem per litteras & interpretes docuit. ille, & factum probauit; & victoriam gratulatus, amicitiam cum Lusitanis instituit; & ex eo tempore vltro citroque legati cum pretiosis muneribus commearunt. atque alijs item ex regnis Lusitanorum fama commoti, oratores ad Albuquerque, ineundæ societatis & officij causa, conuenere. Præterea, quod de Banda, Molucisque insulis, & earum mira fertilitate, opibusque ad Albuquerque aures dudum fama peruenerat, ad eas insulas cognoscendas, iungendamque cum incolis amicitiam, egregia fortitudine, ac maritimæ rei scientia vir, cuius modo meminimus, Antonius Abreus, cum nauibus tribus, Albuquerque missu discescit. Inter hæc Vtimutis, quod spreta nostrorum paucitate, consilia de tyrannide occupanda cum hostibus agigaret, litteris eius ad Alodinum deprehensis, quæ manifesto viri perfidiam coarguerent, in ipso illo pegmate, quod nuper ad ferale conuiuium, Sequeriæ, comitibusque in littore exstructum fuerat; recidente in capita audorum poena scelerati consilij, vna cum Patiaco filio, octogennarius ipse propalam securi percussus est, frustra nitente vxore supplicibus verbis, & ingenti auri pondere, quod aureorum cætum millium excederet summam, suorum capita salutemque redimere. Per eosdem fere menses, quibus hæc ad Malacam agebantur, Idalcan absentiam Albuquerque suam occasionem ratus, ad Goam recuperandam, Narasingano bello distentus ipse, strenuos duces minime contemnendo cum exercitu miserat. ij transmissis pluribus locis, vt olim, æstuario, insulam & agros haud ita magno labore occupant: cæterum vrbs ipsius oppugnatione non eundem exitum habuit, cum clade & ignominia repulsi non semel, ad obsidionem consilia verterant. iamque omnes ferme circa aditus barbarorum custodia tenebantur: & cum alibi fossas & aggerem duxerant; tum vero ad Australia vada, loco in primis idoneo, munitissimum castellum excitant; quod a vici nomine ibidem positi, Benefarinum hodieque appellatur. Quibus operibus cincta ciuitas, breui cum aliis incommodis miseris que, tum vero fame vrgeri vsque adeo cœpta est, vt Lusitani complures (de numero nominatim affirmare nil ausim, cum alij septuaginta ipsos, alij non plus vnde uigin-  
ti tra-



ti tradant) in hostilia castra sede transfugerint; perque summam impietatem eiurato Christi nomine, Mahometicam superstitionem induerint. Atque hoc ipso tempore Ioannes Machiadus memorabile facinus edidisse fertur. is exsul è Lusitania, vt supra dictum est, cum apud Idalcanem Turcæ habitu mereret, variis contra finitimos Reges expeditionibus, magnam sibi & fortitudinis, & prudentiæ pepererat laudem: & splendendum militiæ gradum adeptus, in consilium de rebus maximis adhibebatur. Idem, in bellis quæ cum Christianis fierent, egregiam nostris operam occulte nauabat: quod eo erat illi facilius, quo maior apud barbaros eidem auctoritas erat ac fides. Hunc ergo, perfugarum misericordia cum cepisset, quod vesano consilio exiguam huiusce lucis vsuram æternitati anteferrent; non verbis modo, sed etiam exemplo factisque, si quo modo posset, eos ad sanitatem reuocare constituit. Duos ipse paruulos habebat filios, lustralibus aquis ab semet Christiano ritu expiatis. hosce primum, ne destituti, Mahometanis postmodum sacris inquinarentur, diuini iuris ignarus, clam intempesta nocte præfocat. mox, vbi diluxit, captiuos Lusitanos, & transfugas, per speciem relaxandi animi, longius ab hostium castris, prope urbem Goam, secretum in locum, sensim, vt fit, sermocinando perducit. Ibi sese Christianum aperte professus, ornatuque Turcico abiecto; de contemptu rerum humanarum, de breuitate huius vitæ, de sempiternis illius alterius æque præmiis atque suppliciis, incredibili quodam animi ardore disseruit: hortatusque est omnes, vt secum in urbem intrarent; cum Ecclesia & Christianis in gratiam redirent; ac Diuina freti clementia, corporis incommoda præ animorum salute contemnerent. Ac scelerati quidem desertores, tam salutari oratione vix ad aures admissa, retro vnde venerant obstinata mente rediere. Machiadus, neque famis, neque atrocissimorum suppliciorum, si Goa caperetur, metu deterritus, accepta à nostris fide, vna cum captiuis in urbem introiit. Ea transitio, ingentem non modo lætitiā, sed fiduciam quoque attulit obsessis: vulgoque ita interpretabantur, non sine causa, tam asperis temporibus, tali viro mentem eam diuinitus datam, vt, stipendiis optimis relictis, ex honorata libertate, & commodorum affluentia, sese in arctam adeo custodiam, penuriamque sponte coniiceret.



## *Historiarum Indicarum*

ret. Neque eos frustrata spes est. quippe mitescente iam hyeme, variis è regionibus, atque adeo ex ipsa Lusitania naues cum commeatibus & militibus aduenere. quarum accessu non leuata solum inopia; verum etiam ita nostrorum auctæ vires, vt quotidianis eruptionibus vltro fatigarent hostem: propioresque iam obsessis, quam obsidentibus essent barbari. Et Albuquerque, circumacto iam anno, compositis Malacæ rebus, ad Sincapurani maris custodiam Fernandum Petreium Andradium, insigni virtute ac prudentia virum, cum nauibus decem reliquit. ipse de citerioris Indiæ statu anxius, quamquam inuitis Malacensis, & propter externos metus omni studio tantum apud se ducem retinere conantibus, cum cætera classe in Malabares cursum intendit. Vt in conspectum Paceni Somatræ littoris ventum est, noctu foeda tempestas oborta, & Albuquerque nauem saxi allisam infregit; & cæteras pene cum omni turba demersit. multi mortales hausti fluctibus; multi varias in terras eiecti. pretiosissima quæque è spoliis Malacensibus, & Regum donis amissa. Albuquerque per tenebras à nauis magno labore in scapham acceptus, cum ipse periclitantem puerum inter manus propere sustulisset; collectis reliquiis nauis fragij Cocinum deuenit. ibique magna sui cum animi voluptate, præter spem incolumes repperit eos, qui, vt supra dictum est, ab Socotora redeunt, in Cambaicum littus eiecti, atque ad Cambaiæ Regem pro captiuis abducti fuerant. ij, secundum Deum vni maxime Antonio Laurerio Franciscano salutem ac libertatem debebant. cum enim iamdiu in eo seruitio degerent, atque ad eos eximendos accederet nemo; Laurerius omnium consensu delectus est, qui Goam de redemptione contenderet, ea lege, vt, si nihil transgisset; intra certum diem bona fide rediret. atque eius reuersionis quasi obsidem & pignus ille sacrum cingulum reliquit Regi: testatus, professionis suæ ritibus atque institutis, haud minimam sanctimonix partem horrido in illo fune consistere. Vt Goam peruenit; absente per id tempus Prætor, nihil decidi super tanta re potuit. ita, infecto negotio, protinus, vti receperat, in Cambaiam reuertit. Quæ res tanta admiratione Regem affecit purpuratosque, vt confestim sine vilo pretio, quin etiam ornatos lautosque Lusitanos benigne dimiserint, neque id modo Laurerij virtus & sanctitas consecuta



consecuta est; verum etiam apud illas nationes non parua cum vtilitate egregiam probitatis existimationem, & famam nomini Lusitanico peperit: sane quam egregio documento, non solum ad conscientiae fructum, & officij religionem, sed etiam ad opes & gloriam, constantia promissorum & fide nihil in rebus humanis esse praestantius. Magna Cocini tum erat, nondum condita, quae nunc est, Lusitana ciuitate, rerum hominumque colluies. Quippe sub eodem testamento misti Christianis Mahometani ethnicique nullo discrimine debebant viri ac mulieres: multaque passim flagitia & fraudes admittebantur. Huic malo occurrendum ratus Albuquerque, cum Rege Naubeado trafransit, ut certo limite Malabaricam ab Lusitana commoratione dirimeret. id ubi factum; capitali poena proposita, omnes sexus vtriusque mortales, qui à Christiana religione abhorrent, è finibus Lusitanis demigrare iussi. quae res non ad purgandas modo nostrorum aedes ac domicilia, sed etiam ad augendum numerum fidelium valuit: quandoquidem eo edicto permoti circiter quadringenti, abiecto idolorum cultu, sese ad Christianam Ecclesiam sponte aggregarunt. Ab horum complexu Albuquerque Goam summo omnium gaudio, quod pro mortuo putaretur, procescit incolumis. Eius aduentu, multo vehementius vrgeri hostes coepti; & à Lusitanis castra ad Benestarinum admota. ibi dum missilibus ac telis vtrinque certatur; missus ab hoste globus agentem cum Albuquerque quemdam ex turba ita discerpit; ut Albuquerque ipsum fædo cruore consperferit. Quo ille tanto ex periculo diuinitus ereptus, globum deinde ipsum argenteis bracteis coopertum, vnâ cum affabre facto monili ex gemmis & margaritis, in celeberrimo templo MARIÆ Virginis, ad Aquas Lupias veteris Lusitaniae, ponendum curauit; reditu insuper annuo in usum perpetui luminis Hieronymianis eiusdem templi custodibus attributo. Atque eo casu, nihilo segnior factus Prætor, nouis operibus, & oppugnationibus crebris cum inclusum mœnibus hostem in dies magis ac magis premeret; variis cladibus denique fessi Roztomacan præfectus, & Turcæ, qui in eo præsidio erant; flexere ad deditionem animos: pactique ut naues, tormenta, ac perfugas traderent; cum cæteris rebus incolumes Benestarino excessere. Albuquerque, recepto castello, impositisque mi-

L      liti-



## *Historiarum Indicarum*

litibus, quassata, & strata ruinis accurate refecit: impios defer-  
tores, amicorum precibus exoratus, viuere quidem passus est,  
sed grauiore multo circuncisione decurtatos, quam qua sese  
nuper ipsi ex initiis Mahometicæ superstitionis affecerant. si-  
quidem auribus naribusque, ac dextris abscisis, & sinistra in-  
super cuiusque pollice; per totam urbem ad puerorum ac ple-  
bis ludibrium ignominiose traduxit: dein, vt apud Indos, quo-  
ad eius fieri posset, omnem sceleris tanti memoriam obrueret;  
in Lusitaniam eo ipso anno remisit. Tum in gratiarum actio-  
nem, ob hostes ex insula pulsos, Christiano ritu supplicatio de-  
creta. composito ad pietatem agmine venerabundi Lusitani  
cum sacerdotibus, infulisque, ad templum Beatæ Virginis adie-  
re. valetudinarium quoque publicum curandis ægrotis & fau-  
ciis institutum. Hisce tam secundis Lusitanorum rebus valde  
commotus Zamorinus, vltro per viros principes ab Albuquer-  
cio pacem petere induxit animum: locumque arci ad Calecu-  
tum ædificandæ tandem aliquando assignauit. Et Rex Maldia-  
uarum aliquot insularum, (eæ frequentia plane mira non lon-  
ge ab Cori promontorio in Meridiem distant) ob id ipsum in  
Emmanuelis ditionem, ac fidem iure stipendiario sua sponte se  
contulit. Tum ab aliis quoque Regibus legati cum donis ad  
Albuquerque gratulandi causa conuenere. Quin etiam Idal-  
can ipse, misis oratoribus, pacem & amicitiam æquis conditio-  
nibus impetrauit. Earundem rerum constanti fama compul-  
sus Abassinorum quoque Aethiopum Rex, cum Emmanuele  
denique societatem ac fœdus vehementer expetiit. is tum erat  
patre Nahu defuncto, Dauid admodum adolescens, atque ob  
id sub tutela degens Helenæ auæ, virili animo & consilio fœmi-  
næ. legati in eam rem fuere; insigni probitate ac prudentia vir,  
Matthæus Armenius, & alius ex Abassina nobilitate primarius.  
ij, quo arctius iungerent amicitiam, fidei pignus ad Emmanue-  
lem ferebant sacrosancti ligni fragmentum eius, in quo salus hu-  
mani generis olim ingemiscente rerum natura pependit. Hunc  
ergo Matthæum ad se recta cum socio venientem, vt in Lusita-  
niam ex India transueheretur, Albuquerque cum cetera beni-  
gnitate, tum vero propter sacras quas afferebat reliquias, ex-  
quisitis cæremoniis, & sacerdotum occurso gratulabundus acce-  
pit; & accurate commendatum nauarchis, in Europam à Coci  
no



no transmisit. Per idem fere tempus, Emmanuelis hortatu, Alphonſus Congi Rex Henricum filium, ac præcipuos ex eo regno, in Luſitaniam, vbi ferme alti educatiq̃ue fuerant, atque inde cum honeſtiſſimo comitatu Romam vſque religionis ergo proficiſci iuſſit. vbi magno totius Eccleſiæ Romanæ gaudio excepti ( augebat lætitiā ipſa longinquitas ) ſummum in terris Dei Vicarium Chriſtiano ritu ſupplices adorarunt . Sub idem tempus, Malacæ magni & periculofii motus repente exſtitere . Quitirius inquilinus erat pollens diuitiis, & rerum nouarum ap prime cupidus . huic, Vtimutis Raia vxor, quod maritum filiūq̃ue nec prece, nec pretio ſeruare valuiſſet, ex dolore in rabiem verſa, permagna cum dote filiam ea conditione deſponderat, vti ſuorum vlciceretur necem ; ac perpetuum bellum cum nomine Luſitano capeſſeret. Ille contracto clam milite, clientum mancipiorumq̃ue circumfluens turba, paucis diebus ad urbem caſtra communiit . inde furtim in præſidia Luſitanorum incurſando ; cedes edere ; captiuos abducere ; ciuitatem vniuerſam trepidatione ac tumultu complere. Cæterum, haud ita diu impunita illi fuit audacia. Coorti repente Luſitani caſtra multis ſimul partibus inuadunt ; conuulſoq̃ue vallo, & ſuperatis muni mentis, trepidantem barbarum in lucos magna edita ſtrage cō pellunt ; diſpoſitisq̃ue vigiliis, referta omnibus diuitiis caſtra diripiunt. Eo die captiuus quidam, ignoto nomine, Luſitanus, egregium qua roboris animi, qua fidei Chriſtianæ ſpecimē præbuit . is, librandi peritus, cum in noſtros obuermo tormento eiaculari extremi ſupplicij metu propoſito iuberetur ; intrepidus abnuit : ac fortiter datis ceruicibus, ex hoſtium ſimul manibus & corporis cuſtodia in cœlum euolauit. At Quitirius, nequaquam ea clade fractus, bellum omni conatu renouabat : & ſtatinis alibi poſitis ; urbem, & omnia circa, latrociniis & excuſſionibus habebat infeſta. Luſitani ad eum inde quoque ex turbandum nauibus proſecti, dum facta deſcenſione progrediū tur incautius, in inſidias præcipitauere, & fortisſimi aliquot viri loco iniquo à barbaris interfecti. Sed ad extremum nouis ab Goa copiis Malacam aduectis, iterata oppugnatione ; & Quitirius non exutus modo caſtris, verum etiam è Malacenſium finibus cum ignominia & damno eſt eiectus . & Lacſamana Mamudiana clafſis præfectus, cum Quitirium maritimis copiis adiu-



## *Historiarum Indicarum*

¶ uaret, ab Andradio fusus, & intra Muaris fluminis ostia fēde coniectus est. Ea depulsa molestia, multo grauius discrimen aliunde Lusitanis instabat: quod item ipsum Dei benignitate in perniciem hostium vertit. Iauæ sunt insulæ duæ (maiolem vnā, alteram minorem appellant) vltra Somatram in Meridiem sitæ, eadem ferme qua Somatra soli vbertate; sed longe ferocioribus incolarum ingeniis. Maioris maritimam oram obtinebat Onuzius Saracenus, viris, armisque, & omni bellico apparatu præpollens. is, ingenti classe adornata, quam dudum aduersus Mamudium admirabili silentio ac dissimulatione inchoarat; vt exactum illum è regno cognouit; ipsosmet qui exegerant, ex improviso adoriri constituit. Nauigia leuiora ducebat plurima: maioris vero formæ iuncos circiter sexaginta, rebus omnibus ad bellum instructos. Non latuit Malacenses, Onuzij aduentus. & à Lusitanis, nauium non plus sexdecim numero, Christi maxime fiducia, obuiam Saraceno est itum: contractoque certamine, quod, propter incredibilem pertinaciam gentis vtriusque biduum tenuit; multo maxima parte nauium amissa, denique Onuzius Iauam turpi fuga repetiit. supra octo millia hostium, ea pugna, aut ferro, aut igni absumpta dicuntur; cum è Lusitanis plurimi quidem vulnerati sint, verum haud amplius triginta ceciderint. Ita, multiplici paucis mensibus parta victoria, non exiguum militaris gloriæ decus Lusitani tulere. Cæterum, contra vim externam feliciter defensa res, domestico scelere propemodum periit. Maxelizius erat quidam, è Bengala oriundus. is, cum Lusitanæ arcis custodibus ad Malacam, & Alphonso Persona præcipue regio Quæstore, per summam simulationem amoris & obseruantia, magnam familiaritatem breui contraxerat. Hunc, Binta ni regulus Alodinus, ad occupandam fraude arcem Lusitanam ingentibus promissis induxit, militibus habitu mercatorum occulte summissis, qui in tanta hominum colluione haud ægre latebant. Hisce clam ad loca idonea distributis, Maxelizius, per speciem salutandi Quæstoris, vti solebat. in arcem admittitur. A prima salutatione, & mutui sermonis officiis, Personæ, tum forte meridiandi causa cubanti, cum sese in alterum auertisset latus; repente Maxelizius ab tergo letale vulnus in caput imposuit. inde ad distinendas fores. aduocandosque suos



tuos accurrenti, quamquam in extremo spiritu Persona profiliens, vt erat maximis & corporis & animi viribus, anteuertit: clausoque per vim ostio, cum custodes ad arma excitasset, in ipso munere tuendæ arcis efflauit animam. Illi barbaros ad murum subeuntes cum cæde magna repellunt; & Maxelizius intra arcem deprehensus, cum sese acriter aliquandiu defendisset; multis ad extremum ictibus repetitus occubuit. Ita, summo Dei beneficio, & eximia Quæstoris virtute, arx, & vrbs re-tenta; &, quod ita res postularer, Bintani regulo pax, petenti, postmodum data. Et ex alia parte, Antonius Abreus, & socij, § ad Molucas paulo ante ab Albuquerqueo destinati, inter varios casus atque pericula, regente Deo, haud exiguum operæpretium fecere. Ad oppidum Agacinum Iauæ insulæ ventum est primum. Inde leucas ad sexaginta in Amboinum insulam delati, quæ ad Molucarum ditionem pertinet; positis vtrobique columnis, ad Bâdam eiusdem ditionis processere: ex qua, quod principem teneat locum, vicinæ aliquot insulæ denominantur. Hæ, totius orbis terrarum solæ (quod constat) sponte, lautiores in epulas, & medicamenta mortalium, ex vna eademque arbore, macim, & nucem myristicam fundunt. Arbor, ad pyri si-militudinem accedit. fructus, mala persica quadamtenus imitatur. floret quo tempore ibidem aliæ quoque plantæ, & herbæ varij generis: è quibus vniuersis mirificus odor, incomparabilis cuiusdam suauitatis existit. Vbi defloruit, maturescens pomum, paulatim è viridi, tum ceruleas luteasque, tum purpureas & igneas transit in maculas, quales in arcu cœlesti cum voluptate miramur: atque eo ipso tempore psittaci & aliæ nobis ignotæ aues eximiæ pulchritudinis, ad gratisimum sibi pastum aduolantes, augment oblectationem; cum folia, & fructus, & alites ipsæ variis colorum picturis in certamen vsque luxurient. Hac amenitate cum reliquis insulas, tum in primis Bandam conspici affirmant: quippe, & maritimum habet tractum sylua felicissima viridantem; & ex insula media mons accliuus attollitur; cuius in ipso vertice lucus eodem & frōdium vestitu, & frugum copia, satis amplum patescit in campum: atque splendidi aquarum riui ad subiectam planitiem irrigandam leni murmure defluunt. Insula tota, ad equinæ soleæ speciem, à septentrione in Austrum excurrens. tres non amplius leucas in longitudinem,



## *Historiarum Indicarum*

vnam in latitudinem obtinet. qua sinus introrsum recedit, ibi emporium est. Gens æneo colore, fuso capillo, robur in membris, in animis feritatem ostentat. viri mercaturam, fœminæ agricultura exercent. Nullum habent Regem. suis institutis ac ritibus viuunt: & vbi consulto opus est, ad seniorum cœtus refertur. In cultu Diuino, illata non ita pridem fabulosa Mahometis dogmata vulgo sectantur. Locus ad inuehendas, & euehendas merces admodum est opportunus. Igitur Abreus eo delatus, vti è Malacensi victoria omnes eas nationes Lusitani nominis fama peruaferat; haud ita difficili negotio fœdus amicitiae hospitijque cum incolis fecit: ac lapideum eius rei monumentum in littore posuit. dein, magna vi frugis pretiosæ coempta, Molucis omisfis, Malacam reuertit: atque inde cū Andradio Lusitaniā repetens, vt apertæ Bandæ nuntium ad Emmanuelem ipse perferret; inani spe delusus, in itinere periit. Longe diuersum habuit exitum navigatio Francisci Serrani ex eiusdem Abrei comitatu. Is post Bandam relictam, ipso profectionis initio ab sociis tempestate distractus, ad infames & scopulis, & latrocinij Lucopinas insulas ultra Bandam, allisa oneraria, saluis corporibus, armisque in terram euasit, fame siti que, ob solitudinem ac siccitatem loci, vna cum socijs vtique moriturus; ni, quæ res exitio cæteris consueuerat esse, præsentem eis opem diuinitus attulisset. Prædonum erant in proximo stationes, in eiusmodi casus intenta cura excubantium, vt eiectiones in littus aduenas improuiso aduentu caperent. ij, cōspecto Serrani infortunio, ad prædam alacres piratico nauigio vehebantur, quam vulgo caracoram appellant. Non latuit scelus magistris & nautas Malacenses, è Serrani turba. quocirca præmonitus ab ijs, vt sibi consuleret; insidias prope littus occulto loco disponit. prædones in terram egressi, dum naufragos venantur, interim exorti ab tergo Lusitani caracoram inuadunt. qua re animaduersa barbari, metu, ne abducto nauigio, in deserta insula destituti perirent; confestim ab latrocinio versi ad obtestationes, culpæ veniam suppliciter petere; ac se, polliceri, si in caracoram accipiantur; duces nostris ad commodum hospitium haud procul inde futuros. Neque abfuit dictis fides. ijs moderantibus cursum, ad Amboinum rursus delati Lusitani, ab incolis Rucutelli emporij admodum benigne tractantur.



stantur. Erant Rucutellanis veteres inimicitiae cum finitima ciuitate Veranula insulae Batochinae Muaris: ac tum, inter vtrumque populum exorto certamine, Rucutellani aduenarum maxime ope superiores fuere. cuius rei cum rumor longe lateque manasset; ad Molucarum etiam insularum Tidoris atque Ternatis regulos fama peruenit, quorum alteri Almanfori, alteri Boleifi erat nomen. A patriis ritibus paulo ante ad Mahometicam superstitionem ambo transierant. ac de finibus inter se contendere soliti; cognito Lusitanorum ad Amboinum appulsu, tam inclytae gentis auxilio contra hostem augeri cupidus vterque certatim naues ac praesidium ad inuitandos ac deducendos ad se peregrinos dimittunt. Diligentior in eo officio fuit Boleifes, celeriter instructis in id ipsum nauibus decem, & custodia mille ferme armatorum imposita. à quibus abducto iam ad Ternatem Serrano, Tidorenses ab Rucutello irriti rediere. At Serranus cum socijs magno apud Boleisem in honore habitus; multa de Molucensium natura, commerciis, moribusque per otium cognouit: neque Emmanuelem modo de rebus ijs accurate per litteras docuit; verum etiam, comitantibus deinceps eodem Lusitanis, non mediocri vel solatio, vel adiumento fuit. Sunt autem, quae communiter Molucæ vocantur, complures numero, subiectæ Aequatori, & à Borea in Austrum vicinis ferme leucis inter se disiectæ: quarum nulla plus leucas sex ambitu colligit. Hisce plurimæ circumfusæ aliæ sunt: verum ad Occidentem in sexaginta leucas tota fronte prætenditur altera Batochina, Mauricam appellant: ita naturæ muneribus Diuina prouidentia distributis (nempe ad conciliandam per mutuos vsus humanam societatem) vt Molucæ, cum ingentis pretij frugem caryophyllon vnæ omnium ferant; reliqua pene cuncta ad victum & cultum aliunde mutuari cogantur, quarum magnam partem ea, quam dixi, Batochina suppeditat. Arbor autem caryophylli, & stipite, & foliis lauro similis est, flore in primis odorato, qui è viridi in rufum immutatus, vbi obduruerit; caryophyllon Arabibus; at Hispanis, quod capitatus est, clauus appellatur. arbor, è decidentibus caryophyllis citra culturam enascitur: annuas fert fruges: quæ tamen propter flagellorum & acrioris decussus iniuriam, non nisi altero quoque leguntur anno. solum infra, purum est:



## *Historiarum Indicarum*

arbore in semet omnem attrahente succum : ipse vero fructus, potentiorum præcipue mensis ac dapibus expetitus ; ab institutoribus ingenti lucro & in Asia, & in Europa diuenditur . Tellus arida est, & in modum pumicis fistulosa . itaque non modo cadentes è cælo imbres momento combibit ; sed etiam è montibus manantes absorbet aquas, antequam directo alueo ad mare perueniant. Eadem aliquot locis cum infano reboatu ignes eructat . Sed præcipua camino Ternatensi nobilitas. Mons in nubes assurgit excelsus, & arduus . cuius inferiora, densis nemoribus vestiuntur ; superiora, ex incendijs glabra & horrida sunt . in vertice, crater, hiatu vasto, in plures circulos circumductos maiores minoribus, ad speciem amphitatri discedit . inde, per æquinoctia maxime, certis flantibus ventis, cum horrissono fremitu flammæ atro mistæ fumo & fauillis erumpunt, & omnia late loca cineribus complent . Visendi annuæ sunt vices : nec nisi per funes, aut ferramenta, quibusdam locis ascensus est . Incolæ etiam sulphur alicubi optimum legunt . fusco ipsi colore, fluxo capillo, ad bellica studia strenui . cætera mirum in modum inertes & pigri . Medulla quarundam arborum victitant : sagum vocatur . ea lente purgata, & testaceis incincta formis, non solum in quotidiana alimenta, verum etiam in usum nautici panis egregie sufficit . Et ex eiusdem plantæ ramis, artificii manu concisis, leuandæ siti, mirifico sapore simul & salubritate candidus liquor exsudat, quem vulgo tuacam appellant . Ipsas insulas, olim desertas, &, qua planities est, mari mersas fuisse ; testantur conchilia, & arenæ, quæ fodientibus passim occurrunt : atque ob id ipsum ab indigenis incolæ negant . Conueniunt è Sinis, Iavis, & aurea Chersoneso, & alijs regionibus : origine dispares, & sono linguæ ; cæterum contumacia, scelere, perfidiaque simillimi . quippe, nec nisi malo coacti recte facere norunt ; & non ferro solum, & aperta vi, sed calumnijs, fraudibusque, & veneno grassantur . Neque Molucensium tantum id ingenium est . cæteræ quoque eius tractus insulæ eadem infamia ferme laborant . Ex ergo, ad quem dixi modum, cum antea Græcis ac Latinis prorsus ignotæ fuissent, nostris hominibus denique patuere . Dum explorantur, §. Albuquerque interim, firmato maris imperio, ad interruptam toties Arabicam expeditionem, rursus animum adiecit. eoque consilio



consilio ad Goæ custodiam, præter Malabarica auxilia. Lusitanos pedites quadringentos, equites octoginta Petro Mascarenia præfecto reliquit. Benestarini præsidio Rhotericum Pereriam, oræ maritimæ cum sex biremibus Ioannem Machiadum præposuit. ipse, viginti nauibus; epibatis Lusitanis mille septingentis, Indis vero circiter mille ab Goæ profectus, malacia diu remorante, ad Socotoram aquandi causa primum; dein Adenum incolumi classe traiecit. Vibs est præclara ad aspectum, edificiisque, & incolis admodum frequens; non soli natura (quippe inuectis omnibus vtitur) sed loci opportunitate, vt supra dictum est, in eam celebritatem adducta. omni fere ex parte ad peninsulæ modum alluitur mari. qua continenti annectitur, præruptus imminet mons: mœnibus præterea, & propugnaculis egregie cincta est. attamen Albuquerque, repente iactis in portu anchoris; magnam trepidationem ciuibus pariter ac peregrinis incussit. nautæ, & institores ex onerariis in vrbe extemplo confugere. Amirianus oppido præerat, Abasinus genere, puer olim captus à Saracenis; & à religione Christiana per fraudem abductus. Is, tentatus ab Albuquerque, non vulgari solertia vir, blandis verbis muneribusque spem deditiois faciendo, rem distulit, dum è propinquo milites euocaret. ij cum celeriter conuenissent, ignarus eius rei Albuquerque, experiundi causa in oppidum ad nauicularios mittit, qui eos metu deposito ad naues redire iubeat. illi vero negare se redituros, aut capita sua toties iam expertæ Lusitanorum crudelitati, & auaritiæ permissuros. Simul Amirianus per internuntios cum Albuquerque expostulat, quod imperium vsurpet in aliena terra; & super tali re cum inquilinis & aduenis potius quam cum legitimo magistratu, penes quem summa sit rerum, suo iure sibi agendum existimet. ad extremum addit, eum non pro amicitia facere, qui tali tempore defensoribus vrbe nudare conetur. Eo nuntio sat patefacta Amiriani consilia. & Albuquerque vim adhibendam ratus, vbi postera dies illuxit; vt hostem ancipiti distineret prælio; partem copiarum in ipso littore exposuit; partem ad Isthmum, quæ à tergo inuaderet, circummisit. Vtrobique à Saracenis acerrime repugnatum est. & cum scalis diffractis pauci Lusitani, qui iam in muros euaserant, cederentur, & frequentes apparerent in oppido ar-

mari



## *Historiarum Indicarum*

mati pedites equitesque; Albuquerqueius iactis ad pinnas funibus, per quos nostri sese demitterent; receptui cani iussit: omnisque oppugnatione urbis & natura, & opere, & valido praesidio munitissimae, Mahometanas naues in portu ferme triginta succendit. inde sublati anchoris, dum Luianum inuehitur finum, cum extremo salutis discrimine in syrtes impactus est. Saluti fuit, imploratum Beatæ Virginis auxilium: cui deinde, ad perpetuam beneficii tanti memoriam, in urbe Goa templum exstruxit: & inde, Sanctæ MARIAE Vada, Luianæ syrti nomen impositum. Ex eo periculo ereptus, ad Camaranum insulam intra fauces Erythræas cum vniuersa classe prouehitur. Ad eius famam, incolæ in proxima continentis, metu diffugerant. Locus haud inamēnus est. perennibus aquis, & pecorum armentis abundat. ad hæc, ingentes ædificiorum ruinæ, celebrem olim teatris & opibus fuisse testantur. Albuquerqueius in explorandis circa regionibus, & maris eius natura noscenda hyemem posuit. quo tempore, duo in primis admiranda euenere. Ad Solem occidentem, qua Regis Abasfinorum imperium est, purpureæ Crucis in cœlo signum præfulgens aliquandiu apparuit. quo viso Lusitani omnes venerabundi procubuere: & Albuquerqueius, ut erat eximia pietate, sublati ad eam manibus, clara voce fusus in preces: O Crux, inquit, nostræ redemptionis argumentum: o signum Christianæ victoriæ: o decorata pretiosissimo sanguine Domini IESU: o Diuina arbor, cuius vitali fructu, letalis quondam plantæ repensus est fructus: in te, te inquam, spes nostras omnes habemus repositas: te profitemur, agnoscimus, adoramus; ac suppliciter petimus, nobis inter tot pericula, terra marique praesidio sis. Ab ea precatione obortæ omnibus lacrymæ: & index fidei ac religionis clamor ad astra sublatus. tum consono clangore hinc inde tuba concrepuit, & omnia tormenta displosa: dein candida nubes conditam Crucem, sine fine defixis in cœlum oculis Lusitanorum eripuit. Neque Albuquerqueius prætermisit, quominus rem, sicuti acciderat, testatò conscriptam, ad Emmanuelem Regem primo quoque tempore mitteret. Per eosdem dies, vel ex intemperie cœli, vel ex insalubrium ciborum succo, atrox morbus naualem turbam inuasit. vulgo inter lusum, aut quotidiana ministeria repente exspirabant. In ijs, miles vnus in mare proiectus, ingentem terrorem



rorem omnibus attulit. noctu quippe, infra sentinam pulsus frequentes exaudiri coepti. quem ad strepitum cum arrepta scapha vigiles descendissent; implexum carinae sub ipso gubernaculo defuncti militis corpus offendunt. scilicet pilus cunctis in horruit. vbi ex pauore collegere sese, res ad nauarchum delata: nec dubium fuit, quin cadauer translatum in littus humo cōtegerent. quo facto, postridie super ipsum sepulcrum rursus in humatus apparuit. Ea re attoniti cuncti cum apud se causam exquirere; Franciscus denique, incertum ex qua familia, monachus, qui concionatoris munere fungebatur; sagaci coniectura suspicatus est, hominem aliquo interdicti, vel anathematis vinculo constrictum, è vita excessisse. itaque in terram egressus, sanctissimi viri Benedicti Abbatis exemplo, è Pontificia formula conceptis verbis, animum demortui rite expiauit: ei que veniam à Deo precatus est. Mirum dictu, ab eo mysterio reddita mortuo pax; & vaga ossa tandem in suo tumulo quieuerunt. In de, transacta iam hyeme, Albuquerque retro ad insulam Melum reuertit. in ipsis faucibus sita est: locusque exstruendæ arci commodissimus visus: sed quod maiore apparatu indigeret, differri opus placuit. Præcella tantum Crucis trophæa ibi defixa, quæ à quattuor passuum millibus conspici possent: & ab eadem sacrosancta Cruce nouum insulae nomen impositum. Ex eo loco profecta classis, cum iam tempus reuersionis instaret, aduersa tempestate rursus in Adeni portum infertur. ibi dies aliquot mutua iaculatione consumpti: & quæ prima sese dedit occasio, in Orientem Albuquerque iter intendit. ab Adeno Diu accessit primum. ibi ab Iazio perhonorifice acceptus, commercij procuratorem consensu reliquit. Ab Dio Ciaulum ventum est; & exactum à Nizamaluco tributum. Ac nulla admodum memorabili re gesta, Mahometanis tantum sex nauibus apprime opulentis, ex itinere captis, Albuquerque ad Goā denique saluis rebus applicuit. Eodem tempore Zamorinus, post factam cum Lusitano pacem, emoritur. Regnum excepit sororis filius Naubeadarinus, qui suo apte ingenio nostris enixe fauerat semper; auctorque auunculo fuerat Lusitanos omni officio demerendi. itaque ipso statim initio imperij, non modo pacem firmavit; sed etiam stipendiarium se fieri voluit Lusitani Regis, certo vectigali sponte instituto, quod in singulos annos

Emmanueli



## *Historiarum Indicarum*

Emmanueli persolueret . ac simul,arci ad Calecutum exstruenda magna eiusdem voluntate admoti cum machinis fabri . & opus , adhibita diligentia breui surrexit : impositoque praesidio commercium cum Lusitanis fremente Saraceno renouatum est . Aegre id passi veteres quoque socij, Cocinensis, & Cananorius ; veriti ne per eam societatem negotiatio Calecutum vniuersa transiret . quos tamen Albuquerque adiit, & multis rationibus lenitum vtrumque , operam dedit vt ab studio rerum nouarum auerteret . Hoc tam felici statu rerum Orientis, Emmanuel decretis Lusitania tota supplicationibus,gratias Diuinæ Bonitati agendas diligenter curabat . ac per id ipsum fere tempus Iulio II. Pontifici Max. vita functo, Leo X. magna omnium approbatione successe . huic Pontificatum ineunti, Emmanuel per legatos non obsequium modo,more maiorum rite deferendum , sed etiam Indicas opes religionis causa libandas existimauit . Princeps legationis fuit Tristanus Acunia, qui, vt supra demonstratum est, res præclaras in India gesserat . Munera fuere, complures ingentis pretij gemmæ, & Pontificalia vestimenta cum aræ bene magno frontali, cuncta in varias Christi & Sanctorum effigies ex auro primo , & vnionibus , atque lapillis admirabili splendore contexta : quorum , qui in eiusmodi rebus intelligunt, simile nihil in Vaticano sacrario visum affirmant . Accesit è Perside animal,priscis Romanorum ludis ac venationibus mirabiliter expetitur , panthera tremendæ pernicitatis , magnifice instrati equi clunibus insidens , ad equitis nutum in syluestres feras inuolare iam pridem assueta . Conspiciebatur etiam , cum Indo rectore , militibusque , turritus elephas, aureo strato, cum alia egregie doctus, tum vero ad certa symbola principem flexo poplite venerari, & inconditos edere ad tibiam motus ; & haustam proboscide ingentem aquæ vim , repente in spectatores effundere . Neque ita multo post, rhinoceros quoque , non visum in Italia multis iam seculis animal , Romam deuehebatur ; vt cum elephanto commissus ( quicum implacabiles gerit inimicitias ) veteris magnificentia spectaculum populo Romano repræsentaret . Sed qui ab vltimis terrarum terminis in Europam incolumis venerat ; ad Ligusticæ demum oræ scopulos facto naufragio, cum impeditus catenis enare nequisset, exoptata plebem vrbana oblectatione priuauit .

Ea munera cum ipsa per se, tum vero propter illustrem eximia  
cuiusdam pietatis, & obseruantia significationem summo Pon-  
tifici, & patribus mire grata accidere. Inter hæc, annus iam se  
circumegerat: cumque in omnium ore ac sermone Lusitanica  
religio, & egregia belli facinora versarentur; Abasini quoque  
legati ex India in Lusitaniam deuehantur. ij, quod contra Albu-  
quercij præscriptum male accepti à nauarchis in itinere fue-  
rant; nauarchos illico Emmanuel in vincla coniecit; nec nisi  
Matthæi precibus fatigatus absoluit. ipsis vero legatis, magni  
honores ab Rege habiti. aduenientibus primum frequenter ob-  
uiam itum est; ædesque magnificæ ad diuersandum attributæ.  
dein Petro Vascō Igaditano episcopo, & Martino Villanoua-  
no Comiti negotium datum, vt eos quam honestissimo comita-  
tu in regiam vsque deducerent. intromissis, Emmanuel è solio  
comiter in amplexum occurrit. post salutationem, à legatis ex-  
tractæ ex arundine aurea litteræ, & dona prolata. Ea dona fue-  
re primum aurea quinque numismata Abasinis inscripta no-  
tis, quæ octonos ferme scutatos penderent singula. dein pyxis  
auro solida, fidelibus claustris adseruans Crucis adorandæ frag-  
mentum, de quo supra docuimus, Abasinis Regibus è Hieroso-  
lyma ipsa transmissum. Eam vero pyxidem Emmanuel nixus  
genibus, & præ gaudio lacrymabundus accepit, immortales Deo  
gratias agens, quod è tam remotis ab Europa regionibus, ab Re-  
ge tam inclyto, per legatos compellari se, bearique insuper tam  
salutari ac pretioso munere voluisset. Post hæc, Helenæ, ac Da-  
uidis recitatæ per idoneos interpretes litteræ, tum Arabico, tum  
Persico sermone conscriptæ. quarum erat summa: si vrgere bel-  
lo maritimo Saracenos, & cæteros nominis Christiani hostes  
Emmanuel pergeret, terrestres Abasinorum copias, quando-  
quidem re nauali parum admodum valerent, & cōmeatus quan-  
tæ vis classi non defuturos: ac Lusitanum hortabantur, glorio-  
sis adeo ceptis fidenter insisteret: postremo, si ad hospitij vin-  
culum, affinitatis quoque iura vellet adiungere; filiorum nu-  
ptias ac filiarum cum regiis dotibus offerebant. Ad ea, pari be-  
nignitate ab Emmanuele responsum est: ac multa deinde ex le-  
gatis de Abasinorum ingenio, institutis, ac ritibus quæ sita per-  
otium. quæ à pluribus postea fuscè ac diserte perscripta, inculca-  
ri à nobis hoc loco necesse non est. Dum in Europa Emmanuel  
Rex



## *Historiarum Indicarum*

Rex legatis mittendis accipiendisque dat operam; interim in  
vltiore India ab Lusitanis non Malacense modo stabilitum  
imperium; sed socijs quoque Regibus latum opportune subfi-  
dium est. Rhotericus Patalinus (vti supra docuimus) præfe-  
ctus erat Malacæ. in eius locum è Cocino cum nauibus aliquot  
missus Georgius Albuquerque, cum ad Somatram deuenisset;  
domestico implicitum bello Regem Pacenum offendit. Factio  
sus quidam è popularibus coacta manu erat in armis: atque is  
quo maiorem ciebat tumultum; eo letior fuit Regi nostrorum  
aduentus; ei que dubijs in rebus non inanem fiduciam præbuit.  
siquidem post minuta aliquot prælia cum ad summam vniuersi  
certaminis ventum esset; Georgius cum suis primam sibi depo-  
scit aciem. Neque commissa pugna subsidiis opus fuit. stu-  
dio laudis incensi Lusitani tanto ardore sese in hostem intle-  
re, vt primo impetu pulsos loco rebelles, magna cede, maiore  
cum trepidatione in fugam auerterint. Quo facto, Georgius,  
& amicum Regem præsentis periculo ereptum, arctius Emma-  
nueli deuinxit; & ipse nouo decore genti Lusitanæ parto, victor  
Malacā procescit. in ea vrbe, Prætorio munere aduersa fama fun-  
gebatur is de quo demonstratum est, Ninachetus indigena:  
multis magnisque in Lusitanos officiis eum gradum ab Albu-  
quercio Imperatore promeritus. Eundem forte honorem, ac-  
ceptus nuper in fidem Abdala quoque dynasta Camparis ada-  
marat: præclarum sibi ad celebritatem nominis ratus, in Mala-  
censi emporio tot tamque variis nationibus è superiore loco  
ius dicere. huic, Albuquerque gratificari cum admodum cupe-  
ret; eam tamen distulerat rem, verecundia prohibitus coram  
super tali negotio Ninachetum alloqui; tamque veteri amico  
(quamquam alioquin improbo viro, perque veneficia ac scele-  
ra Præturam exercenti) repente magistratum abrogare. Sed  
quod præsens non erat ausus, absens postmodum non omisit.  
Proficiscenti Malacam Georgio, in cæteris mandatis illud etiā  
dedit, Prætori Ninacheto Abdalam sine mora sufficeret; perdu-  
ctumque Malacam, in eo tribunali quam honestissime colloca-  
ret. Ille, quam difficili ac periculoso loco Campanana res esset,  
ignarus, Georgium Botellium cum nauibus non amplius tri-  
bus, inscio Ninacheto, ad Abdalam aduehendum proficisci iu-  
bet. Cæterum Lingæ Rex, qui Regis Bintani filiam habebat  
in



in matrimonio, tum maxime terra marique circumfessum Abda-  
lam premebat. id ubi Lusitanis nauarchis in itinere cognitum  
est; confestim à Malaca subsidium per litteras & nuntios euo-  
cant. Misit à præfecto Lusitani bellatores egregij centum, Ma-  
lacentes ferme septingenti. Cum iis copiis Botellius initio,  
Campanani æstuarij fauces audacter inuectus; mox retro flexit  
iter, propterea quod æstuarium ad instar fluminis longum & an-  
gustum, depresso alueo, marginatis vtrunque ripis, non sine cau-  
sa metum afferebat, ne prætereuntes nostros barbari ex tuto su-  
perne iaculis ac telis obruerent. igitur eo periculo animaduer-  
so, portus aditum custodire, & mare commeatibus infestum red-  
dere statuit; vt hostem vel extra munitiones eliceret ad pugnam,  
vel victoria pene iam parta inuitum ex obsidione detraheret.  
Neque inanis fuit coniectura. Linguanus, cognito nostrorum  
consilio, quod multitudine militum abundaret, in apertum pro-  
uehi, ac sese ad prælium offerre decreuit. ergo relictis ad ope-  
ra stationibus, ipse cum sex armatorum millibus; actuariis octo-  
gingta, quas vocant Lanciaras, in Lusitanos mouit æstu secundo.  
Classẽ præibat ipse cum naui maioris formæ, crassioribus mu-  
nita pluteis, & machinis varij generis; ac, præter naualem tur-  
bam, propugnatoribus ferme ducentis. in eam conspectam Bo-  
tellius hortatus ad pugnam suos, extemplo vim iaculorum tor-  
mentis emisit, adeo perite libratis, vt remiges ad transtra com-  
plures vno ictu discerpserint. quo metu perterriti qui in eo la-  
tere curabant nautæ; partim in mare sese præcipitant, partim  
infra scalmos occulto loco se condunt. ita, ministerio destitu-  
ta nauis, in obliquum intorta vorticibus, adeo tenaciter ad v-  
tramque fluminis ripam inhæsit, vt neque ipsa moueri posset lo-  
co, & pone sequentibus reliquis transitum intercluderet. Tum,  
ex propinquo initum certamen; & Botellius cum suis in regiã  
nauem egregio conatu transcendit. Aequis viribus aliquan-  
diu dimicatum est, dum Regem satellites obnixè tuentur. Sed  
ubi cæteri Lusitani in ipso tormentorum strepitu excitati super-  
uenere; tum demum percussi nouo terrore barbari; & Rex  
metu ne opprimeretur, è naui defiliit; perque auia & lutulenta  
cum paucis diu errabundus denique in tutum euasit. at Lusita-  
ni regia naue expugnata, in cæteras gradum illico faciunt. eã  
cum obstructo, vt diximus, exitu clausæ tenerentur, & in angu-  
stijs



## *Historiarum Indicarum*

stis confertæ atque implexæ remis, atque armamentis, neque explicare se possent, & contra vim æstus reciprocantis frustraniterentur; naualis turba, tentato vix prælio, sequuta Regis exemplum, qua cuique licuit, se in terram eiecit. ita, multis primo impetu cæsis, vacua pene classe Lusitanus potitur. Et Abdala, præter spem obsidione exemptus, Malacam ouantibus Lusitanis ingenti pompa deferitur. Ibi iussus Ninachetus magistratu se abdicare; non tulit ignominiam, veri honoris, & solidæ virtutis ignarus. confestim ex aloë, & sandalis odoratis exstructo rogo, quadratum iuxta suggestum nobilibus aulæis & alia pretiosa veste constrauit. ex eo suggesto, aurea ipse toga gemmisque præfulgens, ad circumfusam concionem de rebus ab se gestis, totoque vitæ suæ cursu disseruit: expositisque beneficiis, quæ in captiuos, primum Lusitanos, tum in Albuquerqueium ipsum difficillimo tempore contulisset, nullo suo delicto spoliari se dignitate, dolenter admodum, & acerbè conquerebatur. Tū Lusitana ingenia detestatus (adeo funestas humano pectori subdit faces ambitio) è pulpito sese in ardentem pyram furibundus iniecit: mortemque paulo post sponte affuturam, deuexa iam ætate vir antecapere, quam vel ad exiguum tempus, minus inter suos honoratus conspici maluit. Verum, ne Abdalæ quidem diuturna felicitas fuit. Iniquorum criminationibus in suspicionem vocatus, quasi de vrbe Alodino prodenda clam ageret, per speciem consultandi, in arcem, Georgij præfecti iussu deducitur. ibi, nihil minus metuenti, diuinamque & humanam imploranti fidem, catenæ subito iniectæ. ac ne ex ipsius quidem vinculis facta dicendæ causæ potestate, paulo post in foro palam ingulatus est: quæ res propter spectatam viri æquitatem, & amabiles mores, magnam apud eas nationes Lusitanico nomini conflauit inuidiam. Inde minus iam multi Malacam institores adire: nec regia modo vectigalia in dies minui; sed etiam ciuitas annonæ caritate primum, tum etiam inopia laborare. Ob id à præfecto ad reconciliandas circa nationes missus Botellius, notæ probitatis ac prudentiæ vir, ciuitates ac regulos adeundo, virtute ac lenitate paucis diebus Malacam intermissa commercia renocauit. In ea legatione cum ad Siacacum dynastam Alodini vectigalem venisset, vltimum pene salutis periculum adiit. Siquidem Alodinus pacis immemor post

Maxelizij



Maxelizij eadem factæ, Siacano cum alia, tum filiæ nuptias offerebat; modo Botellium sibi vinum, aut mortuum traderet. processissetque haud dubie fraus; ni Botellius, incolæ monitu, quæ captum libertate donarat, mature insidias præcauisset. Ea expectatione delusus Alodinus, lanciaras ferme sex & triginta ad eum insequendum protinus misit. Eæ in Lusitanicos lembos nouem cum incidissent; quibus Franciscus Mellus præerat, atrox diu prælium, & incerta victoria fuit, dum hostes multitudine maxime freti nostros circumuenire nituntur. Sed ad extremum, acrius instante, atque ad omnes occurrente impetus Lusitano, impares viribus ac dimicandi peritia barbari, magno suorum amisso numero, terga vertere. Neque nostris incruenta victoria fuit: è sociis multi, è Lusitanis triginta quinque desiderati. Huius pugne fama tranquilliores in vltiore India fecit res: & Botellius, annona leuata, rebusque ex animi sententia confectis, auro pretiosisque aliis onustus mercibus, Malacam reuertit. Neque segnius interim ad Goam Lusitana res ab Albuquerque Prætorè administrabatur. Intentus omni cùra constituendo & propagando Emmanuelis imperio, nullam eius rei occasionem elabi sinebat è manibus. Ante omnia, captus opportunitate Diensis emporij, legatos ad Mamudum Cambaie Regem cum donis misit, vt munitum de more diuersorium Lusitanis, negotiandi causa, in eadem insula certis legibus exstruere sibi liceret. Neque abhorrebat à conditionibus Rex, commercij spe illectus adeo fructuosi. Cæterum Iazij, qui nihil minus, quam Lusitanos accolat cuperet, opibus artibusque discussa tota res est. Cum Idalcane præterea, & Narsingano Rege confirmata per mutuos nuntios amicitia, atque de communibus commodis. Verum nihil tenacius in Albuquerque mente, quam Armuzianæ rei cura infidebat. cuius tum regni status erat eiusmodi. Post Albuquerque discessum, & arcem scelere nauarchorum amissam, ingens rerum perturbatio erat Armuziæ consecuta. Primum, Atar eunuchus grandi iam ætate, decesserat. Dein, Zeifadinum susceptis iam liberis regni potentem, Nordinus vrbis præfectus per Abasina mancipia veneno sustulerat: inque eius locum, præteritis filijs, suffecerat Zeifadini fratrem, nomine Torum. hunc, multis ante officijs, ac tum recenti beneficio sibi deuinctum, quo insuper magis haberet in potestate, fidis pri-

M            uatim



## *Historiarum Indicarum*

uatim sibi ministris, ac satellitibus cinxerat. Ex ijs, tres germani fratres, Mudofar, Hales, Hamedes, quod Nordinum arcto affinitatis gradu contingerent, præcipuum dignitatis, & gratiæ locum obtinebant: sed ante omnes longe eminebat is, quem è fratribus tertium posui, Hamedes: vir & manu promptus, & libidine dominandi, & solertia in rebus gerendis, Atari eunuchopersimilis. Is callide conciliando sibi militum animos, & obnoxios sibi sensim in urbem introducendo, & grauisima quæque in se vnum trahendo munia, paulatim eo potentiæ viriumque peruenerat, regnum vt omne suo arbitratu ageret versaretque. Quocirca & Nordinus iacere, & præ illo pene ciuile ac modestus videri; & gemebundus Torus nusquam eodem inuito commouere sese, nedum maioris momenti quippiam aggredi. Iam vero, quod ad Emmanuelem Regem pertinebat; Lusitanis quidem ducibus illac iter habentibus patebat hospitium; & Emmanueli annum stipendium ex Albuquerqueij formula pendebatur: veruntamen ea erat conditio rerum, vt Hamedes nullo fractus præsidio, vbi vellet, ab Lusitano Regem regnumque posset abducere: & Emmanuel, per fraudem arce deiectus, precariam quodammodo eius insulæ ditionem habere videretur. Hisce rebus probe compertis, Albuquerqueius, Torum teterrimo seruitio domesticorum eximere, & in fide ac patrocinio Emmanuelis omnino stabilire decreuit. Ea res quod in primis egebat silentio, ne se Hamedes ad obsistendum instrueret; per speciem Adeni repetendi, magnis nauibus duabus & viginti, & minorû nauigiorum ingenti numero comparato, circa initium insequētis anni Goa profectus; in medio itinere cursum ab Arabia repente in Persicum sinum auertit. Armuziam vt est ventum, nauigiis confestim circumdat insulam, ne quid aliunde subsidij, vel commeatus eo subuehi posset. dein misis vltro citroque nuntiis, de nouis amicitiae legibus agi ceptum. Summa postulorum Albuquerqueij erat; præter stipendium Emmanueli bona fide soluendum, vt arx, ac diuersorium Lusitanis ad urbem daretur negotiandi causa. Neque Torus abnuebat; cessit quin etiam arce protinus: cæterum, quo minus reliqua explicarentur, maxime obstabat Hamedes, continuandæ scilicet dominationis audus; &, si alteri cedendum foret, in Ismaelem Persam, quam in Lusitanum Regem longe propensior. Ea incensum cupiditate,



piditate, cum ad saniora consilia reuocandi nulla esset spes; molientem insuper infidias, Albuquerqueius immisiss per occasionem percussoribus, anteuertit e medio tollere. Hamede interempto, cætera expedita fuere; ac facile deinde omnibus de rebus communi consensu transactum est: & in arcem absoluedam cum Albuquerqueius diligenter incubuit, tum ipse quoque Torus materiam, & alia necessaria large subministravit. Dein tormenta omnia, quæ ad rebellandum animos facere possent, Armuzianis adempta. & Lusitani regni stemmata, & vexilla in turribus cum ingenti clamore & plausu publice posita. Viri ferme triginta e stirpe regia, ob regni emulationem, a tyrannis candenti ferro occæcati, regio sumptu in vrbe alebantur. Hos quoque, Albuquerqueius, ne quid eorum causa tumultus existeret; Goam amandauit, dato Quæstotibus, & præfectis negotio, vt cuncta eis ad victum, cultumque liberaliter Emmanuelis impensa præberentur. Inter hæc, Ismael, non modo sibi de Armuziano stipendio bellum cum Emmanuele suscipiendum non existimauit; sed etiam admiratione captus rerum, quas a Lusitanis perexigua manu gestas, consentiens fama toto pene terrarum orbe vulgauerat, legatum jungendi fœderis ac societatis, ad Albuquerqueium destinauit. is vero in gratiam tanti Regis ingenti apparatu ab Albuquerqueio exceptus. Missi ad eum deducendum, e Lusitana iuuentute præcipui. Pompæ autem ratio fuit eiusmodi. Præibant in equis, cum venaticis pantheris, Persæ rectores duo: tum equi cataphracti sex nullo fessore sequebantur: dein equites, in argenteis ferculis regalia dona, vestem magnificam varij generis, itemque natiuas & factitias primæ notæ gemmas, cum tiliarum ac tympanorum hilari pulsu gestabant. Postremo legatus ipse cum suo comitatu, Lusitanisque incedebat. is in ornatisimum solium, adstante procerum corona, ab Albuquerqueio perhonorifice acceptus; cum muneribus litteras ad Emmanuelem, & ad Albuquerqueium reddidit: expositisque mandatis, omni genere comitatus honorisque tractatus est. Ac demum redeunti, vicissim legatus ad Ismaelem adiunctus Fernandus Lemius: & missa pariter dona: affabrefactæ lorice duæ cum galea inaurata, ac thorace quam optimo. armillæ aureæ quattuor: & nobiles pyrôpi complures: itemque alia pretiosa ex auro gemmisque monilia: necnon e singulis la-




## *Historiarum Indicarum*


dicorum aromatum generibus aliquantum. Accessere, optatissimum Ismaeli munus, aliquot variae magnitudinis aenea tormenta cum Lusitanis ballistis, aequae Cyprio, & stanno, ac postea magistri quoque eius fabricae cum peritis libratoribus missi, ut quoniam ab Turca novae illius terrore procellae nuper acie victus fuisset; ea quoque virium parte communi hosti esset par. Dimissa legatione, & rebus ad Armuziam ordinatis, Albuquerque Torum hortatus est, ut Emmanuelis amicitiam cum fide coleret; certissimumque in eius maiestate praesidium suis fortune repositum existimaret. Inde Goam classe renavigans, cum iam sexagesimum tertium annum aetatis ageret, fluente sensim aluo consumptus, aegre ad Goam portus fauces animam traxit. ibi, cum sese a lectulo movere non posset; in ipsa naui per confessionem elutis animi sordibus, & sacro ad supremam luctam oleo iniunctus; Christum, cuius Cruci affixi in sinu fovebat effigiem, suaviter alloquens, inter carorum manus & lacrymas exspiravit, prorsus inuicti ad laborem ac patientiam aequae corporis animique vir: & cum quolibet suae aetatis ducum, vel nautalis rei scientia, vel expediti consilij magnitudine comparandus. Facinora duo apprimae gloriosa vasto dudum agitabat animo. alterum, ut Nili fluente, nouo & spatij longe breuioris alueo, Abbas finis adiuvantibus, in Arabicum sinum auerteret, ac totam Aegyptum Turcis redderet prorsus infructuosam. alterum, ut ab Armuzia vectos hippaginibus equites velocissimos ad trecentos, in intimum repente littus eiusdem Arabici sinus exponeret: qui, ante quam a vicinis regionibus concursus fieri posset; Mecam non amplius septendecim Leucarum intervallo aduolarent; & ex inclyto apud eas gentes fano, abominanda Mahometis ossa raptim auerterent: scilicet in perpetuam teterrimi impostoris & haesiarchae ignominiam Christiano ritu publice concremanda. Talia meditant, iniquorum obtrectatio primum, dein mors interuenit, ut seni matura, sic rei Christianae atque omnibus bonis acerba. Elatus est quam amplissimo funere, & comploratione tanta; ut sacerdotum Christiano ritu psallentium voces nequaquam exaudirentur. Conditus est in aedicula MARIAE Virginis, quam Goa capta, ut supra dictum est, ipse construxerat: ac deinde Alphonsus filius (qui Olisipone haec ibidem scribentibus nobis octogenarius agebat animam)

animam) suis impensis auxit, ornauitque. Oræ Indicæ imperium, quæque illo imperio continentur, Albuquerque decedens pacata Emmanueli reliquit; & bellicam rem (vt ijs locis ac moribus) egregie constitutam. Paulo ante ipsius obitum, è Lusitania cum nauibus decem Cocinum appulerat Lupus Soarius prætor ab Emmanuele designatus. is cum iniisset magistratum; anno qui Albuquercij mortem est insecutus, renouata cum finitimis Regibus amicitia, Fernandum Petreium Andradium cum nauibus octo misit in Sinas, ad instituendum cum ea natione commercium, & regiones è proximo cognoscendas. Vna profectus etiam Thomas Petreius, Emmanuelis nomine, cum donis ac litteris legatus ad Regem Sinarum: quorum nobis mentio quando nec semel facta est iam; & sæpius, vt videtur, in posterum incidet; aliqua hoc loco de gentis natura, moribus, opibusque posuisse, non incommodum fuerit.

*Libri Quinti Finis.*







# HISTORIARVM

## INDICARVM.

### LIBER SEXTVS.



**S**INARVM regio, quam hodie Cinam vulgus appellat, vltima terrarum Asia, ab Oriente, & à Meridie, alluitur Oceano quem Sericum, vel Eoum prisci dixerunt: ab Occidente Indiam vltiorem attingit: à Septentrione, cingitur Massagetarum, Scytharumque limitibus. Multo latius quondam imperasse gentem, annales ipsorum, ac litteræ, & veterum ædificiorum illustria monumenta, & complures, in India præsertim, ab ijs denominatæ nationes, haud obscure testantur. Sed cum sua ipsi mole viribusque fatigarentur (quod à Carthaginiensibus in re simili factum legimus) sponte misso veluti sanguine, & castigata luxuria, intra hosce fines recepere sese; graui proposito edicto, ne quis iniussu magistratuum excederet. Regna, seu prouincias vastæ magnitudinis, numerant quindecim cum sua cuiusque metropoli: ad mare sex, mediterranea reliqua. Tellus, quòd maxima ex parte intra temperatæ plagæ terminos continetur; radiosque Solis,



lis, suapte natura vitales puro ac patienti excipit sinu; sic fit, vt saluberrimo cœlo, & purioris auræ dulcedine perfruatur; ac simul inclytę fertilitatis gleba, frugum omnis generis fundat copiam biferō triferoque prouentu. Accedit ad eximiam soli fecunditatem, summa cultorum industria. Et infinita est multitudo, quippe subolescente in dies prole, & in alienas regiones migrationibus interdictis. Neque in tanta mortalium turba cessare cuiquam licet. non priuato dedecore tantum, & proximi cuiusque probris ac iurgiis; verum etiam publicis moribus legibusque desidia plectitur. Itaque rustici homines nullam agri partem incuria squalere patiuntur. Saltus & colles; pinu vitibusque: campi & planities; oryza, hordeo, frumento, cæterisque segetibus nitent. quamquam è vitibus more nostro non exprimunt merum. vuas quodam condimenti genere in hyemem adseruare mos est. cæterum ex herba quadam expressus liquor admodum salutaris, nomine Chia, calidus hauritur, vt apud Iaponios: cuius maxime beneficio, pituitam, grauedinem, lippitudinem nesciunt; vitamque bene longam, sine vllō ferme languore traducunt. oleis alicubi carent: sed earum vice non desunt plantæ, quæ humorem vinctui præbeant. Pascua sunt etiam gregibus alendis vberissima; & in hortis egregie cultis cum alia nostri orbis poma, tum sapidissimos melopepones, suauissima & optima pruna ficusque, & medica citreaque varieg formæ ac saporis, apprime generosa mala conspicias. Ad hæc, perspicui fontes, & miro colorum decore odorumque fragrantia flores ac rosæ perennant. flumina vero, quæ magnas quoque patiantur naues, piscosa & amœna, viridissimo riparum vestitu, pinguibus aruis interfluunt. Quin, & ora maritima pluribus introrsum æstuariis ad omnium rerum copiam inuehendam euehendamque, facili patet accessu. Ingentem præterea volucrum & ferarum vim, ad aucupium ac venatum, paludes, luci, saltusque suppeditant. Metalla auri, & argenti, & ferri probatissimi, & alia, incolæ effodiunt. Margaritas, & præcipuæ nobilitatis vasa fictilia, quæ vulgo porcellana dicuntur; pretiosas pelles ad frigus arcendum; itemque gossipij, lini, lanæ, bombycisque, & serici fila, vestemque omnis generis mittunt innumerailem. Saccari, & mellis, rhabarbari, cāsura, minij, glastique tingendis vestibus expetiti, prouentus ingens: odoramentis



## *Historiarum Indicarum*

cum alijs abundant; tum præcipue mosco (cuius nullam apud Latinos Græcosve scriptores mentionem inuenio) è feris quibusdam, vulpecularum effigie, crebro verberare enectis, dein putrefactis. Denique, nihil aliunde, non ad victum modo cultumque; sed ne ad delicias quidem ac voluptates requirunt. ac proinde nulla sub Sole gens est, apud quam aliarum gentium opes æque consistant. quippe vendentibus cuncta Sinis, nihil inuicem redimentibus, nisi forte in vsum tectorij cuiusdam odorati, piper ex India. Neque erat externo commercio locus; ni Sinam infinita quædam teneret argenti cupiditas. id præferunt auro; & cum indidem effossum, tum è remotis regionibus illatum, audivissime accumulunt. Iam de ædificiis, priuatisque ac publicis operibus explicare, infinitum sit. Urbes præcipuæ magnitudinis celebrant ferme ducentas: inferioris autem ordinis, longe plurimas. porro castella & pagi, quorum nonnulli tribus familiarum millibus incoluntur; vicique passim ita multi sese offerunt, vt summa iniri vix possit. sunt autem egregio situ plerique: scatent aquis, procera circumdati sylua; ex qua turritæ prædiuitum aratorum eminent domus. Porro, dispersæ in æstiuos maxime secessus nobilium villæ, opere in primis elegantibus; vel ad opacas amnium ripas garrulos auium concentus, & fugientis aquæ lene murmur excipiunt; vel è montium iugis verticibusque, subiectos vallium anfractus; & vasta maris ac terrarum spatia, longe lateque despectant. Sed ipsarum præcipue urbium pulchritudo mira. Nauigabilibus impositæ fluuiis, admodum profunda & lata fossa, mœnibusque cinguntur quadrati ab imo lapidis, lateritiæ ad summum structuræ. lateres autem, ex eodem argillæ genere quo porcellana vasa, confecti, & calce optima interliti, in eam duritiem ac firmitatem breui tempore coalescunt, vt ferramentis postmodum labefactari vix possint. crassitudo mœnium, quattuor, & alicubi sex capit homines: additis ad prospectum pergulis, ac mœnianis, & occultis ambulationibus, qua præfecti oblectationis causa pererent: pomœrium, intra extraque, libero ad circuitum spatio, fenis in ordinem equitibus patet. Ad obliquos autem ictus, modico intervallo, turres & propugnacula prominent, artificiosis contexta fastigiis; & podiis elegantibus adornata. Ex ijs mœnibus cum quædam ante bis mille annos constet extructa;



etia; nullam tamen in eis rimam, aut finum, aut labem aspicias. adeo seuerè acriterque facta tecta ab regis curatoribus exiguntur. Urbis vero totius, ea ferme dimensio est. Latissimæ viæ duæ se interfecantes, perpetuo tractu qui lustrari oculis possit, præcipuas quattuor portas aperiunt, præferratas, ornatu magnifico, adituque ad aspectum præclaro. Ab hisce rectis viis, aliæ dein aliæque transuersæ, priuata & publica ædificia, vicique distinguunt. Et ab utroque latere viarum, excurrunt porticus, quæ comitantem plebem, & fabrum atque institorum apothecas ac tabernas, à tempestatum iniuria vindicent. iam vero, è lapide trifores ut plurimum, & quidem summo artificio perfecti cum inscriptionibus fornices passim visuntur. quæ monumenta, magistratu abeuntes, regij præfecti relinquunt. magistratibus autem ipsis, celeberrimo loco stant ampla & operosa prætoria, cultissimis hortis, capacibus piscinis, fontibusque pellucidis, & variis aquarum deriuationibus ad omnem animi remissionem instructa. Nec desunt auaria, & ferarum septa, & operis topiarij tonfiles, syluæ, luci que densissimi, & distincta floribus prata: ut singulæ præfectorum domus oppidi prope modum instar obtineant. Priuatorum ædes, circa maritimam oram humiles. mediterraneis vero locis, multiplici contignatione tolluntur, vel pictura decoratæ, vel opere albario candoris eximij. A primo ingressu panditur atrium, armariis circumquaque dispositis: in quibus inanum Deorum statuæ collocantur, accedunt lacus pleni piscium, ac pensiles horti. materia in ædificationes utuntur mire leuigata, & certo lenocinij genere in auri colorem ac splendorem adducta. Pari læuore tegulum est, calce spissatum atque commissum ad pluuias arcendas: durantque seculis tecta talia, extremis imbricibus è marmurato pereleganter elaboratis. ad singulas vero ianuas, viridi opacitate arbores ad lineam directæ consurgunt: quarum gratisimo aspectu, quasi pabulo quodam, oculorum acies quolibet fatigata reficitur. Porro vrbes, præterquam quod magnis, ut dixi, fluminibus pleræque alluuntur; sunt etiam quæ, ad subuectionis euectionisque commoditatem, canales nauium capaces introrsum admittant. quales multis locis apud Belgas, & alicubi etiam in Italia cernimus; marginatis utrinque semitis ad terrestre iter adstructis. lapidei quoque pontes egregie facti,



## *Historiarum Indicarum*

Ati, non ad oppida solum, sed etiam in agris plurimi. quæ flumina propter altitudinem pilas arcusque reiciunt; ea, confertis & contabulatis nauibus pro ponte iunguntur. sin ex imbri vehementius intumuerint; solutis interim ordinibus, viatorem, gratuitæ cymbæ, Regis impensa transmittunt. Iam, voraginibus, & hiatibus terræ, & stagnantibus aquis, quæque alia ad iter impedimento sunt, publice occurritur. quin etiam, asperimis locis ad montium latera excisis cautibus, viæ pateſcunt, ea molitione sumptuque, vt Romanam in eo genere magnificentiam non requiras. Tempia etiam cum turribus, culminibusque spectantur (licet alioqui Deos contemnant Sinæ) pulcherrima, & maxima. Trans pomœrium dein, præsertim ad mare, suburbia, eodem ornatu, & laxitate viarum, aduenas ferme ac negotiatores frequentissimis diuersorijs, & cauponis accipiunt; in quibus, præter delicatas de genti more potiones, omnium etiam generum cocti, crudi que prostant cibi, & exquisita cupedia. Sunt autem Sinarum populi (quemadmodum eiusdem plagæ alij) prout ad Septentrionem, vel ad Meridiem vergunt; magis aut minus æneo colore, vel candido: simis naribus, exiguis admodum ocellis, rara barba, longis crinibus, quos accurate comptos, & in verticem coactos illaqueant, & oblongum ex argento clauum in laqueum inferunt. neque tamen vna est omnibus capillamenti ratio. quippe, cælibes, comam a fronte discriminant; mariti, confundunt; atque hæc præcipue nota, ordinem vtrumque distinguit. Primarij, ac diuites, quique militiam exercent; versicolore serico: plebei ac pauperes, lino, seu gossipio tegunt corpora. nam apud Sinas lana, cum maxime suppetat, minime textitur. Sagis ad veterem Hispaniæ consuetudinem vtuntur, media sui parte crispis ac rugosis; cæterum fusa & explicata lacinia, & laxis manicis: ipsum verò sagum, ab læua parte confibulant. Accedit talâris tunica, quam qui è regia sunt stirpe, vel superiore aliquo magistratu funguntur, circa baltheum maxime; cæteri limbo tenus acu pingunt. Caput operiunt præcelso ac rotundo pileo, è tenuissimis virgulis atrofilo prætextis. Caligas induunt affabre factas, & elegantes cothurnos, aut calceos bombycino obstragulo perpolitos. Vestimenta per hyemem pretiosis murium Scythicorum pellibus, quas vulgo martas, vel sabellinas vocamus, calore admodum suauis,



suavi, & ventis impenetrabili densitate suffulciunt; iisdem separatim pellibus circumfouent colla. Molestias flatuum, munitis egregie fenestris, ac specularibus prohibent. Per æstatem vero, ad reliqua remedia caloribus leniendis, illud etiam accedit. Subterraneos idoneo loco effodiunt specus: inde concepnam auram, intensiorem aut remissiorem, prout libuerit, per omnes ædium partes admirabili machinatione dispensant. Mulieres, circa curam capitis multæ sunt. crines diu pexos concinnatosque in summo circumligant vitta gemmis auroque distincta. reliqui corporis ornatus, minime lasciuus. Præcipuam decoris ac formæ laudem, in pedum breuitate & exilitate constituunt: atque ob id ipsum, tenellos ab infantia fasciis perquã arcte constringunt. Magnus apud nobiles matronas honos pudicitia. raro visuntur: nec in publicum prodeunt, nisi gestatoria sella, prætentis ex omni parte velis, &, occultæ speculationis causa, reticulatis exiebre fenestellis ad latera apposis. succollant serui, magna vndique stipante familia. Deprehensum adulterium eque viri ac fœminæ, capite luitur. Ad nuptias, dotem non viro fœmina, sed vir fœminæ defert. Singulæ vxores in matrisfamilias numerantur loco: pellices procul à conspectu variis locis aluntur. Prostitutis ac meretricibus (ea fere mancipia sunt) proprium ac separatum in suburbiis domicilium est. Annum è lunaribus periodis duodecim ita conficiunt, vt tertio quoque anno ad duodecim vnã addant. Principium, à Martij mensis nouilunio auspicantur. Eum diem publica hilaritate, natalem quisque suum priuata gratulatione celebrant. munera sibi & sportulas inuicem mittunt. apparatus deinde epulis, noctu præsertim, exquisitisimi interponuntur ludi. Comœdias, ac tragœdias exhibent sumptuosas, vel fabulis in præsens à poeta confectis, vel actionibus è vetere historia repetitis. petoristæ, aretalogi, præstigiatores, mimi non desunt. parietes fornicesque viridi fronde, micantibus rosis, & pretioso peristrômate vestiuntur. fragrant odoramentis ac floribus viæ. accensis funalibus ac laternis, arbores, pergule, fenestræ collucet: neruorum pulsu; tibiarum vocumque concentu omnia personant. Conuiuiorum autem ratio est talis. Inuitantur multi. propria singulis mensa, aut summum binis, apponitur ex ligno ad instar ebeni splendidissimo, variis syluestrium



## *Historiarum Indicarum*

strium maxime rerum figuris, ac certis linearum ductibus (quò in genere Sinæ admodum excellunt) capreolatim ex argento, vel auro discurrentibus. Ea pictura nitorque pro mappa est. fœrica frontalia dein ad humum vsque dependent. Conuiuæ fucatis confident cathedris, præmolli, vt apud nos, culcitra ad gratiorem quietem obductis. Inde elegantissimi primum canistri fertis redimiti, onusti baccis pomisve, toto margine disponuntur. Intra id veluti septum, admirabili structura cæteræ exsurgunt dapes. cumque fagina omnis generis, ferina æque ac domestica, & piscibus, ostreisque, & cunctis ferme illecebris, & condimentis abundant; suilla tamen præcipue carosum morum pariter & infimorum expetitur mensis: neque ex alio vllò animali copiosior ganea. Cibos digitis atrectare (vt sunt vulgo munditiarum diligentissimi) rusticitatis putant. bracteatis paxillis, vel argenteis aureisve fuscinulis, concisa minutim frustra in os inserunt. Exiguus poculis crebro haustu sedant sitim: & magno cum honore verborum mutuo sibi propinant. Miro interim silentio atque ordine lances ab atriensibus inferuntur: & in singula fercula mensæ instrumentum omne mutatur. Hæc separatim viri. ac matronæ item seorsum (quæ maritorum zelotypia est) eodem apparatu in penetralibus conuiuantur. Salutandi ritus, inter plebeios, eiusmodi: læuam in pugnum compressam obtegunt dextra. ambas dein pectori sapius admouent, & simul, accommodato ad gestum sermone demonstrant, amicum sibi conditum hære in medullis. At primores, brachiis arcuatim extensis, ac digitis vtriusque manus implexis, identidem sese ad terram vsque summittunt: certantque verborum officiis inter se, vter posterior, alterius honoris causa quiescat. Opificum ac sellulariorum, ingens vbique numerus, & certus ordini cuique vicus est. sculpendi ac pingendi artem, itemque plasticen, toreuticen, encausticen, necnon fabricas, ærariam, ferrariam, cæterasque metallicas, ac materiarias egregie callent. neque ad conflandos ignes (quod vel in primis mirere) cuiusquam egent opera. quippe, certa ratione ita libratiss tubulis quibusdam, atque ad caminum aptatis, vt acceptam è cauernis auram perpetuo reddant. mechanica quælibet, vel ibidem excogitata, vel ex aliis terris inuecta, celerrime arripiunt. Anea tormenta conflare;



flare; litteras imaginesque subie&is prælo typis excudere (quibus commentis Europa recentibus adeo gloriatur) vetustissimo in usu apud Sinas esse, compertum est. Accedit ad artificium tormentorum, quod ex ijs quædam solutilia faciunt; perque partes imposita baiulis, aut iumentis, quocunque opus est, sine vexatione circumferunt. Ad scribendum autem, arctas & oblongas adhibent è leui admodum ac tenui papyro pagellas. neque versus ab læua ad dextram, vt Græci; neque ab dextra ad læuam, vt Hebræi; sed ad imum ab summo perducunt. cuius generis impressum volumen; atque inde transmissum, Rome in Vaticano, itemque in Laurentiana Philippi Regis bibliotheca videre me memini. Litteris vtuntur velut Aegyptiis, quas hieroglyphicas Græci dixere. Eæ singulæ singulis nominibus seruiunt, atque etiam integris interdum sensibus. Ita fit, vt cum Sinæ, varia lingua, quippe tam multis regionibus tamque disiectis, vtantur; tamen, quæ litteris consignata sunt, per æque omnes intelligant. Præter suum cuiusque nationis atque prouinciæ, certus insuper & communis eruditorum est sermo. Latinæ apud nos linguę respondet. vulgo Mandarinum appellant. hoc aulici, scribæ, iurisperiti, iudices, magistratus vtuntur: huic impensa cura dant operam. Qui per plateas erret otiosus, vt supra docuimus, vel manum supplex ad stipem porrigat, ferme est nemo. Mancij, vel aliqua parte corporis debiles, vel morbo impliciti grauiore, quam vt sibi parare victum vlllo modo possint; cognatis affinisve alendi attribuuntur à magistratu. sin propinqui desint; vel propter inopiam alendo non sint; causa probe cognita, ne quid subsit fraudis, in regia valetudinaria deportantur. Luminibus capti, si premat egestas, pistrino ac molæ; manci, aut quoquo modo mutili, dum suppetunt vires, alijs alij ministerijs affiguntur. Denique nullus inertix, vel ignauix locus est. Itinerum spatia, hoc pacto distinguunt. Minimam omnium mensuram patrio nomine vocant. Li. hæc, interualli continet quantum æqua planitie, die puro ac sereno, vox humana percurrit. Li decem, vnum explent Pù, quod Hispaniensi ferme leucæ respondet; siquidem Pù dena, diei vnus iter efficiunt, quod vulgo ychan appellant. Peregrinationibus autem, non iumenta modo, sed etiam variij generis cisia, lecticę, pilenta deseruiunt: accedunt rhedæ ac vehicula partim equis iuncta; partim



## *Historiarum Indicarum*

tim etiam, ubi camporum æquora patiuntur, velis euntia. Nec vero minus perite, ac scienter aurigæ quam nautæ, & gubernacula moderantur, & varia velorum inflexione, prolato vel reduto, prout opus est, pede, ventos excipiunt. Pretia rerum (ut quondam in Latio) non moneta nummi; sive; sed, ne locus adulterio pateat, concisi maxime argenti pondere metiuntur: atque in id ipsum, forfices, & habilem trutinam ligneolæ inclusam thecæ, in sinu circumferunt. ad maiora vero pondera, cum lancibus libram, publice probatam obfignatamque habent domiteruntios duntaxat ex ære publica forma percutiunt, gestantque pertusos in linea, suppleendis argenti pretiis. vel etiam ad quilibet coemendas. Nihil quod ulli usus possit esse, perire per incuriam sinunt. excrementa sordesque; ad stercoreandum agrum; vilissima scruta, in chartarias officinas; ipsa denique canum ossa, in celaturam & sculptilia conferunt. Fœneratores, utpote reipub. noxii, cum alijs pœnis, tum pecunia mulctantur in fœno re deprehensa. debilibus tantum aut cœcis ex infima plebe, ad sustentandam inopiam, aliquid usuræ nomine exigisse impune est. Suarum quisque mercium infitor, descriptum indicem; pha-macopolæ etiam singulorum simplicium quæ appellant, specimen ipsum coguntur pro tabernæ foribus habere proprium. Ea sæpe ab ædilibus inspiciuntur: neque componendi, miscendive, nisi præsens necessitas urgeat, neque composita diutius adseruandi, cuiquam omnino ius est. Vocales & gesticatorias aves enutriunt impensa cura, venduntque, præter naturales colores, vario etiam vestitu ornatuque distinctas. Iam, navalium copia, ac totius rei maritimæ apparatus, pene incredibilis: adeo large, materiam & omne instrumentum, cædua sylva, & ferri optimi venæ, & lini gossipiique frequentissima textrina suppeditant. Maximas naues, vento duntaxat mobiles (quarum supra meminimus) vulgo iuncos appellant. ex ijs partim ad bellum parantur, eminentibus ad proram puppinque castellis: partim depressiores, ad mercaturam & onera. Sunt quas Lanteas, quas Bancones vocant: illæ, sex remis ingentibus; hæ tribus tantum, quaterno vel senio in scalmum remige ad utrunque latus instructæ. Longis etiam, triremium instar, utuntur; sed sine rostro; & ad amnes, ac vada sulcanda plano alueo fabricatis. Aliæ conspiciuntur, maxime peragrandis animi



animi causa littoribus, auro & argento cēlata puppi, cubiculis, reticulatis fenestris, porticibus, pensilibus hortis pene in maris contumeliam exornatæ. Ad summam, variæ magnitudinis ac formæ nauium tanta copia est; vt præfecti orę maritimæ, si quid vrgeat subitæ rei, militares iuncos à quingentis ad mille contrahere momento dicantur. Neque vlllo tempore anni desunt classēs, ad tuenda & purganda piratis maria pluribus locis paratæ. Hæ, magno totius regni bono, mercatoribus, & nauicularijs omnium nationum præstare conantur non modo tuta, sed etiam secura commercia. Carinas oblinunt certo bituminis genere mire fideli cum ad explendas rimas, tum ad teredinem & noxia lignis animalia prohibenda. Purgandæ vero naui, pluribus confertam vasculis antliam, ad latera introrsum applicât eo artificio; vt vnus quilibet sedens, alterno pedum ac perleui motu, paucis horis quantamlibet sentinam exhauriat. Nauigiorum fluuiialium incredibilis copia. quippe, in ijs magna pars hominum cum coniugibus, & liberis degunt: è quibus alij vcturam exercent; alij pro cauponibus & institoribus, in perpetua statione sunt: nec solum in cibos, verum etiam in cultum, ac vestitum, ipsasque delicias habent cuncta venalia; vt in ipso itinere ac fluuiis, vrbana commoda & copiam non requiras. Sunt qui intra eas naues, altitium, atque anatum præsertim, ingentes alant turmas: & facillima est soboles; propterea quod ex ouis, non matris incubitu, sed leni tepore ex ignibus temperatis adhibito, quotquot visum est pullos excludunt. Noctu, animantes eas intra septa nauium cohibent; mane vt diluxit; in campos oryzæ feraces emittunt. ibi, non paruo agriculturalum compendio, noxias frugibus herbas, mira quadam auditate depastæ, sub noctem ad cymbali, seu tympani pulsum, in suas quæque chortes ac receptacula redeunt. Minutæ vero cymbæ, non fluuiatilem modo, sed ne marinum quidem saporis egregij piscem interioribus incolis deesse patiuntur. Verno tēpore anni, tumescentibus imbre ac niue fluminibus, cum ad ipsas maxime fauces foetificandi causa æquorei greges ex alto succedunt; confestim è vicinis regionibus haud ignara prouentus magna hominum multitudo cum retibus & verriculis aduolat. ingens captura nullo negotio fit: inde amnici nautæ à maritimis quam optimos pisces vili coemptos pretio, & vimineis cōditos



## *Historiarum Indicarum*

ditos corbibus, peruncta charta ad continendum liquorem in-  
tectis; mutata subinde aqua, & pabulo iniecto, quamuis intima  
in loca incolumes vehunt. ibi ex angustiis in ampla transfusi  
viuaria, & latas urbium fossas, ad lautiora conuiuia popinasq;  
toto anno sufficiunt. Capiendi autem, cum alia sunt artes;  
tum illa vel in primis iucunda. Prægrandes, ac domesticos ha-  
bent coruos, eiusmodi prædæ assuetos. horum colla nodo ita  
laxo constringunt; vt nequaquam interclusa respiratione, ci-  
bos tamen transmittere, ac deglutire non valeant. ita è caueis  
dimissi; admirabili solertia sese in aquas immergunt: piscicu-  
los minutos ore conceptos, maiores autem rostro apprehen-  
sos, domum, vnde abiire, identidem referunt; quoad solutis  
omnino faucibus, ad satietatem ipsi quoque pascantur. Ea  
magistratuum oblectamenta præcipua. Rei litterariæ magna  
pars hominum vacat. Medicas artes, & physica, & astronomi-  
ca attingunt pauci: iura legesque habent ante annos bis mille  
scripta, neque vnquam ( vt ferunt ) exinde mutata. his vero,  
quod ferme ad honores ac magistratus aditum patefaciant, ple-  
rique certatim insudant: deque politicis rebus, regnorumque  
administratione & quærunt ipsi inter se, & vbi licet, è peregri-  
nis auide sciscitantur. Gymnasia cum egregiis doctoribus fer-  
me oppidatim ample, & copiose sustentat Rex. in ea gymna-  
sia è ludo litterario primisque rudimentis pueri & adolescen-  
tes leguntur. studiorum præfecti, quos cessatores, vel tardos  
animaduenterint; obiurgant primum: dein plagis afficiunt: ad  
extremum ignominia notatos expellunt. ceteros, pro cuiusq;  
profectu ac diligentia, tollunt laudibus. Ad hæc, regij censo-  
res tertio quoque anno gymnasia publice recognoscunt. ab ijs,  
ingenij & doctrinæ hoc fere modo specimen sumitur. celebra-  
rimis in regni cuiusque gymnasiis, ad eam ipsam rem, mensis &  
subselliiis instructa visuntur ampla & spatiosa conclauia. In ea  
ex alijs prouinciis ( ne quid gratiæ detur ) euocati adolescen-  
tes, prætentato sinu ne quem secum inferant librum; mane  
cum pugillaribus includuntur. ibi à censoribus theses de re-  
pub. & regno, itemque de priuatorum controuersijs, ponuntur  
ex tempore. in eam sententiam, clausis ostijs, adhibitisque cu-  
stodibus, pro sua quisque copia & facultate scribunt eo inten-  
tiore studio, quod in eiusmodi certamine non dignitas modo.  
sed



sed etiam res vniuscuiusque disceptat. sub noctem, apertis foribus, pensa exiguntur, adscriptis auctorum nomine, origine, & patria. dein dimissa iuuentute; censores per otium ea scripta perpendunt: & ex vniuerso numero tria primum millia; rursum ex hisce, trecenta; postremo ex trecentis, nonaginta quã optima seligunt. atque is demum habetur sapientiæ flos; neque vltra subcernitur. quippe, totidem iuris peritos, ad supplementum, in singula regna describi solenne est. Post hæc, edicitur dies, quo die victorum nomina voce præconis pronuntiantur. Fit denuo ex omni parte concursus. qui palmam tulere, ij cum exquisito verborum honore magistri appellantur: atque is dies magna conuiuiorum ac ludorum pompa & celebritate peragitur. Noui magistri, phaleratis in equis, ingenti omnium ordinum studio & comitatu, per urbem incedunt. dein missos in regiam, referri Rex iubet in Loytias; quo maxime titulo nobilitas vniuersa censetur: & annum singulis honorarium ad eam personam tuendam attribuit. ac tum denique inter se amplexantur, eiusque collegij necessitudinem persanctam existimant. Porro, ex Loytiarum corpore iudices, & consiliarios, & magistratus creari mos est. neque per ambitionem, aut corruptelas, nullo sui dato in imis documento, raptim ad summa transfiliunt: sed in inferioribus probati spectatiq̃ue, gradatim ad superiora conscendunt. Magistratuum minorum ingens vbique numerus. maiores in vnaquaque metropoli, cum amplissima potestate quinque: neque ij indigenę, quo magis inter ignotos, odio & amore vacui, rectam in administrando rationem sequantur. Inter hosce, omnium consensu, primum dignitatis & imperij locum obtinet Tutan. is, quasi vicario Regis munere, vniuersę provincię præpositus est; ac dignitatis causa, proprio ac separato à reliquis præfectis habitat loco. ad hunc grauisima quæque & maxima referuntur; pleraque decedit ipse, ac de toto rerum statu subinde Regem per litteras edocet. Proximus huic honore habetur Ponchasius, penes quem vectigalium & fisci regij est cura. is cum ingenti scribarum & custodum copia, tuetur ærarium; rationes & codices recognoscit; annua stipendia, salaria, mercedesque distribuit. Sequitur Anchasis, qui cum consilio delectorum virorum, non de ciuilibus modo controuersis ac litibus iudicat; sed etiam rei capitalis



## *Historiarum Indicarum*

talis quaestiones exercet : atque ad hoc tribunal toto eo regno  
§ in causis grauioribus prouocatio est. Porro Aitan rem belli-  
cam administrat, conscribit exercitus, comparat classes ; ac præ-  
cipue in id excubat, ne peregrini in vrbes ac mediterranea sen-  
sim irrepant. Aitani subest postremus omnium Luitisius, vir,  
militaris item rei peritus, qui ad Aitanis arbitrium, prout opus  
est, varias in expeditiones cum exercitu proficiscitur. Sunt  
qui præfectorum alia quædam tradant nomina, & plura : sed v-  
tique magna omnium species : mira maiestas. ac singulis, exce-  
pto Luitisio, à consilio sunt viri decem lectissimi, verum impari  
dignitate. superioris ordinis quini ab dextra sedent, quod a-  
pud Sinas honori ducitur : aureo baltheo, & ( qui regius est co-  
los ) croceo galero : inferioris classis ab laua totidem, cingulo  
argenteo, & cæruleo galero distincti. Si præsidem in prouincia  
mori contigerit ; antiquissimus è consiliarijs in locum defun-  
cti succedit. Ex eodem numero, ad obeundam, ac lustrandam  
Regis iussu prouinciam, legati mittuntur. Caterum cuncti per-  
æque præsidēs & consiliarij, regium insigne gestant ad pectus  
humerosque ; serpentem ex auro textili. Neque minoribus  
præfectis, alijsve, magistro custodiarum excepto, quemquam è  
superioribus hisce nisi de genu alloqui, aut compellare fas est.  
Euntibus in prouinciam, præter vestimenta, & famulos aliquot ;  
nihil omnino vel ad iter, vel ad hospitium, vel ad cæteros vitæ  
usus parandum. in singulis oppidis regij sunt parochi. ab iis  
cuique pro dignitate cuncta benigne præbentur. quod si pri-  
uatis amicorum hospitij vti malint ; pro cibariis numerantur  
pecuniæ. Ineuntibus magistratum, obuiam primum sub signis  
peditum cohortes, & equitum turmae ; tum reliqui ordines cum  
insigni pompa ; & vario symphoniarum cantu procedunt : ea fre-  
quentia per vicos vrbis, magnifico peristromate ornatos, non  
sine honore florum odorumque, nouus præfectus in prætorium  
vsque deducitur. Præsto sunt regij famuli & curatores, qui sine  
vlla ipsius molestia cibos, instrumentum, & suppellectilem ex  
maiestate suppeditent. intra easdem ædes propriis conclau-  
bus ac cœnationibus, aëclæ, scribæ, accensi, lictores, & forense  
ministerium omne alitur vnus Regis impensa : quo plures om-  
nium actionum & vitæ quotidianæ arbitros ac testes habere se  
magistratus intelligat. Iura autem, hoc fere pacto redduntur :  
à primo



À primo mane ad vesperam, paucis horis ad meridiandum intermissis, præcelso in tribunali confidet prætor. cingunt latera iudices. cohors ad imperium parata circumstat. qui ad ius petendum accedunt, intromissi ab ianitoribus, procumbunt illico, & vel eminus ipsi, quid velint, elata voce pronuntiant; vel supplicem libellum recitandum propalam offerunt scribis. Prætor; agitata re, de consilij sententia respondet; ipsumque responsum litteris consignatum à scriba, ipse dein rubricato pigmento sua manu confirmat. Ex aperto administrantur omnia. solitudo, & secreta colloquia, & arcani susurri vetantur, quo minor flagitiis & fraudibus, quæ oderunt lucem, aditus sit. Capitalis noxæ reos, identidem comperendinant: nec nisi lente quæ sita, & ad liquidum cognita causa, condemnant. itaque oppido pauci in tanta hominum multitudine carnificis manu finiunt vitam. Caterum interea, vincti, quam diligentissime adseruantur loco amplo, instar oppidi, celsis admodum parietibus circumsepto; eodemque rerum venalium copia, tabernis, & opificijs, nequid extra petendum sit, ad omnes vitæ usus instructo. carceri, cum magno vigilum numero præest non leui auctoritate vir. is per se, perque suos, custodiarum seriem quotidie recognoscit: & quam intentissima excubat cura, ne cui, delinitis pretio ministris, vel perfosso pariete, suspensive alicunde funibus, aut alia quapiam ratione effugium pateat. Fori vero ipsius, & prætorix turbæ seuera admodum disciplina. graui malo, erratum, atque adeo murmur omne compescitur. qui deliquere; ijs, quo conspectior ignominia sit, vexillum quoddam in manus datur. cum eo vexillo, ad conuentum vsque dimissum, genibus nixi persistunt: ac demum ad Prætoris arbitrium verberibus acerbe mulctantur. ac multos passim videas (neque id propter adfuetudinem probro est) vibicibus liuida, & medicamentis oblita facie. Porro præfectis, cum in publicum prodeunt, multo cum satellitio, gregibusque clientum & amicorum, sella, vti dicebamus, magnifica gestari mos est: & quidem defixis in vno obtutu oculis (quo in genere à prima ætate exercentur) ac toto vultu ad seueritatem tristitiamque composito. Frænati sequuntur equi; variæ umbellæ circumstant: liكتورum anteit manus: quorum, hi regia vexilla; arundines illi tostas ad verbera; alij clauas argenteas ferunt; alij, pendente ex humeris ta-



## *Historiarum Indicarum*

bella gypsata cum sericis floccis, inscriptum magistratus imperium ac potestatem ostentant. Hi omnes, in ordinem bini, magnis clamoribus submouent plebem, quæ vel in domos festina se proripit, vel etiam honoris causa vias euerrit. in transitu vero, mirum silentium: non modo interpellare præfectum, sed ne contra quidem intueri fas est. Rem militarem, non tam audacia vel firmitate, quam numero, & machinis, & egregia in primis disciplina sustentant. Præter extraordinarias copias, quæ variis locis, vbi res postulat, comparantur; in singulis vrbibus, firma ac certa præsidia sunt. pro muris aguntur excubiæ, quas identidem obit circitor: itemque validæ stationes ad portas. earum fores, præter alia repagula serasque, impresso chartæ, & commissuris agglutinato signo, quotidie muniunt: nec nisi eodem à ministris inspecto ac probe agnito, aperire concessum est. Ad limites regni, crebræ & minutæ visuntur arces. quæ vero Scythæ contigui sunt, insanæ substructionis murus in duascentas amplius excurrit leucas, quantum inter duos admirandæ altitudinis montes interuallum est. Ea regionis claustra firmissima. Vbi ex illa parte increbuit belli rumor; confestim à custodibus dato signo, è vicinis castellis & oppidis concursus ad munimenta fit; quoad ab Rege duces iusto cum exercitu superueniant. Equites, elegantissimo ornatu armatiq; prælium ineunt, quaternis ex ephippio pendentibus gladijs, quorum simul duobus perquam scienter vtuntur. pedites item egregie armati pugnam capeffunt. largum vnicuique stipendium optima fide persoluitur. spectatæ virtuti certus ab imperatore honos: contra, ignauix perfidiæque supplicium. Qui ad militiam adscripti non sunt; ijs arma priuatim nulla: quæ maxime res ab intestinis tumultibus otium præstat. Atque vt cæteri magistratus, quo magis caste rempub. administrent, ferantque incorruptam in iudicando sententiam; è longinquis petuntur locis: ita, ordinum ductores, ac militares præfecti, ea de causa leguntur indidem, vt eos ipsamet caritas liberorum & cõiugum, ad subunda belli pericula, & acrius pro aris ac focis dimicandum accendat. Porro, hisce tot præfectis, iudicibus, populisq; cum regio nomine ac potestate vnus præest vir, necis ac vitæ omnium dominus. huius, vel è stipatorum & apparitorum frequentia, vel ex ædium admirabili ornatu & laxitate; vel ex ipso



ipſo genere domesticæ diſciplinæ; veneranda maiestas. Octo habet a conſiliis, è toto Loytiarum ordine lectos viros: is ab Rege ſecundus dignitatis eſt gradus; ſummumque totius gentis oraculum. ſexaginta circiter alit vxores. ſcæminæ tantum, vel eunuchi miniſtrant. ipſe, niſi mutandę ſedis cauſa, vel cum ad bella procedit; fere nunquam excedere ſolet è regia. De omni ſtatu prouinciarum, & præfectorum actis, certior aſſidue fit; veredariis ſeu cursoribus ita diſtributis; vt in ſingulos meſes ex qualibet prouincia litteræ in regiam perferantur. ij, per equos paribus ferme interuallis in via diſpoſitos, celerrime per uolant; ſuumque in ſingulas poſitiones aduentum, quo recentes equi, ſeu ad flumina traicienda naues illico expediantur; vel tintinnabulis perargutis è belluæ ceruice pendentibus; vel etiam, vt apud nos, cornu ſapius inflato prænuntiant. Super hæc, ſtatis ipſe temporibus idoneos viros ad cuncta coram inſpicienda, per omnes regni partes cum ampla poteſtate dimittit. quin etiam, extra ordinem certos è ſuorum fidelium numero in eam ipſam rem deſtinare conſuevit, ſacramento priuatim adaſtos muneris cum cura & cum fide fungendi. id vt quam occultiffime fiat; multa Rex habet apud ſe diplomata, ſuo notata chirographo & ſigno; nominibus tantum ſpeculatoris, & locorum, & perſonarum, ne quid emanet, conſulto ſuppreſſis. Inde, vbi tempus eſt, clam accepto diplomate inſpector idem & cenſor, quam Rex iuſſerit verbo prouinciam, tanquam vnus de populo circuit; præfectisque, ac prætoribus, inter publicæ rei adminiſtrationem, ac prætertım inter dicendum ius, diſſimulanter aſſiſtit. Vbi quæ voluit, probe cognouit; tum demum adit conſilium; & prolato repente diplomate; mira omnium veneratione ſummus totius conſilij iudex & arbiter in ſolio collocatur. Inde, prout exigit res, alios ornat laudibus, atque ad altiores extollit gradus; alios, nulla cuiuſquam tergiuerſatione, vel in ordinem cogit, vel etiam ſupplicijs grauioribus aſſicit. Atque eo præcipue metu magiſtratus ac iudices in officio continentur. In ſingulis prouinciis aurea tabula velata inſcripto Regis nomine cuſtoditur. Eam tabulam ſingulis nouiluniis velo reducto, Loytiæ, & præfecti omnes honoris cauſa inuiſunt, & æque ac Regem ipſum adorant. Demortuo Regi, è filiis maximus natus; ſi deſint liberi (quod in tanta vxorum turba perrarum



## *Historiarum Indicarum*

est) proximus è regia stirpe succedit. cæteri, ne quid eorum causa tumultus existat, remotis inde palatiis ad instar oppidorum incredibili magnificentia, regio cultu apparatuque, in libera custodia detinentur; proposita capitis pœna, si extra eos fines iniussu pedem extulerint. Legatos Regum, qui vel amicitiam expetunt, vel æquo iam ante fœdere iuncti sunt, missa obuiam nobilitate Rex comiter accipit: ac legatione peracta, Loytias appellatos honoris causa, cum amplis muneribus domum remittit. Iam de thesauris, & coaceruatis auri & argenti laminis, admiranda narrantur. nec desunt qui ad nostræ monetæ supputationem; aureorum annua millies ferme ac ducenties centena millia Regem capere pro certo perhibeant: quantum vix moriens Imperator Vespasianus, & quidem pecuniæ diligentissimus, in arario Romano reliquit. Ingens omnino summa: & in cuius contemplatione haud immerito laboret fides. veruntamen satis constat, in vno Cantonis emporio, quod aliis eius plagæ multis & celebritate, & diuitiis inferius est; ex annuæ salariæ vectigali, centum circiter & octoginta millia coronatorum; & in mediocri quodam oppido eiusdem oræ Cantoniæ, è decimis oryze duntaxat, amplius centum millia percipi. vt minime dubitandum sit, quin ad fiscum perueniant immanes pecuniarum acerui quotannis: imperij magnitudinem, frequentiam populorum, exactiones capitum & ostiorum, portoria mercium, frugum omnium decimas, fructus metallorum, & cætera vectigalia reputantibus. Accedit non mediocris ad summam opulentiam momenti res: quod more Turcico & sectæ Mahometanæ totius, in ditione finibusque Sinarum, tributa & stipendia, præter vnum Regem, nemo prorsus omnium imperat. nulli, vt apud nos, Comites, nulli Duces, Marchiones, Barones, vel dynastæ censentur. Magistratus ac præfecturas, non tam in beneficij aut præmij, quam in laboribus ac muneris loco tribuit Rex: neque splendida honorum vocabula, & opimi reditus, hæ redem sæpe degenerem sequuntur. suas sibi quisque diuitias ac dignitatem, studio ac diligentia parat: nec virorum fortium & vigilantium loca, per nobilitatis fucum, ignauia & segnitie occupat. Hæc ferme Sinarum bona laudesque: quas tamen easdem grauioribus malis vitiisque superari non dubium est. Religionis, quæ iustitiæ prima & præcipua pars est, cura genti postrema.



postrema. Sacrificulis (quos patrio fermone vocant Hoxiones) exiguus admodum honos. templa vulgo adēunt consuetudine magis & instituto quodam, quam quod mortalia curari ab Dijs; vel humanis dictis, factis, cogitatis interesse cœleste numen existiment. Sane Euangelium accepisse olim ab Apostolo Thoma creduntur, vt supra dictum est: & imago testatur id ipsum proceræ mulieris, puerulum in sinu fouentis, cui ardentē hodieque lychnuchos more nostro suspendunt. Sed nec Apostoli vlla iam ibi mentio: & cuiusnam ea sit effigies, prorsus ignorant. adeo, vel ipsa regionum longinquitate, vel diuturno cultorum desiderio, in ea terra semen omne Christianæ pietatis interiit. Qui sapientiores habentur, ij arcanis & quæ non temere vulgent decretis, Pythagoræ ferme somnia de transmigratione animorum sequuntur: & pro meritis actæ vitæ, sua cuique præmia & supplicia, ex communi omnium gentium opinione constituunt; sedesque fingunt refertas cunctis iis, quæ vulgo vel ad felicitatem prima, vel ad miseriam extrema ducuntur. Capillum tam diligenter iccirco nutriunt, quod credant ea se tanquam ansa in cœlum aliquando sublatum iri. sacrificuli contra (qui quidem cœnobiticam agunt vitam) abradunt capita, quod sine tali adiumento sydera se conscensuros esse confidunt. Mundum vniuersum ex aqua initio conditum affirmant, quæ vehementius agitata, è spumis ampullisque, cœlo; ex imis partibus & crassioribus, materiam terræ præbuerit; reliqua reseruarit sibi. Interrogati, quisnam initio aquas agitarit: sponte ciendi vim ius inditam fuisse respondent. Rursus, vbi quæritur, à quo eam ipsam vim ac virtutem acceperint; subriident, quasi plane ibi sistendum, neque sit vltra procedere. Primos homines vna cum cæteris animantibus ac plantis, aiunt è terra exstitisse. ac sine legibus, aut vllō iure, vagos ac feros, arborum baccis, & crudis carnibus initio vesci, & sanguinem potare assuetos, ipsa dein ratione dūce ac magistra, frugibus ali, tecta moliri, vrbes condere didicisse: adhibitoque studio, paulatim à barbara & agresti vitā, ad cultum & mansuetudinem fuisse traductos. Non pauci, muta simulacra, vel etiam informes adorant lapides; namque ij ferme Dij gentium sunt. Ad hæc, artis cuiuslibet inuectores, aliosque priuatim aut publice benemeritos, quidam etiam parentes, carosve, in numina referūt.



## *Historiarum Indicarum*

iisque & statuas ac templa ponunt, & vota faciunt, & adolent thura, non mortuis modo, sed interdum etiam (quod magis detestere) viventibus. Alij Solem, & Lunam, ac stellas, cœlumq; præcipue ipsum, vnde cuncta in terras bona promanent, omni studio colendum existimant. Sunt etiam, qui inferna venerentur monstra succincta colubris, & igneo vomitu, cuiusmodi cacodæmones in Europa depingimus. neque id tam impetrandi cuiuspiam commodi, quam depellendi maleficii causa. quippe obseruantia interdum eiusmodi visa, maiorem in modum extimescunt. Sed qui simulacris diuinos habent honores; ii inter cætera illo vel in primis ridiculo genere superstitionis vtuntur. Ad captanda itinera, vel grauiores quaslibet auspicandas res, adhibita ad statuam precatione, sortes obseruant: quarum est ritus eiusmodi. Dimidiatos globulos è ligno duos, ad iuglandis fere magnitudinem, filo traiectos; coram simulacro ipso temere ac fortuito iaciunt. Si ambo supini, vel etiam alterno cōfederint situ (quod vulgo infausum putatur) idolum verbis ac iurgiis male admodum accipiunt: dein, quasi contumeliæ pœniteat; rursus delinimentis, votisque, ac supplicationibus propitiare contendunt. Si nihilominus aduersæ appareant sortes; idolum videlicet acerbius plectitur. ad verba accedunt verbera; in aquas proiicitur; amburitur igni: dein blanditiis denuo, ac promissis placatur. atque in hac vicissitudine tamdiu persistunt, quoad iacta in sortes ambo misilia prona consistant. Tum vero, modulato carmine grates laudesque agunt inani Deo. mox etiam, egregie conditas coctasque gallinas, anates, anseres, oryzam, &, quod præcipuo est in honore mensarum, offerunt suillum caput, & cantharum vini. Ex iis vbi singulis aliquid in disco; porcini capitis imas auriculas, reliquarum altitium vngues, vini guttas aliquot in ara simulacro apposuerint (qui vetus est libandi mos) cæteras ipsi dapēs magno cum tripudio, & effusa lætitia comedunt. Mortuorum exsequiæ celebrantur in hunc fere modum. Patrem familias, vt exspirauit, quam optimis vestimentis indutum, in cathedra collocant. huic ad genua procumbens vxor primum, dein filii, tum reliqui deinceps propinqui & amici cum lamentis & lacrymis vltimū dicunt Vale. Postea corpus in arcam includunt, ex odorata & minime putri materia: commissuris cum alio spissamento, ne

fector



fetor emanet; tum lamina ferrea diligenter obstructis. eam arcam in amplo conclaui, vestitis lino parietibus, à terra suspēdunt, ac linteo tegunt, in quo picta imago defuncti conspicitur. Ante id conclaue, aut in ipso ædium vestibulo, stant mensæ opiparis onustæ dapibus. quindecim ipsos dies arca domi adseruatur: cognati & noti locum officij causa frequentant; sacerdotes vero, noctu præsertim, piacularia sacra Diis manibus faciunt; ac pictilem chartam vel supet demortui cadauer cum certis carminum præfationibus cremant; vel prætentis toto conclaui funibus appensam agitant; vociferantes, eo motu animū defuncti ocyus ad astra tolli. post quintumdecimum diem, arca in campum sepulturæ dicatum solenni pompa deuehitur. ibi cadauer inclusum, paulatim absomit dies. interea sese identidem Hoxiones ingurgitant cibo: eaque illeæti sagina, locupletum præcipue funeribus inhiant. Mortuos, proximi biennium, vel etiam triennium lugent. quo temporis, spatio crasfiorem tunicam apprimunt carnibus, & horrida sese recte præcingunt. filij, si personam gerant publicam, illico se abdicant magistratu. Hæc de sepulcris. Ac ne maritimæ quidem res suis carent superstitionibus. Quæ naues primum deducendæ sunt, hæc Lunæ, vel cuiuspiam fabuloso dicatas Deo, variis expiamentis & supplicationibus lustrare mos est. Ac cæteris item in rebus alias alij cæremonias ac ritus obseruant. Sunt qui omnem de Diis ac spiritibus opinionem plane & impune derideant: vnum esse interitum hominum ac iumentorum; neque post mortem restare quicquam omnino, arbitrentur. Huic de superis persuasioni, consentanea hominum ipsorum inter ipsos est fides: quam eatenus colunt, quatenus commercij necessitas, & fructuosa existimationis ratio postulât. ea remota, nequaquam ij sunt, quibuscum in tenebris mices. quin etiam, totius humanitatis multis in rebus videntur expertes. alienigenam ferme auersantur, & interiore (vt dictum est) usu & hospitio prohibent. Aere alieno pressi, liberos vel mancipio & nexui dant; vel etiam (quod multo flagitiosius est) adhibita omni lenociniorum arte, prostituunt. Vngues enormem in longitudinem excrescere patiuntur: quasi verò id (quemadmodum apud Græcos olim & crepidis vti, & comam alere) ingenui hominis, & sordidis operibus nequaquam occupati indicium sit. Cognitores capitulum



## *Historiarum Indicarum*

talium rerum, amplianda toties causa, per speciem lenitatis, di-  
ram crudelitatem exercent. quippe rei, quorum magna semper  
est multitudo, interim onusti carenis, noctu præsertim, arctissi-  
meque inter se constipati & constricti, adeo sæua ac tetra cu-  
stodia detinentur; vt dilatam à iudicibus mortem haud pauci  
quotannis accersant, sibi que ipsi afferant vim. Interea, in con-  
spectu comeffantis ac ludibundi sæpe iudicis, seriæ quæstiones  
per tormenta exercentur: quorum cum alia sunt genera; tum  
illud quotidianum. Pro virgarum fascibus cubitali arundine  
vtuntur, cuius ante meminimus, lata digitos quattuor, crassa v-  
num; & quidem igne tosta, quo grauiorem faciat plagam. hoc  
sæuitiæ instrumento, humi stratorum, ac sæpe infantium artus  
ac plantæ adeo acriter & acerbe caduntur, vt qui non robustis-  
simo sunt corpore, vel fracti ac debilitati discedant; vel etiam  
inter ipsa verbera nonnunquam expirent. Cum hac gentis im-  
manitate, profusa libido coniuncta est. abdomini cæterisque  
indignis homine voluptatibus intemperanter indulgent. Le-  
ges & edicta magis ad seruitutem & abiectionem; quam ad vit-  
tutem & animi magnitudinem, informant populos: atque ob  
id ipsum, etiam in bellica re nationibus aliis inferiores haud im-  
merito existimantur. Externum ad grauiores expeditiones  
conducunt militem. Id firmamentum est belli. Rex, barbara  
& stulta quadam arrogantia, sese dominum mundi, cœli filium  
appellat. Priuatorum fortunas, & partam sudore & vigilantia  
rem, per publicanos & exactores durissimos atterit: ex ipsis e-  
tiam capturis impudicarum, quod à Caligula olim factum legi-  
mus, sedisimo vectigali instituto. Externorum Regum orato-  
res, quos quidem iure beneficiario sibi habet obnoxios (sunt  
autem plures variis impositi nationibus, quarum olim imperiū  
deposuit Sina) per summum fastum & superbiam tractat. Non  
nisi humili equo insidentes, qui pro habenis vili regatur fune; in  
regiam urbem despiciatissimi introeunt. dein pedites intra pa-  
latij aditum accepti; ad partem eam in qua latere audierint  
Regem (nam ipsius quidem aspectu prorsus arcentur (cum qui-  
na ex interuallis adoratione procedunt. tum elata voce, lega-  
tionem, nixi genibus peragunt. adest regius apparitor, qui cun-  
cta per scribam excipiat; idemque, veluti numinis internuntius,  
ferat ab Rege responsum. eo accepto responso, cessim orator,  
&



& subinde flectens genua, plane inhonoratus abscedit. Inter hæc, & alia longe turpiora, quorum vel mentionem bene morata horreat mens; nihilominus elato supercilio Sinae reliquas omnes gentes præ se contemnunt: rudes, inertes, barbaras putant. de suis tantum ipsi rebus magnifice & gloriose non sentiunt modo, sed prædicant. Nostris tamen hominibus tribuere non nihil videntur. quippe Sinas utroque oculo præditos aiunt, Europæos altero, cæteros neutro. In hosce mores & instituta, Christi disciplinam inferere, quantæ sit molis, quilibet non imperitus rerum existimator facile iudicauerit. obstant regia edicta, & difficultas introitus. Obstant conspirationes antistitum, qui peregrina in eas terras inferri sacra; & extorqueri sibi nefarios quæstus, & coargui mendacia minime patiuntur. obstant regionis feracitas, & libidinum illecebræ, & cætera malorum irritamenta; &, quo nihil cœlesti philosophiæ inimicius est, fastus & superbia, & suarum omnium rerum amor quidam infinitus. accedit educatio puerilis, & fabulæ, & opinionum hausta cum ipso lacte peruerfitas. Verum nihil plane maiori est impedimento, quam nostratium Christianorum (quos ethnicis præluere ad omnem iustitiam & castitatem oportuerat) tanto nomini ac professioni minime consentanea quotidianæ vitæ documenta. neque enim tantam spectata paucorum innocentia & virtus adstruit Euangelio fidem; quantam insignis multorum, & notissimi fere cuiusque, avaritia & improbitas adimit. Hactenus de Sinarum moribus; quo in genere varia, tametsi nondum ad plenum explorata, subinde in Lusitaniam perferuntur: quæ ego si persequi velim, immemor propositi mei sim, quo mihi præcipue nostrorum hominum acta, non aliarum gentium ritus, vel instituta, litteris mandare decretum est. Nunc ad institutum reuertor. E Sinarum prouinciis, maxime occidua est Cantonia. Eo priusquam peruenias, multæ occurrunt insulæ; quas præfecti regij præsidis & clasibus tenent: neque ipsorum iniussu progredi aduenas Cantonem est fas. Fernandus Andradus, ut exponere ceperam, cum ad Tamum insulam peruenisset; post diuturnam moram, transitu ægre tandem impetrato, cum duobus expeditis & egregie ornatis nauigiis, cætera classe ad Tamum relicta, Cantonis portum inuehitur; ac magistratum permissu Thomam legatum exponit; cui ædes & lautia

de



## *Historiarum Indicarum*

de more attributa . ibi Fernandus, mira lenitate ac iustitia con-  
trahendo cum incolis; haud ita difficili negotio aditum ad ea  
commercium nostris aperuit: auxit probitatis existimationem,  
quod sub tempus reuersionis, de suo discessu per praconem to-  
ta vrbe denuntiari iussit; ut si quis quid vel ab se, vel ab suorum  
quopiam, vel crediti, vel commodati, vel quouis alio nomine  
repetere vellet; mature profiteretur. Ea res videlicet magni &  
innocentis animi visa. & ex vnus viri moribus, de totius na-  
tionis virtute nimirum existimabant: apparebatque maximo  
cum rei Lusitanæ incremento societatem hanc institutam; nisi  
post Fernandi profectiorem, aliorum deinde nauarchorum cu-  
piditas ac licentia, qui Malaca ad spem ingentis lucri, in eadem  
loca venere, opinionem Lusitanicæ iustitiæ fideique propemo-  
dum sustulisset omnem. Siquidem ex iis quidam ad Tamum in  
terram egressi primò ne appellatis quidem magistratibus, ca-  
stellum excitarunt. ibi tormentis vigiliisque dispositis, impe-  
rium vsurpare, negotiationem communem interuertere, ac sibi  
proprie vindicare; externos æque atque incolas iniuriis & cõ-  
tumeliis intolerandis afficere; virginibus vim inferre; à pla-  
giariis ingenuos ingenuasque coemere; non popularibus mo-  
do suis, & optimo Regi, verum etiam, quo nihil atrocius est,  
Christianæ disciplinæ, sanctissimisque parentum institutis, de-  
decori ac probro esse. itaque paucis diebus, instigante malo de-  
mone, meriti sunt; ut non pro sociis amicisque, sed pro immani-  
bus piratis atque hostibus haberentur. neque vero sum ne-  
scius, hac ipsa minuere Barrium & eleuare dicendo. cuius ego  
auctoritate fretus, multa reticuissem; nisi eadem illa Goësius  
primum, dein Osorius plane disertis verbis arguerent. Igitur  
Lusitani, è præfectis regiis valida classe circumfessi, cum in eo  
iam esset ut caperentur; seu tempestas repente coorta Sina-  
rum naues dissipauit, ac distulit. Per eam occasionem elapsi,  
pecunia, quam gloria conspectiores Malacam rediere. Tristior  
multo fuit Thomæ Petreij legationis exitus. is magno labore  
quadrimestre amplius iter emensus; cum ad regiam denique  
peruenisset; præoccupatas cum aliorum; tum vero Cantonio-  
rum magistratuum litteris & criminationibus, Regis & satrapa-  
rum offendit aures. ita, non modo Regis conueniendi potestas  
legato facta non est, sed etiam de consilij sententia pro explo-  
ratore

ratore comprehensus, & Cantonem remissus, in carcerem con-  
ditur: ubi omnibus incommodis paulatim absumptus, inter  
maleficos furesque nocturnos vitam miserabili sine con-  
clufit. Hunc maxime in modum, paucorum scelere  
alienati Sinarum animi, & famæ fideiq; inesti-  
mabile damnum est factum. ac deinceps,  
quotquot ex orbe nostro in ea loca  
vel suis, vel alienis nauibus deue-  
nere; pessime accepti mul-  
tatiq; sunt: & com-  
plures in annos,  
nomini  
Christiano, ac Lusitano præfer-  
tim, ora nulla fuit  
infestior.

*Libri Sexti Finis.*





# HISTORIARVM INDICARVM, LIBER SEPTIMVS.



**N**TEREA Sultanus Campson, ad abo-  
 lendam acceptæ ad Dium cladis macu-  
 lam, & arcendos Arabia Lusitanos, clas-  
 sem omni conatu ad Suezium repara-  
 bat, auctore maxime Hoceno Persa, de  
 quo supra docuimus. Is, cum ex Dienfi  
 prælio, Campsonis iram non sine causa  
 pertimescens, ad Mamudium perfugis-  
 set Cambaia Regem; placandi Cam-  
 psonis, & recuperandæ pristinae digni-  
 tatis & gratiæ, tale consilium iniit. Gid-  
 da est emporium in Arabico sinu, diei ferme itinere à Meca;  
 idemque portus peregrinis, qui praua inducti religione, ad falsi  
 prophetæ sepulchrum vndique confluunt. Ea vrbs, quod nul-  
 lis clausa mœnibus, nullo præsidio vel arce teneretur; & aliquo-  
 ties iam à Campsone defecerat, & Arabum campestrum, quos  
 vocant



vocant Baduinos, incursionibus repentinis erat vehementer infesta. Porro Lusitani si frequenti navigatione ijs regionibus adfuescerent; metuendum erat, ne Gidda nullò negotio occupata, eodem impetu Mecanam euerterent ædem; ac Mahometis reliquias, ad solatium interceptæ ab Saracenis Hierosolymæ, dissiparent. Eo animaduerso periculo Hocenus, totam rem cum Cambaiano Rege primum, dein cum satrapis, & principibus cōtulit. publicamque iactando causam; & religionem ac pietatem (vt sæpe fit) priuatis rationibus prætexendo, facile obtinuit, vt contra vim Lusitanam, cingendæ muris Giddæ magna sibi cum à Rege, tum à priuatis, pecuniæ subsidia præberentur. Cum iis subsidiis Giddam delatus, ingenti oppidanorum lætitia excipitur. Inde primum ausus Campsonem compellare per litteras, culpa cladis nuper acceptæ, neglectas in religiones, & iustam nummis iram artificiose collata; docet, sibi esse in animo, ad sacrarium Mahometis ab omni tuendum iniuria, & Lusitanos Arabico littore prohibendos, Giddam vndique apertâ firmare munimentis: id vbi summa ciuium voluntate perfecerit; tum etiam, in Campsonis gratiam, nec opinantibus iis arcem imponere; ne, quod antea fecerint, in posterum ab eius imperio atque auctoritate desciscant. In eam rem affatim sibi pecuniæ aliunde suppetere: tantum à Campsone sibi peritis munitoribus opus esse. postremo hortabatur, vt aduersum conatus nostrorum, classem sine mora reficeret: accensisque ad Mahometanam tuendam rem, Christianosque pellendos, Indorum principum studiis, ne deesset. Ea satisfactione, tamque enixo studio religionis delinitus Campson, non iras modo posuit; sed etiam structores & architectos Giddam extemplo deportandos curauit: quorum assidua opera, & Hoceni sedulitate, breui murus cum propugnaculis vrbi circumdatus est. arcis extruendæ, quod maturum eius rei tempus nondum esset, cura in posterum dilata. Simul etiam, comprehensis in Alexandrino portu naualibus fabris Italici maxime generis, & cum noua materia transmisissis, vt ante, Suezium; clasfis ædificata maiorum nauium, quæ partim remis, partim velis agerentur, septem circiter & viginti. In eas epibatæ impositi ad tria millia, missi Mammaluci Arabesque; & ex aliis nationibus Christianæ ferme fidei desertores. Omnibus iis præpositus cum summo imperio nobilis archipirata



## *Historiarum Indicarum*

archipirata Solimanus Mitylenæus, qui tum propter latrocinia Turcicis finibus exsulabat, adiuncto legato eodem Hoceno; quem pro Mir Hoceno, Amirafen, vocabuli similitudine decepti, dixerere nonnulli. Erant tum Arabicæ fauces, quasi victoriæ præmium, Ægyptiis ac Lusitanis in medio positæ: neque erat dubium, quin utriusque prioribus ea claustra custodiis occupassent; Arabicum pelagus, totamque eam navigationem essent in potestate habituri. itaque iisdem utrinque artibus & consiliis certabatur. utrisque propositum erat Adeno potiri: sin id minus essententia cederet; vicinum aliquem locum permunire, atque obtinere præfidiis. Quod cum Albuquerqueius iam ante frustra tentasset; tum Solimanus quoque aggressus, cum vniuersa classe primum omnium Adenum accessit. & initio conatus oppidanos ad voluntariam deditioem allicere; cum ferocia responsa tulisset; urbem summa vi oppugnare constituit, ignarus, præter muros turresque præualidas, quam illa firmo ac fidei præsidio teneretur. Si quidem ad primos Ægyptiæ classis nuntios, Amiriani præfecti accitu, non è vicinis modo locis magna auxilia conuenerant; sed ipse quoque Rex, ab Elach vrbe, quæ caput est regni, cum haud contemnenda militum manu raptim eo sese contulerat. Igitur admotis ab Solimano triremibus, vario genere tormentorum vrbs acriter quati cepta. iamque crebris ictibus labefacta non exigua muri pars cum ingenti fragore prociderat: & Solimanus Mammalucos ad ineundam forti animo pugnam hortatus, veteremque militiæ gloriam nouo de core augendam; copias ad littus exponit. perque patefactum ruina iter ausus in urbem irrupere, præter opinionem acerrime resistentibus oppidanis, cum magna suorum cæde vulneribusque repellitur. Ergo, tum ex propugnatorum frequentia; tum ex vnius temere tentati prælij euentu coniectans, quam non suarum virium ea oppugnatio esset; conscensis trepide nauibus, retro ad Camaranum auertit iter. Ibi, exposito omni fabrilis instrumento, idoneus arci extruendæ locus eligitur. ac positis fundamentis, intenta cura & labore murus ducebatur latus pedes duodetriginta. Caterum, superante in id multitudine, Solimanus, ne otiosa interim haberet statua; Hocenum cum nauali maxime turba ad opus promouendum reliquit. ipse cum expedito milite in continentem egressus; oppidum Ara-

biæ

biæ Felicis, Zebitum, duodecim ferme leucas à mari, improuiso aduentu cepit. Locus erat cum refertus opibus; tum etiam elegantiâ & cultu visendus. ibi dum Solimanus partim amœnitate regionis, partim dulcedine prædæ retentus, moram trahit; interea ad Camaranum tristes nuntij incerto auctore afferuntur, Campsonem cum omnibus copiis ab Selymo Ottomano deletum. Hocenus, qui & ab innato Persis in Græcos odio, Solimanum auersaretur; & antelatum eum sibi in maris præfectura periniquo pateretur animo; oblatam occasionem auide arripuit, ab eius auctoritate classiarios abducendi. concione aduocata, cunctos hortatur, ut quoniam Aegyptia res in extremum sit adducta discrimen; operosa & inutili abiecta munitione, secum ad urbem Giddam è vestigio redeant; oppidumque in primis opportunum, ac recenti firmatum opere; itemque classem tanto impendio & labore paratam, Aegyptio imperio seruare nitantur. Neque in id, consulto imperatore opus esse, qui & incerta fide vir, & natura Ottomanico addictus nomini; quæ prima se dederit facultas placandi ac demerendi Selymi, nulla iurisiurandi religione rem Aegyptiam sit hosti teterrimo proditurus. Ea oratione gratius nihil ad aures Aegyptiorum accidere potuit. nam præterquam quod cœli, & aquarum grauitate, valetudo maximæ partis tentari erat cœpta; fremebant insuper, se in sordido, ac laborioso, & nullius emolumenti ministerio relictos; cum interim cæteri, partim vrbis opulentæ spoliis ditarentur; partim etiam ad satietatem sese in somnum, ac cibum, aliasque voluptates immergerent. Inde, omissa ædificatione, vnanimes Giddam extemplo traiciunt; nauigiis aliquot ad Arabicum littus non tam in Solimani gratiam, quam ad Mammalucos deportandos relictis. Id ubi rescivit Imperator; iectus atrocitate facinoris, perfidum ac seditiosum Hocenum increpitans, cum ea quam habebat manu sine mora subsequitur. Ad urbem Giddam appropinquanti portæ ab Hoceno clausæ. tum verò accensus rabie ac furore Solimanus palam se ad oppugnationem accingere, cruentaque inter ipsos Mahometanos haud dubie pugna imminabat; ni Paracates, Macanæ præful ædis, cognito

O      periculo,



periculo, confestim aduolasset. Eius aduentu s. data certamina, patuitque Solimano introitus, ea lege, vt dum de Campsonis voluntate vel obitu certiora afferrentur, iis quas tum habebat copiis dux vterque separatim præfesset. Caterum intromissus Mitylenæus, fide nimirum egit Aegyptia. Comprehensum fraude Hocenum, vti opibus imperioque plus poterat, in vincula coniicit: dein silentio noctis prouectum triremi in altum, fluctibus mergi iubet. Ita, ad vnum Solimanum, rerum omnium potestas, & arbitrium rediit. Ac paulo post, explorato & cognito exitiali Campsonis exitu; vt in gratiam cum Selymore diret, trahendis in Ottomanicam ditionem omnibus circa nationibus populisque, operam deinde nauauit egregiam: ac demum ab Solimano Selymi filio Cairi præfecturam adeptus est. At Emmanuel, de Sultani comparatione rursus ab Rhodiis certior factus; ad Prætorem Lupum Soarium de rebus iis mature perscripserat; mandaueratque vt contra eum apparatus summa ope instrueret sese: ac quanta maxima posset classe vltro ad Arabiam tenderet; neu Aegyptios cum Indis coniungi (nam id erat iis initio constitutum) vlla ratione pateretur. Soarius, ab dimisso in Sinas Andradio, statim ad eam expeditionem omnes curas, & cogitationes intenderat: adhibitaque diligentia, naues, quot antea nunquam, septem & triginta, cunctis rebus ornarat. Cum iis profectus ab Goa, præter Cambaiam Armuziâque, repente ad Adenum applicuit. Percussus inopinato aduentu, & classis magnitudine Amirianus, qui magnam muri partem è recenti Aegyptiorum oppugnatione stritam adhuc ruinis haberet; excidium metuens, tempori paruit; & clauis vrbis confestim ad Lusitanum suppliciter misit: & cur sibi minus cum Albuquerque conuenisset, causatus præfractum & asperum ingenium viri; sese ad urbem dedendam, accipiendum intro præsidium, & imperata facienda paratum ostendit. Omnino præclara erat occasio tam opportuna potiunda vrbis; & maximo rei Lusitanæ compendio, Saracenis & Aegyptijs Indicum mare in omne tempus intercludendi. Verum Soarius, antiqui moris homo, qui nimirum alienam è sua æstimaret fide, nequid copiarum in ea custodia relinquere cogeretur; atque vt quam integerrimas ad hostem afferret vires; prauo, quin potius nullo consilio, rem in posterum distulit: in præsentia, commeatu multo  

plici



plici in classem exacto, ad Camaranum procescit. At Amirianus, & incolæ, ingenti leuati metu, nulla mora interposita reficere muros, alimenta conuehere, custodias augere, nitique certatim, vt tam eximîæ, tamque insperatæ superum in sese indulgentiæ, pro sua quisque parte respondeant. Interim ad Camaranû fœda tempestate naues Lusitanæ amissæ quattuor; quibus, præter validam iuuentutem, omnis etiam vehebatur ædificandi apparatus. dein, cum nusquam appareret hostis; dimissæ ad explorandos maris recessus aliquot actuariæ. In eas cum incidisset excussum ex Aegyptia classe nauigium, in quo erant Italici fabri ferme triginta, cognitum ex iis est, Solimanum Giddæ se continere, subductis in tutum nauibus. magnam ibi sollicitudinem, magnum esse terrorem; quod Lusitani ad dimicandum parati omnium virium mole aduentare dicantur. proinde, si perculsis quamprimum instent; urbem haud dubie vel armis, vel conditionibus, in potestatem esse venturam. Hoc nuntio erectus Prætor, extemplo Giddam iter edixit. Vt in conspectu fuit clasfis, primo in vrbe vsque adeo trepidatum est, vt desperata defensione oppidani vulgo pararent fugam: Prætoris dein mora, & Solimani adhortatio restituit animos. Et copiæ ab eodem extra mœnia productæ, ad ostentandam hosti fiduciam, instructo agmine decurrere. Addebat audaciam ipsa loci regio: quod vrbs à mari, admodum insidioso accessu, cœcis & humilibus circa vadis, vno tantum, & eo sinuoso ac perangusto adiur euripo. cuius cum in ipso flexu castellum excitarent, tum etiam aliis locis tormenta in hostes opportune direxerât. Quæ omnia non tam ad reficiendos ex timore oppidanos, quam ad absterrendum à congressu Prætorem valere. Ergo, ne Lusitanam rem in discrimen obiiceret, nequicquam exposcente pugnam milite, & minoribus præfectis tantam ignauitæ notam inuri nomini Lusitano quærentibus, Prætor oppido abstinuit; paucas tantum naues in portu succendit: ac tanto apparatu nulla re gesta, explodentibus & exhibulantibus de more barbaris, in-eunte iam hyeme ad Camaranum reuertit. Ibi, quod nulla ad ædificandum cémenta suppeterent, inchoatum ab Aegyptiis opus institit demoliri. Quo in opere dum dies noctesque naturalis turba versatur; ex aeris intemperie grassari morbus in clasarios cœpit: ac paucis mensibus tetralue absumpti permulti.



## *Historiarum Indicarum*

accedebat ad grauitatem cœli, magna annonæ difficultas, vt in deserto loco, & hostili circa regione. Factum ē Ceilifo proximo vico Arabes venalia cibaria ad littus comportare cœperunt. sed care Lusitanis id subsidium stetit. Lembus vnus ē classe ad commercium quotidie commeabat. Is, cum nihil tale nostri timerent; ab duobus speculatoriis Aegyptiorum nauigiis, indicio & fraude Ceilifanorum excipitur. Lusitani septendecim in eo lembo nauigabant. Comprehensi omnes, & minime tum vulgari munere, ad Selymum ab Solimano transmissi sunt. Inter hæc clades & ærumnas, hyberna transacta. & aperiente se iam vere, Prætor, ne nihil omnino egisse videretur; ex Arabico sinu ad Africum littus traiecit. Aualites ibi est emporium olim nobilissimum: nunc, vt humanæ sunt vices, negotiatoribus infrequens; ac vulgo Zeila appellatur; nullis vallatum menibus, aut propugnaculis: ac tum, propter finitima cum Abasino bella, magna ex parte desertum, modico, tantum in speciem, reguli præsidio tenebatur. Id oppidum, quod Solimano Adenum petenti enixe fauerat, omniaque necessaria benigne suppeditarat; Lusitanus Prætor oppugnare ac delere constituit. Expositis cohortibus aliquot, per minores duces haud ita magno certamine confecta res est: cæsisque custodibus, in ipsa tecta facibus & incendiis adeo acerbe sæuitum, vt ne alimentis quidem, quibus vel maxime egebant, Lusitani pepercerint: nimirum Adenica freti copia, quo Prætor tanquam ad certam possessionem tota spe & cupiditate ferebatur. sed eum improvida longe fefellit opinio. siquidem ab Zeilana clade transfuctus Adenum, cum ab Amiriano fidem promissi repeteret; magno suo dolore denique sensit; quam fugacia sint occasionum momenta, & quam irreuocabilis rerum bene gerendarum præteruolet opportunitas. Amirianus quippe, dum rubro mari Lusitani vagantur, non modo nouis operibus militibusque firmarat urbem; sed etiam per exploratores, de naufragiis interituque nostrorum, ac turpi ab Gidda recessu didicerat. Itaque rediens quassata classe & imminutis copiis Prætor, adeo non mouit oppidanos, vt iis etiam ludibrio & contemptui fuerit. In summa rerum inopia, portu exclusus, modica vix aquatione impetrata, plenus damni ac mœroris, Indiam irrita expeditione repetiit. Quietæ dein ab Aegypto res per aliquot annos fuisse, dum



dum Ottomanus, extincto Sulthano, & sublati ab radice Mamelucis, Alexandrinum imperium, & Africae noua regna sibi constituit. Per eosdem ferme dies, quibus circa Arabiam naualis afflicta res est, ne Goa quidem vrbs multum ab extremo periculo abfuit vnus hominis temeritate, quem arcta sibi affinitate deuinctum discedens Prætor, Goæ Præfectum perampla cum potestate reliquerat. Huic simulas vetus cum Calderia quodam intercedebat, Albuquerqueij alumno, viro egregie strenuo. qui post Prætoris profectionem, vbi summam rerum omnium penes aduersarium vidit; veritus, ne is pro magistratu exerce- ret inimicitias; ex insula in cōtinentem profugit Pondam, quo nomine portus vicusq; abest ab Goa passuum circiter octo milia. Pro Idalcane Ancoſtan ijs finibus præerat. Ab eo, propter fortitudinis famam Calderia comiter acceptus, in honore habebatur. Id vbi Goanus rescivit; per internuntios inimicum ex- fulem ab Ancoſtane vehementer expetiit. Ancoſtan, qui ad re ac dignitatem Idalcanis pertinere arbitraretur, tutum ad se cui libet esse perfugium, præsertim cum in fœdere nihil eiusmodi nominatim cautum fuisset; adduci se non est passus, vti receptum in fidem Lusitanum exposcenti proderet inimico. Ea re accēsus Goanus, per interpretem conuitia primum & minas in Ancoſtanem iacit: dein, specie transfugæ, percussorem Calderiæ submittit Ioannem Gometium, virum audacem, & ad eiusmodi promptum facinora. Is à Calderia in hospitium benigne acceptus, & in Ancoſtanis amicitiam ac familiaritatem breui perductus; cum inuitatu Ancoſtanis, oblectandi animi causa, in campum vna cum cæteris primoribus prodiisset; per causam se- cretioris colloquij seductum paulisper à comitatu Calderiam, pene in Ancoſtanis conspectu, nihil minus opinantem interficit, ac subditis equo calcaribus inde se proripit. Enimvero indigna res omnibus visa: & dimissis continuo equitibus, è fuga retractum insidiatorem sua ipse manu Ancoſtan iratus obtruncat. Tum vero amens furore Goanus, omnibus modis amicum vlcisci, ac priuati odij causa, publicam rem in discrimen vocare non dubitat. Paschales tum forte agebantur feriæ; & instabat quinquagesimæ diei celebritas, quam Græco nomine Pentecosten appellant. In eum diem Præfectus, per simulationem ludorum atque certaminum coacto milite, Fernandum fra-



## *Historiarum Indicarum*

trem, & Ioannem Machiadum, de quo supra commemorauimus, Pondam quam occultissime iubet intrare, & Ancoftane ipso interempto, vicum præda exhausta delere. Octoginta non amplius equites in eam rem vtrique attributi, & pedites Lusitani septuaginta, & Indorum maior aliquanto numerus. Ij noctu vado transmissi, cum, si maturatū foret, hostes alto sopore mersos in tenebris opprimere potuissent, atque id ipsum enixe Machiadus hortaretur; Fernandus, penes quem erat imperium, lucem opperiri æque stolido ac pertinaci consilio maluit. atque hæc ducis ipsius: illa militum fuit culpa. Campum, in quo Pondam iacet, ab Goa petentibus, arctior & impeditior saltus intrandus est: cuius fauces vel pauci homines facile tueantur. Ad eas obtinendas angustias, quo tutum, si res posceret, copiæ receptū haberent; prouido Machiadi monitu pedites relictī complures. ij, vt agmen præcescit, ne prædæ postmodum expertes forent, statione per summum scelus deserta, protinus antecedentium vestigia subsequuntur. Vti Pondam appropinquatum est; obscura nox & quies vtrinque texit inceptum. Aduentante dein luce, fremitus equorum, & armorum fulgor insidias prodidit. Conclamatum ergo confestim ab incolis ad arma est: & primo ignari quanta Lusitanorum esset manus, Ancoftane duce, fluuium qui Pondam præterfluit, raptim transgressi, in tutum sese recipiunt. mox, paucitate nostrorum animaduersa, collectisque è repentino pauore animis, denuo traiciunt flumen; & in hostes palatos, atq; ad rapinam potius quam ad pugnam intentos, conferti ipsi & conglobati dant impetum. Vix primam impressionem sustinuit Lusitanus; &, paucis exceptis, cæteri cursu angustias repetunt, loci difficultate, si minus virium præstantia, sese defensuri. verum eas quoque nudas custodibus, barbari iam infederant. ita, in medio deprehenso Lusitani passim ceduntur. Machiadus, egregia corporis & animi fortitudine cum aliquandiu restitisset, neque vllam cerneret spem salutis; ad Fernandum conuersus, erumpe tu, inquit, si qua potes, dum hostem ego vtcunque summoceo: & Goam vbi perueneris, fratri tuo renuntiato; dum iracundiæ dolorique intemperanter indulget, quam expetenda ad præmia opimamque prædam præcipuos è Lusitano præsidio miserit. His dictis, miro animi ardore se rursus in hostem concitat; & egregie dūnicans multis,



multis confossus vulneribus ipse, & circa eum quinquaginta ferme Lusitani pedites aut equites cadunt. è reliquo numero capti septem & viginti. in iis nobiles & honorati viri aliquot ex Emmanuelis familia. E sociis Indis, amplius centum aut occisi, aut in seruitutem abducti. cæteri notis callibus trepida fuga latebras ac nemora petiere. Fernandus, inter hostium tela, stragemque suorum, pernicious equi beneficio præter spem euasit. Ad eius cladis nuntium, ingens luctus & meror in vrbe fuit. ac vulgo liberis, aut cognatis orbatæ æque viri ac mulieres, præfecti temeritatem & furorem execrabantur. Idalcan vero, non tam eo successu, quam violata ab Lusitanis pace lætari; oblataque sibi occasione, quam dudum expetisset, Goæ bello recuperandæ. quippe tum prælio custodibus imminutis, tum etiam ineunte per eos dies hyeme, quæ in aliquot menses clausum externæ opi mare esset habitura. Addebat fiduciam, deletæ in Arabico mari Lusitanæ clasfis quamquam incertus rumor; & quod induciis nuper cum Narsingano Rege Crisnarao pactis, vniuerso apparatu ac totis viribus in bellum Goanum sibi liceret incumbere. Hisce adductus rationibus Idalcan, primum è suis ducibus, Ancoftane adiuncto, Zufolarinum, cum sex & viginti peditum, quattuor equitum millibus ad Goam proficisci iubet. Eo terrore in urbem allato; Præfectus quotquot per ætatem ferre arma possint, custodire muros, & locis opportunis stationes agere iubet. ad Benefarinum præcipue intendit vigilias: & quoniam in eo publica salus verti videbatur, ne hosti pateret introitus; quicquid naualium copiarum fuit, partim vada obsidere, partim circumire interdium noctuque insulam imperat. ad hæc, paganos, & agricolas, ne, vt olim, iter barbaris aperirent; intra urbem euocatos, vel in opera, vel in præsidia mature distribuit. Zufolarinus, ad motis ad littus copiis, cum aliquoties transitum frustra tentasset, ad extremum operibus insulam cingere; & quoniam à mari (vti dictum est) nihil eo anni tempore subuehi posset; terrestribus quoque comitatibus omnino institit prohibere. Ita, præciso omni vndique aditu, penuria primum, dein fame laborari tota insula ceptum. ventumque ad vltima foret; nisi, vixdum hyeme exacta, singulari Dei beneficio primum à Quiloa Ioannes Sylueria cum vario comeatu, & quadringentis armatis; tum ex vltiore India Ra-



## *Historiarum Indicarum*

phael Pereestrellius cum fortibus viris ; ac demum ex ipsa Lusitania cum nauibus sex Antonius Saldania subuenissent . Huius noui subsidij fama, non absistere modo obsidione Zafelarinum coegit ; sed etiam Idalcanis nomine pacem ab Lusitano petere : quæ ex vetere formula Idalcani est data ; cum eo , si nuper ad Pondam capti restituerentur ; & eius pacis Prætor adueniens auctor fieret . sequutum vtrumque . & captiui cum fide redditi, & Prætor Goam delatus , ratam habuit pacem . Hoc maxime modo Goa tertium ab Idalcane obsessa , & in summum adducta discrimen, ex hostium faucibus præter opinionem eripitur . Eodem fere tempore, scædioribus etiam de causis, dum nihil minus Lusitani præfecti, quam de officio cogitant , amissa Malaca propemodum est . Georgio Albuquerque, qui Abdalam summa populi inuidia damnarat indicta causa, Georgius Brittus in vrbis præfectura successerat . Is, vixdum sanatis iis, quæ exulcerata per alios erant ; Malacensibus æque incolis ac peregrinis admodum grauis esse ; & insitam ingenio violentiam in omne genus hominum cepit expromere . Mamudianæ familiæ seruitiisve, quæ portoriis vel munitionibus , Alphonfi Albuquerqueij decreto, operam dabant ; mercedes quotidianas, & alimenta subtrahere ; alios à calumniatoribus circumuentos , in ergastula condere ; ereptas iustis possessoribus villas & prædia , quas ad fiscum deuoluta , amicis aut affinibus pessimo exemplo donare : iuncorum magistris, qui antea nostrorum merces quoquo- uersus bona fide vectare consueissent, non modo custodes apponere Lusitanos ; verum etiam, nullo eorum delicto , ipsas nauium præfecturas adimere ; denique, crudelitatis & avaritiæ , nefaria passim edere documenta . Ijs rebus territi qui nuper ad urbem redierant, cum denuo diffugissent ; ac nihil ferme vlla ex parte subueheretur ; tanta rursus Malacæ solitudo, & rerum omnium caritas consecuta ; vix vt magnis propositis immunitatibus præmiisque, & præcone circumquaque dimisso, turbatæ hominum mentes sedari, atque ad modicam celebritatem frequentissimum nuper emporium redire potuerit . Cum in peius quotidie cuncta inclinarent ; accessit ad res propemodum ex toto euertendas, intestina discordia . Primum eo tempore & maximum erat Malacæ munus, arcis præfectura : quod nimirum tam recenti dominatu, tamq̃ infestis circa nationibus Regibusq̃, Lusita-



Lusitanorum salus in eius arcis tutela consisteret. ac proinde, omni contempto periculo, reliqui duces ac magistratus, eum honoris gradum certatim expetebant. Georgius Brittus per eos forte dies dolore corporis animique confectus, cum supremam sibi horam adesse intelligeret; Præfectum urbis Nonniū Vaszum Pereriam, vxoris fratrem sibi substituit, Regis decreto; quod ita mandarat Emmanuel, vt si arcis præfecto diem obire contigisset; in eius locum urbis præfectus extemplo succederet. Britto igitur defuncto, arcem Nonnius occupat. enimvero id nullo modo ferre Antonius Patiecus maritimæ rei præpositus; quod eam præfecturam ad se pertinere affirmaret; præiudicata iam ante re Alphonsi ipsius Albuquerqueij sententia; qui Rhoterico Patalino ea lege tradidisset arcem, vt eam postmodum ipse relinqueret Fernando Petreio Andradio, penes quem eo tempore naualis item rei erat summa. itaque nullum esse dubiū, quin Georgio demortuo, protinus ea sibi vigilia debeat. Hoc certamine accensis animis, cum suos vterque sectatores haberet; nulla publicæ rei cura, duas in partes discessit nomen Lusitanum: ac veritus Patiecus nequid ex ea concitatione tumultus oriretur; classem omnem, & quicquid naualis erat turbæ, paruam ad insulam recepit è regione Malacæ. Cum dies aliquot obstinati ambo suspectique inuicem, in prauo consilio perstitissent; neque demoueri se de sententia vllius precibus vel auctoritate paterentur; festo die quodam Patiecus in continentem exscendit sacrificij causa. ac præter ipsam arcem cum honesto comitatu ad templum eunti, Nonnius (edicto prius suis quid fieri vellet) in ipso limine apparuit; hominemque blanda compellans voce; Quin, ait, Patiece, nostrarum litium ac dissensionum cognitoribus vtimur, communibus amicis ac popularibus nostris, eorumque arbitrato redimus in gratiam? cum ad ea audienda Patiecus propius ad portam appropinquasset; è latebris repente profiliens præualidis laceris Thomas Nonnius elatum inter manus Patiecum in arcem rapit. Patieci comites, nouitate rei primum attoniti; parumper hesere: dein stupore in iram verso, cum ducis caritate vim pararent; partim præsidij metu; partim regijs minis ac denuntiationibus territi, destitire. Ea res momento vulgata, non modo nouam furoris & amentię labem Lusitanis aspersit, quod

omisso



## *Historiarum Indicarum*

omisso concordia bono, tot vndique cincti periculis, inter sese contenderent; verum etiam locum Alodino dies noctesque in id ipsum intento, ad regnum omni conatu repetendum, aperuit. Ciribiges erat apud eum Raia, inter suos clarus bellica laude. Is, valida longarum nauium classe ab Alodino accepta; Muaris fluminis ostia petiit, leucas à Malaca non amplius quinque: aduersoque amne subuectus, in terram egreditur; ac loco peropportuno, è robusta materia densatoque aggere permunit castra: inde, uti nuper Lacfamana, repentinis excursionibus mare prorsus infestum habere, & in conspectum urbis Malacæ identidem prouehi, & mox recipere sese; ut, si qua posset, irritatos certamine Lusitanos, ad paratas intra flumen insidias de more perliceret. Harum rerum nuntiis Goam per Verissimum Patiecum Antonij fratrem allatis; Prætor Soarius, qui ex Arabia paulo ante redierat, Alexium Menesium cum nauibus tribus, in quibus erant bellatores trecenti, Malacam celeriter misit. ac sub idem fere tempus illuc è Sinis etiam Fernandus Andradius, non exiguo cum apparatu & copiis appulit. Horum aduentu atque auctoritate, gliscens denuo Lusitanorum intestina discordia, quamuis ægre sublata: & simul, à Menesio ad Sionis Regem, qui cum ab ipso iam Albuquerque instituta erat amicitia legatus Emmanuelis nomine, Eduardus Coelius mittitur, partim eius amicitia firmandæ causa; partim etiam ut eadem opera colonos ab Rege peteret frequentandæ Malacæ, & quæfluosissimo eius oræ commercio Mahometanis eripiendo. Coelius ad urbem Hudiam, quod regni caput est, Sionia naui delatus; Emmanuelis litteras ac dona reddidit Regi. dein iureiurando utrinque renouatum est fœdus. cuius fœderis testem Coelius celeberrimo urbis loco præcelsam ligneam Crucem summa Regis voluntate defixit. Ita Coelius, rebus admodum ex voluntate transactis; ac duarum insuper nauium præsidio adiutus ab Rege, latus Hudia soluit. & Camboianam oram pene præteruectus, quod à Patanis accessu tempestate prohiberetur; dum ad Sincapuram necessario cursum intendit, transuerso repente Euro in littus Panis eiicitur. Potiebatur eius terræ, ut supra demonstratum est, regulus is qui Alodini sororem habuerat in matrimonio: ac tum forte ab Alodino ipso, incertum quibus de causis, grauiter dissidebat. naufragos igitur Lusitanos haud im-  
merito



merito sibi diffidentes, metuentesque, non modo non pro accepta olim ad Malacam ignominia damnoque tractauit; sed etiam contra gentis morem benigne & comiter excepit hospitio. Quin, proposito Lusitanæ societatis commodo simul & ornamento, ac Malacensis præcipue commercij vberissimo questu; facile sibi persuaderi à Coelio est passus, vt multorum exemplo dynastarum & Regum, sese cum honorario vectigali ad Emma-nuelem adiungeret. ita, vas aureum librarum circiter sex, in annum tributum est pactus. quam tamen deinde fidem, ab ingenij mobilitate non diu coluit. Inter hæc, Alodinus de Menesij Andradijque aduentu per exploratores certior factus, tot in vnum coactis Lusitanis vtique aperta vi sese imparem ratus; ad solitas artes dolosque confugit: simulato belli tedio, pacem eo consilio petiit; vt nuntiis vltro citroque mittendis rem in discessum vtriusque ducis extraheret: quippe quos & reuerfionis auidos, & secum vna florem Lusitanæ iuuentutis deportaturos esse non ignorabat. Neque sagacem astutiam viri, frustratus euentus est. Deceptos iam aliquoties Lusitanos, improba negotiandi cupiditas, & nimius reuisendæ patriæ amor, nouam in fraudem impulit. Iactatis vtrinque conditionibus, atque ita approbatis, vt nihil ad firmam stabilemque concordiam, præter Soarij Prætoris auctoritatem, deesse videretur; eius auctoritatis impetrandæ suscepto munere, quæ prima nauigandi facultas data est, Menesius, & Andradius cum egregio comitatu Goam petiere. At Alodinus à Bintano progressus ad Pagum (id vico nomen; alij Pagodem appellant) occulte paratam interea classem, ad eas quas habebat naues adiunxit: auditoque ducum Lusitanorum discessu, ad arcem oppugnandam extemplo copias omnes æque maritimas ac terrestres admouit. Nihil tam inopinatum nostris accidere tali tempore potuit. oppressi, vix ad arma capienda spatium habuere. itaque eo die defensa ægre mœnia sunt. Inde, cum sæpius vrgerentur; nec vigiliis tantum, sed etiam omni vndique commeatu prohibito, fame laborarent; longe peiore quam antea, loco res Lusitana esse cœperat: actumque de ea proculdubio foret; ni plane insperatum subsidium Deus rebus iam perditis attulisset. Iauensis quidam erat in hostium castris vir cum pecuniosus & clarus, tum etiam consilio manuque promptissimus. Is, grauib; ab Alodino acceptis iniuriis, quas

salua



## *Historiarum Indicarum*

salua dignitate ferre non posset; accensus vlciscendi cupiditate, ad Lusitanos capta occasione transfugit. eo duce atq; adiutore, vt erat locorum ac temporum bene peritus, Lusitani fidis aliquot Malacensibus in expeditionem assumptis, agmine silenti profecti, subito vicissim impetu castra hostium cum magna caede expugnarunt. prædæ haud ita multum in jis inuentum. tormenta, pleraque ex ære, aucta ad trecenta. quominus Pagum victrici classe porro contenderent, ipsumq; Alodinum oppugnarent; obiectis transuerso flumine munitionibus, custodijsq; passim in ripa dispositis, in præsentia prohibiti sunt. cæterum eo facto repressa interim tyranni ferocia, atque ad leuandam annonam, in aliquot menses laxamenti nonnihil nostris est datum. Dum in hac rerum vicissitudine Malaca vrbs fluctuat, Soarius Prætor ducibus alijs alio missis ad maria tutanda; ipse cum septingentis armatis ad Ceilanum siue Taprobanam, nauium vndeiginti classe contendit. Cum Callensi regulo ante multos annos (vt supra memorauimus) Laurentius Almeida pacem ac societatem inierat: Soarius, Columbani præcipue reguli amicitiam & commercium expetebat, quod in eius potestate laudatissimi cinnamomi tyluas esse non dubie comperisset. cuius item rei fama commotus Emmanuel, id ipsum per litteras accurate mandauerat. Igitur delato in conspectum Ceilani Soario; & Columbanam præcipue oram oculis perlustranti, locus occurrit ad nauium appulsum, & arcis ædificationem idoneus. hami figura littus in mare procurrit; curuoq; anfractu capacem efficit portum, in quem ex insula nauigabile flumen illabitur. huc applicita classe, nuntij confestim ad regulum missi, fœderis & amicitiae causa; postulatumq; de more, vt in vsum diuerforij, merciumq; custodiam contra insidias maxime Saracenorum, castellum ibi liceret exstruere, non tam Lusitanis, quam incolis & regulo ipsi, præsidio ac munimento futurum. E Brachmanum disciplina, vt cæteri ferme Indi, erat regulus, atque adeo Brachmanes ipsemet. neque ita pollens habebatur ea tempestate viris armisq;. quocirca, & patrijs institutis peregrinas religiones auersabatur; & in tam tenera insula haud immerito Lusitanam extimescebat vim. Attamen, reputans apud animum suum, quam ex tenui fortuna vicinus Cocini Rex, post initam cum Lusitano amicitiam,



amicitiam, ad quantas opes breui tempore peruenisset; eiusdem successus, & emolumentum cupiditate ac spe captus; & de fœdere, & de castello, non tamen sine aliqua sollicitudine assensus est. Cæterum haud ita diu in sententia perstitit. Saraceni ex continente profugi, vel in primis vtilem in ea insula negotiationem paulo ante instituerant. ij, morte tristius rati, inde quoque ab Lusitanis pelli se; toto connixi impetu, regios consiliarios pecunia muneribusque; regulum ipsum adhuc fluctuantem, cum alijs rationibus, tum proposito miserrimæ seruitutis metu, facile ab ea mente deducunt. neque id modo, sed etiam ad arcendos aditu Lusitanos, vltro suam ipsi nauant operam: ijsq; præsertim instantibus operi, hortantibusq; insulanos, munitiones raptim excitantur. ibi ferrea nonnulla tormenta disposita; & simul, ad nouam societatem plane dirimendam, Lusitani pauci, qui, vt in pacatam regionem securi descenderant, intercepti. Soario ad opus inchoandum in terram egredienti, obiecta munitio præter expectationem apparuit. missi protinus ad rem cognoscendam aliquot expediti, renuntiant, mistos insulani Saracenos in statione versari. ita Mahometanum scelus haud dubie patuit. & Soarius, ommissa interim ædificatione, copias ad pugnam exponit: magnoq; vsus militum ardore, quamquam assidue iaculantibus contra barbaris, ad ipsa tormenta succedit. Aliquantum laboris ac periculi fuit, dum telis eminens dimicatur. ast vbi ad manus ventum est, momento disiectis munitionibus, hostes in fugam auersi: tum fugientibus acrius instare Lusitanus; neque aut ignotis callibus, aut occurrentibus fluuijs ab insequendo desistere, quoad Prætor signo tuba dato, palatos iam ac dispersos ab effuso impetu reuocauit. Magnus hostium numerus cæsus eo prælio. nec Lusitano gratis victoria stetit. vulnerati iaculis ferme sagittisq; complures: nonnulli etiam desiderati, in ijs Verissimus Patiecus, qui Malaca paulo ante redierat. Ab ea pugna, Soarius, vnus diei quiete militibus data, postridie prima luce rursus cum omni fabili apparatu descendit; ac fossam à portu vastam ad mare duxit prohibente nemine. intra eam fossam vallum erigitur, tormentis in hostem obuensis: dein modico interuallo additur murus, barbarorum terrori magis, quam operis firmitati, propter calcis inopiam interlitis argilla



## *Historiarum Indicarum*

argilla camentis . Hæc ingenti classiariorum certamine confectum peracta . & regulus , cum aduersa ictus pugna ; tum surgentis operis nec opinata molitione perterritus ; misso confectum legato , veniam petijt eorum , quæ alieno suasu , inconsulte ac temere egisset : atque ad iungendam ex integro societatem hospitiumq; se se paratum ostendit . At Soarius grauiter questus non opera tantum sibi cum armatis opposita , sed etiam comprehensos interposita pactione Lusitanos ; præcise negauit , se pro tam atrocibus iniurijs aliter satisfactionem accepturum , quam si regulus ipse in Emmanuelis fidem ac ditionem cum annuo vectigali concederet . Neque abnuuit Columbanus , Lusitana horrens arma . cumq; super ea re præfectus regius aliquoties non sine interprete commeasset ; ad extremum ita conuenit : ut regulus Emmanueli quotannis persolueret stipendij nomine , cinnamomi pondo centum & viginti millia ; annulosq; duodecim , sapphyris , aut pyropis ex eadem insula inclusis : & elephantos præterea sex . Emmanuel autem , receptum in fidem Columbanum , ab hostium vi conatibusq; , ipse & successores ipsius , terra mariq; defenderent . His maxime legibus data pax : & nulla interposita mora , Soarius destinato loco arcem condere aggressus est . opus , adiuantibus etiam regijs , breui absolutum . in eius arcis custodia Prætor Ioannem Sylueriam valido cum præsidio collocauit . oram maritimam nauibus quattuor tuendam Antonio Mirandæ Azeuedio tradidit . ipse , rebus ex animi sententia confectis , & Arabicæ nauigationis magna ex parte compensato damno , circa initium Decembris ouans Cocinum est reuectus . Hæc ferme in vtraque India cis Gangem & vltra , Soario Prætor per triennium gesta . Prouinciam dein ab Soario accepit Didacus Lupius Sequeria is , qui primus Emmanuelis missu Malacam adierat . Huic , magna Indici exercitus parte varijs casibus absumpta ; naues nouem cum bellatoribus mille quingentis Emmanuel in supplementum attribuit , cum quibus anno seculi huius decimo octauo profectus Olisipone , Cocinum secunda nauigatione deuenit . in eo cursu , circa promontorium Bonæ spei , contigit res minime prætereunda silentio . Magnitudinis vastæ piscis est in Africo Oceano , quem piscem , à figura videlicet , acum appellant ( Xiphiam ego fuisse crediderim ) prælongo



longo rostro, & in mucro nem desinente; eodemq; ita duro atque hispido, vt ferrum deterat in modum limæ. Ex ijs belluis vna, dum subterfugientem prædam furibunda persequitur, in aduersam onerariam plenis euntem velis, toto impetu illata, in imas compages, pertuso alueo, acutissimum caput infixit. Ex eo laqueo dum se se per vim conatur excutere; quamuis libratam suis ponderibus nauem adeo quatefecit, vt se in Syrtim impactos nautæ non sine horrore putauerint. Quo dein ex foramine, cum, ignaro quidnam esset rei magistro, sentinam traheret nauis; Cocini demum subducta, insertum in carinam, vt dixi, plane cubitale rostrum ostendit: quod illico extractum, & in Lusitaniam argumenti & miraculi causa, deinde transmissum est. At Sequeria, inito magistratu; primum circa omnes arces præsidia noua disposuit. dein regulum Baticalæ, detrectantem iugum; pactumq; nuper Emmanueli stipendium persolvere (vt sunt leuia barbarorum ingenia) recusantem; misso ad eius portus fauces obsidendas cum nauibus aliquot Alphonso Menesio, subsequitur ipse mox, ad fidem officiumq; aut minis, aut malo redegit. Simul etiam, cognito Malacam rursus ab Alodino grauitè premi; Antonium Corream cum onerarijs ad com meatus petendos, eoq; importandos, proficisci iubet in regnum Pegu. cuius regni, vltra Gangem positi non longè à Malaca, Triglypton olim urbem, caput fuisse quidam existimant. Correa, prospero cursu ad Martabanum emporium Pegusiorum delatus; ne in terra adhuc ignota longius ab suis nauibus ipse discederet, Antonium Passanium, & Melchiorum Caruallium cum honesto comitatu muneribusq; misit ad Regem in vrbe Pegu (ex qua tota regio denominatur) inde aliquot dierum itinere commorantem. Magna tum erat (vt sæpe diximus) toto pene Oriente, gloria nominis Lusitani: magna cum bellicæ virtutis, tum opum ac diuitiarum existimatio. neque minor, si per Lusitanos licitum esset, omnes circa nationes tenebar, in Malacensi emporio negotiandi cupiditas. Itaque Pegusianus Rex, quamquam in primis tum potens ac nobilis; tamen haudquaquam indignatus, Antonium Corream nuntios pro se misisse; comiter ijs acceptis, duos vicissim ad eum ipse cum donis remisit, stabilien-  
dæ societatis & amicitiae gratia: satrapam vnum; alterum pontificem;



## *Historiarum Indicarum*

tificem; hunc, Raulinum; illum, Samibeleganum, Pegusiorum vulgus appellat. Vt Martabanum est ventum, post mutuae salutationis officia, conscriptae communi consensu, pacis & foederis leges. tum, ad eas solenni iureiurando firmandas, in celeberrimum vrbis fanum Antonius Correa regijq; summa populi frequentia conuenere. totius autem caeremoniae ordo fuit eiusmodi. Samibeleganus prior, in aurea plagula diligenter inscriptas eius amicitiae leges, tum Pegusia, tum Lusitana lingua; vt & populares, & hospites intelligerent, elata voce recitari iussit. idem à nostris vicissim est factum. lectis, & subscriptis conditionibus, Raulinus, seu sacrificulus, quædam ex ritualibus Pegusiorum libris de more pronuntiat. papyracea dein segmenta crocei coloris (qui color apud eam gentem cultui diuino dicatus est) & aliquot simul arboris odoratae folia certis notata litteris, igne subiecto comburit. Tum, suis insertam manibus, manum vtramque Samibelegani, cineribus ijs imponit, pauca ex eo percontans, quibus ille ita respondebat; vt sui Regis nomine ratam & fixam eam societatem fore, iureiurando promitteret. Hæc omnia, summa attentione miroq; silentio peracta. Dissimiles animorum habitus Antonius Correa comitesq; in eam caeremoniam attulerant: quippe qui vano errore ducti, Christianam fidem ethnicis iureiurando obligari fas esse vix ducerent. itaque Antonij accitu, linteatus antistes, qui nauticis præerat sacris; diuini humaniq; iuris haud multo quam cæteri Lusitani peritior, in medium prodit. sa cræ paginae, Christiano ritu, erant ab Antonio cum solenni imprecatione tangendæ. atqui sacerdos pro Euangelij biblijve, librum ex composito protulit, eleganter & arrificiose compactum; in quo varij generis lusus & cantica Lusitanico sermone scripta continebantur; nonnullis tamen immistis, vt sit, sententijs moralibus, atque diuerbijs. Huic ergo libro dum Antonius fallacem admouet manum; diuinitus factum est, vt in ea verba ex Ecclesiaste incideret: VANITAS VANITATVM, ET OMNIA VANITAS: quod ille vbi præter omnem expectationem animaduertit, subita percussus religione cohorrui; ac præclare sensit, quam integram & inuiolatam foederum fidem, vel cum ipsis barbaris ethnicisque; esse cæleste iubeat numen. ergo apud se perinde iustum atque legitimum



gitimum id iusiurandum Antonius habuit, ac si pro vulgari eo libro sacrosancta vtriusque testamenti volumina contigisset. Sancito in hunc modum fœdere; impositisq; in onerarias mercibus, & omni genere commeatus, Correa peropportune Malacam defertur. Eius aduentus, non modo ex diuturna fame & squalore obsessos refecit; sed etiam animos ijs addidit ad Alodinum ipsum ultro laceſſendum, &, si qua fieri posset, ex tam vicinis sedibus tandem aliquando exturbandum. Quod ille quasi præſagiens, ad omnes eiusmodi casus multo ante se se parauerat. transuersis primum cancellis non vno loco interseperat flumen, angusto dumtaxat singulis paronibus lembisve transitu relicto. dein, sub aquas paſſim fistuca stipites præacutos adegerat. ad hæc, densissimas vastæ magnitudinis arbores, quæ ripas fluminis dextra læuaq; prætexunt, ad radicem ita incidi præceperat; vt perleui momento impulsæ, nauigantes obruerent. Denique non longe à Pogo, qua sinuoso fluminis ambitu longiorem in cubitum prominet ripa; confibulatis è valida materia trabibus, & cespite ingesto, nouum castellum excitarat; idq; non modico præſidio, nec paucis ex ære tormentis ad hostem ex obliquo feriendum instruxerat. His rebus cognitis (neque enim deerant qui cuncta renuntiarent) Correa, & Eduardus Mellus, contracta minorum nauium classe, quarum pleræq; remis agerentur, & bellatoribus circiter quingentis impositis; Muaris fluminis ostia petiere. inde præmissi cum securibus dolabrisq;, & firmo præſidio militum fabri ad hostiles munitiones amoliendas. ij quo validiores, ac peritiores talium erant artium, eò celerius confecta res est. discissi cancelli; euulsi ex imo stipites; insidiosæ arbores in diuersum proiectæ. ita sequenti agmini tutus ad castellum vsque fuit accessus. neque ita magno negotio, admotis nauibus machinisq;, deiectum inde præſidium. Hinc, magna concepta fiducia, Lusitani ad Pagum victrici succedunt classe. Vt in conspectum oppidi ventum est; dispositæ extra vallum Alodini copiarum cum elephantis, & sublatus de more ingens clamor, & emissa tormenta, nonnullam cruenti prælii speciem præbuerent. sed vbi egressus è nauibus Lusitanus in sicco signa constituit; & cominus gladijs contisq; dimicari cæptum est; tanta plane diuinitus formido (veterum Hebræorum victoriam diceret)



## *Historiarum Indicarum*

tantus terror hostes inuasit, ut oppido ad prædam relicto, se  
se in proximos lucos, & nota latibula fædo cursu coniecerint.  
nec pauci ex ijs in fuga verius quam in pugna cecidere; cum è  
Lusitanis (quod præsentì diuinæ opì acceptum sine controuer-  
sia referas) ne vnus quidem desideratus sit. Fusis fugatisq;  
hostibus, ad spolianda tecta raptim discurret miles. exhausto  
quicquid erat pretiosi; oppidum concrematum. dein Alodini  
parones, & varij generis navigia in vnum coacta fere centum.  
quorum erant aliquot, puppi proraq; regium in morem cæla-  
tis inauratisq; ex eo genere nonnulla in triumphì speciem re-  
servata. cæteris ignes iniecti. Hac tam insigni victoria parta  
Lusitani cum summa gratulatione redeuntes in urbem accepti.  
Alodinus, fracta, sed nondum perdomita ingenti ferocia, ad  
recolligendas è tanta clade vires, Bintanum insulam fremens  
gemensq; repetijt. Interea, vicini Malacæ barbari, alienas  
angustias & incommoda suam rati occasionem; multis & gra-  
uibus iniurijs nostros affecerant: ac Pacenorum præsertim ty-  
rannus, qui nuper in id regnum inuaserat; delatosq; in Pace-  
num portum negotiatores aliquot Lusitanos partim exuerat  
mercibus, partim etiam per sumnum occiderat scelus. Ac ne  
Acenus quidem, quamquam societate ac fœdere iam pridem  
nostris obstrictus, in ea rerum difficultate sat se pro amicitia  
gesserat. Ad eas vindicandas iniurias, regulosq; ab instituto  
latrocinio deterrendos; Garzias Sala Malacæ Præfectus, Em-  
mannelem Patiecum, vnica, verum egregie instructa naui di-  
misit. is, præcipuo in Somatranos odio instinctus, quod An-  
tonium fratrem paulo ante in vincla coniecerant, cum alia So-  
matræ littora, tum verò Pacenum, Acenumq; breui adeo fecit  
infecta; ut non peregrini modo infestores multi ab ea naviga-  
tione desisterent: sed etiam incolæ, piscatu, quo maxime ali-  
mento victitat ea gens, intolerabili cum dolore damnoq; ab-  
stinerent. Neque præcellam Patieci nauem, atque à machinis  
ac milite paratissimam, semiermes ipsi, minoribus navigijs  
aggredi satis audebant: tantum ad opportuna insidijs loca ex-  
eunare instituerant, si quos, ut sit, in terram egressos, per oc-  
casionem excipere possent. Forte ita accidit, ut Patiecus,  
aquandi causa, Malacensi quam exercitatissimo remige instru-  
ctam scapham intra Iacaparini fluminis ostia mitteret. abest



ea aquatio à Paceno portu millia passuum ferme quattuor . neque ad remigum præsidium propugnatores plus quinque attributi, Antonius Veranus Portuensis, Antonius Passanius Alanquerianus, Franciscus Gramaxius, Ioannes Almeida Quintelanus; postremi nomen intercidit. Aquatione per otium facta, priusquam ad suos Lusitani se se recipiant, à barbaris agniti. Et Pacenorum Præfectus, Raia Sudamicinus, rei subitæ nuntio excitus, lanciaras tres confestim expediri iubet; correptisq; quæ fors obtulit telis, in singulas, aptas instructasq; remigio, centum & quinquaginta armatos imponit. Ea dum parantur, coorti repente ab vtraque fluminis ripa barbari, sagittis & iaculis abeuntes nostros detinere non desinunt. & ea quidem mora non admodum Lusitanos retardat. quippe hostium tela, densatis vtrinque scutis excipiunt. grauius aliunde malum instabat; quod vno eodemq; tempore contrarius ventus & æstus accedens, exitum intercluderet: neque ab socia navi, procul in salo iactis anchoris, erat in re trepida cur opis quicquam expectarent. iamq; raptim instructæ lanciaræ haud dubiam ad prædam cum ingenti clamore festinant. longe tamen reliquas antecedit ea, qua Sudamicinus ipse cum iuuentutis flore vehebatur. Ea re animaduersa Lusitani, tot vndique pressi difficultatibus, consilium ab ipsa desperatione capiunt, vltro in aduersum hostem eundi; vt, quemadmodum sit nomine Lusitano dignum, fortiter dimicantes occumbant prius, quam per metum mortis, in teterrimam seruitutem abducantur. Hoc ergo consilio scapham repente circumagunt: validoq; remorum impulsu vix dum concurrerant proræ, cum Lusitani salutari IESV nomine pariter inuocato, strictis gladijs aut hastis, priores in nauigium hostile magno ausu transiliunt: ac ferro primum summonent barbaros: dein conglobatos in vnum, ipsaq; audacia obstupefactos, haud tamen incruenti ipsi ad satietatem trucidant. Nec in longum extracta est pugna. Paceni, cum ad vehementes gladiatorum & cuspidum ictus nuda præbuisent aliquandiu corpora; & emicantem è Lusitanorum oculis ardorem ferre vltra non possent; quicunque commodum est, certatim se se in flumen eiciunt. Sudamicinus perterritos nequicquam precibus minisq; cohibere conatus; denique se ipse quoque de navi præcipitat; dolo-



## *Historiarum Indicarum*

reque ac rabie accensus, ut quemque suorum nando adeptus est, elato pugione confodit. Ceteri duabus lanciaris ex intervallo sequentes, cum, si acrius institissent, nostros vulneribus affectos ac propemodum exsanguis nullo negotio conficere potuissent; nec opinata suorum clade perculsi, terga verterunt. Ita, IESV adiuuante, è rebus perditis repente Lusitanus victor euadit: ac nullo è suis amisso, captiuam ipsius Præfecti lanciam in altum abducit: eo maiore omnium gratulatione ac lætitia, quo propior exitio fuerat res. Eius tam præclari facinoris fama cum cæteris circa populis, tum præcipue regulo ipsi Paceno magnum terrorem inculsit. Missis extemplo ad Patiecum, mox ad Garziam Salam legatis, demisse petijt pacem; eaque conditione impetrauit; ut cuncta per scelus ac fraudem ablata Lusitanis cum fide redderet. Hoc rerum Malacensium statu, Sequeria nouus Prætor enixe operam dabat, ut pedem, si posset, in Maldiuis insulis figeret. Ex, ut supra docuimus, Canarino, & Malabarico littori obiectione, numero plus mille censentur. Multitudinem hanc, intercurfantes euripi faciunt, adeo angusti, ut alibi nauium antennæ iubas arborum deterant: alibi etiam, qui valentiores sunt viribus, ramo quopiam manibus apprehenso, ex vna in alteram insulam saltu transmittant. Multis rebus ad victum necessarijs carent incolæ: sed pro ijs omnibus: vna est palma (sic enim appellant) Iudaicis & Africanis, careotas ferentibus, longe præstantior. quippe, non proceritate solum & pulchritudine excellit; verum etiam tota prorsus in vsu est ita multiplici, ut vulgo, si quem frugi & industrium laudibus efferre volunt, palma vtiliorem appellent. Prima dos, in fructu ipso. Tengan Narlemve Indi; cocum, seu nucem Indicam Lusitani dixerunt: humani ferme capitis magnitudine, duplici operimento: quorum exterius, in summo læue, stupea intus densitate (caïrum vocant) netur ac textur, cannabis & sparti modo, cum alios in vsus, tum præcipue in vitilium nexus, & anchoralia: neque materia vlla ad nauticos funes & maris impetus obsequentior. namque, ut falsuginem amat ea planta; caïrum quoque ex ea prognatum, & marinis aquis immersum, identidem reuirescit: & anchoris illigatum, fluitantes in salo naues egregie continet, non tam ab innata duritie, vel operis firmitate, quam viriditate ipsa, & lenti-



etiam quadam ad instar corij: ut se se vel in altum elato nauigio, miram in tenuitatem extendat; vel residente, rursus in crassitudinem contrahat. quod secus in nostris euenit rudentibus: quæ nimirum ipsa vi ac pertinacia sæpe rumpuntur. inerior autem calix, rufo colore, & globosa rotunditate prædurus; addito auro vel argento, in pocula figuratur. ipsa verò pomicaro, amygdalæ in modum, pinguedine quadam & grato sapore laetescens, non per se tantum in cibo grata est, ac salubris; verum etiam, vbi visum fuerit, exhausto lacte, paulatim in oleum eliquatur. totus autem racemus, dum ex eo tener adhuc emicat fructus, nodo constrictus, ac leuiter incisus, in obdita oris angustii vascula opimum instillat succum, ex quo varijs artibus coctionibusq; veteri, ut Strabo ipse testatur, inuento, mel seu saccharum, vinum, acetumq; perficitur. iam folia, cum & librarijs pro papyro sint, & loco tegularum imposita domibus, arceant imbres; tum etiam in vestis formam facili simul ac spisso contextu neuntur. Denique, vna eademq; arbor, omnia prorsus ad rem nauticam instrumenta ac materiem præbet. quippe truncum & ramos; in malum, assamenta, clauosq; comam in vela: cairum in funes (ut dictum est) omnium optimos, filaq; ad laterum futuras: postremo cocum ipsum, quæque ex eo conficiuntur, in onera. ita, non sine miraculo quodam, omnibus plane rebus ex semet apta & instructa nauigat palma: eademq; discissa per hyemem, viuaces ad prunas, lenta ignium alimenta suppeditat. Incolæ importato lino, sericoq; talares tunicas eleganti opere texunt: quibus honestius multo, quam cæteri Indi velant corpora. Piscantur etiam palmeis verriculis minuta conchylia (sunt qui Venereæ conchæ genus putent) miro splendore, & colorum varietate. hæc, saburræ loco in onerarias indita, ac diuersas in regiones euecta, apud Gangaridas & Sionios, vilioris monetæ explent vicem ad res parui pretij coemendas: apud Hesperios autem Aethiopas, cum rebus etiam carioribus permutantur. Insularum omnium caput est Maldiua; ex ea cæteris cognomentum. ibi frequenti emporio domicilium est Regis. quicum initiam à Soario per Ioannem Sylueriam, ut supra demonstratum est, amicitia; ad eam stabiliendam, locumq; munitæ apothecæ de more petendum Sequeria deinceps Ioannem Gometium



## *Historiarum Indicarum*

destinavit. Neque magnæ contentionis fuit res. Ab homine donis ac promissis illecto; & cum Lusitanæ felicitatis opumq; haud ignaro; tum vectigalibus novis rem augendi percipido, facile non de societate modo, sed etiam de castello impetratum. id castellum ad mare Gometius, quod lapidibus & calce careret; è lignea materia glebisq; raptim exstruxit, ac munijt. Eius deinde operis, & quadam nominis Lusitani fiducia, vix quindecim armatorum custodia septus, cum iam non pro inquilino vel hospite, sed pro tyranno ac domino sese gereret, & commeantes in id emporium peregrinos varijs vexaret iniurijs; repentina conspiratione Saracenorum oppressus, vna cum suis occiditur. arce, & ijs quæ intra arcem asseruabantur, Mahometanus potitur. ita Lusitani, quam facili aditu in eas irreperant sedes; tam levi negotio mox deinde sua culpa deiecti sunt. Nec leuiores alibi plagæ per eos dies acceptæ. Goana oneraria commercij causa Ciaulum petens, in Saracenorum, qui Dabulum incolunt, biremes illata, prælio commisso deprimitur. In easdem biremes Lusitana carauela postmodum incidit (rotundæ naus genus, cum ad onera, tum ad militiam vtile; dromonem Græco vocabulo haud incommode fortasse quis dixerit) contracto mox certamine, dum tormenta exercentur, ignea scintilla in sulphurei pulueris cadum illabitur. inde sæuum repente coortum incendium, nautas vectoresq; omnes, vna muliere excepta, protinus hausit. Ad earum rerum nuntios, ira percitus Christophorus Sosa, qui cum navibus aliquot Canarini maris custodiæ præerat; nocte sublustri, Calacinum (is locus est agri Dabulensis) inuasit. Sosæ aduentu præcognito, incolæ paulo ante diffugerant. Lusitanus ad prædam versus, quamquam erat barbarica vilisq; suppellex; tamen ab ea dulcedine auelli non potuit; quoad, illucescente demum die, Saraceni circiter quadringenti, sagittariæ artis peritissimi superueniunt. Aduersus eam multitudinem Sosa cum centum & quinquaginta armatis egreditur: quorum erant sclopettarij seu fistulatores non pauci. Accensis vtrinq; animis, atrox pugna coorta. Saraceni arcubus tantum instructi; primam hostilium glandium procellam submissis corporibus excepere: tum ad sagittandum ipsi consurgunt. tamque densus ac perpetuus fuit spiculorum imber; vt Lusitano, ad fistulas replendas



replendas nihil vnquam temporis aut loci reliquerint. Inde cum, sensim cedendo, ad mare se se reciperet Sosa; minime fefellit hostem. circummissus illico iuuenum globus, reditum interclusit. itaque Lusitani vndique vrgeri cæpti: nec sine multo sanguine, vix tandem ad naues effugium patuit. Soluentibus dein oram simul, & iaculantibus, adeo pertinaciter institere Saraceni, alienato ab sensu periculorum animo, vt semet aquis vmbilico tenus immergerent, nauigijsq; remorandi causa, propemodum iniicerent manus. Ex eo discrimine Sosa denique elapsus, Ciaulum ad faucios curandos, minime secunda fama se contulit. Eodem fere tempore quattuordecim nauium classis, cui Georgius Albuquerqueius præerat, Olisipone profecta, male admodum nauigauit. quattuor tantum eo anno in Indiam peruenere. è reliquis vna è medio cursu in Lusitaniam vento reiecta. aliam in ipso itinere Castellanus quidam nauarchus ab Indicis commercijs ad latrocinia piraticamq; conuertit. tertia, superato iam promontorio Bonæ spei, circa Quiloæ, & Mombazæ littora, magis etiam miserabili genere cladis interijt. Mahometani eas incolunt regiones. hi, Ancolino Rege interfecto, iampridem ab Lusitana societate defecerant. Cum dira necessitas cogeret, aquandi gratia, ad Matuam, eius oræ vicum, quadraginta viri ex naui Lusitana apulerant scapham; in quibus erant primarij duo: præfectus, & gubernator. Dum egressi ad fontes doliola complent; interim scapham, remigibus vacuam, recedens æstus in sicco destituit. Ad eam deducendam, aptandosq; remos, semiplenis vasisbus illico Lusitanus accurrit. nec segnius barbari, animaduersa re, duo circiter hominum millia infensis animis aduolant: nautasq; partim sub oneribus, partim à terra molientes, ad vnum omnes occidunt: nequicquam cæteris Lusitanis, cum ad bombardæ ictum accedere propter vada non possent, indignam suorum cædem ex alto spectantibus. Ac ne ipsi quidem lætorem exitum deinde sortiti. quippe, vrgente siti, dum alias aquationes in vicino conquirunt; rectore vacua nauis haud longe ab Quiloa in syrtes impingitur. Ad conspectam eminus prædam, ingens repente affuit hostium vis. momento spoliata oneraria: & quotquot ea vehebantur cæsi, vno duntaxat relicto adolescente, quem tyranno Mombazæ muneri mit-



## *Historiarum Indicarum*

terent. Albuquerque, dissipata classe, ignarus, ex ijs quæ non comparebant, quo quæque delata esset, cum cæteris nauibus ad Mosambicum exegit hyemem: atque inde, transmissa mari, Goam insequentem demum estate peruenit. Circa idem fere tempus, Prætor Sequeria, toties iam ab alijs infelici successu tentatam Arabicam expeditionem aggredi statuit. Contractis ex omni ora nauibus maioris formæ quattuor & viginti, bellatorum tria millia imposuit; quorum erant Lusitani mille & octingenti: cæteram summam, è Malabaribus & Canarinis expleuerat. Cum ijs copijs Goa profectus Februario mense, anno seculi huiusce vigesimo, ad Aromata promontorium Africæ, secunda nauigatione transmisit. Ibi cognito ad Giddam stare sex Turcarum triremes; manusq; armatorum cogi ad fauces Adeni occupandas: intra ipsas fauces inuehi, & longitudine sinuse mensa, circa Giddam laceffere bello Turcas decreuit; vt si se occasio dedisset, signis collatis de rubri maris possessione decerneret. Hoc animi proposito legens oram, ad Meten vicum, aquandi causa, applicuit, metu desertum ab incolis. vna tantum vetula inuenta: cuius indicio in summa siccitate aqua patuit. amnis erat alueo glareoso. sub eam glaream, æstate, cursu tacito se se ita latices condunt; vt nihil humoris in summo prorsus appareat. Anum indicem remuneratus, & in eius gratiam flammis ab eo prohibitis vico, Sequeria in Arabiam non longe ab Adeno traiecit. ibi dum ad Aram ( id loco nomen ) anchoras iacit; in scopulum sub aqua latentem illata Prætoria, solutis incussu compagibus extemplo diuellitur. quæ in summis tabulatis erant, cum parte machinarum ægre seruata. cætera demerso alueo periire. naualis turba ( quadringenti numerabantur ) in cæteram classem distributi. à Sancto Antonio nomen erat Prætorix. ex eo, Diui Antonij saxa, locus appellatus. Ab hac statione cum ad Giddam recta contenderet Prætor, adeo pertinaci complurium dierum Aquilone prohibitus est; vt interim aduentante hyeme, idoneum rei gerendæ tempus effluerit. Itaque omisso bello, ad pacem cum Dauide Abassino Rege firmandam animum adiecit. cuius Regis imperium, cætera mediterraneum, modica tantum ex parte ad rubri maris littora pertinet. Eam oram Davidis nomine tenebat Præfectus maximus, quem honoris titulo Barnagazium.

gaziū vocant. oppidis ac vicis, Præfecti minores præerant. Cum hisce Præfectis de societate agendum erat Sequeræ, & legati duo in terram exponendi. alter, Matthæus Armenius, is, qui ab ipso Dauide Helenaq; ad Emmanuelem cum donis ante decennium venerat: atque ob suspectam eius legationis fidem, ab Lusitanis nullo suo merito multa indigna & acerba pertulerat. alter, Emmanuelis ad Abassinum erat legatus, Rhotericus Lima, susceptus in locum Eduardi Galuani, qui superioribus annis in ipso itinere, nondum peracta legatione, decesserat. Simul etiam erat ei Mazua insula (quæ Ptolemais ferarum olim fuit) haud procul à Camarano visenda, si forte locus arci ad eius regionis custodiam ædificandæ idoneus foret. ea insula Arquico oppido maritimo Abassini littoris obiecta, perangusto freto ab continente dirimitur: & lunato sinu in idem littus obuersa, in primis tutam ac placidam stationem nauibus præbet. ad hæc, cisternis, armentisq; varij generis, in usum classium & presidiorum abundat. Prætor, totam insulam per otium contemplatus, tametsi Mahometani incolebant; tamen, vitandæ inuidiæ gratia, suos ab incendijs ac præda continuit: Mahometis vero fanum rite expiatum, intermeratæ Conceptioni Deiparæ Virginis dedicauit: ibi per eos dies Christiana sacra peracta non semel. Interea ab Arquici Præfecto oratores affuere cum donis & commeatu: quibus, utpote Christi cultoribus, sericum vexillum Cruce insignitum, amicitia causa, datum est. illi, cognito Christianos & Lusitanos aduenas esse, cuius gentis fama iampridem eo tractu increbuerat, mirum in modum gratulati; primum omnium de Matthæo Armenio cum cura perquirunt. hunc ipsum ubi adesse præter expectationem audiere; & mox in cōspectum est productus veneranda canitie senex; obortæ cunctis præ gaudio lacrymæ. &, vulgata eius rei fama, certatim ad optatos viri amplexus, & manuum oscula confluebant. Ea demum celebritas, & Matthæum omni suspicione liberauit; & Lusitanis, quod infontem adeo aspere & inhumane tractassent, dolorem simul ac pudorem iniecit: eo magis, quod etiam aliquot è sacra Visionis æde monachi (multa autem cœnobia, ex Diui Antonij ferme institutis, eo toto regno visuntur) salutandi eiusdem Matthæi causa, ad classem accesserant: qui  
ab



## *Historiarum Indicarum*

ab Lusitanis sacerdotibus linteatis, cum symphonia & psalmis accepti, magnam animi voluptatem præferebant, non è Matthæi solum, sed etiam ex ipso Lusitanorum aduentu: quod vetus oraculum sibi à maioribus traditum ferrent; ex occiduis aliquando regionibus, Christianæ religionis homines in ea loca venturos. Eius vaticinationis promissa, tantæ classis appulsu, tandem esse confecta; & in illo sacratorum hominum cœtu, Hesperiam cum Eoa Ecclesia, tanto locorum interuallo, dextras quodam modo miscuisse; magnopere lætabantur. in sermonem dein cum Arquicano Præfecto ventum est; & paulo post, ad stabiliendam societatem (quod ita Dauidem velle non ignoraret) Barnagazius cum peramplo comitatu Arquicum processit. Paululum ibi altercationis fuit, dum dies locusq; colloquio constituitur: littus ipsum aduena: Arquicum oppidum Barnagazius præoptabat, nonnulla fraudis ac periculi suspitione ab Saracenis iniecta. Ad eam suspicionem tollendam (quando per obsides transigi, indignum Christiana amicitia & hospitio videbatur) cum synceri animi pignus Crucem nudari & porrigi ab sacerdote iuberet Antonius Saldania, Lusitanis Prætoris internuntius; se uero vultu Barnagazius cōfestim exurgens obstitit; negans, tam leui de re, tam augusta attrectanda mysteria. Quin ego potius, inquit, de iure meo decedam, meq; vltro in omne discrimen obiiciam. ita, mediæ regionis campus, inter oppidum & mare, consensu deligitur. Barnagazius cum equitibus ducentis, peditum duobus millibus ab Arquico; Sequeria cum sexcentis non amplius armatis è classe descendit. iis copiis in statione vtrunque conspecta relictis; cum senis ambo comitibus in medium prodie-re. Primus congressus fuit, mutuo blande & amice consalutantium: & Regis vtriusque in alterum, beneuolentiam studiumq; accurata oratione testificantium. dein societas ac fœdus hoc maxime modo sancita. Classiarius sacerdos argenteam Crucem in medium attulit: ea Barnagazius prior apprehensa, nixus genibus: Quam, inquit, pacem IESVS Christus, generis humani Redemptor, discipulis reliquit suis; eadem esto, internos, qui eiusdem Christi cultum profitemur, ac fidem. Hanc ego pacem (quantum in me fuerit) Regis mei nomine spondeo; atque ita iuro per hanc sacrosanctam nostræ salutis effigiem



effigiem. In eandem ferme sententiam conceptis verbis iuravit Prætor. dimisso dein colloquio, per triduum ex utraque parte donis officiisque certatum. & ingens omnium fuit lætitiæ, quod opulenti duo Reges terra marique, contra Christianæ rei aduersarios arma iunxissent. Post hæc, Sequeria Rhotericum Limam legatum Barnagazio commendauit, ac tradidit, ad regiam usque tuto mittendum. cuius in comitatu cum alij honesti viri complures fuere; tum verò Franciscus Alnarus sacerdos: qui dein reuectus in Lusitaniam, eius peregrinationis seriem patria lingua descriptam edidit: eodemque postea auctore, Paulus Iouius gentis ritus moresque latino sermone diligenter est persecutus. Per eosdem fere dies quibus in Arabico si-  
 nu Lusitanus agebat Prætor, è Paceno Somatræ insulæ regno, summus Mahometicæ superstitionis Califa seu antistes, nomine Molana, supplex illuc usque contendit. puerum adducebat duodecim ferme natum annos, Paceni Regis filium: cuius parente occiso, Geinal tyrannus, ab Alodino socero adiutus, regnum inuaserat. huic si contra communem hostem suppetias Lusitani tulissent; restitutum in patrias fortunas puerum, in Emmanuelis auctoritate cum annuo tributo Molana spondebat futurum. Et pupilli orbitas, & Califæ obtestatio apud Sequeriam valuit. Ad Geinalem ex ea possessione pellendum, sex naues cum valida manu armatorum, Georgio Albuquerque attributæ. Cuius rei, & iunctæ cum Dauide amicitie nuntios qui ad Emmanuelem afferret, Petrus Vasaus in Lusitaniam à Præторе missus. magna toto regno omnium ordinum gratulatio fuit; & in singulis oppidis miro populi studio supplicatum est. Prætor, cum egressus freto Calaiatum petiisset, Ar-  
 muziam inde processit. ibi, clauso iam mari, cum magna nauium parte hyemare coactus est. Dum hæc ad Arabiam, & Persidem fiunt; Goæ Præfectus interea Rhotericus Mellus Lusitanam rem, haud contemnenda, si crimen abesset, vectigalium accessione ditauit. Idalcanem inter, & Crisnaraum Nar-  
 singæ Regem, atrox ac funestum per eos dies exarserat bellum; dum reconciliatæ nuper amicitie leges ambo parum syncera fide custodiunt. Idalcan perfugas & noxios è Narasingæ regno contra ius & fas clam admittere, grassari occultis latrocinij, ac repetentem res Narasinganum, dolis fallaciisque frustrari.

Crisnaraus



## *Historiarum Indicarum*

Crisnaraus vicissim, otij impatiens, bellum denuo optare; & in Raciolum urbem Decani regni munitissimam, spe atque auditate imminere: quam sibi maioribusq; ademptam, Idalcanis accessisse regno ægre ferebat. Eius ergo repetendæ urbis, & Idalcani arma rursus titulo specioso inferendi tale consilium inijt. Saracenus erat in ipsius aula, Cides Mercar, Mahometano cultu ingenioq; industrius vir, & experiens. Hunc, ad Arabicos equos in vsum belli coemendos magno cum auri pondere Crisnaraus Goam misit: & quo testatior esset res, ad Goæ Præfectum super tali negotio separatim litteras dedit, haud dubius, quin per Decanios fines necessario iter habenti bene nummato viro, Idalcan, prædas eiusmodi sagaciter odorari assuetus, de more structurus esset insidias. Quod putarat, euenit. Ingressum Decanios limites Cidem, utpote eiusdem sectæ hominem; quin etiam è Mahometis, ut ferebatur, stirpe genitum; Idalcan benignis admodum promissis ad se per litteras inuitauit. Cides, vel societate superstitionis, vel vberioris stipendij ostentatione adductus; vel etiam interuertendæ regiæ pecuniæ spe; haud grauata ad Idalcanem sese contulit. ille, comiter acceptum, per speciem honoratæ præfecturæ, Dabulum extemplo amandauit. ibi, nequid rumoris emanaret, pecunia spoliatum, per idoneos talium facinorum administratos è medio sustulit. Crisnaraus interea, speculatoribus clam appositis, cum rei gestæ seriem haud magno negotio comperisset, lætus oblata belli occasione; missis quoquo versum ad Reges ac dynastas epistolis; manifestam Idalcanis perfidiam, & violatas pacis leges minaciter & acerbè conquestus est: dein, maximis equitum peditumq; contractis copijs, Raciolum urbem obsidione cinxit. Ad eam soluendam obsidionem Idalcan profectus; commisso prælio, magna parte suorum amissa, cum paucis elabatur. Crisnaraus victor, non castris modo Idalcanis est potitus; sed etiam Raciolum urbem valido instructam præsidio, crebris iam oppugnationibus frustra petitam; metu denique in deditionem accepit. Idalcan interea, remotis oppidis, quo propter siccitatem Crisnaraus cum exercitu peruenire non posset; amissa in præsens renouandi belli fiducia, se se inglorius continebat. Ad eius cladis famam, cum alij ab Idalcane defecere; tum Gini, gens



gens in Decano regno prænobilis. Eius gentis principes, germani duo fratres, Comus, & Appa, contractis octo ferme armatorum millibus, in subiectos Gateis iugis agros impetum fecerant: inde sine dubio in oram maritimam transgressuri, crebris portubus & vectigalibus quæstuosam (Concanum vocant è regione Goæ) quam Ginorum olim familiæ Mahometani eripuerant. Eius oræ Præfectus, Idalcani hero avaritia & fraude non absimilis, magna pecuniæ summa è vectigalibus portorijſq; collecta; id vnum laborabat, quo pacto, inter eos tumultus, domini rem ad suum peculium adiungeret. Omnia circumſpectanti, commodiſſima ad fugam, Goa Luſitanorum vrbs viſa. id quo tutius faceret; Luſitanum ſibi præfectum ante conciliandum ratus; ad ſpecimen probitatis ac fidei petijt ab eo per nuntios, primum vt Idalcani contra Ginotumultuantes opem pro amicitia ferret. id ſi facere grauaretur (quod ita fore haud erat neſcius) tum libero mendacio ſuadebat, vt ipſe potius in eos portus & vicos, Emmanuelis nomine inuaderet. æquiore animo Idalcanem in afflicta fortuna laturum. ſuas opes & vectigalia in Luſitanorum, quam in perduellium poteſtatem veniſſe. Hoc nuntio accepto Mellus Præfectus, rem ad conſilium detulit. ac tali tempore nemini dubium erat, quid ius, quid æquitas, quid amicitia poſtularet. verum apud homines lucra penſantes, vtilitas valuit. Mellus cum octingentis ferme Canarinis peditibus, Luſitanis equitibus ducentis & quinquaginta, euripo traiecto, Concanum ſine certamine vlllo occupauit, non auſis Ginis aduerſus Luſitanos arma ferre: & Rhotericum Iuſartem cum modico præſidio ei regioni præfecit. At Idalcanis procurator, domino prodito voti compos, Goam plenos argento auroq; loculos tulit: & quo res occultior eſſet, amico Luſitano cuidam æque fallaci cuſtodiendos inirio tradidit. Dein, cum hic depositum ex occaſione repereret; ille alter ſe quicquam accepiffe impudentiſſime pernegaret, neque chirographum exſtaret vlllum; ex dolore ac deſperatione Mahometanus in furorem & inſaniam verſus, mentem ſimul cum pecunia perdidit. Fraudator vero, dum theſauris male partis incubat ſecurus; inopinata morte poſtmodum, ab eo quod cariſſimum habebat in terris, auellitur. Quin etiam ipſe Criſnaraus deinde malis artibus receptam urbem Racio-

lum,



## *Historiarum Indicarum*

lum, bello vicissim superatus, amisit. quæ bella, & numero perditum equitumq; , & vniuerso apparatu ( alioquin fides Barrium, & Oforium, & alios rerum Indicarum auctores appellet ) orbis nostri expeditionibus longo intervallo præferenda, enarrare nostri instituti non est. Postremo, ne Lusitanis quidem ipsis, vt in loco exponemus, diuturna stetit, minus honeste quæsitæ possessio. Ita, per omnes eorum scelerum affines peruagata cælestis ira, breui tempore pœnas à singulis improba cupiditatis exegit. Per eosdem fere menses, nouum & § multiplex aliud in mari miraculum exstitit. Classis nauium nouem duce Georgio Britto dum ex Lusitania Indiam petit; rostrata celsior Rhoterici Vasaï Pererix, in medio cursu, repente, veluti frano equus adducto, ita substitit magno cum aquæ sonitu ac motu, qualis, vbi in vada & syrtes incurritur, edi consuevit. Eo ipso terrore perculsi nautæ, demissa vtrunque bōlide, profundum sine dubio mare comperiunt. Cum inflatis vento velis hæreret nauigium nihilominus; dispiciendi causa ( quòd esset nox ) admotis ad marginem luminibus; implexam alueo ingentem belluam vident. Carinæ centum & quinque dodrantium longitudine, applicuerat corpus; cauda gubernaculum illigarat; alis immanibus latera ad summum vsque cingebat: quas iam in alas per imprudentiam nonnulli manus iniecerant. Ad spectaculum adeo tetrum, ingenti videlicet horrore nautæ militesq; perfusi. vt vero, doli magnitudine, vasto hiatu nouissime caput extulit; metu exanimati pane omnes, infernum profecto monstrum diuinitus immissum credere, ad viuā tot noxiorum corpora glutienda. Pauci, quibus in tanto discrimine mens animusq; constiterat, consultandi gratia in vnam partem secedunt. erant qui contis, & iaculis, ballistisq; depellendum suaderent cetum: alij contra, nihil magis tali tempore vitandum aiebant; ne tantæ molis animal vulneribus irritatum, concussu ipso & agitatione violenta nauem euerteret. in summa inopia consilij, cum nihil explicaretur; & maior in singula momenta terror instaret; suppliciter ac demisse veniam pacemq; Dei & cœlestium exposcere, atque ad vota precesq; confugere placitum est. Neque ea irrita fuere. Sacerdos cum linteo, & stola, & signo Crucis in medium prodijt. ab eo, sacris carminibus, & exorcismis delinita



linita bellua (mirum dictu) nulla cuiusquam noxa relicto nauigio, cum è portentosis narium fistulis ingentem reflasset aque vim, se se admodum placido lapsu in mare demisit. Lusitani, tamquam ex orco præter spem erepti, debitas diuinæ clementiæ laudes & grates agebant. Circa idem fere tempus, in Sommatram Georgius Albuquerque cum orbo extorriq; delatus est puero. Ante eius aduentum, tyrannus Geinal, Pacenorum erga se voluntati diffusus, non longe ab vrbe munierat castra; seq; intra id munimentum cum tribus millibus armatorum tenebat. Albuquerque, missis qui tyrannum iubèrent iniusta possessione decedere; cum denuntiatione minisq; nil nisi verba & frustrationes eliceret; fauente Aruano finitimo regulo, castra cum trecentis duntaxat Lusitanis aggressus, non sine sanguine suorum expugnat. ac Geinale interfecto, & prædæ parte Aruano concessa, qui inter oppugnationem auersas castrorum portas obsederat; pupillum magno populi assensu plausuq; Regem acclamatum, & cum annuo tributo in verba Emmanuelis adactum ex fœdere, in patria sede ac domicilio collocat. Eius pueritiæ regendæ, Molana præpositus is, qui pupilli susceperat causam: & rei maritimæ cura, Lusitanorum amico Ninacunapani concredita: dein ad Mahometanos in officio continendos, castellum ipso in aditu portus exstrui ceptum. Quæ ne res, adeo secundæ, nimium Lusitanos efferrent; quo die Geinalis capta sunt castra, ipso die ad Acenum oppidum, leucas à Paceno fere viginti; dein ad Bintanum longe dispari successu pugnatum est. Georgius Brittus, navibus quinque ab Cocino Molucas petens; cum ex itinere Acena littora tenuisset; auri occæcatus auiditate, cuius vim ingentem in proximo delubro esse audierat; cum centum & viginti armatis in terram egreditur. Huic Abrahamus tyrannus obuiam cum sex elephantis, peditibus mille progressus, pugna commissa, Lusitanos complures temere inuectos, & in ijs Georgium ipsum interficit; ceteros grauius saucios retro ad mare compellit. Inde in Georgij locum Antonio fratre suffecto, Lusitani Malacam traiciunt. quò cum item Albuquerque paulo post à Paceno superuenisset; duodecim amplius coactis in vnâ nauibus, & propugnatoribus ferme sexcentis, Alodino, infestum de more Malacense littus habenti, arma inferre denuo placuit.



## *Histor. Indic. Lib. VII.*

placuit. Is nuper ad Pagum victus, ut supra demonstratum est, in Bintanum haud longe à Pago receperat se se. Ea insula, Sin-  
capuranis obdita faucibus, nobili secatur amne; qui ponte  
iunctus, dein se in mare euomens, portum nauigantibus præ-  
bet. Huic impositam amni urbem, insulæ cognominem, Alo-  
dinus, pulso, uti supra docuimus, vetere domino, præclare  
munierat. ad pontis caput propugnaculum excitarat; à cæte-  
ris partibus, serratæ structuræ, ad latera ferienda, vallum &  
aggerem obiecerat. Portum ipsum, & fallacia vada, & ada&ti  
fistuca flexuosi de more stipitum ordines; & in assidua statio-  
ne paratæ lanciaræ seu lembi egregie tuebantur. Lusitani, pro-  
pe certa victoriæ spè profecti, nondum probe explorata regio-  
ne, descendunt; duabusq; simul partibus ad mœnia subire co-  
nati, cum neque scalas attulissent, & stagnantibus circum aquis  
ac voraginibus impliciti tenerentur; destinatis vndiq; hostium  
telis ac tormentis, promptissimi quique sternuntur. Nec fe-  
licius mari tentata oppugnatio est. cum & incognita obstarent  
vada, & hostilium nauigiorum agilitas, onerarias Lusitanas,  
magnitudine ipsa inhabiles, crebris detrimentis afficeret.

Ita, omisso incepto, & præcipuis è suorum numero  
desideratis, diuersi duces; Albuquerqueius  
Malacam redijt: Brittus ad Mo-  
lucas, quò intenderat,  
nauigare per-  
rexit.

*Libri Septimi Finis.*







# ISTORIARVM

## INDICARVM,

### LIBER OCTAVVS.



VM hæc apud Indos alterna succedunt vice; interim ex alia quoque parte, atque adeo plane diuersa, perquam insignè ab homine Lusitano facinus editum est. Fernandus Magalianes agebat Olisipone, ingenti animo vir, & rei naualis apprime callens. Is, quod in India sub Albuquerque duce stipendia multa fecisset; nequaquam pro spe præmiorum (vt in suis plerunque meritis æstimandis nimium sibi fauet humana cupiditas)

ab Emmanuele tractari se questus, ad opulentiores Caroli Cæsaris Castellæ Regis aulam transijt. ibi, cum astronomis aliquot communicato consilio, & implacabili odio in Emmanuelem accensus, Cæsarem & consiliarios docet; Molucas insulas, quarum celeberrimis toto iam terrarum orbe diuitijs Lusitani fruuntur; intra Castellanae conquestionis limites

Q

tes



## *Historiarum Indicarum*

tes haud dubie contineri. idq; non pluribus tantum argumētis ē mathematica supputatione contendit; sed etiam acceptis inde litteris à Francisco Serrano, de quo supra commemorauimus; in quibus de admirabili quadam eius regionis cum opulentia, tum ab aurea Chersono longinquitate differeret. Profecto, si à fortibus & peritis hominibus tentetur ex Occidente iter; haud ita magno negotio ē Peruana terra in easdem insulas penetrari posse. opem dein addit monitis. ac se, modo in eam expeditionem necessaria praebeantur; in omne discrimen, experiundi causa paratum ostendit. Mouit Cæsarem & magnitudo promissi, & Fernandi auctoritas cum testimonio Serrani coniuncta. Quinque compactis egregie nauibus, eximio & nauta & milite ad Hispalim instructis (quo in numero exsules erant Lusitani complures) vnus Magaliones cum summo imperio ac potestate praeficitur. Cum ijs nauibus, Bati fluuii in altum Oceanum euectus; Canarias primum insulas, tum Brasiliam certo iam pridem itinere petijt. inde, velis in Austrum datis, cum ignota littora diu legisset; ad magni fluminis ostia ventum est; quod Sancti Iuliani vulgus appellat. is locus quinquaginta gradibus ab æquinoctiali abest circulo. neque inde longe, infesto rigore, & aeterno pressa gelu, niuosa montium cacumina in cælum exsurgunt. terram incolunt homines immani duodecim amplius dodrantium statura, effervis moribus, crudis in cibum carnibus adsueta. ē quibus duo ad classem attracti, blandimentisq; ac muneribus à Magalione deliniti, intra paucos dies ex insolita victus consuetudine perire. Ad eam oram explorandam missa navis vna, cui praeerat Ioannes Serranus; in scopulos illata, saluis tamen hominibus, frangitur. Hisce rebus conterriti classarij, & prae alia maris incommoda, saeuissimo frigore eneati; incerta vitae, & perueniendi quo intenderant spe; reuersionem plerique suadere, quidam etiam conuitio efflagitare institerunt. Hosce Magaliones, obfirmato ad omnem patientiam animo, benignis adhortationibus aliquandiu sustentare conatus; comperta demum coniuratione; partim capite, partim exilio punijt. quae supplicij ac minarum acerbitate, obstupefactis interim ab omni rerum nouarum conatu reliquorum animis; ultra eum locum tres ferme gradus, hoc est leucas circiter quinquaginta, processit.



proceſſit . atque ibi demum ſeſe oſtendit euripus, ſinuoſo meatu Oceanum vtrumq; coniungens . Ea re tum ex incitatiffimo aquarum æſtu animaduerſa; tum ex cetorum oſſibus in litus eiectis; quaſi peracto iam itinere, gratulatio ingens à Magaliane facta; & euripo ipſi, ab inuentore, perpetuum ac nobile nomen inditum eſt . ibi, commeatibus valde imminutis, cum denuo fremitum vel querimonias quorundam inaudiffet; capitis pœna propoſita, vetuit ea de re ſermones inferri . Tum alia nauis ad inquirendum exitum præmiſſa; ducem frustrata per tenebras retro vnde venerat, Hiſpalim reuertit octauo menſe quam ex eo portu diſceſſerat . Eam nauem miſſis qui quærent, incallum dies aliquot præſtolatus, cum reliquis tribus audacter ipſe progreditur: perq; varios mæandros, & cæcas ambages, crebro velorum flexu tandem ex altera parte vaſtiſſimum rursus in æquor euasit . & quoniam ſub æquatore ipſo poſitas Molucas eſſe didicerat; in eam partem proras dirigere magiſtros iubet . Leucas mille quingentas procul ab omni terræ conſpectu prouecti, in deſertas aliquot inſulas incidere; quas ex aduerſo Italiæ oppoſitas nonnulli arbitrantur . inde continuato in Septentriones itinere, ad Subum inſulam leucarum ferme duodecim ambitu, auri feracem, frequentem incolis ventum eſt . Ibi Magalianis labores exitu necopinato concluſi . quippe inſulæ regulus, quod armis eo tempore cum finitimo Rege Mathani contenderet; oblata recentis auxiliij ſpe, aduenas non ſolum hoſpitiſ libenter excepit; ſed etiam in eorum gratiam ſe ſe cum vxore, liberisq; , & popularibus circiter octingentis, Chriſtianum fieri voluit; & honoris cauſa in ſacro baptiſmate Fernandi nomen aſſumpſit . Hiſce neceſſitudinum vinculis magis magisq; Luſitanus obſtriçtus, petenti opem & Chriſtiano, & hoſpiti, negare non potuit . Deſcenſione cum præſtantibus aliquot facta, Magalianes, cum ſemel iterumq; fudiſſet hoſtes; tertio denique ex inſidijs ipſe circumuentus occiditur . Cæteri, partim circa eum interfecti, partim elapſi vix ad naues cum triſti nuntio peruenere . Neque hic finis miſeriarum fuit . ex quo facile exiſtimari poteſt, quam non temere, nec ſine diligenti præparatione, barbaris Chriſtiana ſint impertienda myſteria . Regulus, qui vix adhibito catechiſmo, vel antea actæ vitæ ſcleribus cum ſalutari deteſtatione



## *Historiarum Indicarum*

ne damnatis, amicitiae & temporis causa, peregrina sacra suscepisset; qua mobilitate Christum induerat, ea tem paulo post & Christum ipsum, & vna cum Christo ius fœderum, fas, humanitatem, fidem penitus exuit. Oblatam ab hoste pacem, cum eo si aduenas è medio sustulisset; recentia merita & iunctas nuper dextras oblitus, minime recusauit. Tam scelerati dein facinoris perpetrandi, cum in aperta vi nulla esset spes; primarios è classe ad viginti, per officij ac beneuolentiae speciem ad ferale conuiuium inuitatos, repente inter ipsas dapes & pocula contrucidat; vno Ioanne Serrano vel ad ludibrium, vel ad lucrispem referuato; & ex redemptione se partem aliquam sulphurei pulueris, & aliquot ænea tormenta (cuius machinae in ijs locis nihil vnquam simile visum fuisset) capturum esse cōfideret. Atque vna hæc spes salutis afflicto quoq; Serrano restabat. Verum vtrumq; postmodum euentus fefellit. namq; productus in vinclis ad mare Serranus; noua clade exponenda primò socios ad misericordiam lacrymasq; commouit: eodemq; interprete, per consuetos iam nutus ac symbola, cum incolis agi de pretio cæptum. Paciscebantur vtrinque pecuniae loco, duas minoris formæ bombardas, & pulueris aliquantum. Ea cum linternis ad terram nautæ admouissent; subito pretium augere insulani, & recedere à conditionibus, ac redemptorem varijs artibus detinere. Inde altercatione cum iurgiis orta, cum maior maiorq; hominum frequentia ad littus afflueret, veriti fraudem & insidias classiarij, se se ad naues re infecta subducunt: anchorisq; sublatis, miserum Serranum, frustra fas religionis, amicitiae, patriæ, lamentabili vociferatione obtestantem, in barbara & crudeli terra destituunt. ad insulam decem leucas inde prouecti, varijs casibus imminutas recensent copias. fusis ac laceris magna ex parte armamentis, centum & octoginta non amplius homines in vniuersum inueniri. Cum in tres ipsas naues, neq; nautæ, neq; funes, neq; vela sufficerent; alueo vno, qui præ cæteris quassatus erat, incenso; turbam cum instrumento omni in alteram transferunt. ita, duabus tantum reliquis nauibus ex eo loco discedunt: ac prorsus in occidentem Solem obuersis, diu errabundi, ad Molucas insulas tandem aliquando perueniunt. ibi cū Tidoris regulo haud ægre societas iuncta. Lusitanarum aberat classis: eo facilius corrasis vndiq; frugibus, regulo

enixe



enixe adiuuante, per tot ærumnas & pericula petitum ex insula specimen auerunt. ac trito inde itinere vtraque primum institit naus. dein Lusitanarum classium iniecto metu; altera fluctibus quassata, cum omnibus compagibus aquam acciperet, ad Molucas recurrit; ibiq; egressis in terram hominibus, ad scopulos allisa diffringitur. altera Indis ad dextram relictis; immani ausu protinus altum præcidere, & recta Bonæ spei promontorium petere intendit. eo superato, cum ad Hesperidas vsque insulas processisset; inaudito post omnium seculorum memoriam cursu totum orbem emensa, & æmulis classibus illuc vsque feliciter euitatis; ab Lusitano demum Limenarcha in eo portu detenta est; & pauci qui superfuerant semianimes in custodiam traditi: è quibus tamen aliqui, naui deinde recuperata, in Hispaniam, vnus etiam, patria Vicetinus, obstupescens cunctis miraculi nouitate, in Italiam redijt. Huic naui non sine causa Victoriæ inditum fuerat nomen. Nauclerus erat Ioannes Sebastianus Canus, ex oppido Guetaria Vardulorum, ad Pyreneum; vir animi fortitudine, peritia gubernandi, & inaudita felicitate sane promeritus, vt ipsius ac patriæ nomen, nullus vnquam casus, nulla temporum longinquitas obruat. Neque me fugit, hæc aliter ab Iouio æquali eorum temporum tradi. Sed nos rem totam ex fide retulimus: haud mediocriter locupletem huiusce narrationis auctorem sequuti Ioannem Barrium Lusitanum: ad quem, præter cæteram notitiam, & habita cum superstitibus ex ea classe colloquia; conscripti insuper ab ipsis gubernatoribus eius peregrinationis commentarij peruenere. Ex eo deinde tempore sæpius in Molucas è Bætica primum, ac postmodum è noua Hispania nauigari captum. quæ res ingenrem discordiarum molem inter Lusitanos ac Bæticos peperit; nec sine magno motu, cum in Europa legibus, tum in Asia ferro; de illius maris & commercij possessione certatum est. Magalanes è Bætica Septembri mense anni vndeuigesimali soluerat. biennium circiter in ea nauigatione consumptum. Inter hæc, de rebus in Ceilano gestis nuntij ac litteræ in Lusitaniam venerant. Ad ea tam opportuna & fructuosa tuenda commercia, & fluxa fide Regem in officio continendum; arcem instaurari, & aucto præsidio diligenter custodiri Emmanuel iussit. Eius rei causa Lupus Brit-



## *Historiarum Indicarum*

tus cum supplemento fabrum ac militum in Ceilanum profectus, accepto à Ioanne Sylueria castello; primum omnium concharum vim ingentem è proximo petijt; è quibus Indico more calce confecta; novos muros prioribus iam collabentibus ex arte perduxit; ac fossam probe purgatam statumine munijt. Ea re offensi vehementius insulani, quos communi vocabulo Cingalas vocant: quod contra ipsorum salutem ac libertatem cuncta parari haud absurde suspicarentur. Et Saraceni inquilini de more suspicionem ac metum augebant, in conciliabulis dictitando, veros videlicet vates initio se fuisse; cum exitialem Columbanæ terræ Lusitanorum aduentum fore prædicerent. Per speciem societatis illapsos inaudita auaritia & crudelitate homines, paucis diebus male mulctato hospiti Regi stipendium imposuisse. post hæc, aliarum gentium homines, nullo iure aut exemplo ab iis littoribus arcere cepisse: non quieturos, quoad iniecto ad arbitrium freno, populis perinde ac iumentis abutantur; nec eorum fortunas modo, sed etiam succum & sanguinem hauriant. Habere Columbanum digna factis & moribus præmia; qui, spretis fidelium sociorum consiliis; nouam & incognitam veteri & expertæ amicitie prætulisset. Huiusmodi facibus ad execrabile odium nominis Lusitani accensa plebs; venalia primum alimenta cibosq; castello subtrahere: dein eò audaciæ ventum; vt Lusitanos longius ab arce vagantes, vel iaculis eminus peterent, vel iniquo loco circumuentos occiderent. ad hæc tam atroces iniurias, principio, pacis & concordie causa, leniter agere, & conuiuere Præfectus. Sed conuitia militum, segnitiam & ignauiam increpantium, diutius ferre non potuit. meridiana hora, quod æstiuæ maxime quietis est tempus, cum centum & quinquaginta armatis Columbum oppidum arce pane coniunctam, quam tu multuosissime inuadit. Barbari, qui vt in summo otio, nullis cincti mœnibus, neque stationes neq; vigilias agerent, metu perculsi repente capeffunt fugam; re familiari, pauidis coniugibus, paruisq; liberis in tanto periculo destitutis. Brittus sine certamine oppidum ingressus; militem à direptione cadibusq; continuit: tantum foeminas puerosq; ad fores ædium alligari iussit; vt cum in sua potestate omnia fuisse redeuntis Cingalæ cernerent, ex eo ipso, quam  
non



non hostiles in Regem populumq; animos gereret, existimare facile possent. Simul etiam ad retardandam eorum ferociam, si ab tergo instarent, patientioris viæ quæ ad castellum fert, testis ignes iniecit, salutari sane consilio. quippe barbari, non celerius, attoniti metu, se se ex oppido eiecerant, quam isti desiderio & sollicitudine pignorum, conglobati furentesq; in prælium rediere: instantesq; Lusitanis iam se recipientibus, eodem impetu in arcem irrumpere potuissent; nisi eos cum demendi vincula suis; tum restinguendi incendij detinuisset mora. Inde nostris ad arcem mature adipiscendam, occludendasq; portas spatium est datum, cum extremi tamen agminis ferme triginta faucij rediissent. Neque is terror (vti putarat Brittus) ad pacandam valuit gentem. quin, exasperati potius animi. signoq; dato per agros, armati ad viginti millia conuenere. ea multitudine freti, cum temere ad arcis mœnia subiissent; magna cum cæde vulneribusq; repulsi, castra communiunt. in exitu iam æstas erat: eo maiorem in spem venerat regulus, si minus oppugnatio procederet; interclusis propter anni tempus maritimis com meatibus auxilijsq; obsessos ad ultimam inopiam redigendi. Neque tamen interea quies ab armis & ab operibus erat. aggerem assiduo labore ad mœnia Cinglæ proferebant. missilibus dies noctesq; fatigabant hostem: inferiores vtique Lusitanis tormentorum magnitudine, & artificio; sed molem supplebat numerus. ferreas cōtraxerant ballistas ferme sexcentas. eæ vel brachijs collibratæ, vel innixæ canterijs, indita in fistulam plura simul veruta decem palmorum longitudine, aprugno aduersus ignem pennata corio, ita excusse emittebant; vt ad passus ferme ducentos obuia quæq; perfringerent. hisce verutis interdiu impetebant inclusos: noctu ignitis iaculis militares intra arcem casas & diuersoria, ramis & frondibus raptim exstructa, incendere conabantur. Lusitano, in magnis rerum angustijs nihil erat æque difficile, atque aquandi ratio, quod puteus extra arcem non sine cruore adeundus esset, neque eo per cuniculos, vt olim Cananore, penetrari loci natura permetteret. Accedebat aduersus tantam hostium multitudinem, mira defensorum paucitas; vt sine vlla interdum vicissitudine ijdem perstare in stationibus & excubijs cogerentur. Vna tantum fiducia restabat venturi ab con-



## *Historiarum Indicarum*

tinente subsidij, si rem vsque in aestatis initium extrahere potuissent. Verum ea quoque spe excidere, postquam exacta iam per ingentes labores hyeme, Antonius denique Lemius ab Cocino cum vna tantum trireme, neque plus quinquaginta propugnatoribus, affuit; & ijs quidem ægre coactis, quod & Sequeria eo tempore cum maxima parte copiarum abesset; neque è præsidijs, in tanta infensarum circa gentium propinquitate, deduci milites expediret. Interea barbari diurnis nocturnisq; operibus promoti vallo, turres insuper è palmea materia, cespite ingesto, duas erexerant: vt è superiore loco, dum fossæ complentur, sagittis & iaculis hostem in muro consistere prohiberent. Eo periculo animaduerso Brittus, antequam alati subsidij tenuitas emanaret, vltro in hostem erumpere statuit. Concilio conuocato, Lemium trierarchum postera luce circa meridiem repente à mari oppugnationem ostendere, & maioribus tormentis quaterre turres iubet. ipse intento in eam partem hoste, cum trecentis & quinquaginta Lusitanis ex alia parte, semiplenas & incautas stationes aggreditur; turbatosq; ipsa audacia barbaros vallo deturbat. inde transgressus munitiones, eodem impetu simul vtramque turrim inuadit; auersosq; hostes, è propugnaculis deiecit. Turribus ab Lusitano captis, clamor extemplo circa vicos & palmeta perfertur; palati in vnum coeunt barbari; vt omni conatu Lusitanum expellant. iamq; instructa acies tota Cingalarum, Saracenis immixtis, admouebatur. centum & quinquaginta erant equites, haud spernenda in ijs regionibus ala; peditum ingens numerus. elephanti quinque & viginti præibant. ex ijs erant primi ordinis quattuor; non turres modo cum sagittarijs dorso vestire assueti; sed etiam in decussim alligatas ad proboscidem falces, tanta vi ac dexteritate vibrare, vt quicquid ab latere vel à fronte se obiecisset, ancipiti ferro proscinderent. is terror Lusitanis offusus, primo referre pedem coegit: mox, quod sæpe fit, in ipsosmet recidit hostes; cum densis icæ glandibus belluæ, spreto rectorum imperio, terga vertissent. Vrente dein magis magisq; introrsus plumbea peste, doloris impatientes, quacunque ruerent, late stragem edere; ac simul cuspidibus iaculisq; ab tergo Lusitanus instare. Ita suismet auxilijs cum ingenti clade barbari dissipati fusiq;. Brittus fugientem hostem



hostem aliquandiu persecutus; vbi ad lucos & nemora ventum est; contentus eius diei victoria substitit; & priusquam se barbari ex pauore ac trepidatione colligerent, non sine multo suorum sanguine se in arcem recepit. Atque is dies obsidioni attulit finem. Amisissis ex amicorum numero præcipuis, regulus Mahometana hortamenta stimulosq; execratus, vna cum arcis potiundæ spe, consilia belli deposuit: missisq; ad Brittum oratoribus, veniam erroris & pacem denuo petijt: atque ab Lusitanis, vel quietem ex longa defatigatione desiderantibus, vel absente Prætorē Sequeria nullam expectantibus opem; haud grauate concessa. Ceilani res in pristinum rediere. At Prætor ineunte iam æstate ab Armuzia profectus, Cambaia legens oram, ad Dium applicuit. ea vrbs, quod magnas (vti diximus) habet opportunitates, & furtiuis Aegyptiorum & Saracenorum nauigationibus tutum ab Calecuto receptum dabat; Lusitano præsidio locum aliquem ibi obtineri ad hostes arcendos magnopere cupiebat Emmanuel. itaque inter cætera Sequeria mandarat in primis, vt Cambaiani Regis, & Iazij dynastæ voluntate, si fieri posset; sin minus, vi atque armis aream arci ad Dium ædificandæ occuparet. Et Cambaianus quidem Rex, haud multum ab ea societatis conditione abhorrebat. lazius vero, summa vi, cum apud Regem, tum apud satrapas nitebatur, ne Lusitanis in eiusmodi possessionem pateret introitus: & simul, quantum ex tuto & occulto poterat damni præternauigantibus inferebat: miro inter hæc artificio eximiam quandam in Prætores, ipsumq; Emmanuelem obseruantiam ac beneuolentiam simulans. Neque tamen eos plane fallebat. ergo pari vtrunque fūco ac fallacijs agebatur. Sequeria cum ab Armuzia rediens Dium applicuisset, vt dicere institueram; bona cum pace in speciem acceptus est. nec modo commeatus in classem benigne præbiti, verum etiam ipse & nauarchi donis egregie culti. Verum appellatus de potestate ædificandi Iazius, ita se ad id propensum ostendit; vt rem interea totam sui arbitrij negaret esse. legatos neecessario mittendos in regiam (vrbs erat Madaba, sexdecim fere leucas à mari) magnopere confidere se, cum Emmanuelis honori; tum etiam suis ipsius precibus ac suasionibus id facile ab Rege datum iri. ita, blandis promissis, ac singulari comitate extrahebat rem. At Lusitanus



## *Historiarum Indicarum*

sitanus fraudem sentiens, vt verbis transigi nihil vidit; ad vim atque arma adiecit animum: neque ita difficilis videbatur futura oppugnatio: quod cum à militibus imparata eo tempore vrbs erat; tum in eo ipso littore stationem habenti Sequeriæ noua ab Emmanuele auxilia superuenerant. Sed tanta fuit Iazij in agendo lenitas, tanta in ostentandis viribus & omnium rerum apparatu solertia; vt Prætor, mitigata in præsens ira, neque ausus tali tempore summam rem in discrimen adducere; sine vlla noxa recesserit: maioribus videlicet copijs anno proximo rediturus. Sequeriæ profectio, duplici voluptate Iazium & amicos affecit: quod non modo præsentem arcis apparatus consiliumq; sine cruore discusserat; sed etiam ad urbem nouis operibus muniendam, & externo, quo maxime nitebatur, firmandam milite, spatium erat nactus. itaque in neutro cessauit: idoneis locis propugnacula exstruxit, instaurauit mœnia, & in ijs tormenta vigiliasq; disposuit. Castellum est in medio ferme introitu atque ore portus. ab eo castello catenam ingentem ex ea parte quæ latius patet, ad oppidum vsque perduxit. ab altera, tres onerarias collocauit ponderibus adeo degrauiatas; vt perforato, cum opus foret, alueo, repente subsiderent. à fronte autem, ne subire triremes ad murum possent, prægrandia saxa & cautes in mare deiecit. tortuosos præterea cancellos, & varijs ad errorem flexibus in se recurrentes, obliquo amne defixit. ita omni aditu terra mariq; intercluso, lembos biremesq; centum & octoginta, & aliquot insuper negotiatorum naues in portu cohibuit. Arabas denique, ac Turcas, Persasq;, & ex alijs nationibus Christianæ maxime fidei desertores, mercede conduxit: ac, nequid interea de ædificatione per legatos Prætor Lusitanus ab Rege impetraret; omnem per se perq; suos conatum adhibuit. Neque segnius eodem tempore, diffusus legationi Sequeria parabat bellum. Ab Dio Goam, atque inde Cocinum delatus; veteres naues, & quassatas refecit, nouas deduxit, complures nauarchos, quibus in beneficij loco Emmanuel quæstuosos ad Malacam, vel in Molucas, aut in Sinas, aliove dederat commeatus, pro imperio ac potestate, Cocini detinuit. ita, summo studio adhibito, duodequingenta maiorum nauium classem varij generis, cum cætero instrumento machinisq;, tum validis militum centurijs



centurijs adornauit . è Lusitana sobole tria millia ; ex Indica impositi Canarini , ac Malabares octingenti . Cum ijs copijs Sequeria , prætextu Armuziæ repetendæ , quod Rex Torus tributum Emmanueli soluere distulisset ; rursus ex itinere Diu accessit . sub eius aduentum Iazius , per exploratores iam ante de Lusitanorum apparatu certior factus ; ne coram agere cum Sequeria cogeretur ; tamquam euocatus ab Rege , magnis itineribus eò contenderat ; Saca filio cum idoneis rectoribus eius adoleſcentiæ tribus , firmoq ; militum præſidio ad urbem relicto . Is , de area blande per internuntios ab Lusitano appellatus ; è seniorum sententia benigne respondit : Si comætu , vel re quauis alia in classem opus sit ; se affatim pro amicitia & pro consuetudine præbiturum : neque id , in tanta rerum omnium copia , quanta vrbi tum suppetat ; in magni obsequij loco numeraturum esse . quod vero ad aream arcis designandam attineat ; se in potestate parentis esse : nec super tali tantaq ; re sibi licere quicquam eo absente decernere . mirari , cur ad eam diem Sequeria nullos ad Mamudium procuratores aut nuntios miserit . integram etiamnum esse rem : & Iazium patrem , ab Rege accitum , eo etiam aduolasse libentius , vt præſens , auctoritate , studio , gratia , postulatis Lusitanorum adesset . simul , quoniam Sequeria per interpretem ambigue intulerat , Lusitanos in eo genere iamdudum exercitados , modo se se in id ipsum intenderent , arcem nullo negotio excituros ; ipse vicissim obscure iecit ; non vnam omnium locorum esse naturam ; haud æque facilem in eo emporio structuram fore , atque in alijs Indiæ , vel Africæ littoribus exstitisset . Sequeria , vbi Mahometanos non minus artibus ad eludendum , quam munimentis ad propugnandum inſtractos videt ; de summa rei præfectos in concilium aduocat . ibi , sententijs in diuersa tendentibus , aliquandiu certatum . Erant qui non diutius ferendam ludificationem , atque admotis vndique machinis mœnia protinus quatienda censerent . In ijs , tormentorum magister ; circumuectum speculatoria nauicula se , ad dextram oppidi partem , quæ in mare imminet , animaduertisse haud ita firmi operis muros . si placeat ; se celeri strage illac transitum in urbem esse daturum ostendit . alij contra , & ij præcipue , quos Prætoris iussu ad Cocinum substituisse docui-

mus,



## *Historiarum Indicarum*

mus, nunc oppidi vires, & armatorum frequentiam; nunc ipsius Regis opes, quem bello prouocari non expediret; nunc naturæ gentiumque memorabant ius: quod utique magno periculo violatum iri, si non ante explorata Mamudij voluntate; inter ipsa benevolentia & caritatis officia, oppidanis repente vim attulissent. quin Prætor, uti Saca & Iazius ipse hortaretur, legatum & litteras ad Regem protinus mitteret: à quo si nihil æqui impetratum foret; tum denique armis decerni posse: neque vnquam Iazij oppugnandi honestas Lusitano causas futuras. Hæc à nauarchis propalam iactabantur: illa tacita suberat cura, ne, si dimicari cæptum esset; crescente in dies mole belli; interim ad optatos cuique portus & commercia nauigandi facultas effugeret. Eo vrgebant acrius, & alijs aliquot in eandem sententiam adductis, facile tenere, ut ab armis abstineretur, quoad legationibus tentata res esset. Id ubi manauit; classiarios, victoria simul ac prædæ incensos cupidine, & pugne signum in singula momenta expectantes, magnus repente dolor incessit: vulgo, se deceptos delusosque fremebant: nec modo querelæ, sed etiam probra & maledicta in Prætorem exaudiebantur. atque etiam præfecti, se bellum suasisse per summam impudentiam mentiendo, assentandoque militibus, in Sequeriam ducem (cui vel in primis parci oportuerat) omnem decreti eius inuidiam transferebant. Ea re Prætor cognita, rursum eosdem in consilium vocat: & „ Quandoquidem viri nobiles, inquit, è vobis audio esse complures, qui sese militibus „ venditent, totamque dilati huiusce belli causam in me conferant „ vnum; & aliter in consilio, aliter in circulis ac cœtibus disputent; denuo perrogare sententias placet; nec verbo solum, sed „ etiam tabulis publicis consignare, ut quid quisque senserit, dixerit, suaserit, palam exstet: neu quis posthac ex mea alteriusve „ infamia, vel inuidia, splendorem ad vulgus, & gloriam querat. Sub hæc dicta, rogati præfecti, eadem illa de belli difficultatibus, de Cambaiani potentia, de spe legationis, deque amicitia legibus iterarunt; cunctas deinceps in codicem scribæ publico referente sententias. Hisce ita peractis, communi decreto missi à Prætore qui Sacæ nuntiarent: Quando nulla super tali negotio habeat à patre mandata; nihil, ipso inconsulto, nedum inuito, Lusitanos de arce conaturos. pacem  
eius,



eius, & Mamudij Regis, & sibi, & ijs qui ante se pro Emmanuele Indiam rexerint, antiquissimam semper fuisse: & quoniam ita omnibus visum fuerit, se duos è classe primarios ibi relicturum: Rhotericum Fernandum, qui ad Mamudium ea ipsa de re contendat; & Didacum Pacensem Beianumve cum nauibus paucis, & fabrili instrumento; vt simul atque cum Rege conuenerit: sine vlla cuiusquam iniuria in optatam, & vtilem vtriusque ædificationem incumbat. interea se Armuziam, vti instituerat, perrecturum: petere ab Saca, & rogare, vt procuratores Emmanuelis pro consueta humanitate, & hospitij necessitudine tractet. Ad ea cum Saca, non exiguo leuatus metu, liberaliter admodum respondisset; ex condito Rhotericus legatus in terram expositus; Beianus cum nauibus tribus responsum ab Rege ibidem expectare iussus. aduentitij nauarchi ad viginti, mercaturæ causa alij alio dilapfi. Prætor cum cætera classe Carmanix oram legens, Armuziam venit. ibi cum Rege Toro, & Lusitano præsidio collocutus, dilata ab Toro pensionis causam reperiebat eiusmodi. Baharenus est, cuius ante meminimus, insula & vrbs in Persico sinu (sunt qui olim Icharam dictam putent) cum fertilis agro, tum vero margaritarum piscatu prænobilis. Hanc insulam iure beneficiario possidebat Mocrinus Arabs, vectigalis Regum Armuziæ. Is, cum viribus & ingenio contumax, tum etiam Mecani antistitis affinitate subnixus, cuius filiam habebat in matrimonio; indignari cæpit, seruire se Armuziano Regi, qui à paucis Mahometanæ sectæ aduersarijs, ex vltimo occidente profectis, regnum defendere paulo ante nequisset. Non esse verum, alijs imperare, qui sua seq; ipsum tueri non valeat. Ergo, non modo iugum aperte detrectare instituit Arabs; verum etiam prædatorijs nauibus omnes circa regiones infestas habere; & commeantes Armuziam vndique negotiatores auertere. è quibus incursionibus, tantum paucis mensibus Armuzianæ rei damnum illatum est, portorijs magna ex parte imminutis; vt Regi ad tuendam vix personam, nedum ad vectigal Emmanueli soluendum, nummi suppetere-  
rent. Hasce querimonias Torus cum ad Sequeriam ante per litteras detulisset; tum vero coram vrgere acius institit, vt sibi aduersus rebelles auxilium ex foedere præberetur. Neque  
abnuat



## *Historiarum Indicarum*

abnuit Prætor . Virum eximie fortem , ac bellicæ rei peritum , Antonium Corream expeditioni præposuit cum septem egregie instructis nauibus , & Lusitanis militibus quadringentis . quorum , è prima nobilitate centum numerabantur iuuenes ad omnia prompti , laudisq; ac decoris apprime cupidi . Adeas copias , Torus , lembos , quos vulgo terradas vocant , ducentos adiunxit , Xaraso ex amicis præfecto , cum tribus circiter Persarum , aut Arabum millibus . ex altera parte Mocrinus , ipsa meritorum conscientia monitus , haud dubie tali apparatu peti vnum se ; tamquam indicto iam bello , sic omnia ad oppugnationem arcendam summo conatu parauerat . ac primum , ex insula vicinisq; locis , armatorum coegerat millia ferme duodecim : in quibus erant equites trecenti Arabes , è Perside sagittarij quadringenti ; fistulatores præterea Turcæ , & ex ipsius Mocrini ditione , perpauci . reliqui , de gentis more , gladio & iaculis utebantur . Ad hæc , qua in Baharenum oppidum est descensus , vallum aggeremq; perduxerat ; passim obuersis in mare tormentis , & suis cuique præfecto stationibus ordine distributis . Correa , mense Iunio profectus Armuzia ; aduersa tempestate diu retentus est ; ac demum in Bahareni conspectum delata classe ; & extra ictum bombarde anchoris in falo iactis , habitoq; consilio ; placuit duabus simul partibus aggredi urbem : & hinc Armuzianos , inde Lusitanos in terram exponere , non modo ad hostem ancipiti prælio distinendum ; sed etiam , quod Correa , in tam exiguo Lusitanorum numero , diffusus Arabum ac Mahometanorum ingenijs , separatim & ex diuerso rem gerere tutius putabat : præsertim cum contra Baharenios eiusdem & sectæ , & sanguinis gentem , inuitos arma ferre non dubiis indiciis comperisset . Neque eum prouida fefellit opinio . Xarafus , infra hostiles munitiones facta descensione , copias proximum in collem subducit , & explicandis per tumultum ordinibus , & imperia turbando imperiis , data opera tempus terit , spectator interea futurus alieni certaminis , & consilium ex partis alterius euentu capturus . Correa , ne ipse quidem ausus in aduersum vallum recta subire ; & militem in mari fluctuantem destinatis hostium iaculis ac tormentis obicere ; paulo supra urbem perincommodo loco descendit : cum exspatiantibus late vndis ,  
alibi



alibi femore, alibi genu tenuis aqua pertingeret. expositis tandem sine vilo certamine armatis; Correa, vt nusquam nisi in virtute spes esset, Tristanum Castrum, nauali turbæ præpositum, scaphas procul ab terra iubet abducere. Nihil inde temporis acie instruenda consumptum. quippe Lusitani vel à præferuido ingenio impatientes moræ, vel è nanibus ferme viritim depugnare assueti; si quando terrestri Marte certandum est, in ijs vtique regionibus, ad signa atque ad ordines ægerrime continentur; sed vagantibus manipulis, palati, ac dispersi qua tulit impetus, in prælium ruunt: & cum denis interdum singulos concurrisse, egregiam laudem ac decus existimant. quæ audacia, vt aduersus tumultuarium & concursantem valet hostem, cuiusmodi Numidæ, & Arabes, Indi; censetur; ita, vbi cum ordinatis equitum turmis, ac pedite veterano res est, circumuentis plerunque, vel in medium acceptis, perniciem extremam afferre consuevit. Igitur ab Lusitano tum quoque de veteri consuetudine immutatum est nihil. Arius erat Antonij Corree frater, ætate ferox, & celebritatis ac nominis præter modum appetens. hic prior in hostem cum nobilibus tendit. raptim Antonius cum reliqua manu subsequitur. ac tantus fuit ardor, vt barbaros cum cæde primum vulneribusq; intra munimenta compulerint: dein, eodem impetu illati, longe summouerint. Ita, pæne iam concessum ab ijs de victoria videbatur; cum effuso repente omni equitatu, Mocrinus elatum successu hostem repressit; & sensim cedentem, vallo, & munitionibus pepulit. Ibi, patentiore campo, affluente rursus ex oppido multitudine, recrudit pugna. cuius, non ex numero tantum, sed etiam ex ipso genere armorum, prorsus erat iniqua conditio: cum Arabes è superiore loco prælongis triginta dodrantium hastis aduersa hostium ora crebris ictibus foderent, priusquam ij venabulo gladiove succedere ad vulnus inferendum possent. ac nihilò secius obnixi animis Lusitani perstare; ballistisq; præsertim ac fistulis equitem se se audacius inferentē arcere. in eo tumultu dum Arius temere in hostium cateruas inuehitur; duabus primum ictus sagittis, dein aliquot acceptis vulneribus concidit. eius cladis nuntij moerore pleni, cum ad Antonium aduolassent; Vos vero pergite, inquit ille, vt capistis: nam frater quidem meus, præclare



## *Historiarum Indicarum*

clare vitam in suo munere posuit. His dictis, accensi rursus ad prælium animi: sed lassitudo & vulnera degrauabant. Medium ferme erat diei: & feruentissimo desuper Sole, arenaq; infra æstuante, cum intoleranda siti mistus cruore manabat ex artubus sudor. Quæ cum defatigatio simul hostem cepisset; quasi tacitis inducijs, paululum vtrinque fuit quietis & spatij ad saucios è prælio subtrahendos. Inde, renouato impetu Lusitani priores in pugnam redeunt; ac sublato pariter clamore, Sanctum Iacobum appellant. Audiit Apostolus voces, ac suis de more propitius, repentinum hosti metum ac trepidationem incussit. Mocrinus, inter prima signa, duobus iam equis insidenti suffossis; dum tertio arrepto restituere pugnam conatur; acerrime dimicanti femur plumbea glande traicitur. ex eo demum ictu, cum sanguinis copiam funderet, fracta viri ferocia est: & elatus ex acie, præcipuis ex amicorum numero prosequentibus, cum se se desperatis rebus in latebras abdidiſſet, intra tertium diem emoritur. Barbari, vt seminecem Regem prælio excessisse vulgatum est; armis passim proiectis momento diffugiunt. ac tum denique Xarafus, deducto in campos exercitu, ad Lusitanos, victoriam gratulaturus, ac tarditatem purgaturus, accessit. Correa, tametsi perfidiam præclare senserat; tamen, ne res, alieno tempore, in iurgia; dein, vt fit, in certamen excederet; in præsentia, dolori & iracundiæ moderatus; fugienti saltem perduelli Xarafum instare, & parta iubet vti victoria. Mox ipse quoque, reſectis parumper ex lassitudine & calore militibus, aderat. Cum nusquam apparerent hostes, ad prædam victores illico versi; quæ non contemnenda ex ædibus præsertim regijs existit. Simul etiam, centum & quadraginta nauigijs ignes iniekti: & Xaraso ad custodiam vrbis relicto, Correa se, ad curandos maxime ægrotos ac saucios, quorum magnus erat numerus, in classem recepit. At Mocrini cadauer, dum ex insula in Arabiam sepulturæ causa traicitur; ab Sadradino Xarasi propinquo interceptum, summo cum gaudio in urbem asportatur. ibi abscissæ ab trunco ceruices; & corium è caluaria perquam artificiose detractum, Arabes gossipio inferciunt. id certum victoriæ signum, Toro missum munere, & cum ingenti gratulatione, in medio Armuziæ foro conditum est, addito titulo, qui Arabica & Lusitanica lingua rei gestæ



gestæ seriem contineret. Ab ea clade, cognatus Mocrini Hametes, pactus vti omnis generis mercenarij, relictis armis equisque, in continentem sine fraude transportarentur; quod reliquum erat insulæ, cum Catifa oppido, in potestatem Regis Lusitaniæ tradidit. Mercenarij cum fide transmissi. & proposita venia, in suas domos incolæ reuocati: iuriq; inter eos dicundo præpositus notæ probitatis senex, nomine Bucatus, natione Arabs; quæ res ad pacandos gentis animos haud mediocriter valuit: siquidem Persas præfectos, populi Arabes ægerime patiuntur. Insula dein à Lusitanis Regi Armuziæ restituta; & ab ipso mox Rege tradita est Bardadino cuidam, Xarafi propinquo; cum eo, vt serafinum quadragena millia quotannis tributi nomine penderet. At Correa, insigni parta victoria, & compositis ad Baharenum rebus, Armuziam reuertit. Aduenienti, vt æquum erat, magni cum à Toro, & omnibus ordinibus; tum à Sequeria Prætore habiti honores. Inde Rhotericus Botus, cum Antonio Abulæo scriba, & Lusitanis præterea septem, Baharenum petere, & ibi Emmanuelis negotia procurare iussi. Et Sequeria, cum Torum externo malo ac metu leuasset; intestinis præterea suorum fraudibus eripere aggressus est; quod certis auctoribus iam ante audisset, regia vectigalia & rationes, à ministris & Quæstoribus interuerti. Ergo, præter Mahometana mancipia, Lusitanos quoque iudices, & scripturæ magistros, magno Arabum dolore, in portu constituit. dein, confirmato Regis animo, & arcis præsidio inspecto, classem ab Armuzia soluit. ac Dium recta petenti, Beranus cum tristi occurrit nuntio; Rhotericum Fernandum à Mamudio ritum rediisse: & Sacam, haud dubie patris imperio, infida cum Lusitanis amicitia tandem abrupta, magno lemborum ac biremium numero in suas naues fecisse impetum: circumuento & oppresso pæne sibi vix ad fugam exitum patuisse; bellum atrox ab Iazio alijsq; piratis instare. Hisce rebus cognitis Prætor; amissis nuper bene gerendæ rei occasionibus nequicquam ingemuit, suam ipsius leuitatem accusans, quod omnibus rebus ad dimicandum instructus, semel ab imparato Iazio blandimentis infringi, rursus mercatorum consilijs auferri se passus fuisset. Cum simul ira pudorq; verarent animum; in præsentia ab Dio tentando copijs adeo im-

R

minutis



## *Historiarum Indicarum*

minutis abstinuit: ultra Diu est locus millia passuum circiter quinque & viginti, sat capaci portu, & ad mercaturam exercendam idoneo: Madrasabam appellant. ibi Sequeria, Diensibus inuitis repente castellum excitare decreuerat. Sed Iazius, de nuper captis Lusitanis cognito mature consilio, eam ipsam regionem firmis praesidijs occuparat. Igitur, ea quoque spe deiectus Praetor, Ciaulum inde se contulit; & ab Nizamaluco tyranno potestatem petijt arcis ibidem exstruendae. In societate cum Lusitanis dudum erat Nizamalucus, ut supra docuimus. ac tum forte aduersus Idalcanem gerens bellum, equis praecipue militaribus indigebat, quos neque India fert, & ab Armuzia capta venales ad vnum Goanum emporium Albuquerqueij decreto deuehebantur. Quocirca Nizamalucus, de potestate arcis aedificandae a Praetore appellatus, ea in primis lege annuit; ut trecentos quotannis equos e Perside, vel Arabia, Ciaulum importari liceret; atque ut ab institoribus, quantum in Goano portu, quadragenos in capita pardaos (nummus aureus est, denarium circiter octo aestimatione) Lusitani procurtaores exigent. Conscriptis conditionibus, expositi a Sequeria in terram fabri: atque ad ipsas fluminis fauces dimenso aedificio, confestim opus fieri ceptum. Ea re vulgata, Iazij quidam praefectus ab Dio celeriter quinquaginta biremes ad opus impediendum adduxit. cum ea classe ab Lusitanis vario euentu certatum. ac nihilominus interea dies noctesque continuato labore, ad iustam altitudinem, muri & propugnacula excreuerant. Ad ea diruenda, pellendosque Lusitanos, cum longe maiore apparatu opus esset, Mahometana classis in periculosa statione multis acceptis incommodis, tandem irritato conatu discessit. Et Sequeria ad custodiam loci praesidio terra marique relicto, Cocinum reuectus, Eduardo Menseffio successori prouinciam tradidit: vna re maxime memorandus. quod ab insita pietate primus in vrbe Goa Diuo Francisco templum; & coniunctas templo edes coenobiumve, sodalibus Franciscanis exstruxit. At Eduardus inito magistratu, quod contra piraticas classes leuioribus nauigijs opus esse intelligeret; biremes duodecim aedificari iubet. cum ijs ad oram arceuique Ciaulanam Simon Andradius obtinen tam profectus, in itinere audit, duas Turcarum triremes ab Dio Dabulum delatas



tas (Mahometanum id emporium est dextra Ciaulum à Goa petentibus) intra eius portus fauces metu nostrarum nauium delitescere. haudquaquam negligenda res visa. Consectim ad vim ac pugnam paratus, Dabulum accessit. oppidanisq; primo tergiuersantibus, dein terrore commotis, non modo triremem extorsit vtrâque; sed annum insuper vectigal imposuit. iisdem fere diebus, graues & periculosi ad Armuziam motus fuere, initio à scribis & Quæstoribus orto; qui Lusitanos custodes ac præfides ad scripturam appositos, intar mortis ducebant. Xarafus eo tempore plurimum Armuziæ poterat. Hoc maxime patrono ac fautore, Mahometani qua veris qua falsis criminibus Torum in Lusitanos accendere; superbum & immodicum peregrinæ gentis, & cuncta paulatim in se trahentis, imperium conqueri; furto surreptos ingenuos ingenuasq; , & per vim ad Christiana sacra compulsos; & super omnia, destinatos ab Toro legatos ad Emmanuelem, fraude Præfecti retentos, indignari. Hæc, & alia id genus identidem deplorando, Regem ingenio mobili adolescentem, ac libertatis audum, adduxere tandem, vt acerbissimæ seruitutis iugum excuteret & regnum Armuzianum in pristinam dignitatem omni ratione vindicare decerneret. Iam tum in exitu erat autumnus anni seculi huiusce vigesimi primi; & commodum Sequeria Prætor omnem fere classem ab Armuzia abduxerat, Emmanuele Sosa cum paucis admodum nauibus ad oram tutandam relicto. Ergo, secretis inter se colloquijs habitis Persæ, ficto primum rumore disseminant, Arabicam oram, quæ ditionis Armuzianæ sit, à Balochijs prædonibus è Perside maritima deuastari. hoc mendacio consequuti quod vel in primis optabant, vt Sosa, ad eos piratas fugandos, ab vrbe discederet; certam & inter se, & cum cæteris oppidorum magistratibus noctem occulte condicunt, qua ad Lusitanos vbique delendos vno temporis momento confurgant. Vbi ea nox aduenit, regiæ classi præpositus, quem Xebandaram vocant, cum terradis octo, duas in portu reliquas Lusitanorum naues, triremem ac dromonem agmine silenti circumuenit. ac trireme quidem à custodibus pene vacua extemplo potitur: & flammæ illico tabulatis, arida palmarum fronde conspersis, iniicit; qui tamen ignis, paulo post ab latitante puero extinctus est. dromonem vero, quod



## *Historiarum Indicarum*

Iusto nautarum numero tenebatur, ne aggredi quidem est ausus. Ceterum, ut ex triremi splendor emicuit (id conuenerat signum) confestim è turribus, dein ex omni vrbs parte, cum ingenti æris crepitu, cuiusmodi Saturnalibus à plebe cieri solet, ad arma, necemq; Lusitanorum conclamari ceptum. multi ex ijs, ad maiorem laxitatem edium, & liberiores negotiandi facultatem, extra muros arcis, domicilia comparauerant. ergo, in semisopitos, vndique impetus ab hoste factus, quibusdam etiam circumdati ignes: & simul exitus itinerum stationibus occupati. exinde cum clamor, & discursus, & nocturna trepidatio, nec audire, nec providere quicquam sinerent; Lusitani partim intra domos oppressi, partim cursu protinus arcem petentes, aut flammis hausti, aut insidijs armatorum excepti sunt. nonnullæ tamen familiæ conglobatæ, cum per media tela ferro sibi viam fecissent; intra arcis portas cum tristis nuntio penetrarunt. Pari audacia eodemq; tempore, ne mutui subsidij vlla esset facultas, ad Curiatum, Soarem, Baharennum, quotquot agebant Lusitani, vel trucidati, vel in vincla coniecti. vnus etiam fuit memorabilis exitus, Rhoterici Boti: varijs quippe tormentis discruciat, ut ab auita religione deficeret; constanti ad extremum vsque spiritum animo, Christum vnum Deum Dominumq; contestans, gloriosi martyrij palmam adeptus est. Desiderati in eo tumultu, præter seruos ferbasq;, Lusitani centum & viginti; numerus in tanta præsidij tenuitate non modicus: & apothecæ omnes ac diuerforia momento direpta. Hisce noctu ferme patratis, ut primum illuxit, emissi raptim ex arce qui residuos è cæde conquirerent; nauesq; frustra tentatas, intra ictum teli reducerent: simul etiam, oneraria Lusitana, cum iam esset in cursu referta caricis, peropportune retenta; & onera in cibum, & solutis de industria compagibus, asseres trabesq; in munimenta suffecit. aliquot etiam hostilibus nauigijs in ipso portu ignes iniecti. hæc omnia ingenti cum ardore, nec sine sanguine multo peracta: & prius quam arx ab hoste cingeretur, Ioannes Meria dromonem expedire, & Goam petere iussus ad opem à nouo Prætoris implorandam. At Sosa, per Mascati Præfectum (qui vnus Tori mandata aspernatus, in fide manserat) de hostium fraude certior factus, ad Armuziam extemplo iter intendit.

Verum



Verum ab eius cursu fœda tempestate diuulsus Tristanus Vassæus Vega prior ad urbem decurrit, ac noctu per medias hostium stationes, deceptis ipsa audacia classiarijs, cum quempiam è suorum numero putarent esse; felici conatu ad arcem ipsam applicuit. Solennia Dei natalitia tum forte agebantur: & sacrificio nocturno dabant operam Lusitani, eo attentiore obsecratione, quo vehementius erant de communi salute solliciti. itaque inter ipsas preces Tristanus Vega repente superueniens, cunctos ingenti spe lætitiaq; perfudit, quod vel ex eo miraculo, sua vota salutemq; Deo cordi esse haud dubie cernerent. Sosæ dein exspectatione suspensis, & è specula identidem, vt fit, omnes circa regiones oculorum acie collustrantibus, tertio die, qui Diuo Ioanni Apostolo est sacer; duas procul ab arce leucas, anchoris in salo iactis apparuit. Rostratam onerariam ex ijs quos galeones vocant, & vnam dumtaxat biremem ducebat, easq; propugnatoribus valde infrequentes; compluribus, coniuratorum scelere, ad Calaiatum nuper amissis. cæterum aquæ, cuius maxime inopia laborabatur, & varij commeatus, petitam è proximo vim attulerat. Eius rei non ignarus Vega, suadere Præfecto arcis Garziæ Cotinio institit vehementer, vt Sosæ, priusquam opprimeretur, opem ex arce sine mora submitteret. Reserat periculi plena in tam exiguo bellatorum numero, & Armuzianis in proxima statione ad omnes eiusmodi casus intentis. Attamen, id sibi periculum, is ipse qui suaferat Vega magno animo depoposcit: neque fortius obtulit, quam præstitit operam. Spectato milite crebrisq; tormentis in paronem impositis egregie velocem; præter hostium & Regis ipsius ora oculosq; incitato remigio ad Sosam tetendit. interea, qui remanserant, supplices ad cælum manus pro felici euentu cum precibus tollere. hostes audaciæ magnitudine attoniti, propemodum hæere. Regis dein imperio, terradis octoginta raptim insequuti, cum aliquandiu ab tergo allatrascent; duce & triginta viris amissis, & saucijs alijs, male mulctati rediere. Vega, è summo discrimine elapsus, ingenti suorum gaudio se ad Sosam adiunxit. Ad id spectaculum percitus ira & furore Torus, domo se proripit; pauoremq; & mollitiem territis ac mœrentibus exprobrans, reuerti cunctos in prælium iubet. atque vt pro meritis quisque sibi aut



## *Historiarum Indicarum*

præmium, aut ignominiam paratam esse non dubitarent; mentas in littore collocat duas: quarum in altera fulgentes conspiciebantur aurei nummi; in altera muliebres mitellæ, ac delicata velamina, quo notæ genere apud eas gentes acerbius nullum esse consuevit. Equum dein conscendit propere, fusteque arrepto, promiscuam insuper multitudinem cogit in naues: postremo cum stipatoribus in editum subit collem, unde, singulorum virtutis aut ignaviæ testis, cōspicere simul & conspici posset. Ac Lusitani pariter custodes, è pinnis fenestrisque prospectant. commilitonum vicem anxij, quippe quorum in virtute dextrisque, non modo imperium, sed vita omnium verteretur. Aucta classe novis copiis, terrarum omnino centum & triginta infestis in Sotam rostris citato cursu feruntur. Sotæ, in summa rerum iniquitate, illud etiam accedebat incommodi: quod omnis tum forte ceciderat ventus: vnicum onerariis nauibus, quæque velis dumtaxat aguntur, aduersum frequentes aduarias agilesque, remedium. Deprehensus, cum nulla nisi in cælesti auxilio, & vltimæ necessitate esset spes; Deum enixe precatus, vti extremis in rebus, quemadmodum antea sæpe, sui numinis præsentiam ostenderet; sociosque ad honestum & Christianis dignum exitum paucis adhortatus; exiguas copias magno animo ad pugnam instruxit. Ac primum, ne impune circumiri ab hostium multitudine posset; ne quis casus, inter pugnandum, suos ab se diuelleret; paronem ac biremem, epibatis ac libratoribus ad idonea loca dispositis, demissisque armamentis, ad onerariam ita reuinxit; vt cum ad opem, vbi res postularet, ferendam, facilis ex alia in aliam nauim transitus daretur; tum, ad arcendos vndique hostes, libera in omnem partem esset eiaculatio. dein ad auram, si quid afflaret, excipiendam, antennas tantum onerariæ sustulit; quod eæ, propter celsitudinem, nihil ad expeditum certamen obessent. Vbi propius ventum est; missilium nubes atro mista fumo tantam caliginem exciuit; vti mutuum hostibus conspectum prorsus adimeret. Certius tamen Lusitani è superiore loco figebant, cum in adeo densa nauigia vanum prope nullum incideret telum. Ausi dein Mahometani aliquot, ostentandæ fortitudinis, & Regis demerendi gratia, è propinquo certare; adhortati inter se, magno impetu in Lusitanam



fitanam biremem è terrada transiliunt. Eo successu elati, cum onerariam porro scandere niterentur, concursu ad periculum facto, partim contis ac ferro detrusi; partim etiam abscisis brachijs interempti: quæ res cæteros ab eiusmodi temeritate deterruit. Inter hæc, tum ipse maris æstus accedens, tum etiam lenis ex alto flatus vela vtcunque percutiens, onerariam per medios Armuzianorum ordines paulatim ad arcem admo- uerat. inde maioribus tormentis ex destinato summoti ho- stes: ac demum octoginta desideratis, vulneratis plurimis, cum ingenti luctu ac dedecore se in portum, vnde prodierant; recepere. è Lusitanis, triginta faucij, occisus puer vnus dunta- xat è nauali turba: spiculorum vero tanta vis intra onerariam & acturias alligatas apparuit; nauiumq; fragmenta collecta ita multa; vt complures dies materiam igni præbuerint. Sofa & Vega, cæteri; victores, insigni parta gloria, gratulantibus ouantibusq; cum effusa lætitia focijs, in arcem accepti. Ea re maiorem in modum exterritus Torus, concesso Lusitanis ma- ri, arcem à terra oppugnare constituit. Tormentis librandis, regia & valetudinariæ Lusitanorum ædes electæ. inde conti- nuis aliquot diebus arcis mœnia quatiebantur. inclusi, nouas ita pro dirutis obijciebant moles; vt spei multo plus in virtu- te, quàm in muro fossisve reponerent. Ergo, post editam lo- cis aliquot stragem ausos ad mœnia succedere Mahometanos, & scalis appositis in summum eniti; cum alio armorum gene- re, tum superne vibratis ponderibus ac trabibus vndique deie- cere. Multi in eo congressu, & fortissimus quisque, exanima- ti. Neque ad iterandam vltra oppugnationem Toro affuit ani- mus. Et, circumagente se hyeme, ictus conscientia admissi facinoris, & Lusitanæ classis aduentum extimescens; cōsiliū formidine ac desperatione plenissimum cepit. Queixome in- sula distat leucas tres ab Armuzia. eò, cum vniuersa ciuitate, congestis raptim iu terradas ijs quæ tolli poterant, ingenti po- pularium dolore migrans: tectis vrbs, quorum erant complu- ra egregio opere & picturis ornata, vltro subdidit faces: hinc, toto quadriduo peruagatum incendium, cuncta propemodum hausit. Lusitani, reinouitate defixi, primo ignium contagia, dein hostium insidias timuere. postremo, vt flammæ quicue- rant; satis comperta vrbs solitudine, ad reliquias fumantis



## *Historiarum Indicarum*

Armuziæ diripiendas egressi, paucis tantum exceptis commeatibus, omnia ferme in cineres & favillam redacta comperiunt. Inter hæc, Eduardus Prætor, de suorum cæde, & arcis periculo certior factus; Ludovicum fratrem cum navibus decem & firmo præsidio, Armuziam proficisci iusserat. Eius rei timore perterritus Xarafus, ne vulgata postmodum consilia rebellionis in suum reciderent caput; incautum & obnoxium sibi Regem, opibus ipse & auctoritate præpollens, per satellites ad scelus omne paratos, è medio sustulit; eiusq; loco substituit è Zeisadini liberis Mamudium, tredecim circiter annos natum. Ludovicus, tetro spectaculo Armuziæ incensæ commotus; & cognitis ijs, quæ nouo Xarafi scelere ad Queixomen accidissent; fluctuavit animo, vtrum commeatibus interceptis (quod erat perfacile) deprehensos intra desertam insulam hostes, omnium rerum inopia & fame subigeret. dein, ex ijs quæ ab exploratoribus deferebantur, non sine causa veritus, ne si afflictos urgere acrius institisset; malis coactus Xarafus cum regia gaza, Regeq; ipso secederet in Persidis interiora; leniter agere, & ostentanda veniæ spe, rebelles ad pacem & concordiam allicere statuit. Neque difficilem habuit exitum res. quippe, Lusitanis, emporij quæstuosi; Armuzianis, patrij soli desiderio laborantibus. Pax ergo in has ferme convenit leges: uti Mamudius cum suis Armuziam inhabitandi causa rediret. debita ad eam diem stipendia; & ex ea die in singulos annos vicena serafinum millia Emmanueli persolveret. Ciues, ablatas inter tumultum Lusitano res, captivosq; omnes cum fide redderent. Lusitani autem, neque iuri inter oppidanos dicundo, neque administrandis vectigalibus, exigendisve portorij, vlla ex parte se se immiscerent. vtrique amicitiam & societatem recte & ex animo colerent. Per hunc modum compositis rebus, læti Armuziani in patriam rediere; instauratisq; ædificijs, & restituto commercio, propter eximiam loci opportunitatem Armuzia breui in veterem celebritatem est restituta. Dum hæc ad Persicum geruntur finem, in Africo item Oceano rei & existimationi Lusitanæ præclare consultum est. Reguli duo, Zenzibaris, & Plembæ, aliarumq; circa insularum, vectigal annuum pacti, se se in Emmanuelis amicitiam fidemq; iam ante contulerant. Id ægre passus Mombazæ tyrannus; magnum



gnum earum insularum numerum, & in ijs prænobilem vnā,  
Querimbam nomine, ab regulorum imperio varijs artibus ac  
promissis auertit. reguli, cum à tot simul populis destituti, ve-  
tigali soluendo non essent; à Lusitanis ducibus, qui ad Mo-  
sambicum aduersa tempestate hyemem exigere coacti erant;  
per nuntios opem rebus afflictis implorant. Digna Lusitanis  
institutis & consuetudine visa res est. Et Petrus Castrius, ne  
otiosa hyberna traduceret, paucis nauibus ad Querimbam ap-  
pulsis; bellatores non amplius centum in terram exposuit. op-  
pidum erat littore peramano; & cum diuitijs celebre, tum  
etiam incolis, & inuecto nuper à Mombaza præsidio frequens.  
Castrius multitudine haudquaquam exterritus, bifariam suos  
diuisit. Cum vna parte Christophorum Sosam occulte cir-  
cumire; seq; ab tergo ostendere iubet: ac simul ipse cum cæte-  
ra manu à fronte hostem aggreditur. Certaminis aliquantum  
ac periculi fuit; dum eminus barbari iaculis de more pugnant.  
vbi cominus geri capta res est; micantes Lusitanorum gladios,  
& præpilata hastilia non tulere. Ac paucis nequicquam resi-  
stentibus, cum proximum quemque hostis caderet; omnes,  
qua pavor tulit, per stragem corporum in agros effusi. Lusita-  
nus, haud contemnendis egestis opibus, oppido flammam iniecit.  
Eius rei fama rebellium fregit animos. & confestim lega-  
ti dudentium insulas, & in regulorum ditionem redeuntium,  
affuere. Castrius, minime vulgari (si paucitatem militum spe-  
ctes) relata victoria; & regulis nouo beneficio obstrictis; ineun-  
te iam æstate Indiam petere intendit. Interea Antonius Brit-  
tus, uti narrare institueram, ab Georgio Albuquerque digressus;  
ad Molucas longa ac difficili nauigatione peruenerat. Baciañ  
inter cæteras illius regionis insulas est. ea tum Laudino dyna-  
stæ parebat. Ibi, quod è Simonis Corree iunco, Lusitani aliquot  
paulo ante per occasionem interempti fuissent; eam fraudē ne-  
cemq; protinus vlisci placuit: & exposito milite Brittus, insule  
agros ferro igniq; vastauit; abegit prædas; ac documento non  
leui sanxit, ne quis Lusitanos homines, vel tēpestare, vel quouis  
alio casu in ea loca delatos, quamuis paucos & inermes; oppor-  
tunos ad cædem & iniuriam duceret. Inde Tidorem progressus;  
ab incolis comperit, Boleifem Ternatis Regē, Almanforis filia  
in matrimonium ducta, ac deinde Franciscum Serranum, è vi-  
ta



## *Historiarum Indicarum*

ta migrasse. Boleifis maxime accitu Brittus ab Cocino fabros & ædificandi instrumentum aduexerat; cum vltro non Boleifis modo, sed Almanfor etiam, in sua vterque ditione, Lusitanis, quo potissimum vellent loco, arcis exstruendæ optionem deferret: & avaritia cæci ambo, dum peregrina commercia, & noua lucra sectantur; certatim in multas indignitates, & in ipsum pæne seruitium ruerent. Veruntamen in Boleife præcipua quædam nominis Lusitani caritas eminebat. Is, vti supra docuimus, & Lusitanis, cum primum in eas regiones delati sunt, hospitio inuitandis, Almanforem præuerterat: & Franciscum dein Serranum, aliosq; diu apud se detentos, mira commitate officioq; tractarat: & cum se suaq; omnia Emmanueli per litteras amicissime detulisset: tum etiam nuper ab Indiæ Prætoris classem & structores castello apud se Lusitanis ædificando per legatos admodum enixe petierat. Denique, morbo confectus, cum heredem regni tenera etiamnum ætate relinqueret filium, nomine Boahatem; vxori, tutoribusq;, & cognatis præcepit moriens, vt Lusitanam societatem summo studio retinerent; neque alias quærerent amicitias sed in vnus Emmanuelis fide opibusq; sat firmum sibi fortunisq; suis præsidium constitutum arbitrarentur. Hæc præcepta, defuncto iam Rege, infixæ in reginæ & propinquorum animis, ad continendam aliquot annos in fide gentem, haud mediocriter valere. Ac proinde vbi nouam diuq; exspectatam ex India classem, Britto duce, Tidorem aduenisse cognitum est; Aroezius illico, Regis tutor, cum nauibus festoq; apparatu, ad eum sociosq; in hospitium deducendos accurrit. Nec leuem interea voluntatem Almanfor detinendi apud se Lusitani, & renouandæ societatis ostendit. Verum Brittus insulam vtramque per otium contemplatus; Ternatem Tidori ad ædificationem & domicilium antetulit; non modo loci natura adductus; quod aliquanto commodiorem Ternates habeat portum; sed etiam haud obscure insensus Almanfori; quod post iunctas cum Serrano dextras; nouis Baticorum se se foederibus illigasset. Ergo Ternatem ab Aroezio perductus in hospitium Brittus, ingenti reginæ, reguliq;, & oppidanorum gaudio excipitur. dein locus ad ædificium, contiguus vrbi delectus; materiaq; & cæmentis eo conuectis; Brittus, latitiæ causa, caput perinde



ac cæteri, fertis ac floribus redimitus, primus omnium & rastello fodit humum, & lapidem in fundamenta coniecit viij. Kal. Quintileis, anno seculi huius altero & vicesimo: qui dies eò etiam maiore cum iucunditate transactus est, quod in eum ipsum diem Diui Ioannis Baptistæ solennia inciderent: cuius felicem lætunq; humano generi exortum, è cælestis oraculi promisso, totus pæne orbis terrarum exquisitis ludis, & anniuersaria gratulatione concelebrat. In hunc fere modum, perpetua (vti rebantur) ac propria Lusitano cum ijs gentibus commercia constituta. Eadem tempestate funestus in Indiam nuntius allatus de Emmanuelis Regis obitu. Circa finem prioris anni decesserat, duos & quinquaginta natus annos; cum sex & viginti regnasset. Huic, vt maiestas ipsius ac merita postulabant, plurimis Europæ, Africaq; , atque Asiæ locis cum sumptuoso apparatu iusta funebria perfoluta. Neque Christiani modo Reges luxere defunctum, verum etiam ethnici, Cocinensis, Cananorius, Armuzianus; iidemq; , posito luctu, postmodum Ioanni successor per nuntios, litterasq; , obsequium & operam officij causa detulere. Ioannes, anno ætatis vigesimo acceptis regni gubernaculis; ad propitiandum cæleste numen, ac populos in officio continendos, illud curabat in primis, vti studium Christianæ religionis antiquissimum sibi esse cuncti perspicerent. Idcirco, & in Lusitania salutariter in eo genere multa decreuit; & per litteras Eduardo Indiæ Prætori mandauit; cultui diuino, & sacerdotum commodis enixe prospiceret; ac nominatim, diuini Apostoli Thomæ sepulcrum in Coromandelio littore, peruestigandum curaret: daretq; operam, vti sacrosancta illæ reliquiæ (quamquam easdem, vt supra dictum est, vel earum certe partem Mesopotamia sibi vindicat) cum dignitate custodirentur. Eduardus, Emmanueli Friæ, præposito Coromandelicæ oræ, cum sacerdotibus aliquot, & architecto id negotium dat. Profecti Meliaporem (nam ibi situm Apostoli corpus audierant) æquatam solo ingentis amplitudinis urbem offendunt. Pauca tantum pyramides, turresq; , & columnæ, miserabili è strage supererant. nec non varij coloris lapides, ac veluti porphyretica peregre sculpta fragmenta, quæ antiquum vrbs ornatum & elegantiam satis arguerent. In ijs viscebantur operosa magnifici cuiusdam templi



## *Historiarum Indicarum*

templi vestigia, vno tantum superstitute ad orientalem plagam sacello, crebris intus forisq; lapideis Crucibus è vetere disciplina conserpo. Sub eo tecto latere Apostoli ossa cum accollæ pro certo affirmarent; primum omnium sarcire ipsum ædificium placuit; quòd testudinis pondere pressi parietes, aliquot locis vitium fecissent. Ad eos ergo fulciendos, ac renouanda fundamenta, conductis è vicino operis, dum effoditur humus; ad quintum ferme dodrantem apparuit locus lapidea tabula tectus: in quam ab interiore parte incisæ prisca gentis lingua (vti à peritis cognitum est) litteræ testabantur; templum id ab Sancto Dei Apostolo Thoma quondam exstructum: ei templo tuendo colendoq; , mercium quæ in urbem importarentur, decimam ab Sagamo Rege attributam. accesserat obtestatio ad posteros, ne quid ex eo vestigali ac donatione imminutum vellent. paulo infra eam tabulam, ipsius Regis (vti ex priscorum traditione Indi asseuerabant) cadauer inuentum. Altius dein molientibus terram, quadratum, primo lateritiæ, postremo lapideæ structuræ septum apparuit, multiplici operimento, pedum circiter nouem altitudine. ibi quòd sepultum haud dubie corpus Apostoli dicebatur esse; adhibiti ad amouendum operculum Lusitani duo (nam Indis rem eiusmodi committere non est visum) non nisi noxis per sacram confessionem expiatis, & reconciliato per Eucharistiam Deo, aggredi rem ausi, locum aperiunt. Immista calci & arenæ, candidissima specie ossa, & apposita lanceæ cuspis, & viatorij baculi frustum, itemq; vas fictile, fidem inuenti demum sacri thesauri Lusitanis fecere. Sub hæc repertum aliud cuiusdam è Thomæ discipulis cadauer; cæterum tetra ac terreo aspectu, quemadmodum & Sagami Regis. vt, si alia argumenta defuissent; ex ipso propemodum colore dignosci Apostoli ossa potuerint. Eo maior gratulatio fuit Christianorum: & affabrefactas, arte Sinarum, arculas duas, è proximo emporio Paleacate confestim afferri placuit: quarum in altera eximij operis argento cælata, ipsius Apostoli; in altera, discipulorum eius reliquiæ inclusæ: & commune gaudium solenni supplicatione pompaq; , & priuatis omnium qui aderant studijs celebratum est. Propositis deinde in ipso altari arculis, adhibitoq; custode; clauis vtriusque Emmanuel Erias Cócinum Prætori Menesio detulit. Hoc maxime modo,  
per



per eos dies, & sacello, & religioni consultum. Biennio dein-  
de post, eadem ossa intra ipsam aram occulto loco, duobus  
tantum consciiis Lusitanis, abdita; ac postremo Goam, Con-  
stantino Brigantio Prorege (qui Diui Thomæ templum in ea  
vrbe exstruebat) à fratre quodam Franciscano translata fuisse  
comperio. Circa idem tempus, quo nuntij de Emmanuelis  
Regis obitu in Indiam allati sunt; Idalcan otium à Narfinga-  
no bello nactus; recuperando Concano littori animum adie-  
cit: quod ei Rhotericus Mellus, per occasionem, paucis ante  
annis ademerat. Exiguus admodum copiis ea loca tum Lusi-  
tani tenebant, cæteris vel ad Persicum & Arabicum sinum; vel  
ad Molucas obtinendas paulo ante profectis. Eius rei non  
ignarus Idalcan, misso præfecto cum quadringentis equiti-  
bus, & quinque millibus peditum; Lusitanos custodes, haud  
tamen sine cruore ac certamine, pepulit: portusq; & agros  
opimæ fertilitatis recepit. Et in Somatra insula, tyrannus  
Acenorum Abrahamus, ab cæde Georgij Britti & comitum  
ferocior factus, oræ totius maritimæ iam haud dubie affecta-  
bat imperium: nec ferro solum, sed etiam (quo nullum acrius  
telum est) auro muneribusq; pugnabat. Ad hæc, miste blan-  
ditijs accedebant minæ, &, vbi commodum esset, fraudes ac  
doli. Nullus amicitix foederumve respectus: nulla affinium  
caritas: nulla fidei vel iurisiurandi religio. Exacta iam ætate  
patrem, à nefariis moribus & consiliis abhorrentem, onera-  
tum catenis in caueam incluserat: ibidemq;, veluti nouum &  
inusitatum animal, illuie & squalore confecerat. Pediren-  
sem Regem, opibus & auctoritate præcellentem, cui & co-  
gnationis vinculo, & iure beneficiario erat obstrictus, pelle-  
ctis ad se popularibus, exegerat regno. Simili scelere Daia-  
num dynastam, cuius sororem habebat in matrimonio, per  
summum scelus, omnibus fortunis euerterat. Inde magna  
eius oræ parte in potestatem redacta, infestis signis ad Pace-  
num vrbem, quò pulsi confugerant Reges, pergat ducere. Pe-  
ditum millia quindecim habebat in armis, & complures ele-  
phantos. ij pro equestribus copiis genti sunt: nam equos non  
alit insula. Cum hoc exercitu castris duo millia passuum ab  
vrbe positis, primum omnium, ad tentandos oppidanorum  
animos, per præconem edixit: qui ciuis Pacenus intra sex-  
tum



## *Historiarum Indicarum*

tum diem ad se transisset; huic nihil, ipsi, familiæq; & bonis ipsius damni illatum iri: cæteris non eandem veniam & clementiam fore victis, quæ ante dimicationem pateret. Hoc edito vulgato, magna pars ciuium transiit. alij clā elapsi, in saltus auios refugere. ita, infrequentem defensoribus urbem tertio adortus Abrahamus expugnat. Restabat arx, in quam Pæce-nus regulus, & exsules duo. Pedirensis, Daianusq; confugerant: lignea quidem illa, & multis iam locis præ nimio Solis ardore fatiscens: veruntamen haud leui præsidio Lusitanorum ferme trecentorum & quinquaginta, & maioribus minoribusq; tormentis instructa. Abrahamo nullæ dum eius generis machine suppetebant. tantum ingentem vim sagittarum, quas letali inficiunt succo, & sarmentorum faces, oblitos naphtha, ad excitandum, ubi res ferret, incendium, scilasq; plurimas ex arundine crassiore, leues gestatu, ascensu stabiles; necnon ferramenta operibus faciendis aduexerat. Ergo, ut sine certamine, si fieri posset, rem conficeret; Lusitanis per interpretem iusserat nuntiari: arcem eam ad suum imperium pertinere: proinde cum bona pace abirent; secumque suas res, dum liceret, auferrent. Ad ea cum ferocius responsum inclusi dedissent; appareretq; armis rem gerendam; summa vi, priusquam auxilium iis alicunde ferretur (mare autem liberum, vicinamq; Malacam, & amicos Reges nonnullos habebant) arcem aggredi statuit. Atque ad vitanda hostium iacula, qua maxime virium parte erat inferior; cuniculos agere ad arcem cepit. nocturnum præterea tempus ac pluuium, ad oppugnationes captabat; ut neque per tenebras nostri collineare possent; & madefactus imbre sulphureus pulvis plane inutilis fieret. ad hæc, arietis loco elephantos ipsos ad arcem admouebat: qui, rectorum instinctu valida impressione facta, munitiones euerterent; sublatoq; interdum ingenti clamore, interdum summo silentio arcem corona circundabat: scalisq; erectis, ex omni parte simul transcendere nitebatur. & obsessi quidem, hostium opera nequaquam extimescebant. excepti obstructiq; ex aduerso cuniculi; nonnunquam etiam felici eruptione certatum est. Sed crebras ac repentinas oppugnationes diutius ferre vix poterant: cum Abrahamus, in magna copia militum, identidem alios aliosq; summitteret; ipsi, propter paucitatem



paucitatem, assiduis p[er]ne stationibus circa munimenta d[is]po-  
siti, dies noctesq[ue] in armis traducere cogere[n]tur. Accedebat  
vulgata graui c[ae]lo vis morbi, & extrem[um] inopi[ae] metus; quod  
per intestina de more dissidia, dum su[ae] quisq[ue] intentus rei,  
publicam negligit; ad tolerandam obsidionem cibaria segni-  
ter ac maligne conuexerant. Praesidio praerat Henricius qui-  
dam. Hoc demum, auctore, quod relatas nuper e[st] captiua na-  
ui pretiosas merces, in Indiam venum asportare gestiret; non  
expectato subsidio, sedum consilium ineunt arcis deferend[um].  
cuius flagitij, post patefactam armis Indiam, Lusitani ad eam  
diem nihil simile admiserant. Id vt quam occultissime fieret,  
minora primum tormenta inuolucris obtecta, ne ab hoste di-  
gnoscerentur, in naues imponunt. maiora, quod amoliendi  
in tanta hostium propinquitate non erat spes, ita ad plenum  
inferciunt, vt, si flammam conciperent, ipsa (vt fit) boli ma-  
gnitudine rumperentur. Sulphurei dein pulueris exiles humi-  
t[er]nias quoquouersum, ac praesertim ad ipsius pulueris cellam,  
atque ad muralia tormenta perducunt: iussis agmen claudere  
magistris; & cum iam omnes extra arcem essent, ignes inijce-  
re. Vix dum euaserant, sarcinis quisque suis dissimulanter  
elatis; cum, exorta repente flamma cum ingenti fragore fu-  
gam hostibus prodidit. Pars ad incendium extinguendum  
audacter accurrunt (& incertum qua de causa, nondum ad  
sulphureos cados, ac muralia tormenta peruaserat) pars ad  
littus effusi, turbatos auersosq[ue] Lusitanos cum caede insequun-  
tur: ac denique appulsae ad terram naues, percussis ac trepi-  
dantibus, magna parte impedimentorum amissa, vix atque  
aegre effugium praebuere; dum in magno tumultu, ne simul  
hostis irrumpat, alij confestim anchoras orasq[ue] praecidunt;  
alij ad naues adipiscendas, collo tenus sese in aquas immittunt.  
Abeuntibus cum oneraria vna, nauigiis tribus, per ludibrium  
barbari tum inter fugam ereptas, tum superstites ex incendio  
res, machinasq[ue] praesertim ostentant: plenumq[ue] cladis & igno-  
miniae agmen cum probris & cachinnis exhibitant. Auxit pu-  
dorem, in ipso p[er]ne portus exitu soci[ae] classis occursum. na-  
ues triginta cum omni copia rerum ab Aruano Rege aderant;  
ipsumq[ue] Regem terrestri itinere cum quattuor millibus pe-  
ditum auxilio venire nuntiabant. E[ss]e naues, cognita praepro-  
pera desperatione abeuntium, retro, vnde venerant, in pa-  
triam



## *Historiarum Indicarum*

triam reuertere . & Lusitani Malacam delati , Antonium insuper Mirandam , & Lupum Azeuedium ; cum recenti milite , & bellico instrumento iam in cursu ad opem ferendam paratos inueniunt . Eo magis & suum factum ipsi damnarunt , & omnium conuitijs & maledictis excepti sunt . E regulis tribus , qui comites fuerant fugæ , Pacenus cum rectore matreque Malacæ remansit ; reliqui duo se se institorum nauibus ad Aruanum Regem supplices contulere . Lusitani è Somatra insula in perpetuum exacti . Et Abrahamus , pulso mox etiam Aruano , regnis quatuor auctus , æneisque tormentis ( qui vel maxime terror gentem premebat ) omnibus circa nationibus , atque ipsis adeo Lusitanis formidandus euasit . Alodinus item , elatus nouo successu rerum , & à Bintano reiectis Georgij Albuquerque copijs ; classes denuo ad vexandam Malacensem oram institit mittere ; & cum Lusitanis obuiam ex vrbe progressis , aliquot secunda prælia fecit . Iam apud Sinas , in Lusitanum S nomen acerbioris etiam odio & immanitate sæuitum est . Martinus Alphonsus Mellus cum sex nauibus eo contenderat , confirmandæ amicitiae , & statuendi commercij causa , nondum probe gnarus , quid Thomæ Petreio legato , de quo supra diximus , accidisset . Lusitanos adesse ubi Cantonem allatum est , extemplo præfectis oræ maritimæ à magistratibus imperatum , nefarios prædones vel comprehenderent , vel ad internecionem delerent . Nihil tale metuebat eo tempore Mellus , quam à peritis rerum semel iterumque præmonitus . eò facilius repentino Sinarum aduentu cum suis opprimitur . & initio quidem , ut se se concordiae & societatis cupidos probarent Lusitani , vel pluribus iaculis appetiti , certare supersederunt ; dein , cum undique instaret hostis , ac nullam pacis mentionem admitteret ; iniquissimo loco & conditione committitur pugna . Multitudine tormentorum ac nauium , ut in suo regno , longe superabant Sinæ . itaque circumuentos aduenas partim bombardis è tuto discerpunt ; partim fessos ac se se dedentes , in potestatem accipiunt . Mellus , cum aliquandiu egregie se se defendisset , ad extremum , singulari Dei beneficio , per mediam hostium classem male mulctatus elabitur . In captos , magistratuum iussu , grauiter acerbisque consultum . in carcerem conditi omnes ; & pro latronibus piratisque damnati , aut pedore ac tabe in vinculis exspirarunt , aut ad supplicium producti sum.



At summo plebis concursu, vel sagittis confixi, vel in frustra dissecti sunt, præconibus vetera gentis piacula, & recentem insuper audaciam referentibus; quod in regios portus ac fines armata manu non dubitassent redire; in quibus omnium flagitiorum ac scelerum paulo ante vestigia reliquissent. Hæc, & alia id genus, elata voce de scripto subinde recitabantur, ad tollendam è vulgi animis opinionem, quam de Lusitani olim generis virtute ac probitate conceperant. Dum hac tam repentina rerum inclinatione tot simul regionibus Lusitani exercentur, ne ad Molucas quidem insulas otium fuit. Rerum ibi summa penes Aroezium erat. Hunc, Lusitana amicitia opibusq; subnixum, & immodicos gerentem spiritus, regina cæteri q; primores minime concoquebant. Arx insuper, eodem in primis adnitente, non parum excreuerat: dispositaq; in muris tormenta, longe lateq; terrorem inferebant. Id sibi suisq; iugum, per causam hospitij ac societatis impositum, regina fero ingemiscens; clam communicatis cum Almanfore parente consiliis; fugam vna cum liberis ac præcipuis amicorum parabat: vt per eam occasionem popularibus paulatim abductis; vrbem desertam ac nudam Lusitano relinqueret. Ea re per indices comperta, Brittus arcis præfectus; adiutore Aroezio, regias ades militibus repente circumdat, elatumq; inter manus Boahatem regulum, & paruulos fratres Aialum, & Tabariam, in arcem asportat. Regina, per occultos exitus inter tumultum elapsa. Inde consternatus Regis desiderio populus, cum frequens ad arcem accurrisset, Aroezij auctoritate, & Britti accommodata ad tempus oratione sedatus est; cum inter cætera persancte ambo affirmarent, consilium id publicæ salutis causa necessario susceptum fuisse, fidemq; obligarent suam, Boahati Regi diadema regnumq; mansurum incolumem. Tum pluribus in æmulum diuitiarum ac dignitatis Almanforem inuecti, barbaros natura cupidos belli cædisq;, ad inferendum ei bellum haud magno negotio perpulere. Inde, inter vtramq; gentem paruis, nec dignis relatu præliis vario successu certatum est. superior tamen ad extremum Ternatensis fuit res. Mariacum oppidum in summo editi montis vertice, quod insulæ Tidoris olim caput fuerat; Lusitanorum ope ab Aroezio cum multa cæde captum incensumq; &



## *Historiarum Indicarum*

Maquienum insula, quam reguli ambo æquis portionibus obtinebant, metu coacta, in Ternatensem ditionem vniuersa concessit. Hæc ferme Eduardo Menesio Prætor per triennium gesta. Successit Menesio Vascus Gamma, dux cum aliis laudibus, tum aperta præsertim India clarus, ac memorabilis. Huic, pro trienni trimestre imperium fuit. ornatissimas naues è Lusitania sexdecim, in iis tria millia delectæ iuuentutis ac nobilitatis abduxerat. Vt in Cambaiana littora ventum est (nam eam in primis regionem explorare placuerat) in summa repente malacia, silentibus ventis, ab imo fluctus intumuit; inde naues inter se nutare; crepitare compages; tabulata concuti cæpta. Naute, subito pauore iacti, cum in Syrtes illatam haud dubie classem crederent, in summa perturbatione rerum omnium, alij bolidem demittere, alij ad exhauriendam sentinam, vel ad clauum tenendum accurrere. Sapientiores alij, circumspectare fugam, atque doliola ac tabulas ad enatandum arripere. ipse imperator, initio nequaquam expers timoris ac sollicitudinis fuit: sed mox comperto eum esse terremotum (quem nauigantes quoq; sentire non dubium est) ad socios hilari fronte conuersus; Adeste animis, inquit, viri; aduentu nostro perterritus Cambaianus Oceanus intremittit. Atque hoc periculo defuncti Lusitani, Cocinum incolumes deuenere. Vascus, accepta prouincia, dum à Cocino varios huc illuc præfectos dimittit; nomenq; Lusitanum in pristinam dignitatem conatur asserere; graui morbo implicitus, in ipso impetu mouendarum rerum, excessit è vita. Vrbi Goæ tum Henricus Menesius præerat, eximia virtute & integritate vir. is continuo in Gamme locum suffectus è successio-nibus, vt appellant: quarum est ratio eiusmodi. Transmissos è Lusitania regios codicillos, minimum tres, olim apud Questorem, aut scribam, nunc apud Goanum Archiepiscopum, diligenter complicatos obsignatosq; custodiri mos est. quibus in singulis, quasi per gradus, ad rem cautius celandam, adnotatum regio ipso chirographo latet nomen illius, qui, si Prætorem in prouincia diem obire contigerit; è Regis auctoritate substituendus est. ijs autem codicillis, ordine superscribitur, prima, secunda, tertia, vel quarta successio: ita. vt, si eius qui primo loco nominatur, copia fuerit; secundum codicillum



eillum resignare, vel aperire sit nefas. Ergo, vbi Prætor morbo, aliove quopiam casu decessit; consilium cogitur. ibi, coram Archiepiscopo, & magistratibus, qua diximus obseruatione, vt nullus aut fraudi aut errori sit locus, codicilli & signa soluuntur: cuius primum exierit nomen, huic defertur imperium; reliqua nomina, rursus occulta, ad Regis nutum arbitriumq; adseruantur. Id, ne per summi magistratus obitum prouincia diutius orba periclitaretur; nea ob id ipsum inter præfectos certamina existerent; sapienter in tanto locorum interuallo prouisum est. Per hunc modo renuntiatus Prætor Henricus, ad regia negotia conficienda, Cocinum petijt: & ex itinere multos Arabum parones, Malabarica onustos fruge, vel cum ipsis oneribus cepit, vel dissipatos in littus eiecit. Tumultuantes præterea ad Cananorem piratas, socij Regis rogatu compescuit, & vicos aliquot eorum exussit. Inter quæ, ad Calecutum, ab Lusitanis ac Malabaribus denuo turbata pax est. Odiosæ primum controuersie inter negotiandum exortæ; & partis vtriusque animi suspicionibus irritati: dein vltro citroq; factæ iniuriæ: postremo, instigantibus è consuetudine Saracenis, bellum exarsit. Hisce rebus cognitis Henricus Prætor, quinquaginta variæ formæ nauibus, in quibus erant duo armatorum millia, Cocino Pananem oræ Calecutanæ contendit. ibi, cum ablatas res nequicquam repetijset, munitum denuo locum & celebrem, terra marique simul adortus, pulso aut casu Mahometano præsidio cepit, ac direptum incendit. Multa inde relata tormenta: quorum aliquot antea Lusitanorum apparebat fuisse. Lusitanus desertor ac transfuga præfuerat vniuersis. huius proiectum humi cadauer, densis concisa vulneribus facie, vix vt agnosceretur, inuentum est. A Panane in conspectum vrbis Calecuti prouectus Prætor, haud mediocrem hostibus terrorem incussit. Naues erant ibi complures. in eas flamme confestim iniectæ; & simul, qui arcem tenebant, suorum aduentu animati; eruptione facta, variis locis ignem suburbij intulere. Inde Prætor, confirmato arcis præsidio, perculsisq; hostibus; leucas in septentrionem fere sex ad Couletum emporium eiusdem oræ processit. curuo in theatri modum, & accliui littore is portus est, ac mire facto ad iacula certis in omnem partem ictibus



## *Historiarum Indicarum*

dirigenda . eo cliuo aggerem ac munitiones Mahometani perduxerant ; infra , stationem habebant parones fere centum & quinquaginta , proris longo ordine in altum obuersis , vt duplici vallo , tormentisq; apte dispositis , & ingenti armatorum numero ( viginti hominum millia conuenisse dicebantur ) contra omnes incursiones oppidum egregie tutum videri posset . Henricus , comperta hostium multitudine , sub ipsum portum anchoras iacit . inde contemplatus naturam loci , & genus operum , ac lintribus ad vada exploranda præmissis ; tribus è partibus vno tempore , distinendi hostis causa , oppidum aggredi statuit . Simonem Menesium cum bellatoribus trecentis in terram egredi iubet ; ac læuum cornu munitionum inuadere . ipse cum centum & quinquaginta , non amplius , descensu facto ; ad læuam ducit : classiarijs imperat ad hostium naues recta succedant . ita , clamore sublato , simul à fronte ac lateribus pugna committitur . Non exigua tum hosti , officinis iampridem institutis , tormentorum copia suppetebat . eo maiori tenebantur spe , Lusitanum congressu arceri , & iaculis eminus obrui posse . quippe seminudi ipsi , patente ad plagas corpore , Hispanienses gladios , & ingentia pila , galeasq; , ac thoraces horrebant . Verum eos longe fefellit opinio . Siquidem inter iaculandum coortus è tormentario fomite fumus ad instar nebulæ , subeuntem audacter Lusitanum egregie texit . & flammæ intermicantis indicio , hinc parones iniectis ferreis manibus nostri apprehenderant ; inde in vallum erepserrant , & intra munitiones coniecerant signa , prius pæne quam eos appropinquare sensisset barbarus . Lusitanis , tum Saracenorum aspectus ; tum pax à Calecutano toties per fraudē violata acuebat iras . Nec diutius tulere dimicationem hostes . Pauci tantum coniurati ad extremum vsque spiritum acriter obstitere . cæteri , quibus patrio more nihil erat pudoris ad fugam , strage suorum exterriti , terga verterunt . Henricus , in magna hostium cede , non plus quindecim è suorum numero amissis ; vulneratis duodequingenta ; & oppido , & classe hostili potitur . Inter ceterā prædam , tormenta variæ magnitudinis aucta trecenta & sexaginta ; & minorū fistularū ingens numerus . parones abducti quinquaginta tres , Indico aromate onusti plerique : reliqui flammis absumpti : ac postremo , totum oppidum ,  
subiectis



subiectis per iram ignibus, conflagrauit. Lusitanus gemina intra paucos dies victoria latus, ouanque; Cananorem, inde Cocinum reuertit. Et Zamorinus, confecto quod per id tempus cum mediterraneis populis gesserat bello, omnibus dein viribus ad Lusitanam arcem expugnandam incubuit. Arx ea Calecutano erat imposita littori, quod, vt initio diximus, insidiosum asperumq; , vix in summa malacia, paruis nauigijs accessum præbet. Iamq; hyems aderat. eo acrius Zamorinus, ne id anni tempus elaberetur, militares copias, & omnem oppugnandi apparatus vndique contrahebat: vt interim vel operibus ac vi arcem caperet; vel necessitate ac fame Lusitanos in deditionem acciperet. itaque extemplo, præfectus cum duodecim fere millibus peditum, ad urbem præmissus. quo in numero Siculus quidam erat perfuga, non ignobilis architectus; qui Rhodiæ expugnationi cum Solimano Turca interfuerat. hoc maxime artifice ac præceptore, barbari vallo & fossa lata pedes fere octodecim, ad dimidiatæ Lunæ figuram, amplecti arcem instituunt. & ex vtraque parte, qua vallum in mare definebat; arcendo nauali subsidio castella erigebantur duo, quæ obliquis ictibus totum littus abraderent. dein, per ambitum fossæ, modicis interuallis, propugnacula quinque excitabant; vnde maioribus tormentis ad idonea loca dispositis arcis mœnia quaterentur. Hæc opera, licet in munitores crebri ex arce impetus fierent; tamen, abundante multitudine, adhibitis pluteis vineisq; , & instantibus præfectis, breui ad exitum peruenere. Arcem, Lusitani haud amplius trecenti obtinebant. præerat Ioannes Lima, vir & militiæ callens, & gloriæ in primis audus. is, cum nulla superesset nisi ab Oceano spes; duplici doliolum ordine; ingesta arena, & lorica extrinsecus addita, brachium ad mare protenderat; alternis inter dolia tormentis, ad arcendum ab latere hostem, apte locatis. & per expedita nauigia Prætorem Henricum de statu rei Calecutanæ fecerat certiorum. Sub hæc, ineunte Iunio mense, cum hyems in ea regione sæuaret; Zamorinus ipse cum reliquo belli apparatu, & nonaginta millibus hominum affuit. Arcu & sagittis plerique; alij gladio & parma; alij etiam ferreis fistulis instructi conuenerant. in speciem despicabiles, cæterum vsu armorum, & corporum agilitate metuendi. Vt eæ



## *Historiarum Indicarum*

copiæ confedere; Siculus architectus Zamorino perfecta opera diligenter ostendit; rudiq; ad eiusmodi commenta barbaro, certam cum admiratione fiduciam iniecit, arcis breui tempore potiundæ. atque id ipsum vti quam minimo Indorum damno fieret, Siculus, petito colloquio, Lusitanos cum alijs rationibus, tum hostilis exercitus magnitudine proponenda, institit ad deditionem hortari. Verum eiusmodi oratione tantum abfuit vt Limæ constantia moueretur; vti etiam ad laceffendum hostem vtrò cum paucis eruperit. sed magna fuit merces audaciæ. Concurfu ab hostibus facto, pæne circumuenti Lusitani, multis acceptis illatisq; vulneribus, ægre ad suos receptum habuere. Inde exasperatis vehementius animis; magno conatu & oppugnari, & defendi arx capta. Tormentis vtrinque certabatur: è quibus erant Calecutano, quæ dodrantali diametro emitterent globos. Sed iaculandi erat dispar admodum ratio. Ab Indis libratoribus, quippe nondum sat in eo genere exercitatis, ictus languidi, infrequentes, incerti; & si qui muris inciderant, egregia laterum & structuræ firmitate respuebantur. Ab Lusitanis, crebri, destinati, vehementes; & vbi hostis arci succederet; confertæ ac seminudæ multitudini certam stragem perniciemq; afferebant. Multos etiam squamis arborum & fragmentis (sunt autem ibi palmeta frequentia) repente carpi, vel exanimari conspiceres. Verum ea damna hostes, vt in tanta militum copia, facile sarciebant: cum deserta stationum loca alij subinde aliiq; supplerent; sauciis ac fessis integros recentesq; submitterent. Longe iniquiore conditione erant Lusitani: quos, præter cæteras belli difficultates, ipsa qua laborare semper solent, paucitas fatigabat. Præfectus, idoneis ad propugnandum locis, notæ fortitudinis viros cum suo quemq; manipulo collocauerat: ipse reliquos è præsidio circa se habebat: cum quibus circumspicere, & obire ad repentina pericula posset. Verum & militem conficiebant, præter certaminis laborem & plagas, diurnæ pariter ac nocturnæ vigiliæ: & præfecto, ad subitos ac diuersos clamores, prout res exigeret, occurrendi vix erat facultas. Interea Henricus Prætor, cognita obsidione, duas naues cum propugnatoribus centum & quadraginta subsidio miserat. quarum alteram Christophorus Iusartes; alteram Eduardus Fonseca



Fonsēca ducebat. Iusartes feliciore cursa paulum antegressus, propius ab Calecutano littore constitit. Fonsēca, quod tardius aliquanto nauigasset; ventis repente cadentibus, ab longiore spatio anchoras iecit. Ad eas conspectas naues, erecti partis vtriusque animi. inclusorum; optati auxiliij spe. obsidentium; metu, ne tot iam exhausti labores in irritum cederent: & locus ipse suspectus, iamdudum mentes Indorum curasq; conuerterat, ne quid falleret tale. Lima, cum ad littus accurrisset; animaduersa paucitate eorum qui aduenerant (nō plus octoginta milites eo nauigio vehabantur) ne descensionem cum euidenti periculo tentarent; nutu & significationibus admonebat. & ex ipso auxilio plerique, conspectis Indorum castris & frequentia, subeundam eiusmodi aleam pernegabant. Verum Iusartes cupiditate gloriæ omne discrimen impauido vultu contemnens, cum triginta quinque voluntariis in paronem desiliit; cæteris custodire nauem, & vbi primum terram attigisset; missilibus procul hostem arcere iussis. Inde contento remigio ad ipsum loricæ os, aduarij prora dirigitur; quo subeuntes facilius protegeret statio Lusitana. sed illuc nautæ dum pari conatu enituntur; interea (vt fit) paronem paulo infra eum locum vehementior æstus abripuit. Eo ferocius progressi extra vallum barbari complures instare: atque, vt erant nudi, se se ad prohibendum accessu hostem aquis immergere. Nec Lusitani segnius è parone se certatim eijcere. ibi conferta in vadis manu, quàm acerrime dimicatur. Cæteri ad spectaculum intenti, propter ancipites ictus; ne suos impetant hosti permistos; iacula cohibere coguntur. Cum aliquandiu dubia stetisset pugna; Lusitani ad extremum depri-  
mentibus vestimentis ingenti labore eluctati, quatuor è suorum numero desideratis, pluribus faucijs, cum magna vicissim hostium cæde, intra loricæ fauces audacissime penetrarunt: ac nihil propius factum est, quam vt instantes ab tergo Indi simul irrumperent. In eo tumultu eximia Emmanuelis Cernicij constitit fortitudo. is, cum iam introisset munitio-  
nes, & fatigatus, & saucijs; circumuentum respiciens præcipuum è commilitonibus quendam; recurrit protinus: ac laborantem, summotis acriter Indis, recepit in tutum, magna vel mercede, vel gloria; quippe, omnium consensu civicam



## *Historiarum Indicarum*

promeritus coronam; ipse post dies aliquot è vlncribus exspirauit. Sed interim dum ad mare Lusitani præfidiarij suis adiuuandis atque intromittendis insistant; ex altera parte frequentes barbari desertas rati stationes, arcem scalis inuaserant. Eo nuntio excitus ab littore Lima, cum promptissimis aduolat: & pluribus locis conantem scandere Malabarem; contis, gladiis, telis, igne deturbat. Erant Lusitano varia nouæ artis iacula, ad hostem cominus eminusq; impetendum. Sed è propinquo nihil Indos æque terrebat, atque incendiariæ bolides. quod est inuentum eiusmodi. Ollam ex argilla semicotta, quo facilius deinde rumpatur; circumdatis ansulis tribus quattuorve, sulphureo complent puluere, & osculum diligenter obturant. tum ad eas ansulas igniti funiculi è gossipio vel stupa alligantur. vbi ad coniectum eius reli ventum est contorta brachijs olla repente diffringitur &; simul arreptis è fomite adalligato fauillis, ingenti circumstantium damno, flammæ edit ineuitabiles. quod missilium genus, in prælijs duntaxat naualibus primo vsitatum; ad terrestria quoq; certamina exitiabili commento deinde translatum est. Hac maxime pernicie repulsi à mœnibus Indi vsulati cum insana trepidatione se se intra munimenta recepere. Interea præfectus naui alterius Fonsæca, quamquam probe animaduerso discrimine eorum qui in litus exscenderant; paratus tamen eandem aleam, si res ita postularet, subire; per litteras ad sagittam reuinctas quæsiuit ab Lima, quid sibi tali tempore faciendum censeret. Ille vero, eadem vsus arte sagittæ, de consilij sententia respondit: Nequaquam se Fonsæca suosq; in apertum adeo periculum obiiceret: tutum in arcem introitum haud minus quingentorum Lusitanorum præsidio posse obtineri. Proinde rediret Cocinum propere; ageretq; cum Prætorè diligenter (ad quem simul ipse in eandem sententiam scripras litteras dabat) vti militum quingentorum spectata virtute subsidium, & sulphurei pulueris vim, & ad obsidionem tolerandam alimenta submitteret. Cum hoc responso Fonsæca per insensos intestosq; fluctus hyemæ summa Cocinum reuertit. & Prætor, cognito suorum periculo, Antonium Syluium ad opem obsessis ferendam cum aliquot nauibus, & viris quot Lima petierat, ex templo profisci iubet. ipse



se interea classi ornandæ operam dabat; ut cum primum se aperuisset mare, cum maioribus copijs eo contenderet. Hæc ubi per exploratores Calecutum allata; confestim Zamorinus, antequam inclusis accederent vires; omni conatu rursus oppugnare arcem aggreditur. Neque Sículus architectus, egregie se se barbaro vendicans, incitatissimæ deerat ipsius cupiditati. aggerem ex Turcica disciplina promouendo, mœnibus adæquarat. Cuniculos præterea sub terras agebat; locis etiam quibusdam statuebat oris vasti mortaria; è quibus in sublime iacta ingentia pondera cum horribili strage in arcis tecta deciderent. Sed operum eiusmodi, quæ Zamorinum inani fiducia inflarant, ubi ad pugnam ventum est, haudquaquam expectationi respondit euentus. Indi telis ac missilibus ex aggere deturbati: cuniculi excepti cuniculis: & mortaria, quemadmodum, ubi à perito magistro locantur, magnum hosti detrimentum important; ita, si artificium absit; in eandem pæne regionem recidente globo, machinatoribus interdum ipsis exitio sunt. Quocirca Zamorinus, haud mediocri suo malo peregrinas artes expertus, reliquum spei in sæuitia hyemis, & fame reposuit. neq; ea spes sefellisset hominem, si ad arcendos commeatus vel modicam classem instructam in proximo tenuisset. Ex quo verum apparuit Themistocleum illud: Qui mare possideat, omnia possidere. Lusitani, Syluio duce ab Cocino præmissi, quamquam atroci tempestate disiectis nauibus; tamen ut se se ex iactatione refecerant, alij subinde atque alij Calecutum accedebant. Lima, fatigatis iam, & ab oppugnatione deterritis hostibus, vnam inopiam metuens; modica militum auxilia recusabat: affuturum mox cum iustis copijs Henricum expectans. Tantum sulphurei pulueris & commeatu præsentem expetebat copiam. Vtraque, noctis intempestæ silentio, scaphis paulatim in arcem inuecta. & vulgo iam è muris, Lusitani, suadenti deditionem hosti, recentes carnes, aliq; cibaria, & ipsum denique in delicias betele ostentabant. Ea res Zamorini contudit animos. & circumacta iam hyeme, cum nauibus viginti, bellatoribus mille quingentis aderat Prætor. is, tum à mari, tum ab arce tormentis hoste summoto; cum ingenti clamore pluribus locis armatos in terram exposuit: immisissq; intra hostiles fossas audacissimis è suorum numero,  
cum



## *Historiarum Indicarum*

cum ex alijs quoque partibus alij ad vallum intrepide subiissent; ad tria Indorum millia partim ferro, partim igne deleuit: in quibus ipse quoque architectus, proditæ ac desertæ Christianæ fidei noxam luit incendio. è Lusitanis eo die paulo plus triginta cecidere. faucij relati amplius ducenti: & Henricus, proruto Indorum vallo, fossisq; oppletis; idoneo prope arcem loco castra communijt. Inde Zamorinus & suorum territus strage, & simul veritus, ne in proxima palmeta Lusitani sæuirent (quo detrimento, vt supra diximus, nihil genti grauius aut acerbius est) misso caduceatore inducias petijt. in quadriduum datæ. interea de pacis conditionibus actum: neque conuenit, eo maxime quod Zamorinus insignem quendam è Cocinensi ditione perfugam tradere abnueret. Ac demum Henricus pertæsus Indicæ leuitatis, & Mahometanæ perfidiæ; præsidium abducere ab Calecuto, & arcem à fundamentis excindere statuit: præsertim quod ita velle Ioannem Regem è commentarijs Vasci Gammæ didicerat. ergo, muris & propugnaculis, opere subterraneo, sulphurei pulueris de more copiam subdi iussit. dein militibus, & machinis, omniq; instrumento raptim in naues imposito (cuius rei facultatem & natura loci, & nautica turba præstabat) ignes cauernis inieci; & barbaris illico, siquid forte prædæ relictum esset, stolidam temeritate in arcem ingressis (tanta inest hominibus rapiendi libido) interim è specubus cæcis erumpentes momento flammæ plerosque hausere: & cum horribili strepitu mœnium structura dissiliijt. Atq; is finis & arcis, & obsidionis fuit. Henricus, incolumi classe & exercitu Cocinum reuectus; alios alio præfectos dimisit. ipse inde septendecim nauib; Cananorem petijt. ibi, dum expeditionem in Cambaiam, Diuinq; meditatur; cum non toto biennio rem Indicam administrasset, graui oppressus morbo, paucis diebus è vita migravit anno post Christum natum M. D. XXVI. Hoc Prætor, fama nominis Lusitani, reflorescere visa quodammodo: req; ipsa comprobatum est; tanti militem, quanti ducem esse. Atque in ciuilibus etiam rebus non vulgari prudentia fuisse dicitur: & quod perrarum in eiusmodi prouincia est, ab auaritia, & à sordibus alienus. Sub idem tempus ad Malacam pariter bene gesta res est. Alodini coplæ, cum urbem terra mariq; vehementer vrgerent, perpau-

cis



cis egressis obuiam Lusitanis, cum ignominia fusæ & fugatæ. Et ex acri obsidione, Linguanus regulus, parua manu Lusitanorum exemptus est. Raia Nara, gener Alodini, Linguam obsederat. ex eius exercitu cæsi sexcenti, & plurimi vulnerati feruntur, vno tantum è nostris desiderato. Et è Molucis aliquot Lusitani ad Celebes populos auri causa profecti, cum litoribus arcerentur; foeda tempestate ad insulam trecentas inde leucas abrepti sunt. incolæ, moris antiqui homines, mira simplicitate ac securitate se se per nutus & nonnulla Molucensis linguæ commercia, in consuetudinem extemplo dedere. Egregio in primis habitu, & amabili vultus hilaritate sexus vterque est. promissa barba & capillo sunt viri. præmollibus floreis tegunt corpora. Ad fabriles vsus, spinis piscium pro ferramentis vtuntur. Ignoti ad eam diem & nominis, & regionis erat insula. cum primum, à nauclero Lusitano, dimensis cæli plagis, nauticam in membranam ex arte relata est, deq; ipsius naucleri nomine Gometij Sequeriæ insula exinde appellata. Non eadem erga Lusitanos comitas eo tempore in Arabici maris accolis exstitit. Hector Sylueria cum aliquot nauibus Erythræas angustias tuebatur. Hunc, in Arabia, qui Dōfarem urbem incolunt, accessu prohibere conati, audaciæ pænas dedere. profligati qui cum armis ad mare prodierant: oppidum captum, & direptum est. & insulæ duæ, Mazua, & Dalaca, quod sese ij populi infestos prætereuntibus Lusitanis præberent, ab eodem Sylueria domitæ, & annuo stipendio imposito, in ditio- nem redactæ. Simul, Æthiopica legatione perfunctus, anno sexto quam ad Arquicum exiscenderat Rhotericus Lima, in classem acceptus. Accessit ab Æthiopico, seu Abassino Rege legatus ad Lusitanum Regem nomine Zagazabus: itemq; cum donis ac litteris ad Romanum Pontificem Franciscus Aluarus, cuius supra meminimus, Rhoterici comes. Is in Lusitaniam reue- Ætus, Italiam deinde petijt. ac Bononiæ, in celeberrimo conuentu, cum Cæsar coronatus adesset; Clementi VII. vti Ecclesiæ vniuersæ Pastori, & summo in terris Dei Vicario, parata n̄ ad omne obsequium voluntatem Abassini Regis ac studium, solenni cum adoratione, & pedum osculo detulit.

*Libri Octauii Finis.*

HISTO.





# HISTORIARVM

## INDICARVM.

### LIBER NONVS.



ENRICO Menesio vita functo, à primoribus Lusitanis ventum in curiam est: ibi apertus alter codicillus, inscriptum ostendit nomen Petri Mascarenia, qui Malacæ vrbi tum præerat, vir bello fortis, & natura munificus, atque ob id ipsum apud omnes ordines gratiosus. Verum illud erat in ea successione incommodi; quod, nisi vertente anno, Mascarenias à Malaca, propter tempestatum rationem, adesse non poterat: cum interea simul à Calecutano, & Cambaiano Regibus, &, quod magis erat formidandum, ab ipso Turca bellum immineret: minimeq; expediret, eiusmodi rerum statu, parente ac præside tandiu carere prouinciam. Ob eam maxime causam, Alphonsus Mexias regius Quæstor, cuius tum erat summa  
in



in Senatu auctoritas, censebat, nulla mora interposita, tertium deinceps codicillum aperiendum: neque expectandum è tam longinqua regione Mascareniam: quem, quo melior esset ciuis, & Regis rei; publicæ amantior; eò æquiore animo ferre oporteret, in tanto taliq; discrimine, salutis communi potius, quam proprio ipsius honori consultum. Aduersus hæc, amici Mascarenix tendere; tam insignem iniuriam deprecari; ac postremò denuntiare, haud leuiori quam quod in præsentia proponatur malo, geminam successionem intestinis odijs ac certaminibus materiam utique præbituram. nec vero dubitandum, quin ipsa dulcedo imperij, & ratio dignitatis, è duobus Prætoribus alterum ad retinendam; alterum ad repetendam omni conatu prouinciam, postmodum esset incitatura. Cum hisce alijsq; difficultatibus non inueniretur exitus; multis altercationibus diu agitata, eò denique deducta res est; vt tertium codicillum inspicerent, prouinciãq; nouo successori mandarent ea lege, vt ipsam, quisquis ille esset, aduenienti Mascarenix confestim redditurum se iureiurando promitteret. In hanc sententiam conuenere omnes. & resignato palam Codicillo, Lupi Vassæ à Sancto Pelagio (contracta vt assolet voce Sampaum appellabant) nomen apparuit; qui per id tempus Cocini præfecturam gerebat. Is, cum solenni adiuratione pollicitus, se se Mascarenix, vt primum aesset, honore cessurum; Præturam interim inijt: cognitoq; prouinciæ statu, alios atque alios duces, ad obtinenda præfidijs maria, destinauit. ipse cum nauibus aliquot, in quibus erant Lusitani circiter mille; Malabaricam oram sibi tuendam desumpsit. Profectus Cocino, circa initium Februarij mensis anni millesimi quingentesimi vigesimi sexti, Cananorem petijt. ibi, dum commeatus in classem imponit, subito certior fit, Mahometanos è Calecutano emporio ad duodecim hominum millia, intra Bacanoris fluminis ostium cum nauibus onustis latere. paratos ad exitum, quæ prima se se occasio nauigandi obtulisset. Ea re cognita, non dubitauit Prætor, quominus in angustijs deprehen- §  
sos quamprimum inuaderet. Ergo sublatiis anchoris eo contendit infestus. Res erat difficultatis ac periculi plena, non modo in tam dispari numero copiarum; sed etiam quod contra omnem eiusmodi casum egregie se se Mahometani munierant.

Fluminis



## *Historiarum Indicarum*

Fluminis alueum de more fixis vtrique sudibus atque cancel-  
lis, in arctum ita coegerant; vt singulis tantum nauigijs aditus  
pateret. cæcos præterea sub aquam, veluti laqueos, idoneis ab-  
diderant locis; in quos illata ex alto nauigia se se induerent.  
& munitionibus in vtraque ripa excitatis, crebra tormenta lo-  
cauerant. Ad hæc, ex oppido fluminis cognomine, qui locus  
erat Narſinganæ ditionis, omnia illis ad victum necessaria sup-  
petebant. Hæc, Prætor, cum partim ab exploratoribus acce-  
piſſet, partim ſpeculatorijs nauigijs obeundo per ſe nocte ſub-  
luſtri notaſſet; ſubmiſſis primum vrinatoribus, laqueos fu-  
nesq; prætentos ab imo præcidi iuſſit: dein, ſublato ingenti  
clamore, concinentibus vndique tubis, aduerſo flumine ſubijt:  
præibant obtectæ centonibus, & maioribus tormentis inſtru-  
ctæ aliquot ſcaphæ, tum cætera nauigia ſimplici propter an-  
guſtias ordine ſequebantur.) In ea conſpecta, illico barbari  
vim omnis generis telorum emiſere: quibus propter aſſuetu-  
dinem haud quaquam exterriti Luſitani, contento remigio ad  
ipſa munimenta ſuccedunt. Ibi atrox & ambiguum aliquan-  
diu certamen fuit, dum conferti & obnixi corporibus Maho-  
metani hoſtem deſcenſu prohibere nituntur. Sed poſtquam  
impetu ex omni parte capto ſe ſe Luſitanus in mediam aciem  
ſaltu mittebat, & dextris gladijsq; res geri cæpta eſt; tum verò  
iniectæ formidine pulſi vndique barbari, & magna cum cæde  
præcipientem in fugam auerſi. ac Prætor veritus, ne ab ira & cu-  
piditate miles oppidum diriperet; & Narſinganum Regem, cu-  
ius tum in ditione Luſitani complures negotiabantur, alieno  
tempore prouocaret; vallo potitus, receptui cani iuſſit, ſuosq;  
à præda, & ab inſequendo vltra hoſte cohibuit. Apotheca &  
diuerſorium erat Mahometanorum in ipſo portu, frugibus, &  
merce pretioſa reſertum. Eam apothecam, Prætor, & hoſtiles  
vna lembos incendi iuſſit. octoginta fere tormentis, quorum  
erant ænea pleraque, ex incendio ad claſſem abreptis. Neque,  
in magna hoſtium ſtrage, Luſitani deſiderati plus quatuor.  
quo triſtior, acerbiorq; Calecutanæ ciuitati, atque ipſi præ-  
fertim Zamorino cladis nuntius accidit: vt, non retentæ qua-  
cunque conditione cum Luſitano pacis & amicitia, magis in  
dies hominem pœniteret. Ab ea victoria Prætor ad excidium  
Dabuli perrexit: quem in portum Mecanis negotiatoribus  
receptum



receptum dari contra fœdus cum Idalcane iſtum; & præterea, armatas inde triremes ad oram infeſtandam egredi pro certo compererat. Appropinquant, nouus præſes loci, quem Indi Tanadarem appellant, vnico nauigio prodiit obuiam ſupplex; & culpas omnes in eum cui ſucceſſerat, transferendo; ſeq; affirmando, vti oporteret, in fide officioq; manſurum; haud magno negotio Luſitani Prætoris mitigauit animum: & renouata pax, ita, ſi Dabulanæ biremes cum tormentis à præſide traderentur. Eductæ extemplo omnes, ac traditæ. Et Prætor ex animi ſententia geſtis rebus, Goam victrici claſſe contendit. Inter hæc, Ioannes Rex, Henrici Menefij morte nondum audita, quatuor miſerat in Indiam naues, & cum ijs noua ſucceſſorum nomina, ac ſeparatim ad Mexiam Quæſtorem litteras, quibus erat in extremis, vt ſuperioris temporis codicillos irritos duceret, & clauſos obſignatosq;, vt erant, in reditu ad ſe perferret; recentibus hiſce vteretur ſi forte Menefium è vita diſcedere contigiſſet. Eam clauſulam Mexias, quòd Maſcareniæ ſibi minus propitium fore ſuſpicaretur, ad res nouandas arripuit. E regijs ad concilium refert, quandoquidem vetera inania fecerit Rex; de nouis diplomatibus aperiendis; quemcunque illa iuſſerint, hunc denique iuſtum ac legitimum Indiæ Prætorem fore. Hæc, præter omnium exſpectationem, à Quæſtore dicta, magnos animorum motus fecerunt: ac ferme aduerſis auribus (vti par erat) accepta relatio. Inter cæteros, Vascus Deza, Cocinenſi arcu præpoſitus, aperte diſſeruit, non modo ſuperuacaneam, ſed etiam pernicioſam eam inſpectionem futuram. Nuper declarato Præture Maſcareniæ, per cauſam abſentiæ, dignitatem optimi & clariffimi viri haud obſcure impugnatam; ſuperinducto contra omne ius faſq; nouo ſucceſſore. Cum inde certamen ac periculum ingens non ſine cauſa timeretur; iureiurando ac promiſſo reddendę aduenienti à Malaca prouinciæ, id periculum Dei benignitate diſcuſſum. Quid opus eſſe, certis & conſtitutis iam rebus, denuo ſolui codicillos? & peſſimo publico labefactari concordiam & pacem; cum tantum belli pæne in manibus ſit, cum tot vndiq; terrores immineant? Nam quòd huic actioni regia prætexantur mandata; proſectò ſi in tanta regionum diſtantia, cum Ioannis ipſius conſulendi facultas deſit; ad interpretationem  
regiæ



## *Historiarum Indicarum*

regiæ voluntatis atque iudicij referenda sint omnia; nulli dubium esse debere, quin Mascarenia delatum è prioribus codicillis honorem, non quietis modo, sed etiam hominis causa, ratum, inuiolatum, ac proprium esse Rex iubeat. Id, vel ex eo aperte intelligi, quod veteres codicillos ad se clausos atque obsignatos referri mandauerit. quos ille si vel apertos irritos omnino esse voluisset; id ipsum vtique disertis verbis adscripturum fuisse. Proinde supersedendum hoc successionis male auspicatæ periculo; noua Regis expectanda responsa; atque interim coniunctionem animorum atque consensum, quo vno maxime inter hostilia circa omnia Lusitanæ stent res, omni studio & cura fouendum. Maiori & meliori parti eorum qui aderant, admodum grata fuit oratio Dezæ: quinimmo ex oraculo missa videri quodammodo potuit. Siquidem paulo ante, Ioannes Rex à nauarchis qui ex India illo ipso anno redierant, audita morte Menesij, & Mascarenia successionem; veritus, è missis ad Mexiam quas dicebamus litteris, nequid controuersiarum existeret; Petrum Annium Gallum cum nauigio expedito submiserat ad ea reuocanda mandata; & Mascarenia nominationem sua auctoritate firmandam. Sed Annius, nondum tempestiuo ad nauigandum mari profectus, superato iam Bonæ spei promontorio, circa Sancti Laurentij insulam naufragio periit. Inde, non ad liquidum explorata Regis voluntate; cum plerique ex æquo & bono agendum, & cauendas omnes discordiæ causas prudenter monerent; Mexias tamen, paucis assentientibus, omne id periculum in se recipendo, premendoq; verbis ijs quæ retulimus ex epistola Regis; peruiacia & obstinatione tenuit, vt nouissimi codicilli consulerentur. ij primo loco Prætorem declarabant Lupum Vasaum ipsum, qui secundum in priore nominatione tenuerat. itaque elatus hoc de se iudicio Regis; pro fiduciaria legitimam ac propriam sibi vindicare Præturam; & ad arcendum honoris aditu Mascareniam, si promissa repetere instaret; omnia præmoliri constituit. Ea re multorum animi grauiter offensi: nonnulli etiam Vasei imperium detrectare palam ausi. Interea de interregno, & Mascarenia successionem, deq; vicario Vasei munere, Malacam littere nuntijq; peruenierant. Et satis comperta re, vtriusque Indiæ Prætorem Mascareniam rite consalutauerant socij coloni q;



coloniq; . Proinde, nequid se absente respublica incommodi acciperet; maturandum ratus Mascarenias, Malacę Georgium Capralium præfecit: ipse, non exspectata motione quam vocant; reclamantibus naucleris citeriorem Indiam petere intendit. neque impune cessit illi temeritas. ad Pulopuarem insulam tenuit primum. ibi dum stat in anchoris; subita procelleui, malo diffracto, lacerisq; armamentis, pene submersus, Malacam retro vnde abierat, redire coactus est. Natus ad res gerendas, & glorię in primis appetens erat Mascarenias. Ergo, dum anniuersarius recurrat Eurus; ne frustra interim tempus absumeret, quod parum feliciter Georgius Albuquerque ante tentarat, herentem lateri tyrannum Alodinum oppugnare, & receptaculum piratarum insulam oppidumq; Bintanum, omnibus modis parat excindere. Forte tum Malacę substitute præfecti aliquot Lusitani, Borneum insulam alij; alij Molucas, alij Somatram ipsam Regis iussu petentes. Hisce non approbantibus modo expeditionem, sed etiam operam suam in idipsum enixe offerentibus, Mascarenias varię formę naues vndeuginti contraxit: & Lusitanis trecentis, Malacensisbus ferme sexcentis impositis, ad Bintanum vela fieri iussit. Alodinus ad eius classis famam, pontem urbemq; nouo præsidio & munitionibus auxerat, venenatis tribulis circumquaq; dispersis; plurimisq; tormentis ad idonea loca dispositis. præterea, quam acerrime defixis in imo longurijs, tignisq; in lapides molares impactis vt pondere ipso detinerentur, obstruxerat portum: & super hæc, opem à propinquo regulo Panensi petierat. Lusitana classis, ob naturam vadosi maris, & frequentes insulas, cum tarde admodum nauigasset; ante ipsam Bintanum denique in anchoris constitit. Inde præmissus ad omnia contemplanda cum speculatorio nauigio Eduardus Coelius, retulit, fauces portus, nisi euulsis cancellis, omnino esse impenetrabiles. porro descensum ad urbem plane exitiabilem fore: adeo locum & præaltis munitionibus, & crebris tormentis, & omni apparatu bellico tutum videri. Hisce rebus permotus Mascarenias, vallum omittere; pontem ipsum (vti Albuquerque olim in expugnatione Malacę) admota celsiore naui, & repagulis per vim extractis, adoriri decreuit. Ad eam rem, eximia fortitudinis nauarchus deligitur, Franciscus Serranus E borensis;



## *Historiarum Indicarum*

sis; Lusitani propugnatores cum magno tormentorum numero additi quinquaginta: & naus, partim validis asseribus plureisque, parrim etiam culcitris, & gossipio, quæque alia sunt missilibus eludendis, egregie recta. Hisce mandatum, ut ostio repurgato, & faucibus utcunque patefactis, pontem inuaderent: laborantibus in tempore subsidium affuturum. Tum, ad breuia vitanda, catures duo, biremium instar, prætentatis canalibus, nauem remulco trahere iussi. Primus labor aperiendi aditus fuit. adacta ad imum tigna, immisfis ductarijs funibus, ergata conuellere nitebantur, eo quidem impetu, ut nonnulli præ nimia contentione sanguinem euomerent: atque ut initia sese dabant; multorum dierum id opus proculdubio fore apparebat. Dum huic vni rei, in orbem succedentes alij alijs, dies noctesque dant operam; noua repente ab alto conspicitur classis. tres & triginta erant lanciaræ à Panensi regulo missæ: quibus, præter varios commeatus, duo circiter hominum millia vehebantur. Ea re animaduersa Mascarenias, ne si propius accessissent, elatus recenti subsidio Bintanius confestim erumperet, ancipitiq; prælio Lusitani postmodum vgerentur; anteuertere, & cum parte copiarum ipsemet quam longissime obuiam ire Panensi decreuerat: sed præfectorum dein precibus victus, ne se temere in discrimen obijceret; Eduardo Coelio cum lanciaris quatuor, calaluzijs quinque (eiusdem fere magnitudinis vtraque actuaria sunt) id negotij dat. ipse ad exitum portus tuendum cum cætera classe subsistit. Barbari, quamquam multitudine superiores; tamen, & oneribus impediti, & à tormentis imparati aduentabant; seminudo corpore, sagittis maxime freti. Ergo, uti propius ventum est; primum bombardæ fragorem, & radiantia fulgetra non tulerent. Perterriti, aliquot suorum amisissis, turpem in fugam ex templo auertuntur; & hærentibus tergo Lusitanis, lanciaræ viginti tres, ad proximam insulam directis proris, in littus eiectæ: & certatim exsistentes barbari; nullo nisi vitæ respectu, omnibus ferme relictis rebus, hac illacque dispersi. reliqui, cum insulam tenere nequissent, contento cursu prælati, nocte iam imminente, per tenebras euaserunt. Coelius, haud parua sine vlllo suorum sanguine parta victoria, relictas ab hoste lanciaras cum ipsis oneribus ad Mascareniam cum ingenti gratulatione



tulatione perduxit. Inter hæc. quod ad transitum satis esset ostio patefacto, Serranus, attracta remulco naui, ad frontem valli processerat. hic vero longe acrius desudandum Lusitanis fuit: dum ingruentem ab latere missilium vim excipiunt: atq; alij recentia foramina raptim obturant, alij conceptas exhauriunt aquas, alij pauentem ad præteruolantium globorum sibilos, abdentemque se remigem, adhortantur. Magnus in primis vsus centonum & gossipij fuit: nec dubium, quin alioqui nauem, quamuis firmis compagibus tabulatisque munitam, creberrima pilarum grando pessumdatura fuerit. E tanto periculo elapsi diuinitus, quintodecimo instituti operis die ad pontem appropinquant: iactisque idoneo loco anchoris, in modum propugnaculi nauem ex omni parte stabiliunt. Tum vero indignatione atque ira percitus Alodinus furere, & suos incusare, quod in omnium conspectu claustris effractis, hostem ad interiora penetrare sint passi. Confestim è gentis consuetudine submissi, qui nando clamoras præciderent, vt ipso fluminis impetu nauis in vada ferretur. Sed Lusitani, fraudem, iniectis ad anchoras ferreis catenis eluserant. Ea quoque spe destitutus Alodinus, euocatum è statione Laqueximenam præfectum, lanciaras vndecim raptim deducere, & cum quingentis armatis interclusam à cætera classe nauem inuadere iubet. Simul, ne quid interim Serrano auxilij superueniat; custodibus edicit, quam intentissimas pro vallo excubias agant; & vbi postulet res, tormenta sine vlla intermissione in prætereuntes exerceant. Vti imperauerat, factum. Laqueximena lanciaris momento deductis instructisque; nauem petit infestus: ac nequicquam arcere conante Lusitano, circumuentam barbari à prora maxime ascendunt: cumque abundante multitudine integri succederent fessis; & paucitate, & labore, & vulneribus fatigatos Lusitanos, capta iam prora, ad malum vsque summouerant. Ibi Serranus grauius faucibus, egregie dimicans cadit; & pro mortuo habitus, collectis dein utcunque viribus, acrior in pugnam resurgit. Verum libero introitu, irruentibus alijs super alios Mahometanis; nulla ope obsisti iam poterat. Cum in eo statu res esset; conspicatus Mascarenias è prætoria discursum hostium, & circumfusas naui lanciaras; atque ex ipso numero & vociferatione, haud absurde conie-



## *Historiarum Indicarum*

stans, præsidium in extremo versari discrimine; confestim Eduardo Coelio, & strenuis aliquot assumptis, in balancum, quod leuioribus nauigij genus est, ad fallenda misilia, desilit; ac nulla deterritus vi, pertinaci remorum pulsu, præter ipsas munitiones, nequicquam eiaculantibus barbaris, ad locum certaminis appropinquat: disiectisque ignifera bolide lanciaris, qua proximum est; conscendit nauem; atque ut prope ferum auxilium suis iam iamque captis, ita vniuersum gaudium & requiem attulit. neque ascendentem (adeo certamine occupati erant introrsus dimicantium animi) sensit quisquam. recentes dein, respirantibus cæteris, pugnam capeffunt: neque ea diuturna, vel ambigua fuit. Exterriti necopinato aduentu hostes cessere primum; dein, cum dolor cadentis ad irritum rei, ad rabiem atque ad iterandum certamen accenderet; cæsi ad vnum quotquot nauem intrauerant; & è Lusitanis (quod pe- ne fidem excedat) in tanto sauciorum numero, ne vnus quidem amissus. Mascarenias, per summam fortitudinem præsidio seruato; magnam sibi ad omnes laudem & gloriam peperit. dein festinandum ratus, ne denuo barbari nauem adorirentur; vel rates, ut solent, secundo flumine ac vento cum ignibus ad incendium immitterent: adiuuandi ratione vires, & rei sine mora perficiendæ, tale consilium expedit. Dux, præter amnem, ferebant ad pontem viæ: alteram, qua vrbs condita est; munimentis & custodijs obtinebat hostis: altera, propter vligines & paludes, inaccessa & clausa putabatur. hoc ipso itinere, quo minus erat suspectum, Mascarenias noctu pontem aggredi statuit. atque ut ab eius rei sensu quam maxime Mahometanos auerteret; quasi à vallo urbem inuasurus; ab ea parte pluteos erigi, vineas agi, & tormenta aliqua collocari iubet: inque hac statione primis tenebris Sanaïam præfectum Malacensium, cum quadraginta Lusitanis, & cum auxiliaribus collocat. ijs mandat, ut cum primum à ponte micantes viderint flammæ; confestim clamore sublato, concinentibus tubis, tormenta displodant, & quam tumultuosissime ex eo loco oppugnationem ostendent; hostemque inde omni ratione distineant. ipse cum cæteris Lusitanis, obseruato maris recessu, primæ vigiliæ silentio, tria millia passuum à ponte, diuersum in littus egreditur. inde per tenacem limum atque voragines



gines ingenti labore eluctati, cum alibi vmbilico, alibi humeris tantum exflarent; integras tamen ac recentes haud sine miraculo vires ad pontem attulere. Quarta ferme erat vigilia, quæ gratisimæ quietis hora est: & peruigil in navi Serranus, ad incendium ollas è composito paratas habebat. iis Mascarenia iussu in castella coniectis, simul ex arida materia splendor eluxit, & in id ipsum intentus è condito Sanaia, clamorem tolli, canere tubas, & cum horrendo fragore, globorum vim in munitiones emitti iubet. Dum simulato prælio Malacenses Laqueximenam egregie cohibent, & in eum vnum locum ex omni vrbis parte concursus fit; interea Mascarenias cum suis, castelli portas & claustra perfregerat. Inde prælio in urbem illato, cum cædes multis iam locis fieret; trepidi ad Regem conuolant ciues: hostem intra mœnia grassari cum fletu renuntiant. ille, inania videlicet ex inconsulto metu ratus afferri; pauidos ac tumultuantes cum iurgiis increpat. Neque fuit fides, donec ipsa lux vniuersam aperuit cladem. Tum vero Alodinus, consenso propere elephanto, fugam arripuit; & mox insequentem à tergo hostem extimescens (namque Lusitani, omissa in præsens præda, vnum tyrannum petebant) ad pedes, ne dignosceretur, degressus, densas primum petiit sylvas: dein, parum tutam ratus insulam, occultis itineribus ad mare se contulit, atque ad Vgentanam contrinentis oræ transmissit. ibi, diuturna ægritudine & morbo, vti Mamudius olim pater, absumptus est. Lusitani interea, dimissis per omnes insulæ partes, qui tyranno indagando, & comitibus ipsius excipiendis insisterent; Bntanum oppidum, cæso aut dilapso præsidio, diripuerant iure belli; neque contemnendam, cum è reliquis tectis, tum verò è regis ædibus prædam exhauferant. tormenta insuper, & quidem ænea pleraque, reuecta omnino trecenta, quorum non pauca Lusitanis Alodinus ademerat. Propugnaculis dein ac munitionibus ignes iniectione, triduoque omnia prorsus absumpta. Sub hæc, pulsus quondam ab Alodino dynasta Mascareniam victorem adiit supplex: ac tyranni questus iniurias; non modo pacem impetrauit; sed etiam in solium restitutus est legibus ijs, vt Ioanni Regi annum persolueret vectigal; arcemque aut propugnacula, non nisi ex auctoritate Lusitani Prætoris exstrueret. Per eosdem fere dies,



## *Historiarum Indicarum*

haud contemnendæ rei spes, cæterum inani successu, Lusitanis affulsit. Sunda est oppidum Iauæ maioris, ad Borealem plagam, Somatranis littoribus obiacens. id oppidum, præter maritimas opportunitates, agro est etiam cum aliarum frugum feraci; tum vero egregij piperis. ei tum oppido Mahometanus dynasta imperabat: is, finitimo bello cum valde premere-tur; coactus inops ad potentiores confugere, oratores opis implorandæ ad Mascareniam destinarat: ac simul idoneum Lusitanis apud se locum & exercendo mercimonio, & arci ædificandæ promiserat. Mascarenias, legatis comiter acce-ptis & confirmatis, peracto demum Bintanensi bello, Fran-ciscum Salam cum aliquot nauibus, &, præter aliam turbam, Lusitanis trecentis misit, nimis lentum perditis iam rebus au-xilium. quippe hostes interea Sundam expugnant, locumq; operibus nouis, & valida militum custodia sepherant. At Lu-sitanos à Bintano profectos, in conspectu pæne Sundæ atrox tempesta oborta disperfit. Lembo etiam vno ad terram alli-so, circumuenti à barbaris & cæsi triginta, nequicquam inspe-ctante ac miserante procul Eduardo Coelio trierarcho. inde, hostilia esse omnia patuit. Et Sala, collectis in alto nauibus, cum ad Sundanum littus tardem appulisset; vi armisq; descen-sione prohibitus, Malacam re infecta redire coactus est. Cæ-terum capti Bintani fama, in primis læta cum vniuerso nomi-ni Lusitano ac sociis accidit; tum iis præsertim, qui Malacen-sem oram incolebant. magno quippe eorum derrimento, Bin-tanij prædones, non mare solum infestum, sed omnes circa agros iam diu fecerant. Et Mascarenias, insignis gloria mili-tari, Malacam reuectus, maturo iam ad eam nauigationem Oceano, citeriorem Indiam petere intendit; ignarus quid, post priorem successione, è regiis litteris accidisset; ac mi-nime dubius, quin aduenienti sibi, Vasæus, vti receperat, il-luco prouinciam traditurus esset. Ergo, Malacensi re consti-tuta, & iuncto vel renouato cum vicinis Regibus fœdere, Ma-scarenias à Chersoneso cum aliquot rostratis maioribus profe-ctus, præter Gangeticum sinum, Cori promontorium supe-rat; flexoq; in Septentriones cursu, Colanum applicat primum. ibi à Lusitanis negotiatoribus Prætor honorifice salutatus, acta Mexiæ, & occupatam à Vasæo prouinciam graui cum do-lore



lore cognoscit. Neque tamen iccirco despondet animum. Experiundi causa Cocinum prouectus, quatum in vrbe Mexias agebat, cum egressum ē naui, & introitum in urbem pernicacius tentasset; concitante populum Mexia; vi & armis ad naues, haud sine damno vulneribusq;, repellitur. Perculit grauiterea res insolentem iniuriæ virum. nec deerant suasores, qui ad contrahendas vndique copias, & vlciscendam iniuriam accendere niterentur. At ille, de communi salute sollicitus, ac memor moderationis eius quam Alphonsus olim Albuquercius in re simili præstitisset; irracundiæ temperare, & iure potius quam ferro cum inimicis disceptare constituit. Ac primum reposcenri Regis nomine classem cum nauali instrumento Mexiæ tradit: vno dromone contentus: inde ad Cananoris arcem delatus, cum à Simone Menesio præfecto non nisi priuatus admitteretur; omni non modo vi, sed etiam minis ac verborum atrocitate sapienter abstinuit: ipso quinetiam dromone sociisq; relicto, cum cature vnico, amicis duobus, totidem pueris, Goam ad Vasaï colloquium recta contendit. Vixdum eo perlatum erat, aduentare Mascareniam, cum ab amicis & necessariis ipsius, magna & inter ipsos & cum aliis gratulatio facta: facileq; apparebat, simulatque præsentis Mascarenia copia foret, consensu maximæ ciuium partis, coactum iri Vasaum vel magistratu sese abdicare, vel certe rem totam bonorum cognitioni arbitrioque permittere. Id ipsum veritus Vasaus, Antonium Sylueriam, & Simonem Mellum propinquos suos, cum magno numero nauium ad custodiendas fauces Goani portus celeriter mittit: iubetq; , appropinquanti Mascarenia denuntiare, in Cananoris arcem ex templo se se recipiat; ibiq; se ad Vasaï nutum in libera custodia fore cum iureiurando promittat: atque inde Goam sua postulata litteris consignata transmittat: id si voluntate abnuat facere; constrictum vinculis Cananorem asportent. Nil recusatum à Vasaï cognatis. Perinde ac si hosti occurrendum foret, ita quam maximis coactis copiis, maritimos aditus occupant. vbi Mascareniam adesse nuntiatum à speculatoribus est; præmissi confestim qui missilibus vela submittere cogerent: dein Vasaï exposita mandata cum minis. Et Mascarenias quidem, quominus antennas honoris causa dmitteret, non

T 4      recusauit:



## *Historiarum Indicarum*

recusavit : ut vero Cananorem se rediturum , atque ibi in custodia sponderet futurum , adduci non potuit . Vnum illud enixe petebat , ut inermi sibi urbem intrare , & cum Vaseo coram disceptare permitterent . Hec identidem exoptulanti , Regisque imploranti fidem clarissimo viro , per summam indignitatem iniecti compedes : atque ad Cananoris arcem asportatus , Simoni Menesio prefecto adseruandus cum iureiurando committitur . duo item comites Mascarenia , ab eius complexu Goam abstracti , & pariter in vincula catenasque coniecti . Hisce actionibus , quod magnam partem ciuitatis admodum offenderent ; Vaseus publice salutis & otij causam pretebat ; videlicet , ne per Mascarenia introitum , ab rerum novarum cupidis & factiosis hominibus , tam alieno tempore tumultus excitaretur . Sed frequentes hominum catus & voces cohiberi nequibant commemorantium Mascarenia cum egregia merita virtutesque ; tum vero causa bonitatemque fretus , nihil nisi ius posceret : cum Vaseus interea , nimirum ex conscientia sibi diffidens , grassaretur armis , omnique ope iudicium subterfugeret . Eiusmodi sermonibus ( neque enim erant obscuri ) permotus Vaseus , insignes aliquotè Mascarenia fautoribus in carcerem trudit . Nihil tam aut infirmum , aut fallax , quam humana consilia . Quod vnicum remedium opprimendae seditioni putarat fore , hoc ipso vel maximum excitauit incendium . Namque ut eius rei fama peruenit Indiam ( adeo lenibus medicamentis gaudent homines ; tristitia , & acrimonia , & aspera detestantur ) extemplo alienati à Vaseo multorum animi : & Mascarenias occasione capta , per litteras & coram deplorando calamitatem suam , memorando aequitatem postulatorum , querendo iniuriam , & vim , & fauoriam inimici ; non Simonem modo custodem ; sed alios quoque complures in causam traxit . Ita , paucis diebus , non sine extremo discrimine rerum , duas in partes Lusitanum nomen omne discesserat ; ultimamque dimicationem dubio procul adesse apparebat . Hic è spectantibus , amici sociique ; miserari gentis vicem , quod in tanta paucitate , quas vires ad imperium vel tuendum , vel proferendum conferre oporteret ; eas per intestina dissidia in suam ipsi cladem perniciemque conuerterent . iniqui vero atque inuidi , ridere amentiam , quod remotissi-



remotissimis in regionibus, cum tot undique pericula circumstarent, adeo certamen prauum imbibissent animis, ut neque patrij soli ricordatione (quæ populares homines peregre deprehensos, admirabili quadam suauitate coniungit) neque communi metu, quod firmissimum amicitiae vinculum est, ab letali pernicacia flecti ad æquitatem & concordiam vlllo modo possent. Hostes verò, tam præclaræ occasione delendi funditus Lusitani sanguinis, haud quaquam indormiebant. Inter alios Calecutanus, tum veteribus odiis, tum recenti incitatus damno; nouam classem habebat paratam, ut vbi sese vnus corporis duæ acies ciuili bello attriuisent; ad reliquias ipse conficiendas accurreret. Neque fefellissent hominem cogitata; nisi propitiatus piorum prece Deus, Vasæi mentem ad saniora consilia reuocasset. Quippe cognito præter cæteros, Simonem quoque Menesium, & Sosam Ciauli præfectum, se se ad Mascareniam aggregasse; tandem extimuit; secumq; agi de iudicio est passus. prima conditio disceptationis fuit, ut ad causam vsque cognitam, vterque pro priuato se gereret. dein, commeantibus vltro citroq; intetnuntiis (namque ipsi congressum inter se, ne mutuo conspectu recrudescerent iræ, consulto vitabant) arbitri electi tredecim. qua item in re Mascarenias haud parum de suo iure decessit. siquidem cunctos è Cocinenfi colonia creari est passus, quam sibi vel in primis aduersariam senserat. eo confesso, neminem fefellit quorsum euasura esset res. arbitri, tum conscij sibi quid de Mascarenia meriti essent, tum etiam Mexiæ priuatis de causis obnoxij, intra paucos dies adiudicata Vasæo Prætura, Mascareniam primo quoque tempore in Lusitaniam redire iusserunt. Insigni infamia id iudicium fuit; neque ex altera factione moderatius pæne quisquam eam rem tulisse fertur, quam ipse cui facta erat iniuria. Sed non diuturna Vasæo letitia mansit. Namque Ioannes Rex, coram audito Mascarenia, Cocinensium acta rescidit; liteq; insuper æstimata, Vasæum Mascarenia aureorum millibus fere viginti damnauit, quantum ex honorario Præturæ per biennium ceperat. Simul, ne quid in posterum simili de re controuersia oriretur; ab Rege decretum; ut in codicillis, vbi res postularet, aperiendis; cuius nomen exisset, hunc, si per id tempus vltra Cori promontorium,

vel



## *Historiarum Indicarum*

vel cis Dium ( qui vltioris Indiæ ferme sunt limites ) vel publica , vel priuata rei causa abesse contingeret ; eius , in eiusmodi successione , ratio nulla haberetur . Hunc exitum habuit lis , quæ Lusitanam rem in extremum pæne discrimen adduxerat . Interea Vasaus , vir , si commune malum , imperij cupiditatem demas , haudquaquam improbandus , amoto æmulo , ad componendas res , armandamq ; aduersus imminetia bella prouinciam , intendit curas . ac primum , omnibus qui Mascareniam secuti erant , veniam & obliuionem præteritorum indulgit . Dein Antonium Mirandam cum sex rostratis maioribus , vna longa naui , & biremibus aliquot , & armatorum mille præsidio , ad Erythræa ostia ; Simonem Mellum cum modica manu ad Maldiuas insulas ; Ioannem Dezam cum vna triremi , lembis sexdecim , ad Malabaricam oram obtinendam ; & alios , prout exigebat res , in alia loca dimisit . Dum apud Indos , quas dixi turbæ sedantur ; ad Molucas interim , haud minus atrox ac detestanda incidit res . In eius emporij præfectura Garzias Henricus Antonio Britto successerat . Is , & belli tædio fessus , & paucitate suorum adductus ; Tidorensi regulo expetenti pacem dederat in has leges ; vt intra sex menses , tormenta , & alias res omnes per bellum Lusitanis ablatas , necnon fugitiua mancipia redderet . Lætus optata pace Tidorensis , id laborabat vnum , quomodo perpetuam eandem ac stabilem faceret . In hac deliberatione versanti , optimum visum est , Calicem Aroezium Ternatensem , cuius supra meminimus , quam arctissimo necessitudinis vinculo sibi coniungere ; quod is cum apud populares opibus , tum apud Lusitanos gratia & auctoritate plurimum valeret . Ergo per fideles interuentos , cum egregiæ cuiusdam voluntatis testificatione , Aroezio filiam in matrimonium offert . Id Garzias interpretatus ad labefactandam ipsius potentiam haud dubie pertinere ; omni conatu dirimere atque impedire nouam affinitatem instituit . Ad eam rem aptius occurrit nihil , quam arrepta qualibet occasione recentia fœdera soluere ; & eodem Aroezio adiutore , quem natura leuissimum , & quietis inimicum nosset ; Tidorensibus arma quamprimum inferre . Cum hæc sententia placuisset ; extemplo per legatos ab Almanfore ex conditionibus efflagitare institit cum cæteras res , tum vero tormenta ;



mēta; quippe quorum partem ex insula abesse, atque haud  
 ita facile restitui posse intelligeret. Ad hæc regulus benigne  
 respondit; necdum exiisse diem in fœdere præstitutum; & sibi  
 nihil maiori esse curæ, quam ut omnia sua Lusitani recipiant.  
 Et cæteris quidem in rebus, non magnam fore cunctationem.  
 tormenta se aliquot Bactiano regulo commodasse: ad ea exi-  
 genda reuehendaque spatio esse opus. veruntamen daturum  
 se operam, ut ad conditum tempus Ternate cuncta sistantur.  
 interim se, præter cætera incommoda, morbo etiam implici-  
 tum teneri. petere ab Garzia, & rogare pro reconciliata gra-  
 tia, moram eam boni consulit, ac simul, ut medicum aliquem  
 ad se mittere ne grauetur. At ille, minime patrijs artibus, cum  
 se excusationem accipere simulasset; medicamentarium ne-  
 scioquem è suo comitatu summisit. is, è condito videlicet,  
 nihil minus metuenti egroto venenum pro pharmaco miscuit:  
 ex quo, paucis diebus, per speciem ægrotationis fraude utcun-  
 que celata, decesit. Defuncto regulo, magnus in vrbe luctus  
 fuit, magna perturbatio rerum omnium. Eo acrius Garzias  
 moerentibus ac percussis instare; & nisi tormenta extemplo re-  
 stituant, denuntiare bellum. Ad ea Tidorenses coacto ægre  
 concilio respondent: orbam ciuitatem in summa tristitia &  
 moerore versari: Almanforis insepultum adhuc iacere corpus:  
 id ubi terræ mandarint, ac iuxta suo Regi persolverint; nihil  
 habituros antiquius, quam ut Lusitanis omni ratione satisfiat.  
 Hæc demisse ac suppliciter agebant ciues: & status erat rerum,  
 qui vel ferrea pectora lenire ad clementiam posset. At vero  
 Garzias, vno tantum interposito die, nauibus ad Tidorem ac-  
 cedit, paratas ad cædem & rapinam copias confestim exponit.  
 oppressi oppidani extemplo diffugiunt. Ille disertam inuadit  
 urbem; contra omne fas diripit, direptam incendit. Nihil  
 eo facto grauius ad vicinorum aures accidere potuit. Ex eo  
 tempore cum à cæteris littoribus, tum à Bactiano præsertim,  
 Lusitani minis armisque procul haberi cœpti. Sub idem tem-  
 pus, ab Hispali naues quinque ad Molucas intenderant iter,  
 ducibus ijs, qui Magalianis è comitatu supererant. Eæ, non-  
 dum probe explorato cursu, varijs casibus dissipatæ sunt. opta-  
 tos portus vna tantummodo oneraria tenuit. Martinus Igna-  
 tius Carquicianus præerat, homo Cantaber, cum propugna-  
 toribus



## *Historiarum Indicarum*

toribus ferme trecentis. Is cognita Tidorensium clade, destitutam insulam summa accolarum voluntate occupauit, ac munijt. Inde inter Ignatium & Garziam, cum contestationibus minisque nuntij comineare. Molucense emporium ambo sibi iure finium assererebant, & alterum vterque excedere ex ijs locis, ac nihil eius negotiationis iubeat attingere. Ex hoc, iurgijs primum, tum etiam prælio leui certatum est. Postremo induciæ factæ, quoad ea de controuersia suum vterque consuleret Regem. Vixdum externi quieuerant motus, cum inter ipsos Lusitanos terra visu, fœda relatu exorta dissidia. Georgius Menesius, successor Garziæ, Ternatem aduectus; inter cætera illud habebat ab Indiæ Pratore mandatum, vt Garziam in reditu per Borneum insulam cursum tenere, iterque illud explorare iuberet; quod multo compendiosius Molucas à Malaca petentibus esse diceretur. At Garzias, qui ad Bandam insulam (qua vetus erat nauigatio) vna cum alijs instituta mercimonia dudum haberet; percussus necopinato Georgij præcepto; varias excusationes asserre, tergiuersari, denique omnia malle, quam negotia priuata relinquere. Et Georgius, ne contra virum pertinacem cum suæ dignitatis iactura diutius tenderet; Garziæ loco Vascum Laurentium, virum egregie fortem, ac fidelem, cum vna caracora, quod nauigij Molucensis est genus, ad ea compendia perquirenda proficisci iussit. Hoc inter Garziam & Menesium simultatis initium exstitit. Per eosdem dies, Ioannis Regis nomine edictum est, quoniam in stipendia militum, & arcis munitionem magni sumptus fierent; ne cui omnino, præter apothecæ regiæ curatores, aut coemendi ab incolis caryophylli, aut externis venundandi esset ius. Inter ipsos autem curatores, & magistratus vrbis, conuenerat pretium, quo ne pluri vel optimæ fruges Regi constarent. Id monopolium ægre admodum passi Lusitani, quippe qui mercaturæ impensius multo, quam militiæ insisterent. Ergo, per summam impudentiam contemptis edictis, vnusquisque venditores ad se priuatim allicere; vberiore offerre mercedem; nullam regij quæstus, aut publicæ vtilitatis rationem ducere. Aduersus ea Menesius, monitis, precibus, minis aliquandiu niti: sed posteaquam se frustra conari, & cupiditatem imperio potentior animaduertit; suo periculo



periculo sapiens esse diutius noluit: remissa paulatim seueritate, cæterorum exemplo suam ipse quoque rem agere aggressus est. Inter hæc, Martinus Ignatius Castellanorum dux è vita migravit. in eius locum suffragio militari successus Ferriandus Turrianus indignari cœpit, suæ cohorti leges dictas à Lusitano; virosque fortissimos, emenso per tot pericula tanto pelagi spatio, in aliena terra sedere otiosos. Cum eadem alij fremerent, & aperte vociferarentur, vi atque armis hostem inde pellendum; Turrianus de communi sententia rupit inducias; extructaque & ornata biremi, hostiliter insectari Lusitanos instituit. Contra hoc malum Menesius uti pari magnitudine actuarium sine mora pararet, cum aliunde, tum ex inchoato Garziæ (necdum enim ex ea regione discesserat) iunco, fabros pro imperio accersit. Id Garzias non necessitate, sed odio ac malevolentia factum ratus; extemplo ad amicos refert. in iis erat mystra quidam, consors eiusdem negotiationis (adeo sacratas quoque mentes amor pecuniæ de recto sensu detorquet) cui, modo ne sordidum lucellum amitteret, nihil erat pensi quid faceret diceretve: Huius maxime instinctu Garzias, indignum facinus clamitans, profectionem suam sine causa impediri; naualia, ubi tum præfectus agebat, petit infensus: abductas operas reposcit; iniuriam acerbe ac vehementer expostulat. Menesius contra; & iure factum tueri, & ipsas temporum difficultates obtendere. Eam excusationem cum alter haud quam acciperet; magis magisque accensi ambo: & inter altercationem prouectus intemperantia linguæ Menesius Garziam insanum appellat. Ad eam vero vocem Garzias adeo exarsit; ut stricto gladij capulo audacius quam priuatum hominem decet, præfecto cum maledictis intenderet minas. Concurso dein hominum facto, sedata rixa. tum verò Garziæ sectatores laudare constantiam viri; suadere ut in incepto persistat: suorum laterum, si periculum immineat, oppositus polliceri. Contra Menesiani, Garziæ facinus & impudentiam exaggerare verbis; pessimi exempli rem nulla mora interposita vindicandam; & seditiosi vnus capite fangiendum imperium dicere. Hisce rationibus adductus Menesius, misso viatore Garziam citat. quo ille spreto cum insuper vim pararet; iusto



## *Historiarum Indicarum*

iusto dolore commotus Menesius, tormenta ex arce ad ædes Garziæ diruendas obuerti iubet. Minuit nonnihil ea res ferociam viri. & abiectis in præsentia pugnæ consiliis (sic tamen vt in voce vultuque contumaciam cerneret) contemptim obit vadimonium, atque inde semet in custodiam dat. Hic amici & fautores Garziæ, licet factum egerrime ferrent; tamen quiescere aliquandiu, rati fore, vt ea satisfactione lenitus Menesius iras poneret; solutoque Garziæ tandem aliquando cum suis proficiscendi faceret potestatem. Sed longe eos fallebat opinio. Vim sibi pròpmodum illatam, & imminutam in sua persona maiestatem regiam fremens præfectus, aperte iactabat, sibi certum esse, primo quoque tempore victum Garziam ad Prætorem Indiæ mittere. Ab ea sententia cum à familiaribus deduci non posset: deprecator adhibitus Aroezius ipse, ex quo vel maxime tum Lusitani pendebant, nihil omnino impetrauit. Tum Garziani, præcipites iracundia, conspiratione facta, consilium capiunt amentia plenum; vt hostes ultro ad urbem aduocent, ijsque vtantur adiutoribus ad opem victo ferendam. Eo terrore perculsus Menesius, ne per domesticas dissensiones portam externo aperiret hosti; occupat eam ipsam rem sui beneficii facere. Garziam per communes amicos leni castigatione mōitum ne pertinaciam adderet culpæ; hortatur vt condonatis Regi optimo inimicitiis, bona fide secum in gratiam redeat: quo in summa rerum difficultate, communianimo viribusque rempub. à Castellano defendant. Haud incassum hortatio adhibita. Victus necopinata clementia & comitate Garzias agit gratias præfecto: siquid vel aliorum impulsu, vel animi perturbatione deliquerit, ignosci postulat sibi: & in posterum non Regis modo, sed etiam ipsius Menesij causa in eius potestate sese futurum esse confirmat. Iunctæ dein dextræ, & demptis compedibus extemplo Garzias in pristinum splendorem est restitutus. Lata ea res coniuratis accidit: atque ob id ipsum à prodicionis incepto nefario destiterunt. Pungere mox capit eosdem arctior in dies Garziæ cum præfecto concordia: nam vt ad Garziam tegendum adiuvandumque, vbi discrimen ingrueret, parati erant omnes; ita familiarem eius cum Menesio consuetudinem oderant, & consensum in bello ceterisque rebus administrandis;



dis: quippe quibus, militiæ deferendæ, atque ad suas cuique  
nūndinas abeundi spes erat vna, turbidæ res, & obstinata du-  
cis vtriusque dissensio. Ergo communicatis iterum consilijs,  
reconciliatam nuper amicitiam denuo labefactare & conuel-  
lere omni ratione conantur. Varias primum causas offensio-  
num serere aggressi; & ad alterum alterius confictas vel que-  
rimonias, vel maledicta deferre. Vbi artibus hisce parum  
proficiunt, ad nouum scelus adiiciunt animum. Aethiops erat  
quidam, præualens viribus, è Menesij domo. hunc ingentibus  
promissis adducunt, vti se ab hero ad Garziæ cædem sollicita-  
tum esse mentiatur: ipsi dein rem per arcanos fufurros quasi  
mysterium tradentes alij alijs, ad Garziam denique detulére.  
Qua ille criminatione tametsi commotus est; tamen adduci  
nequibat, vt inter mutua quotidiani conuietus officia, tam  
recenti præsertim ac tam illustri gratiæ reconciliatione, tan-  
tum nefas a Menesio conceptum existimaret. Ast, vbi testis  
idem & index mandati maleficij accessit Aethiops; enimue-  
ro, quasi certa iam re, Garzias & vultu & animo penitus cri-  
men accepit. ac ratus in eo rem verti, vter facinus antecape-  
ret; primo coacta manu interficere Menesium cogitabat: dein  
veritus ne cædis eius inuidiam sustinere non posset; compre-  
hendere hominem, & vicissim in carcerem condere statuit;  
hortantibus idipsum amicis; & asseuerantibus haudquaquam  
defutura postmodum crimina ac testes, quibus premi reus, ac  
detineri, atque ad extremum obrui posset: interea Garziæ,  
pro ipsius auctoritate; compositis ad arbitrium rebus, quæ  
primum nauigandi facultas daretur, ex residua copia non de-  
futurum quem ad nouum vsque Regis decretum arcis præpo-  
neret. Hisce ita constitutis, in omnem occasionem rei bene  
gerendæ cuncti excubabant. Ac demum Garzias nactus op-  
portunitatem, quod Menesius partem suorum ad Maquienum  
insulam cum Aroeio miserat, vt Castellatum ab eo cõmmer-  
cio prohiberent; alios insuper ipse ad conuiuium in diem cer-  
tum inuitandos curauit à Francisco Castrio quodam ex suis in-  
timis, ad Tolocum, qui vicus à ternate distat ferme quatuor  
millia passuum. Vbi ea dies aduenit; circa pomeridianas ho-  
ras, quod remissionis & otij ferme tempus est; satis comperta  
custodum infrequentia, certos è suorum numero in arcem  
præmittit;



## *Historiarum Indicarum*

præmittit; qui præfectum lusu facetiisque detineant. dein cum audacissimis aliquot ipse paruo intervallo subsequitur. Nulla in introitu difficultas fuit, quippe, assueto quotidie admitti; & tum desertis plane stationibus, & ex patente ianua clauibus incredibili socordia & securitate suspensis. Eas coniurati detractas immittunt seræ; foresque silenter occludunt. Inde ad penetralia familiariter intromissi, accepta & reddita salutatione confidunt. Neque ita multo post Garzias Menesium alexæ intentum repente medium corripit: reliqui, pars duobus, qui forte ibi aderant, præfecti administris, ne vociferando tumultum excirent, ora manibus obstruunt; pars hærentem in tergo Menesij Garziam adiuvant. Erat Menesius insigni corporis firmitate, ac tum vires addebat dolor. itaque per summam indignationem exclamanti; lacertisque, & morfu, & calcibus diu multumque eluctanti, ægerrime tandem vincula iniecta; & quo tutius adseruaretur, detractus in imam arcis turrem includitur. Garzias denuo præfecturam vsurpat. Cæterum neque eius rei sat probabilem in vulgus causam afferre poterat: & reputans apud se atrocitatem facinoris, iudicia nimirum, & offensionem Regis extimescebat. Augebat sollicitudinem, quod Menesiani ad Maquienum, cognita præfecti iniuria, frēmere, atque ad eam vindicandam propediem affuturi nuntiabantur. His anxius curis Garzias, haud inepto consilio venundandum ratus quod mox amissurus erat, Menesium alloquitur: iacentique & afflicto quas vult condiciones imponit; in ijs, vt sibi ad profectiōem (quando iuncus nondum esset absolutus) Petri Botellij nauem attribuat; liceatque sibi quos velit à Molucis abducere. Ita Menesius è carcere missus, cum libertate gubernaculū recipit. Concio dein ab eodem vocatur. In ea concione questus Garziæ perfidiam & latrocinium; condiciones omnes quippe coacto expressas, rescidit: Garziam etiam ipsum comprehendere, & eius bona publicare cupit. Verum ille tormentis in arce confixis, ne in abeuntem exerceri possent, arreptaque naui, iam vela fecerat. Absentem ergo Menesius (quod reliquum erat vnum) perduellionis crimine condemnauit; totamque causam testato descriptam, ad Prætorem vrbs Malacæ transmisit; ac simul, fessis rebus auxilium ab eodem expetijt. Dum ad Molucas in tam varijs ac  
peruersis



peruerſis hominum voluntatibus, alterno tanquam acceſſu re-  
ceſſuque æſtuant negotia Luſitana; interim ab alijs in alia re-  
gione præfectis multo commodius acta res eſt. Ad Longum op *ſ*.  
pidum non longe à Malaca, Mahometani incolæ paucos pri-  
mo Luſitanos, dein miſſum à Malacæ præfecto ad eam rem co-  
gnoſcendam Aluarum Brittum, triremi quam ducebat, extu-  
tum, vnà cum ſocijs occiderant. Ad eas vlciſcendas iniurias de-  
nique proſectus Martinus Cortea, triremem recepit; ac magna  
cum hoſtium cæde captum oppidum concremauit. Et Ioannes  
Deza, præpoſitus oræ Malabaricæ, ſecunda aliquot prælia fe-  
cit. Zambucis aut paronibus quadraginta octo cum magna Ma-  
hometanorum cæde potitus eſt. Idem, aliquot locis deſcenſio-  
ne facta, prædas abegit: vicos & villas exuſit. atque exeunte  
demum æſtate Chinacutiales Calecutanæ claſſis præfectus, quæ  
ſexaginta paronibus, & magna armatorum copia conſtabat, ab  
eodem Deza memorabili pugna victus, cum ſeſe in mare ieciſ-  
ſet; inter enatandum è fuga retractus, haud parua dein merce-  
de in libertatem eſt reſtitutus. Eadem æſtate præter ſpem fuit  
otium ab Turca. Et Antonius Miranda cuſtos Arabici maris, *ſ*  
claſſe in ſtationes idoneas trifariam diſtributa; alias atq; alias  
Mahometanorum naues cum oneribus pretioſis excepit; Ar-  
muziamque proſectus, prædam in eo emporio vendidit. ex ea-  
dem claſſe Mirandæ, ſcapha vnà Ciaulum petens, in manus la-  
tronum Dienſium incidit. Luſitani ſeptendecim ea ſcapha ve-  
hebantur. Comprehenſi omnes, gratum in primis donum Cam-  
baiano Regi ſiſtuntur. Ille Didacum Meſquitam ex eo nume-  
ro, apprime generoſum ac ſtrenuum, à Chriſto ad Mahometē  
allicere blanda oratione conatus eſt. Id verò Didacus cum for-  
titer ac præciſe negaret; quinetiam vltro in pſeudoprophetam  
probra & maledicta ingereret; horrible dictu, in os hiantis  
bombardæ totus inferitur, cum grauibus minis, ni extemplo  
pareat, ignis ab tergo applicandi. Cum ne hoc quidem terro-  
re de fide conſtantiaque decederet; varijs tormentis excrucia-  
tus, in aſperum denique ergaſtulum vnà cum cætero comitatu  
coniectus eſt. Circa idem tempus ab Cocino proſecta claſſis  
nauium ad quattuordecim, repentina procella, circa oſtium  
Catuxæ fluminis oræ Malabaricæ, ad terram alliditur. Laceris  
nauibus Luſitani cum egre in littus euafiſſent; à barbaris aut  
V capti,



## *Historiarum Indicarum*

§. capti, aut hostiliter trucidati sunt. Eo successu inflatus Zamorinus, ad pellendum maris possessione Lusitanum, nouam classem ornauit nauium varij generis centum & triginta. hisce prepositus Cutiales, vir & militiæ peritus, & magna insuper sanctitatis existimatione, quod paulo ante à Meca redierat. is intra portum Termapatatum copias continebat; vt in prætereuntem cum exigua manu Simonem Mellum, è ducibus Lusitanis vnum, ex occulto impetum faceret. Ea re cognita Valsæus Prætor, quam intentissima cura intra sextum diem rostratas maiores sex; lembos tredecim instruxit. Et Antonio Miranda, qui ex Arabia venerat, ad custodiam insulæ Goë relicto; ad Termapatatum ducit infestus. Tum Cutiales, pro certo putans adesse Mellum, è portu raptim egreditur. Concursum acriter initio est: procedente dein pugna, Calecutanis (vt sæpe aliàs) mira diuinitus incussa formido. tanto superiores numero nauium militumque, nulla parte certaminis pares Lusitano fuere. Interfecti aut capti duo circiter millia; parones trigintaquinque abducti, aut depressi: tormenta relata quinquaginta circiter. è Lusitanis, diuina scilicet protegente clementia, plane desideratus est nemo. Inde magno suæ genti decore parto (in conspectu enim Cananoris vrbis hæc gerebantur, omni ad spectaculum effusa multitudine) Prætor ad populandum Malabaricum littus victrici classe contendit. multis ibi nauigijs repentino aduentu subditæ faces; palmeta succisa; mortales varijs locis aut cæsi, aut aucti. Sed in Catuam præcipue vicum, impositum eiusdem nominis flumini, ab ira male acceptæ nuper naufragæ turbæ, sæuitum est. ferro flammisque cuncta deleta. Ab ea strage, clasfis ad Porcam eiusdem oræ procescit. Locus erat opportunus, & æstuarij à mari præclare munitus. Et dynasta, qui patrio nomine Arel vocatur; prædatoriis nauibus haud exiguas opes eo congefferat. Huius avaritia simul & inconstantia, quod ab Lusitanis paulo ante ad Zamorinum defecisset, Prætor incensus; exposito militi predam edixit. Ea vero mercede proposita, nullæ paludes, nullæ voragines militari cupiditati obstituerunt. per vias & inuia cuncti enituntur. Et quod per eos forte dies Arel cum iuuentute in expeditionem abierat, sine vlllo certamine, quod vix optare essent ausi, potiuntur oppido, atque ad prædam securi discunt.



runt. In ædes Arêlis præcipue impetus est factus. magna inde signati vis auri, & argenti, gemmarumque, & pretiosæ ac peregrinæ vestis exhausta. ac prænobiles fœminæ duæ, Arêlis vxor, & soror, monilibus & margaritis regium in morem excultæ, detractis ornamentis, in seruitutem abreptæ; quibus Arel postmodum ingenti summa redemptis, ad Lusitanorum societatem & amicitiam precario rediit. Ab ea populatione nauibus Goam reductis; à Francisco Pereria Ciauli præfecto nuntij trepidi cum litteris affuere; Dientem classem bene magnam in eo tractu vagari: Ciaulanam arcem perexiguo teneri præsidio: ni propere subuentum sit, ingens ab hoste periculum imminere. Aduersus eum terrorem extemplo Prator naues variæ magnitudinis quinquaginta duas, & in iis duo millia bellatorum eduxit. Vbi Ciaulum est ventum; per exploratores cognoscit, hostem ad quattuor inde leucas abesse. biremes erant quatuor & sexaginta, milite, remige, tormentis instructæ. Mahometanus Hali præerat. Contra eas copias Prator, intentus vltimæ dimicationi, ab Ciaulo sub vesperam prodiit. Hectorem Sylueriam actuariis præpositum, oram quam proxime legere iubet: ipse cum maioribus nauibus altum tenuit, classe diuisa, quo minus hosti pateret effugium. Atque illo die, tenebris iam imminetibus, nihil est actum. pugna tantum in diem insequentem edicta. & quoniam præcipua in dextris erat spes, mandatum nauarchis, ne tormenta in hostem emitterent, priusquam è propinquo manus conferere se posse diffiderent. Præmium pronuntiatum, qui primus nauem hostilem inuaderet, aurei centum. Simul, quo magis propitium haberent Deum, peccata Lusitani per confessionem expiarunt. Vbi postera illuxit dies, ad Bombainum finem, applicita promntorio Mahometana classis apparuit, cognito iam Pratoris aduentu, ad certamen parata. Triplex erat agmen. primum & medium minores præfecti, postremum Hali ducebat. Inde mutuo conspectu irritatis animis, vti ad bombardę ictum est ventum; tormentis, quibus iam tum abundabant, Mahometani extemplo rem gerere. Lusitanus, quem admodum imperatum erat, supersedere iaculis; perq; volitantes globos ac fumi nebulas omni conatu ad hostem appropinquare. Inter hæc, ne barbaro, si de more fugam arriperet,



## *Historiarum Indicarum*

ab tergo receptus daretur; circumuecti silentio nauarchi octo; Maini fluminis ostium occupant. & ex altera parte commisso prelio, primus Antonij Fernandi lembus in hostilem biremem incitato remigio illatus, durioris materie repercussu longe resiliit. ex eo lembo vnus Franciscus Barrius Pauia in ipsam biremem transilierat primo statim incurfu: destitutus, cum telis vndique peteretur; tumultuosæ pugnae procellam, ad suorum vsque reditum, summa cum omnium admiratione sustinuit. Certatim dein transensum ab aliis est. ac Barrio seruato, dum instant perculsis, inter ipsam forte dimicationem sulphurei pulueris olla ex ipso carchesio decidit; conceptisque repente flammis, tabulatum omne à malo ad puppim cum superstantibus in mare proiecit. inde sine labore, semina ista biremi Lusitanus potitur. Neque minus acriter interim à Sylueria cæterisque conferta manu res geritur. Multi è barbaris, aut intra naues, aut in ipsis fluctibus cæsi. Ceteri vt inclinatham rem videre, passim in fugam effunduntur. neque multum in ea præsidij fuit. Maxima pars, intento ad Mainum amnem cursu, in stationem hostium incidunt. ita, ex vniuerso numero biremes in medio deprehensæ quadraginta sex, cum omnibus tormentis in potestatem venere; flammis absumptæ tres; quatuor à Maino exclusæ, cū Nagotanem oræ Ciaulanæ subiissent; ab accolis Indis oppressæ. Hali dux ipso pugnae initio, posteaquam collato pede certandum animaduertit; diffusus suorum virtuti, præceperat fugam; ac primo flectere promontorium institit; dein segni vento estuque reciprocante detentus, leuiore arrepto nauigio Tanaham, atque inde Bazainum oppidum petiit. fugientem biremes aliæ sex inter tumultum adeptæ. E Lusitana classe, iterato miraculo, non modo naus, sed ne vir quidem vllus amissus. Quod si cui forte incredibile videatur; Fernandum Lupium historicum interroget (nam alij auctores nondum exstant) quippe is non solum equalis eorum temporum fuit; sed etiam ad hæc ipsa commendant a Indiam sese consulto peragrasse testatur. Equidem, & ex aliis id genus euentis, quæ multa iam ante retulimus, facile adducor vt rem ita se habere concedam; & quæ in diuinam haud dubie potentiam referuntur; non est cur humanis laudibus afficta videri cuipiam debeant. Cæterum Diensibus audita



audita clades, missum pauore luctum ingentem fecit: constansque opinio est, si protinus ab Hali fuso, Prætor Diu processisset; primo aduentu capi oppidum potuisse. Neque in eam rem Vascō consilium aut animus defuit; sed partim successoris aduentantis fama retardatus; partim intercessione minorum ducum atque obsecratione deterritus; omissa re, naues cum ingenti præda Goam reduxit incolumes. & quando foris aliorum culpa non poterat; domi certe, Lusitanam rem omni conatu promouere perrexit. Atque è portorio & scriptura multis iam ante fraudibus ac rapinis, magno commean-  
tium bono sublatis, deinceps in administrationem rei n-  
ualis toto pectore incubuit; vt paratas haberet successor mari-  
timas copias, si, vt pro certo putabatur, ad expeditionem  
Diensem animum adiecisset. Ergo, adhibita diligentia, pau-  
cis mensibus classē ornauit, quantam rarò aliàs habuit Lusit-  
anus, nauium centum & triginta sex. in quibus erant rostra-  
tæ celsiores quatuordecim; triremes quas vocant regias, sex;  
celoces octo; dromones sex; biremes aut lembi, duo sopra  
centum. Inde ad ædificia & sarta tecta conuersus, in Armu-  
ziana arce nouum è regione portæ propugnaculum exstruxit;  
muros ac templum instaurauit. Ciauli, intimam turrem, vbi  
præcipua quæque adseruantur, maiorem in altitudinem extu-  
lit. portum, qua descensus in oppidum est, quadrato lapide  
muniit, & duo armamentaria faciendâ curauit. Gog partem  
mœnitium ad mare versam expleuit; & ædem vrbis maximam  
dudum inchoatam absoluit; & Franciscanum cœnobium nouo  
tegulo operuit. Cananore, puteum de quo inter obsidionem  
acriter dimicatum fuisse docuimus; perducta fossa, castelloq;  
ad labrum fossæ excitato, intra munimenta complexus est.  
necnon arcis mœnia labefacta refici; & præfecti domum &  
apothecam amplificari iussit. Itemque Cocini quæ pars ad  
mare vergit, armauit mœnibus turribusque, & aliâ non pauca  
peropportune ad eas munitiones adiunxit. ac demum, debi-  
tis militi trecentorum millium aureorum stipendiis cum fide  
& cum gratia persolutis; prouinciâ optime constitutam ex-  
plicatamque successori Nonnio Aunîæ tradidit. Is, anno  
priori, magnis nauibus vndecim, & Lusitanis epibatis ter mil-  
le Olisipone profectus, magna parte nauium infortuniis amiss-



## *Historiarum Indicarum*

sa, circa Melindem aduersis tempestatibus hymare coactus erat. asperum litus & importuosum habet Melinde. tutior longe ad Mombazam statio. Ea statione prohibitus ab tyranno (ad quem ob id ipsum oratores pramiserat) exposito milite se se ad oppugnationem parabat. Neque ausi certaminis aleam subire Mahometani; raptim defosso quod pretiosum erat, vna cum tyranno profugiunt. Lusitani sine sanguine oppidum ingressi, quod reliquum erat e suppellectili cibariisque, diripuerunt. atque exacta demum hyeme, ac refecto milite nauibusque, Nonnius Armuziam venit. Ibi, ex Ioannis auctoritate Rafus rector olim Zeisadini pueri; vir facinorosus ac subdolus, in vincula coniicitur. Ea re commotus Bardadinus Rafi cognatus, is qui Baharenum insulam beneficiario nomine obtinebat, ab Armuziano Rege desciiuit, probabilem causam nactus, quod Rafus intra aedes regias fuerat comprehensus. quæ res tamen si plane incio acciderat Rege; tamen id ipsius iniussu Lusitanos ausos persuadere sibi non poterat. Ergo iracundia in Torum accensus, intra arcem egregie munitam sese cum coniugibus, liberis, pecuniisque receperat: ac stipendium Armuziano palam abnuebat. Ad eum opprimendum missus ex fœdere Simon Acunia cum nauibus sex, & militibus haud plus trecentis; aduerso vento diu detentus, ad portum denique Bahareni defertur. Sub eius aduentum Bardadinus non tam præsentis classiculæ metu, quam ne in posterum aduersus se Lusitanica arma conciret; candidum vexillum petendæ pacis in muro statuit; ac simul per interpretem Acuniæ nuntiari iubet, se ab Armuziano iustis ac piis de causis dissidere: cum Lusitanis vero nullas exercere inimitias; quinimmo, quoniam ab Toro stent, paratum se in Ioannis Regis gratiam cum suis rebus abire, arcemque iis vacuam tradere. Haud aspernabatur conditionem Acunia: sed militum clamoribus, qui prædæ spe illecti, coercendum utique rebellem, & saltem pecunia mulctandum fremebant, ab salutari sententiâ abductus; vnam pacis rationem esse respondit; ut Bardadinus & cæteri cum singulis duntaxat vestimentis excederent. Tum ille candido vexillo apposuit rubrum: uti se æque ad bellum atque ad pacem (quando ita velent) animatum Lusitani sentirent. Erat Acunia, præter paucitatem



citatem copiarum, à bellico etiam instrumento flagitiose im-  
paratus. Ergo suorum conuitiis coactus exscendere, cum ad-  
mota bombardamuros quater instituisset, vix toto vertente  
mense tormentarius eum pulvis defecit. & Arabes, cum pro  
muris dimicando, & obstruendo obmoliendoque ubi quid  
perforatum aut dirutum erat, acriter obstitissent; tum verbis  
insuper Lusitanorum temeritatem, & conatus irritos elude-  
bant. Bardadinus quidem, adeo se metu omni vacuum præ-  
buit; ut Lusitanis perquam amico suaderet animo, integris  
rebus abirent: quippe & oppugnationem infeliciter experti;  
& si obsidione inclusos vrgeret persisterent, ab ipsa regionis  
& cæli intemperie; grauioribus etiam quam ipse vellet, pertina-  
ciæ pœnas daturi. Neque vana fuere prædicta. & loco graui, &  
caloribus maximis, cum arena vehementissimo Solis ardore  
estuaret: ad hæc, odore tetro, ingruere morbi in milites ceperunt.  
breuique; adeo grassata pestilentie vis; ut ex omni numero vix tri-  
ginta ad arma sustinenda sufficerent. Neque hæc Bardadinum  
fallebant: qui si uti occasione voluisset; stratos passim oppri-  
mere ac delere facili negotio potuit. Sed partim Ioannis de-  
merendi gratia, ab eruptione continuit suos; partim etiam ne  
Lusitanorum clades, propinqui sui Rasi capite lueretur. At Si-  
mon Acunia, in summa rerum desperatione, cum aliquādiu hæsif-  
set; ad extremū, omisso incepto proficisci constituit. Non lon-  
ge à mari posuerat castra. ac nihilominus tanta erat lues, ut  
cum baiuli & iumenta deessent; ægrotos, iniecta pedibus re-  
ste, veluti cadauera ad naues pertrahere valentiores pauci co-  
gerentur. ac Simon ipse, impositis admodum ægre tormen-  
tis, cum vela fecisset; ab dolore male gestæ rei paucis diebus  
extabuit. Circa idem tempus, Hector Sylueria, dum Cam-  
baianos agros circa Nagoranem flumen effusa vastat, ac vicos  
incendit; ab Regis præfecto qui cum sexcentis equitibus, &  
duobus millibus peditum propinqua oppida tuebatur; retro  
ad naues compulsus est. Cæterum nihil turpitudinis in rece-  
ptu fuit. Tenorem pugnae seruantes Lusitani, cum agmen Syl-  
ueria clauderet, ad littus peruenere. Vnius etiam (cuius im-  
merito intercidit nomen) in eo tumultu insigne facinus exi-  
stit. Is, parma hastaque extra ordinem pugnans, infestum con-  
spicatus equitem in se venientem; mansit intrepidus: tollens



## *Historiarum Indicarum*

tiq̃ue ad vulnus brachium, vltro ipse ferrum in axillam adēgit: ac fuso ex ephippijs hoste, victor equo potitus est. Nec mora. nouus repente eques ē peditē, cum alio item, haud ab-  
simili euentu, concurrit. per medium pectus, nequicquam obstante lorica transfixum, humi prācipitat. apprehensum habenis equum, ad Sylueriam prāter omnium ora sine vlla trepidatione perducit. Neque, ad incitamentum aliorum, tam strenuo bellatori prāmium defuit. Equestribus insignibus abduce, virtutis ergo, donatus, atque à Prātoribus Indiā prācipuo deinde in honore semper est habitus. Ab ea popu-  
latione Sylueria legens oram, ad Bazainum oppidum aduerso flumine subiit. is locus tria circiter millia passuum distat ab aperto mari; ac tum sine arce aut mōenibus erat vllis. tantum ad flumen, qua ē nauibus in terram exscensus est, lignea munimenta & aggerem cum propugnaculis tribus, tormentis sexaginta, barbari obiecerant. Prāsidebat ē prālio nauali nuper elapsus Hali cum tribus peditum millibus, & equitibus grauis armaturæ quingentis. atque ad eas tuendas munitiones parte copiarum relicta, cum reliquis ipse intra oppidum occulte confederat, vt si vallo superato Lusitani ad frequentia tectis loca prouherentur; in arcto deprehensos, vel etiam ad prādam palatos opprimeret. Sylueria, admotis ad littus nauibus, cum ex omnibus locis pugnam posceret miles; Canarinos ducentos ad primum hostium impetum frangendum prāmifit. subsequuti mox Lusitani cum ingenti ardore, obuijs in aduersa tormenta pectoribus, ad ipsas munitiones celeriter euasere. ibi atrox fuit prālium: dum saxi partim ac sagittis, partim etiam contis & gladijs barbari obstinate resistunt. Sed ad extremum vndique pulsi, ad tecta refugiunt; & Lusitanus vallo potitus cum tergis fugientium instaret, eodem impetu ad urbem defertur. Tum Hali dux cāteri q̃ue ex insidijs prāpropera festinatione consurgunt. neque Sylueriā in re subita defuit animus. dato repente signo, milites ex vrbe in campum eduxit. ibi densatis ordinibus, impauidi hostem excipiunt. Et Hali ratus fugere Lusitanum, cataphractus primum immisit: quā res barbaris fuit exitio. si quidem Lusitani fistulatores plumbeo nimbo in equitatum effuso (quo tum missili barbaria carebat, maiora tantum tormenta conflare didice-  
rant)



rant) equi & ad fistularum bombos pauore consternati, & vrentibus introrsum globis in rabiem acti, domitis frænis in suos auertuntur; atque in perturbata peditum acie tanto maiorem stragem dedere, quanto magis in orbem sine intermissione fistulas exercens ab tergo Lusitanus instabat. inde haud magno certamine cuncti fugam arripiunt: neque pugnam instaurare deinde quisquam est ausus. Tum Lusitani direpto oppido flammam iniciunt: ac deinceps omnem circa regionem ferro atque igne peruastant. eo metu, maris accolæ ad interiora compulsi: Tanahensis vero dynasta finitimus, annuo stipendio imposito in fidem acceptus. Per eosdem fere dies, intra hostium Ciales amnis oræ Malabaricæ, Calecutana ingens nauis latebat, opimis onusta mercibus, cursum ad Mecam expectans. hanc parones duodecim, triplici ordine, validis retinaculis inter se conferti, & crebris à fronte & vtroque latere tormentis instructi, pro muro atque aggere tuebantur. Ea re cognita Antonius Miranda, qui eam regionem classe obtinebat, adiuncto Christophoro Mello, qui cum vna triremi & sex lembis ab Goa nuper accesserat; duplici agmine ab vtraque parte fluij ad hostem subiit. Tormentis primum eminus vtrinque certatum. dein cum primo paronum ordine congressi cominus Lusitani, tanto ardore prælium iniere, vt non ferentes impetum barbari sese partim in mare præcipites darent; partim in secundum ordinem haud magno intervallo se se reciperent. Sed ne ibi quidem territis consistere licuit. Circumuenti extemplo omnes, vel incendio exusti, vel ferro cæsi, vel in seruitutem abducti sunt. è paronibus item arsere quatuor: reliqui simul cum oneraria mercibusque in potestatem venire. Inde Miranda populatos agros, nemine obuiam armato, onustum spolijs militem in naues recepit. Fama dein repente accidit, Calecutanos aduentare parones circiter quinquaginta. Cum ijs haud procul à monte Formoso quem appellant, prospere dimicatum est. Paronibus quatuordecim non sine magna hostium cæde captis, fugatis reliquis, cum ingentique terrestri ac nauali præda, Christophorus Mellus Goã, Antonius Miranda Cocinum in hyberna concessit.

*Libri Noni Finis.*

HISTO-






# HISTORIARVM

## INDICARVM.

### LIBER DECIMVS.



T Nonnius Acunia cum solennibus  
cæremonijs & supplicationibus inito  
magistratu ( is fuit annus apertæ Indiæ  
trigesimus secundus ) nouos de more  
præfectos, ad obtinenda præsidijs ma-  
ria destinauit . In ijs Antonium Syl-  
ueriam cum nauibus longis quinqu-  
ginta tribus, & Lusitanis epibatis non-  
gentis, è quibus erant fistulatores qua-  
dringenti , Cambaiam bello vrere, at-  
que omni clade vastare iussit . Hecto-  
ri Sylueriæ, ad Arabici freti custodiam, rostratas celsiores  
.quatuor, dromones duos, quatuor lembos attribuit . Oræ  
Malabaricæ, Didacum Sylueriam cum duabus biremibus, dro-  
mone vno , sex lembis præfecit . itemque alijs alia munera ex  
regiis commentariis delegauit . Ab ijs vario euentu gestę res.  
Antonij Sylueriæ præcipuum decus inter omnes fuit . Is, cum



ea quam dixi manu profectus ab vrbe Goa, Ciaulum tenuit. inde Rainelum Cambaia petit infestus. Mahometani oppidum habent, ex eorum genere quos Naiteas appellant. Campestres est locus, quattuor circiter à mari leucas, amni adiacens tortuoso, qui, propter tenuitatem, leuiores duntaxat nauigia patitur. Ager circa, frumenti & oryzæ ferax, multa insuper in lautiores dapes abundat alite; & incolæ, accipitrum genere, quos vulgo falcones vocamus, aucupium scienter exercent. Oppidum, ædificiis è polito lapide, & multiplici contignatione frequens, non modo propter soli vbertatem, sed etiam propter opulenta Sinarum commercia, scatebat ea tempestate omnibus diuitiis, & egregiam bello iuuentutem iuxta in terrestres, ac nauales expeditiones præbebat Regi. Præcipuum tamen (vt in plana ac fertili regione) robur in equitatu, quo ferme cataphracto, more Persarum vtuntur. & cum nulla pars corporis ad vulnus patet; tum ad ferendum hostem pugione præincti equites. bina vel terna spicula gestant manu; & præter hæc, ex ephippiis arcus & pharetra suspenditur. Sylueria ad fauces fluminis classe delatus, maiores naues cum ducentis armatis in salo reliquit. Ipse caturibus cum cætera manu subuectus; Surratum oppidum, metu incolarum desertum, ex itinere incendit. ac Rainelani, tum agrestium fuga, tum fumantibus rectis admoniti, quod moenibus carerent; ad amnis ripam atque ad omnes viarum aditus munitionibus raptim excitatis, maiora tormenta & militum stationes opponunt. Inde in Lusitanos cum ingenti clamore ac tubarum sonitu appropinquant, horrida vis telorum emissa: cæterum propter ipsam nauigiorum humilitatem nocuit nemini. Simul, ad prohibendum descensione hostem, equites prodierant circiter quadringenti. hos, præmissa fistulorum cohorte, Sylueria, territos facili negotio intra oppidum repulit. Tum egressi in terram cæteri, submissis identidem ex arte corporibus vitabundi, nemine prorsus amisso, ad ipsa tormenta succedunt; ac pede collato, ardentibus animis ineunt pugnam: quam aliquandiu ancipitem oppidani fecerunt, dum in arcto conglobati, pro telis ac focis egregie dimicant. Sed ad extremum valida impressione facta Lusitanus intra munitiones irrumpit: neque sustineri ultra impetus potuit. pulsi  
est.



## *Historiarum Indicarum*

à statione barbari, & decumanæ viæ faucibus captis, ex omni  
dein parte fugam capeffunt. Sylueria victor, hoste profligato,  
suos ignaros locorum ab insequendo cohibuit: custodisque  
contra subitos incurfus ab continente dispositis; diripiendi  
oppidi signum dat. in omnes partes extemplo discurretur. ni-  
tidissima suppellex; &, præter pecunias, multum eboris no-  
biliumque vasorum, & varij generis prætiosæ mercis egestum  
est. Expleri quamuis audis prædæ miles potuit, si carnes  
oneri ferendo fuissent. sed veritus Sylueria, ne immodico pon-  
dere mergerentur; cæteris opibus ac testis inicii flammæ, &  
hostilia tormenta, ex ære omnia, in medium fluminis alueum  
proiici iussit. Ad hæc, naues incensæ viginti, & cotiæ, quas  
vocant, multæ, mercibus & commeatu, cæsaque materia in  
ædificationem onustæ. Neque minus atrociter in villas, hor-  
tosque, & sata sæuitum est. Pleraque, vt ne vestigium quidem  
exstaret, ignis absumpsit. Ea clades omnem late regionem  
terrore compleuit. & Lusitanus, victoria vsus, impetu eodem  
oppida vicina, Damanum, & Agazinum, vicosque ignobiles  
complures quasi procella peruasit. Inde cum ingenti præda  
& magno captiuorum numero, in Bombainum insulam rece-  
pit sese: atque ibi, dum à Tanahensi dynasta, aliisque exigiti-  
tributum, aliquandiu substitit. Hæc ea æstate ab Antonio Syl-  
ueria gesta. Eodem tempore Cambaia Rex cum Nizamalu-  
co per præfectos gerebat bellum. ij, cum è Ciaulanis maxime  
finibus agerent prædas, aduersus eam pestem, oppidani, à  
Pereria Ciaulanæ arcis præfecto, ex fœdere opem efflagitant.  
ille cum paucis equitibus peditibusque incontulte prouectus,  
multo maiores ac paratiores in hostium copias incidit: & ple-  
risque suorum amissis, dissipatis aliis, ipse trepida fuga vix  
in arcem euasit. ob eam rem à Prætore Nonnio præfectura de-  
iectus, inque ordinem, haud leui apud Lusitanos animaduer-  
sione redactus est. Interea Malabaricæ regioni præpositus Ia-  
cobus Sylueria Calecutum petierat iussu Prætoris, vti coram  
commodius ageret de conditionibus pacis; cuius haud me-  
diocriter cupidum sese denuo Zamorinus ostenderat. Vbi eo  
peruentum est, immutato repente animo barbarum, nouis  
aliorum fœderibus illigatum, & à societate Lusitana prorsus  
alieuum offendit. Ea ne impunita esset leuitas, ignem Sylue-  
ria



ria tectis immitti, & oppidanos qui ad extinguendum accurrerent, misilibus è classe impeti iussit. vtrumque impigre factum. & incendiariæ ollæ in proxima coniectæ ædificia, & è nauibus tela in concursantem ignis opprimendi causa multitudinem mittebantur: atq; vti aridam simul & valentem materiam flammæ occupauerant; deleri pæne tota vrbs potuit, si modo paulum adspirasset venti. Cæterum per aeris tranquillitatem præcipue stetit, quo ne plus ducentæ ædes arderent. Inde Sylueria populabundus, ad omnia maiorum fluminum ostia nauium stationibus collocatis, quod è Lusitana re in primis erat; egregie obtinuit; ne quid eo anno Malabaricæ frugis Mecam transuehi posset; & Mahometani mercatores, exclusi temporibus, imposita iamdudum in naues onera magno cum detrimento ibidem exponere; nauesque propter hyemem subducere sunt coacti. Hisce rebus peractis, Sylueria nouis ab Goa copijs auctus; Mangalorem, oræ Narsinganæ opulentum emporium, arcemque emporio coniunctam, vi atq; armis adortus, expugnat. Prædiues negotiator eum locum habebat in potestate. is, cum iamdudum lateret sub vmbra Lusitanæ amicitia, occultum cum Zamorino percusserat foedus; ac mutua collusione Calecutanas merces, cum ius ab Lusitanis nauigandi impetrasset, suo nomine in Arabiam transmittere confueuerat. Ea fraude comperta Lusitani captum oppidum arcemque diripiunt; ad sexaginta maiora tormenta, & æris Cyprij, coralij, argenti viui, purpureæ & bombycinæ vestis, itemque tormentarij pulueris, & varij generis commeatum, quantum nauigia pati poterant, auctum: cæteræ gazæ, vnà cum ipfis tectis murisque, subditæ facies: quod flammis absumi nequiuert, ferramentis excisum: naues tredecim concremata: nihil in agris frugiferum, nulla felix arbor in hortis relicta; multi mortales aut capti, aut occisi. Dynasta ipse, desperatis rebus, cum inter tumultum elaberetur; plumbea glande traiectus occubuit. Per eosdem ferè menses quibus hæc in India gerebantur, in Arabico littore noui motus exorti. Turcica mancipia duo, Mustafa quidam peritus rei bellicæ, & Sofar Chius natione, sed oriundus ab Italia, Quæstor Aegypti, Solimano præfecto per fraudem interempto, & grandi interuersa pecunia; cum militibus ferme sexcentis Suezium petunt; comprehensique

in



## *Historiarum Indicarum*

in eo portu nauibus, in Arabiam, expugnandi & obtinendi Adeni causa traiciunt. Castris loco idoneo positis, maior in dies multitudo ad famam belli, ac prædæ spem, è vicinis regionibus affluebant. Inde, cum quintum iam mensem tormentis Adeni mœnia quaterent; & intenta custodia commeatus arcerent; Lusitanæ demum classis aduentu deterriti, quam Hector Sylueria ducebat; irritò incepto ab obsidione discedunt. & Sylueria, circa Aromata promontorium, onerariis aliquot haud incruento certamine captis, postremo Adenum accessit: liberoque mendacio abusus, Regi nuntiari iussit; sese, cognito vrbis discrimine, sine mora, ne Turcæ pedem in Arabia figerent, instructis egregio milite nauibus, aduenisse, paratum prælio dimicare; Turcasque inde per vim expellere; ni sponte ipsimet, eo perculsi metu, abscedere maturassent. Dein pluribus exsequendo, post occupatam à Turcis Aegyptum, & finitimas Adeno terras, quantum ab immani & inexplebili gente periculum vniuersæ instaret Arabiæ; ac simul in posterum Lusitanas opes & auxilia pollicendo; Regem & recenti obsidione fatigatum, & suis in præsentia diffidentem rebus, haud magno negotio perpulit, vt aliorum exemplo in Ioannis Tertij fidem solenni cum iureiurando veniret. Fœderis conditiones fuere, vt Adenicis nauiculariis institoribusque, omnes in partes, vna Meca excepta, commeare liberum esset; Regemque ac regnum, Lusitani, quoties tempora exigent, ab hostibus tuerentur. Rex Adeni vicissim, Lusitanæ Regem patronum ac defensorem agnosceret; ei que tributum nomine in singulos annos dena serafinum millia Armuzianæ monetæ persolueret. In has maxime leges iuncta societas; & serafini millequingenti extemplo ab Rege curati ad coronam auream Ioanni in Armuzia vrbe fabricandam, quæ stipendij præmitiæ in Lusitaniam primo quoque tempore mitterentur. Ceterum profecto inde Sylueria, barbarus metu solutus, ad ingenium rediit. & coalitam nuper amicitiam, ac fœderum ius, inexplabili facinore violauit. onustam pipere nauem Lusitanam, quæ in Adeni portum secunda decurrerat; cæcus auaritia, & vetere in Christianos odio, circumuentam repente diripi, & Lusitanos omnes, quique ea vehebantur naui, quique in Adeni emporio relictæ ab Sylueria fuerant, per summum nefas



fas spoliari, & interfici iussit, magnamque sibi pecuniæ summam eo scelere peperit. Cum hæc cis Cori promontorium fierent; in Molucis insulis hoc pacto se habebant res. Eversam ab Garzia urbem, Tidorenses, adiuuante Castellano, haud magna mole, quippe è lignea materia folijsque, refecerant: & in defuncti Almanforis locū suffecerant adolescentulū (quo nomine, quibusve parentibus, nihil traditur) is dum ad puberem perueniret ætatem, tutela regni penes Radem erat Cacicem. in eadem insula Castellani exstructum iam ante ab Ignatio ad portus fauces propugnaculum, arcis instar, vallo & fossa munierant. Cæterum è trecentis bellatoribus ad centum ferme variis redacti cladibus, cum aliis, vt in tam longinqua regione, difficultatibus, tum paucitate maxime laborabant. Eadem Lusitanos quoque premebant incommoda; verum eo meliore conditione, quod & ab suis ipsi coloniis emporiisque aberant propius; & Boleifis demortui Regis liberos omnes (vti supra demonstratum est) obsides insulanorum fidei, inclusos intra arcem habebant. Sed huic locorum opportunitati, hominum industria, & publicæ rei studium deerat. siquidem neque à Malca iamdudum, neque ex India, quasi nullæ iam essent insulæ Molucæ, quicquam vel in supplementum, vel in alimenta, vel in stipendia militum aduehebatur; ipso vel in primis eam negligentiam demirante Aroeio: & Georgius Castrius à præfecto Menesio ad Bandam insulam missus, vt in eo emporio, quod Molucensi diœcesi erat contributum, pecunias mutuas ab Lusitanis qui ibidem negotiabantur, & militares viros aliquot Regis nomine sumeret; spernentibus iussa mercatoribus, nihil omnino impetrauit; ac per idipsum tempus Tidorenses pauci admittis Castellanis eadem loca petierant ad sollicitandos populos, atque ab commercio Lusitano auertendos. ij, in circulis cætibusque magnitudinem Castellani imperij viresque iactando; Lusitanæ vero ditionis fines & copias eleuando verbis, & vtraque regna comparando inter se; haud paruos ad præoptandam potentiorum amicitiam in ea gente motus animorum fecere. Castrius emulos ac seditiosos comprehendere casso labore conatus, Ternatem, vacuus nummis & com meatibus, desertissimo comitatu reuertit. Ita, Menesio quoque, in magna rerum inopia, fluxaque gentium



## *Historiarum Indicarum*

gentium fide, ex omni numero paulo plus centum & triginta Lusitani supererant. Deleri à barbaris vtraque natio potuit, si communi consilio ad facinus conspirassent. Sed sordida lucri cupiditas, & ciuile odium ad mutuam perniciem præceps, ad tutelam publicæ libertatis incautum, adeo distrahebat animos, vt discordes infensique inter se, domesticis certaminibus externa fouerent arma. Ab Lusitano Ternatensis; ab Castellano Tidorensis iamdiu stabat: porrò ad Ternatensem Bacianius, incertum quas ob causas inmutata in successorem Almanforis voluntate; ad Tidorenses Catabrūnus Geilolij regni procurator, puero admodum eo quoque Rege, se adiunxerant. inter vtrunque partem, ducibus Europæis minuta prælia serebantur. Sed ex omnibus maxime bellum ciebat Geilolius, spe concepta inter eos tumultus imperij proferendi; cuius rei facultatem quietis rebus cernebat nullam. Mauricæ sunt aliquot insulæ, de quibus ante dictum est, Morum vulgo omnem eum tractum appellant. Harum partem cum singuli obtinerent Reges, quod in primis opulenta est terra, mutuo se se inde pellere conabantur. Ea res, ad euertendum Tidorem, non receptum vltra æmulis daret is locus, aditum denuo Lusitanis aperuit. Quippe in eam ipsam expeditionem, vt fines Ternatensium inuaderent, Rades & Geilolius cum sua vterque classe in Mauricas profecti, Castellanis adsumptis circiter quinquaginta, Tidorenses urbem arcemque cum imbelli plebe, & præsidio Castellanorum haud amplius quadraginta reliquerant. Ea re comperta Menesius, confestim arce Gomezio Ario concedita, centum & viginti Lusitanos eduxit: adiunctisque Aroezij, & Bacianij auxilijs, per speciem occurrendi hostium nauibus, cum à Ternate soluisset, repente ad Tidorem flexit iter. & copijs bipertito in terram expositis, urbem & male munitam, & defensoribus pæne vacuum, primo impetu cepit. Oppidani cum regulo dilapsi. vrbs iterum direpta & incensa. Inde ad Castellanos, qui sese in arcem vrbe capta receperant; missi à Menesio codicilli, cum clementi adhortatione, vti rerum suarum statum agnoscerent; captiuos & cætera per bellum ablata redderent; & incolumes ipsi cum suis rebus abirent; neu barbaricum solum respergi vltra Christiano sanguine paterentur. Quod si Cæsarem respicerent, gratiorem illi haud dubie



dubie lenitatem in disceptando, & animi æquitatem in complectenda concordia; quam in perditis iam rebus, improba partium studia, & pertinaciam in bello extrahendo, futuram. Ad ea ferocius primo responsum à Castellanis. dein, ubi admoueri tormenta scalasque videre; Fernandus præfectus, accepta fide, ad colloquium prodiit. In eo colloquio, post multam altercationem, denique pax ita conuenit. Castellani, captiuos & cætera ablata Lusitanis cum fide redderent. inde ad Zamafum oppidum oræ Mauricæ cum suis rebus abirent. nullo præterea plagæ illius adirent insulas; neu quam eius mercaturæ aut negotiationis partem attingerent. Ternatensi Regi ereptam paulo ante Maquienum insulam restituerent; neu illi, neu Baciano, aut alijs Lusitanorum socijs arma inferrent; nec Tidorenses, aut Geilolium, cæterosve illorum hostes, vlla iuuarent ope: sed ibidem quieti responsum ex Europa super commercij controuersijs, uti cum Ignatio ante conuenerat, expectarent. Menesius naues iis præsidiumque Zamafum usque præberet; neu Castellanos, Tidorisve aut Geiloli Reges dein laceggeret bello. In hæc leges insiurandum vtrinq; exactum: & datis qui prosequerentur, Castellani Zamafum sine mora transuecti. Sub hæc, Tidorensi quoque Regi data pax, & instaurandæ rursum vrbs potestas facta, cum eo ut Ioanni certum quotannis tributum penderet, neque Castellanis in posterum, alijsve nationibus contra Lusitanos adesset. Additum etiam, ut Lusitanos aliquot haberet apud se, ad gentem Europæis institutis & moribus imbuendam. Per hunc fere modum compositis in præsentia rebus; adulta iam ætate Boahates intra arcem emoritur. Neque absuit veneni suspicio, in Aroeziū vulgo collata, quod vereretur (vr est sollicita omnis ambitio) ne maturo ad imperium adolescente, dominari postmodum ipse desineret. Suffragus in Boahatis locum germanus frater, natū minor, Aialus. Is vero, ut sibi tandem aliquando restitueretur, summa ope orare infelix institit mater: sed apud surdas aures nihil ea deprecatio valuit. Aroezius, continuandi imperij cupidus, obstabat in primis: sentiebatque in ea re cum Menesio, quamquam alioquin grauius eidem inferendus, cum alias ob causas, tum vero, quod Cacilem Vaia-cum, è primoribus vnum, plus æquo fouere, sibi que palam

X      anteferre



## *Historiarum Indicarum*

anteferre videretur. quæ res non Aroezius modo prorsus alienavit à Lusitanis, sed etiam ipsi Vaiaco exitium attulit. quippe, non ferens æmulum Aroezius, fictis primum criminibus hominem insectari cepit; dein etiam, cum parum criminatio procederet, necem inuiso capiti aperte moliri. Vaiacus, cum se imparem opibus aduersario cerneret: vndique insidiis appetitus (quod vnicum erat præsidium) in arcem ad Menesium confugit supplex. Verum ne ibi quidem tuto esse licuit. inclusum; Aroezius, quasi maleficum & facinorosum, exemplo ad supplicium à Menesio expetiit. Menesius, cum neque Aroezius exacerbatum, & amico inopi afflictoque consultum vellet, suos in consilium vocat. Ibi dum sententijs certatur; Vaiacus interea, metuens, ne postmodum noxæ dederetur inimico; sese præ celeri desperatione è turri præcipitat. Huius viri interitu, Menesium haud mediocris inuasit mœror. Accersit ad iras acuendas, parua dictu res; sed quæ in iis gentibus magnos animorum motus excinerit. Petitam è Sinis paulo ante fuculam (vt fit) Menesius habebat in pretio. hanc extra muros forte pascentem, oppidani aliquot ex insidiis occidere. Causa occidendi fuit, partim praua religio, quod Mahometicis & Iudaicis addicti superstitionibus, eam pecudem vulgo execrantur; partim etiam odium Menesij ipsius; quem id peracerbe laturum non ignorabant. & sane maior quam pro re dolor hominem pupugit; ac proinde quam intentissima habita quæstione, affinem eius culpæ comperit Cacilem Vaiduam, qui & princeps tum erat sacrorum, & Aroezius Regemque ipsum arcta affinitate attingebat. Hunc, nulla vel personæ, vel affinium, vel publicæ quietis habita ratione, in arcem arripi iussu, Menesius in carcerem condidit. Vulgata dein re, concursus ad Menesium factus ab Aroezio, & primoribus ciuitatis; quorum vel auctoritate, vel precibus utcunque placatus, acceptis vadibus Vaiduam è custodia emissi imperauit. id ministerium Petro cuidam Fernando mandatum, infimæ fortis homini; qui, vt est procax hominum ingenium in alienis miseriis, inter soluendum Vaiduam, os eius ac faciem, frustra quiritantis ac diuinam humanamque implorantis fidem, petasone pingui perunxit: qua ille contumelia adeo accensus est, vt lacrymas non teneret. Productio dein  
ad



ad arcis portam, præstò fuit honoris causa Aroezius cum magistratibus, & magno ciuium numero. quos, Vaidua, suam fortem miserans eiulansque cum appellaret, aruina succulenta madentibus genis; Lusitani quidem adstantes, ingenti sublato cachinno, vrbanum Fernandi factum efferre laudibus: at vero Ternatensibus, ad eam deformitatem lacrymæ pariter obortæ: atque ita superbum & indignum id ludibrium visum est; vt nisi arx atque tormenta ceruicibus imminerent; arma extemplo capturi, iniuriamque summi apud eos antistitis vlturi haud dubie fuerint. Sed præsentimetu ac dira necessitate coerciti, quieuerunt. Vaidua, ignominia ac doloris impatiens, voluntarium sibi in aliquot annos conscivit exilium: ac vicinas interim insulas cum querimonijs & obtestationibus obeundo, gentem vniuersam contra Mahometis contemptores omni arte sollicitare non destitit. At vero Ternate, incolis iam sat superque irritatis; longe etiam atrocior ad exulcerandos omnium animos consecuta res est. Intra arcem, vt supra demonstrauius, & pecunia, & commeatus penuria erat ingens. Inde milites cum à tabernis atque è macello alia atque alia, vt fit, non præsentibus nummis, interposita fide coemerent, ac postea soluendo non essent; concursus à plebe cum expostulationibus ad Aroezius fieri captus. ille, quando Lusitanos neque in ius vocare poterat, neque ad satisfaciendum creditoribus cogere; quod reliquum erat vnum; annum in vrbe comprimi iussit. Ex eo Menesius milites increpare, quod ipsorum improbitate atque avaritia, nihil iam venale prostaret. illi contra, in Menesium Prætoremque India conferre culpam; ac simul ferociter stipendium exposcere. Cum nihil eiusmodi altercatione proficeretur, & inopia cresceret in singulos dies, Gomezium Arium ad conquirenda cibaria cum armatis aliquot insulam peragrarè placuit. Haud longe ab vrbe Ternate vicus est, Tabonam appellant. Eò progressi pauci ex Arii comitatu, quasi ad populandum non ad precandum venissent; ita in aedes irrumpere, cibos efflagitare; si mora fieret, per vim egerere. Cum maior quam pro numero & loco audacia esset; non tulere diutius insolentiam incolæ: arreptis quæ fors obtulerat telis, Lusitanos minis deterere à rapina institerunt. inde rixa cum iurgiis orta: & Arius



## *Historiarum Indicarum*

procul clamore suorum audito, ad opem ferendam & sedandum tumultum accurrit. Neque segnius, ac maiore cum manu affuit præses loci, vir egregie fortis: accensisque ad iracundiam animis, cum nihilominus in temerario incepto Lusitani perstarent; pauci a multo pluribus circumuenti, multis acceptis plagis, quidam etiam armis exuti, in arcem ad Menesium reuertuntur. Horum conspectu & vociferatione ostentantium vibices, & se se fustibus indignum in modum acceptos ab agresti plebe querentium, commotus haud satis cognita causa Menesius; per iram, auctores eiusmodi facinoris ab Aroezio postulat. graues additæ minæ, ni exemplo dedantur. Aroezius, licet malum id sibi met Lusitanos contraxisse non ignoraret; tamen urgente metu inuitus obtemperat. Tabona citari præses & duo è primarijs, Menesio sine mora sistuntur. è quibus ille duos præcis manibus domum remittit. Præsidem verò brachijs post tergum reuinctis, in littore destitutum, ferocissimis duobus molossis obiecit. quorum impetum ac dentes, varia corporis declinatione, aliquandiu frustra euitare conatus; horrente supplicij sceditatem effusa ex oppido multitudine; circumspectare primo cœpit fugam: dein, cum terrestres omnes exitus milite obsessos cerneret; in mare se (quod supererat vnum) ad incertam spem salutis immisit. neque canes, quippe iam inescati, ab insequendo abstinere. pedibus tantum nanti, pone cum adhererent; dolore ac desperatione in rabiem actus, repente se se conuertit; dentibusque, horribile dictu, certare cum belluis institit: atque ad extremum, vnius aure mordiens apprehensa, cum iam sanguis viresque deficerent; moribundus, molossum vnâ secum ad ima detraxit. Atrox & inhumanum id pœnæ genus haud immerito visum, eo magis quod Lusitano ex patrijs institutis ac legibus gloriari licet; nullam gentium in homines damnatos mitiora exercere supplicia. Et Aroezius eo facto, ad implacabile Menesij aduenarumque odium efferatus; de tollendis è medio Lusitanis pariter & Castellanis agitare cœpit. Ac per fideles primum inter nuncios placatum sibi Catabrunum facile adduxit; vt simulatque casos ad Ternatem Lusitanos audiret; Castellanos ipse vicissim ab Toloco ad Geilolum allectos, ad vnum interficeret. Additum magno vtriusque consensu, vt sublati peregrinis, regulum



gulum vterque suum necaret, ac regnum inuaderet. Hisce de rebus dum occulta consilia ineuntur; atque ad fraudem, quando in aperta vi spes non erat, tempus & ratio exquiritur; indicium interim conspiracy ad Menesium deferitur. ille, per summam dissimulationem Aroeziū in arcem (vti solebat) accersit, itemque ex Aroeziū amicis, quos ille in sceleris communionem asciuerat, præcipuos duos, Tamaranum & Boium: quorum hic iudicijs capitalibus; ille rei maritimæ præerat. Hi separatim interrogati de coniuratione, primo satis constanter negabant: dein tormentorum admoto terrore, seriem totius rei sine cunctatione prompsere. Hoc tanto periculo Menesius iratus, damnatum de consilij sententia Aroeziū, in elato suggesto (vti principes viros moris est), toto spectante populo securi percussit. Reliqui duo quo genere leti perierint, incertum est. Eo casu perterriti primores urbis, ad locum natura munitum, cui Turoto nomen, simul cum Regina, liberisque, & coniugibus effugerunt. Inde Regina denuo per legatos Aialum filium à Menesio summa ope repetere aliquandiu perseuerauit. Postremo, bi clausas aures frustra tentari perspexit; Aroeziū exemplo venale quicquam ex agris ad urbem deferri vetuit, adeo ut pene obsessi non modo penuriam, sed etiam famem Lusitanos sentirent. Interea Consalius Pereria successor Menesio destinatus, cum dies aliquot Malacæ ex itinere substitisset; idoneam nactus tempestatem, in Borneum traiecit; pacemque & hospitium cum Rege libentissimo instituit. Ea insula est perampla. ducentas circiter & quinquaginta leucas ambitu colligit. Mahometem colunt populi; carnibus, oryza, & varijs alimentis abundant; & super hæc, laudatissimam caphuram, & primæ notæ adamantes, agallochum; itemque apprimè expetitur vicinis gentibus factitij vini genus quod patre vocabulo tampoi dicitur, cum veste Cambaica, ære, argento viuo, rubrica miniove permutant. Portus & oppida numerant multa: sed præcipua nobilitate Borneum regia est urbs. hæc nomen fecit insulæ, lateritijs mœnibus, & sumptuosis ædificiis mirum in modum exulta. Inde Pereria Tarnatem delatus, perturbata omnia; Lusitanos macie ac fame luridos ac deformatos ostendit. Accepta dein præfectura, Menesium ab Regina oratoribus pro atrocitate facinorum dolenter & grauiter accusatum,



## *Historiarum Indicarum*

in custodiam dat. habitaque rite quaestione, sicuti à Pratore Nonnio in mandatis habebat, testata omnia crimina, & litteris consignata, ipsumque Menesium victum remisit in Indiam. Tum, ioste ac leniter agendo cum incolis, Regemque puerum laxius & liberalius habendo, Reginam & ceteros profugos cum omni rerum copia ad urbem reduxit. Simul etiam arcem (quippe alicubi aggere tantum exstructo murus & propugnacula deerant) absoluere aggressus est: quam rem quo enixius ipsimet oppidani adiuuarent; cum solenni iureiurando palam Reginae promisit; adificatione absoluta, se se confectum ei filium incolumen fide optima redditurum. Post hac, ad Lusitani Regis negotia procuranda, & prohibendum mercatura militem, toto pectore incubuit. Neque solum edicto graui, uti Menesius antea, cauit ne cui præter ministros regios contrahere cum incolis liceret; sed etiam circummillo conquistore, mensuras omnes atque stateras è priuatorum adibus ablatas aut concremavit, aut fregit; certam præterea caryophylli partem eius quod sibi quisque iam emerat, pretio dominis persoluto, in regiam apothecam conuehendum curauit. Id verò acerbissimum accidit Lusitanis: militiae quippe munia perosi; vetito commercio dudum assueuerant. coemptisque frugibus, tanquam serpentes thesauris, incubabant. Ante alios Fernandus Lupius pro Episcopo (vicarios tum, sacerdotes eiusmodi, vulgo appellabant) qui ceteris exemplum omnis disciplinae ac sanctitatis deberet esse; interdictam sibi negotiationem, & ereptum è faucibus nefarium quaestum, pati nullo modo poterat. Proximus huic Vincentius erat Fonsseca, vir seditiosus ac turbulentus. Atque hunc quidem, Praefectus, arrepta occasione, quod exigenti vigilias circitori ferocius & contumacius respondisset; in vincla coniecit. Verum ceteros ex eadem factione coercendi, haud æque expedita erat ratio: quippe complures, & paratos ad facinus; & incolarum, quibus tolli edictum pariter expeditet, opibus ac fauore subnixos. Hisce rebus elati plerique milites, primò arcem præfectumque deferere; ac partim ad Castellanos, partim etiam ad Mahometanos transfugere cogitarunt. dein, veritine si adeo aperte nudassent animos; periculum affinis ac liberis in Lusitania relictis crearent, sibiq; receptus à tam præcepti



cepti consilio non daretur; tutius ac satius fore statuunt; per ipsosmet Ternatenses exitium necemque præfecto moliri. Nec mora. mutuis adhortationibus inflammati; non modo plebem, sed etiam magistratus, atque adeo Reginam ipsam in præfectum accendere. Venisse nouum ex India non hospitem aut amicum, sed dominum ac tyrannum: qui, dum à Prætorè Indiæ, & regijs Quæstoribus gratiam ineat; gradumque sibi ad opes & imperium struat; aliorum omnium rationes & comoda negligat: & iniquissimis edictis, contra naturæ, & gentium iura, totum commercium interuertat. Neque verò blanditijs & fucata eius comitate decipi se patiantur. Simulatque arcem absoluerit, certum esse illi, non Regem modo è custodia nullo pacto dimittere, sed etiam Reginam ipsam vna cum proceribus repente comprehensam, in eundem carcerem includere; quo pluribus obsidibus obnoxios ad omnia sibi habeat insulanos; nec tantum alimenta subtrahere, vt antea, sed ne hiscere quidem in posterum audeat quisquam. Ni talia machinantem occupent è medio tollere; non modo graua fortunarum damna; sed etiam teterrimam haud dubie seruitutem omnibus imminere. Hæc, & alia eiusmodi, quæ in tali re praua cupiditas & malitia suggerebat; secundis auribus cum à populo, tum à Regina in primis accepta. ac læta mulier, quicquid itarum ac simultatum cum alijs fuerit, totum id in ipsos vertisse Lusitanos; tam præclaram occasionē vlciscendi acceptas iniurias, delendiq; gentem insociabilem, è manibus elabi passâ non est. Vocatis ad concilium affinis amicisq; demonstrat; agitados partim consciëntia scelerum; partim intercepti lucri dolore Lusitanos, capitali inter semet odio dissidere; atq; ipsius maxime præfecti necem omnibus votis expetere. Collato in eos à Boleise coniuge beneficia, dextrasque iunctas & hospitij sanctissima iura in memoriam reuocata. Pro iis quam male relata sit gratia, reputare apud se quemque iubet. Vixdum vita functo Boleise, paruulos liberos fraude in arcem abreptos; se se ægre ex impiorum manibus elapsam, relicto solio, vagam inopemque tam idu tolerasse vitam; maiorem natu filium, vt primum ad capeffenda regni gubernacula pubescere inceperit, veneno sublatum. hunc qui sibi afflictæ superfit vnus, per quotidianos dolos & callidam frustrationem in custodia deci-



## *Historiarum Indicarum*

neri: ad hæc, intolerandas contumelias, & inaudita post hominum memoriam infantium supplicia cruciatusque commemorat. Hortatur, quandoquidem ipsemet Lusitani ad facinus adeo gloriosum inuitent, ac dextras quodammodo porrigant; sese ad tyrannum interficiendum ingenti animo parent. Vbi eam belluam, adiuuantibus vel certe approbantibus inimicis, in ipso cubili macerant; tum subito aucti subsidijs quæ in tempore sint affutura, occæcatis intestina rabie lupos ad vnum omnes occidunt; arceque occupata, & excusso impotentissimi dominatus iugo, innoxium Regem orbæ parenti, ciuibus, vrbi tandem aliquando restituant. Haud magni negotij fuit cunctos in sententiam adducere; quippe Lusitanis & natura cultuque dissimiles, & publice dudum infensos, & propriis insuper damnis atque offensionibus irritatos. Cum certatim in id operam suam deferrent, dies rei peragendæ condicitur. Interea Regina ad omnem suspicionem auertendam, officia in præfectum intendere; operas in arcis ædificationem vltro suppeditare; hortari vt munimentis perficiendis insistat; scilicet quò sibi optatis vnici filij amplexibus quamprimum perfrui liceat. Vbi destinata affuit dies; delecti viri tum in Mahometis fano sub arcem, tum etiam in proximo luco, eoq; densissimo, clam in insidiis collocantur: qui vbi è turri signum editum sit, extemplo per inchoata vel intermissa opera in arcem irrumpant; dein coniurati cum gladiis, iidem ferme qui familiariter ad Regem itare consueuerant; circa meridiem de more intromissi, ad intimam turrem sine vlla interpellatione perueniunt. ibi cum Rege collocti, simul expediunt ferrum; & colligunt animos. Maxime opportunum erat diei tempus: custodibus ac ministris, vti solebant, meridiandi causa dilapsis; & præfecto per summam securitatem intra cubiculum quiescente. Vnus Vincentius Fonseca victus vigilabat in proximo. Is, è corporum motibus vultuque confuso rem haud obscure coniectans, cunctantes hærentesque, nutu ac verbis instigando perpulit tandem, vt in cubiculum præfecti impetum facerent. Ergo strictis gladiis hortati inter se, alij fores effringunt; alij gypsatos arundine intertexta parietes, calcibus prouunt. Pereria, arreptis armis cum se se acriter defendisset ac diu; transfixo denique duobus ictibus



bis pectore, moribundus occumbit. Interea qui sub arcem in delubro latebant, gestientes cupiditate cædis & sanguinis, non expectato signo teneri non potuerunt, quominus in prætereuntem forte Lusitanum irruerent. Eo argumento, nec non clamore ex præfecti ædibus vociferantis ancillæ, patuit fraus. Tum excitati Pereriæ famuli aduolant: ad arma vocatur: atque, ut in communi metu, ab utriusque factionis hominibus ad turrem extemplo concurritur. ibi, mira celeritate, antequam signum ederent percussores oppressi partim cæduntur; partim è muris fenestrisque sese præcipites dant. Ab Lusitanis, ut in re trepida, occlusæ portæ; & pro mœnibus & propugnaculis vigiliæ stationesque pæne sero dispositæ. Ac per hunc modum eo die seruata non arx modo; sed, vno Pereria excepto, vita omnium ac salus; euidenti profecto Dei benignitate, credo propterea quod futuræ postmodum in iis locis Christianæ messi consuleret. Sub hæc, inter Lusitanos de successore, uti consueuerant, ingenti contentione certatum est. Atque ad extremum, adnitente Vicario, per seditionem ac tumultum, præteritis iis quorum habenda erat ratio more atque instituto maiorum, è vinclis ereptus Fonseca in locum defuncti pessimo exemplo sufficitur. Ab hoc, tametsi non tam voluntate, quam vi, quod alioquin ex omni circa regione com meatibus arceretur, commodius factum est nihil, quam quod expostulanti Reginæ Aialum filium reddidit. Ceterum, militari neglecta disciplina, & contempto Ioannis edicto, liberam negociandi potestatem atque licentiam Lusitanis indulgit. Et ipse postmodum apud Indiæ Prætorem accusatus (incertum quibus artibus) omnium criminum & flagitiorum impunitatem adeptus est. Aialo regnante, nihilo quietiores, quam antea, res fuere. Quippe dum seuerius exercet imperium, & à magistratibus cæterisque, quos ad eam diem publici peculatus pauperant, acrius rationes reposcit; principum sibi odium simultatesque irritauit. ij probabilem nacti materiam criminandi, quod per eos forte dies vagi ad rapinam aliquot ex arce ab agrestibus interfecti fuerant, eius cædis culpam in Regem conferendo, aliasque comminiscendo calumnias, Fonsecam adduxerunt, ut in fontem Aialum vi atque armis pelleret regno, eiusque loco Tabariam spurium substi-



## *Historiarum Indicarum*

substitueret, è stirpe regia minimum natu. Ea res multitudi-  
nis animos vehementer offendit: ac vulgo Fofsecæ diras om-  
nes imprecabantur. atque etiam è Lusitanis nauarchis mini-  
me deerant, qui cum eo palam exercerent inimicitias, & in-  
dignam Consalui Pereriæ necem, amissamque propemodum  
arcem, & summa iniuria occupatam ab eo præfecturam expro-  
brarent. Ita, domestico simul & externo sollicitus metu, per-  
æque omnibus adeo diffidebat, vt non die non nocte arma  
deponeret, nihil ab vilo porrectum, nisi sinistra acciperet ma-  
nu, quo alteram ad stringendum gladium expeditam haberet;  
&, quod in conscientia magnorum scelerum accidit, vmbas  
horreret. Interdum etiam, congressus hominum vitabat, ac  
lucem; & in solitudinem abditus; statum rerum suarum taci-  
tus apud se deflebat. Eo libentius de successoris aduentu nun-  
tium accepit (is erat Trifianus Ataidius) ei que sine vlla ter-  
giuersione clauēs arcis & gubernacula tradidit. Hoc præfe-  
cturam gerente, haud contemnenda occasio amplificandæ in  
eo tractu Christianæ religionis affulfit. Momoia est vrbs in Mo-  
ro. Simulacra colebat gens, atque inde Mahometani quotan-  
nis prædas agebant. eam iniuriam & calamitatem querenti  
Momoiano dynastæ, Consalvus Velofus qui tum ibi negotia-  
batur, spem fecit, si Christiana fufcipere sacra in animum in-  
duceret; auxilium contra eas incursiones à Lusitanis impe-  
trandi. Haud aspernatus conditionem barbarus, auctore Cō-  
saluo legatos ad Ataidium mittit. ij, dies aliquot à præfecto  
comiter habiti; sacro fonte abluuntur: dein muneribus culti  
ac Lusitano vestitu ornatuque; in patriam reuecti, plenam  
promissis legationem dynastæ renuntiant. Ille, tam læto suc-  
cessu, magnam in fiduciam erectus, Ternatem extemplo con-  
tendit. Ibi iuncta cum Lusitanis amicitia, magnifico pro co-  
pia loci apparatu, ipse comitesque baptismo lustrati, atque  
aliis quidem alia de more imposita nomina: dynasta in Lusita-  
ni Regis videlicet gratiam, Ioannes est appellatus. Momoiani  
redeunti, comes additus Simon Vafæus sacerdos. huius ope-  
ra, præsertim Ioanne adnitente, multi paucis diebus ad Ec-  
clesiam adscripti. Cumque in dies cresceret numerus, labo-  
ranti Vafæo Franciscus Aluarus item sacerdos paulo post ab  
Ternate succurrit. Tum verò summi infimique, credo ma-  
gis



gis imitandi principis causa ( vt euentus postea docuit ) quam quo necessaria Christianæ fidei capita probe tenerent ; relictis in speciem simulacris vni Deo nomina profiteri instituerunt. Simul , delubra non pauca , statuis demonum comminutis atque sublatis , rite expiata , & cultui diuino dicata sunt . & ab Ataidio , vti receperat , Lusitani milites aliquot Momoiam transmissi , qui urbem muneret ; ac nouellos Christianos à Mahometanorum incurfu rapinisq; defenderent. Dum hæc ad Momoiam fiunt ; Ternate ab improbis cupidisq; rerum nouarum , Tabariæ nomē ad Ataidium defertur , quasi de occupanda per dolū arce consilium iniret ; ipsiusq; præfecti vitæ in primis moliretur insidias . Ea criminatio , innoxio adolescenti , vt initio calamitosa , ita exitu salutaris fuit . Quippe ab Lusitanis fraude in arcem illectus , repente in vincla coniicitur . dein crimina dilbere , atque iras lenire præfecti frustra conatus , cum valida custodia in Indiam ad Prætozem est missus . atque ibi demum causa cognita , verbis honorificis absolutus , repudiato Mahomete Christianus efficitur . Inde patriam repetens , cum ad Malacam ex itinere substitisset , extinctus est morbo . Cæterum Ataidius , præiudicata re , neque Nonnij expectata sententia ; Cacilem Aerium eius loco fecerat Regem , Boleifi pariter expellere natum Iaua : quæ , filij salutis non sine causa metuēs , cum acrius tenderet ne tam infaustæ successionis aleam subiret ; satellites puerum à complexu parentis auulserant ; ipsamque muliebriter vociferantem , vāsano perciti furore , ex ædium fenestra præcipitem dederant . Hoc tam atrox facinus , non Ternatensium modo ; sed omnium eius plagæ Regum ac populorum iras denuo in Lusitanos accendit . ac vulgo in cœtibus concilijsque , præter cæteras quarimonias & maledicta , fremebant , indignam atque intolerabilem esse rem , ab ijs qui pene precario nuper in eas regiones irreperint ; Reges incolis ex libidine dari adimique . Id verò in primis pro suo quisque sensu & ingenio deplorare . Ac per eos ipsos dies , ad cumulandam inuidiam , fœdum Pinti cuiusdam factum accessit . Is ad explorandum Mindanaum , & alias circa insulas , ab Ataidio missus , à Mindanao ad Siriagum deuēnit . ibi clementer acceptus , cum Rege hospitium ac societatem mutuo sanguinis haustu sanxit . is genti sollemnis fœderum ritus . inde , cum securi insulani qua-

si ad



## *Historiarum Indicarum*

si ad amicum & socium, vel contrahendi, vel etiam visendi causa familiariter in ipsam nauem adirent; Pintus, aliquot ex ijs repente correptos, abdito loco infra tabulata coniecit, asportandi causa. Non latuit ea fraus incolas. quippe, dum se ad iter expediunt nautæ; sensim vnus è captiuus in mare defiliit; nandoque cum ad suos peruenisset; rei gestę seriem exposuit Regi. Ille accensus ira, extemplo celeres deduci, & in eas armatos imponi iubet. ab ijs Lusitanus prope inter moliendum oppressus, sæua postmodum coorta procella pæne submergitur. Inde ad leuandam onere nauem iactis in mare tormētis, magna cum formidine ac trepidatione Ternatem applicuit. Hæc ob res, omnium animis maiorem in modum exasperatis; Molucenses Reges ad extinguendum nomen Lusitanum, misis vltro citroque nuntijs, cum Ternatensi populo coniurauerant; in eandem societatem regulis quoque Papuarum insularum assumptis, Vaigamano Vaigeo, Quibibio, & Mincimbo. Consilium erat, sparsos varijs locis Lusitanos, ad internecionem delere: Ternatensis arcis præsidium, quando muralia tormenta deerant, subtrahitis vndique alimentis fame conficere: si id minus è sententia cessisset; felices omnes arbores vltro succidere, & cum familijs longe inde migrare; vt quoniam noxia & inuisa natio armis ex ea terra pelli non posset; certe solitudine ipsa, & inopia rerum omnium, excedere cogeretur. Hisce rebus ita constitutis; initium belli factum à Ternatensibus: ij, quam occultissime suis rebus in tutum egestis, nequid hosti ad prædam reliquum esset; postremò, ante lucem omnes ex vrbe profecti sunt. frustra que Ataidius; vt primum id rescivit, abeuntes omni ope reuocare; eorumque iras pollicitationibus & blanditijs permulcere tentauit. Maritima primum loca procul ab arce petiere: dein cum à Lusitanis nauibus vexarentur; in abditos saltus ac præaltas rupes recepere se se. inde furtiuis expeditionibus, in aquatores maxime & lignatores Lusitanos fiebat impetus. quinetiam, vt nullam secum pacis conditionem esse Ataidius intelligeret; patriam ipsam Ternatem, vbi erant aliquot domicilia Lusitanorum, subito aduentu iniectis ignibus concremarunt. Eodem fere tempore cæteræ quoque gentes in arma coortæ: & Lusitani, qui alijs alijsque in regionibus, vt apud amicos agebant, repente circumuenti cæsi que. Et Moro, præter alios, Simon quoque



que Vaseus Sacerdos occubuit. Franciscus Aluarus, multis vulneribus acceptis, egre nauicula Ternatem euasit. Pesimum verò ex ea coniuratione illud accidit, quod Catabrunus veneno adolescentulum Geiloli Regem sustulit, regnumque per scelus inuasit: dein ad occupandas in eo tumultu Mauricas insulas magna classe profectus neophytos Momoianos, vtpote Christianis præceptis leuiter admodum institutos, ab recta in Deum fide, metu minisque deduxit, vno incassum reclamante dynasta Ioanne: quippe qui Christianæ disciplinæ præcepta, & Euangelij veritatem, in pectus alte demiserat, is, vbi obstinatos ad dedicationem, atque ab suscepta religione per summam leuitatem atque perfidiam auersos populares animaduertit; locum extra urbem tumultuario opere munijt; frustra que hortatus Lusitanos aliquot quos circa se habebat, ne asperis in rebus desponderent animum; ipse cum paucis familiaribus oppugnationem hostilem à matutino tempore ad vesperum præclare sustinuit. Nocte dein, desperata corporum salute, ad animos præsertim domesticorum quacunque ratione seruandos incubuit. Vxorem habebat Christianis nuper sacris initiatam; hanc vnà cum parvulis liberis, ne propter infirmitatem naturæ vel ætatis, de baptismi præmiis periclitarentur, in opinionis errore optimo vtens animo, sua ipse manu peremit: inde cum sibi quoque manus pararet afferre; domesticorum interuentu prohibitus, & non sine magno animi dolore, Catabruno traditus est. Ab eo cum interrogaretur, cur tam triste consilium cepisset, immeritam coniugem cum innoxia prole occidendi per summum nefas; vxori quidem ac filiis egregie ab se consultum esse respondit; quorum sexus etasque ab salutari Christi confessione abduci facile potuisset; at se se, vti virum deceret, nec tyranni minas horrere, neque extrema supplicia crueiatusue, Christi causa defugere. Hac orationis libertate Mahometani seuitiam acrius concitauit: cumque in eo iam esset, vt carnifici traderetur, amicorum ac procerum deprecatione seruatus est. Dignus profecto qui non in vltima barbarie, sed in Europa media nasceretur. quippe, tam generosum ingenium, cultoribus peritis adhibitis, ad eximiam virtutum omnium frugem haud dubie peruenisset. Et Ioannes quidem, quam dixi constantiam ac fortitudinem præstitit. De cætera neophytorum



## *Historiarum Indicarum*

phytorum turba utrum vel unus in fide manserit, nihil com-  
perti est. adeo ( ut est in sacris litteris ) male fundata ædifi-  
cia, ingruentibus ventis atque procellis, facili momento sol-  
vuntur. Hæc, & alia eiusmodi audienti Ataidio peracerba  
§ erant; sed acrior & præsentior erat sensus quotidianæ penuriæ,  
omnibus circa populis infensis infestisque. itaque ingraue-  
sciente in singulos dies annona, oryzae precium in modios à se-  
sterciiis binis ad quadragenos ferme peruenerat: iamque fames  
vrgebat; actumque de summa rerum procul dubio foret, ni  
per idipsum tempus cum com meatibus & modico militum  
supplemento, Simon Sodreus à Malaca, & à Mindanao Pin-  
tus, cuius paulo ante meminimus, affuissent. Hoc aucti  
subsidio Lusitani, variis eruptionibus Turutum castellum e-  
gregie munitum, itemque Palatiam, & Calmatam, & Gicum  
haud sine certamine capiunt. quibus victoriis laxatae dunta-  
xat in præsens angustia sunt: deficiente dein rursus commea-  
tu, imminutoque variis cladibus præsidio, premi denuo lon-  
ge vehementius capti, utique postquam commisso nauali cer-  
tamine cum Tidorensibus, præter consuetudinem, semel ite-  
rumque male pugnatum est. Ex eo tempore de maris posses-  
§ sione deiecti, egredi ex arce nusquam audebant: & diuina ma-  
gis benignitate, quam viribus humanis, in aduentum Anto-  
nij Galuani extracta obsidio est. Eduardi, cuius supra mentio  
est facta, filius erat Antonius, in Abassina legatione ad Ca-  
maranum insulam vita functi: vir excellenti cum in Deum su-  
perosque pietate ac religione; tum erga homines æquitate, &  
incorrupta in Regem suum fide; & super hæc, admirabili qua-  
dam nauticæ rei scientia: quippe gubernatorum, in syrtibus,  
euitandis & dirigendo cursu errata corrigere; desperantes, ut  
sæpe fit, de salute vectores nautasque confirmare; & morbo  
laborantes mira sedulitate suis etiam, ubi res ferret, impensis  
curare iamdiu solitus. Is, cum in India priuatam rem ageret,  
ex regijs repente litteris Molucarum præfectus ab Nonnio de-  
claratur. ac tamen non ignorabat quam affecta atque adeo  
exulcerata Molucensis esset res; tamen obsequio in Regem,  
& studio rei communis adductus, plenam laboris ac periculi  
præfecturam haud grauate suscepit. cumque ei, è filico regio,  
in stipendium & sumptus necessarios nummi tarde admodum



ac maligne præberentur ; sua ipse pecunia ( habebat autem in numerato non exiguam , qua negotiari sic cum industria pegeret , ad opes ingentes peruenire breui tempore potuisset ) & militem conduxit , & varios commeatus , & molas , & plumbum , & omnia generis ferramenta , quibus rebus carent Molucæ , coëmit . itemque ad propagandam Ternate sobolem , hostesque de spe deiiciendos eius coloniæ vel præfecturæ extinguendæ , Christianas mulieres aliquot secum auexit , quas ibi cum Lusitanis in matrimonio collocaret . Cum hoc apparatu à Cocino profectus , Malacam venit : inde per Borneum insulam ad Ternatem incolumis appulit . Descendenti , non præfectus modo , & vulgus militum ; sed etiam sacerdotes cum hymnis & sacris carminibus obuiam prodire , quasi ad certam eius præsidij salutem ac libertatem è cælo descenderet . Neque eos fefellit spes . quippe , expositis à Galuano commeatibus , annona primum leuari cæpta , ædilesque macello præpositi ; & in singulas res pretium statutum , quo ne pluris quæque vaniret . Præter hæc , ad clericorum disciplinam regendam , curandosque popularium animos , recentia Alphonsi Cardinalis Lusitani decreta , seu constitutiones ecclesiasticas Vicario tradidit . dein ad militiæ munera , & arcem vbi opus esset instaurandam , curas intendit . iustitiæque in suos , fortitudine & vigilantia in hostes , cum arma nunquam exueret , & pro vallo excubaret , & ad subita ac periculosa primus accurreret ; enixe operam dabat , vt omnes in salutari concordia atque in officio contineret . Ad Tidorem eo tempore constituerat moles belli , quo coniurati Reges , Aialo exsule assumpto , armatorum millia plus quinquaginta contraxerant . neque urbem tantum cinxerant muro fossaque , sed etiam , in præalta supra urbem rupe , castellum , arcis instar , extruxerant . Inde cum Ternatense infestum haberent littus , & prodeuntes ad piscationem & quotidiani victus ministeria Lusitanos exciperent ; veritus Galuanus ne per belli moram in pristinas recideret rerum omnium difficultates , missis primo Tidorem legatis , Reges ad superioris temporis offensiones voluntaria obliuione delendas , atque ad renouandum cum ingenti quæstu commercium eblandiri conatus est . dein , cum inflati nouo successu barbari omnem pacis mentionem asper-

narentur ,



## *Historiarum Indicarum*

narentur, atque adeo in Lusitanum nomen conuitia & probra iactarent; Galuanus, fufis ad Omnipotentem Deum precibus, & caelestium vniuersorum ope suppliciter implorata; rem est ausus portenti similem, & merito carituram fide; ni alia complura id genus euenta, hoc etiam ipsum omni suspitione mendacij apud equos rerum aestimatores eximerent. Naues habebat in portu maiores, non amplius quatuor: & praeter eas, aliquot leuiores nauigia. in classiculam hanc impositis circumter quadringentis armatis, quorum erant Lusitani centum & septuaginta, reliqui, Aerio & paucis exceptis, infimae sortis homines, ac Lusitanorum fere mancipia; Tristano Ataidio cum eius familiaribus amicisque ad custodiam arcis relicto, Tidorrem petit ultro; & nullis (incertum quare) hostium nauibus obuiam egressis, idonea statione extra idem teli anchoras iacit. inde obsidentem littora multitudinem, & situm urbis, ac totius circa regionis naturam attente praelustrat. Aduocato dein concilio, optimum visum, imminentem urbi rupem arcemque, ut in tali nullo metu ab hoste neglectam, inuadere. Ad eam rem Lusitani delecti centum & viginti; hisce additi est reliqua turba qui trecentorum summam explerent. caeteri, classem tueri, & ad hostem distinendum, huc illuc circumagere naues, & variis locis descensionem ostentare iussi. Galuanus interea, die qui fuit Indorum praesidi & Apostolo Thomae sacer, anno a partu Virginis supra sesquimillesimum trigesimo septimo, quendam est captiuus nactus peritum itineris ducem, remotiore ab urbe loco, circa quartam noctis vigiliam cum ea quam dixi manu descendit; silentique agmine & expedito, per syluestres maxime semitas ad montis verticem occulte succedit. Iam itineris magnam partem, lento gradu, lassitudinis vitandae causa, confecerat; cum orta lux, & micantes procul galeae, rem hosti prodidere. extemplo ad arma conclamatum horrenda cum vociferatione: quam, reperiens cussu multiplici, nemorum densitas, ac sinuosi conuallium anfractus augebant: & omni ex parte, quasi ad praedam haud dubiam, concursus illico fieri coeptus. Ante alios Aialus, quem ex amisso regno praecipuus vrebatur dolor, ad praecupandos transitus cum parte copiarum accurrit; & modica in planitie Lusitano est syluis egredienti sit obuiam, ibi contracta repente pugna Aialus



lus casside armatus, & maculis ferreis, prælongam vibrans vtraque manu romphæam, in hostes furibundus inuehitur: ac dum hastatis & fistulatoribus incautius obijcit se se, cum vndique peteretur, vulneribus aliquot acceptis, in arma procumbit; & simul, ut erat egregijs viribus, momento resurgit; ac dissimulato aliquandiu dolore ne suis trepidationem iniiceret, ante prima signa prælium ciere perrexit: dein, cum latius manaret sanguis, quippe nullo medicamento suppressus, linquente iam artus animo, & oculis offusa caligine, rursus occubuit; tantum ad stipatores effatus, ut inde se quam ocysime tollerent; ne canes (sic enim Lusitanos vocabat) optato ad ludibrium corpore potirentur. Vti iusserat, non sine periculo factum. & ipse quidem elatus ex acie, paulo post efflauit animam: reliqui attoniti casu Regis (ut est fugacissimum genus) extemplo terga verterunt; ac per inuia cautesque præruptas passim arma iactantes, pars nota nemorum latibula; pars urbem trepidi repetunt, ac venientem subsidio alteram aciem, per angustos calles vnâ secum auertunt; pars montis cacumen contento cursu occupare nituntur: horum maxime tergis institit Lusitanus; cæsisque compluribus, vno tantum amisso mancipio, immixtus fugientium turbæ in arcem irrupit. Ibi Galuanus tam insignem victoriam ac plane diuinam, Christo domino superisque gratulatus, ignes arci confestim iniecit prudenti consilio. quippe oppidani pariter & externi, vbi supra caput grassantes flammæ videre, subito pauore perculsi, cum imbelli plebe sese certatim è portis ac propugnaculis in apertum effundunt: Lusitanus interea, collectis vtcunque viribus; cum incitato clamore, ac tubarum cantu, ex arce decurrit; ac sine certamine vacuam defensoribus, refertam diuitijs urbem ingreditur. ad quas cum extremo periculo diripiendas ne cæca præceps auditate discurreret miles, ædificijs omnibus iussu Galvani subditæ faces: magnoque omnium dolore, quique ut in tutum suas opes eo congefserant; quique subiectam oculis adamauerant prædam; cuncta, exceptis com meatibus, intra paucas horas ardere, & ex ea quæ tardior ad fucam fuerat, urbana multitudo, capti plurimi, iuncusque in portu vnus, & actuaria nauigia permulta. Minutis dein prælijs terra marique fatigari hostis ceptus: quem ad huiusmodi machinas rudem adhuc, nihil eque ac tormēta Lusitana terrebāt.



## *Historiarum Indicarum*

simul etiam, prægravante multitudine, in tam parua insula cibariorum difficultas urgebat. Super hac, aduenis Regibus non sine causa iniectus timor; ne Lusitana clasfis aucta navium numero, in eorum fines impetum faceret: ac proinde (vti omnis ferme coniuratio, vbi proprii periculi incensit metus, quamlibet leui de causa dissoluitur) Tidorensi valere iussu, fœderati Reges domum quisque suam repente dilapsi. Eam occasionem Galuanus denuo tentandæ cum Tidorensi pacis idoneam ratus, si forte rebus aduersis ferociam exuisset; legatos ad eum & litteras misit: neque ita difficile fuit, desertum à tot auxilijs, & recenti clade perterritū, ad equitatē & cōcordiam reuocare, adnitente præsertim Cacile Rade, Regis fratre germano, qui inter ceteras causas, vulgata Galuani virtutū fama cōmotus, amicitiam & societatem cum eo vehementer optabat. Pacis conditiones fuere; vt Tidorensis ablata Lusitanis arma & machinas omnes redderet: caryophyllum insulæ totum Lusitani duntaxat Regis procuratoribus è Ternatenſi formula venderet: neminem contra Lusitanos aut armis, aut vlla iuuaret ope: Lusitani pretium sine dolo persoluerent; & vrbi reficiendæ vna cū insulanis instarent. Hæc in leges renouata societas est: eaq; magis in dies mutuis deinde congressibus donisque, & egregia in primis Galuani fide ac liberalitate coaluit. Inde aduersus Geilolium, minitantem adhuc, & de Christiana religione in primis pessime meritum, Galuanus classe profectus, Ternatem sæua tempestate relicitur. Ibi, quod statim navigationis Indicæ aderant dies, nefaria militum seditio rursus exorta. & missionem, & frugis priuatim auhendæ potestatem ferociter postulabant. eos, Galuanus, quando per vim coercere non poterat; tum verbis, tum exemplo ad officium reuocare conatus est. quippe, non solum ipse, contra aliorum consuetudinem, ab omni negotiatione prorsus abstinuit, sed etiam vitro sibi collatum à Tidorensi Rege proceribusq; magnum caryophylli numerum, in Regis Lusitani apothecas à scribis & custodibus iussu inferri. Sed videlicet nullum in rebus humanis remedium efficax est, vbi mentem, de celestium bonorum contemplatione deiectam, fœdus auaritiæ morbus inuasit. Facta conspiratione permulti collectas fruges surtim in naues imponunt: tum intentantes arma palam, si quis eos retinere aggress-



aggressus esset, non modo contra leges amicitiae, sed etiam contra iurisiurandi fidem, inter infestas gentes ducem repente destituunt, & impia velificatione in Indiam intendunt iter. neque tamen de facinore tam atroci vlla dein questio ab Indiæ Prætoribus habita. At Galuanus, quamquam asperis in rebus à magna suorum parte desertus; consilio tamen atque animo stetit. Ac primum, quod omnes in partes magnopere interesse cernebat; profugos & ipsa desperatione in furorem versos Ternatenses mitigare, & in patriam reuocare adhortationibus, monitis, ac præsertim illustribus iustitiæ & sanctimonix documentis instituit. quam ad rem, Tidorensum quoque suasiones haud mediocri momenti fuere. Paulatim ergo positis odijs, relictas dudum sedes & incunabula repetebant. Quominus frequentes redirent; Tabariæ desiderium (quippe nondum defunctum audierant) Aialo præsertim extincto, erat in causa. Aerium, inter cætera, quod & ætate minor, & è peregrina pellice natus esset, auersabantur. Galuanum orabant, vt innoxium Tabariam ab Indiæ Prætoris deposceret: atq; ipse interim arbitrato suo regnum administraret. Neque conditio erat spernenda, quandoquidem ex huiusmodi procuratione, præter cæteras utilitates, nullo prope negotio Galuanus ditari affatim poterat. Sed partim, credo, incertus vtrum ea res Ioanni Regi grata esset futura; partim haud ita decorum ratus, Christianum hominem in parentis pastorisque loco Mahometanis præesse; oblatum sibi honorem opesque, magno animo & excelso repudiavit: omniq; arte ac studio, muneribus, etiam è sua pecunia consecutus est, vt in patriam cuncti remigrarent, & communis concordix salutisque gratia, Tabaria interim omisso, Aerium Regem volentes agnoscerent. Hac maxime ratione Galuanus rem Ternatensem diu multumq; iactatam, haud sine magno labore ac difficultate restituit. Cæterum ab Geilolio, & Bacciano adhuc restabat bellum. Nec dubitauit Galuanus Regem vtrumque ad singulare certamen prouocare; vt vnus, aut alterius capite potius, quam multitudinis damno & vexatione, certamina finirentur: & in arenam haud dubie ventum esset, ni Rades, cuius modo meminimus, pro amicitia intercescisset. Hoc vel in primis adiutore & sequestro, non prouocatio tantum oppressa;



## *Historiarum Indicarum*

verum etiam inter Lusitanum & Reges ambos recôciliata pax,  
& longo interuallo renouata commercia. Post hæc, ad refi-  
ciendas vrbes per bellum dirutas, curæ conuersæ: qua in re fi-  
dem Tidorensi Galuanus egregie præstitit. dein, calcarijs in-  
sticatis, Ternatensem ipse arcem augere ædificijs & propugna-  
culis aggressus est: portusque aditum, antea insidiosum & per-  
angustum, scopulo qui medium occupabat, ferramentis exci-  
so, reddidit ampliorem. Ad hæc, Lusitanos colonos, contra-  
ctis ad sobolem nuptijs, hortando perpulit, priuatas ædes pro  
arundineis coementitijs facerent; puteos foderent; hortosq;  
& allatas ex India vites, & poma fererent; quam ipsam ad rem  
& ad cætera vitæ ministeria, largas aquas à duodecim ferme  
passuum millibus ad arcem vsque perduxit. Insuper Aerio Re-  
gi, ducta iam ad propagandam stirpem vxore, consulenti po-  
pularibus suis, & ædificandi æmulatione vehementer incenso,  
rectas vias atque transfuersas, & cæteram vrbs dimensionem  
summa eius voluntatè descripsit. neque ipsum modo Regem,  
sed omnes peræque incolas, omni officio & humanitate de-  
merebatur. Ex quo apud barbaros tantum huic viro beneuo-  
lentia & venerationis accessit; vt eum æque ac parentem cun-  
cti obseruarent: ipse quoque Rex, & magistratus; nihil fere  
§ grauioris negotij, nisi ex eius auctoritate susciperent. Per idē  
tempus, in Mauricis insulis archipirata quidam, haud contem-  
nenda classe non modo gentem importune vexabat; sed etiam  
Ternatenfibus atque adeo Lusitanis aperte minabatur. Aduer-  
sus id malum Galuanus caracoras aliquot ab Tidorensi Rege  
commodatas, cum paucis Lusitanis & auxiliariis aliis misit,  
Fernando Vinagrio sacerdote, viro impigro, expeditioni præ-  
posito. is, Christo duce ac præfide, insignem ex hoste victo-  
riam tulit. Archipirata, & ipsius frater, alijsque multi occi-  
dione occisi; cæteri turpem in fugam auersi. Inde Vinagrius  
ad Mauricas res componendas adhibito studio: cum plerosq;  
ex iis qui per metum à Christo paulo ante descuerant, in gra-  
tiam cum Ecclesia reduxit; tum alios quoque non paucos ad  
§ fidelium numerum aggregauit. Hanc latam adeo victoriam,  
alia mox neque magnitudine, neque fructu inferior subsequen-  
ta. Iuncti complures ab Iaua, Banda, Macazare, & Amboi-  
no insulis ad coemendum caryophyllum Molucas petebant. Ea  
re



re cognita Galuanus, ne per huiusce classis aduentum Lusitana commercia turbarentur; caracoris viginti quinque, Lusitanos haud amplius quadraginta, & auxiliares circiter quadringentos imposuit. Cum ea manu profectus Iacobus Lupius Azeuedius, Molucensi mari præpositus, ad Amboinum occurrit hosti; neque vlla pugnandi mora est facta. fusi fugatique magna cum cæde barbari; & ex ipsis iuncis, aliquot in potestatem venere. in ijs tormenta complura; telorum vis ingens; & pecuniæ non parum inuentum est. Inde territis late nationibus, victor Azeuedius Amboini oram legens, accolæ maris vniuersos aut voluntate, aut vi ad nomen Lusitanum adiunxit: ijs qui Atiuam, Mantelum, & Nuciualem præcipua eius littoris habent oppida, enixe petentibus, Christiana sacra per sacerdotes impertijt. ac demum rebus è sententia gestis, magna cum præda Ternatem reuertit. Iisdem fere diebus, Galuani & missu, Ioannes Focatia ad Papuas insulas delatus, consilio ac lenitate magis quam viribus, regulos omnes ad societatem atque amicitiam perduxit Regis Lusitani: præbitamque ab ijs magnam commeatus copiam, incolumi classe Ternatem aduexit. Hoc tam secundo rerum progressu; nequid ad gloriam Galuani præfecturæ deesset, ex alia quoque parte ostium repente ingens Euangelio patuit. Macazar est insula, cuius modo meminimus, leucas à Molucis in Orientem quinque circiter & quadraginta. Eadem ab Aquilone in Africum perpetuo tractu leucas ferme ducentas excurrit: atque, vt aliæ ferme vicinæ, plura in regna diuiditur. Abundat in alimenta mortalium oryza, sale, carnibus, pisce: in reliquos verò vsus atque delicias, candida veste, sandalo, ebore, auro, margaritis: & quæ corporum firmitas & studium est gentis, valentissimo in primis & exercitatisimo remige. Super hæc, omnibus ad euectionem subuectionemque scinditur multis; qui è montana introrsus regione decurrunt. Ex hac insula germani duo fratres, Ternate nuper baptismi sacramentum, sponse eodem & hortatore Galuano, susceperant: nouisque de more nominibus Antonius Galuanus alter, alter Michael vocabantur: ambo deinde cum in patriam reuertissent, Euangelio utique prædicando, magnam popularium partem ad contemptum fœtulum. Deorum, ac miram in cupiditatem nouæ ipsis quidem,



## *Historiarum Indicarum*

quidem, ac peregrinæ religionis impulerant. Ea re permoti, legationis munus iidem ad Galuanum gentis nomine haud ita grauate recipiunt; atque ad conciliandam facilius societatem, vario genere mercium, quas terra fert, in naues imposito, nobiles insuper aliquot adolescentes baptismi causa Ternatem adducunt. Periuicunda Lusitanis ea legatio fuit. Macazares confestim sacro fonte lustrati, & Franciscus Castrius notæ probitatis & industriæ vir, ad firmandam cum ea gente, & ineundam cum vicinis Regibus amicitiam, haud sine muneribus à Galuano missus, ex itinere primum ad insulam Celebiorum appulit Cetiganum. ibi clementer acceptus, Regem vna cum fratribus tribus, coniuge, ac filio; itemque è nobilitate ad centum & triginta, & è plebe non paucos ab idolorum seruitute, ad vnius Dei cultum, ingenti omnium animi voluptate conuertit: & elutis baptismate maculis, neophytos alios aliter; ipsum Regem nouo nomine Franciscum appellauit. duo & viginti dies in tam salutari negotio positi. dein, magno sui desiderio relicto, Castrius ad Mindanaum insulam accessit; ac legens oram, denique ad insigne oppidum Siliganum haud frustra delatus est. quippe Regem (quem Antoniū exinde Galuanum vocarunt) Reginamque, & filias duas, & è populo centum circiter & quinquaginta ad Euangelicam veritatem ab impia superstitione traduxit. In eadem insula baptizati cum vxoribus, fratribus, liberisque, & magna popularium turba Reges alij tres, Butuanus, Pimilanus, & Camiguinus: illorum vtrique Ioannes; huic Franciscus inditum nomen. His rebus peractis, à Mindanao Castrius cum ad Macazares vela fecisset, aduersis repente ventis, ac saua tempestate pæne submersus, Ternatem necessario rediit, Macazarense expeditione in aliud tempus dilata. Interea Galuanus magnopere lætus relatis in horreum Domini, quamquam oppido paucis ex infinita messe, manipulis; ad nouas operas comparandas diuino prorsus instinctu seminarium puerorum instituit. quod vnicum labenti Christianæ disciplinæ remedium, tanto deinde post Tridentina Synodus approbavit. In id Seminarium adlectos è varijs nationibus adolescentulos indolis bonæ, qui matura dein ætate, in sua quisque patria Euangelio insisterent; summa cura, ac diligentia, quoad permetteret occupare.



occupationes, per se, perque suos, Christianis & litteris im-  
buebat, & moribus. quin etiam, parentes barbaros, quo fa-  
cilius desiderium ferrent; & verbis, &, ubi res posceret, etiam  
donis, admirabili quadam benignitate ac mansuetudine lenie-  
bat. Hic Molucensi rei cursus Nonnio Indiam regente per no- §  
uennium fuit. Eodem Pratore Nonnio primus ex Episco-  
porum numero ad ecclesiasticam rem inspiciendam ordinan-  
damque, Fernandus è Franciscana familia in Indiam venit: ibi  
cum cæteris functionibus; tum sacramentis præsertim Confir-  
mationis, & Ordinis rite ministrandis, necnon per sacras  
conciones & priuata colloquia Lusitanis ad disciplinam atq;  
ad officium reuocandis; ethnicis ad Christianam allicien-  
dis fidem; Episcopale munus egregie præstitit. nec dubium,  
quin multa & ab hoc viro, & ab alijs in eo genere digna relatu  
& præconio, gesta sint. Sed admodum raræ tum quidem in  
ijs locis fuerunt litteræ: & si qui exstant scriptores; ij ferme  
institorum peregrinationes atque commercia, & ducum res  
bello gestas, ac domesticas plerunq; dissensiones per otium ex-  
plicant; Christianæ rei (quod caput erat) progressum, & in eru-  
diēda barbarie piorū labores & fortia facta, quasi ab instituto  
aliena, vel omnino prætereunt, vel mira breuitate perstringūt.  
Inter cæteros multa est mentio Zufolarini, quæ ad Goā obsidē- §  
dam, Albuquerque Prætor, venisse docuimus. Is deinde,  
honoris, & gratiæ causa Azedecam ab hero Idalcane appella-  
tus, & aliquot insuper auctus vicis atque castellis, ad amplas  
breui peruenit opes; ac Pondam vicum, de quo supra diximus,  
ad multa opportunum, & vrbi Goæ imminentem, lata fossa &  
egregij operis muro circumdedit. Veritus deinde propter in-  
terpositas offensiones (qui Mahometanis Regibus ac tyran-  
nis est mos) ne ab Idalcane per calumniam omnibus bonis ac  
fortunis euerteretur; occultum fœdus cum Nonnio Pratore  
percussit; atque ad Lusitanorum animos demerendos, Barde-  
fiana, & Salfetana portoria optimi & propinqui redditus, Ioan-  
ni Regi sponte assignauit. Missi confestim ab Goa exactores  
& scribæ, fixo in iis locis domicilio, aduentitiæ & insperatæ  
pecuniæ non exiguas colligebant summas. Haud ita multum  
dein effluxit temporis, cum Azedecan, vel purgatis, vt fit,  
suspicionibus; vel deprecatoribus apud Idalcane adhibitis,



## *Historiarum Indicarum*

pristinum gratiæ locum recepit : demptoque metu, poenitere capit hominem, proiectæ sine causa tantæ partis fructuum; & præualidæ gentis in eas terras inductæ. Multa visuntur apud Indos fanis dæmonum adiuncta domicilia, non modo viro- rum, sed fœminarum etiam; præsertim quæ defuncto marito sese cremandas eundem in rogam inferre non ausæ (quam vetustissimam esse consuetudinem, & Propertius, & Strabo demonstrant) metu deinde ignominia, lucem & celebritatem hominum fugiunt; & remotis ab vrbe locis intra septa quædam inclusæ, quod reliquum est vitæ, in execrabili Satanæ famulatu consumunt. Ex hisce vnum commodo situ, Lusitani Quæstres inuaserant: locus, de nomine cacodæmonis cui dicatus erat, Bardor appellabatur. Eos inde, facta manu, duce Solimano barbarus pellere, & vectigalia sibi vindicare frustra conatus, occasionem insuper Lusitanis præbuit, arcis egregia, quam Raciolum appellant, in iisdem finibus exstruendæ. Tum vero Azedecan, auctis externo milite copiis; nouem circiter millium summam expleuit: in quibus cataphracti erant equites quinquaginta, leuioris armaturæ ducenti. Cum hisce copiis idem Solimanus Raciolum accessit primo. dein ad eliciendum in infidas Lusitanum reducto exercitu, duas inde leucas, circa montis cuiusdam flexum, occulte confedit. Interea excitus à Raciolanis Ioânes Pereria Goæ præfectus, absente per eos dies Nonnio Pratore, cum Indis mille, & Lusitanis quadringentis; quorum erant equites non amplius centum, extemplo Raciolum accurrit. inde, cupiditate certaminis ad hostem parum explorato prouecti Lusitani, iniqua repente cernunt omnia; numerum peditum equitumque; naturam loci; corporum habitus. quippe, longe ab arce subsidioque, non modo cum multiplici, sed cum recenti adversario, fessis ac paucis prælium instabat. Solimanus interim, ad circumeundos Lusitanos extenuata maiorem in sinum acie; pedites ab lateribus; cataphractos in medio; expeditos equites centenos in vtroque cornu locauerat. iamque promotis agminibus, ad iactum missilium, quæ ignea erant pleraque, ventum erat; cum ex imminente periculo turbata Lusitanorum, præsertim auxilium, mentes; & insolitus quidam oculis animisque terror effusus. Ea re animad-  
uersa



uersa Ioannes confestim aciem interequitans; Quæ vos ( in-  
 „ quit ) noua formido, commilitones, quis præter consuetu-  
 „ dinem horror inuasit? scilicet ex longa defatigatione, incom-  
 „ modo loco deprehensi, necopinatam hostium multitudi-  
 „ nem extimescitis. quasi verò nunquam adhuc, ex eiusmodi  
 „ periculis ac difficultatibus, Dei benignitate, cum in-  
 „ columnes, tum victores etiam euaserimus. Nonne, qui rebus  
 „ in asperis ad hunc vsquem diem nobis maioribusq; nostris af-  
 „ fuit Christus, nunc quoque præsens ac propitius fore putan-  
 „ dus est? aut non idem hic est hostis. quem antea sepe fudistis?  
 „ cuius toties in terga pugastis? cui per hosce dies inuito ac  
 „ renitenti munitissimam arcem imposuistis? Proinde, state  
 „ animis viri, & omnem salutis spem, secundum immorta-  
 „ lem Deum, in dextris ac virtute reponite. Nam de receptu, ne  
 „ deliberatio quidem reliqua est vlla. Cædetur patenti campo fu-  
 „ gacissimus quisque, prius quam fractis metu viribus ad mœnia  
 „ Raciolana tanto interuallo perueniat. Inter hæc dicta, conspi-  
 „ catus intentos ad orbem claudendum hostes; Iordanem Frei-  
 „ ram cum delectis equitibus triginta, in cataphractos immittit.  
 „ ipse cum pugnacissimis nouem (nam reliquos tardabat metus)  
 „ antequam hostium cornua inter se coirent, in alterum, arden-  
 „ tibus animis impetum dat. Et quamcunque in partem sese fe-  
 „ rox iuuenum concitat globus, perturbant hostium signa, & ma-  
 „ iorem quam pro numero edunt stragem: atque instantibus nu-  
 „ per, vltro ipsi pauorem ac trepidationem incutiunt. Eo specta-  
 „ culo Solimanus accensus, ex altera parte cum suis in auersos  
 „ incurrit. ita abruptum ab reliqua acie cornu; & solutis ordi-  
 „ nibus, promiscue geri cæpta res est. Et Lusitani fociiq; cum  
 „ inter pugnae fugæque consilium aliquandiu trepidassent; pu-  
 „ dore demum per ignauiam deferendi ducis, & mutuis inter se  
 „ adhortationibus incitati, densata acie, & pariter clamore su-  
 „ blato, medios in hostes inferunt signa: & corrigendæ tardita-  
 „ tis ac demendæ ignominia studio, valida facta impressione,  
 „ hostem impellunt primo: dein redintegrato impetu prorsus a-  
 „ uertunt. Fusos inde pasim Pereria cum equitibus, ad pro-  
 „ ximum vsque flumen actiter insequutus, late cæcidit; cū qui-  
 „ dem Canarini & Decanij, ne in fuga dignoscerentur, virentes  
 „ ramos, quod fociorum Lusitani nominis erat insigne, capi-  
 „ tum



## *Historiarum Indicarum*

tum regumentis infererent: ex hostibus, eo praelio, præter captiuorum turbam, mille & septingenti desiderati. è Lusitanis & auxiliaribus, icti, sagittis ferme, complures; ne vnus quidem (quod portenti simile videatur) occisus. Tum castra, plena omnis opulentia, momento direpta. & Pereria, euidentissime plane Dei superumque auxilio, cuius maxime fiducia inierat pugnam, memorabili parta victoria, spolijs diues & barbarica suppellectili, Goam reuertit; omniq[ue] obuiam effusa ciuitate, cum laudibus, & cum solenni supplicatione ouans urbem introijt. At Azedecan, quamquam tristi nuntio percussus, non tamen iccirco abiicit belli consilia: quin. Solimano dimisso, cuius ductui iam toties male pugnarum erat, Carnabecum Turcam Asiaticum, virum & corporis robore, & armorum arte præstantem, & sub eo præfectos octodecim ex eadem natione conduxit. ij cum octingentis equitibus, & peditem quatuor millibus ad eadem vestigalia recuperanda profecti; rursus ab Lusitano vincuntur. Carnabecus ipse inter alios, ac Turcæ præfecti, eo praelio ad vnum omnes occisi. Neque tamen incruenta Lusitanis victoria fuit. promptissimi aliquot, partim profundis foueis hausti, quas consulto occæcauerant hostes; partim etiam ipsius Carnabeci manu perempti sunt. Ea pugna fractus tandem Azedecan, ab armis abscescit: & pacata in aliquot annos regione, Lusitanus traditam sibi vestigalium possessionem, haud sine magno prouentu retinuit.

*Libri Decimi Finis.*





# HISTORIARVM

## INDICARVM,

### LIBER VNDECIMVS.



VM hac à minoribus præfectis geruntur, ne ipsi quidem Nonnio Prætori fuit otiosa prouincia. Is ingentem nactus naualem apparatus, quem decedens Lupus Vasaus partim Goæ, partim Cocini reliquerat; ad expeditionem Dientem, quam Lusitani dudum coquebant, animum adiecit. ac primum, idoneos homines, magnis præmijs inuitatos, mercatorum specie Dium ex vrbe Goa præmisit: qui

cuncta probe cognoscerent; ac Lusitanas vires augendo verbis, Tocanem dynastam, Sacæ demortui fratrem, ad vitanda certamina, & componendam quauis conditione pacem impellerent; ac demum appropinquanti sibi omnia explorata clam ex vrbe renuntiarent. In horum opera & fide, quam multis



## *Historiarum Indicarum*

multis rebus perspectam habebat; magnam rei perficiendæ spem collocauerat Nonnius. Dein, satis prouisis omnibus, quæ ad rem pertinebant; diem ad conueniendum nauticis omnibus Ciaulum edixit. Ab Ciaulo profectus cum ornatisimis nauibus variæ formæ trecentis, in quibus erant Lusitanorum tria millia, Malabarium totidem, & Canarini bis mille; Damantum oppidum oræ Cambaicæ processit, metu desertum ab incolis. ibi, solenni peracto sacrificio, Antonius Petronius Franciscanus, pro concione cunctos ad obeunda fortiter militiæ munera, pellendosque ex vrbe Dio nefarios Christiani nominis hostes, Mahometanæ sectæ cultores, hortatus est. Ab Damano clasfis, præciso Cambaico sinu, Betelem tenuit. Hoc nomine insula est, perexiguo circuitu leucæ ferme vnus, angusto admodum freto à continenti disiuncta, difficili accessu, pæne vndique septa præruptis haud modicæ altitudinis rupibus. Ea, quod leucarum octo non amplius traiectu peropportune imminet in urbem Diu, & circumdato muro inexpugnabilis reddi facile poterat; ad eum locum muniendum paulo ante Cambaia Rex quendam è suis præfectis, Turcam uatione, cum duobus millibus armatorum, & structoribus operisque circiter mille transmiserat. Sed nondum eo peruenerat opus, vt arceri munimento externa vis posset. ac proinde repentinò tantæ clasfis aduentu perterriti milites, & præter cæteras difficultates etiam nauigijs ad transmittendum, vel accersenda è propinquo auxilia destituti; consilio habito, de arce honestis conditionibus tradenda consentiunt. Dux ipse, quo plus auctoritatis inesset legationi, accepta fide, ad colloquium prodiit. Petebat vti sibi cæterisque insula excedere, suæque secum exportare tuto liceret. Cui Prætor, insolito ferox apparatu, & audus rei gerendæ; ipsi quidem id petenti dare se dixit: cum reliquis, nisi permittentibus omnia, negauit ullam pacis conditionem esse. Hoc tam triste responsum in arcem relatum, mistam desperatione iram in militum pectoribus accendit. Extemplo regius Quæstor, ex obuiis trabibus raptim conferta rate, per tenebras pecuniam regiam in continentem auexit. hunc, nando subsequuti ex imbelli turba qui poterant. cæteri, fero & infando consilio, vxores, & liberos, & quæ habebant carissima, in vnum congesta cumulum,



lum, ea ipsa nocte succendunt. & ex vniuerso præsidio septingenti ferme, certo deuotionis genere, monachorum instar vertice capitis ad coronę seu diadematis figuram abraſo (adeo is ritus apud barbaras quoque nationes defunctum humanis curis animum, & ipsius prodigum vitę ſignificat) ad mortem fortiter oppetendam obſtinata mente coniurant. Inde cœci furore & amentia, non ſine probris conuitiisq̃ue, Luſitanum vario telorum genere ſuperne laceſſunt. Ea commotus audacia Prætor, non exſpectato, vti decreuerat, Solis ortu (& forte nox erat Lunę radijs admodum illuſtris) expoſito milite, à quatuor ſimul partibus adortus inchoatam arcem expugnat. Variis inde locis, vti ſe ſe paſſim conglobauerant hoſtes, atrociter dimicatum eſt. Dux ipſe cum egregiis aliquot, eques primo, tum pedes ingenti animo prælium ciens, haud inultus occubuit. Caſo duce, fuga in omnes partes illico fieri capta, cumq̃ue hinc infeſtę cuspides; inde vaſtę crepidines, & obſeſſum nauibus mare ad ſalutē obſtarent; vrgente metu alij per ſaxa cantesq̃ue ſe ſe deuoluunt; alij ſpecus & latibula circumſpiciunt: multi eminus traiecti miſſilibus, multi cominus gladio haftaue confoſſi, pauci admodum in ſeruitutem abducti. Cæterum vnius memorabile in primis exitium fuit. is, in anguſtijs deprehenſus, cum adhærentem lateri comitem interfectum, & in ſe deinceps intentam Luſitani lanceam cerneret; nulla cunctatione in vulnus ac ferrum vltro ſemet impellens; ad corpus aduerſarij per ipſum haſtile furibundus affluxit; & ſtriſta ſica, necopinantis abſcidit femur. ita, mutuis ictibus, alterius vterque ſanguine expleti, in eodem pene veſtigio torruerunt. E Luſitanis deſiderati nobiles viri ſeptendecim. vulnerati centum & viginti, quorum nonnulli poſtmodum exſpirarunt. Poſt hæc, euerſis, aut incenſis Cambæorum operibus; eorumq̃ue tormentis in claſſem acceptis, Prætor circa eandem inſulam octo ferme dies in anchoris ſtetit; nuntium ab exploratoribus de ſtatu rei Dienſis ibidem exſpectans. Ea mora ſaluti Dienſibus fuit. Siquidem per eos ipſos dies Muſtafà, & Soſar, qui nuper ab Adeni obſidione receſſerant, fugitiua, vti ſuprà demonſtratum eſt, Turcarum tyranni mancipia, nouam & conditionem & ſedem quærentes, Diu claſſe deuenere; ſecumq̃ue ſexcentos Turcas, Arabas mille & tre-

centos,



## *Historiarum Indicarum*

centos, & præter minora tormenta, basiliscos æneos egregiæ formæ tres in urbem inuexere. Hoc tam insperato subsidio magnopere confirmatus est Toca, cum paulo ante, Lusitanæ classis fama conterritus, ad deditiōem haud dubie inclinaret. Exinde, Mustafæ suaso, emissæ extra oppidum cum pretiosis rebus puerorum ac mulierum turba; reliquos oppidanos recensuit. inuenti qui arma ferre possent, præter novos auxiliares, vndecim fere millia; & omnes graui edicto vetiti egredi ex vrbe. Tum, eodem hortante atque adiuuante Mustafâ, stationes ad portas, in muris tormenta vigiliæque dispositæ: & sub præcipuas vrbis vias ætæ, & sulphureo puluere completi cuniculi; quibus, si in urbem irrupissent hostes, in extremam eorum perniciem ignis applicaretur; & intra ostium portus, quod ferrea catena claudere solitum esse docuimus, tres & septuaginta biremes instructæ: denique nihil omis- sum, quod ad urbem, præsertim à mari, firmandam tali tempore pertineret. Nonnius, vt dicebamus, consulto ad Betelem interea trahebat moram. dein, cum ij quos ob idipsum ab Goa præmiserat, neque ipsi venirent, neque nuntium aut litteras mitterent; quippe custodibus ad exitus omnes appositis; ignarus omnium quæ apud hostes fierent, ad incertum euentum à Betele Dium ire perrexit; haud dubie ratus, ad conspectum tantæ classis, motum aliquem in vrbe futurum. Vbi eo peruentum est, vixdum in salo iecerat anchoras, paratus per colloquia tentare animos incolarum, cum ex omnibus repente propugnaculis in classem vis ingens pilarum emissæ: è quibus, inspectante Nonnio, in ipsam pæne Prætoriam tres illatæ, magnam consternationem fecere. Inde subduta extra ictum classe, & omni spe non voluntariæ deditiōnis modo, sed etiam pacis abscissa; cum speculatoriis nauigijs missi qui è proximo quoad liceret lustrata oculis vrbe, certi quippiam referrent. ij, abrafo ad iacula vitanda littore, sensim progressi, ingentem aspiciunt pro muris hominum frequentiam, & nauium multitudinem in portu paratam, & omnia telis, atque tormentis, micantibusque cum ingenti sono flammis horrentia. Simul animaduertunt; non æque ab terra atque à mari difficilem oppugnationem esse: & sicubi descensio facta sit; à Septentrionibus maxime succedi ad mœnia



nia posse. Hisce rebus cognitis Prætor, quod in vnam rem naualem intentus, terrestris pugnae machinas & instrumenta nequaquam aduexerat; portus claustra perfringere; classemque adoriri, & simul è nauibus mœnia diuerberare decreuit. In eam rem postridie cum tormentis maioribus promotæ, centonibus & pluteis rectæ, scaphæ complures; triremibus ab tergo & ab latere adiunctis; quæ simulatque per stragem aliquis aditus daretur, ad irrumpendum inter volitantia tela militem audacter exponerent. Hæc, turbatis inexpectata hostium vi plerisque, aduerso insuper æstu, per metum ac trepidationem ægre fiebant: & simul periniqua erat verberandi conditio: quippe cum oppidani, è fixo & immobili, ad ictus destinatos tormenta librarent; Lusitani, è fluxo & instabili, prope in incertum mitterent tela. Ergo, vt in huiusmodi conditione, alteris nihil ferme illatum damni; ex alteris, propugnatores & nauæ non pauci pæne momento discerpti sunt: & quod vel in primis oppugnantium fregit animos, omnia ferme tormenta, maioribus quam quos paterentur bolis, & nimia defatigatione disrupta. Hoc tam infelici successu perculsus Nonnus; ne simul ad procellas ac tempestates expositam in salo classem haberet, simul milites remigesque tanto cum detrimento densissimis hostium globis obliiceret; sublatiis anchoris, frendens gemensque irritò conatu ad Betelem rediit. Inde, Antonio Saldania ad peruastandam Cambaicam oram cum parte copiarum relicto, cæteras ipse Goam reduxit incolumes. Eodem paulo post Saldania quoque rediit, inter cæteras clades enerfa Goga (id oppidi nomen) & onustis Indica fruge quinque & viginti paronibus vno incendio absumptis, Cambaici sinus custodia viro egregie forti Iacobo Sylueriæ tradita. Goæ hyems iure dicundo, & nauibus reficiendis exacta. deinde vbi sese æstas aperuit; Cialem Prætor classe contendit. is locus vltra Calecutum duas leucas apprimè nauigabili æstuario impositus, mire factus erat ad Arabum infestanda commercia; & Zamoeini consilia exploranda, conatusque opprimendos. Ibi ergo Prætor, quieto Calecutano, neque ad impediendam ædificationem auso inire certamen, arcem egregiam opere militari paucis diebus exstruxit. In eam rem agri pars cum palmetis ab Cialensi regulo præsentibus



## *Historiarum Indicarum*

sentibus nummis coempta : & regulus ipse , ne Zamorini vim extimesceret , in fidem ac societatem acceptus est . Eadem estate , Iacobus Sylueria , Tanahensem dynastam Dienfis auxilij fiducia tributum pendere recusantem aggressus , oppido exegit ; ipsumque oppidum egesta præda cremavit . In eodem tractu Bandoram , qui locus erat in Tocanis ditio-  
ne , & opere magno , & valido præsidio munitus , vi cepit , ac diruit . Multos præterea Cambaicæ oræ vicos evertit ; naues partim subductas exussit , partim cum oneribus Diu petentes excepit , aut depressit . adhuc , in remigum supplementum , quatuor millia captiuorum abducta ; & clausis vndique maritimis com meatibus , Dienfi portorio & annonæ , ingens eo anno detrimentum illatum est . eadem pene vastitas , eodem Sylueria duce , anno insequenti propioribus etiam vrbi Dio littoribus atque agris inuecta . villæ , vici , nauigia pas-  
sim incensa , multi mortales abducti . opulenta emporia duo , Pate , & Patane , haud sine certamine capta & direpta . Mangalor oppidum insigne (quo item nomine emporium est in ora Malabarica) dilapsis metu Mahometanis , deletum : ditati præda milites : nec parum pecuniæ in regios quoque fiscos redactum : im-  
pune cuncta : cum & nouo Cambaicæ Regi Badurio interioribus implicito bellis , haudquaquam vacaret opem ferre quamuis adeo laboranti oræ maritimæ ; & Melicus Tocan , circumferen-  
ti bellum Lusitano occurrere nec posset , nec satis auderet absente Mustafa , qui post repulsos ab Dio Lusitanos , in regiam cum læto nuncio ad præmia petenda , & venditandam in posterum operam suam Regi , haud sane magna Tocanis voluntate con-  
tenderat . Eo adiumento ac præsidio destitutus Tocan , omnibus circa populis ob recentia damna terrore nominis Lusitani perculsis , quicquid habebat copiarum ac virium , partim ad vr-  
bis Diycustodiam , partim ad muniendum Bazainum summo studio conferebat . Et Nōnius , ardens dolore susceptus ad Diu labis , ad eam eluendam , excidium Bazaini tacitus dudum apud se voluebat . Ac maturandum ratus antequam ab terrore populationum reficerentur hostium animi ; cum nauibus amplius octoginta , & bellatorum quatuor millibus , quorum dimidia pars Lusitani , cæteri Malabares aut Canarini erant , Ciaulum accessit . inde præmisso cum expeditis nauigijs Emmanue-



se Albuquerque ad portus introitum occupandum, ipse Iacobo Sylueria trans Dium accito, cum cætera classe subsequitur. Bazaini tum agebat Tocan magno equitum peditumque numero ad famam clasfis Lusitanæ contracto. Munitionis autem ratio erat huiusmodi. arcem idoneo loco edificatam habebant. præterea, ad euripi fauces, qua descensuros putabant hostes, propugnaculum excitant. inde perpetuam fossam immisso mari, itemque aggerem cum crebris turribus, magna tormentorum imposita vi, ad oppidum usque perduxerant. neque oppugnari, nisi eo munimento superato, arx poterat; & frequentia tectis loca protinus petenti hosti, nullis circa syluis, aut collibus, turres ab larere minabantur. Nonnius, duce transfuga locorum perito, paulo supra id quod dixi propugnaculum, tripartito exposuit copias. Primo agmini Iacobus Sylueria; secundo Fernandus Deza, & nauarchi aliquot præerant: postremum ducebat ipse. Vbi propius ad munitiones ventum est; Lusitani, tentata dein omnia propter altitudinem fossa; præter hostium oculos ad oppidum recta contendunt. Scilicet in prætereuntes confestim ex aggere sæuus imber telorum, perpetua iaculatione coniectus. quacunque audax incedit agmen; igniferæ bolides; plumbei ac ferrei globi, spicula densa circumuolant. Mirum profecto, & quod, nisi in potentiam Dei referatur, plane fidem excefferit. Puro & patenti littore, cum è turribus ac fenestellis undique peterentur; nemo prorsus omnium ictus est. quo miraculo commoti auxiliares multi, sponte dein Christianam fidem amplexi, cum ita affirmarent: angustis in rebus nullum omnino eque atque Lusitanorum Deum suis cultoribus esse præsentem atque propitium. Ad extremas munitiones cum decem amplius millibus armatorum se se Tocan ostendit. Ibi acrior concursu primo, quam perseverantior pugna fuit. Inuenientem se magno impetu Lusitanum, gladijsque & hastis aduersa ora & pectora fodientem, diutius non ferentes Mahometani; transmissio per pontem euripo, ad proximos montes celeri fuga succedunt, eodemque loco castra communiunt. Nec maior inclusis intra arcem, ad sustinendam oppugnationem animus fuit. Eminus conspicati suos abeuntes, & hostium aduentus agmen, extemplo se se per auersam arcis partem omnes eijciunt: traseoque pariter euripo, Tocanis vestigia subsequuntur. Per huc



## *Historiarum Indicarum*

modum arx oppidumque minore quam timebatur certamine in potestatem venit. è Mahometanis, tum in prælio, tum in fuga, cæsi quingenti & quinquaginta. è Lusitanis, desiderati non amplius sex. Multum ibi sulphurei pulueris & globorum inuentum; & maiora tormenta circiter quadringenta. Prætor, collaudato præcipue Sylueria & ijs qui in primo agmine dimicabant (nam ad secundam aciem & subsidia prælium non peruenerat) donisque militaribus de more distributis, in ipso littore castra posuit: inde quicquid erat fertile in agris, ferro ignique corruptum; opplete hostium fossæ; prorutum vallum; & arx ipsa, quod ad eam tuendam copię non suppetere, à fundamentis excisa. & Nonnius, per se perque suos egregie repenso barbaris quod ad Deum acceperat damno, incolumi classe Goam hyemandi causa repetiit. Circa idem tempus, Vgentanæ Rex, Malacensem oram crebris excursionibus habebat infestam. Aduersus eum cum quadringentis Lusitanis à Malaca profectus Stephanus Gamma, qui tum urbi præerat, aduerso flumine ad hostem subit: ac munitiones primum in itinere obiectas, exposito milite per vim cepit: dein, fugato Rege, desertam arcem & urbem Vgentanam incendit; tormenta complura, nauesque captiuas cum insigni laude victor Malacam reduxit. Sub hæc, è Lusitania cum onerariis quinque Martinus Alphonsus Sosa, præfectus maris Indici designatus, Goam defertur. Is, accepta à Nonno classe, nauibus quinque & triginta, in quibus erant Lusitani sexcenti, ad Damanum duxit oppugnandum. Cambaici littoris id quoque oppidum est, supra Bazainum leucas ferme quattuordecim. Carebat mœnibus, atque ob id ipsum oppidani cognito clasfis aduentu diffugerant. Sed firmi operis arcem Turcæ admisti Resbutis, quæ gens latrocinij dedita Carmania fines attingit, quingenti numero tuebantur. iidem, urbis aditum à portu. tumultuariis munitionibus crebrisque tormentis obseperant. Sosa in conspectum hostium delatus, leui primum nauigio ad contemplandam loci naturam & opera circunuectus est; dein vitato portu, nocte intempesta in asperum litus non sine periculo repente descendit; ac partim scalis ad muros appositis; partim, dum pauidi quidam elabuntur, portis raptim occupatis, in arcem irrupit. Intra mœnia, cum Turcis præsertim, intercluso exitu, atrociter dimica-



micatum est: ac, paucis exceptis qui inter primum, vt dixi, tumultum euaserant, ceteri ad vnum omnes occisi. è Lusitanis, decem desiderati non amplius: grauius isti complures. Arx triduo diruta, & solo, vix vt vestigium exstaret, æquata est. Inde victor Sosa totam Cambaicam oram, non sine magno terrore, Diu vsque percurrit. Capti, & euersi Damani fama Badurium valde commouit; præsertim quod eo ipso tempore grauiora ex alijs partibus bella imminerent. in quæ dum totis incumbit viribus, ne interim acrior ab tergo Lusitanus instaret; oratorem petendæ pacis ad Nonnium misit; scriptisque & obsignatis conditionibus, Ioanni Regi Bazainum, vicinasque insulas, quo in numero Salfetanæ sunt, & partem insuper continentis attribuit. Pace cum Lusitanis facta, sese ad ceteras expeditiones accinxit. Duo tum à Septentrione hostes in primis vrgebant: Cremenina vidua, Sangæ Regina, eximia specie, cæterum præferoci & plus quam virili ingenio, mulier; à prima ætate militiæ rudimentis imbuta, pugnamque inire, Amazonum instar, intrepide solita. itemque Mogores, Scythica gens, præpollens viribus; & cum finitimis Persis bello certare assueta. horum Rex M ramudius, à magno Tamberlane originem trahens, Mandoo dynasta sollicitante (cuius auunculum Badurius pepulerat regno) paulo ante in Cambaig fines valido cum exercitu irruerat. Inde sublatis animis Cremenina, filij gerens tutelam, statutum olim vectigal Badurio abnuebat pendere; coactisque duobus equitum, triginta peditum millibus, in regia se se continebat vrbe, cui nomen Citor. Hæ duæ maxime Badurium eo tempore distinebant curæ. Super ijs cum aliquandiu apud se deliberasset (nam consiliis admodum rarò utebatur) Sangam edomare quamprimum, dein Mogoribus omni conatu obuiam ire constituit. Apparatus autem huiusce expeditionis erat eiusmodi, quemadmodum à Christianis cognitum est, qui in eo ipso bello Badurii stipendia meruere. Equitum sub signis habebat centum & quinquaginta millia, è quibus erant grauis armaturæ triginta. peditatus quingentorum millium explebat summam. in ijs, externi variarum nationum ad quindecim millia. id erat exercitus robur. Fartacas & Abassinos, alij præfecti; Turcas trecentos Mustafa ducebat. accesserant Chri-



## *Historiarum Indicarum*

stiani captiui, demptis ad militiam vinculis, non plus octoginta; quorum erant quinquaginta Lusitani, Galli reliqui, incertum quo casu, Dobriga quam vocabant naui, ad Cambaicas regiones appulsi. Armorum telorumque omnis generis vim in gentē, curulia tormentā mille admodum ex ere cuncta parauerat: in iis, vastā magnitudinis quatuor basiliscos, intremente solo, centena singulos bouum iuga trahebant. Hisce addita sulphurei pulueris pilarumque plaustra quingenta, & libratores, ac fusoriæ artis magistri complures, cum omni iaculandi & conflandi instrumento. adhæc, turriti elephanti amplius ducenti; quaternas alij minores fistulas, maiusculas alij binas, totidemque milites dorso vectabant. Signato in stipendium auro argentoque, vehes onustæ quingentę, & super hæc omnia, Satrapæ ac dynastæ permulti cum suis quisque thesauris, & magno comitatu sequebantur. iam vero mercatorum, opificum, lixarumque & calorum summa iniri vix potetat. Cum hisce copiis è Mandoo regno, quod nuper intraserat, profectus in Sange fines Badurius ad Citorem castra posuit. Ea vrbs edito loco duodecim millia passuum obtinet ambitu, sumptuosis admodum ædificiis publice ac priuatim ornata, mœnibusque ac propugnaculis egregie cincta. itaque propter maiestatem ac pulchritudinem, quamquam arrogantis vocabulo, Mundi vmbella (id enim Citor gentis lingua significat) appellatur. & quoniam, si vel ad muros ex inferiore loco succedere Cambeus, vel fame subigere inclusos instaret; cum anceps oppugnatio, tum lenta fore videbatur obfidio, consilium cepit hosti plane exitiale: magnis operibus machinisque ex tuto urbem adoriundi. neque difficilis erat ei molitio quantauis, nimirum exsuperante ad omnia multitudine. Esgo ad vrbs radices, densum ordinem trabium, qui munientes ab tergo protegeret, pluteorum vice defixit. post hosce pluteos breui tempore duas turres, quæ fastigio altitudinem æquarent mœnium, latas pedes quinquaginta, è lapide & argilla excitauit; gradusque ad ascensum adstruxit. in iis turribus delecti bellatores, & muralia tormenta disposita cum neque in aduersis propugnaculis quenquam consistere paterentur; & tectis ac delubris vltimum haud dubie minarentur excidium; Regina, alioquin ad defensionem parata, admoto hoc



hoc tanto terrore despondit animum : perque notos calles, cum liberis & paucis familiaribus clam ex vrbe profugit. opidani frustra hostem aliquandiu arcere conati, ad extremum perditis rebus, in auri, argentique, & pretiosæ vestis aceruos (quos in idipsum ex publico priuatoque collegerant) ad Betelanam conuersi rabiem, subditis ignibus iniecere sese. tres ipsos dies incendium tenuit. ad septuaginta millia sexus vtriusque mortalium per eam desperationem absumpta. Sultanus urbem ingressus ingenti latitia, purpuratos amicosque nouis beneficiis ac vectigalibus auget; militi stipendia duplicat; se ipse adeo magnifice & elate circumspect, vt omnium Regum vni sibi, qui Citorem expugnasset, vmbellæ honorem deberi haud absurda quidem allusione iactaret. Verum, quæ sunt humanæ vicissitudines, non diuturnum Sultano eius vicoriæ gaudium fuit. aduentanti copiis auctis Mogori obuiam progressus; ad Docerem urbem semel, ad Mandoum iterum profligatur, & castris exuitur. inde cum ab aliis, tum ab ipso Mustafa desertus; barba, ne dignosceretur, abrafa, gregali cultu, perpaucis comitibus Diu vsque contendit. Ibi, à concepto pauore, de asportandis Mecam thesauris qui supererant, & regno relinquendo agitasse dicitur. Sed suorum hortatu retentus, dum hostes populando agro, & egerenda è desertis urbibus præda morantur, & ditati spoliis, vt fit, patriam cogitant; interim ad opem à Solimano Turcarum tyranno petendam oratores misit: iis dona ad ipsum Turcam data, quorum æstimatio ad sexcentorum millium aureorum summam ascenderet; ad milites vero quam exercitatissimos (nam id vnum ab Turca implorabat auxilium) mercede conducendos, magna pecuniæ vis. Hoc in præsentia reparandi belli consilium Badurius cepit. Veritus deinde, ne serum afflictis rebus id remedium esset; fracta demum superbia, Sossam ab Ciaulo (nam in ea tum statione classem habebat) dein ab Goa Prætorem ipsum Nonnium ad se per legatos ac litteras inuitauit: iisque, modo partem capefferent belli; potestatem arcis ad Diu edificandæ (quod frustra iam toties omni arte quæsierant) ultro detulit. Hisce nuntiis allatis, ab neutro in tam præclara occasione cessatum est. Sosa prior, tum Nonnius Diu instructa classe contendunt. Ibi nouis vtrunque fœde-



## *Historiarum Indicarum*

ris & amicitia legibus in publicas tabulas testato relatis, designati communi consensu fines arcis, in extremo insulae promontorio. qui locus imminet in ipsum introitum portus, ut claustra maris haud dubie Lusitani tenerent. Annus tum agebatur seculi huiusce trigesimus quintus. Area dimensa, confestim ad structuram admotae manus, non fabris tantum & nautali turba, sed ipsis etiam militibus & praefectis enixe rem adiuuantibus. Triquetra, ut pote in promontorium desinens, loci est figura. iactis fundamentis, ab aperto mari ad interiorum tumulum, e regione oppidi, murus est ductus pedum septendecim crassitudine, altus ad coronam usque viginti. in eo tumulo, rotunda, uti mos tum erat, cespite ingesto erigitur ante omnia turris dodrantium nonaginta diametro. Thomaea appellata, quod eius Apostoli festo die exordium sumperat: inde rursus ad alterum insulae marginem continuata moenia sunt; qua rupes abscissae portum attingunt. ibi turris altera extructa diametro dodrantium sexaginta. Huic ab Diuo Iacobo Hispaniarum praeside inditum nomen. Muris fossa circumdata quoad cautes & praecipitia tulere. Inter duas turres medio ferme spatio, portam cum lorica in urbem aperiunt. intra moenia sacellum, & praefecto praesidij militibusque testata militariter excitant. Per hunc modum in praesentia duntaxat arx ab urbe intersepta est; laterum munitio, quod ea mari alluuntur, in aliud tempus reiecta. Caterum opus undequingagesimo die, non sine Sultani admiratione perfectum. Simul, ad recuperandum in Cambaiae finibus Variuenem pagum, arcemque appositam Indo flumini, missus rogatu Sultani Vascus Petreius a Sancto Pelagio cum Lusitanis ducentis & quinquaginta; Sofare adiuncto cum Turcis trecentis. Mogores centum & quinquaginta, incenso pago, arcem obtinebant. ij, quandiu leuioribus missilibus dimicatum est, hostibus egregie restitere. Ast ubi prouectis e classe maioribus tormentis moenia quati coepta; diffisi viribus arcem deferuere. Ita Variuenes denuo in Sultani potestatem redigitur. Praeterea in maritima Cambaiae oppida praecipua Lusitanorum manipuli aliquot praesidij causa profecti. cuius auxilij fama e longinquo, ut fit, in maius aucta, retardatus Mogor; spoliis Cambaianis graue exercitum trahens, instante iam hyeme,



me, domum reuertit. Is Mogorici belli finis Badurio fuit. Inde Sultanus ad refouenda quæ recentibus cladibus afflicta & prostrata iacebant, itemque ad continendos in fide populares intendit animum. quippe, non pauci ea tempestate, Sultani tyrannidis iugum excutere conabantur. Per eosdem fere dies, ad naualem nominis Lusitani gloriam vnius viri virtute ac felicitate, haud mediocris accessio facta est. Iacobus Botellius erat nauarchus egregie strenuus, idemque maritimæ scientiæ laude præcellens. is, cum aliquot annos in India & Emmanueli & Ioanni Regibus operam fortem ac fidelem nauasset; in Lusitaniam deinde redijt ad præmia de more petenda. ibi dum suam agit causam, resque, vt fit, ab se gestas exponit; ab inuidis in crimen repente vocatur; quod fretus nauigandi peritia, Magalianis exemplo, res nouas cum regni periculo moliretur; atque ad Regem Galliæ, qui tum erat Franciscus eo nomine Primus, trāsfrugere cogitaret. Per eam criminationem oppressus, relegatur in Indiam. in eo exilio, non tam de patria, quàm de existimatione sollicitus, id maxime laborabat, quo pacto iniquorum calumnias refelleret factis; ac suam in Regem obseruantiam & fidem, insigni aliquo documento probaret. Iuncta per id tempus inter Lusitanos, & Sultanum amicitia, locoque ad arcem Diensem dato, quod Ioannes dudum ardentè optabat; pergratum se Regi facturum existimauit, si omnes tam latè rei nuncios celeritate præuerteret. Modicam biremem pedes minus octodecim longam, sex latam habebat, ære suo in bellicos vsus exstructam. In eam egregijs aliquot nautis, ignaris consilij, assumptis, (quos in itinere deinde tumultuantes partim donis mitigauit; partim metu minisque coercuit) tam paruo nauigio protinus Lusitaniam petere intendit. Dabulum ab Cocino prouectus, præciso Indico mari, ad Arabiæ littora vehitur; & auatione facta, cum ex eo loco ad Bonæ spei promontoriū incredibili audacia processisset; inter flectendum aliquoties pene merso actuario, caligine tum obtectam insulam Sanctæ Helenæ præteruectus, contento cursu Tertias, ac demum Olisiponem per summos labores atque pericula tenuit: resq; ad Diem gestas ab Lusitanis, libentissimo narrauit Regi: quam narrationem ab Nonnio Prætorè mox nuncij & litteræ, deflorata iam eius nouitatis gratia, comprobarunt. ita, non modo purgatus



## *Historiarum Indicarum*

Ioanni, sed etiam præmijs donatus, patriæ redditur. Per multos dies in ore omnium ea nauigatio fuit. Quod si paria tam fortibus ausis vir sortitus esset scriptorum ingenia, scilicet Argo illa, tot poetarum carminibus inclyta, præ Botelliana biremi haud immerito rideretur. Compositis vtcunque ad Diu rebus (nam inde diuertit oratio) Prætor ad arcis tutelam relicto cum octingentis militibus, & idoneo tormentorum apparatu, Emmanule Sosa, Goam hybernandi causa reuertit. Eodem tempore bellum atrox inter Zamorinum, & Cocinensem exarserat. § Cocinensi, pro amicitia missus confestim auxilio, cum virtutis expertæ militibus, Martinus Alphonsus Sosa. is, conantem ingenti exercitu in Cocinensem agrum irrumpere Zamorinum, ad Repelini vada, Eduardi Patieci quondam nobilitata victorijs, parua item manu, magna cum laude represcit. Repelini regulum, Zamorini socium, ex oppido per vim exegit: dein ad naues reuersus; Calecutanam classem ad Couletem oræ Malabaricæ fudit, fugauitque. ac rebus terra marique præclare gestis, Lusitani nominis gloriam apud eas gentes non parum auxit. § Inter hæc, Sultanum Badurium, vel ab ingenij leuitate; vel quod Prætor non pro spe copias ad persequendum bello Mogorem misisset; pœnitere cœpit indomitæ gentis in suum regnum admittæ. Ninarao Dienfi præfecto mandat, vti extemplo per speciem cingendi ex omni parte oppidi, & includendi quod in extremo patebat regij stabuli, modico interuallo murum arcis Lusitanæ prætendat. Id cum se Lusitani passuros negarent, quod ex eo munimento periculum ingens immineret arcis; elatus iracundia Sultanus, conuitia in eos, & minas intemperanter effudit: dein, simulata rursus amicitia; incautos adoriri, atque adeo Prætorem ipsum, vt ferunt, simulatque rediret, ad epulas inuitatum opprimere statuit. Super hæc, ad distinendas quâmaxime Lusitanas vires, missis clam litteris nuncijsque, Zamorinum cæterosque eius oræ dynastas in Lusitanum instigabat nomen. Prætor, pluribus ac minime obscuris indicijs fraude comperta, ineunte seculi huius anno trigesimoseptimo; nauibus triginta, in quibus erant Lusitani quingenti, Diu iter edixit. Eodem cum sua classe Martinum Alphonsum ex ore Malabarica subsequi iubet; paratus, vbi res facultatem daret, Sultani insidias anteuertere. Ea facultas opinione celerius oblata. Cum



Cum enim in Dienſi portu ſub arcem iactis anchoris Prætor morbum egregie ſimulans, Regi ſalutem nuntiari iuſſiſſet; ac ſe, quominus ad eum adiret, valetudine prohiberi; Sultanus, nimirum ad ſua tegenda conſilia, ultro ipſe parua biremi ad inuiſendum in prætoria Nonnium acceſſit, venatorio amiſtu viridi, atro capitis diademate, gladio inaurato ſuccinctus. Vehebantur eodem nauigio, præter Emmanuelem Soſam (quem ipſe pro amicitia ex arce euocarat) Satrapæ vel amici non amplius tredecim; præterea pueri duo, regium pugionem alter, pharetram alter & arcum de more geſtabant. Lembi quatuor cum cætera familia ſequebantur. Vbi ad prætoriam applicuit, conſcendenti, Nonnius aperto capite obuiam ad ſcalas magna cum obſequij ſignificatione progreditur; acceptumque perhonorifice, in puppim inſtar cubiculi, regio apparatu exornatam induxit. intromiſſi cum eo, præter interpretem & puerum vnum, præcipui Satrapæ tres. in prætoria Luſitani milites erant ducenti. Scilicet ingrediens Rex, à conſciis arcanorum illico morti deſtinatus: intentique ad imperia exſequenda, ſuſpenſo omnes exſpectabant animo, quam mox Prætor ad occidionem vocaret. Sed apud Nonnium, tantisper dum in naui moratur Sultanus, hoſpitii valuit fas. Taciti ambo, & alter concepti facinoris, alter aditi periculi magnitudine conſuſi, aliquandiu perſitiſſe dicuntur. ad extremum Sultanus, cum à ſuis Perſico ſermone quæſiſſet, num in pergula quæ ad gubernaculum eſt, armati laterent; reſponſumque eſſet, nihil videri tale; tandem, proſequente officij cauſa Nonnio, ad ſcalas rediit, ſuamque in biremem ſaltu ſe miſit, deſunctum periculo vana opinione confidens. At Nonnius, vti abeuntem vidit, quaſi omni religione ſolutus, conſeſſim ſuos aſpera voce vultuque ceſſatores increpitat. Illi, dudum ad cædem inſtructi, in expedita nauigia extemplo deſiliunt; contentoque remigio Sultanum intra Luſitana præſidia claſſemque deprehenſum inuadunt. Emmanuel Soſa cum promptiſſimis in regiam è ſua naui tranſcendit. Alij ab lateribus circumſiſtunt. Atrox circa Regem pugna cooritur. multi vtrinque vulnerantur, aut cadunt. in iis Soſa, ab Soſaris genero, quem Tigrem muudi à virtute appellabant, gladio conſoſſus, in mare proiicitur; & puer is, qui pharetram & arcum



## *Historiarum Indicarum*

cum Sultani ferebat, artis sagittarie peritissimus, octodecim spiculis totidem Lusitanos, nullo prorsus in irritum misso, confixit: atque ipse ad extremum glande traiectus occubuit. In eo tumultu, armate celoces regie tres à Mangalore superueniunt; in quibus erant mercenarij Turce complures. ij, vt Regem in extremo discrimine circumuentum videre; haudquaquam exterriti, ad eum eripiendum per media hostium tela nauesque perrumpunt. neque à prelio abstinere, quoad affluente in singula momenta maiore Lusitanorum numero, ad vnum omnes interfecti sunt. interea regiam nauem promiscua cedes vacuam epibatis fecerat. Rex ipse, vulnere accepto, nautis ac remigibus omni ope adhortandis instabat. iam prope littus erat naus, cum è remigibus duo tresve, vno tormenti ictu discerpti sunt. inde biremis, presertim estu recedente, transuersa repente vadis inhesit. neque segniter Sultanus ad vicinam salutem in mare defiliit. sed nimirum frustra eluctanti extremus aderat dies. inter enatandum, affecto corpore, cum in aduersos fluctus aliquandiu tetendisset; denique ad Lusitanum actuarium, cui preerat Tristanus Paiua Scalabitanus, ipso aquarum impetu abripitur. ibi, spem inter ac metum, cum ingentibus promissis ac precibus vt reciperetur, qua Regem, qua Sultanium se clamitans miser, dum illi remum ad euadendum porrigit Paiua; preter expectationem, à quodam è nautis infime sortis homine, conto seu hasta conficitur. Exanime corpus cum diutius fluitasset, subsidit deinde, neque vnquam apparuit. Ita, opulentus in primis Indiæ Regum, cum nuper maria terrasque sui nominis terrore compleisset; ab ijs demum quos magna mercede conduxerat, teterimo genere leti, suorum in conspectu peremptus, cecitatem humani consilij, & vanitatem eorum quæ vulgo solida ac præclara putantur, exitu comprobauit. Ex ijs qui pugnae superfuerant, semineces aliquot in classem accepti: quo in numero Sofarem Nonnius clementer habitum, curatis vulneribus, misit ad comprimendos in vrbe tumultus. namque omnis multitudo (& erat eo tempore frequentissima) vt in eiusmodi perturbatione rerum, incendij ac direptionis metu perculsi, ad portas ac muros, fugæ causa ruebant eo impetu, vt, præ conferta in angustijs turba, elisi aut obtriti sint aliquot.



is paor ac trepidatio, Sofaris demum aduentu atque auctori-  
tate sedatus. Badurij mors, non tam interfe&toribus glorio-  
sa, quam læta ijs gentibus fuit: foedam quippe in populares ry-  
rannidem exercuerat: vitiis omnibus à pueritia deditus; nu-  
minum contemptor; æque sui prodigus, & rapax alieni; po-  
tentie virumque per libidinem & sæuitiam ostentator dirus:  
multos per calumniam omnibus fortunis euerterat; multis be-  
neficia dederat idem, ademeratque; multos etiam ex amicis,  
in ijs duos Iazij filios, vt Diu inde reciperet, omnibus tor-  
mentis excruciatos necarat. Ergo, tot scelerum sibi conscius,  
adeo omnes homines, omnia loca temporaque suspecta habe-  
bat; vt cibum suis ipse sibi pararet manibus, perque summam  
indignitatē, principis simul & coqui munere fungeretur. Quo  
magis mirandum est, ad inuisendum Prætorem venisse tam exi-  
guo comitatu. Sed illum videlicet vltrices furie in eam amen-  
tiam impulerunt; vt quibus perniciem extremam haud obscu-  
re machinabatur, eorum potestati semet vel nimis callida si-  
mulatione, vel stolidi temeritate permetteret. Sublato Sulta-  
no, tota insula in Lusitanam ditionem extemplo concessit. Cu-  
stodes ad castella tuenda, itemque vectigalibus in portu exi-  
gendis ad Diu atque ad Rumæpolim (nam eo quoque faci-  
li appulsu commeabant naues) scripturæ magistri à Prætore di-  
sposti. In regijs thesauris haud ita multum pecuniæ inuentum:  
in horreis vero & armamentariis, commeatum & instrumen-  
ti bellici omnis generis ingens copia. in naualibus etiam haud  
exiguus nauium variæ formæ numerus. omnium ratio in co-  
dices à Quæstoribus relata. Neque multo post, contra omnes  
belli casus arx ab vtraque parte, qua in mare vergit, muro cir-  
cundari cæpta; & è vasto specu, in quem medio ferme spatio  
tellus recesserat; admodum capax effecta cisterna; & euerfa  
Rumæpoli, quod ad eius præsidium copiæ non suppeterent,  
eius loco nouum propugnaculum excitatum est. Dum hæc pa-  
rantur, quidam è Gangaridum gente, quam hodie Bengalam  
vocant, ad Prætorem adiit, natus, vt ferebatur, annos tre-  
centos triginta quinque. neque mendacij suspicio suberat: nam  
& seniores qui tum erant, se de hoc eodem grandæuo aiebant  
à maioribus accepisse; & ipse filium habebat nonagenarium;  
& cum litteram nosset nullam, quæ referebatur ab eo de ve-  
terum



## *Historiarum Indicarum*

terum gestis rebus, ad fidem annalium optime congruebant. Huic aliquoties iam deciderant dentes, alijs continuo subnascentibus: & barba vbi prorsus incanuiisset, in atrum denuo colorem, idque paulatim, semet ipsa vertebat. ante centesimum annum idola coluerat: inde æque miserabili errore ad nefariam Mahometis transierat sectam. is propter miraculi nouitatem Sultani stipendiis ali consuetus, idem vitæ subsidium ab Nonnio petijt: Nonnius haud grauate assignauit: dein arcis custodia cum sexcentis fere militibus Antonio Sylueriæ commissa, Goam, vti solebat, in hyberna se contulit. Vulgato

§ Sultani casu, Cambaiæ procures Mamudium puerum, eius sorore genitum, creant Regem. rectores pueritiæ, iidemque tutores regni, tres, Driacan, Madremalucus, Alucan adiuncti. Ad hosce, post Nonnij profectionem, Sofar, vel ob nouas offensiones, vel Christianæ religionis odio in Lusitanos accensus, omnibus suis rebus miro silentio in tutum auectis (& erat totius ciuitatis longe ditissimus) triginta ferme leucarum itinere ad urbem Madabam ab Dio contendit. iamque ad bellum sponte inclinatos, facili negotio perpulit, vt omni conatu ad pellendos ex arce Lusitanos incumberent. Confestim habito delectu, conscripta decem peditum, quinque equitum millia. Alucan dux iis copiis datur. Præterea Sofar, egregiæ virtutis pedites ter mille, equites mille suo ære conduxit. Pari ferme imperio vterque ex vrbe Madaba Iunio mense profecti, non longe ab Rumæpolj castra locant. Ex recentibus eius loci ruinis, continuo Lusitani in nouum necdum omnino absolutum, de quo dixi, castellum sese recipiunt. Id castellum Sofar, Alucane interim operibus occupato, cum suis magno impetu adortus, dum muros incautius subit; altera manu plumbeo globo transfixa, prælio excessit. Eo vulnere spatium Lusitanis datum perficiendo castello; itemque cisternæ intra arcem, conuectis è vicino aquis, ad iustam altitudinem implendæ. ac primo consilium Antonij Sylueriæ fuit, totam insulam tueri, atque ob idipsum nauarchos aliquot, cum suo quemque manipulo, ad loca idonea toto freto disposuit, qui transitum hostium ex continente impedirent. Simul, quoniam Diensem populum aliena ab se voluntate, multosque institorum habitus peregrinos milites in vrbe versari didicerat; eorum cœtus aliquo-



aliquoties vi minisque discussit; arma plerisque ademit; & mercatores quatuor, in primis pecuniosos, qui obsidum loco essent, repente in arcem arripuit. Dein, cum promotis munitionibus Alucan fretum omne tormentis infestum faceret; nec possent sine perniciē Lusitani diutius in ea statione perstare: nauibus insuper aliquot tormentisque, alieno sane tempore, subitæ procellæ impetu amissis; Antonius, de suorum sententia denique relicta insula, nauarchos in arcem recepit Rumeo castello Franciscum Patiecum, adiunctis ex vniuerso præsidio militibus ad septuaginta, præposuit. in marino propugnaculo, quod in ipso aditu portus olim Iazius extruxerat, Franciscum Goueam cum delectis locauit. itemque in arce, prout res postulabat, aliis alias partes custodiendas attribuit. Relicta ab Lusitanis insula, confestim hostes libero transitu summa ciuium gratulatione in urbem admissi. Alucan regiis in ædibus procul ab hoste confedit: neque in aleam pugnæ, grandi iam ætate vir, sese facile committebat. Sofar, prope arcis mœnia locum cepit, atque communiit. Inde per occasionem leuiæ certamina feri cæpta, quibus ferme superior Lusitana res erat: duce plerunque Lupo Sosa Cotinio, qui cum præsidio lignatoribus aderat, idemque postea totam hanc obsidionem duobus libris diligenter est persecutus. Dum hæc in Cambaia geruntur; Ottomanus interea alijs aliisque Badurij nuntiis precibusque fatigatus, ac demum de eiusdem cæde ab vxore vidua & profuga coram edoctus; non tam ad laceffendum bello Mogorem, quam ad pellendos ex India Lusitanos, & Orientis regna ad suum imperium adiungenda, conatus omnes adhibuit. Classē ad Suezium, cura Abrahami purpurati ædificatam & instructam habebat maiorum nauium (quarum pleræque remis agebantur) ad sexaginta quatuor: ad quas accessere deinde Cambaicæ septem, Malabaricæ tres. Ei classi cū summa potestate præposuit Solimanum Peloponnesium, præsidem Aegypti, virum enormi non minus adipe, quam auaritia & crudelitate notissimum. huic, remigum ad septem milia, bellatorum sex attributa; in quibus erant Ianizari seu prætoriani mille quingenti: Turcæ bis mille; aliarum gentium ceteri, maritimæ ferme rei callentes; qui & militum, vbi opus esset, & nautarum partes obirent. Solimanus, lustratis ad Suezium



## *Historiarum Indicarum*

zium copiis, cum remigum pars imperium detrectaret; ductos vno imperio iussit occidi. eo metu seditione compressa, profectus, ad Giddam appulit urbem ab incolis metu relictam. dynasta, cui Solimani rapacitas & immanitas haud erat ignota, cum popularibus in auia loca secesserat. Ab Gidda ad Camaranum, inde ad Zebitum traiecit clasfis. Nocoda Hamedius Turca oppido imperabat. is, large & munifice accepto Solimano, eiusdem iussu repente securi percutitur. oppidum Mustafæ Mammaluco donatum. Ab Zebito Adenum superatis faucibus ventum est: præmissis iam ante legatis, qui ab Rege com meatum, vacuasque in vrbe ædes curandis ægrotis pro amicitia peterent. vtrumque cum cura præstitit Rex. & alimenta in classem, & hospitium laborantibus datum. in id hospitium, simulato morbo, singuli milites à quatuor valentibus à mari transuehebantur, armis in lectulo sub veste contextis. per eam fallaciam, nihil eiusmodi suspicante populo, quingenti paulatim intromissi. Tum Solimanus ex composito per satellites Regem ad naues accersit. ille, cum suæ dignitatis haudquaquam oblitus, indignabundus abnueret; confestim insidiatoribus quod iam ante conuenerat è classe proponitur signum. ij cum armis extemplo coorti, stupente ad inopinatam rem ciuitate, regiam circumstant, comprehensumque Regem ad Solimanum vi pertrahunt. Ibi superbe interrogatus ab eo, cur tertium iam diem ad se officij causa venire distulisset; cum liberius responderet, quam prædonis aures ferre consueissent arreptos propalam ex ipsius prætorix nauis antennis suspenditur. Vrbe dein crudelem in modum direpta, præsidioque imposito, Solimanus ex eo portu soluit. ac tamen ex Ottomani mandatis Goam primo intederat cursum, tamen mutato postmodum consilio, Dium flexit, haud dubius quin facili negotio Lusitanam esset expugnaturus arcem; ac simul potiturus insula magni ad vniuersam Indiam obtinendam momenti. qua tota de re cum litteras ab Sofare iamdudum accepisset, Sofarem deinde ipsum in itinere ad leucas ab Dio circiter quindecim obuium habuit. Interea de Turcarum aduentu & ante rumor, & ipsi postremo speculatores ad Antonium Sylueriam attulerant. Ille tam multis variisque terroribus minime fractus; pro ea quam habebat copia



pia vigilias intendit ; custodias auget ; munitiones instaurat :  
 simul , ad petendum à Prætore subsidium nuntios Goam cum  
 epistolis mittit . iam Turcæ appropinquabant , in hunc fere  
 modum instructi . dextrum cornu è quatuordecim triremi-  
 bus , quas regias vocant , in altum Solimanus extenderat . si-  
 nistrum , è triremibus non amplius septem , propius ad ter-  
 ram admouerat . medium locum tenebant onerariæ , totum  
 agmen reliquæ triremes & rostratæ claudebant . Vt in con-  
 spectu fuit clasfis ; ad nobiles qui ad spectaculum ex arce  
 conuenerant , Sylueria perquam serena fronte conuersus ; En ,  
 „ inquit , viri , tempus , acceptam à maioribus bellicam glo-  
 „ riam , debitamque tum Deo , tum Regi nostro fidem no-  
 „ bis ob oculos proponendi . horum vtrumque si attentis ani-  
 „ mis intuebimur , profecto labores omnes atque periculâ ,  
 „ quæ ex hostili tanto tamque multiplici apparatu nobis im-  
 „ pendent , præ officij ac pietatis fructu leuia ducemus . E-  
 „ quidem , & ex ipsa quam agimus causa , & ex vestra virtute  
 „ commilitones , magna in spe sum , fore vt de immanibus hi-  
 „ sce barbaris illustrem intra paucos dies victoriam reporte-  
 „ mus . qua vos eadem fiducia quoniam teneri certo scio ; su-  
 „ peruacaneum reor hoc loco trophæa recensere , quæ toties  
 „ iam ex communibus & Christianæ religionis , & Lusitani  
 „ sanguinis hostibus , Deo bene iuuante , retulimus . Ab hisce  
 „ dictis , ad stationes disponendas animum intendit . Fessis in-  
 tutum receptis , alios de more substituit . Cespitis & mate-  
 riæ ad renouandos aggeres , itemq ; lanæ & centonum ad pro-  
 tegenda mœnia vim sedulo comportari iubet . ad hæc , serui-  
 tijs , ne quid eorum perfidia occultæ fraudis erumpat , custo-  
 des apponit . in primis vero annonæ diligens habita est cura :  
 vt salubri temperamento ac dimensione per idoneos mini-  
 stros erogaretur . Super omnia , propitiando immortalī Deo  
 diurnæ pariter ac nocturnæ supplicationes adhibitæ . At So-  
 limanus , in salo anchoris iactis ad tentandam arcis oppugna-  
 tionem septingentos prætorianos in proximum littus exponit .  
 ij , misti sagittariis egregio ornatu fistulatores , cum ad mœ-  
 nia subiissent ; repentina misilium vi , sex è Lusitanis occidit ;  
 viginti consauciant . Neque segniter ab inclusis reddita iacu-  
 latio est . Ianizari quinquaginta interfecti , vulnerati complu-  
 res .



## *Historiarum Indicarum*

res. Cæteri, minoribus quam venerant animis, ad Sofaris munimenta se recepere. Per eosdem dies, transuerso cum sordidis nubibus Austro, clasſis propemodum ad terram alliditur. Eo metu Solimanus, & quod telis ex arce peteretur, ad Madrafabæ portum, leucas ultra Dium quinque processit. Descendenti, paratus iterum ad omne obsequium præſto fuit Sofar. Cum eo Solimanus consilia de totius belli ratione, atque adeo de ipsius Cambaiæ occupando regno communicat. Exposito dein milite, muralibusque tormentis, Dium terrestri itinere accedunt. Eodem fere tempore Alucan, haud leuibus argumentis suspectum habens Turcicum scelus, ac dominandi libidinem; cum parte copiarum (nam reliquas promissis & auctoritate Sofar apud se retinuit) omiſſa obſidione, in mediterranea loca secedit; Regemque Mamudium & rectores de suo consilio per litteras edocet. Rex & factum probauit; & misſis circum populos & dynaſtas edictis, nequicquā expoſtulante Solimano, commeatus in castra subuehi vetuit: quæ res non paruo Turcis impedimento ad victoriam fuit. Inter hæc, operibus, ad ſtatuenda maxime tormenta, iſtabant barbari. Illud etiam incendiariæ machinæ genus ab iisdem excogitatum. Vastæ magnitudinis, ad onera tranſuehenda, nauiſ erat in portu. Huic naui præceſſam ex arida materia pyram, pice, sulphure, nitro, aliisque ad foetorem ſimul ac fumum excitandum rebus, imponunt. Conſilium erat, ardentem ſtruem in marinum propugnaculum eſtu reciprocante demittere, vt vel præſidiariis flamma tetroque vapore ſpiritum includeret; vel certe, dum extinguendis ignibus occupantur; inter eam trepidationem atque caliginem, Turcæ traiecto celeriter euripo, ſcalis in muros euaderent. Verum ad eam molitionem, quo tanti ponderis machina innatare fluctibus, & muris applicari poſſet; nimirum exſpectanda erant ſumma per plenilunium incrementa maris, quas vulgo nautici aquas viuas appellant. Ea re animaduerſa, Luſitani, ultro nauem incendere, Albuquerqueij ad Goam exemplo, & illud vtcunque ſeu exitiale commentum, ſeu inane ludibrium amouere conſtituunt. Ad eam rem Franciſcus ipſe Goueanus eligitur, qui maritimæ rei, & propugnaculo præerat, inſigni conſtantia vir. is proxima nocte duobus egregie armatis ca-  
turibus



curibus eò sensim accedens, non fefellit excubias. continuo è stationibus densæ pilæ in prætereuntes emissæ. at ille nihilo secius in incepto persistit; perque media tela, fauente Deo, ad locum sine damno prouectus; in pyram multis simul partibus ignes coniicit. custodes ad viginti confestim in mare defiliunt: ij è caturibus plerique confossi. Vbi materiam flammæ tenacius occuparunt, quam vt opprimi facile posset; pari audacia & felicitate, Goueanus, volitantibus vndique globis retro vnde venerat, cum suis incolumis abiit. Ea spe delusi Turcæ, haud omiſsa interim arcis Diensis obsidione, sese cum magna parte exercitus ad Rumæi castelli mœnia quassanda conuertunt. Inde cum vtrinque summa vi pugnetur, & multi quotidie occumberent; in Lusitana muliere (Barbaram nomine appellabant) inuictum animi vere Christiani robur enituit. Huic, amisso coniuge, duo supererant filij, ætate viribusque florentes, Aloisius, & Christophorus. ille ad Rumæpolim, hic in eadem arce Diensi agitabat excubias. Forte ita euenit; vt Christophoro, cum pro muri corona staret armatus, contorta ab hostibus è transuerso pila partem ventris vna cum intestinis abriperet. Extemplo semianimis domum relatus, vti erat de æterna salute sollicitus; parentem optimam interrupta compellans voce; Peto, ait, abste, quæsoque mater; vti mihi prius ad expianda crimina sacerdotem, quam ad prosequendum obitum, lacrymas ac suspiria præbeas. Vereor enim, si te ingemiscentem audiero; ne dolor tuus ac mœror, meam ad supremum hoc iter necessariam exigui temporis præparationem impediat. Cui parens, inter adstantium singultus & complorationem vna fidei oculis, & placido vultu; Ego verò quod doleam, inquit, fili habeo nihil, nisi noxæ aut piaculi quippiam tibi superesse, quod eluas. Nam alioqui probe intelligo iis, qui istud obierint leti genus, præclaram esse mercedem paratam in cælo. Tu modo clementis Dei pacem ac veniam fidenter implora: teque in hoc transitu virum præbe. Id vnum in hac orbitate maximo mihi solatio fuerit. Inter hæc adhortationes, labentia moribundi viscera manu suffulciens, fugientis animæ reliquias tandiu fouit, quoad accito in id sacerdoti peccata cum salutari detestatione confessus, & absolutus; in sinu pa-

A a                      rentis



## *Historiarum Indicarum*

rentis animam efflavit . Vixdum demortui corpus vidua terræ mandauerat ; cum de alterius filij nece nuntius affertur . in propugnatione Rumæi castelli paulo ante ceciderat . scilicet nemo fuit , quin geminato intra paucas horas vulnere , confectum iri scēminam pro certo putaret . Ad illa , in tam acerbo casu , tantum absuit vt quicquam Christiana spe , & grauitate indignum admitteret . vt etiam venientes ad se doloris leniendi causa notos ac familiares vltro consolaretur . Huius mihi matronæ sensus , & in liberos caritas , laudbilior haud paulo visa , quam eius quæ ad primum de morte filij nuntium exanimata est ; aut illius , quæ lætitia conspecti repente nati quem mortuum crediderat , exspirauit . Cæterum Patiecus Rumæo castello præpositus , magna parte muri diruta , cum hostium multitudini vltra obsisti non posset ; saluis , præter arma , rebus atque corporibus , deditionem fecit . Vix ea facta deditio , hostes ex omni parte in castellum irrumpunt , Syluerianis qui freto diuulsi rem ex arce ipsa cernebant , ad spectaculum adeo triste collactrymantibus . inter eam irruptionem , plane memoranda contigit res . Vexillum erat Christi Domini in summis mœnibus de more defixum . id vexillum Turca signifer contemptim raptum abiect , & Mahometanum eius loco substituit . Non longe inde aberat Ioannes Petreius , exacta iam ætate vir ; cæterum egregie pius idem , ac strenuus . is , vbi strata humi diuina trophæa conspexit , generoso quodam ardore succensus , eos qui circa se erant , ad illam vna secum vindicandam contumeliam inuitat . Sex ferme sequuti . Cum iis ad locum intrepidus vadit ; euulsisque pseudopropheta , Christiana reponit insignia . id conspicati extemplo victores accurrunt ; Lusitanis interminantur ; Mahometana restituant . nil valuerunt minæ . Turcis vixdum digressis , pari constantia Petreius & socij ad locum aduolant ; Mahometis afflicta rursus imagine Crucem extollunt . hoc ipsum tertio vel quarto , Lusitanorum incredibili perseverantia factum est . neque certamini modus fuit , quoad exasperati & perciti rabie barbari , obtruncatos Christianæ dignitatis assertores in mare deiicerent . Hinc mira visu diuinaque res . Militum Christi cadauera , diuino scilicet nutu , ne honore sepulchri carerent , obliquo euripo , contra vim ætus rapidissimi , sponte ad ipsam



sam arcis Lusitanæ portam euasere; haud obscuro sane documento, cum tanta sit corporum diuinitus habita ratio in terris, quam gloriosa fuerint eorum animis in cælo præmia persoluta. reliqui dedititij, cum honestæ morti antetulissent exiguæ lucis usuram; initio comiter accepti ab Solimano, atque adeo donis culti, sed iisdem postea, in reditu, ab ira male gestæ rei, capita ad Zebitum præcisa dicuntur. Capto Rumæo castello, in vnâ Diensem arcem tota belli moles incubuit. ac simul terra marique oppugnatio capta. Maioribus primum tormentis per dies aliquot sine intermissione muri quatiebantur; Lusitanis, vbi quid procidisset, impigre obmolientibus. Aspera dein prælia, promoti ab hostibus agere vineisque, commissa. acti vtrunque cuniculi: sæpe eruptionibus, sæpe in ipsa mœnium strage pugnatum est. Verum atrocissima omnium postrema dimicatio fuit. Triplici acie deinceps ad mœnia successerant Turcæ. quatuor ipsas horas mira contentione certatum. ac tantus fuit ardor animorum, vt Lusitanus fistulator, assidua neque irrita iaculatione iam oculis pilarum exhaustis; dentem excusserit sibimet: raptimque in fistulam inditum plumbi loco in hostes emisit. E Turcis quingenti eo die desiderati: vulnerati circiter mille. è Lusitanis fortissimi viri cecidere quatuordecim; è reliquo numero partim ambugi, partim grauitè vulnerati adeo multi, vt non plus quadraginta idonei ad sustinenda arma superessent. iamque ad extrema ventum erat. vna cum viribus annona quoque, & tormentarius puluis, & pleraque instrumenta belli defecerant. Vicit nihilominus pertinacia Lusitanus, quod nulla vi, nullis cladibus, non modo ad arcis deditiõem, sed ne ad pacis quidem mentionem adduci potuit: ipsis quoque fœminis puerisque, supra sexum & ætatem; omni ope adiuuantibus viros; eosque ad certamen, ac decus, & oppetendam in Christiana causâ mortem adhortantibus. Inter hæc, ab Nonnio, dum ad subsidium inclusis ferendum reliquam ornat classẽ, celeriter præmissæ liburnicæ sexdecim, ad Madrafabam accesserant noctu, quaternis in singulas puppes luminibus ad speciem augendam haud frustra sublati. eo quippe terrore Turcæ perculsi, tribus iam millibus suorum amissis, & super alia damna, arctioris etiam in dies commeatus, &



## *Historiarum Indicarum*

imminentis hyemis pauore perterriti, Sofarem exsecran-  
tes, urbem incendunt; & noctis intempestē silentio conscen-  
dunt naues, duobus circiter mensibus in obsidione con-  
sumptis: ac vela dant in Arabiam tanta cum trepidatione,  
vt saucios quingentos, & magnam tormentorum partem fēde  
reliquerint. Is dies fuit festus Sanctorum omnium: quo etiam  
pulchrior latiorque, Lusitanis, exitij metu præter spem libe-  
ratis, illuxit. Turcico amoto auxilio, Sofar quoque cum suis  
in loca remotiora discessit. Insulam dein totam Lusitani sine  
certamine recepere. Inclyta per gentes ea fuit victoria; bo-  
namque Asiæ atque Africæ partem; Europamque pæne totam  
noua cum nominis Lusitani laude peruasit. quippe, non cum  
incondito ac semiermi Aethiope, vel cum fugacibus Indis,  
sed cum paratissimo & exercitatissimo milite & imperatore,  
in summa propugnationum inopia fuerat res. Ergo Franciscus  
ipse Rex Galliæ, magnus virtutum estimator, captus admira-  
tione Sylueriæ, pictam eius imaginem è Lusitania postmodum  
expetiit, præstantium virorum ac ducum tabulis inferendam.  
¶ Dum Lusitani obsidentur, paranti Nonnio quamprimum in-  
clusis auxilium ferre, præter opinionem successor è Lusitania  
venit Garzias Noronia. Huic, ob Turcici belli famam, na-  
ues undecim, armatorum septem millia tribuerat Rex: Qua  
in expeditione atque apparatu minime filenda res accidisse  
fertur. Ad maiorem delectus copiam, vt in tanto pericu-  
lo, Ioannes, insuper natura misericors, facinorosos, ac noxios,  
& rei capitalis damnatos qui ad militiam idonei viderentur,  
conscribi & centuriari imperauerat. ij, quo notior eorum es-  
set opera, separatim vnam in nauim impositi: Callaicam ap-  
pellabant. Hæc regis clementia diuino iudicio haud satis com-  
probari visa. Ceteræ quippe naues, Olisipone profectæ, cur-  
sum tenuere omnes: vna duntaxet, qua cenum illud atque  
colluies vehebantur, incertum quo infortunio quoue loco,  
prorsus in itinere periit. Ac ne reliquarum quidem magnus  
in publicum vfus fuit; quippe soluta, vt dictum est, obsidio-  
ne Diensi, profectisque iam hostibus. Præter militares autem  
copias, episcopo Fernando iam vita functo, virum egregium  
qui eo munere fungeretur, secum Garzias adduxerat Ioan-  
nem Albuquerqueium è Franciscana familia, Castellanium, eius-  
que



que comites atque adiutores, Vincentium ex eadem familia catechistam eximium; & clericum quendam, nomine Iacobū, ex oppido Lusitanie Borba, notę facundię concionatorem. Horum vero, cum in episcopatu administrando, tum in excolēdis atque ad Christum alliciendis hominibus, fructus pietatis & industrię constitit. Vincentio etiam memorabile quiddam contigisse perhibetur. Cum enim Episcopi iussu in Malabarica regione iuuentutem Christianę doctrinę rudimentis imbueret, pueris aliquot vel tardioribus, vel aliud forsan agentibus colaphos infregit, quę res apud eas quoque nationes probro vel maximo ducitur. Inde ira par entibus mota. cumque furore perciti, ad eam, vt ipsi rebantur, ignominiam demendam, arreptis armis in Dei famulum irent; quamuis læsa puerilis ætas, tantum abfuit vt patrum facinus adiunarent, vt etiam facta manu lapidibus eos arcere non dubitauerint. Cuius rei miraculo stupentes barbari, gradum illico retulere, & suam quisque domum re infecta dilapsi sunt. At Nonnius tradita successori prouincia, cum circiter decennium Indiæ præfuisset, in patriam deinde renaugans, graui correptus morbo, circa frontem Africę moritur. Defuncti corpus, nequaquam tanto viro dignis exsequijs, in mare piscibus esca proiectum est. Noronia, vt primum iniit magistratum, ad componendas maxime res Dieneses, iniuria belli profligatas ac perditas adiecit animum. Id quia non nisi pacatis Guzaratibus fieri poterat; tentatis ante prouiderum voluntatibus, legatos de pace ad Mamūdium misit. Ægre impetrata. nam etsi rectores iam tum propensi ad quietem & otium erant; duę tamen faces Regem adolescentem assidue ad vlciscendam auunculi cædem omni arte incendebant; Badurij mater, & Sofar: quanquam is quidem occulte ac dissimulanter, vt spatium ad reparandas interim vires, ab Lusitanis haberet. Pax in has maxime conuenit leges. Vti portum arcemque Lusitanus; reliquam insulam & oppidum Cambæus haberet, dimidiumque portorij caperet. Eidem quodocunque libuisset, murum è regione arcis liceret ducere; veruntamen remoto ab arce, & nequaquam suspecto præfidiarijs loco. ij fines communi consensu præscripti. Iacobus Lupius Sofa, loco Sylueriæ, cum nongentis militibus arci præpositus: & otium, quod ita vtrique parti expediret, in mil



## *Historiarum Indicarum*

tōs annos fore videbatur. Cæterum inquietus adolescens, auge præsertim stimulis agitatus, ad recuperandum ab Lusitanis Bazainum, vicinasque insuper insulas, quod nihil in nouo fœdere cautum de ijs diceret, præfectos cum modico exercitu misit. Cum ijs ab Rhoterico Laurentio Tauora, qui Bazaino præerat, minutis aliquot prælijs prospero fere semper euentu pugnatum est. Guzarates ad extremum fessi bellicis incommodis, ultro pacem ab Laurentio petiere. Neque ea concessa, per vim omnes haud sine magna cæde ex ijs locis exacti. Circa idem tempus, Ceilani Regem Zamorinus acri bello premebat. Missus à Præ-tore ad auxilium socij Regis & amici cum haud magna classe Michael Ferreria, Calecutanos commisso prælio superat: cæsi ex hostibus ferme notissimi, in ijs Patemarcas ipse classis præfectus: pleræque naues cum magno tormentorum numero in potestatem venere. Michael, defuncti ducis caput abscissum, munus gratisimum Ceilanio misit Regi. ob eam rem cum grandi pecunia donaretur; pecunia reiecta, contentus victoria, domum ouans reuertit. Ea clade, Zamorini maritimæ vires accisæ: pacemque dein à Præ-tore haud æquis conditionibus impetrauit. Dum hi duces in India Lusitanas opes ac nomen armis amplificant; in Molucis interim Christianam rem pietate ac iustitia Galuanus augebat. Post Celebios dynastas ac Reges ad veri Dei cultum adductos, magnus in Molucensibus quoque populis, ac Ternatensi præsertim, ad eadem sacra motus animorum exstiterat. Ea re animaduersa, Mahometani Cacizij, quippe quorum priuata res ageretur, omnes insulas circumire; proceres ac Reges obiectis religionibus admonere, orare, obtestari, vt orienti quamprimum occurrerent malo: neu tam insignem summo prophetæ contumeliam imponi permetterent. Horum precibus ac denunciationibus fatigati Reges, minaci edicto, si quis Mahometanos ritus atque instituta deferret, exsilium, & omnium fortunatum proscriptionem intentant. Eo edicto, aliorum studia Christianæ disciplinæ restincta: aliorum, vt sæpe fit, multo magis accensa: in ijs Colanus Sabia ex intimis Aerii Regis amicis, & consiliariis; nullo terrore de sententia demoueri se passus; in arcem Lusitanam repente confugit, ac mox ipse cum suis baptismo expiatus, Emmanuelis Galuani sibi nomen desumpsit. Post hunc, Geilolii quoque Regis consobrinus,



fobrinus, Mahometica superstitione contempta, Christianam religionem amplexus. Accessit quinetiam è Caciziorum ordine primarius quidam, natione Arabs, ex ipsa Mahometis progenie: quod summum apud eas gentes nobilitatis est decus. Huius vero conuersione, nequicquam mœrentibus collegis atque frementibus, maiorem in modum plebs vniuersa commota: atque adeo Acrius ipse Rex parum obfuit, quin patriis ritibus relictis, illico sese ad Christum adiungeret. Alii certe complures auctoritatem Arabis aperte sequuti: quos omnes Galuanus in fidem ac patrocinium benigne receptos; opera, consilio, pecunia tuebatur. Neque tamen iccirco quicquam apud alios ipse vel de existimatione, vel de gratia perdidit. Mira quædam erat caritas & veneratio viri, nihil magis æque summi atque infimi, quam ne sibi Galuanus eriperetur, timebant. Ergo, re sæpius agitata; permissu denique magis quam voluntate Galuani, legationem communiter ad Ioannem Tertium decernunt cum litteris, in quibus exposita priorum præfectorum auaritia, crudelitate, superbia; itemque commemoratis ex altera parte Galuani beneficiis, integritate, prudentia; enixe petebant, salutis & pacis omnium causa, vti proprium ac perpetuum, quoad viueret, Galuanum Ternatis præfectum esse pateretur. Addita, si hoc petentibus daret, promissa, quæ ad Lusitani Regis dignitatem & commodum magnopere pertinerent. Hæc à Regibus proceribusque, communi omnium nomine missa legatio. Cæterum tanto locorum interuallo satis mature peragi ac renuntiari non potuit. iam Georgius Castrius erat in cursu, designatus Galuano successor. Huic Ternatem appulso, auideque expetenti provinciam, Galuanus nondum spatium sui magistratus exacto, minime pericax vel ambitiosus, ex templo concessit. Nihil tam acerbum aut calamitosum iis nationibus euenire tali tempore potuit. Vixdum abierat præfectura Galuanus, cum tota Molucensis res, illius viri lenitate atque consilio quam optime constituta, iisdem ferme quibus olim de causis, in pristinos fluctus ac perturbationes cum inæstimabili detrimento Christianæ fidei recidit. Quæ quoniam vulnera sine acerbulo dolore tractari nō possunt; consulto faciam vt ea posthac vel attingam leuiter, vel etiam silentio prorsus inuoluam. Dabit, opinor, haud grauate pius



## *Historiarum Indicarum*

mihi lector hanc veniam : contentus videlicet iis quæ superio-  
ribus libris, ad genus indicandum, inuicti retulimus. Hoc re-  
rum Molucensium statu, Garzias Indiæ Prætor, letali corre-  
ptus morbo, sesquiannum circiter administrata prouincia, an-  
no seculi huius quadragesimo è vita migravit. Garziæ statim  
è regio chirographo substitutus est Stephanus Gamma, qui  
Malacæ vrbi paulo ante præfuerat. Martinum Alphonsum So-  
sam multis rebus præclare gestis insignem, primo loco nomi-  
nauerat Rex : sed cum is nuper in Lusitaniam rediisset ; ad Ste-  
phanum, qui proximum ab Sosa gradum in ea nominatione  
obtinebat, omnium consensu delata res est. Per idem fere tē-  
pus, nouo Lusitanorum beneficio cum Thoma (quem alij To-  
masum vocant) Persarum Rege firmata societas. Reixelanus  
tyrannus, de quo supra demonstratum est, ab Ismaele defece-  
rat. idem è Persicis finibus magna cum incolarum trepidatio-  
ne ingentes agebat prædas. Ad eum coercendum plectendū-  
que missus ab Thoma Cazican præfectus cum duodecim milli-  
bus equitum, & magno peditatu, ad Reixelum locauerat ca-  
stra. sed oppidi præclare muniti neque facilis erat expugnatio,  
& in obsidione spes erat nulla, quoad mare liberum tyrannus  
haberet. iccirco, ad com meatus vndique prohibendos, naua-  
le subsidium Persa iure amicitia ab Lusitano, arcis Armuzia-  
næ præfecto, per legatum ac litteras petiit. In eam expeditio-  
nem profectus ab Armuzia cum celocibus aliquot Martinus  
Alphonsum Carualialius, adhibita cura, vigiliisque disposi-  
tis, breui maritimos omnes ad oppidum aditus interse-  
psit. Tyrannus, inopinato ictus malo, cum in singulos  
dies inopia cresceret ; magno primum auri pondere Lusita-  
num aggreditur, vt onerariis duabus alimenta vehentibus  
transitum dissimulanter ad se permittat. dein, vt inui-  
ctum ab avaritia sensit animum viri ; desperatis iam rebus, in  
eius maxime fidem concedere voluit : sed Caciziorum verbis  
ab ea mente deductus est : cum ita differerent, multo satius, vt  
in malis, esse, Persarum quam Lusitanorum arbitrio sese com-  
mittere. quippe, si in potestatem Mahometanorum veniret ;  
corpori duntaxat imminere discrimen : sin impiis magni pro-  
phetæ aduersariis vltro se dederet ; non corporis modo, sed  
animi quoque damnum dubio procul esse facturum. Ea su-  
persti-



perstitutione obiecta, miser, ad cruciatus ac necem sese Cazicani permisit. Capti latronis nuntio valde lætatus est Thomas, eamque victoriam Lusitanis præcipue tulit acceptam. At Carualialius, hoc facto Persis maiorem in modum nomini Lusitano deuinctis, non minus integritatis ac fidei, quam rei naualis ac bellicæ decus Armuziam retulit. Dum hæc in sinu Persico fiunt, Stephanus Gamma interim & viribus ferox, & paterna gloria stimulante, haud leuis momenti rem, cum à Vasco parente olim, tum nuper à Garzia Prætore cogitatum suscepit; vti subductas ad Suezium Mahometanas triremes, ingenti cum Turcicæ rei detrimento combureret. In id classe instructa ornataque, per speciem Diensis reuifendæ arcis, vel Adeni mox oppugnandi; ad Arabicum fretum recta contendit: & successissent vota; si protinus ab sinus introitu Suezium petiisset. Sed visendi studio applicata ad dextrum litus classe, dum agros vicosque maritimos, & veteris Arabiæ monumenta perlustrat; interim de ipsius aduentu, & male tecto consilio, ad regionis præfectum citatis equis nuntij perferuntur. Neque ille cunctandum ratus in tali re, validas equitum ac peditum copias ad loci custodiam extemplo submisit. Ea re segnes Lusitanorum conatus elusi. Appropinquantì Suezium Stephano, à præcursoribus nuntiatum, Turcica naualia magnis firmisque militum præfidiis obtineri. Non plus triduo (tantum in celeritate momenti est) Suezium Turcæ præoccupauerant. Lusitanus Prætor, magna spe deiectus, & grauiter semetipsum incusans; in Arabem ac Saracenum effudit iras, totamque oram nullo obuio late vastauit: Philoteras, hodie Alcoceris portum, itemque Elanam seu Torum, & Suaque-num olim Aspidem, vrbes; nauesque permultas incendit. inde abiturus, cum ad Mazuam applicuisset insulam, Lusitanæ clasfis fama excitus Barnagazius, & vna orator Asnafasagaris Abassini Regis (quem alio nomine Claudium appellabant) cum ipsius Regis, & Elisabethe matris litteris affuit. Fessis rebus auxilium contra communem aduersarium ex foedere postulabant. Gradaametes Adelis ac Zeilæ tyrannus, Solimani Turcæ stipendiarius, infestissimus nominis Christiani hostis, in Abassiam dudum cum exercitu irruperat: multisque cladibus Regem penitus in intima Aethiopiæ compulsus, magna parte



## *Historiarum Indicarum*

parte finium exuerat; religiosissima templa cum sacris monachorum cœnobiis euerterat; prædas pecorum hominumque identidem agebat. Hæc Abassini cum miserabiliter exposuissent; indigna, vti par erat, visa Prætori Lusitano res. confestim aduocato concilio, supplicat Christianis contra Mahometanos communi consensu decretæ. Reliqua erat consultatio, quem potissimum expeditioni præficerent. in magna competitorum turba, cum id pietatis & officij munus certatim sibi quisque deposceret; Christophorus Gamma Prætoris frater, acri ac præferuido ingenio adolescens, cæteris antefertur. Huic, ex vniuersis copiis, Lusitani cum armis duplicibus quadringenti, & magnus tormentorum numerus attributus. Cum hac manu Gamma profectus Iunio mense, anno seculi huius quadragesimo primo, ad puteos quosdam salfos prima nocte confedit. Inde caloribus maximis per loca partim à feris infesta, partim etiam confragosa & arentia, summo labore fieri ceptum iter est pedibus. tormenta, commeatumque; cameli ac mulæ vehabant, Barnagazij cura contractæ. vbi angustia occurrerant, qua transitus onusto iumento non esset; detracta belluis onera Lusitani, atque ipse ante alios Gamma, subibant humeris. ita, septimis demum castris peruentum ad præalti montis iugum, ex quo in vberes & irriguos Abassiae campos longe ac late prospectus est. Ab iugo degressi, aliquot annibus facile superatis, tertio die Baroam procedunt. Vrbs est in ditione Barnagazii ampla, & exornata ædificiis; piscosus præterlabitur fluius, circa ripam vtramque frequens vicis pagisque; sed per id tempus Mahometanorum iniuria desertis. Appropinquanti Lusitano, sacerdotes & monachi obuiam prodire cum infulis, Dei primum, tum Gammae & comilitonum implorantes opem: quartumdecimum annum premi se se dura atque intoleranda Zeilani tyrannide. oppida euerfa; incolas miserrimam in seruitutem abductos, antiquissimæ religionis ædes atque cœnobia nefarie spoliata ac diruta: iam sibi ne aras quidem quo supplicandi aut sacrificandi causa confugiant, superesse. Pergerent porrò alacres, ad salutem eius gentis è cœlo demissi: ac violatæ religionis, contemptique Christi Domini pœnas, ab impio & sacrilego tyranno repeterent. Hæc, monachi, & alia quæ in tali re iustus pius-  
que



que subiicit dolor, cum flebili vociferatione conquesti, adeo confudere audientium animos; ut in tanta rerum indignitate lacrymas nemo teneret. Gamma, seruis Dei bene sperare iussis, ad proximi templi parietinas adorandi causa concessit. nobiles erant columnæ, & lapidis elaborati fragmenta: neque ausi Christiani ædificium instaurare, temporarium sacellum rei diuinæ faciendæ, vili desuper tegete paleisque operuerant. A precatione, Gamma cum suis in statua extra urbem locata se contulit. ad noui auxilij famam, Abasfini subinde aliquot in castra affluebant. Mox, duobus eorum præfectis & Barnagazio in consilium ab Gamma vocatis, de ratione gerendi belli deliberari cœptum. Victoriæ spem in eo verti censebant omnes, si cum reliquijs copiarum Abasfini Regis mature se se coniungerent. Sed quod is bimestri ferme itinere ab eo loco distabat, nemini erat dubium, quin sapius interea cum Zenlano certandum foret. in præsentia, cum ad Lusitanorum æstimationem, tum ad commeatus facultatem & copiam expedire visum in primis, uti Elisabetham Regis matrem in castra perducerent. Eam si apud se haberent: & maiorem hominum concursum ad signa futurum; & audacius multo ac libentius alimenta ab agrestibus vndequaque subuectum iri. Elisabetha non longe inde sese munitissimo tenebat loco, quo Regum filij nati minores, nequid eorum gratia seditionis existat, Sinarum more includuntur. excelsa & vndique abscissa est rupes; quæ ab satis lato fundo paulatim fastigiatur ad summum. inde ad fungi maxime speciem, circumquaque prominet labrum, mille fere passuum ambitu, ex quo subiecta quæque ita lustrantur oculis; ut nullus circa latebris insidiisve sit locus. Intra eius proiecturæ planitiem, regia tecta, cum capacissimis duabus cisternis, & ornatisimo templo cœnobioque visuntur: accedit agri, quod probe cultum, in annua quingentorum fere hominum alimenta sufficiat. Vno duntaxat, eoque perangusto ac tortuoso anfractu ad certum vsque ad spatium ascensus est. ab eo spatio ita arrecta sunt saxa; ut funibus corbisque extollantur demittanturve homines, quæque alia vel importanda, vel euehenda sunt. ac demum ea natura est loci, uti prorsus neque vi, neque fame sit expugnabilis. Gamma latus propinquitate Reginæ, litteras primum ac nuntios  
ad



## *Historiarum Indicarum*

ad eam officij causa; tum ad ipsam deducendam armatos præmisit centum. Elisabetha, ne publicæ rei pro sua parte deesset, ex diuturno veluti carcere haud grauata descendit, liberis & arce, parenti quæ ibidem agebat exacta iam ætate, concredit. Instratæ mulæ (nam equis minime vtuntur Abasini) ad saxi radices, opera Barnagazij præsto erant. Regina, præter Lusitanam centuriam famulis quinquaginta, ancillis non amplius triginta sequentibus in viam se dedit hoc ferme ornatu. Vestes erant ex Indica tela niuæ, tenuissimo textu. hæc bō bycina penula contegebat cinerea; ramis floribusque subtiliter ex auro conspersa. Caput Hispanico more velatum, faciem etiam, nisi qua cerneret, linteo obductam habebat; phaleratæ, & serico ad pedes vsque vestitæ insidens mulæ, quam Barnagazius ipse, obsequij causa, nudo exerto brachio, tygridis exuuiis humeros tectus, loro ducebat: cingebant latera linteati dynastæ pedites duo. Pro vmbella, pellucidum conopœum ingens, ita omnia contegebat, vt nisi reducto linteo, nequaquam introspecti posset. Aduenientem, Gamma festo vestitu, ac densis tormentorum bombis, quibusque aliis rebus lætitia significari solet, venerabundus accepit: idemque quod ante per litteras, coram per interpretem docuit; se à Stephano fratre Indiæ Prætore, quod ita velle Ioannem Lusitanæ Regem intelligerent, cum ea manu missum ad ipsam filiumque, adiuvandos. proximo anno maiores, Deo volente, copias affuturas. interea paratum se cæterosque qui aderant, pro Christiani nominis dignitate, & Abasini regni salute mortem optetere. Ad hæc Regina paucis ita respondit; vt magnas Lusitano primum Regi, tum Gamme cæterisque gratias ageret. sperare se tam firmo præsidio collapsas Abasiniæ res in pristinum statum breui esse redituras. Inde, transacta iam ad Baroam hyeme, castra mota; certusque & in castris & in agmine locus Regine assignari captus; eidemque custodes corporis, Lusitani fistulatores centum attributi, Michael Castanosio præfecto, qui hæc ipsa in commentarios retulit. Aduentu Regine vulgato, Abasini frequentiores adesse, & à sua inopia, quippe finibus ab hoste vastatis, certatim cibos in castra conuehere. Per hunc modum Gamma, dierum aliquot iam iter emensus, munita loco excelsa castella duo, haud incruento certamine cepit.



cēpit . complures populos , qui ad Zeilanum metu defecerant , ad Abassini fidem imperiumque reuocauit . Maturanti dein cum Rege sese coniungere , à quo binas iam in itinere acceperat litteras , compendiis viarum antegressus Zeilanus occurrit , multitudine copiarum longe superior , cāterum armorum ac telorum genere minime par . ducentos non amplius ferreis instructos fistulis Turcas auxiliares habebat . cāteri , leui armatura , sagittis , hastisque , & gladiis utebantur . Vbi propius ventum est , neque iam vitari congressus poterat ; in aciē dux vterque copias educit . ac primum Lusitanorum paucitas contemptui Mahometanis esse . dein , vbi tormentis geri capta res est ; equi flamma & fragore consternati , domitis plerique frānis , in fugam seque & seffores auertunt ; tum sagittarij destitatis ictibus toto passim campo sternuntur . Denique Gradaameti in primis ordinibus restituenti pugnam , femur , vna cum equo plumbea pila transfigitur . inde super moribundum equum ad terram corruens , concursu suorum ex acie in tutū effertur . Ad casum tyranni , fuga Mahometanorum ex omni parte fieri cāpta . instant Lusitani , & quoad vires tulere , ferociter hostem insequuti , magna edita strage , non plus vndecim suorum amisissis , victores in castra reuertuntur . Idem , iterati paulo post praelij euentus fuit : hoc etiam lātior , quod nuda praesidio castra Mahometana direpta sunt . deleri eo die hostis potuit , si ad persequendum equi Lusitano fuissent . grauis adhuc ex vulnere Gradaametes lectica in aciem exierat . non nisi transmissio vicino flumine , ab effusa constitit fuga . Lusitani , gemina intra paucos dies victoria gratulabundi , onusti manubiis , in statina rediere . ibi dum fauciis curandis operā dant ; Barnagazius cum popularibus quingentis , & paucis insuper Lusitanis è maritima ora superuenit . Inde territus barbarus , magna suorum parte dilapsa , retro ad Mangadasum præcelsum montem , qui fauces in Arabicas imminet , hyeme iam aduentante concessit . nec Lusitani à vestigiis abstinere , cumque se se Gradaametes tum loci natura , tum anni tempore tueretur , Gamma item vicinum montem , Ofalā nomine , ad hyemandum elegit . ibi dum Lusitani partim intercipiendis com meatibus ; partim finitimis pagis vicisque in Abassini ditio nem aut vi , aut voluntate redigendis insistent ; Gradaametes  
interea,



## *Historiarum Indicarum*

interea, quam occultissime per legatos ac munera, trans fretum ab Zebitano prefecto aduersum Christianos opem implorat. Misit Turcæ fistulatores admodum mille, quo maxime genere militum opus erat, cum tormentis curulibus decem: quos ille per aueriam montis partem inscio Lusitano, vere iam appetente, latus accepit. neq; interposita deinde mora, quominus ultro vallum & castra Lusitanorum inuaderet. Sensit illico Gamma non mediocriter auctas hostium vires: ac primo, distributis manipulis; in subita re stationes ad idonea loca disposuit: dein, ubi curules admouebantur ballistæ, munimento diffusus, uti per vices in hostem erumperent suis edixit. dictis obtemperatum: & in summa rerum omnium iniquitate Lusitani pugnam acriter initio sustinebant: dein perpetua ferri ac plumbi procella stratis plerisque; cæteri priusquam ab hoste circumuenirentur, fugam in saltus auios rupesque præcipiunt. De Barnagazio nihil traditur. Elisabetha cum faucibus curandis aliquandiu piam, uti solebat, ac sedulam nauasset operam; perditis ad extremum rebus pauida perexiguo comitatu profugit. Castanosius præfectus, & è stipatoribus triginta sequuti. in Reginae tentorio vulnerati complures incerta spe vitæ relictæ. in eos parta victoria Mahometani cum foede sauirent; quidam è Lusitanis, atrox ac triste facinus ab ultima desperatione commisit. accenso funiculo, tormentariorum pulueris cadis (nam ibidem adseruabatur) sensim adrepes, applicuit ignem; flammisq; momento diffusis, seque & quotquot intra id tabernaculum agebant, eodem absumpsit incendio. Gamma, cum egregie aliquandiu dimicasset, ad extremum grauitèr faucius, hortatu suorum, intendentibus iam se tenebris, præter ipsa castra cum paucis effugit. dumque egerenda è castris præda hostes distinentur; tota nocte per summam vexationem itinere facto, orta demum luce, ne conspici posset, in proximam conuallem, & densas circa sylvas è via deflexit. ibi, dum ad abditum fontem è longa defatigatione colligit vires; ab equitibus insequutis, indicio vetulæ cuiusdam oberrantis, inter curandum vulnus opprimitur. Ad tabernaculum dein regium cum ingenti plausu raptatus, congestis in eum ab Gradaamete probris minisque, detracta primū veste, virgis acerrime cæditur: tum ad ludibrium & contumeliam




meliam totis castris per militum & calonum ora traducitur postremo, cum omnes iniurias & cruciatus inuito propter Deum animo pertulisset; ad se retrahi iussu, ab impotenti sæuaque iracundia fuisset ipse manibus tyrannus obruncat. Sunt qui, ex ipso mortis & causæ genere, Gammam in cælestium numerum pro certo referendum existiment. Sane, Abasfinus Rex in ea quam ad Indiæ Prætorem de his rebus misit epistola, Christi martyrem non dubitanter appellat. Caput Gammæ præcisum, & cum eo primarij Lusitani duodecim ad Solimanum Ottomanum ab Turcis dono transmissi. Ea victoria intemperanter elatus Gradaametes, conuiujs ludisque, aliquot deinceps dies indulgit. Ceterum insolenti barbaro, lætitia primo in mœrorem, mox etiam in perniciem vertit. Dimissis cum congiario Zebitanis, quasi nil iam superesset periculi; cum vxore liberisque, & cætera multitudine, ad Nili fluenta, valetudinis & animi causa concesserat. Ibi, nihil tale metuentem Claudius cum Lusitanorum reliquijs è fuga collectis, & Abasfinorum peditum octo millibus, & equitibus quingentis inuasit. Contracto certamine, Gradaametes, ab Lusitano cuius nomen ignoratur, cum vnum tyrannum simul omnes impeterent, plumbea glande traiectus occubuit. Magna dein edita Mahometanorum fugientium strages. & castra cum tormentis & cætero belli apparatu direpta. &, quod omne superauit gaudium, haud exigua Christianorum omnis ætatis & sexus vtriusque multitudo, è miserrima seruitute ac vinculis erepta. Gradaametis vxor, cum trecentis equitibus quos circa se præsidij causa habebat, & cum thesauris effugit. Certa dein pax Abasfino Regi aliquandiu mansit; ijs qui per bellum ab eo descuerant, cum lacrymis & infima deprecatione ad fidem atque ad officium redeuntibus. Tam insigni parta victoria, Claudius, in iisdem locis, anniuersarias hebdomadæ sacrosanctæ ferias admirabili pietate celebrauit. quandiu corpus Domini clausum in sepulchro adseruatum est, attratus, & squalidus veteri gentis more, nihil omnino gustauit. nec pedem è templi finibus extulit. idem à Regina matre, & proceribus factum. Nec minore cæremonia studioque paschalia deinceps peracta mysteria. elutis per confessionem sordibus animorum, salutari cælestis agni cibo refectioni, summi atque infimi,  
ad



## *Historiarum Indicarum*

ad extremum agmine composito collucentibus vndique ce-  
reis, cum solenni pompa supplicationem obiere. Ne-  
que ita multo post, Lusitanis qui in bello cecide-  
rant, iusta funebria, & regalis apparatus exse-  
quiæ, cum insigni erga pauperes beni-  
gnitate, & piacularibus sacrifi-  
ciis, & summa omnium  
ordinum frequentia  
perfolutæ. Lu-  
sitani su-  
per-  
stites, virtutis ergo donis ab Rege dona-  
ti, & liberaliter habiti, quod reli-  
quum erat vitæ, fere omnes  
in Aethiopia tran-  
segere.

*Libri Vndecimi Finis.*







# HISTORIARVM

## INDICARVM.

### LIBER DVODECIMVS.



LVR A iam hinc, & vberiora, de progressu Euangelij, deq̃ue rectæ in Deum fidei propagatione dicentur. Quippe, ad hæc vsque tempora, constitutis emporiis, arcibus extruendis, tuendo mari, & propulsandis finitimorum armis distenti Lusitani duces ac procures, in magna illustrandi nominis Christiani voluntate, humanæ tamen magis quàm diuinæ rei operam

dederant. Et è Franciscana familia fratres, cum domicilium in India pridem constitutum haberent; essentq̃ue amplificandæ religionis Christiani percupidi, tamen quotidiana psalmodia, funeribusq̃ue, & cæteris diurnis pariter ac nocturnis ceremoniis impediti, satis otij nequaquam suppeditare poterant peregrinationi, catechismo, aliisque muneribus, quæ ad con-

B b

uersionem



## *Historiarum Indicarum*

uerfionem gentium, & curationem, & cultum haud dubie requiruntur: De cæteris, neminem illorum temporum, ego quidem cum Antonio Galuano, vel prudentiæ laude, vel caritatis ardore contulerim. Proximi Galuano habebantur, Michael Vafæus, totius Indiæ pro Episcopo: ( Vicarium generalem appellabant ) & Iacobus, de quo supradixi, Borbanus, Episcopi comes: itemque Cosmus Annus, regius scriba. ij, communi consensu, Stephano Gamma prætor, & Fernando Rhoterigio Questore approbantibus, cuiusmodi Ternate Galuanus, collegium seu Seminarium in vrbe Goa instituerant puerorum è variis nationibus, ad fidem Christianam ( si fieri posset ) vsquequaque disseminandam: atque ob id ipsum, ei collegio ab Sancta fide nomen indiderant. Sed mox, in stadio equestri ( ita enim vocatur is vicus ) attributa huic operi noua Diui Pauli conuerfionis œdícula, priore appellatione antiquata, cognomen collegio fecit. eidemque alendo, prædia & redditus qui paulo ante in Tricuarino, Diuare, & Ciorano insulis, dæmonum cultui deseruierant; fanis eorum ac delubris Vafæi cura disturbatis enerfisque, ex Regis auctoritate assignati. Per eosdem fere dies, haud contemnendum etiam aliunde incrementum Christiana res ceperat. Parausunt populi ad Comorini seu Cori promontorium, imbelles ac mites, piscatu margaritarum præcipue dediti. Inde Piscarium, quinquaginta ferme leucarum spatium, littus appellant. idque ab ipso promontorio initium ducens, meridiem spectat primo, tum in septentriones reflexum, ad vsque Remanacoris vada, & Manarem insulam, fronte in orientem solem obversa protenditur, tanta in tam breui locorum intervallo cœli varietate, quemadmodum supra demonstratum est, vt iisdem anni mensibus, cis promontorium, æstas & calor; trans idem illud, hyems & frigora sæuiant. pagis vel oppidis quinque circiter, & viginti, ora ea tota censetur. ij ergo populi ab inquilinis Mahometanis adempto piscandi arbitrio, cum grauioribus in dies afficerentur iniuriis, coacto concilio, de re communi consultant. Forte in iis tum locis negotiabatur è Christianis Malabaribus quidam Ioannes Cruceius; qui nuper in Lusitania fuerat, eumque Ioannes Rex comiter acceptum, honoribus ac beneficijs auxerat. Hoc maxime auctore, Parau,



Parauæ, in summa consilij inopia, rerumque difficultate, legatos  
opis petendæ Cocinum mittunt magistratus ac decuriones  
(Parangatini patrio sermone dicuntur) hisce imperatum, spō-  
deant, si rebus afflictis auxilium latum sit, paratos Parauas  
omnes, publico gentis decreto, Lusitana sacra suscipere. Ei  
promisso quo maior esset fides, Cocinum delati Patangatini,  
mandatis suorum expositis, confestim salutaribus abluuntur  
aquis, & Christo dant nomina. Hoc veluti pignore cetero-  
rum voluntatis accepto; non dubitauere Lusitani suppetias  
laborantibus ferre. Classis ab Cocino ad Piscarium littus mis-  
sa, non modo Mahometanorum audaciam repressit, sed etiā  
Parauis erepta piscationis iura magno cum ipsorum emolumē-  
to restituit: & sacerdotes aliquot eadem classe delati, lustran-  
dis baptismo Parauis æque summis atque infimis, nemine re-  
pugnante, institere. Ac per hunc modum, paucis diebus,  
voluntaria conuersione, in Christi fidem gens pæne vniuersa  
concessit. Ad huiusmodi veluti subitarios fidelium greges;  
aliqua subinde mancipia, vel focij & auxiliares Indi temere  
adiungebant sese (certotum hominum testatam & illustrem  
vocationem excipio) magis quo dominis aut Lusitano prætori  
gratificarentur, quam quod suis ponderibus religionum di-  
scrimen ac momenta perpenderent. Ergo, multo maxima  
neophytorum pars, præter intincti lymphæ corporis, & no-  
minis immutati memoriam, Christianæ disciplinæ retine-  
bant nihil. Id autem, partim socordia gentis fiebat; partim  
etiam cultorum inopia. quippe qui, propter paucitatem, nec  
probe subactō sererent solo; neque sata deinceps ab initio us-  
que ad extremum, æquali cura prosequerentur. Ita, labores  
in semine destituti, optatam segetem virtutis ac pietatis fer-  
re non poterant. Inter hæc, è quotidiano commercio natio-  
num quæ ignorant Deum, multa & grauiæ in hominum no-  
stratum mores irreperant vitia: propiusque aberat, vt Euro-  
pæi aduenæ aliquid in singulos dies ex Asiatico traherent lu-  
xu, quam vt indigenis ipsi Christianæ sanctimonix & seueri-  
tatis quicquam impertirent. Ad hanc morum contagionem,  
accedebat ingenium soli cœlique: mire factum ad corrup-  
pendam vel generosam indolem; quodque, ni summa cautio  
adhibita sit, quamlibet Martium vigorem animorum, otij



## *Historiarum Indicarum*

dulcedine, & variis voluptatum delinimentis extinguat. Hæc, Ioannes Rex, cum & litteris multorum, & sermone didicisset;angebatur intimis sensibus, quippe cui salus hominum, ac præcipue popularium suorum, carissima semper fuisset. præterea, stimulabat animum illa quoque religio, quod ex decretis Pontificiis, & iure communi, non nisi tuendi augendique diuini cultus, & promulgandi Euangelij nomine, si promulgationem eam impedirent, bellum ignotis inferre gentibus, & Indicarum frugum opumque decimas, & vectigalia capere sibi liceret. In tanto autem reliquarum artium studio, tantisque diuitiis, & copia rerum, languere Christianam industriam, & adeo paucos existere, qui mortalibus inani spe & praua cupiditate deceptis, rectum viuendi monstrarent iter, haud immerito nefas arbitrabatur. Ac proinde, quo pacto hisce occurreret malis, dies noctesque agitabat animo. Sed in summa rei expediendæ voluntate, nihilominus hærebant consilia Regis: quippe, ad tantam hominum vim in arctam & angustam ab lata & spatiosa via traducendam, tot peragrandas terrarumque regiones, tractanda tam variarum nationum ingenia, multorum inimicitias atque odia subeunda, refellenda iam inueterata, & penitus infixæ captis errore mentibus, Brachamanicæ vanitatis aliorumque mendacia; & numero magistrorum, & spectata innocentia vitæ morumque, & egregia corporis animique firmitate, & sana multiplicique doctrina, & super hæc, non vulgari prudentia, magnoque rerum usu opus esse non ignorabat. Huius autem generis magna per id tempus erat in Lusitanicæ regno penuria. Sacri concionatores è finitimis regionibus accersebantur. Liberalium artium studiosi, Complutum ferme aut Salmanticam adibant. nonnulli etiam, Regis impensa Parisiis alebantur. Vnicum erat regni totius Olisipone gymnasium infrequens, ab Dionysio Rege inchoatum. ibi, pars iuuentutis iuri maxime ciuili operam dabat. atque id sane gymnasium, nuper ipse Ioannes, in posterum longe prospiciens, ex Olisiponensi tumultu Conimbrigam transtulerat, in urbem antiquam, & Musarum otii iam ante dicatam; ac tum quidem, castigato præterlabentis Mondæ fluminis alueo, salubris pariter & amœni secessus. Eo clarissimos dicendi magistros, ac mathematicæ rei



ac medicæ professores, & humani diuinique iuris, & sacram litterarum interpretes, non ex Hispania tantum, sed etiã ex Gallia, Germania, Italia, magnis præmiis euocabat: scholisque ex Parisiensi formula & disciplina institutis, aliquot insuper adolescentium collegia in eadem vrbe fundauerat. Sed necdum ad maturitatem ea peruenerat soboles; & Indicæ necessitates præsentem efflagitabant opem; & domesticis hisce præfidiis, ad excolendam Lusitaniam ipsam, & supplendos magistratus, & sacerdotia tuenda, egebat Rex. Neque porro verum erat, quo remotæ fouerentur partes, intestina ac vitalia membra destitui. Hisce anxio curis, atque ad Indicam subleuandam rem, externa circumspicienti auxilia: tale remedium haud obscura Dei prouidentia oblatum est. Ignatius S  
Loiola Cantaber agebat Romæ, qui paulo ante, cum eximijs aliquot eiusdem propositi viris, afflatu diuino se se ad vineæ Christi culturam, atque ad Euangelij prædicationem, sine vlla prorsus aut temporum aut locorum exceptione deuouerat. Ea societas IESV ab ipso Pontifice Maximo, qui tum erat Paulus hoc nomine Tertius, postmodum appellata. Iamque variis Europæ locis haud obscurum egregiæ cuiusdam pietatis ac doctrinæ specimen dederant. Id Ioannes certis auctoribus vbi cognouit; Petro Mascarenias, suo apud Pontificem oratori, mandat, etiam atque etiam agat cum Ignatio, vti alumnos disciplinæ suæ minimum sex mittat ad se. quando generis humani salutem, & Christi Domini gloriam vsque adeo fiant; non defuturas in Asia atque Africa scaturigines, quibus eam aliqua saltem ex parte releuent sitim. præterea, nullam in eas terras nauigandi moram fore, simulatque commoda tempestas affuerit: quæque ad nauigationem necessaria sint; ea ab suis procuratoribus large & copiose præbitum iri. Hoc accepto mandato Mascarenias Ignatium appellat. Ignatius ex auctoritate summi Pontificis, quod alijs quoque regionibus pro sua parte consultum vellet, expetenti sex oratori duos tantum assignat, Simonem Rhoterigium Lusitanum (quem Ioannes ipse Lutetiæ in studio litterarum aluerat) & Franciscum Aspilcotam Nanarrum claro inter suos genere natum, cognomento Xauerium. Ac Simon quidem, mature præmonitus, quod quartana tum laborabat feбри, in Lusita-



## *Historiarum Indicarum*

niam naui transmisit comite Paulo Camerte, egregia probitate fideque viro, qui se se cum alijs ad Ignatium per eos dies adiunxerat. Xauperio autem, quo maiorem videlicet in re subira ferret obsequij laudem, non nisi pridie quam illi cum Mascarenia itinere terrestri obeundum fuit, denuntiata res est. Ac, tametsi, confirmata nondum societate, nihil in ceteros iuris erat Ignatio; Xauperius tamen ad imperium usque adeo durum, ac repentinum, non modo tergiuersatus vlla ex parte non est, sed etiam incessit omnibus laticijs: acceptoque spatio vix quod salutandis amicis, & refarcienda attrita ac lacerata tunica satis foret, postera luce cum oratore discessit. Huius mihi profectioem viri (nam Rhoterigius, Regis ac procerum deinde rogatu in Lusitania substitit) paulo fusius persequi est animus: ut promulgandi Evangelij studiosis hominibus, recens propositum sit Apostolica peregrinationis exemplar. Quamquam huiusmodi narrationem exsequenti mihi, subit illa suspicio, fore ut quae de piorum hominum in egrotos, ac pauperes, & infimam plebem officijs, vel prodita sunt, vel in posterum prodentur à nobis; aut friuola, aut etiam sordida videantur iis, quorum videlicet aures, magnificis de re publica, de moribus, de natura disputationibus, vel sumptuosissimis bellorum apparatus, terrestribusque ac navalibus praeliis, & inclytarum urbium expugnationibus adsueverunt. Sed habet hoc utique philosophia Christi. nihil primo aspectu contemptius; nihil in recessu diuinius. quippe, animos, non ad sitim caedis ac sanguinis, vel ad inanis gloriae cupiditatem; sed ad humanitatem ac mansuetudinem, atque ad amorem solide ac verae virtutis inflammat: quaeque ab alijs de officio, vel ostentationis vel etiam animi saepe causa quaeruntur, ea rebus ipsis ac vita quam verbis multo libentius explicat. Ergo Christianae documenta virtutis, tanto & ad bene viuendum aptiora, & ad narrandum grauiora censenda sunt, quanto facta di-  
8-  
ctis, & pacis munera bellicis artibus antecellunt. Xauperius igitur, ubi profectiois affuit dies (annus tum agebatur huius seculi quadragesimus) ita ex vrbe decessit, nihil ut secum preter simplicem corpori tegendo vestitum, & in quotidianas preces Romanum breuiarium extulerit. Ut fieri captum est iter, illud ante omnia mordicus tenuit, ut intimam sui custodiam,



diam, & certa precandi commentandique spatia non omitteret. inde vegetior in dies atque robustior, ad opem alijs ferendam semet acriter incitabat. Hi quo libentius curationem ubi opus esset acciperent, cunctis interim officiose demerendis, atque omni ratione sibi conciliandis insistere: deposita seueriore persona, comiter alloqui singulos: hilari ac sereno respondere vultu: faciles ad se cuilibet præbere accessus; cōtemnere omnino neminem: gloriam æque fugere atque alij capere: nihil in victu cultuque sibi præcipuum sumere; minimis vilissimisque contentus esse: uti quisque pessime se acceptum à prodromo quereretur, ita huic libentissime suo lectulo lectoque cedere: ubi quis per niuosa, ac lutulenta, & prærupta itinera laberetur, ad eum subleuandum raptim, ad pedes vel cum periculo desilire: alio quouis casu periclitantibus, ubi non posset manu, prece votisque succurrere. Inter cæteros, primarius quidam, contra omnium sententiam ausus tumentis fluuiis ad transitum se se committere, cum aquarum impetu vorticibusque ad exitium raperetur, pia (ut affirmant) Xauerij supplicatione seruatus est. ad hæc, lassos & imbecilles omni obsequio ac sedulitate refouere: postremus cubitum ire, primus exsurgere. denique, famuli dum quiescunt, ipsis operam dare iumentis. Hac ille summissione, officio, suauitate, clementia, cæterisque artibus, quas ei spiritus celestis haud dubie suggererat; breui omnium animos ita sibi deuinxit, uti deinde nihil ad cuiusquam reprehensionem ab eo profectum; aut acerbum ulli videretur, aut nimium. Neque ipsos duntaxat qui in comitatu erant legati, meliores quotidie reddere conabatur; sed etiam in cauponis ac diuersorij, cum se occasio daret, promiscue cunctos docendo, monendo, iuuando, excellentis cuiusdam virtutis & caritatis relinquebat impressa vestigia. Per hunc modum superatis iam alpidibus & Pyrenæo saltu, in Pompelonis veniunt fines. cumque inde Xauerius ad suos facillimo negotio posset excurrere, nunquam adduci se est passus, ut quicquam omnino carni aut sanguini daret; atque ad patriæ saltem incunabula reuiscenda, quauis modico diuerticulo de via deflesteret. Inter hæc, sagaci viro Mascarenia, cognoscendi noui comitis, atque introspiciendi penitus eius animi sensus, maxima dabatur facultas:



## *Historiarum Indicarum*

nihil enim vitia virtutesque hominum ita explorare consuevit, ut bene longi itineris diurna pariter, & nocturna consuetudo, quippe quæ simulationem quamlibet callidam & artificiosam, diu sustineri non patitur. eo liquidius Mascarenia de Xauerio ferre sententiam licuit. cumque in dies notitia pariter & admiratio cresceret viri; præmissio ex itinere tabellario, de ipsius laudibus ad Ioannem ita multa perscripsit, ut Rex miram in eius videndi ornandique cupiditatem incumberet. Olisiponem denique tertio mense peruentum. ibidem agebat Simon. huius quartana verus, cuius accessum eo ipso die expectabat, Xauerij demum læto ac salutaris amplexu discussa. Post triduum Xauerius euocatur in regiam. accedenti, sese Rex perhonorificum præbuit, ac verbis amplissimis, quid de illius meritis ac sanctitate sentiret, in amicorum ac procerum corona testatus est. At ille, peracto salutationis officio; cum ei lauta ad diuersandum hospitium non deessent; ab regia protinus ad publicum valetudinarium, quod Misericordiae sodales procurant, una cum Simone, & Paulo Camerte se confert. ibi, dum naues ad cursum parantur, de more tempus ita distribuant patres, uti nocturnas horas, breui duntaxat excepto somno, sacris carminibus, & rerum diuinarum contemplationi: diurnas, agris omni ope refocillandis, confessionibus quamplurimorum excipiendis, & quotquot ad se veniret, aut consilio, aut re iuuandis insumerent. Hisce ferme occupationibus, quod reliquum erat hyemis, summa populi Olisiponen-sis approbatione transactum. Iamque Indica navigationis appetebat tempus, cum regij æconomi, & Castaneria-nus in primis dynasta, iussu Regis instare Xauerio, uti, consultis hominibus peritis, indicem ederet eorum, quæ vel ad iter tam longum, vel ad prouinciam adeo remotam necessaria duceret. ita sibi etiam atque etiam ab Rege mandatum, uti prorsus nihil, ipsi vel sociis; neque ad valetudinem, neque ad commodum cultumve deesse pateretur. seorsum dein illi Ioannes totam Indicam rem accurate commendat: conuertendis ad Christum ethnicis, neophytis in fide firmandis insistat; Lusitanæ ditionis arces atque præsidia lustret; deprauatos corrigat mores; deque omnibus rebus quam diligentissime ad se perscribat. Postremo, quo sibi aptiorem & expeditiorem fore



re prouinciã intelligat;transmissum ad se ex vrbe Roma diploma litterasque Xauerio reddit; quibus eum Summus Pontifex Nuntium Apostolicum in regionibus Indicis ampla cum potestate creauerat. Et Xanerius Regi quidem paucis ita respondit, vt cum eximiã illius benignitati gratias ageret immortales; tum vero, quod ad procurationem Indicæ rei pertineret, se se, quantum liceret ac posset; serui fidelis officio functurum esse reciperet. Regiis vero curatoribus, & Castaneriano præsertim, complura in vsum nauigationis identidem offerenti; aliquandiu obfirmato restitit animo: dein, ne per contumaciam superbiamve cuncta respuere videretur, perpelli se tandem est passus, vt sibi comitibusque duobus (nam ad Paulum Italum, paucis illis diebus, studio pietatis incensus accesserat Franciscus Mansilia Lusitanus) singulas crassiore textu lacernas ad arcenda circa Bonæ spei promontorium Antarcticæ plagæ frigora, itemque sacros aliquot libros, cuius generis inopia laborare India dicebatur, in nauim imponi permitteret. reliqui vero commeatus atque viatici genus omne reiecit, cum ita diceret: suscepto paupertatis voto, & vnus Dei causam agenti sibi nequaquam esse de crastino laborandum. Hortante dein dynasta, vti puerum saltem vnum adsumeret, victus quotidiani administrum; Mihi vero, inquit Xauerius, dum pedibus manibusque vti licet meis, opus ministro non est. Cum ille nihilominus vrgeret ac premeret; indignum ea fore persona quam gerebat, affirmans, si in tanta vectorum ac nautarum turba palam conspiceretur, aut vestem ad nauis marginem abluens, aut cum cæteris ollam foco in quotidianos cibos imponens; Atqui clarissime vir, Xauerius inquit, dignitatis tuendæ, artes istæ & præcepta quæ narras, quo vides loci Christianam rempublicam adduxerunt. itaque mihi, & ollas, vbi res postulauerit, inspectante populo, non attrectare solum, sed etiam tergere; & lauare pannos, & infima quæque, modo peccatum absit, obire ministeria certum est. Cuius veritate responsi, & in præsentia œconomo uocem includit, & magnam apud eum de se in perpetuum præclaræ cuiusdam ac diuinæ sapientiæ opinionem reliquit; quam Castanerianus postea prædicare libenter solebat; illudque crebris vsurpare sermonibus; in clasfis discessu, non minus cum Xauerio



## *Historiarum Indicarum*

uerio sibi certaminis fuisse, ut plus acciperet; quam cum alijs hominibus, uti ne plus exigent. Ab eo colloquio, & Simonis deinde amicorumque complexu, Prætoriam nauim Xauerius Regis iussu conscendit. ibi vero, quam in omnes partes fructuosa eius caritas & industria fuerit, quo facilius possit existimari; pauca de vniuerso genere classium Indicarum hoc loco præfari est necesse. Præter nauigia permulta, quæ varijs anni temporibus ex Olisiponensi portu ad alia atque alia commeant noui orbis emporia; quatuor ferme vel quinque in Indiam onerariæ destinantur, magnitudinis adeo vastæ, ut cum inflatis aura secunda feruntur velis, oppidi propemodum instar obtineant. Harum singulis, præter commeatus, instrumenta, mercesque, complures hominum ordines vectari mos est. Primus ordo, nauticę multitudinis. ij certis inter se legibus ac disciplina constricti, cursum ex arte moderantur. Secundus est præfectorum ac magistratuum, qui vel ad obtinendas arces ac maria; vel ad ius dicendum, & curanda publica negotia, in orientem ab Rege mittuntur. Tertius militum, qui que ad naues tuendas, qui que ad Indica præsidia supplenda conscripti sunt. Quartus est mercatorum, qui cum vxoribus interdum ac liberis, in colonias Indicas migrant. Accedit famulorum ac mancipiorum ingens numerus. Nec desunt medici seu quos uulgo physicos, seu quos chirurgos appellant. Populus unius onerarię, in uniuersum capitibus modo sexcentis, modo octingentis, interdum etiam plus mille censetur: & obuersante plurima leti specie; culeum è sparto, & linteum quisque secum in nanim infert, quibus insutus, si diem obire contigerit, deiciatur in mare. Porro, cunctorum expiandis animis & rei diuinę procurandę, mercenarius plerunque præest: qui morientium ubi confessiones audierit; & mittendos in pelagus, lustralibus aquis & piaculari precatione fuerit prosecutus; nimirum sat suo muneri, sat legi factum existimat. Ab Olisipone Goam; inde Cocinum, coemendi maxime piperis causa, nauarchi petunt. is cursus, ut nullus grauior interueniat casus, quinto haud citius mense conficitur. interea, pro locorum ac temporum varietate, modo cadentibus ventis, malacię lentissima tædia; modo fauientibus procellis, iactatio vehemens, sæpe sine exitu nausea, fastidium cibi, terror



ror asiduus, diuturna insomnia toleranda. adde maligne diuisa, & sæpenumero vitiata cibaria; vicissitudines immoderati caloris & frigoris; grauitatem cœli sub æquinoctiali maxime plaga, quæ superando Bonæ spei promontorio, semel iterumque traicitur. Ad hæc, non leue incommodum in ipsa quoque habitatione consistit. ab ima carina ad summam nauis oram, contignationes quatuor vel quinque attolluntur. in infima, nautici saburram ad æquilibrium sternunt. in cæteris, tormenta constituunt, vasa disponunt, mercimonia capsasque constipant. vectoribus, admodum exigua sub ijs tectis agendi spatia relinquuntur. à prora puppique gemina in pugnam surgunt castella. in horum utroque, & simul ad gubernaculum, ligneas casulas ac tuguriola fabri concinnant. hæc, qui sunt pecuniosi, magno in breue tempus conducunt pretio. cætera turba, nisi auiant venti, prout cuique datur, sub dio in angustiis cubant. sin atrocior tempestas discursum nautarum ad repentina imperia postulet; pauidi confertique sub tabulata coguntur. ibi, concluso halitu æstuque teterrimus odor sentinæ, pædorque, & illuuiæ afficit corpora. Inde cum graues alij morbi, tum vero lethargi, apostemata, febres variæ, fœda oris vlcera, & purulenti gingivarum tumores existunt: & ipsos etiam haud raro sacerdotes, medicosque corripunt. Iam, in tanta plebis colluuiæ, militumque licentia, quot quantæque sint labe animorum ac vitia; enumerare superuacaneum est. tacitus ea sibi quisque subiiciet. Omnem hanc benemerendi syluam, & sempiternæ gloriæ segetem, in sua nauigatione Xauerus habuit. Martinus Alphonsus Sosa cum summo imperio præerat classi, Prætor Indiæ designatus: qui in eius maris præfectura paulo ante præclaras gesserat res. Huic primum, Xauerus, & affeclis eius apparitoribusque, ad iustitiam colendam ac fidem, plena prudentiæ, plena salutis monita per occasionem dabat: tum ad aliorum animos pariter sanandos & corpora, omnes conferebat vires. excitare afflictos, consolari mœrentes, adsidere ægrotantibus, interdum etiam iisdem sua manu condire & coquere cibos, præbere sorbitiunculas, atque vitalem instillare succum, sternere lectos, ac fordes euerte-  
re. quibus esset spes vitæ, hisce, auertendi cœlestes iras, & mores in posterum corrigendi præcepta inculcare. quorum de-  
plorata



## *Historiarum Indicarum*

plorata esset in terris salus, ijs æternæ vitæ facere spem, & simul ad supremam pugnam arma contra dæmonum incursum ac petitiones induere. valentes, ad officia pietatis & humanitatis hortari, detrahentes de aliorum fama, ferentes iurgia discordiasque, vel impia in superos verba iactantes, vel rem alea dissipantes, leni simul & graui oratione compescere; plurimam diuinæ tum iustitiæ, tum clementiæ mentionem & recordationem inferre; controuersias rixasque dirimere; lenire odia; religionis ignaros ac rudes, Christiana doctrina instituere; omnibus omni ratione prodesse. inter hæc, se ipse inuictum ab omni perturbatione præstare, cibo potuque vti parcissimus; nec dies modo totos exerceri, sed etiam noctes: & fatigatos vigilia cadentesque oculos, tandiu in opere cōtinere, quoad somno & lassitudine oppressus, vbi vbi fors ferret, tandem aliquando succumberet. Atque ex hoc tam abiecto, tam in speciem seruili genere vitæ, tantum abest vt quicquam vel de auctoritate, uel de existimatione perderet; ut eum, summi infimique, tanquam salutis omnium præsidem, & è supernis demissum sedibus, intuerentur. Inde primum & patris, & sancti cognomentum inuenit: sic enim in oriente postea semper, & uocitatus, & habitus est. Cæterum in hoc itinere, Xauerij uirtus, eo maiorem habuit campum; quo tardius illo quidem anno ab Lusitanis nauigatum est. non nisi Augusto mense exeunte ad Mosambicum deuenere: ibi ad Aprilem usque hyemare coacti sunt. & agris, qui permulti erant, in regium nosocomium è classe deportatis; in eorum famulatu præter tanta denuo cum assiduitate uigilijsque uersatus est, ut præ sui corporis negligentia grauem & periculosum in morbum inciderit: in eo morbo cum maxime arderet febris, teneri non poterat, quin, vacillante corpusculo, periclitantibus tamen ac moribundis adesset. in iis, nauticum infiniæ sortis adolescentem; cui exitialem exitum haud sine causa metuebat; è faucibus tartari; si qua posset, eripere statuit. iacebat miser humi, destitutus ab omnibus; ei que per extremam phrenesim (quod erat in primis dolendum) ad detestanda & confutenda crimina tali tempore neque mens, neque sermo constabat. Hunc tolli à ualentioribus iussu, in suomet cubili Xauerius collocat. ad eum contactum (mira dictu res) confestim



stim ad se iuuenis rediit, & peccata Xauperio rite confessus, magna cum salutis æternæ spe sub vesperam excessit è vita. Inter hosce labores exhausta iam hyeme; Prætor Sosa, quod certis de causis præuenire cuperet; quæ prima facultas nauigandi fuit, rostrata maiore celeriter antecessit, neque Xauperium, viribus vtcunque receptis ab se diuelli permisit. Paulus & Mansilia, in nosocomij procuratione, quoad classis abiret, iussi persistere. Xauperius interim, de instituta vitæ consuetudine remisit nihil, certam ei nauis particulam ibi quoque Sosa in hospitium assignauerat. hanc item pater aliis egentibus ultro concessit. ipsi pro culcitra funis anchorarius in spiram conuolutus, pro ceruicali fuit ipsamet anchora. Ex itinere primum ad Melindem, tum ad Socotoram nauis appulsa. vtroque, in erudiendis ac subleuandis hominibus, pro temporis breuitate, Xauperij nauitas ac diligentia constitit. Goam denique anno seculi huius quadragesimo secundo peruentum est, pridie nonas Maias, quo die Romæ quondam sanctus Ioannes Apostolus ex olei feruentis dolio illesus emerfit. Descensione facta, pater ad Regis valetudinarium, vti solebat, extemplo se confert. Eodem paulo post cum classiaris ægrotis Paulus & Mansilia comites magna omnium gratulatione succedunt. Goanæ tum Ecclesiæ præerat Ioannes Albuquerque (de quo supra commemoratum est) præstanti sapientia Pontifex. Ad hunc, Xauperius, antequam vllam reipublicæ attingeret partem, adiit honoris & obsequij causa: eique sine ambagibus id quod erat exposuit: se Pauli Pont. Max. & Ioannis Regis Lusitanæ missu, ad impertiendum ethnicis Euangelium, stabiliendos in fide neophytos, Christianos aduenas & inquilinos pro viribus adiuuandos, in ea loca venisse. attamen, ita sibi certum esse fixumque: communis rei nihil omnino, nisi ex ipsius Episcopi auctoritate ac sententia gerere. Simul, Pontificias litteras, quibus Nuntius Apostolicus fuerat declaratus, eidem offert venerabundus: ac profitetur, sese iure illo ac potestate nequaquam vsurum, nisi quatenus episcopus ipse permiserit. Hac seu altitudine animi, seu modestia captus Albuquerque, illico ruit in amplexus viri: perlectum probatumque diploma restituit: postremo, etiam atque etiam Dei seruum adhortatur, vti ani-



## *Historiarum Indicarum*

mo soluto ac libero Christianam rem è præscripto summi Pontificis administret; valde confidere se se, illius aduentum, ad Indicæ ecclesiæ vel tutelam, vel amplificationem magnopere profuturum. neque in præsentia modo Xauerium comiter ac libenter accepit; sed etiam in posterum præcipuo semper tum in honore, tum in amore cunctis approbantibus habuit. Ab ea salutatione regressus in domicilium hospitale Xauerius, consueta pietatis & caritatis munia cum suis obire perrexit. Præter hæc, salutarem publici catechismi ritum, in regionibus iis utique primus instituit. Quotidie ferme prædibat ipse cum tintinnabulo, & ingentem promiscuæ turbæ numerum in templa cogebat. ibi rectæ fidei capita, & Christianæ vitæ præcepta, vulgi sermone breuiter ac dilucide comprehensa (quæ ipsemet postea certioribus ad modulandum adstrinxit numeris) decantabantur hoc fere pacto. Verba præibat pater, inflexis ad aures populi demulcendas leniter vocibus. easdem voces reliqui extemplo reddebant. id cum pro populi captu bis terve ac sæpius fieret; sequebatur, vt sonus ille, ad aures blande ac suauiter accidens, integra paulatim sensa, totasque periochas penitus in pectora demitteret vulgi. Ad extremum, vt silentio indito symphonia conquieuerat; certos ex eadem institutione locos, Dei famulus fuisse ac populariter explicabat. Ita, pueruli, foeminaeque, ac tarda plerunque mancipia, paucis horis ac pene ludibundi, multo plura percipiebant de rebus altissimis atque diuinis, quam illa noua ac vetus Academia, lycaumque illud inclytum, & omnes antiquæ philosophorum scholæ, tot seculis, tanta contentione, tantis lucubrationibus extundere valuerunt. Hæc tum in vrbe Goa per hyemem à Xauerio gesta: & simul, optimatum rogatu, Paulus Gamers, Diui Pauli seminario collegioui, quod iam puerorum numero haud paruo constabat, administrando regendoque præpositus. At Xauerius, quod per eos dies de recēti Parauarum & Piscariæ gentis conuersione cognorat; Mansilia comite ad eos edocendos & confirmandos vere inueniente profectus est. ij populi, vti supra docuimus, magna Michaelis Vafæi & sociorum alacritate, salutaribus illi quidem abluti fuerant aquis; cæterum eius mysterij vim & reliqua ecclesiæ sacramenta, itemque precandi formulas,



las, & Christianæ fidei articulos, & legis diuinæ præcepta penitus ignorabant. Neque sacerdotibus Europæis quive Goæ, quive Cocini degerent, vlla ostendebatur facultas barbariæ illius erudiendæ: quippe in magna distantia locorum, & nullo propemodum linguæ commercio. ex quo nimirum facile conici potest, dum peregrinus homo Xauerus ignotum sermonem addiscit, cæcamque ignorantiam noctem ex iis mentibus conatur expellere; quam graues illi miseriæ, quantus molestiarum cumulus fuerit perferendus. Cum Brachamanis præcipue magna seruo Dei fuere certamina. Abduci à se populum, fraudesque suas ac mendacia detegi, mortis instar ducebant. cumque à vi cædibusque eos turbarum abstergeret metus, frustra Euangelici præconis linguam donis ac mercede alligare sæpe conati sunt. Interea, vicino quodam in oppido, quod tyranni metu in patria superstitione perstabat, fœminę quartum iam diem ex partus difficultate grauissime laboranti agentique animam, Xauerus accitus interuenit. fidei summam exponit: certum ad salutem iter ostendit. assensa est mulier: baptismum expetiit: illico peperit. ea re adducti propinqui, dein populares vniuersi, tyranno mitigato, repudiatis idolis, Euangelio credidere: quos omnes probe institutos pater sacro item baptismo proluuit. Hęc & alia plurima Xauerium mire districtum habebant: atque vbi quot in præsentia fatis esset, eodem substiterat loco; delectos ex omni Christianorum numero hypodidascalos (ij patrio sermone canacapoli vocantur) & probitatis, & ingenij laude præstantes, in ea locabat specula, qui cæteros in officio continerent, sacras tuerentur ædes, baptismo fungerentur; & si quid accidisset grauius aut difficilius, consignatum interea litteris memoriæ causa, postmodum ad se referrent. Hisce vicariis commendato grege, ad aliud ipse aliudque deinceps oppidum aut pagum, pedes, & quidem sine sacculo semper ac pera, transibat. Vbi oram omnem iis quæ dixi caritatis officiis, & prædicatione Euangelij peragrauerat; orsus iterum à capite eandem pari diligentia prouinciam obibat, pensum cum à cæteris Christianis, tum vero à canacapolis exigens. Atque huic hominum ordini, quo commodius tam piæ ac necessariæ functioni vacarent; certum auri pondus impetrauit quotannis in Lusitanie



## *Historiarum Indicarum*

Lusitaniæ Regine socculos ab Indis conferri solitum; cum quidem ad Catharinam scribens, Ioannis vxorem, insigni virtute, ac pudicitia fœminam, haud inepte lusisset, nullis eam soccis æque facile scanfuram in cœlum, ac precibus neophytorum, in quos Christi causa id opis ac beneficentiæ contulisset. Amplius annum Dei famulus in Paraua regione traduxit; eumque Domini agrum adeo reliquit probe cultum & conlitum, vt hodie in primis totius Indiæ felix ac fertilis habeatur. Harum rerum fama commoti Macoë finitimi populi è Trauancoris regno ad Comorini latus occiduum, Parauis multitudine ferme pares, Xauerium ad se baptismi causa per supplices nuntios ac litteras euocant. ille profectus, eodem & institutionis, & peregrinationis ordine, plus decem hominum millia vertente mense ad Christum adiunxit. noui dein ad eum concursus quotidie fieri, atque vbi patrio sermone proposita principia Christianæ doctrinæ didicerant; cum alia suspicere, & laudibus in cœlum ferre; tum vero ipsa præcipue decem diuinæ legis præcepta. mirari quam illa æquitatis plena essent, quam vera, quam rectæ rationi consentanea. oblatam sibi è cœlo haud dubie lucem gratulari inter se; deplorare suam, & maiorum suorum amentiam, qui ad eam diem in tam densis errorum tenebris, ac tanta vitiorum fœditate iacuisent. inde se mutuo ad Christianam religionem adhortari: mox cæteruatim ad fontem æternæ salutis accurrere. Hisce abluendis cum maxime instaret Xauerius; noui à Manare legati superueniunt, id ipsum orantes: hoc nomine insula est, extremæ Ceilano ad septentriones apposita. eam quoque gentem, ne ipse ab inchoato opere abduceretur, missis interea pro se idoneis vtcunque viris, initiat. Is verò ager, non fidelium modo, sed etiam martyrum vberem segetem paucis diebus effudit. Si quidem Iapanapateni Ceilaniæ terræ tyrannus, cuius in ditione erant Manarense, idolis ad insaniam deditus, audita re, insitam ingenio feritatem nouellos in Christianos exercuit. immissoque satelite, partim eorū occidit, partim varijs supplicijs per summam indignitatem affecit. pauci ex insula in continentem elapsi (in ijs regibus quidam adolescens) terrestri leucarum amplius ducentarum itinere Goam vsque se contulere. ibi rite instituti omnes, & mystico partu renati sunt. Neque hac tantum regione



gione se se tenebat animorum ardor. Macazares quoque, leucas in ortum quingentas ab Cocino disiuncti, Christianos doctores maiorem in modum expetebant. ij legatos primum eadere ad Antonium Galuanum (vtri supra commemoratum est) miserant. Galuani iussu cum ad eos tenderet Franciscus Castrius; aduersa tempestate prohibitus, Ternatem redierat infecta re. Felicius deinde nauigauit, cum Sosa Indiam regeret, Antonius Paiua, coemendi sandali causa missus in eadem insulas ab Rhoterico Vazao Pereria, Malacæ Præfecto. Iam ante, in illis emporijs negotia gesserat Paiua, ac proinde multos ibi notos habebat; neque erat Macazarici sermonis ignarus. Vt in Supanos deuenit) hoc nomine gens est) Rex ipse, iam septuagenarius, in primis totius Macazaris potens & bellicosus, vltro (quæ facilitas Regum illorum est) ad inuisendum aduenam accessit. Filium ducebat secum, annos quindecim natum; itemque adolescentulas, aureis armillis ornatas, triginta. Eo comitatu cum ad portum venisset; accepta salutatione redditaque, variis de rebus, vt fit, cum peregrino mercatore sermonem instituit. inter cætera quæsiuit ex eo, quid ita, Lusitani Mauris (sic vulgo Mahometanos appellant) infensi infestique potissimum essent. Ea occasione arrepra, Lusitanus, in hæresis Mahometanæ vitia, & ipsius auctoris ambitionem, fraudes, avaritiamque pro ea quam habebat fandi copia inuectus; iis dein vitiis fraudibusque, veritatem, ius, fasque Christianæ religionis opposuit: deque ipso Christo Dei filio, generis humani liberatore, nonnulla subiunxit. Inde affirmavit, nomini Christiano cum sceleratissima & corruptrice animorum secta, propriū ac perpetuum bellum esse susceptum. Omnia Regi probabilia admodū visa: &, quod iam aduersperasset, domum regressus, Paiuæ xenia misit ad nauē. Postero die, ac sepe deinceps, multa ex eodē sciscitari perrexit. in ijs, illud etiam; quisnam esset Iacobus quidā, quem in præliis inuocari ab Lusitanis, ad se Mauri detulissent. Ad hæc, Paiua, de Christi discipulis ad Euangelium prædicandum à magistro dimissis, pauca perstrinxit. in ijs, præcipua sanctitate meritisque fuisse Iacobum, qui primus latissimum Hispaniæ, patefacti hominibus cœli, nuntium attulisset: atque idcirco in eius præcipuæ Apostoli tutela ac patrocino Hispanos latere



## *Historiarum Indicarum*

vniversos . ac proinde , inter dimicationem ab ijs inuocatum contra Christianæ fidei hostes adesse fulgentibus armis horrificum , igneo equo insidentem . eius rei , vel Mauros optimos esse testes , qui conferta cum Lusitanis pugna , plures ipsi ac paratiores , tali viso non semel cœcam in formidinem , fugamque præcipitem acti sint . Sub hæc Paiua è Christianis institutis , de inuocatione præsidioque cœlestium pauca differt . Cum hæc & alia id genus complura , mira quadam approbatione per eos dies audisset Rex , neque tamen de capeßenda peregrina religione statueret quicquam ; Paiua , quod in eo emporio tempus ultra negotiandi non esset ; ad Siani regnum leucas inde quinquaginta procescit . Cum Siano Rege familiaritas intercedebat Paiuæ ; quippe apud quem ægrotus olim in hospitio fuerat , multaque cum eo de Christianis initijs egerat . Hunc ubi adesse cognouit Rex , confestim ad eum , iactis procul à portu anchoris in salo stantem , prior visendi gratia transmisit : & mirifica quadam ex eius adspectu voluptate perfusus , post mutuam salutationem ; Auguror , inquit , faustum ac felicem mihi meisque tuum esse aduentum , ô Paiua : quandoquidem , ex quo te aspicio , tanta ac tam noua me gaudia pertentant . multo dein ac suauis cum peregrinis habito sermone , digreditur . Insequenti luce , cum ad eum salutandum honoris causa vicissim in urbem Sianum Lusitani venissent ; conuersus ad Paiuam Rex , Caue , inquit , putes excidisse mihi , quæ , hic apud nos cum esses , de vestræ nationis in vnum Deum fide ac pietate narraßti . hærent ea mihi penitus infixæ ; neque vnquam ex eo tempore voluntas mihi eiusdem amplectendæ ac profitendæ fidei defuit . Sed hætenus , me , popularium metus , si ab auitis institutis abscederem , necnon existimationis ratio , si , grandi iam natu , repente immutatus viderer ; ab hoc tam honesto consilio retardarunt . easdem ob causas adhuc animi pendeo : teque pro amicitia consulo , quid mihi faciendum putes . ac simul quæso vti coram hisce proceribus ( adstabant autem plures ) aliqua de fidei vestræ mysterijs , deque hominis Christiani officio differas . Tum Paiua , se indoctum præfatus , ac minime dignum , qui tam sublimia tamque diuina tractaret , ac nihilo minus incenso pij Regis studio pro sua parte non defuturum ; orsus à primo decalogi præcepto , cætera singillatim deinceps  
quam



quam planissime potuit, explicauit: eaque cuncta summam ad illa duo capita redigi ostendit: amoris erga Deum, & proximum. Magno assensu, Regis præsertim, ea oratio audita. sic ille abiit dies. Postero, eadem scholæ pari auiditate repetuntur. Paiua, ad ea quæ tradiderat, sermonem adiunxit de officijs operibusve misericordiæ, quæque ad corporis, quæque ad animi auxilium pertinent; ijsque operibus præcipuas Christiani muneris partes docuit contineri. Ab ea peroratione dimissus Paiua, proximo die reuocatur in regiam. ille, Deum enixe precatus, uti mortalibus cæcis lumen aliquod æternæ veritatis offerret; ad urbem properauit, in rerum diuinarum cogitatione ita defixus, ut viæ laborem, ac tempus omnino fefellerit. Vbi ad Regem peruenit; adstante nobilium corona, rursus de Christianis præceptionibus verba fecit. exinde quæ fuit ab eo Rex, num quid de mundi creatione cognosset: ille, totam eius creationis seriem, à sanctis hominibus & prophetis conscriptam esse respondit. Cum, Sanctus quid nam sibi vellet, rursus interrogasset Rex (id enim verbum Paiua reddere Macazarice nequierat, propterea quod ij populi, ut sanctitatis ipsa re; sic etiam vocabulo carent) sanctos esse, inquit, eos, qui proposita nuper ab se præcepta seruarent; ac se quam maxime à corporis contagione seiungerent. huiusmodi fuisse rectæ religionis interpretes, Dei plenos; ac proinde nullum in eorum scriptis inesse mendacium. Tum Rex; quid est, ait, mendacium? Atqui, ut ad hoc respondeam (inquit Paiua) liberali venia est mihi abs te opus, o Rex. quod si nihilominus acerba & aspera mea tibi visa erit oratio; peto quesoque, uti omnem in me vnum iram exerceas: Lusitanos meos cum suis rebus incolumes abire permittas. Cum ille continuo quidlibet expromendi potestatem fecisset, Scire aues, inquit, mendacium quid significet. Ego vero, nulla comparisonem huiusce tibi vocabuli vim facilius aut clarius demonstrauerim; quam ista ipsa quam vos agitis vita. Cum enim IESVM Christum, Dei filium, totius veritatis auctorem, penitus ignoretis; sic fit. ut erroribus infinitis impliciti, à veritate semoti, in ipso mendacio volutemini. Cum hæc & eiusmodi maxime dicerentur, subito coactæ nubes, magno cum cæli fragore, tonitribusque, & procellis, ingentem



## *Historiarum Indicarum*

gentem uim imbrium effudere. quæ res eo & mirabilior uisa est, & gratior accidit, quo maiore cum detrimento frugum, diuturna siccitate laboratum in ijs regionibus fuerat. Cum dein Regem urgeret Paiua, ut in Christi uerba sine dubitatione iuraret; ille nouem insuper dies ad deliberandum sumpsit. Obstabant egregiæ ipsius uoluntati, maxime sacrificuli, quos uocant Becos, teterrimum genus. ij, quemadmodum Satane ministros decet, ipso amictu ornatuque corporis, muliebrem sexum certatim ementiri non dubitant. expilant faciem, crines alunt comuntque: dentes artificio quodam inaurant: denique fractis motibus gestibusque, luxum atque mollietatem produnt, ijsdem foeminam attigisse capitale est: ardenti uiuus crematur pice qui tale quippiam admiserit. at uero ipsi (quod uix auditu fas sit) certis inter se legibus nubunt: & praua insuper uulgo & ferentes dogmata, miseram gentem nefarię turpitudinis ac superstitionis implent. igitur hi præcipue, ab noua religione absterrebant Regem; quippe qui omnibus adfuerit flagitijs, Christianæ seueritatis & castimonix nomen horrent. Accedebant ad labefactandum, si qua possent, Regis propositum Mahometani quoque complures, qui mercaturę causa in eius regnum ex Vgentana, Pane, Patane conuenerant. § Horum scelerei & conatibus dum obuiam itur, Supanus interim Rex, bene comitatus, ornatisima classe, necopinato superuenit. ac primum omnium interrogat Lusitanos, num Sianius Christo se addiderit. Cum ab ijs responsum esset, Sianium cunctari deliberabundum adhuc; Supanus, in re adeo salutari, tam longa deliberatione quid opus est? inquit. ego quidem, nulla interposita mora, Christianum me uolo fieri. Tum Paiua, quod sacerdotibus careret, ipse per se perque suos raptim ara excitata, quam maxime festo apparatu, Regem sacro baptismo rite lustrandum curauit à quodam e comitibus, cum cætero corporis habitu, tum ipsa canicie uenerando. post Regem, alij quoque complures amici & propinqui eodem sacramento expiati. Regi, Ludonici nomen impositum. cætera cohors, alij aliter appellati. Summa dein cum lætitia, & gratulatione bombardæ perstrepuerunt; rei que gestæ fama longe ac late manauit. eo exemplo incitatus, tandem aliquando Sianius omni contempto periculo rupit moras.

à Paiua



¶ Paiua ipso cum primoribus aliquo baptizatus, Ioannem appellari se voluit. Bonorum ingenti gaudio celebratus hic itē dies: & Reges ambo præter veterem amicitiam ac vicinitatem, nouo insuper sacræ necessitudinis ac societatis vinculo magis magisque constricti. Abeunte dein Paiua cum suis, veriti, ne duce, ac magistro destituta gens, breui pristinos in errores ingeniumque recideret; oratores ad Malacæ præfectum implorandi tam necessarij subsidij causa misere. Hic admodum Euangelij cursus (quod quidem exstet) gerente Præturam Sosa, per triennium fuit. Interea Prætor ipse, tuendæ atque administrandæ prouinciæ diligenter operam dederat. Is, vt primum Goam est delatus, inito magistratu, hyemem totam ferme iure dicundo consumpsit. atque illud ab eo in primis laudabiliter institutum, vt sexta quaque feria valetudinarium publicum ad consolandos egrotos inuiseret: ibidemque rei diuinæ palam interesset. custodias præterea singulis hebdomadis adibat: victorum cognoscebat causas, curabatque vt salua æquitate ac fide, quamplurimi soluerentur. idque toto præturæ tempore solenne seruauit. Exacta hyeme, præfecturas de more distribuit. ipse ad Baticalæ Reginæ ferociam edomandam arma conuertit. Hæc mulier, stipendiaria Lusitani Regis, non modo vectigal dudum abnuebat pendere; sed etiam piratis & hostibus nominis Christiani tutum in suos portus dabat receptum. Sosa, quadraginta nauibus, in quibus præter auxilia Lusitani erant mille quingenti; ad Baticalam profectus, in ipso portus aditu consistit. inde missi ad Reginam, qui debitas pensiones, & præterea piraticos parones ad vnum exigerent. illa, metu repentino iacta, quatuor in præsentia mittit parones. inde cum varias ad frustrandum excusationes afferret; descensione facta Prætor instruit aciem. Mahometani, primo è palmetis in hostem intrepide subeuntem, varij generis tela coniiciunt. dein, vbi ea sperni sensere, ad urbem citato recedunt gradu. ibi rursus conglobati in conspectu liberorum, & coniugum (nam Regina tum aberat) prælium instaurant. anceps aliquandiu dimicatio fuit, sed inferente se acrius Lusitano, fusi per agros, fugatique omnes: oppidum nullo defensore captū & incensum est: è Lusitanis desiderati duodecim, vulnerati complures. è barbaris maior multo numerus cecidit.



## *Historiarum Indicarum*

cidit. Cæterum in ea pugna insigne traditur facinus Franci-  
sci Almeida Scalabitani. is, conspicatus commilitonem in ex-  
tremo discrimine, hostiles manipulos impetu capto perrum-  
pit: circumuentum Lusitanum egregie protegit: & in eodem  
hærens vestigio, intentos in se mucrones ac tela tandiu susti-  
nuit; quoad suis ad opem utrique ferendam spatium datum  
est. ita, coronam is quoque civicam populari seruato; præci-  
pua victoriæ laudem, absterrito Mahometano promeruit. e-  
xinde Prætor, succedentibus in orbem centuriis, Baticalanos  
fines, non intermissa dierum aliquot clade vastauit. ac, metu  
malisque demum, Reginam & consiliarios, ad piraticas tradē-  
das naues, pernumeranda stipendia, & pacem renouandam a-  
degit. postremo victor incolumi classe Cocinum petijt: ab Co-  
cino dimissis varia in loca nauibus, in vrbe Malaca primus por-  
torium & scripturæ magistros instituit: ex quo, ad regia vecti-  
galia non mediocris accessio facta est. Inde Goam in hyberna  
§ reuectum, cupido incensit Tremelani delubri exspoliandi, cre-  
do, quod eo cultu ac donariis indignum idolum duceret. in Co-  
romandelio tractu delubrum id est; cum cætera superstitione,  
tum auro ac diuitiis inclytum. in eam rem, Sofa, permultis ijs-  
que aptis remigio nauibus quo facilius esset ad terram appul-  
sus, & tribus fere armatorum millibus, ineunte vere cum ab  
Goa soluisset, vixdum in altum euectam classem atrox tempe-  
stas oborta pæne demersit. maximo in periculo prætoria ipsa  
triremis fuit. dispersæ cæteræ, Cocinum denique tenuere. Inde  
ad insulam processere, quam à vaccis appellant. ibi ab explora-  
toribus cognitum, Coromandelium littus omne, contra quam  
Prætor ab alijs audierat, asperum & importuosum esse: nullam  
ibi tutam stationem fore. Hoc nuntio reuocatus; ne nihil om-  
nino tali apparatu egisse videretur, ad Colanum repente flexit.  
ibi arcem, uti docuimus, Lusitani habebant. Rex erat socius:  
ac tum ab vrbe cū exercitu aberat, bellis finitimis occupatus.  
ab arce leucas circiter quatuor, à mari non plus vna, distabat  
fanum, in quo magnam item pecuniæ vim asseruari ferebat  
§ fama. Prætor in terram egressus, per speciem amicitiae pau-  
latim ad locum progredi. populus mirari quid in pacata re-  
gione sibi vellent armatæ Lusitanorum cohortes. vbi tem-  
plum intrantem vident Sofam; tum demum sensere quid pe-  
teret.



teret. extemplo reliquias militum ex agris euocant: atque ad naues redeuntem Lusitanum angusta ac depressa via (quod ad Calecutum olim Albuquerque euenerat) è superiore loco, sylvisque ac sepibus, Naires minus centum adorti; sagittis ac fistulis magno detrimento affecere. Sofa, cum agmen clauderet, ex equo degressus quo minus ad ictus pateret; ferme triginta suorum amisissis, vulneratis compluribus, ægre ad mare peruenit, haudquaquam satis magno operæ pretio: siquidem effossis templi penetralibus, auream ollam extraxerant numulis argenteis plenam quos Indi fanones vocant, neque sesterium plus vnum continent singuli. Eam ollam Ioanni Regi dono missam, consulti Pontifices reddendam Colanio censuerunt. reuecta quamprimum in Indiam, & eodem loco Regis iussu reposita est. Per idem tempus, crescenti ex aliorum malis, præclara se Lusitanis dedit occasio. Inter Azedecanem & Idalcanem (vti sunt eæ gentes ad omnem flatum spei vel timoris mobiles & infidæ) noua odia & simultates exstiterant. Idalcan Azedecanem, beneficiarium & vetricalem suum, in regiam pro potestate euocabat. ille capiti metuens, pariterque thesauris quos diuturna parcimonia rapinisque congefferat; palam imperium detrectabat. Inde mutuo sibi struere insidias, mox etiam bellum aperte moliri: ac demum in eius belli societatem pro se vterque muneribus ac promissis Lusitanos allicere. Inter cætera, Azedecan, exturbandi è male parto imperio Idalcanis, consilium cepit eiusmodi. E stirpe Decanij Regis, quem à satrapis ducibusque circumuentum & captum fuisse memorauimus, Meales erat quidam. is, ad otium magis quam ad arma natus, & sæuitiam Idalcanis haud sine causa pertimescens; veniam ab eodem impetrauerat, religionis ergo secedendi Mecam. ibi cum vxore liberisque aliquandiu commoratum; Solimanus archipirata, de quo supra diximus, Indiam petiturus, auexerat, iniecta quidem spe auiti regni recuperandi: sed, quod multo similis veri est, quo per eum, si res ita ferret, seditiones ac turbas in ijs regionibus excitaret. Hisce ergo promissis inflatus Meales, & comiter in classem acceptus; in Cambaiæ deuenerat fines. Cæterum à Lusitanis paulo post victo & fugato Solimano, haudquaquam suis viribus fidens, ibidem in exilio sponte substiterat. ea re



## *Historiarum Indicarum*

cognita Azedecan, ex vrbe Bilgano leucis ab Goa quatuordecim, per occultos interpretes ac litteras instare Garziæ Castrio Goæ præfecto ( nam Sosa tum aberat ) vti Mealem è Cambaia quamprimum accersat. is vbi Lusitano præsidio septus in terra Decania pedem posuerit, concursus ex agris vicisque, ab importuni tyranni odio, ad iustum ac legitimum Regem extemplo futurum. se quoque in id ipsum paratas habiturum copias: & Lusitanos, Meali tum inopi egentique quibus velint impositis legibus, si eum in patria locauerint sede; pro infidioso & rapaci accola, vicinum Regem ad omnia fidum atque opportunum habituros. Hisce atque alijs rationibus facile persuasum præfecto, vti magnis pollicitationibus Mealem cum vxore liberisque Goam euocaret. Eo vbi peruenit; confestim admonitus Prætor, qui tum erat Cocini, Goam repetit. ibi in concilio dies aliquot anceps deliberatio tenuit. nam & pacem cum Idalcane factam, repente violare, nefas; & Mealem vltro accersitum repente deserere, turpe non sine causa videbatur. Variantibus inde sententijs, cum aliquandiu hæsisset Prætor; tandem è dignitate fideque nominis Lusitani statuit esse, Mealis afflictas fortunas omni ope excitare; & cum Azedecane, iamdiu id exoptante, vires atque arma coniungere. Habito delectu, clam dies ad reducendum Mealem præfectis edicitur. iam ad primos Decanij regni fines præsto erat popularium manus, Meali excipiendo submissa. Vbi dies affuit, Prætor ipse cum armatorum copijs Mealem sine fine gratias agentem ad littus honoris causa deducebat. vix ad arcem Benefarini peruenerant, vnde in continentem ex insula traiectus est; cum seuocatam Prætorem Petrus Faria Lusitanus vir bello egregius, & magno rerum Indicarum vsu monere etiam atque etiam institit, integris rebus videret quid ageret: perfida barbarorum ingenia inconstantiam rerum humanarum apud se reputaret: neu florentes tum Lusitanas opes cum perditis misceret exsulum rebus; neu Idalcane tanta potentia Regem, amicum ac socium, sine causa lacefferet. mittendi Mealis, quodcumque sit opus, arbitrium penes Prætorem fore: sedandi belli, si temere moueatur, non quoties libeat, facultatem fore. Hac oratione, & simul auctoritate viri permotus Prætor, qui adhuc fluctuaret animo, repente, quasi noua res aliqua



aliqua maioris incidisset momenti; redire vna cum Meale cum  
 & os in urbem iubet. id cum initio sermonem æque ciuibus  
 atque aduenis præbuisset, sapienter dein factum apparuit. si-  
 quidem quintodecimo ferme post die, nuntius venit, ab Idal-  
 cane debellatum esse. Profectus magno cum exercitu ab Vr-  
 be Visapore (ea distat ab Goa leucas circiter sexaginta) Bil-  
 ganum acri obsidione cinxerat. Azedecan inclusus, urgente  
 animi ægritudine senioque, extremum obierat diem. eo de-  
 mortuo, Idalcan urbem facili negotio captam diripuerat. ma-  
 gnas ibi opes, ingentem rei bellicæ apparatus inuentum aie-  
 bant. Hæc vbi Goam allata sunt, Prætor necessitatem in con-  
 filium vertit: celato quid nuper egisset; legatum victoriæ gra-  
 tulandæ ad Idalcanem mittit. Mire opportuna ea fuit legatio.  
 Idalcan, inter ipsam rei tanræ lætitiā, vel Prætoris officio,  
 vel ipsius legati dexteritate captus; Bardefios & Salfetanos vi-  
 cos agrosque; & extra suam ditionem quicquid Azedecanis  
 fuisset; Lusitanis attribuit; cum eo tamen, vti Mealem cum  
 coniuge & filijs Malacam amandarent, ibique custodiendum  
 curarent, ne ad novos tumultus ciendos redire posset in pa-  
 triam. Prætor, ea donatione gaudens, misit extemplo qui  
 possessionem locorum adirent, & vectigalia nomine Lusitani  
 Regis, vt olim, exigerent. De Meale incertis implicans re-  
 sponfis, callide rem extraxit, neque ab Goa dimisit hospitem;  
 verbo, vti in oculis populi Goani tutius adseruaretur: re ve-  
 ra, vt in tanta locorum vicinitate, hoc metu Idalcanem in of-  
 ficio contineret. ex eo tempore Meales nequicquam è proxi-  
 mo auita intuens regna, & Lusitani præfecti fidem implorans,  
 Goæ in libera custodia dissimulanter est habitus. Hæc ferme  
 ab Sofa Prætoris gesta; quem deinde virum, in Lusitaniam se-  
 cundo cursu reuēctum, & auctoritate florentem & opibus, præ-  
 cipuo in honore semper habuit Rex. Cæterum eius præturam  
 vna res maxime fecit insignem; aperta per id tempus, & pri-  
 mum cognita nostris hominibus terra Iaponia, cuius de terræ  
 & cultorum ingenijs ritibusque, tamen si non pauca dudum à  
 nobis alibi tradita sunt; tamen hic etiam exponi quædam aut  
 ex eo tempore allata, aut etiam liquidius cōperta, locus haud  
 dubie postulat. Quem igitur vulgo Iaponem vocant, eę præ-  
 cipue tres insule sunt, circumfusus aliis minoribus interfluo eu-  
 ripo



## *Historiarum Indicarum*

ripo disiunctę. Prima & maxima, in satrapias aut regna tria & quinquaginta diuiditur: eius caput est vrbs Meacum: inde insula tota denominatur. alteram Ximum appellant. hæc satrapijs regniſve cenſetur nouem. nobiliſſimas habet vrbes, Voſuquim & Funaium regni Bungenſis. Tertia dicitur Xicocum: ſatrapias aut regna continet non plus quatuor; inſignis maxime Toſa vrbe regni cognominis. ita Iaponis vel regna, vel ſatrapia (ſunt enim complures in quas vocabulum regni minime conuenit) in vniuerſum numerantur ſexaginta ſex. Totius terrę longitudo ferme in ducentas, vti ferunt, leucas excurrit. huic nequaquam reſpondet latitudo: decem tantum alicubi patet; ſummum triginta non amplius. de ambitu nil dum certi proditum eſt. Iacet ab Aequatore in Arctum à trigeſimo gradu ad trigეſimum fere octauum. Ab oriente obuerſa eſt nouę Hiſpaniæ, centum & quinquaginta leucarum interuallo. A Septentrione, Scythas vel Tartaros, & alios ignotę feritatis populos. Ab Occidente adſpicit Sinas, varia pro littorum flexu excurſue diſtantia: ſiquidem ab vrbe Liampo, qui Sinarum regnis in ortum eſt limes; ad Iaponis inſulam Gotum, quę prima inde nauigantibus occurrit, leucas numerant ſexaginta: ab Amacano autem, occiduo Sinarum emporio, vbi Luſitani ferme negotiantur, ad eandem Gorum, leucarum ducentarum nonaginta ſeptem traiectus eſt. A meridie, vaſto mari interfuſo, inexploratas habet terras, è quibus caſu nautas olim quosdam in Iaponem delatos fama eſt, neque inde ſoluiſſe. Tellus, maxima ex parte, niualis ac frigida, neque admodum ferax. Septembri menſe oryzam (is cibus eſt communis omnium) quibuſdam etiam locis Maio triticum metunt: neque ex eo panes more noſtro, ſed genus quoddam offæ, ſeu polentę conficiunt. Salubris cœli temperies: aquę bonę: calidas etiam alicubi, medicos in uſus emicare cognitum eſt. Editi præruptique montes cum alij paſſim, tum duo præcipua nobilitate viſuntur, quorum alter, incertę appellatiōnis, aſidue flammas euomit; inque eius cacumine, certis hominibus, poſtquam voti cauſa diu ſe macerauerint, ſplendida circumfuſus nube ſe ſe cacodæmon oſtendit; alter Figenoia-  
ma nomine, leucarum aliquot aſcenſu trans nubes attollitur. E terrę viſceribus incolę varia effodiunt metalla: & longinquas



quas nationes ea merce pelliciunt. Arbores vel ad amenitatem, vel ad fructum ferunt haud absimiles nostris. vnus tamē, quæ palmam imitatur, ignoto nomine, admirabile prorsus ingenium. siquidem (vti perhibent) humorem quemlibet reformat: si forte maduerit, contrahit illico sese, ac veluti pestifero contactu marcescit. remedio est, auulsam radicitus, in sole siccare; & in vacuum scrobem scoriam ferri contusam, vel sitientem arenam infundere: ibi, postquam aruerit, rursus depacta, reuirescit, ac pristinum nitorem decoremque recipit. rami quoque decidui seu defracti, si clauo ad truncum affigantur, velut insiti coalescunt. Plurima vero varijs locis exsurgit cedrus, tantæ proceritatis, & crassitudinis, vt inde, fabri, basilicarum columnas, & cuiuslibet quamuis capacis onerariæ malos efficiant. Ex animantium genere, oues, porcum, gallinam, anserem, fædasque alias domi haud quaquam alunt Iaponij: si caro gustanda sit, ferina vescuntur. Campos, boum & equorum militarium armenta: saltus atque dumeta, lupi, cuniculi, apri, cerui pererrant. è volatilibus, phasiani, anates amnicæ, palumbes, turtures, coturnices, ac syluestres gallinæ cernuntur. Pisce cum alio abundant incolæ, tum vero fluuiali trutta, seu silare, & marina tanquam alofa; huic honos plurimus. Butyrum nesciunt: oliuo carent: factitio utuntur, è cetis ad littus eiectis: pineas tædas ac faces, alicubi etiam paleas ad lumen adhibet vulgus. Procera statura, si cui contigerit, & decoro corporum habitu gloriantur. lenta plebisque uiuacitas; firmæ uires: in sexagesimum usque annum militaris ætas extenditur. Barbam alunt modicam: in capillo uariis est mos: uolsella depilant, pueri sinciput, plebei ac rustici dimidium caput, uiri nobiles totum ferme, paucis ad occipitium relictis capillis, quos attrigisse quempiam, contumeliæ loco uel maximæ ducitur. Mortalitatis incommoda, famem, sitim, æstum, algorem, uigilias, laboresque admirabili patientia tolerant. in lucem editi, uel hyeme summa, protinus lauandi ad flumina deferuntur. ab ubere auulsi, uenatu exercentur, & procul à matre ac nutrice locis habentur asperis, quod ita sentiant, nulla re magis infringi animos, quam molli ac blanda educatione. Storeis, culcitæ in modum tumentibus, nitidisque, pauimenta consternunt. in ijs & somnum,



## *Historiarum Indicarum*

num, subiecto ceruicibus lapide vel tigillo, & cibum capiunt genibus nixi, cruribus insidentes. Munditiarum apud eos haud minor quam apud Sinas cura. Paxillulis item ipsi duobus inter edendum ita scienter vtuntur, vti neque excidat quicquam, nec digitorum tersu opus sit. cœnationem intrant excalceati, ne catastromata calcando coinquent. tenuiores, ad mare præsertim, victitant herbis, oryza, pisce: diuites, ad consuetudinem Sinarum, ornant splendide atque apparate conuiuium. in singula fercula, sine linteis aut mappis mutatur sua cuique conuiue mensa è cedro pinuve, palmi fere altitudine, binum dodrantium quadro, nitidissima, lectissimisque distincta coloribus. cibi confecti, in pyramidem extruuntur, auro conspersi, cupressinis ramulis ad gratiam prominentibus. nonnunquam etiam, rostro pedibusque inauratis aues integræ nobilibus patinis inferuntur. Hospitem & conuiuiam hilare ac libenter accipiunt. conuiuandi ac propinandi multas habent leges cum ritibus exquisitis: hæc cuncti diligenter obseruant. Vsum vitis ignorant. oryza expriment vinum: sed ipsi quoque ante omnia delectantur haustibus aquæ pæne feruentis, insperso quem supradiximus puluere Chia. circa eam potionem diligentissimi sunt. ac principes interdum viri suis ipsi manibus eidem temperandæ, ac miscendæ, amicorum honoris causa dant operam: certasque habent ædium partes, huic ministerio dicatas: in iis focus assidue stat, cortina è ferro liquato superimposita. inde, venientibus & abeuntibus amicis pocula porrigunt: hospitibus vero, in digressu, contemplandam etiam offerunt gazam quæ apud eos maximi fit. ea ferme sunt illius quam dixi potionis instrumenta, focus & olla cum tripode, infundibulum, figlini calices, cochlearia, & vascula tum herbæ ipsi, tum pulueri qui ex ea conficitur, adseruando. Hæc, vtique certi generis, quod non nisi peritus eiusmodi rerum inspector intelligat, haud inferiore apud Iaponios habentur loco (quandoquidem hæc opinione gentium constant) quam apud Europæos anuli gemmati, & baccata monilia. Mira etiam dignitas, omni ornatu remoto, nudis gladiatorum laminis certorum opificum. prorsus, vti nonnullæ aureorum quinque circiter millibus æstimentur. Magnus insuper honos papyri plagulis quibusdam



quibusdam læuoris eximij, in quibus, atro monochromate singulæ tantum aues, arbore sue, nobilium artificum penicillo pictæ retinent oculos. Hæc igitur, vt dixi, Iaponij, dynastæ præsertim, & auide sibi comparant, & alijs ambitiose proponunt. Ligneis plerique ob crebros terræmotus, quidam tamen ab imo lapideis vtuntur ædibus, elegantia atque arte visendis. magnifica item exstruunt templa, & sacerdotum vtriusque sexus ampla & sumptuosa cœnobîa: quamquam ingentem eorum numerum, hæc scribentibus nobis, præpollens tyrannus Nubunanga, non tam Christianæ rei studio, quam execrabili quodam omnium religionum ac superstitionum odio, nuper euertisse nuntiabatur. Sermo Iaponiorum, vnus & communis est omnium; sed ita varius idem & multiplex, vti plures haud immerito videantur esse. quippe vniuscuiusque notionis ac rei, multa vocabula sunt, quorum alia contemptus, alia honoris causa; alia apud principes, alia apud plebem; alia denique viri, alia fœminæ vsurpant. ad hæc, aliter loquuntur ac scribunt; & in ipsa scriptione, aliter epistolas, aliter volumina librosque conficiunt: habent autem plurimos, tum soluta oratione, tum elegantissimo versu conscriptos. porro notis vtuntur eiusmodi; quarum singulæ, singulas, vel etiam plures dictiones, Aegypto ac Sinensi more, contineant. ad summam, à nostris haud imperitis rerum æstimatoribus, Iaponica lingua, Latine, ve genere ipso, vel vbertate præfertur. Itaque ad perdiscendum & magni laboris, & longi temporis indiget. Armis vero ap, prime dedita gens est. ea sunt, præter ferream fistulam, arcumque & saggitas, gladius incuruus, & pugio (queis abduodecim ætatis anno se se præcingunt) tam egregia chalybis temperatura, vt ferrum nostrum acie propemodum illæsa diffindat. accedit pilum auro argenteue bracteatum, falce præfixum: nanguinatam appellant. hastis item egregie vtuntur, quæ nostras & leuitate, & longitudine superant. Amictus ab infantia ad iuuentutem sumunt varios, idque cum cæremoniis, & solemni apparatu. Cæterum, qui adulti iam sunt, talarem gestant versicolore tunicam. hanc domi demittunt; prodituri autem, in caligas infundunt, ad imum æqualiter laxas; easque circa renes leui subligant nodo.



## *Historiarum Indicarum*

nodo. Tunicae amiculum superinduunt breviorē (quimonem vocant) manicis non ultra cubitos eminentibus. haec vestes per æstatem gerunt simplices, ac subtilissimo textu: per hyemem scilicet densiores ac duplices, inserto item serico tomento; easque, ne incommode tumeant, perquam artificiose perpungunt. Calceis crepidisve sine obstragulo, sandaliorum instar, utuntur, corneo ad extremum extante hemicyclo, quem firmitatis causa, primum inter & secundum inferunt digitos. Flabella gerunt, tum ad velandam faciem, tum ad auram colligendam, auro sericoque intertexta. sub umbella ferme procures, alioquin aperto capite, in sole pariter ac pluvia vterque sexus incedit. e coloribus festum habent nigrum atque puniceum: albus in luctu est. Ac plurimis quoque aliis in rebus, credi vix potest, quantopere à nostro, victus eorum & cultus abhorreat. In olfactu, suffitus nostros minime ferunt; alia ipsi quædam odoramenta succendunt. In gustu, nostras illi epulas, nos vicissim illorum condimenta aspernamur. Aquam nos gelidam, illi calefactam æstate pariter & hyeme potant. In auditu, symphoniam eorum, nostræ aures omnino refugiunt. Nobis, dentium, in candore; illis, quod mirere, in ipsa nigritie decor est. itaque atro quodam eos pigmento identidem inficiunt. foeminas in publico viri & cognati praecedunt, famuli subsequuntur. equum nos ab læva, illi ab dextra conscendunt. Inter salutandum, nos caput; illi, perleui crepidarum vel sandaliorum excussu, pedes aperiunt. advenienti amico nos adsurgimus, illi subsidunt. nobis gemmarum, illis ferrea vel fictilia vasa in honore sunt. Iam, in curationibus, nos dulcia & bene cocta, illi salsa, & acria, & cruda ægrotis apponunt: nos, pullos & altilia; illi pisces atque conchylia. pharmacis nos ferme olidis & amaris: illi perquam suavis & odoratis utuntur. nos crebro sanguinem, illi nunquam eliciunt. Atque aliis item in generibus ita multa observant eiusmodi; ut si minus plantis (neque enim id probe dum exploratum est) moribus certe orbi nostro plane oppositi videantur esse. Neque vero, cur ita faciant, probabilem plerunque rationem afferre non possunt. ut illa: fidere quam attolli, maioris venerationis indicium: cuiuslibet



cuiuslibet usus vasa, quam nullius commodi lapillos, quantavis mercede, sapientius emi: frigida comprimi fibras, irritari tussim, & pectoris vitia, restingui nativos ignes: feruida foueri calorem insitum; laxari meatus, eoque facilius leuari sitim; ægro, quas appetat natura poriones, non quas horreat, propinari: sanguini, quippe vehiculo vitæ, parcere oportere defendunt. & alioqui, non minus illis Europæi, quàm Europæis illi ridiculi sunt. ac, si quando per munditiarum aut elegantia contentionem, vt fit, cauillis agatur; par pari nobis egregie referunt. Sed cum in eiusmodi rebus tam vehementer à nostra consuetudine discrepent; iidem tamen in constituendis hominum classibus ordinibusve, haud absummum nostrum discrimen ac rationem sequuntur. ordines ij, quinque præcipui. Primus, eorum qui cum imperio sunt, rerumque potiuntur: hosce communi cunctos nomine Tonos appellant, quamquam inter ipsos Tonos alij dein exstant dignitatis gradus, vt apud nos Regum, Ducum, Marchionum, & Comitum. ij omnes, non tam auro pecuniaue: quam ceteris opibus, & clientelis abundant. quippe ad regnum cuncti, militibus amicisque agros (iure fundi sibi retento, ac nullo imposito vectigali) diuidunt ea lege fruendos, vt & in pace, descriptis ordine ministerijs appareant Regi; & in bello, suis ipsi cibarijs ac reliquo sumptu militiam obeant. sic fit, vti dynastæ, quamquam in magna numorum inopia, tamen & multitudinem bellatorum, & aula frequentia ceteroque apparatu, vim imperij, ac speciem regia maiestatis obtineant. Illud vero præclarum, quod animo excelso, non morte demum aut vltima necessitate cogente excedunt gubernaculo, sed vbi vrgere capit senium, certis ad victum cultumve sibi prædijs reſeruatis, filium aut si quem alium successorem destinant, artibus regnandi ac præceptis imbutum; plerunque ipsimet in solio collocant; ac iuuenilem eius ætatem exinde prudentia, rerum usu, consilijs iuuant. quod ipsum apud nos ab Carolo Quinto Cæsare, quo latius ac felicius imperabat, eo maiore moderationis ac sapientia laude factum animaduertimus. Altera Iaponiorum classis, eorum est qui nefaria gentis illius procurant sacra, capite ac mento prorsus abraſo, inter quotidiana & occulta flagitia & stupra, cœlibem nihilominus ac sobriam



## *Historiarum Indicarum*

sobriam profesſi vitam, atque ad mortales decipiendos, conciliandæ pecuniæ cauſa, in omne argumentum ſanctimonix grauitatisque compoſiti. iidem nobilium ac diuitum exſequias ducunt; & alternantibus in odæo choris, carmina ſuo more decantant, & dicendi copia & facultate præſtantes, concionibus populum arbitrato ſuo circumagunt. Variæ ac multæ numerantur eorum ſectæ: nec deſunt qui ad quandam Rhodiorum equitum ſpeciem (Chriſtianos quippe ritus hac etiam ex parte malus effingit dæmon) bellicas vna cum religione res tractent: ſed communi omnes appellatione Bonziji vocitantur, honeſto loco nati plerique: nam proceres, multitudine liberorum, & anguſtia rei familiaris vrgente, ex ijs aliquos ad Bonziorum inſtituta ac familias aggregant. Multa inſuper varijs habent locis gymnafia, quas Academias dicimus, copioſis inſtructa veſtigalibus; atque ob eas res præcipuum, ante hanc hominum ætatem, toto Iapone obtinebant honoris ac dignitatis locum; ſed poſt illatas in ea loca faces Euangelij, fraudesque vulgo nudari & coargui ceptas, multum videlicet vniuerſo generi de auctoritate atque exiſtimatione decęſit. Tertius ordo, ciuium ac reliquæ nobilitatis eſt; è quibus, in cultu Regum plurimi, ac ſimul in militaris gloriæ ſtudio conſeſcunt; nec pauci, artibus ijs quas ipſi liberales exiſtillant, atque inter cætera pangendis carminibus delectantur. Sequuntur inſtitores, ac ſellularij, & variarum opifices rerum, egregia ferme ſolertia. Multas armorum habent fabricas; atque ipſi etiam typis ad impreſſionem vtuntur. Poſtremus eſt agricolarum locus, & eorum qui propter inopiam, in ditiorum famulatu ac miniſterio victitant, quorum longe maior quam apud nos multitudo cenſetur. In vniuerſum, acuta, ſagax, ac bene à natura informata gens eſt: iudicio, docilitate, memoria, non Eois modo, ſed etiam Hesperijs nationibus antecellit: quæ res in ruſticis ac pueris liquido cernitur. illi, urbanos pene mores, uegetum ingenium, ac minime agreſtem indolē præſeferunt. hi, celerius multo quam Europæi noſtri, latinas, & litteras, & artes arripiunt. Paupertas dedecori aut probro eſt nulli: uix etiam in multis agnoſcitur, adeo accurate familiarem diſpenſant rem, & pro ſua tenuitate concinni ac nitentes



tentes incendunt. Maledicta, furta, impiam temere iurandi consuetudinem, aleæ genus omne auersantur. Famæ gloriæque auidissimi, dignitatis vero supra quam credi possit retinentes æque summi atque infimi sunt. nullam non modo contumelia speciem, sed ne dictum quidem paulo asperius ferunt. ergo reuerentur inter se, præcipue nobiles, certantque officijs & honore verborum. quin, ipsi rerum vilissimarum artifices, quique se in diem locant, comiter appellandi, si eorum uti velis industria. nam alioquin irritantur, ac spreto luccello, captum opus abijciunt. Constantiam ac decorum ita custodiunt vulgo, ut vel ab imminente ruina, sensim ac sine trepidatione vlla recedant. cauentque diligenter, ne quid abiectum, aut timidum, vel in dictis vel in factis appareat. atque ob id ipsum, animi perturbationes, agitudines, impetus, in speciem cohibere, atque iræ præsertim notas omnes obruere, vel potius in contrarium flectere didicerunt. tum enim & gradus lentior, & frons hilior est. intemperantiam vero linguæ, maximo animo minime dignam putant. ac proinde, vociferationes ac iurgia, neque inter populares in publico, neque domi inter maritum uxoremque, parentes ac liberos, herum ac famulos audiuntur. Sedate grauitèque quod agendum est, agitur. siquid odiosius accidit, internuntij commentant: quin etiam, inter ipsas noxiorum pœnas, conuitia remouentur, & uerborum acerbitas. prouocationes autem ac rixæ, contra quam apud nos, admodum raræ. ferociam illi minasque in tempora belli reseruant. Iam vero (quæ haud postrema amicitiae lex est) mutuis in congressibus, domestica incommoda, necessitates, ærumnas, amicis haud temere impertiunt: tristitiam & curas egregie condunt: neque alienam pacem & iuunditatem, ineptis querimonijs, & supervacaneo mœrore sollicitant: ab alijs interrogati, rem totam uel renidentes eleuant, uel certe modica significatione perstringunt. denique asperis atque aduersis in rebus, plane incredibilem animi æquitatem ostendunt, ac uelut in gradu perstant, & quicquid euenit, sine gemitu excipiunt: credo, ipsa uarietate casuum edocti, & inconstantia rerum humanarum, quæ in ijs regionibus uel maxime uiget. infimæ sortis homines ad regis celsitudinem cuchi repente, alios è summo fastigio ad ima

D d      præcipitari,



## *Historiarum Indicarum*

præcipitari, pene quotidianum est. hac illi vicissitudine scilicet eruditi, latissima quæque sic optant, ut interim difficillima cogitent. Firmus autem est animus ad quæ diu meditatæ ac præparatus accedit. Neq; prouectæ solum ætatis eæ laudes: in puerorum consuetudine, atque adeo in ipsis lusibus & remissione animorum, senilis prope maturitas, & moderatio quædam elucet. Hæc ferme Iaponiorum bona: quæ tamen eadem, ingenti malorum cumulo compensari nil ambigas. Ac primum, in Dei cultu, quod potissimum iustitiæ munus est; & in finibus bonorum ac malorum, vna cum cæteris quæ Christum ignorant gentibus, miserandum in modum errant. Magistris religionum ac sapientiæ vtuntur ijs quos dixi Bonzijs. hi, vario alioquin dogmate mendacijsque, omnes tamen (quod facili negotio deprehendas) in tollenda pariter Dei providentia, & animorum immortalitate consentiunt. Inter docendum interest, quod impietatem hanc pauci palam & promiscue cunctis hominibus; alij non nisi nobilibus ac dynastis ex arcano tradunt: vulgus ac multitudinem, tartari metu in officio continendam affirmant. Duobus hisce generibus interiecti scelere & amentia sunt, qui veteres quosdam impostores, Amidam, & Xacam suppliciter adorandos inculcât plebi, verbisq; conceptis deprecandos identidem, neque id per hæsitacionem angoremve, sed animo plane securo; certa que, si tantum hi rite innocentur, salutis æternæ fiducia; quippe quorum vtriusque, dum in terris agerent, tanta durities & asperitas vitæ fuerit ad generis humani luenda peccata, uti vltra sollicitum esse de superum pace veniaque, aut hoc nomine corpus diuexare quenquam, vel quoquomodo pœnas delictorum ab semet exigere, non modo stultum & superuacaneum, sed in ipsos beatæ vitæ parentes contumeliosum ac nefarium sit. hoc Bonzij multi & priuatim & publice suadere non desinunt, nequitia Lutherianæ persimili: ut vnum vtriusque auctorem facile agnoscas. Porro, quos dixi, Amidam, & Xacam, & si qua sunt alia primæ notæ numina, à quibus futuræ vitæ bona expetantur, patrio cognomine Fotoques vocant. alios dein habent veluti minorum gentium Deos, bonæ valetudinis, liberorum, pecuniæ, & eorum quæ ad corpus attinent, largitores: hosce Camis appellant, Reges olim ipsos, Regumve filios. aut inuento



inuento quopiam, insignive alio facinore, falsæ diuinitatis gloriam consequutos. horum de vita rebusque gestis, vti de Ioue, Saturno, Libero, cæterisque inanibus Dijs Græci poetæ, absurda quædam, & ridenda, & turpia fabulantur. Inde Iaponij paulatim extinctis quæ Deus indiderat, veritatis igniculis conscientiæ magisterium exuunt, effractisque pudicitiae claustris, in choreas, ludos, computationes, ac venerem intemperanter effusi, cæci cum cæcis ducibus viatores ad sem piternum interitum præcipiti celeritate festinant. iidem, per causam retinendæ grauitatis atque constantiæ, dum animorum sensa motusque à primis annis obtegere ac celare adsuescunt, facili deflexu, à prudentia ad astutiam, calliditatem, perfidiamque degenerant. inde prauum simulandi studium, & fallendi certamen. vti quemque pessime oderunt, ita familiarissimis oculis intuentur: bona fides, & aperta simplicitas, & candor illuditur. Accedit sæuitia morum, & immanitas dicta. leuissimis de causis, & quidem nec opinantes & auersos inuadunt homines, vnoque aut altero acuti ac ponderosi acinacis ictu conficiunt: dein, composito ac securo vultu, quasi facinus ad se nulla ratione pertineat, ferrum vaginæ reddunt. insuper, nacti occasionem ex tuto, gladij acumen in capite humerisve insontis cuiuspiam interdum experiri non dubitant. In bello, captis per vim oppidis, aut pagis, certum exitium; cuncta ferro flammisque vastantur: non ætati, non sexui parcitur. in prælio victi, si palantes effugiant, nullo discrimine ciues hostesne sint, spoliolum causa plerumque ab agrestibus opprimuntur. aliena, vt diximus, furto subducere dedignantur; cadibus rapinisque grassari non item. tetra latronibus, mare piratis vehementer infestum. prægnantes foemine, partum haud raro medicamentis abigunt, idque Bonzijs auctoribus ac magistris, vel etiam editos in lucem infantes, alendi tedio, inopieue, crudeliter injecto præfocant pede. egentibus egrotis, aut peregrinis publica & gratuita diuersoria nulla. sub dio pernoctant, miseramque trahentes animam, deserti ab hominibus, vel ipsa die sanantur, vel extincti morbo, abijciuntur in sterquilinum. Eo maiore cum approbatione Iaponij Christianam caritatem erga destitutos & calamitosos, itemque sepulturæ ac funerum instituta mirantur. Sontibus quolibet nomine, haud leuiora quam



## *Historiarum Indicarum*

exsilij, aut proſcriptionis, aut capitis ſupplicia conſtituta ſunt. gladio ferme trucidantur improvidi. nam alioqui ſe haud inul-  
tos cadere pariuntur. quibuſdam tamen locis comprehenſos  
larrones, certoque ad ignominiam vehiculi genere per ciuiũ  
ora tranſuectos, extra urbem cruci, ab ignaris quanta ſigno  
illi veneratio debeat, affigi mos eſt. In ſeditioſos etiã, qui  
quidem potentes ac principes viri ſunt, ex antecondito in-  
terdum animaduerti ſolet in hunc fere modum. Aedes noxij,  
Rex, vbi viſum eſt, milite armato circundat, eidemque facit  
liberum aut pugnæ aut mortis arbitrium. Si pugnam optarit,  
commiſſo protinus certamine, cum familia plane tota dele-  
tur, ac perpetua in omnem poſteritatem notatur infamia. ſin  
voluntariam elegerit necem, ultro ſibimet ventrem alta plaga  
in obliquum, nonnulli etiam animoſiores duplici in decuſſim  
incidunt. vbi effluere inteſtina capere, parato in idipſum famu-  
lo ceruices amputandas præbent; & ex amicis præcipui illatis  
pariter ſibi manibus, ſupra mortuum corruere ſibi glorioſum  
putant. Atque idem facinus, in alijs quoque periculis, præſer-  
tim vbi agitur exiſtimatio, & fama, valde uſitatum eſt, & obdu-  
ctis denſa caligine mentibus honeſtiſſimum ducitur. quin, ip-  
ſi interdum pueri vel à parentibus exacerbati vehementius, vel  
grauiore aliqua indignatione concepta, genus id leti palam ſi-  
bimet ipſi conſciſcunt. Forenſis res, nulla propemodum: non  
iuris ciuilis formulæ; non reſponſa prudentum; non vadimo-  
nia; non carcer: non iudicum teſtiumve reiectio; non citatio  
reorum, aut cauſæ dicendæ poteſtas. ius totum in armis, aut  
principum placitis: horum in proceres ducesque; ducum in ci-  
ues; ciuium in ſuam cuique familiam formidabile vitæ pariter  
ac necis arbitrium: neque ab inferioribus acta pro poteſtate, à  
ſuperioribus in cognitionem reuocari, aut reſcindi conſueue-  
re. ipſi autem dynaſtæ Regesve, quamquam ab externo ac mer-  
cenario milite plane imparati, atque ob idipſum indigenis ve-  
hementer obnoxij; tamen barbaro quodam faſtu, vti de Sina  
retulimus, adorari coliq; ſe volunt: ſtipati armatorum caterua,  
difficiles aditus, delicatas præbent aures: adductoq; vultu, nu-  
tibus ferme vel ſcriptis agunt: ſermonem grauate conſociant:  
nil opis habent in populi caritate repositum: regit omnia me-  
tus: huic adiunctum eſt odium: inde crebræ, & occulte cōſpira-  
tiones



tiones ac seditiones erumpunt: excussoque rectore, sceptrum ad alios aliosque, in summa rerum omnium perturbatione transfertur. vetusta imperia, & principum longa serie deductas imagines, oppido pauca reperias. Sane Iaponum omne nomen vni quondam parebat Imperatori, cui titulus Vo, seu Dairi: quoad is diuturna pace in delicias atque socordiam resolutus; præfectis, & satrapis, ac præcipue Cubis (sic enim duo primarij vocabantur, quorum alter deinde extinxit alterum) contemptui cæpit esse. Viri ergo militares, talem aliquandiu perpesi, mox indignati dominum; tandem abrupte frangos, & suam inuasere quisque provinciam: ita, momento unitas illa, & maximi contextus imperij, multas in partes ac veluti fragmenta disiliit; ius tantum Dairi mansit in hunc usque diem, honorum vocabula proceribus diuidendi, quæ pro gradu varietate mutantur identidem, certisque characteribus designantur. inde haud spernendas cogit pecunias: alioqui pane precariam obtinet dignitatem. Summus vero & potentissimus Iaponiorum omnium habetur ille, quisquis Meacum, & Meaco finitima nobilissima regna (quem ractum cõmuni cognomine Tensam appellant) armis atque arcibus occupavit. Ea loca nuper obtinebat Nubunanga, quem dixi, tyrannus. huius in solium à coniuratis ante hoc biennium interempti; liberis eiusdem aut pulsis aut occisis, per factionem ac vim præcipuus è ducum numero Faxiba succcessit. Hactenus de moribus institutisque Iaponiorum, quod adhuc in tanta locorum longinquitate cognosci potuit. Cæterum aditæ primum eius terræ titulum, decusve, & alij quidem Lusitani ad se trahunt: sed ego Antonio Galuano crediderim, in eo libro quem de inuentoribus orbis noui conscripsit, aperte narranti, Antonium Motam, Franciscum Zeimotum, & Antonium Perxotum, cum ex vrbe Sionis Dodra peteret Sinas, pertinaci vento ad insulas Iaponiorum abreptos anno seculi huius quadragesimo secundo, cum Sosa (vt dicebamus) Indiã provinciam regendam accepisset. Is, eo perfunctus munere, Ioãni Castrio successori gubernacula tradidit, qui felicissima vsus nauigatione, præter militum supplementa, egregios tres viros è Societate Iesu ad Xauerij labores adiuuandos aduexerat: Hispanum vnum, Ioannem Beiram è Ponteueteri (id oppidi nomen, ora Cal-



## *Historiarum Indicarum*

saicæ ) Italos duos, Nicolaum Lancilotum Vrbinatem, & Antonium Criminalem Parmensem, qui deinde, vti explicabimus, præclaro martyrio coronatus est. Hisce comitibus Goā delatus Prætor, forensi primum composita re, nouisque magistratibus & scribis cum cura suffectis, in reficiendam exinde augendamque classem, & reuocandam omni studio militarem disciplinam incubuit. Circa idem tempus, Moluci Rex Aerius, Goam victus defertur. Solio deturbatum nulla ipsius culpa; ferroque & criminibus oneratum Iordanus Ternatensis Præfectus cum armatis custodibus ad Prætorem Indiæ miserat. Aduentientem, Castrius, detractis catenis, regio apparatu excepit; & in separato hospitio liberaliter habitum, causa probe cognita, de consilij sententia clementer absoluit: ornatum inde laudibus & honesto comitatu, in regnum haud sine tacita Iordani suggillatione restituit. Hoc item Prætore feliciter administrata Christiana res est. Michael Vassus, de quo supra commemorauimus, eximia virtute sacerdos, deq; Ecclesia Christi optime meritus, consilij cum Francisco Xauerio communicatis, sub aduentum Castrij nauigauit in Lusitaniam; Indicæ rei vitia demonstrauit Regi; vt ea tollerentur, omni ope curauit; ab eodem Rege, anno sequenti litteras ad Castrium Prætorem eiusmodi retulit: Ioannes Rex, Ioanni Castrio Indiæ Prætori, amico S. Quod non ignoras, idololatria tam grane piaculum est, vt ea in meis regnis vlllo pacto ferenda non sit. delatum est autem ad nos, in Goanis finibus, tum publice, tum priuatim coli sacella idolorum. præterea ludos, ritusque ethnicos celebrari palam. Ac proinde, tibi etiam atque etiam mando ac plane iubeo, idola omnia per idoneos administratos inuestigata, & vndique sublata comminuas, comburasque, & cum grauib; edicis minis, ne cui prorsus vllum eiusmodi simulacrum aut signum ex ære, ligno, argilla, gypso, aliove metallo, materia, massa, fundere, ducere, sculpere, fingere, exprimere, figurare: aut aliunde importatum habere, seu sacra ludosve ethnico more facere, aut Brachmanas concionatores magistrosve, teterrimos Christi aduersarios, vlla ope iuuare, vel recto recipere liceat. Qui secus faxit, pœnis in edicto propositis nulla remissione mulctator. Et quia gentes ad legitimum vnus Dei cultum, non modo spe

futura



futurae beatitudinis, sed etiam praesentibus interdum praemijs  
„ inuitanda sunt; curabis enixe, vti redempturae vectigalium,  
„ curationes publicae, & alia munera questuosa, in homines eth-  
„ nicos ad hunc diem conferri solita, in ipsos Christi neophy-  
„ tos primo quoque tempore transferantur. Ad classes meas  
„ deducendas audio promiscuum cogi vulgus Indorum. Placet  
„ excipi Christianos. quod si necessitas, eorum quoque operas  
„ interdum exegerit; videbis omnino posthac, vti quotidiana  
„ illis merces ac iusta solvatur. Atque hoc toto de genere,  
„ Michaelis Vasaï sententiam exquires: quem nos virum &  
„ publicae rei bene peritum, & Christianae religionis apprime  
„ studiosum animaduertimus. Ad hæc, certis auctoribus ma-  
„ gno mihi meo dolore compertum est; ab Lusitanis hominibus  
„ vili pretio coempta mancipia, quæ apud Christianos dominos  
„ perfacili negotio ad baptismum adduci possint; Mahometan-  
„ nis ac barbaris mercatoribus, ad non dubium animorum inte-  
„ ritum, vberioris quaestus causa venundari. Id piaculum ne ad-  
„ mittatur in posterum, neu seruitia vlli nisi Christiano empto-  
„ ri aut licitatori addicantur, item graui cauebis edicto. Fœne-  
„ ratorum licentiam, quam certo capite Goanarum legum ali-  
„ didicimus, fac imperio atque auctoritate coerceas: idque ca-  
„ put è legum serie quamprimum expungas. In oppido Bazai-  
„ no templum Diuo Iosepho exstruitur, idoneumque stipen-  
„ dium alendo Vicario, & beneficiariis aliquot, de meo adsigna-  
„ tor. Annua porro tria pardaum millia, in impuras Mahomet-  
„ tis ædes, & nefarium cultum, ab eius sectatoribus impendi  
„ antehac solita; euangelij præconibus, & conuersionis adiuto-  
„ ribus in posterum numerantur. In agro Cialensi, neophytis à  
„ Michaele Vasaï institutis, & si qui præterea ad Christum acces-  
„ serint; è meis vectigalibus trecenti quotannis oryzae modij  
„ ab antistite diuiduntur. Pondera, pretia, pactiones, olim cum  
„ Thomæis Christianis initas, qui in Cocinensi ditione diuen-  
„ dunt piper, à nostris mercatoribus labefactari violarique co-  
„ gnouimus: nec non subtrahi corollaria, quæ ad pretium ad-  
„ di ex pacto conuento consueuerant: idque magno cum eorum  
„ damno pariter & offensione, quibus multas ob causas præ-  
„ cipue consultum oportuerat. Ac proinde curabis quam dili-  
„ gentissime, vt in hisce commercijs, Thomæi prorsus incolu-



## *Historiarum Indicarum*

„ mes indemnesque seruentur : eosque cæteris etiam in rebus ;  
„ uti Christianos & socios æquum est , liberaliter comiterque  
„ tractabis . Ages etiam cum ipso Cocini Rege , uti ritus quos-  
„ dam ethnicos ab ipso auguribus in piperis venditione adhi-  
„ beri solitos ( quandoquidem nihil ipsius ea res interest ) è no-  
„ stro commercio tolli permittat . Ab eodem Rege aiunt Indos  
„ ex eius ditione , qui relictis idolis Christiana suscipiunt sacra ,  
„ fortunis omnibus illico spoliari . Ab eiusmodi immanitate  
„ & tu omnibus nervis amicum Regem niteris auertere : & nos  
„ ipsi quoque in eandem sententiam ad eum litteras dabimus .  
„ Socotoranam causam diligenter ipse tu mihi , coram & per lit-  
„ teras commendasti . eos ego populos , è miserrima servitute  
„ ereptos admodum cupio ; sed cum eo , ne Turca , cuius in im-  
„ perio sunt , acrius irritetur ; classesque in isthac maria mitte-  
„ re paulatim adsuescat . Hec totum , adhibito Michaeli Vaseo ,  
„ tu pro tua prudentia rerumque istarum usu , videbis cuiusmo-  
„ di sit . Piscarij littoris incolas , cum aliis iniuriis affici à meis  
„ ducibus ferunt ; tum vero cogi ad ea quæ piscantur , sibi tan-  
„ tum , iniqua conditione vendenda . Cauebis igitur etiam at-  
„ que etiam , ne populis iis liberum vendendi arbitrium adima-  
„ tur . ducesque mei in commercio eiusmodi ne quid sibi pro-  
„ prium arrogent . atque ad cæteram quoque tollendam vexa-  
„ tionem , videbis num ea littora sat custodiri , meaue vesti-  
„ galia sat commode exigi sine classibus possint . quæ res si fa-  
„ cultatem habuerit ; non est cur illuc in posterum nauigent .  
„ Præterea , cum magistro Francisco Xauero consultabis atque  
„ dispicies , utrum ad eius Ecclesiæ incrementum expediat , fas-  
„ ve sit ; piscandi potestatem patere duntaxat iis qui Christum  
„ induerint : cæteros ; quoad sapiant , eo questu & commodo  
„ prohiberi . Qui ex ethnicos ad Christum se se conuertunt , eos  
„ audio tanquam sceleratos & sacros , à parentibus , cognatis ,  
„ amicisque testis eiici , bonis eueri , ac summa protinus in so-  
„ litudine atque egestate versari . Horum tu inopiæ subleuan-  
„ dæ , communicata cum Vaseo re , annuam è meis redditibus  
„ pecuniæ summam decernes , distribuendam à sacerdote , qui  
„ eiusmodi neophytorum institutioni præfuerit . è Ceilano in-  
„ sula , regius ut fertur , adolescentulus , impias auunculi ne an-  
„ parentis ? effugiens manus , Goam baptismini gratia se contu-  
lit .



» sit. Huius in persona quando ad aliorum conuersionem haud  
» leue momentum est, dabis operam uti doctrina quidem ac  
» moribus, in Diui Pauli collegio cum alumnis ceteris imbua-  
» tur: quod vero ad victum cultumque attinet, lauto separatim  
» hospitio, impensa mea copiose ac liberaliter habeatur. Signi-  
» ficauit is ipse mihi per litteras, ad Ceilani regnum sibi ius  
» actionemque competere: videbis quidnam hoc sit: totamque  
» rem probe exploratam & cognitam ad me perscribes. Quod  
» autem tyrannus in suos populares qui Euangelio credidere,  
» tam crudeliter sauiit; seras quidem illas, veruntamen debitas  
» tanto sceleri poenas ab eo per te quamprimum exigere volo: &  
» grauem audaciae mercedem statui; quo intelligant omnes, ni-  
» hil esse mihi antiquius, quam ut omni ex parte integri inco-  
» lumesque seruentur, qui à daemonum castris ad Christiana si-  
» gna transferint. Ab ethnicis artificibus, Christi Domini, Vir-  
» ginis Matris, & sanctorum imagines pingi, atque adeo cir-  
» cumferri venales; minime decorum est nomini Christiano.  
» Tu ergo, cum proscriptionis ac virgarum minis edices, ne cui  
» profano tabulas eiusmodi pingere, aut vendere quoquomo-  
» do in posterum liceat. Parœciale Cocini templum, itemque  
» Colani, dudum inchoata, patere imbribus putrefacienda, tur-  
» pissimum est. Vtrumque tu, architectis ac fabris adhibitis,  
» quamprimum tegendū ac perficiendum curabis. Placet etiam,  
» in vico Noroa templum Diuo Thomæ Apostolo fieri; Calapo-  
» re ceptam sanctæ Crucis edem absolui; itemque in Ciorano  
» insula templum excitari. præterea, locis idoneis auditoria  
» scholas institui, ad quæ statis diebus non Christiana modo plebs  
» catechismi causa; verum etiam ethnici ad Euangelium au-  
» diendum vel inuiti conueniant. Quandoquidem in ista mea  
» ditione mihi primum omnium & maximum est obsequium  
» Dei, & Christianæ religionis amplificatio; cupio vehementer  
» è Salsetanis quoque & Bardesiis finibus quibus mihi nuper  
» Idalcan cecidit: idolorum cultum, ac profanas gentium super-  
» stitiones prorsus euelli. Id quo citra tumultum ac vim, hoc  
» præsertim initio fiat; expedit, rationibus ac disputationibus  
» quam lenissime populos edoceri, quanto in errore, ac verita-  
» tis ignorance versentur: quamque vel peruersum vel impium  
» sit, cultum, vni debitum Deo, simulacris lapidibusque ab ho-  
» mine



## *Historiarum Indicarum*

» mine tribui. Porro, ad eas pellendas tenebras, cum alios vi-  
» ros adhibebis virtute & eruditione præstantes; tum vero ipse  
» tu primarios gentis euocare, alloqui, monere non defines,  
» atque omni ratione ad Christum allicere. Qui se se dederint;  
» hosce, in fidem receptos, non tueberis modo, sed etiam pro  
» suo quemque captu fouebis ornabisque. Hæc omnia scito  
» nobis maiorem in modum esse cordi: quæ singula, te pro tua  
» industria & probitare sedulo curaturum esse confidimus. Al-  
» merini viij. Idus Martias M D XLVI. Epistolam igitur hanc,  
indicem regiae pietatis ac sapientiae, Vasaus in Indiam pertu-  
lit plenus optima spe. Cæterum salutaria principis mandata,  
itemque Prætoris edicta, non quantum par fuerat ponderis,  
habuere. obseruata & exhausta ferme facillima queq; reliqua,  
partim quod priuatis obstarent commodis, haud æquo animo  
in vulgus accepta: partim, nondum maturis ad agendum re-  
bus, in aliud tempus dilata. Eiusdem Regis decreto, ad re-  
ditus quos antea capiebat Diui Pauli Collegium, aureorum  
insuper annua bina millia Goanis è vestigalibus accessere. Xa-  
» uerius interim, Parauana Ecclesia constituta, Molucas (quam  
Domini vineam à Galuani discessu fœdum in modum squalere  
didicerat) Parauis illum apud se retinere summa ope conanti-  
bus, petere nihilominus intendit. Meliaporem ex itinere  
primum, inde Malacam: à Malaca in Amboinum, & Mauri-  
cas insulas, postremo Ternatem defertur. Omnibus locis  
bene ac feliciter gesta re, plantarijs de more institutis pro co-  
pia præsentis villicos atque custodes apposuit. Hinc ad reuisen-  
da quæ liquerat; operasque in Christi latifundia diuidendas  
(quippe recentes interim ex Europa cultores aduenerāt) haud  
sine magno Molucensium fletu Goam renaugare est coactus.  
¶ Interea Tolannus Mauricæ terræ dynasta, in Ecclesiam Dei (&  
erat ibi neophytorum ingens numerus) odium exprompserat  
nominis Christiani. multos acerbe torserat, quosdam occi-  
derat, plerosque omnibus fortunis exuerat. Ad ea facinora  
punienda profecti ab Ternate Lusitani, locum tum cætera mu-  
nitione, tū sudibus præcurtis, ac tribulis ferreis vndiq; septum  
offendunt. adeo, conscius quid meruisset Mahometanus, op-  
pidum ad hostes arcendos omni quidem arte, veruntamen  
arrito conatu firmarat. siquidem cruciantibus è vicino  
verticibus



verticibus montium, tanta repente cecidit cinerum vis, uti munitionibus coopertis obrutisque, liberum ac tutum Lusitanis ad urbem accessum daret. hinc, non solum exitu læta, sed etiam miraculo insignis parva victoria. Circa idem tempus Meliapore item insignis ad memoriam accidit res. Lusitani, suburbano in colle, ubi mactatum à barbaris Apostolum Dei Thomam fuisse docuimus, nouum eidem Apostolo sacellum exstruebant. Aperientibus fundamentum, insculpta quadrato lapidi, sanguineis & in speciem recentibus conspersa guttis apparuit Crux, lapideo item circulo inclusa; repandum in lilium desinens. insidet in summo columba: lætæ ab imo herbæ luxuriant: in eo circulo incisæ notæ cernuntur, quas propter vetustatem legi adhuc potuisse negant quidam; alij, seorsum ad legendum adhibitos diuersarum nationum Brachmanas duos præcipua eruditionis fama; haud paruo quidem labore, veruntamen congruenti ambos interpretatione respondisse ferunt, notas eas, plurium litterarum singulas obtinere vim. ijs Apostoli Sancti martyrium, quale nos è vetere traditione descripsimus, breuiter contineri: atque illud nominatim (quod ipsæ testentur guttæ) Christi famulum, inter eius Crucis adorationem & oscula cecidisse. Extractam ergo tabulam ac probe purgatam, Lusitani confestim in ara gratulabundi constituunt: intentiore cura sacellum absoluunt. Noua inde loco frequentia, nouus honos accersit. sed miraculo mox euidenti maiorem in modum aucta religio. octo ante Christi domini, tribus ante Apostoli natalem diebus, cum ab Ecclesia celebratur expectatio Virginei partus, in eam ædiculam Christiani rei diuinæ causa conuenerant. Mirum dictu: simulatque ab sacerdote cœptum Euangelium est; vniuerso inspectante populo Crux ea modicis primo stillis, largo dein sudore manauit. admota hinc tersui linteola sacra, liquido cruentas ebibere maculas. Color etiam Crucis, è candido sensim in pallidum, è pallido in atrum cessit: grato posthæc splendore cæruleus effulsit: ad extremum, sacrificio peracto, natius redijt. Scilicet, res tam noua & illustris, ineffabili quodam gaudio delibutis adstantium animis, altos gemitus, pias acclamationes, vim lacrymarum exciuit: neque vero proprium illius duntaxat diei cœtusve, id spectaculum fuit. ex eo tempore, singulis ferme

OT III  
annis



## *Historiarum Indicarum*

annis, eadem festa luce, eodem non modo sacrificij, sed etiam Evangelij momento recurrit. si quando intermissum est, ipso doctus euentu dirum aliquid portendi populus putat. Ac, ne quis apud nos in tali tantaque re dubitandi foret locus; totam dein & facti seriem, publicis consignatam litteris, & operis effigiem è lapide ipso diligenter expressam, Cocinensis Episcopus in Europam sub initia Concilij Tridentini transmisit. Cæterum thesaurus ipse, repertus Castrio demum obtinente provinciam; & Evangelio adstruxit fidem, & opportune Prætori ad omne periculum ac dimicationem pro Christi nomine subeundam, animos addidit.

*Libri Duodecimi finis.*







# HISTORIARVM

INDICARVM.

LIBER TERTIVSDECIMVS.



**T**RANQVILLA tum Lusitano res  
erat Indica, finitimis tyrannis dyna-  
stisq̃ue partim vi ac metu subactis;  
partim etiam æquo fœdere in amici-  
tiam ac societatem adscitis; cum re-  
pente periculosum & graue bellum,  
vnde minime putabatur exortum est.  
Eius belli concitator ac princeps fuit  
Sofar, qui post fœdum ab vrbe Dio  
Solimani discessum, pacemq̃ue red-  
ditam Lusitanis, nunquam animum re-

miserat à colligendis per otium viribus, quibus, vbi maturum  
esset, ad eorum perniciem vteretur. Sex amplius annorum spa-  
tium liberum in omnes apparatus habuerat. quo tempore ita  
fese in Mamudij adulta iam ætate Regis gratiam insinuarat, vt  
omnium arcanorum non particeps esset modo, sed pæne mode-  
rator & arbiter. ac simul animum adolescentis, & suo ipsum do-  
lore,



## *Historiarum Indicarum*

lore, & muliebribus iam sat incensum facibus, ad vlciscendos auunculi Badurii manes, delendumque ex India Lusitanum omne nomen, miris artibus incitarat. In eam rem, præter veteres copias, novos quotidie varijs è nationibus milites, ducesque belli peritos, ingentibus præmijs euocabat Rex. iis in disciplinam tyrones & collectitii tradebantur: fabrum, artificum, ac munitorum multitudo quam maxima cogeatur. ac præter cæteros, architecti etiam & machinatores egregii quinque à Byzantio vrbe conducti, menstruo in singulos trecentorum aureorum pacto stipendio. armorum ac tormentorum omnis generis officinæ locis idoneis peramplæ institutæ. sollicitati occultis legationibus Indi Reges ac Principes ad puniendas iniurias, & recuperandam maris possessionem, quam latrones pauculi, specie mercaturæ subreptam, aliena magis ignauia, quam sua virtute obtinerent. Sibi esse certum ac fixum, primo quoque tempore Diensem arcem inuadere. si vna cuncti consurgant, libertatemque ac dignitatem, qua nihil prius debeat esse, tandem aliquando respiciant; tam exiguum profecto manum, tot sparsam præfidiis, ab ope domestica toto præne terrarum orbe disclusam, mutui demum inter ipsos auxilij communione sublata, nullo negotio prorsus obrui & extinguere posse. Cum eiusmodi fere mandatis dimissi quoquo uersum legati. Et omnia hæc interim clandestinis agitata consilijs, alto silentio tegebantur. Vniuersæ comparationi, tantisque delectibus, probabili sane commento prætendebatur imminens in singulos dies à Patanio Rege bellum, quicum propter vicinitatem, quotidiane discordiarum causæ non deerant. Sofar, simulandi æque ac dissimulandi magister, tum vel maxime cum Lusitanis, honore verborum, officiis, humanitate certare. Neque vero callidi veteratoris fucum astutiamque inscite Mamudius imitari: quippe, tum suoapte ingenio tectus ac perfidus; tum domesticis disciplinis ad omnes dolos atque fallacias eruditus: adeoque se per id ipsum tempus in Lusitanos bene animatum ostendere; ut noxios etiam perfugasque, si qui ex eorum ditione in suos transissent fines, magna cum beneuolentiæ significatione iisdem ad supplicium redderet. Porro, artificium hoc dupliciter proderat Cambaianis: quod cum suas ipsi cogitationes vario obtentu celaret, tum Lusitanos (et  
est



est omnis incauta securitas (ad cuncta quę nosse cuperent de viribus ipsorum opibusque, de numero militum ac nauium, deque omni statu prouincię palam & sine ambagibus promenda perlicerent. Erant autem, siue superiorum temporum vitio, siue inani fiducia diuturnę pacis, tum eiusmodi res, quę vel quietum hostem & otij cupidum, pæne explorata victorię spe irritare facile possent. Disciplinę bellicę studium, ad mercimonia quęstusque conuersum. regius fiscus, vario sumptu & fraude multorum exhaustus. classis in naualibus, interna vermium labe ac situ corrupta. nautę remigesque, neglectis custodiis infrequentes. milites, è statiuis atque præsiidiis, causati sibi stipendia non pernumerari, plerique diffugerant, atque arma flagitiose vendiderant. in ipsa Diensi arce, quę maxime omnium erat, propter loci naturam, subitis ac variis belli casibus opportuna, è defensoribus nongentis, quos ibi Garzias pace constituta reliquerat, ad ducentos circiter & quinquaginta redierat summa. atque hos ipsos, Ioannes Mascarenias præfectus, priuata magis munificentia & comitate, quam auctoritate imperij, vel sacramenti religione retinebat. ibidem adseruabatur pulueris tormentarij, si acrior instaret necessitas, quod vix vnum in mensem esset satis. ac, ne frumenti quidem, vel oryzę, & reliqui commeatus, ex anteconnecto atque seposito copia suppetebat. Hęc, Sofar, in primis, & alia id genus, ab Lusitanis, qui in Cambaia negotiabantur, separatim ac sæpius, pro familiari consuetudine percunctando, probe cognorat. Inde Regum exterorum, præsertim qui mare accolunt, pertentari animos denuo placuit. missi rursus legati. iis auditis, Reges alij pecunia & milite iuuere Mamudium: alij, quominus eandem coirent societatem, intestino ac propius vrente bello dissentienti sunt. apud quosdam etiam, rei euentum expectantes, composita nuper cum Lusitano pax & amicitia valuit. At Cābaianus, posteaquam sat sibi copiarum viriumque paratum ad omnes conatus animaduertit; gerendi belli hanc maxime rationem instituit. Sofarem, ingentibus inflatum promissis, summę rerum ampla cum potestate præfecit. Rumecani Sofaris filio, rei tormentarię procurationem attribuit. hyems ad obsidionem arcis delecta, cuius initium, vti supra demonstrauimus



## *Historiarum Indicarum*

Strauimus, in ijs locis est à Kalen. Aprilis: vt ipsum anni tempus, præclusa nauigatione, Lusitanos maritimis, quæ vna supererant, auxilijs prohiberet. Rebus ita constitutis, ad earum suspicionem quoad fieri posset auertendam, rumorem insuper è composito dissipant; urbem Dium Sofari pro amicitia donatam ab Rege; in eamque possessionem breui Sofarem esse venturum: nec sine magno comitatu; reuocandæ veteris frequentia causa. quæ res eo propius ad veri similitudinem esset isbat, quod & plenus certaminum & controuersiarum esset isdominatus, vt non multum ex ea largitione Rex damni facere videretur; & huic eidem Sofari oppida nobilia duo, Surratum & Reinelum paulo ante concesserat. ea fama vulgata, Sofar, Surrato, vbi tum agebat, litteras ad Mascareniam dat: in quibus erat scriptum: Ad cætera loca, quæ Mamudij Regis benignitate obtineret, nouissime Dium urbem accessisse. id munus eo sibi accidisse iucundius, quo maiorem inde facultatem sit habiturus, optata Mascarenia tanti viri consuetudine perfrendi. simul sibi esse in animo, urbem superioribus belli claudibus magna ex parte dirutam & euersam instaurare, & in pristinam, si fieri possit, celebritatem reducere; tumultus ac rapinas arcere; aduenis ac mercatoribus, quo libentius affluant, pacem, annonam, fidem omni ratione præstare: neque id suatantum, sed etiam ipsius Regis Lusitania causa. hæc quoniam in tanta hominum perfidia, tamque seditiosis incolarum ingenijs fieri sine magno apparatu copiisque non possint; petere se & orare, si armatus, & cinctus amicorum frequentia, Dium aduenerit; nequid idcirco aduersus Lusitanam rem aut amplitudinem ab se, vel à Mamudio cogitatum interpretetur. id adeo reapse daturum operam, vti equi pariter & iniqui omnes intelligant. Si fallat; diras omnes in se, caputque suum, fortunas, ac liberos, imprecatur. Hæc per summam impudentiam à Sofare in præsens tempus de more conficta. Mascarenias haud ita pridem in eius arcis præfectura successerat Emmanueli Sofia (alteri ab eo qui a Badurianis est cæsus) cognomento Sepuluedæ. atque is initio præfecturæ, cum in Cambaia finibus multa misceri ac parari contra Patanium Regem audisset; haud sane commotus est. quippe nec sine causa, Mamudio, rebus iam à Mogore accisis, amuli atque opulenti Regis insidias  
omni



omni conatu precauendas putabat, & quo minus temere Lusitanum, constituta iam pace, Cambæi lacefferent, vel sibi obnoxium ducerent; sat magna ipsorum mercede recentibus euentis edoctos arbitrabatur. Hæc ferme principio Mascareniam solitudine liberabant. Ast ubi, tempore procedente, Patanius nihil mouebat; ac nihilominus Cambaia erat in armis; & militari concursatione, machinarum opificio, carrisque ac iumentis omnia perstrepebant; enimvero tum suspicari Mascarenias cæpit, subesse fraudem, atque ad Lusitanæ arcis excidium ea cuncta spectare. suspicionem auxere commeatus atque tormenta, in pagos Dio propinquos paulatim subuehi cæpta. Postremo dubitationem eximere omnem, Sofaris ipsius litteræ, tanta præsertim adulatione blanditiisque conspersæ; necnon magna calorum lixarumque turba cum plaustris & impedinentis in urbem ingressa; itemque sub signis cohortes armatorum aliquot sublequuntæ. Annus tum numerabatur seculi huiusce quadragesimus sextus: & exacto iam autumno Martius mensis erat in exitu. Mascarenias, quamquam atroci ac subita percussus re, tamen ex templo colligit animum; seq; in omnes firmandæ arcis, & seruandi præsidij partes intendit. Prima fuit propitiandi præpotentis Dei cura. cælestem opem & supplex implorauit ipse; & aliorum precibus iussit exposci. Tum per expedita nauigia Castrium Indiæ prætorem, itemque Bazaini & Ciauli præfectos Hieronymum Menesium, & Antonium Sofam; de hostium apparatu & conatibus edocer: ni suppetiæ quamprimum ferantur, vltimum haud dubie sibi suisque imminere discrimen. In eadem loca mox nauibus institorum amandat imbellē turbam, exceptis aliquot vsus quotidiani mancipiis, & paucis insuper matronis, quæ sexus oblite, ne deferrent viros, societatem periculi, & diuturnæ obsidionis incommoda minime recusabant. Lusitanos præterea negotiatores, quibus erat arctior cū Diensibus amicitia, hortatur tum publicæ salutis, tum priuati compendij causa, vti coemptam frumenti & oryzæ vim, carnes pilcesq; sale duratos, & alia id genus alimenta militibus deinde vendenda, celeriter in arcis apothecas importent. id, vti potuit in tanta temporis angustia, & Diensium iniquitate, sedulo factum. Simul, tecta & tabernæ in vestibulo arcis euersæ. ti-



## *Historiarum Indicarum*

gna, tabulæ, ferramenta, mali nauium introlati. Inter hæc, Mascarenias pari dissimulatione, & iisdem quibus peti se videt artibus, ad Sofaris epistolam ita rescribit: Quod Sofar, præter cætera in eum à Mamudio collata ornamenta, honoresque nuper etiam Dienfi toparchia decoratus auctusque sit; neque mirari se, qui præclara eius in Regem regnumque Cambaiæ merita dudum norit; & magnam cepisse animo voluptatem, non ipsius modo Sofaris, verum etiam reipublicæ causa; quod bonorum omnium intersit, fortibus & industrijs viris laborum præmia pro dignitate persolui. Quod ad ipsius aduentum in urbem attineat, nequaquam se illi concedere, vti maiorem fructum, è mutuo conspectu & familiari consuetudine percepturus sit. De copiarum numero, quas ad urbem varijs de causis cogatur adducere; neque pudoris, neque arbitrii sui esse, definire quicquam: tantum admonere pro amicitia, videat etiam atque etiam, ne quid in tanta hominum colluie, & Lusitani præsidii vicinitate turbetur. Hisce litteris acceptis, magnopere letari Sofar, tam belle testæ sua consilia; tam læta initia dare sese. neque diutius morandum ratus; instante iam hyeme, Diu alias identidem aliasque submittit manus. interdum milites ac lixæ cum sarcinis, noctu maiora tormenta cum reliquo instrumento oppugnationis intrabant. Postremo Sofar ipse ad xiv. Kalen. Maias cum Rume cane filio urbem inuehitur. millia quinque Turcarum ducebat. ij. erant exercitus nerui. sequebatur longe maior è varijs gentibus multitudo. Novus dominus, vetus inquilinus, ingenti gratulatione & plausu ciuitatis exceptus, diuertit in regiam. inde per causam Mascarenia salutandi, speculatores in arcem mittit. à Mascarenia vicissim ad eum, honoris & officij causa destinatur Simon Pheus Limenarcha, notæ prudentiæ vir. Hunc Sofar aduenientem primo comiter accipit: mox, variis de rebus instituto sermone, deliberatum esse, ait, sibi, ad rixas vitandas, muro urbem ab arce diuidere; valde optare se, ne Lusitani, vt olim, adeo salutare impediunt opus. dein eorundem iniuriam institit queri, quod pæne precario in eas regiones admissi; totum sibi vindicent mare; & cum alios populos ac dynastas, tum vero ipsum quoque Cambaiæ Regem iniussu nauigare prohibeant. Sat iam peregrinos & aduenas veteribus



bus incolis insultasse : tantam indignitatem ferri non posse diutius. hæc Pheum renunciare suis, ac simul reputare iubet quemque apud se, quam pauci, quam procul ab domo, quam à rebus omnibus imparati, quam incommodo anni tempore, tot tamque infensis nationibus ad prædam obiecti sint. ad ea si prudenter animum aduerterint; profecto fore, uti, vel cum iactura, paci atque otio consulant, nedum in tanta rerum iniquitate deprehensi, validiorum opes atque arma ultro lacefiant. Cum hisce mandatis Pheus in arcem regreditur. Mascarenias ad consilium refert. ac tametsi liquido cunctis apparuit, à Sofare non certamen iuris quæri, sed vim; tamen, ne furendi materiam hosti armato præbuisse viderentur; de ceteris rebus placuit responderi, nihil ipsorum iuris aut potestatis esse. haud longe distare Prætores Indiæ Castrum. si ad eum legati mittantur, sperare pro eius iustitia, quod fas æquumque sit, facile impetraturos. Quod vero ad murum attingat exstruendum, in Marziano fœdere difertis verbis cautum esse de limite. si intra id spatium edificare Sofar animum inducat; se non modo non prohibituos, verum etiam adiuturos manu. Sin terminos transilire, & quod Ninaraus ante frustra tētarit, arci obmoliri atque officere cogitet; daturus operam uti denuo Cābaia atque India omnis intelligat, Lusitanos nullo terrore, nullis difficultatibus, vel de iure finem, vel de gradu cōstatiē demoueri. Hæc Pheus idē referre iussus in regiam, & vna exemplum fœderis, testato descriptum. Ad ea denuntiata, nimirum Christi desertor excanduit: traditumque sibi à Pheo bellum, incensus ira, discerpit. id Sofari, & committendi belli principium; & finis alienę gerendę personę fuit. confestim iniectę legato catenę: & ambulantes in proximo Lusitani alij duo repente comprehensi, & in custodiam traditi: nimbus telorum in arcem subito procursu coniectus. Per hunc modum hostili scelere patefacto, Mascarenias, quo propius cernit periculum, eo in speciem erectior celsiorque; suos omni ratione confirmat. hortatur ne improniso malo isti contrahant animos. proprium esse Lusitani generis & sanguinis, demonstrare quidnam diuino fulta præsidio, neque tamen idcirco in discordiam resoluta, paucitas possit. Eius rei multa eaque illustria varijs orbis terrę partibus edita documenta. Sed ne lon-



## *Historiarum Indicarum*

ge abeant, nuper hanc ipsam arcem, Antonio Sylueria prefecto, maioribus etiam copiis terra marique oppugnatam obsesamq; Lusitanos perexiguo numero ad vltimum inopie redactos, multo maxima parte suorum amissa; tamen stetisse caelesti subnixos ope; & que pati in iis angustiis possit humanum corpus, omnia pertulisse, quoad fracti metu aduentantis ab Goa subsidij, Turce pariter & Guzarates, atque adeo Sofar idem ille, relictis per summam trepidationem impedimentis, abscefferint. Inde, prædicatione omnium & fama, nomini Lusitano ingens additum decus. haud disparis exitus, in simili causa, nunc quoque præcipiendum animis gaudium. nam & aduersus ruptores foederum, contemptores diuini atque humani iuris, teterima daemonum mancipia, pro insontibus & circumuentis, & quod caput est, recte fidei defensoribus, haud dubie superos bellum esse gesturos. & accita iam ab Goa, Bazaino, Cialulo, & aliis oppidis fidelissima suorum auxilia propediem affutura. Neque vero, quod ad timorem vel maxime proponatur, extimescendam esse hyemem. Lusitanæ pietati, virtuti, nauigandi scientiæ, non regionum interualla, non ventos, non tempestates, quominus vltima experiantur, obstare. Tantum interea se ipsi viros præbeant: omni conatu enitentur ad laudem; neu committant, vti vel Christiana fiducia, vel duritie militari, Syluerianis aut aliis inferiores vlla ex parte fuisse videantur. Eiusmodi vocibus publice priuatimque obfirmato ad omnem patientiam milite; Mascarenias, pro tenuitate præsidij, stationes vigiliasq; disponit. Septem, instauratę paulo ante arcis erant propugnacula: in iis totidem duces cum vicenis fere militibus collocat. Marinum castellum Fernando Caruallio committit. huic defensores triginta attributi. Cambaicam oram Iacobus Maæus duobus caturibus tueri iussus, & hostem, quoad liceret, maritimis comeatibus intercludere. Reliquam manum sibi Mascarenias ad subita belli reseruat. Duces ad sua quisq; digressi loca, se se alacriter ad opus accingere: cætonibus ac molli tomento protegere muros: aggerere cespitem: farta glebis dolia inter pinnas locare: arma, cõros, machinas, & quicquid ad repellendum hostem opus est, pro copia præseti raptim expedire: ad nominis Christiani gloriam retinendam; subeunda pericula; famem, sitim, vigiliasq; & vltima perferendas mutuis adhortationibus incitari.



incitari. Inter hæc, Sofar, omnibus iam rebus in proximo comparatis, qua parte ex oppido est aditus, aggerem vineasq; ad arcem agere instituit. apertam quippe oppugnationem, & repentinum ad mœnia successum impediēbat, præter defensorum virtutem, ipsa quoque altitudo & latitudo fossæ; quam post Sylueriæ discessum, Emmanuel Sosa duplo quam antea capaciores effecerat. Sofaris autem, muniendi ratio fuit eiusmodi. Ab utroque insulæ margine vallum arci ad teli iactum obiecit. in eo vallo turres locis editioribus excitantur è soluto lapide, frontibus duntaxat ad lineam exæquatis. ab tergo baiuli atque operarij terram adaggerant. in summo, prætentis gossipij sarcinis, muralia tormenta; in medio atque imo, relictis ex arte fenestellis, minores fistulæ collocantur. Hæc omnia paucis diebus admirabili celeritate perfecta. noctu fere muniebant, quo minus ad certos Lusitanorum ictus paterent. interdiu, sicut ab opere cessabatur; ita ab arce diuerberanda, & fatigando præsidio nulla dabatur quies. A vallo dein multiplex murus captus duci, flexuosis Indico more mæandris: quo & oppidani tutius ad arcem subirent, aggeremque protruderent; & præsidarij, si forte erupissent, non modo ad transversas ex occulto iaculationes præberent corporas sed etiam ignotis anfractibus & errore viarum impliciti tenerentur. Dum hæc fiunt, Sofar optimum statuit, ex alia parte marinum adoriri castellum: ut eo capto, & portum haberet in potestate, & arcem ab latere tormentis impeteret. Eius rei causa ingentem onerariam in recessu intimo procul ab hostium telis, ad castelli fastigium adæquandum, pluribus tabulatis attolli iubet; multoq; bitumine ac pice diligenter oblini: quam deinde, ad castellum admotam æstu secundo, succendant; concepto igne, inscaphas defiliant armati; auctoq; tumultu inter fumum & clamorem, scalis ascensum in muros obtineāt. Hæc res, priore bello frustra tentata, eundem rursus habuit exitum. quippe, tabulata paulatim in sublime crescentia conspicati è turribus Lusitani, rem ad Mascareniam deferunt. Extemplo negotium datur Iacobo Lacteo, qui captiua iam aliquot nauigia ad arcem traxerat, uti quamprimum occupet parato ad incendium pegmati necopinatos ignes inferre. Noctu profectus cum fistulato ribus haud plus viginti, quamquam tectis sub manus vola funi-



## *Historiarum Indicarum*

culis, lenissimoque remorum pulsu, non latuit Sofarem ipsum, ea forte hora circumeuntem excubias. ille confestim ad arma littusque dat signum. tollitur clamor. ex omni parte concurritur. Laeteus, ad similem casum prae paratis iam ante fuorum animis, rectum cursum rectasque proras in periculum tenet. nec minus feliciter quam antea Goueanus, circumfremetibus ferreis globis atque sagittis, ad onerariam penetrat, ut in nullo tali metu, minime custoditam. Confecta iam videbatur esse res, cum in ipso (ut fit interdum) articulo, ingens praeter omnem expectationem difficultas oboritur. hostilis pyra, quam vel è longinquo concepturam ignes crediderant Lusitani, aduersum coniectas è proximo rædas ardentisque ollas, repente contumax & inuicta perstare: iteratis undique iaculis nihilo magis lædi: iaculantium oculos animosque ipsa rei nouitate confundere. Tum Lusitani, ancipiti urgente malo, quod & in mora exitium, & in irriti incepto deformitas foret; consilium à cupiditate gloriæ mutuantur audax ac pæne temerarium. incisis momento anchoralibus, nauem ipsam remulco ad castellum usque per media tela perducunt, ibi demum facibus per otium ingestis, in hostium conspectu, relucetibus late flammis absumpta. Id euentum, ficuti eximiam in suos Dei benignitatem, & pristina miracula retulit, nullo, ne tum quidem, è Lusitanis in itu redituque inter tantam missilium procellam desiderato, vno tantum leuiter saucio; ita Sofarem, primo indignantem, dein stupore defixum, ab consilio maritimæ oppugnationis auertit. eo acrius ab terra munitiones vrgeri cæptæ. & abundabat multitudo, ut si quid tormentis ab Lusitano dirutum esset, Mamudiani ex templo reficerent; & in ortuorum loco (plurimi autem quamquam per tenebras fixi cadebant) fustuario coactos alios aliosque submitterent. inclusis contra, neque ad erumpendum copiarum, neque ad perpetuos & temerarios ictus iacula suppetebant. Per hunc modum, vertente mense, ad arcis pæne fossam agger vineæque perductæ. huic rursus aggeri lapideum præstruunt murum, tredecim pedum latitudine: & in eo noua castella, crebrasque stationes, & varia tormenta constituunt. Hanc ferme circumvallandæ quacunque licuit, arcis formam sequutus est Sofar. Interea Castrio Prætori, ad classem, ut dictum



dictum est, reparandam sat per se incitato, acres addiderant stimulos, Mascarenis nuntij ac littere. Confestim, è duobus filiis Fernandum natu minorem, egregie indolis adolescentem, cum nauigiis compluribus, & vario commeatu, cadisque sulphurei pulueris, & nobilium manu, Diu quam celerrime iubet precedere. Hosce, dubio profectos caelo, atrox in medio cursu tempestas adorta disiecit. pars Bazainum & vicina littora petiere: Fernandus cum octo caturibus instando & remigando peruicit, uti Diensem teneret arcem; inuitisque, & inspectantibus Mamudianis, militem, & commeatus, & omne bellicum instrumentum exponeret. Ingenti Lusitanorum gaudio id subsidium acceptum: ac minime dubia spes victor & consequuta. initur bellatorum numerus: ad quadringentos & quinquaginta peruenit. Suppletæ dein auctæque custodiæ, & Fernando infirmissimum omnium propugnaculum Diui Ioannis (suum cuique propugnaculo ferme ab caelestibus patronis indiderant nomen) cum fortissimis iuuenibus est datum. Per eosdem fere dies, Mamudius, ad visenda opera militesque animandos, cum nouo exercitu Diu aduenit. id suspicatus è concursatione plausuque Mascarenias, Fernandum Carualium è marino castello rem per exploratores iubet cognoscere. Transmissi multa iam nocte nandi periti & spectatæ fortitudinis viri sex, ad vicinam hostium stationem adrepunt; & è custodibus vni manus iniiciunt. ad cuius vociferationem concursu facto, Lusitani duo tresve inter tumultum occisi. reliqui, tenaciter apprehensum vigilem, praevalentes ipsi viribus, ad suos illico transtulere. Ex eo, de Regis aduentu cognitum est, itemque de consilij hostium nonnulla comperta. quibus rebus adeo non exterriti sunt Lusitani, ut etiam per tenebras crebo igne, bombisque, & tubarum cantu signa effusæ cuiusdam gratulationis ediderint. Inde cum admiratio cepisset hostes, ausi è proximis vigiliis percontari quidam (è diuturno commercio haud ignari linguæ Lusitanæ) quæ nam esset causa tantæ ac tam repentinae lætitiæ. Responsum ex arce est: efferri gaudio Lusitanos, quod Mamudium ipsum in castris versari didicerint. quippe, hætenus cum fugitiuis & desertoribus, mistis ex omni colluione, turpiter dimicatum. deinceps, cum Rege regniq; proceribus multo honestius fore certamen.



## *Historiarum Indicarum*

eo responso irritati vigiles inuicem probra Lusitanis ingerere, seruitium Sofaris, aternas compedes, acerba supplicia minitari. Verborum iaculationem, ferrea vtrunque sequuta missilia. Per continuos dein dies, inspectante atque adhortante Mamudio, arcis mœnia quatiebantur. Sub testudine basiliscos (noxiorum plerunque nominibus animantium hodie ballistas appellare mos est) & alia id genus tormenta Mamudiani promouerant. iis Thomæum, & Iacobæum propugnacula, & quantum inter vtrumque erat muri, cum ruinæ minis, ac terribili fragore feriebant. Minora vero tormenta, in ipsas potissimum fenestellas ac pinnas obuenterant ita scienter, vt sine præsentis exitio se vix quisquam propugnatorum ostenderet. Inter ceteros nobili viro Iacobo Gnaia (à quo multa de his rebus accepimus) in hostem collineanti globulus in fomitem fistulæ illatus; fracto impetu, oculum ipsum quo collineabat, excussit. Puluis autem, eo erat artificio ac subtilitate perfectus, vt e flammis emicantes ouales pilæ, dolia cespite plena transfigerent. Mortarium etiam idoneo statuerant loco, (& peritissimus aderat librandi magister) inde immani ambitu globi triginta paucis diebus in arcem immissi, maiore tamē inclusorum trepidatione, quā damno: quod tum è genere sonitus, tum è magnitudine impendentis è sublimi pestis ac ponderis, plerique spatium ad præcauendum haberent. tecta ferme perforabantur, & dissilientibus lapidū fragmētis nihil erat in proximo tutū. magister dein fortuito ex arce telo perimitur. succedit huic artifex, nequaquā vsu vel scientia par. huius culpa recidētibus in castra globis, tres è Mamudianis obtriti: neque ultra exerceri machinam placuit: ita is terror amotus. Cæterum ex aliis partibus haud intermissa verberatione aliquantū procidebat muri. & propugnaculū Diui Thomæ, solutis compagibus, metuendo hiatu discesserat. Aduersus id malū interior murus latitudine pedū viginti mature perductus. diruta prius ædificia materiam & saxa variæ magnitudinis præbuere. A præfecto ipso cum nobilissimis primū ad motū operi manus: horum industriā ceteri deinceps acriter subsequuti: magnoq; certamine continuata structura, intra septimum diem murus absoluitur. Sub hæc Mamudius, longiorem quam putarat obsidionem, & sine vlla pacis mentione obstinatos cernens Lusitanos, è suo



fuο comitatu Iufacarnem ducem impigrum, & bellicæ com-  
potem laudis, cum Abafina legione in castris reliquit. ipse,  
procerum hortatu Madabam vñdecimo quam venerat die re-  
greditur: verbo, ad expediendos commeatus nouumque sub-  
fidium: re vera, præter moræ tædium, metu quoque perſuſus,  
quod è cognatorum numero quidam hoſtili glande traiectus,  
ad ipſius pedes exanimis corruiffet. At Sofar, incenſus dolore,  
& rabie, quod nullam admodum inſignem operam præſenti na-  
uaſſet Regi, præceſſam aliam ſtruem è ſaxo terraque, interſtra-  
tis ad firmitatem ramis ac frondibus ( vñde Ramoſa appellata  
eſt ) erigebat; vt libero in arcem proſpectu, Luſitani præſidij  
diſcuſſum ad bellica miniſteria, deſtinatis è ſuperiore loco iñti-  
bus impediret. Aduerſus eam perniciem, Maſcarenias, oppor-  
tunitatem captans iaculandi, tormenta identidem alio atque  
alio transferebat. turrim dein è regione creſcentis machinæ  
raptim excitauit. in eo præſidio poſitus Antonius Paſſanius  
cum fiſtulatoribus quadraginta; quot ipſe quamquam arctis  
in rebus priuato ſumptu propter diuitias ac ſplendorem ale-  
bat. ij ſumma contentione opus impedire iuſſi. id quo cōmo-  
dius facerent, nocturnis horis ( quo maxime tempore munie-  
bat hoſtis ) ferrea candelabra permagna, crebræque faces ad  
idonea loca diſpoſitæ: quæ, fuſo longe lateq; lumine, cum ſitū  
caſtrorum, genus operum, multitudinem hominum veluti diur-  
na luce nudarent; magnus videlicet, vilium præſertim opera-  
rum interitus conſequutus. Sed ea erat agreſtis turbæ copia,  
is ab tergo inſtantium atque vrgentium præfeſtorum terror,  
vt plagis coacti miſeri ſeſe volitantibus palam telis obijce-  
rent; ac peremptorum loco noui ſubinde recentesque ſupple-  
rent. ita, nequicquam conantibus prohibere Luſitanis, ad ſum-  
mum perducta moles, & omni bellico apparatu conſeſtim in-  
ſtructa. Inde, cum arcis interiora in dies magis infeſta fie-  
rent, Maſcarenias ante ſacram ædem edito loco tumultum ex  
tollit: collatisque eo tormentis, & ingenti præcipue baſiliſco,  
Ramoſam ita quatefecit, vt magna cum ſuperſtantium clade  
proſterneret. neque ſtratam ruruſum exaggerare auſi Mamu-  
diani. Conatus dein omnis ad foſſas opplendas, & opera mœ-  
nibus ipſis iniungenda conuertitur. iam ad marginem vſque  
perduxerant vineas, acceſſere validis ex aſſeribus muſculi, quā  
duriffimo



## *Historiarum Indicarum*

durissimo corio tecti, sub quibus operæ sine periculo commearent. Ex iis musculis tabulæ decliues ita prominebant, uti per eas deuoluta ex occulto saxa, truncique arborum, & glebæ ultra mediam fossam impetu ipso ferrentur. Inter hæc Mamudiani per tenebras clara voce maledicere obsessis, quod more foeminarum intra septa latitantes, non hastâ gladiove, sed missilibus tantum è longinquo rem gererent. at non hisce artibus qui primi è Lusitania ad Indos venerint, gloriam quæsiisse: non ita nuper Syluerianos bellum exercuisse: verum in dextris & pede collato repositam habuisse victoriæ spem: neque se mœnibus, sed armis mœnia tutari solitos. attamen sibi non esse dubium, quin eius desidiæ, non tam penes militem, quam penes præfectum resideat culpa. quippe qui communem salutem proprio timori prætexat: virosque (siquidem eius dissimiles sint) victæ prodigos, laudis appetentes, ad conferendam cum hoste manum paratos, fame postmodum & omnium rerum inopia perituros, exemplo segnitæ. & imperij vinculis intramunimenta cohibeat. Hæc & alia eiusmodi ad excitandam seditionem, vel ad prouocandos ad temerariam pugnam Lusitanos, iactare sub muris ac portis identidem barbarus, nimirum Sofaris iussu: quod magna esset in spe, si apertum ad certamen elici possent, paucis præliis absumptum iri omnes præsidij vires. Sed neque milites, in id usque tempus obedientes duci, neque ducem, minime leuem, aut bellicæ artis ignarum, admodum mouebant importuna & quotidiana conuitia. Magis illa cunctos angebat cura, ut ingruenti à musculis damno quamprimum obuiam iretur: quæ res magnas habebat difficultates. nam & coniectos è muris ignes coria respuebant: & maiorum ballistarum vsum, quo vel maxime inclusi valebant, spatium ipsam propinquitatis ademerat. His rebus anxio, multaquæ apud animum suum agitanti præfecto; remedium tale in paucos tamen dies oblatum. Fornix erat in iis mœnibus, simplici lapidum ordine in speciem obstructus. Eo animaduerso, locum aperiri ac repurgari Mascarenias imperat; postibusque validissimas imponi fores. Immissi dein qui perpetuo egestu, succedentes inuicem alij alijs, fossam latentes



tentes exhaurirent : ac tradita per manus rudera silentio in arcem asportarent . ij deciduam vnde quaque materiam ita subducebant , vt quam integerrimum cumuli fastigium, fallendi hostis causa, relinquerent . Quatriduum totum nocturnus diurno continuatus est labor . interea Mamudiani munitores fabrili bolide fundum subinde explorare . ac primo admirari cur minime cresceret, neque responderet operi acruus . dein , posteaquam magis etiam ac magis imminui sentiebant (extenuatus quippe, demum assidua subtractione corruerat) noscendi causa, periculo contempto , capita proferunt . Lusitanos , quæ iaciebantur, impigre amolientes cernunt . confestim & è musculis in fossam, & è muris in musculos tela coniecta . Et Sofar à præfectis fabrum admonitus aduolat . is , dum ad oram valli , in dextrum innixus cubitum , Lusitanam cryptam attentius contemplatur , suspensio & cogitabundo ; nequaquam in spem tantæ rei missus ex arce globus , manum simul & sinciput abstulit . Ea vulgata re , tantus exercitum incessit pavor, vt parum abfuerit, quin desertis operibus vineisque, obsidio solueretur . Obstabat maxime Rumecan, ferox ingenio viribusque, & odio nominis Lusitani à primis annis imbutus . Is, domestico luctu minime fractus , celebratis more Mahometano paternis exsequiis ; tum vniuersos, tum singulos appellare : hortari ad perseverandum : tot iam exhaustos labores ; tantæ molitionis opera tanto sudore perfecta ; ex hostibus in ipsa paucitate perijsse non paucos ; & qui supersint, vulneribus, fame, vigilijs, defatigatione confectos, hominum simulacra non homines , vix iam sustinere arma, latitare in angulis , desperato nouo subsidio fugam haud dubie meditari . sed & maritimos exitus, aduerso anni tempore , & terrestres , vallo & stationibus intercludi ; immanes belluas indagine cinctas teneri , victoriam esse in manibus ; tam propinquæ spei exitum nullo pacto deferendum : tot nationum salutem , tantum discrimen opinionis in hac obsidione verti : si paulum adnitantur Mamudiani ; & liberatæ Indiæ decus æternum, & nauatæ Regi suo operæ mercedem opimam laturos . Hisce dictis animati plerique . Rumecanis consilium approbant ; in tanta tamque re-

centi



## *Historiarum Indicarum*

centi clade tantam animi magnitudinem vulgo admirantur . denique dum à Mamudio veniant mandata , summam belli administrandi consensu militari ad eum deferunt . mittuntur ad Regem legati . ille per litteras iubet duces oppugnationem vrgerè : noua identidem supplementa , confecti belli præmia pollicetur amplissima : prærogatiuam suffragij militaris de Rumecane confirmat . Lusitanis interim , cognita è fugitiuo quodam Sofaris nece , magna videlicet spes tranquillitatis affulserat : ac , veluti pactis inducijs , dum sedatur in castris timor , vtrinque otium fuit . Sed mox necopinato recrudit bellum , nouo imperatore adeo impigre obeunte munia ; vt Sofarem deesse , neque hostes , neque ciues vlla ex parte sentirent . Ad fossam præcipue aggerandam , ex patris destinatione curas intendat . itaque præter eam turbam quam in castris habebat , alia insuper ex agris oppidisque multitudo contrahitur : ac turmatim diuisa , ad tintinnabuli pulsum in orbem subit : neque iam è musculis tantum , sed propalam è vallo , cum interea misilibus certaretur , variæ magnitudinis lapides , arbores totas , virgulta , cespitem iactant : occisorum cadauera , ne ceteri spectaculo terreantur , obruta ruinis accumulant . postremo , vineas ac vallum ipsum vndique prorutum , cum ingenti fragore deuoluunt : neque iam vlla ope resistere Lusitanus valebat . Fornix primum assiduo iniectu materiæ obstructus : dein , quod supererat spatij , quotidianis incrementis occupat moles . Inter hæc , Mascarenias , tot vndique cinctus angustijs , nouum à Castrio Prætoris auxilium efflagitare per litteras nuntiosque , quos in apertum vitæ discrimen speculatorijs nauigijs hyeme sæuiente mittebat . Rumecan verò , quamquam libero iam ad mœnia successu , cruentam nihilominus dimicationem prospiciens ; Simonem Pheum sub muros misit , qui varijs conditionibus popularium tentaret animos ; Mamudij , & Rumecanis clementiam prædicaret ; obsessisque , si abire incolumes animum inducerent , naues ad profectionem offerret . Ad ea cum ferocius responderetur , negaretque Mascarenias , cum violatoribus fœderum atque periuris , vllam sibi pacis conditionem esse ; confestim Pheus è conspectu subtrahitur : coniectisque per iram telis , Lusitani duo qui ad colloquium pinnas muri fidenter ascenderant , occiduntur . Postridie



die sub vesperam è Mamudianis promptissimi, excelsos nauum malos transuersis iunctos tigillis, ad Sancti Ioannis propugnaculum erigunt: elatisque super capita scutis, in summum enituntur. Ferme triginta iam ascenderant, cum Lusitani ad periculum propulsandum, ac demendum dedecus mutuo se cohortati, impetu capto, alios è corona præcipites dant; alios in scalis obnixos, contis detrudunt; detrusos, iaculis, & flammarum alimentis, & saxorum ponderibus obruunt. in horum locum succedere conantes alij, pari defensorum constantia repelluntur. pauci incolumes, magna pars ambugi, aut vulneribus confecti recedunt. neque ultra tentari pugnam ipsa patitur nox. Paulo dein segnior obsidio fuit, dum ad summum certamen Mamudiani se comparant: accensisque vrbe tota luminibus obeunt templa, suumque Mahometem inani prece sollicitant; multi etiam solenni vouent coniuratione, se non nisi victores ab arce redituros. In diè viij. Kal. Augusti certamen edixerant. is Diui Iacobi Apostoli natalis est dies: quod ipsum victoriæ mox omen Lusitanus accepit. Vbi tempus affuit, Mamudiani instructis ante lucem copijs, ad arcem silentio primum, vt fallerent; dein, postquam vigilare hostem sensere, magna cum vociferatione succedunt. Lusitani presentibus animis corripiunt arma, Sanctum Iacobum ingeminant; tentantes ab omni parte aditum hostes, igne, ferro, lapidibus prohibent; vbi plurimum periculi ostenditur; ibi frequentiores obsistunt. Rumeacan interea suis hortator adesse; alios castigationibus, alios promissis ac laudibus incitare, alijs voti ac iurisiurandi religionem incutere; acerrime vtrinque prælium cieri; confusus imperijs, minis, gaudio, metu, clamor, itemque tremendus tormentorum sonitus ad astra ferri; subeuntium audacissimi quique passim occumbere. in Thomæum præcipue & Diui Ioannis propugnacula ingruerat belli moles. Eo dum intenti propugnatorum oculi pariter animique sunt, è Mamudianis interim eximia corporum agilitate complures, obseruato æstus recessu, ad maritimam arcis latus, antequam dilucescat, accedunt: perque præruptum, eoque desertum ab hoste saxum, partim brachiis humerisque, partim qua cautes patiebantur, scalis innixi, in arcem scandunt, inque ædium tectis Mahometana vexilla constituunt. dein, stolidi capti auiditate, armorum atque hostium obliti, ad prædam illico



## *Historiarum Indicarum*

illico dilabuntur. Mulierculæ quædam, alijs omnibus ad pugnam digressis, in ea parte curabant. ex ijs nonnullæ virili animo arreptis hastis, prædatores locorum ignaros, & incerto concursu nocturnoque pauore perterritos, intra tecta coercent, aliæ ad opem à præfecto exposcendam ad mœnia prouolant. Mascarenias trepido nuntio excitus, ne pugnantium frangantur animi, silentium imperat; ipse cum expeditis ad locum accurrit: ibi hostes partim in ædibus inclusos; partim in angustioribus errantes obtruncat. triginta ferme, cum sese conglobassent, ad vnum cæsi. cæteros ex arce deiectos, tum altitudo præcipitij, tum prominentes ex rupe filices acuti dilacerant. intentiore dein cura locus custodiri ceptus: & Mascarenias, ab ea parte victor, in prælium festine regreditur; suis laborantibus omni arte animos addit; neque verbis tantum, sed etiam corpore miscet certamen; ducisque pariter ac militis partes egregie sustinet. Sex ferme horas dubia victoria pugnatum est. Ad extremum Rumezan suorum clade percussus, receptui cecinit. Lusitani tantis defuncti periculis, primum omnium Deo superisque, ac patrono præsertim Diuo Iacobo laudes, gratesque agunt: cæzorū deinde ineunt summam. è suis tantummodo septem; ex hostibus comperiunt amplius mille & trecentos. capta etiam militaria signa non pauca. Christianorum funus magno omnium studio celebratum est. Laudati pro cuiusque merito milites ac præfecti. Ludouicus Sosa, & Fernandus Castrius, quorum alter Thomæo, alter Sancti Ioannis propugnaculo præerat, præcipuum fugati hostis, arcisque seruata decus tulere. Antonius quoque Passanius, interiorē aggerem turremque magna cum hostium strage tutatus est. Ac, foeminarum etiam, illo potissimum die conspecta virtus: è quibus aliæ furtiuo, vti dicebamus, ascensu transgressum munimenta hostem Mascarenia trucidandum obiecerant; aliæ ad mœnia dimicantibus viris arma & saxa, itemque fascias & medicamenta suggesserant, versataque inter ipsam dimicationem erant adeo pertinaciter, vt faucibus nonnullæ constanti dextra sibi spiculum euellerent, plagisque obligatis ad institutum redirent. Is, bene iuuante Deo, pugne illius exitus fuit. Secundum eam pugnam, obstinatis vtriusque



que partis animis, aliæ deinceps haud absimili euentu pugnatæ. in iis, præter cætera tormenta ferrumque, ardentibus maxime iaculis certabatur, maiore oppugnantium, quam defensorum pernicie. quippe gossipio, quo Indi ad vestem vtuntur, ignis tenaciter adhærescens, momento excitatum incēdium per confertos manipulos cuneosq; late fundebatur. quos autem flammā comprehendisset, ij, abiectis armis, cum simul vestimenta projicere non valerent, cæterosq; ab ijs adiuuandis exuendisve, sui quemque periculi metus auerteret, cæci amentesque crebro cum gemitu, incerto vestigio, extra ordines ferebantur. Hinc, deformatos vultus; exusta lumina; pendentem è nudatis artubus cutem, ac velut in lora diffectam; horrendo spectaculo cerneret. At Lusitanum multo minus lædebat ignis, amictu laneo, & insuper ocreis & chirothecis ac thorace munitum. & corio deficiente, præfectus, in eundem vsum, è pellibus inauratis peristromata pretiosa militibus diuidenda curauerat. Ex eo tempore Mamudiani cum aperta parum proficerent vi, subterraneis operibus (& suppetebat ad omnia multitudo) occulte grassari constituunt. Cuniculos plures ad arcem agunt. interea, vt ab sensu operis Lusitanum abducant, fabros cum dolabris ad suffodiendos muros quam tumultuosissime subigunt: maiores globos cum fragore terrifico ac densa fumi caligine iaculantur. Porro cuniculorum dispar, neque vno tempore fuit exitus. alij specubus puteisque, quos Mascarenias mature in id ipsum effoderat, inutiles facti: alij non interrupto successu ingentibus detrimentis rem Lusitanam affecere. Longe perniciosissimus omnium fuit is, quem ad Sancti Ioannis propugnaculum præcipua contemplatione direxerant: is vt infra fundamenta peruenit, locum tormentario complent puluere: eiusdemque pulueris tanquam institas ad cuniculi os perpetuo tractu perdunt. Posthæc, veluti ad vltimam oppugnationem instructi, sub signis ad eam maxime partem subeunt arcis; ac vix tentato conflictu se se recipiunt. dein rursus accedunt receduntque simulato metu, nimirum vt e Lusitanis quamplurimos, propugnandi spectandique studio in fraudem illiciant. Tum Mascarenias, ratus id quod res erat, hostem dolo non metu pedem referre; mittit extemplo qui Fernando Castrio & reliquis præsidia.



## *Historiarum Indicarum*

præfidiarijs nuntiet, quamprimum ex eo loco secedant: hostilem trepidationem in tempus fictam: aliquid profecto occultæ machinationis subesse. illi, & vigore ætatis, & superiorum dierum victorijs nimium sibi præfidentes; qua Indorum ignavia irridere, qua præfecti seu monita seu iussa contemnere. Graue piaculum contumaciæ dedit nobilium cohors. nam simulatque frequentes in turri conspecti sunt; ignem cuniculo Mamudiani raptim iniiciunt. is à primo aditu ad intestina momento perlatus, multiplicatis in arcto flammis, & in apertum impetu vasto enitentibus, euulsam ab radicibus turrem cum terribili strepitu qualis ex Aetnæ cauernis interdum cieri solet, in altum sustulit, longeque ac late disiecit. è superstantibus alios, volitantia saxorum fragmenta dilacerant: alij, sublime quantum prope oculorum sequi acies posset elati, dein ad terram afflictæ, suo & armorum pondere conteruntur. alios, dira ignium vis, tamquam tormento excussos ad hostem usque proiecit: quorum interitu nequaquam expletis odijs barbari, inanima & mutilata cadauera tum incessunt probris, tum sparis & gladijs crudeliter fodicant. Viginti ferme ex ea statione tantæ cladi superfuere; ad centum extincti, in Ioannis Regis familiam adscripti plerique, & claris orti natalibus. quo in numero Fernandus Prætoris filius fuit. corpora dein conquesta mulieres terræ mandarunt. Caterum vixdum recesserant flammæ, cum per stragem ac ruinas Mamudiani conantur in arcem irrumpere. aduersus eum impetum quatuor è superstitibus raptim opposuere sese: nam reliqui incendio afflati, & recenti malo attoniti ac sopiti iacebant. & cum pugnacissimis aliquot Mascarenias confestim accurrit. huic manipulo sacerdos effigiem Christi Domini è Cruce pendentis intrepide præferebat. eius admodum piis adhortationibus, & occulta nimirum è cælo vi, non dubie confirmati erectique Lusitani, tumultum ac periculum pugnæ sustinuerunt, quoad opere tumultuario murus interim ab tergo ingenti aliorum sudore ac certamine obiectus est: & imminente iam nocte, Mamudiani, multis item è suorum numero amissis & saucijs, incepto irritò recesserunt. Eius die casu admoniti reliqui præfidiarij, exinde cautius in muris agitare, atque ad primas talium incendiorum notas abfistere.



mittere. itaque & Iacobæa & Passania turris, item subditis ignibus, nullo defensorum interitu prociderunt. Thomæa vero (nam eo quoque cuniculus penetrauerat) procumbentibus in fossam ruinis, paratos atque imminentes in irruptionem trecentos è Mamudianis oppressit. Atque huiusce machinationis in vniuersum ferme hic erat euentus, vt Mamudiani introitu exclusi, spatia saltem obsessis eriperent, & intra mœnium excidia subitarias munitiones raptim excitarent: Lusitani contra, & per patefactum ruina iter conantem transcendere hostem, virtute atque armis arcerent; & nouum introitus pro diruto murum summa contentione reficerent. Iade angustior in dies arx fieri, & vix ad explicandos ordines relinqui locus. Quatuor iam menses obsidionem pertulerant Lusitani, cum ex adeo paucis aliqui ferme quotidie aut vulnerarentur, aut caderent. Accessit inopia & fames, frugibus carnibusque consumptis: & præter fœda animalia, quicquid etiam erat fruticosum aut herbidum, in alimenta conuerso. hinc vulgo ingruerant morbi: fessisque & animis & corporibus, qui arma tractare possent, vix centum & quinquaginta supererant. atque ij admodum ægre continebantur, quominus in hostium stationes ultro impetum facerent, vitæque miseras & ærumnas honesta morte finirent. In hoc rerum discrimine diu expectatum ab Goa subsidium aduenit. naves quinquaginta Bazainum facili tenuerant cursu. Aluarus Castrius Prætoris item filius, & Franciscus Menesius præerant. inde Aluarus cum meliore parte classis Diu protinus antecessit. reliquæ, carptim, prout agilitate vel robore quæque præstabant, captatis tempestatibus, ante Septembris exitum subsequutæ. armati supra nongehtos cum omni rerum copia in arcem expositi, quæ res Lusitano maiores quam pro viribus animos fecit. Auxit ferociam, basiliscus, qui demersis in ruina rotis inhæserat, cum eum ad se iniectis funibus Mamudiani attrahere niterentur, prospera pugna retentis. Ex hoc indignari postremus quisque, & accusare primos, quod hostium conatibus non statim ex arce obuiam ierint, quod opera mœnibus applicari, munitiones transferri, se se in tantas angustias cogi permiserint. recensere victorias (vt de Europa & Mauritania fileatur) ad Sofalam, Quiloam, Goam, Ff Malacam,



## *Historiarum Indicarum*

Malacam, Armuziam, Calcutum, ad Repelini vada, ad Diu-  
denique partas; ingentes barbarorum exercitus parua saepe  
manu fugatos; peruagatum Africa atque Asia tota nominis  
Lusitani terrorem, scilicet quo tanta decora, tantęque laudes,  
in vno demum praefecto atque in vno praesidio pereant. tuen-  
dum omnibus viribus quod a maioribus acceperint patrimo-  
nium dignitatis ac famę. viriliter tandem erumpendum in  
hostium castra, & dignum aliquid rebus olim gestis, & vetere  
gloria perpetrandum: quicquid ad eam diem acceptum in ar-  
ce sit damni, id fraude, cuniculis, tormentis illatum: si vera  
virtute, manu, & gladijs decernatur; Lusitanum impetum, &  
micantia ex propinquo arma Indos haudquaquam laturos:  
hęc initio pauci; dein velut ex contagione plures quotidie pa-  
lam in circulis & contubernijs fremere; & in Mascarenias cun-  
ctationem qua vera, qua falsa iactare. Postremo ad eundem  
conuenire frequentes; pugnam efflagitare; minari, si diutius  
torpeat, se quemlibet alium vel ex argilla ducem haud dubie  
suffecturos. Mascarenias contra, lenire furentes; de hostium  
genere, numeroque differere; iam nunc abundare commeatu  
arcem; custodes vti ad hostem lacessendum paucos, ita ad  
prohibendum sat multos adesse; hyemem maxima ex parte  
circumactam; vniuersas ab Goa copias propediem afforestum  
demum certioribus victorię premijs, & minore suorum de-  
trimento praelium inituros. Hęc & alia in eandem sententiam  
furdus canere Mascarenias: adeo certamen penitus imbibe-  
rant animis plerique: nec deerant qui ab insito liuore, solute  
obsidionis gloriam preceptam Ioanni Castrio cuperent; atque  
ad profligandos Guzarates eguisse Prætoris ipsius auxilio nol-  
lent videri. Mascarenias, vt inflatos inani fiducia, fixosque  
in audaci proposito animaduertit; Aequum fuerat (inquit)  
ciues, militem ab duce regi, non regere; expectare signa, non  
extorquere; scire, quæ ad rationem gerendi belli pertineant,  
praefecto & consiliarijs curæ esse. Nunc, quando mihi prope  
manus iniicitis, & seditionem vultu verbisque praefertis; vin-  
cat sane maiestatem imperij, inconsulta spes, & libido. ite,  
quod superi bene vertant: virtutem istam, lacertosque, & ar-  
morum scientiam expromite. ego, quos agere debueram, se-  
quar; & quamquam alieno tempore, tamen partem periculi  
ac



ac laboris vobiscum vna capeſſam. Vos modo videte, vt quos ante pugnam ſpiritus atque ardorem oſtenditis; eoſdem in aſcenſu valli poſtmodum, atque in ipſo conflictu præſtetis. Cum hæc dixiſſet, prout in arcto licebat, copias inſtruit: primam aciem Aluaro Caſtrio; alteram Francisco Menefio dat; cum cæteris ipſe, modica manu ad cuſtodiam arcis relicta, ſubſequitur. Facta ſecundum euripum eruptione (nam ex ea parte latior patebat exitus) ferociſſimi quique vallo ſuccedunt; ac deſenſoribus primo impetu percuſſis aut deturbatis, ingenti ardore tranſiliunt. dein, ſigno ab hoſtibus dato, cum noua identidem ſubſidia è caſtris aſſuerent, atrox eſſe prælium cæpit: & qui nondum tranſcenderant Luſitani, cum proculcate priorum pedibus lætiores herbæ, altitudinem nudaſſent valli, quod ex arce proſpicientibus nuper humilius apparuerat; iſti re ſubita, primo hæſitare, dein, hoſte imminente, fugam aut latebras circumſpicere. Tum Maſcarenias: Hæcine pugna eſt quam poſcebatis? increpitans; ante diſcrimen feroces, in ipſo diſcrimine timidos & ignauos appellans; ad opem laborantibus ferendam fruſtra conatur accendere. Inter hæc Menefius intra vallum acriter dimicans, & circa eum aliquot principes Luſitanæ iuuentutis occumbunt. Aluarius Caſtrius ſaxo percuſſus, cedente ad iſtum galea cum attonitus cecidiſſet, Maſcarenia interuentu ſeruatus eſt. Neque vltra ſuſtineri ſuperfundens ſe ex omni parte caſtrorum, poterat multitudo. Luſitani cum vndique pulſi tranſfigerentur, & oppugnari è diuerſo latere arcem, ſeu conſilio ſeu temere ſublata nuntiaret vox; nequicquam obſiſtente Maſcarenia, nullius niſi vitæ memores ad mœnia portasque præcipiti curſu vertuntur. cupientem ſimul inuehi Mamudianum tormentis è muro deterrent. Hic temerariæ eruptionis euentus fuit. Exinde ſuo ipſi conatu ſegnioreſ facti (vt in contrarium ſæpe migrant vitia) vix pro muris obire ſtationes, vix recenti ſucceſſu elatis & ſubinde arcem aggredientibus Indis obſiſtere: quoad reſciti tandem ex pauore animis, ruruſum alacres, & oblitterandæ ignominia cupidi, ad conſueta munia rediere. At Mamudiani, quo ſe magis magisque obfirmatos ad continuandam obſidionem oſtenderent; atque vt expeditiores ab continenti com meatu haberent, euripo ad Rumæpolim, iaſtis vtrique moli-



## *Historiarum Indicarum*

bus , alterum pontem imponunt ea magnitudine ac firmitate , vt quamlibet onustas vehes tuto ac large transmitteret . Simul , dies noctesque fatigare ac premere Lusitanum ; stantes muros frequenti verberatione concutere ; quæ minus commode ballistis labefactari possent ; in ea subditis ignibus calefacta , syphonibus acetum immittere ; putrefacta continuo , excindere ferramentis ; igniferos è stupa , gossipio , & sulphureo puluere globos in tecta conijcere ; denique cuniculos , quod ea res prospere cessisset , ad arcem vniuersam euertendam pluribus simul locis agere . Aduersus ea , Mascarenias , operarijs auctus , non vna regione item obliquas aduersasque excauare fossas ; tormentis ac missilibus ab omni parte hostes impetere ; intergerinos ædium parietes perforare ; qua tecti milites & mancipia commearent . Iisdem fere diebus quibus hæc ad Dium fiebant , Goam de Fernandi & commilironum clade nuntius affertur . inde grauis mœstitia simul & metus ciuitatem incescit . Prætor , quamquam acri doloris morfu perstrictus , tamen ad cæteros animandos , lugeri filium vult . ipse nitens purpura & ornatu alio sumptuoso , in campum vna cum proceribus , velut animi causa , processit . ibi , tum in gyros flexo , tum cursu & saltibus incitato militariter equo , malum subinde Mamudianis interminans , cunctos vultu & oratione confirmat . mox in classem apparatu omnes de integro curas ac neruos intendit . ac mitescente iam hyeme , Aluarum Acuniam nauibus quinque , in quibus præter magnam instrumenti bellici vim , fistulatores erant quadringenti , protinus iubet obsessos adire , ac suo nomine prohibere quominus ante vniuersæ classem aduentum , pedes è munitionibus efferant : sese paratis omnibus ad pugnam rebus breui affuturum . Cum ea manu profectus Aluarus , circa Dium in aliquot naues Arabicas incidit . ijs mercenaria variarum gentium auxilia propinquus Sofaris quidam ad exercitum subuehebat . Aluarus , commissio feliciter prælio , naues expugnat , captum ducem in arcem infert . huic magnum auri pondus ad redemptionem frustra offerenti , vna cum primoribus abscissæ ceruices , capita in euripum consulto proiecta , vt in conspectum



speculum vr̄bis æstu accedente ferrentur . perlata atque agnita ,  
iram in Lusitanos ac rabiem hostibus acuere . At Prætor , ap-  
petente vere , Bazainum oppidum nauarchis & militibus ad  
conueniendum edixit . atque ad cæteros excitandos eodem  
ipse confestim celocibus circiter quadraginta contendit . Coa-  
ctis omnibus copiis quæ contrahi è vicinis regionibus potue-  
re ( ij fuere præter naualem & aliam turbam , Lusitani bellato-  
res mille quadringenti , Canarini auxiliares trecenti ) Cambai-  
cam oram ferro ignique perpopulatus , ad Mortuorum insu-  
lam nauibus circiter octoginta peruenit . Huc euocato Ma-  
scarenix mandat , vt̄ ad exscensionem cuncta quamprimum  
expediat , ac sine intermissione tormentis vndique vallum ho-  
stium , & densos aggeres quatiat , ruinaque patefaciat in vr-  
bem iter . Dictis obtemperatum , & paulo post Prætor inco-  
lumi classe subsequitur . Ab auersa parte arcis per triduum sine  
tumultu expositus miles . naues portum inuectæ , quam ma-  
xime tuto ab hostium telis recessu consistunt . Prætor , omnium  
postremus in terram egressus , vt̄ munitiones intrauit ; mirari  
faciem loci : solo æquatas turres ac propugnacula ; alicubi nul-  
lum fossæ vestigium ; inædificatos mœnibus ab hoste muros ,  
quasque propemodum ex vna arces factas . contemplatus dein ,  
quatenus licuit , hostilia castra , adhibitis proceribus , de sum-  
ma belli consultat . Erant qui differendam eruptionem , & re-  
ficiendum è maritima iactatione suaderent militem . ipse , ra-  
tus ad nominis Christiani dignitatem pertinere , ne vno qui-  
dem die Prætozem Lusitanum ab Indis clausum teneri ; nul-  
la interposita mora certamen experiri constituit . militi-  
bus edicit , curatis mature corporibus tertia vigilia præsto  
sint . Arcem , detractis valuis , ne qua in receptu spes vlli  
foret , Antonio Corree cum idoneo præsidio inter prælij tem-  
pus tuendam adsignat : consilio dein adiuvat rem , quod con-  
siliū haud dubie victoriam peperit . Turre erat ad dextrum  
vr̄bis latus , qua in apertum mare prospectus est : Sylue-  
rianam appellabant . ad eam quatiendam , quasi ex illa par-  
te descensio quæreretur , dromones pridie missi tres , è sa-  
lo eminens muri partem vehementi iaculatione diruerant .  
id vbi cognouit Prætor , Nicolao Consaluo , impigro vi-  
ro , & rei maritimæ in primis perito , mandat , vt̄ na-



ues quæ remis agantur, præter nautas ac libratores, imbelli turba, lixis & calonibus impleat: ij pariter ac nautæ hastas erectas singuli binas: remiges altera manu remum, altera accensos funiculos teneant: libratores tormenta in hostem veluti ad oppugnationem exercent. Hoc modo instructam classem iubetur Consalvus ad insulæ alterum latus, de quo dictum est, paulo ante lucem admonere; vociferatione, bombardâ, tympanis, tubis, quam maximum strepitum ac tumultum ciere; alijs alijsq; subinde locis descensionem ostendere, multimoda arte hostiles distingere copias. Hæc mandata Consalvo. cæteris item præfectis, prout quæque res postulabat, sub vesperam edita imperia. Rumecan, haud satis certus qua potissimum ex parte Lusitani essent erupturi; ad omnes aditus æque terrestres atque maritimos, tormenta vigilasque disponit; telorum omnis generis ingentem copiam in muros aggeresque comportat: auget munitiones: &, qua ex euripo descensus ad oppidum est, præaltas fossas leui superiniectu ramorum ac terræ latenter occæcat. Externi selectique militis (præter Guzaratas Indosque, quorum maior multo erat numerus) in am curam ac sumptum acriter incumbente Mamudio, viginti millia in armis habebat. Ex ijs ipsa robora ad primos impetus excipiendos in fronte castrorum locat, firmatque ab tergo subsidii: Rumæum pontem septingentis militibus insidet; reliquam multitudinem, quo clamor, quo signa aduocarint; paratam ad omnia occurrere iubet. Rebus ita prouisis, tanta virium suarum Mamudianos cepit fiducia, uti Lusitanorum paucitatem conatusque irriderent, vixque vniuersæ pugne subituros aleam crederent. Lusitani contra, uti Christianos decet, vno Deo maxime freti, nihilominus expediunt arma: atque ad conditum tempus ante Prætorium armati conueniunt. Dies erat iij. Idus Nouembris, Diuo Martino sacer. Tum loco excelso, ut vndique conspici posset, Antonius Casalius Franciscanus insigni pietate sacrificat: Deumque precatus, ut in hostes Ecclesiæ sacrosanctæ, formidinem ac terrorem auerteret; Christianos, quo alacrius capebant pugnam, noxis omnibus Pontificia potestate expiatis absoluit. Eisdem, Prætor, quod pluribus agendi spatium non esset, paucis adhortatur, uti Christo duce, cuius tue-  
antur



antur causam, forti ac fidenti animo prælium ineant. Ioannem ipsum Regem, vniuscuiusque virtutis vel ignauia primo testem & spectatorem, mox remuneratorem aut vindicem adesse putent. Indici totius imperij summam in eius diei certamine verti nil ambigant. postremo sciant, præter naturam loci, ab se quoque diligenter prouisum, vti segnibus timidisque nullum neque terra, neque mari effugium sit. Ex arce detractas fores, è portu naues in expeditionem emissas. Magnanimis, certam vel in morte victoriam, vel in victoria salutem & præmia constituta. Cum hæc agerentur, iam Nicolaus Consalius classem è composito ad alteram partem insula circumegerat: variisque (vbi conuenerat) locis descensum & oppugnationem ostentare pergebat. & nox adiuuabat inceptum, ex incerto speciem omnium multiplicem oppidanis intuentibus reddens. & in Prætoria sublime vexillum, ac lumen in puppi, ad hæc, densi tota classe ignes, tormentorum fragor, micantiaque arma, & mistus hominum vocibus ac tympanorum pulsu tiliarumque concentu Martius turbarum sonus; Castrum cum omni exercitu adesse monstrabant. Eo terrore Consalius omnium oculos in se conuerterat: vt non ex vrbe tantum, sed etiam è castris, armatorum agmina, relictis præfidiis ad mare concurrerent. id vbi à speculatoribus accepit Prætor, in primo tumultu, antequam dolum clarior proderet lux, instructas, prout angustia loci ferebant, copias, (ferme tria erant hominum millia) pluribus simul portis emittit. primum agmen ducebat Mascarenias è veterano milite, ac perito locorum, atque ad eius imperia dudum adueto: accesserant è reliquo exercitu quadringenti. cū ceteris modico interuallo sequutus est Prætor. Cingebant latera spectatæ fortitudinis viri. Vna Casalius ornatu quam augustissimo trabeatus, Christi ad Crucem affixi attollens imaginem, concionabundus aderat. Eius hortationibus inflammatis Lusitani, simulque diurna & humana pleni spe, clamore consentienti ad castra succedunt: ac semiplenas adorti stationes, è vallo deiiciunt: & partim stratos, partim integros aggeres murosque, scalis, contis, humeris innixi transcendunt; hostemque obuium, hastis, gladiisque conficiunt. Ad eius rei nuntium Rumezan vacuam ratus arcem, cohortes aliquot ad eam occupandam circuitu capto



## *Historiarum Indicarum*

iubet extemplo contendere. ij, ab Antonio Correa, quamquam patentibus portis, magna cum cæde pulsi. Alia item manus ad opem castris ferendam à mari submissa. inde aliquot locis atrociter dimicatum est. id adeo ex ipsa vulnerum fœditate perspici potuit. Cosmo Paiuë gladio femur abscissum. Vasco Fernando, cum sese in hostes acrius immisisset; decusus ab tergo thorax, perque plagam nudata vitalia; cuidam, quod super aures oculosque eminebat, à reliquo capite, prope ad ostentationem artis, vno acinacis ictu diuisum est. Circa vnam item è turribus, qua Prætor ipse constiterat, multum sanguinis fusum: & vexillifer Eduardus Barbutus, inter scandendum ter ab hoste præcipitatus, repetito quartum conatu in pinnas euasit, ibique per vim Lusitana signa constituit. Exinde ingens Mamudianos inuasit pavor, & fuga passim fieri cæpta. perterritis, hinc Prætor, illinc Mascarenias pertinaciter ab tergo cum suis instant, immisti que fugientium turbæ eodem impetu in urbem irrumpunt. ibi redintegrata pugna, & æquis aliquandiu viribus mercenarij ac transfugæ maxime resistebant. Vrgente dein vehementius Lusitano, quantum se inuehebat hic, tantum illi de loco demoti. atque vti denuo inclinarat certamen, Lusitana vis ultra sustineri non potuit. Fusi Mamudiani, insula trepide relicta; super alium alij ex vtroque ponte sese in continentem eiiciunt. multi in turba obtriti, multi à persequentibus interfecti. Castris & oppido Lusitanus vno die positus. in oppidanos deinde nullo discrimine sexus ætatique sæuitum est. Mascarenia præcipue cohors, dolori atque iracundiæ paruit: Mahometicamque perfidiam, cæsos tot præliis commilitones, & diurnæ obsidionis mala ad satietatem vltæ est. armati iuxta & inermes, pueri senesque, viri pariter ac foeminae trucidati. vsque ad brutorum animantium cædem atrox ira peruenit. regium Cambaia vexillum, & alia signa relata complura. castrensis æque atque urbana præda militi celsit. vtrobi que tabernæ apertas, paratam expositamque rerum omnium copiam; triclinia strata, & appositos cibos velut in media pace (adeo Lusitanum Indus contempserat) inuenerunt. Simom Pheus & socij, ad catenas demendas frustra quæsi. ab irritò sub muris colloquio Mamudiani Madabam vinctos attraxerant. hosce dein, & vna ciuem  
Goanum



Goanum Athanasium Frerium cum militibus viginti, dum lembo Diumpeterent, vi tempestatis ad Surratum nuper eiectiones, ab nuntio cladis acceptæ Mamudius rabie furens iugulari omnes iussit. in cisternam proiecta cadauera. Cæterum in prælio è nostris desiderati circiter sexaginta: ex hostibus ad quatuor millia. Rumezan imperator (incertum à quo perreptus) inter cæsorum acervos gregali amictu vix tandem est agnitus. sexcenti viui, in ijs principes aliquot, in potestatem venerunt. Præter innumerabilem armorum ac telorum copiam, ænea tormenta maiora in castris reperta quinque & triginta, è quibus vnum Arabicis inscriptum notis, rudi opere factum, sed inusitata magnitudinis, in armamentario Olisiponenfi conspeximus. Clara admodum & gloriosa Lusitanis hæc quoque victoria fuit, vel magnitudine periculi, vel prædicatione omnium & fama: celebritatem auxere diuina miracula, quod hostes ipsimet affirmarent, conferta iam pugna, maiores aliquot ballistas, applicitum quater ignem, cælo minime pluuiis, respuisse. & super ædiculam arcis, apparuisse mulierem cælesti lumine radiantem, cuius fulgor ita adspicientium oculos mentesque perfringeret; vt, cæci propemodum, neque in ordines ire, neque in vnum conglobare se possent; ac tanto superiores numero, tamen, immutata repente rerum omnium specie, in denos Lusitanos pugnaturi singuli viderentur. inde consternationem, & fugam ortam. Prætor, ab tam felici euentu primum Deo supplicationes habendas curauit. collaudato dein exercitu, laureatas ad Ioannem Regem litteras misit, militumque ac ducum virtuti minime maligne testimonium tribuit: inde hostiles omnes munitiones æquauit solo: pontes quibus insula continenti iungebatur, intersecidit. Simul, ad reficiendam augendamque arcem, admotis ipse ante alios manibus, cunctos accendit: atque vt ingenti labore militum; ita non magno sumptu, intra paucos menses partim repurgatæ ruderibus fossæ; partim etiam turres ac mœnia restituta: ijsque, ad extremum, laxiore circulo noua fossa nouique muri circumdati. Hisce rebus peractis, & stipendio militibus persoluto, Prætor incunte autumnos victor Goam insolita omnium ordinum gratulatione reuectus est. Per eosdem fere menses Idalcan in Barthesianos & Salseranos fines, eadem qua nuper ijs Lusitano cesserat leuitate,



## *Historiarum Indicarum*

uitate, ad vectigal portoriumque exigendum armata manu procuratores immiserat. Aduersus hosce, modicis copiis Prætoris iussu profectus Iacobus Almeida, eiectiones ex agris, Pondam trepida compulit fuga, castellum, uti supra docuimus, magnis operibus ab Azedecane munitum. ijs cum ab Idalcane subsidia mitterentur, Castrius ipse cum duobus millibus peditum, equitibus ducentis in ea loca traiecit. Ad eius aduentus famam, pauidi hostes, ne expectata quidem oppugnatione, castello agrisque excessere. Castrius  
§ Pondam recepta & euerfa, Goam rediit: inde aduersus Mamudium reparantem bellum, protinus classe contendit lemborum aut biremium centum & viginti, quibus Lusitani mille octingenti, & socijs Naires quingenti vehebantur. Cum hisce copiis in Cambaiam delatus; alijs atque alijs locis milites sub signis ad populandam oram agrosque duxit. Cum diu neminem obuium habuisset armatum; ad Barocum denique urbem cum equitum millibus quinque acie instructa sese illi obiecit Mamudius ipse Rex. Turritos elephantos, & curulia tormenta in prima fronte locauerat; post elephantos in dimidiata Lunæ figuram instructo equitatu substituerat. Neque Castrius detrectauit certamen. Vbi ad teli iactum est ventum, repente Mamudiani referunt gradum, haud tamen confusis turmarum ordinibus; & intra conspectum hostium, loco remotiore consistunt. Tam subiti receptus causa in occulto est. Sunt qui ab Turca quodam ex præfectis monitum dicant Regem, ne florem nobilitatis, & vna suum ipse caput furentibus rabie ac temeritate Lusitanis obijceret. Sunt qui putent eo consilio recessisse, uti auditate pugnandi pertractos intra sua præsidia Lusitanos, ex omni parte circumueniret. siquidem è toto regno copias ingentes equitum peditumque in loca vicina contraxerat. Vtcunque sese habeat res, Castrius ad ostentandam fiduciam, integris item ordinibus, aliquantulo spatio cedentibus instare perrexit: dein torrente desuper Sole, armisque degrauantibus, expressa ab tanto Rege timoris confessione contentus, incolumem exercitum præter oculos Mamudij, cum plausu cantuque ad naues reduxit. Patanem inde Arabum coloniam metu ab incolis relictam, itemque Patem eiusdem tractus oppidum celebre, & alia emporia multa, plurimas



mas naues incendit: magnum mortalium numerum partim occidit, partim cum alia omnis generis præda captiuos auexit: fata, villasque, & conditas horreis fruges exussit. Eam vastitatem per se grauem, spatium tempo ris grauiorē fecit. Tres fere menses circumlatus belli terror ac populatio: & Mamudij conatus in multum tempus ea clade represssi. Inde Prætor confirmato Dienſi præſidio, renauigans Goam, ex itinere Dabulum oppidum Idalcanis maritimum vi cepit, direptoq; flamas iniecit. Idalcan, absente Caſtrio, in Salfetanum rursus agram, externorum magna ex parte militum octo millia miserat, equites septingentos. Abasini erant, Arabesque Turcis immiſti. Duces iis quinque pari imperio præerant, ita vt pluribus ſententijs in decernendo ſtaretur. ad Marganum vicum munierant caſtra. Prætor, vt Goam inſulam attigit; priuſquam urbem intraret, nouis copiis auctus, ab Agacino (id loci nomen ad veteris Goę ruinas) illico in Salfetanam terram tranſmiſit ratibus. Luſitanorum peditum duo millia, equites centum & octoginta; pedites Canarinos ex eadem inſula Goa item bis mille; Naires ſagittarios peltatosque trecentos ducebat. Eius aduentu cognito, duces hoſtium, ſilentio noctis in locum natura tutiorem ſe recepere. à fronte fluuius, ab tergo mons editus clauderat. eorum veſtigijs acriter inſiſtens Prætor, in caſtris ab hoſte deſertis ea nocte conſedit. ibi reſectus ex itinere miles. Poſtridie, diuiſis quadritariam copijs, intentus prælio ad hoſtem ducit. Luſitanos interim, tanquam non cum armatis ac pluribus dimicandum, ſed quaſi par pecorum grex maſcandus foret, accenſa cupiditas inuaſerat pugna: minisque ac denuntiationibus plerique ad ſigna contineri vix poterant. ex iis quinquaginta fiſtulatores, inconſulto Prætoſe, deuſijs callibus antegreſſi, flumen vado traiſciunt, intercluſique ab ſuis temere hoſtem laceſſunt. in eos continuo Arabicus equitatus emiſſus; cumque pauci à pluribus premerentur, atque retro ad flumen trepidi cederent; coſpicatus laborantes Prætor, ad opem circumuentis ferendam anſe tranſmiſſo cum paucis equitibus aduolat: perque ignium riuos, quos iacta à Mahometanis ardentes duxerant ollæ, perque media tela hoſtem aggreſſus, tandiu ſuſtinuit pugnam, quoad ab tergo reliqua ſuperueniret acies. Eo primum certamine



## *Historiarum Indicarum*

tamine ( ita per litteras iusserat Rex ) cum Sancto Iacobo, Di-  
uus quoque Thomas Apostolus inuocatus . & is ipse dies forte  
natalis erat Apostoli, xij. Kal. Ianuarias , quæ res animaduer-  
sa , fiduciam animosque militibus auxit . Simul etiam Casa-  
lius idem qui nuper ad Dium , Christi pro nobis è ligno pen-  
dentis effigiem excelsam gerens , commemoratione tantæ ca-  
ritatis identidem addebat stimulos . Neque ad superos vota ,  
neque ad homines hortamenta irrita fuere . Euidens tum quo-  
que cæleste numen Christianis affuit rebus . Et Lusitani pro-  
ceres , nouo ardore concepto , in Mahometanas cateruas im-  
petum dant . Aluarus Castrius primo incurfu duos ex equis  
præcipitat ; stricto dein gladio sese medios in hostes immittit .  
Ioannes Ataidius vnum ex primariis deturbat : inde non gla-  
dio tantum , sed manu atque impressione vrget aduersos . Frã-  
ciscus Syluius , effuso item vno , cum tribus simul capesit pu-  
gnam , atque omnes interficit . Iacobus Almeida vnum è quin-  
que ducibus hasta transfigit . Aluarus Camigna tres equites ,  
Aluarus Gamma duos , Antonius Persona totidem sternit . Sal-  
uator Fernandus vexillifer , ad cæteros magis magisque inci-  
tandos , in mediam hostium aciem seque & signum intrepidus  
intulit . Dum hæc ab antesignanis fiunt , nequaquam ab aliis  
interea cessatum . acriter vbique gesta res . magna passim edi-  
ta strages . ac nisi prælio interuenisset nox , è tanto hostium nu-  
mero pauci omnino superfuissent . Sub vesperum cepta pu-  
gna , circiter vnus horæ spatium habuit . arrepta dein fuga  
plenos vulnerum ac pauoris Mahometanos tenebræ simul ac  
sylvæ tutatæ sunt . Eorum equites cecidere centum & quin-  
quaginta : sexcenti pedites : è quinque præfectis , occisi tres .  
in ijs Celabatecan Turca , magna inter omnes auctoritate . è  
reliquis , alter duabus acceptis plagis ægre tandem euasit : al-  
ter incolumis , per densas cohortes incitato equo sibi viam a-  
peruit . E Lusitanis vnus tantum desideratus , Ioannes Carria-  
gius , Goanus ciuis , & Naires duo : vulnerati Lusitani qua-  
tuor , Naires haud amplius tres . Hæc omnia postmodum ad  
Ioannem Regem ipse perscripsit Prætor , idemque multiplici  
intra vertentem annum parta victoria , Goam urbem specie  
triumphantis inuectus est . Sub hæc , perhonorificum de re-  
bus ad Dium gestis decretum Regis allatum . ex eo cum alia  
fortibus




fortibus viris diuisa præmia; tum veteranis ad Bazainum agri assignati. Prætor ipse laudatus verbis amplissimis, & Proregis titulo decoratus est: eidem super honorarium stipendium, decem auri millia dono data, & in tres annos prorogatum imperium. Sed, quæ rerum humanarum vanitas est, Castrio non diu licuit uti honore ac beneficentia Regis. è magnis laboribus vigilijsque lenta correptus febris, gementibus bonis, intra paucos menses extinguitur, vir omnium consensu æque belli ac pacis artibus clarus. Huius ingenium & industriam varij per omnem ætatem casus exercuere. Olisipone, adolescens, ob clandestinum matrimonium eiectus à patre, in aliam partem vrbs migravit. ibi, quamquam in magnis rei domesticæ angustijs, cum Petro Nonnio eiusdem vicinitatis, illustri mathematico, familiaritatē inijt, multaq; ab eo per otium de rebus astronomicis, ac de nautica in primis arte cognouit. Ab ea commendatione, ipsomet insinuante Nonnio, in Ludouici principis amicitiam peruenit. Ioannis Regis frater germanus hic erat: idemque eximius bonarum artium patronus ac præses. Ab eo cum auxiliaribus copijs ductus in expeditionem Cæsaris Tunetanam, egregium sese virum & manu, & consilio præbuit. Inde cum Garzia Neronia in Indiam ab Rege missus; magnam sibi rerum Indicarum notitiam peperit: eamque litteris ingenti labore ac subtilitate explicauit. Ab Olisipone Goam vsque, singulorum dierum iter; locorum aspectus ac situm; altitudinem Solis ac poli, diligentissime persecutus est. Id ipsum rursus præstitit oram legens ab Goa Diu vsque, & ex partium dimensione, multis oppidis vicisque vocabula antiqua restituit. ij commentarij, Ludouico dicati, in Academia Eborensi (quam Henricus dein Cardinalis regali munificentia condidit) adseruantur. Exstant eiusdem Prætoris ad Ioannem Regem epistolæ: in quibus præter communis boni studium insigne, non vulgarem insuper tum militaris, tum politicæ rei scientiam facile animaduertas. Et, quod hæc omnia superat, vsque adeo pius perhibetur fuisse, uti quantalibet stipatus aut nobilium aut plebis frequentia; ad Crucis adspectum illico positus humi genibus, oculos in cælum cum attenta quadam veneratione defigeret. huic pietati non sine causa victorias vulgo acceptas ferebant; quas breui tempore,



## *Histor. Indic. Lib. XIII.*

tempore, parvisque copijs, non paucas neque obscuras de nominis Christiani hostibus reportavit: hoc etiam nomine felix, quod morienti Xaverius affuit, & in extremo illo certamine opem egregiam tulit. Castrio vita functo (annus tum agebatur seculi huius octauus & quadragesimus) successiones quas vocant, de more consultæ. prima Ioannem Mascareniam, cuius modo meminimus, nominabat. is, quod in Lusitaniam paulo ante redierat, solutus alter codicillus Prætorem declaravit Garziam Salam, grandi iam ætate virum, multisque in eadem prouincia honoribus domi pariter ac militiæ clarum. Huic, ritu solenni tradita extemplo gubernacula. Atque eo lætius fuit eius initium magistratus, quod per eos ipsos menses, è Dominicana quoque familia prædicatores in Indiam peruenere. Duodecim erant numero. Antistitem habebant Iacobum Bermudium Castellanum. Hisce, ac venturis deinceps fratribus, templum cœnobiumque Goæ magno rei Christianæ bono, & vrbis ornamento conditum est.

*Libri Tertijdecimi finis.*







# HISTORIARVM

## INDICARVM.

### LIBER XIII.



**S**U idem tempus quo hæc in India gerebantur, in vltimas quoque terras porta præter spem & expectationem ingens Euangelio patuit. Angerus erat in Iapone quidam, maritimo in oppido Cangoxima honesto loco natus, regni quod Saxumam appellant. Is, contracta cum Lusitanis institoribus amicitia, de religionis Christianæ mysterijs, ac simul de Xauerij sacerdotis vita rebusque quas gereret, multa ex ijs in familiari sermone percepit. inde paulatim, & veritatis, & Xauerij tanto studio est captus, vti ad eum inquirendum, vasto & ignoto sese mari absque vlla dubitatione crediderit. profectus ducibus Lusitanis ijsdem, post varios errores atque discrimina, Malacæ Xauerium (qui è Molucis Indiam repetens eadem in vrbe substiterat) summa sua cum animi voluptate conuenit. atque vt pater item de Iaponijs miræ quædam audierat, aduenarum congressu & aspectu valde lætatus, crebris deinde colloquijs varia ex ijsdem sciscitari non destitit. percommode ad singula respondebant: minimeque vulgaris



## *Historiarum Indicarum*

vulgaris inesse cunctis, ac præsertim Angero, tum indoles, tum humanitas visa. ergo Xauerius, vt primum Indica negotia transegisset, Iaponios (quod iam ante cogitarat) omnino adare constituit. Interea, quod Parauana & finitimæ Indorû Ecclesiæ erant illi ex itinere inspiciendæ; Angerum Goam via breuiore præmisit. Ioannem Beiram, Nannum Riberium, Nicolaum Nonnium socios Molucas petere iussit. Malacensis catechismi, quem negligi aut remitti nolebat, munus Vincen-  
tio Viegæ externo sacerdoti egregie probe concredidit. Mox ipse perquam difficili ac periculosa nauigatione Cocinum delatus, inde ad Cori promontorium Piscariosque traiecit fines. ac suis qui in ea regione curabant, Antonium Criminalẽ communi consensu præposuit: neophytos ad perseverantiam adhortatus est; oratoria recognouit; nec leuibz denuo signis atque miraculis Christianæ fidei veritatem ostendit. morbos depulit: dæmonia exegit: mortuos quin etiam reuocasse perhibetur; quod tamen vt postea fateretur ipse, quamquam gra-  
uissimorum hominum prece fatigatus, adduci non potuit. Hisce alijsque in ora Piscaria gestis rebus, ad urbem Goã summa ciuium gratulatione peruenit paulo antequam Prætor Cam-  
strius è vita discederet. huic animam agenti (vt supra signifi-  
catum est) affuit. Angerum vna cum famulis probe institu-  
tum, sacro intinxit latice, ac Paulum appellauit. famulorum alter Ioannes, alter Antonius nominati. ea, mensis Iaponicæ fuere libamina. simul, è socijs alios alio: Alphonsum Cyprianum genere Castellatum, in Diui Thomæ Coloniam; Gasparum Berzeum, ortum in Belgis, Armuziam destinauit. Goani collegij ac seminarij domesticæ disciplinæ consuluit. Indica suorum domicilia, dum abesset, Paulo Camerti cuncta subiecit. Interim vero, Iaponicam ad expeditionem, instante iam die, se ipse diligenter parabat. is vbi percrebuit rumor, pio-  
rum greges ad illum protinus lacrymabundi conueniunt. mo-  
nent, obsecrant, obtestantur, ne semet vltro tam ancipitem ac periculosam in aleam det; neu publicam rem, quæ ipsius vel in primis nitatur capite, eiusmodi consilijs tantum in discrimen adducat. Sane quam multa erant, quæ quamlibet ani-  
mosum hominem ac fortem, absterre à tali itinere possent: primum ipsa longinquitas. quippe leucas amplius mille tre-  
centas



centas distat à Goanis finibus terra Iaponia . dein , multis in regionibus , ac præsertim circa Somatram ac Sinas, mare à piratis infessum, itemque à Sinarum præfidijs , quæ sæpenumero in peregrinos omnes nullo discrimine tanquam in hostes inuadunt . idque tum erat extimescendum magis, quod Sinas inter & Lusitanos nondum essent plane reconciliata commercia, neque locus foret Sinarum ullus, quo Lusitanis ad contrahendum aperte descendere , aut ubi tuto commorari liceret . memorabantur etiam varijs locis insidiosa vada syrtesque , nondum ad plenum ijs cursibus exploratis . itemque Eoi pelagi natura, quod sæuum, & vastum, & vorticosum , totas haud raro naues absorbet . & super hæc, præcipuus nautarum terror, ecnephias typhon; suetus in ea vel maxime plaga furere: & ipsa cum oneribus vectoribusque nauigia, in asperum sæpe litus ac saxa torquere . Cum hæc & alia multa ad timorem proponerentur, satisque mirari se posse amici negarent , cur tanto rerum usu, tali sapientia vir, tantis periculis obijceret sponte sese, relictaque in vicino segete , cuius ipsemet sementem fecisset ; tam longinqua, tam operosa, tam incerti prouentus noualia peteret : Ast ego ( inquit ille ) satis mirari non possum, infinitam Dei vim pariter & clementiam quotidianis præconijs celebrare soliti, eidem nunc potentia ac bonitati, meo potissimum in capite diffidatis . Anne vos præterit, qui rerum omnium arbiter sit, huic animata æque atque inanima , prorsus ad nutum omnia deferuire? Testis haud semel vnda , quæ se se Domini ac famulorum postea gressibus, mutata illico natura, calcandam exhibuit . Testes venti ac procellæ, quæ perfusis vltimi exitij horrore discipulis, vno Christi imperio conciderunt . Testis inclytus ille Iob, in quem nihil omnino, nisi ex Domini voluntate, malo dæmoni licuisse comperimus . Testis denique ( ne in re aperta sim fusior ) veritas ipsa , quæ capitis nostri capillos omnes numeratos esse , ac ne vnum quidem ex ijs periturum , disertis verbis affirmat . ergo , sicuti Regum Ducumve internuncij ac præcones , regis duntaxat insignibus freti, per media castra, per instructas armatorum phalangas ac tormenta disposita, vadunt securi, & inermes; ita, diuinarum legum interpretes, gentiumque doctores, vna summi Regis tutela ac maiestate subnixi, per varia terre marisque



## *Historiarum Indicarum*

„ risque pericula, atque adeo per intentas vndiq; machinas ac  
„ mucrones, quocunque res postularit, intrepidi atque alacres  
„ penetrare non dubitant. At enim isti ipsi quos narras, in la-  
„ trones incidunt, laniantur à feris, naufragia faciunt: varijs im-  
„ plicantur morbis; æstu, frigore, fame, siti, rerum omnium e-  
„ gestate laborant; circumveniuntur consccleratorum insidijs,  
„ factionibus opprimuntur; tyrannorum iussu omnibus suppli-  
„ cijs excruciatī mactantur. Concedo: & quidem hisce itineri-  
„ bus olim Apostoli ac martyres ad sempiternam gloriam per-  
„ uenerunt. Sed idem contendo; hæc omnia ad illorū vel pro-  
„ bandam fidem, vel constantiam illustrandam, Diuina tantum  
„ dispensatione permitri. Nam alioqui refertæ historiæ sunt e-  
„ xemplis eorum, quibus esurientibus angeli ministrarint cibos,  
„ quorum leuandæ siti, purissimi subito fontes è terra emicue-  
„ rint; quibus, posita extemplo sæuitia, flatus ac tempestates ob-  
„ secundarint; quos, voracissimæ & in alios ferocissimæ belluæ,  
„ propalam blandiendo permulserint; quos vel exquisitissima  
„ lictorum carnificumque tormenta nil læserint; queis ferrum,  
„ equulei, virgæ, rotæ, flammæ pepercerint. Atque in eiusmodi  
„ certaminibus, tametsi non semper explorata victoria est, mul-  
„ ti que ac magni sæpe conatus in irritum cadunt; tamen diuinæ  
„ gloriæ & hominum saluti seruientem, fidenter omnia tentare,  
„ moliri, experiri par est. Ita ne vero? ad leuissimam incertam-  
„ que prædam, per densas acies, micantes gladios, & volitantia  
„ tela cæco impetu ruet miles; inanes honorum titulos, & spe-  
„ ciosa vocabula, nihil aut modicum duratura, ambitiosus per-  
„ summam indignitatem atq; miseriam, quotidianis obsequiis,  
„ adulatione seruili, valetudinis damno, patrimonij profusio-  
„ ne captabit; sordidarum mercium causa, quæq; duntaxat cor-  
„ pori seruiunt & vetustate facillime corrumpuntur, institor ac  
„ nauicularius, terra vnde ortum habet, relicta, veluti ruptis na-  
„ turæ foederibus, ventorum ac maris iræ sese permittet; obie-  
„ ctusque fluctibus ac piratis, ignotum orbem, peregrinarum  
„ auium instar, ignota semper littora pererrabit; nos, propa-  
„ gandæ religionis, amplificandi Christiani nominis, omni-  
„ potentis Dei demerendi, seruandi humani generis gratia;  
„ inopiam, ærumnas, incommoda, mortem denique recusabi-  
„ mus? præsertim cum illorū temporarios labores, ab improba  
„ plerunque



plerunque cupiditate profectos, mortemque vnam, altera saepe  
mors, & sempiterni labores, atque infiniti cruciatus excipiant;  
nostram industriam operamque, si in officio ac fide ad extre-  
mum usque perstemus, beatissima æternitas, immortales coro-  
næ, immensa præmia maneant. nihil ergo sit tanti, quo nostra  
de Deo, deque hominibus benemerendi studia retardentur.  
Nam quod Goanæ Ecclesiæ, viciniq; huiusce tractus, absente me,  
solitudinem pertimescitis; agnosco pietatem vestram. sed ne  
in hanc messem operæ defint, satis à me, ut in tanta nostro-  
rum paucitate, prouisum est. Paulum Camertem eximia carita-  
te virum, Goano collegio; Antonium Criminalem, insigni vir-  
tute pastorem, Ecclesiæ Parauanæ cum idoneis adiutoribus  
vtrumque præfecimus. Ad hæc, episcopum habetis in vrbe vi-  
gilantissimum; Franciscanos, Dominicanosque fratres, vestri  
amantissimos cupidissimosque: præter hosce, alii quoque su-  
binde sacerdotes è Lusitania superuenient. Vltimis, vltimis, in-  
quam, nationibus, ad quas læti salutis nuntij, nullo vnquã tem-  
pore allati sunt, rectus ad vitam æternam callis tandem aliquã-  
do monstrandus; ac teterrima demonum seruitute miserandum in  
modum oppressis; Christianæ liberatis cominus attollenda ve-  
xilla. Neque enim pro Lusitanis tantum, aut Canarinis, aut Pa-  
rauis, sed pro vniuerso hominum genere, quot quot vbique sunt,  
fuere, futuri sunt, redemptor idem & conditor I E S V S vitam ac  
sanguinem in Cruce profudit. quibus miserrima captiuitate detē-  
tis, cum in idipsum à præpotenti Deo vocatus destinatusq; sis, non  
omni ratione consuluisse, neq; per inuia quauis & aspera sacrum  
Euangelium pertulisse; extremæ non modo ignauie, sed etiã perfidie  
crimen esse quis ambigat? Proinde facestant querelæ, absint com-  
plorationes, singultus ac suspiria fileant. quin potius, uti Chri-  
stianos, & Dei hominumque amantes decet, meam hanc expē-  
ditionem, faustis, ut ita dicam, omnibus, & studio incensis apud  
Deum suffragationibus prosequimini. Hisce dictis leuato ut-  
cunque mœrore, conscendit nauim Aprili mense, anno post  
Christum natum MDXLIX. Comites habuit è societate Cos-  
mum Turrianum, & Ioannem Fernandum Hispanos: de exter-  
nis, Paulum famulosque Iaponios. Cocinum ab Goa primum,  
inde Malacam exeunte Maio venere. Hic patri quo intende-  
rat pergere cupienti, nauis Lusitanorum nulla sese obtulit. Tun-



## *Historiarum Indicarum*

cus erat Sinarum in Malacensi portu, & quidem piratica infamis, vulgo latronis iuncum appellabant. Cum hoc ipso latrone Xauerus (tanta inerat eius menti fiducia diuinæ tutelæ, tantus ardor liberandi ab dæmonum seruitute Iaponios) certa mercede paciscitur, vti relictis ad læuam Sinis; ipsum & comites in Iaponem extemplo perducatur. soluere viij. Kalen. Iulias, ipso Diui Ioannis Baptistæ die natali. Post multa nauigationis incommoda, & nautarum fraudes, Cangoximam, Angeri, vti dictum est, patriam attigere xvij. Kal. Septembris, qui dies Assumptæ in cœlum Deiparæ Virgini sacer est. Xauerus à Pauli propinquis atque domesticis amanter exceptus, vixdum recreatis à maritima iactatione comitibus, ad Christianam rem animum adiecit. linguæ primum Iaponicæ rudimentis ad instar pueruli summo studio ac sedulitate institit operam dare. in præcipuis dein fidei Christianæ capitibus conuertendis, quamquam enixe adiuuante Paulo, tamen ob rei difficultatem, & mysteriorum altitudinem, & linguarum inscientiam, complures dies ingenti labore miseriâque desudatum est. postremo, ijs in codicem vtcunque relatis, ex eo codice Xauerus balbutire ad populum vna cum sociis cepit. magni extemplo concursus ad eos facti. atque, vt procacia & acuta sunt Iaponiorum ingenia, ridere alii solâcos barbariemque; alii, quid ea lectione significaretur, ambigere; alii peregrinum habitum cultumque demirari; alii etiam, communis consuetudinis ac morum ignaros, probris & caullis petulanter incesse. nec deerant, qui eiusmodi ludibria detestati, miserarentur innoxios; nec spernendum vtique genus hominum interpretarentur esse, qui tam remotis è regionibus, docendi tantum gratia, periculo maximo, nulla mercede venissent. Xauerus interea sociique nihil de studio & contentione remittere. ad hæc, normam eam tenere viuendi, tamque illustria sobrietatis, patientiæ, mansuetudinis, omniumque virtutum exempla præbere; vti veram ac salutarem doctrinam afferre se, factis moribusque multo magis, quàm dictis aut scriptis ostenderent. Inde haud leuiter commoueri ciuitas cœpta; nostrisque non ad magistratus modo, sed etiam ad Regem qui tum extra oppidum agebat, Paulo præsertim adnitente, facile patuit aditus. Cômmercium is Lusitanorum auide iam dudum expetebat, quos  
ad



ad vicina emporia cum pretiosis oneribus cōmeare didicerat. apud eos quod plurimum gratia & auctoritate Xauerium valere Paulus & famuli testarētur; valde sese illi comem & humanū initio prābuit. quin etiam prolatam à Paulo, Christi & Sanctissimæ Virginis matris imaginem veneratus, idipsum fieri ab omnibus qui aderant, imperavit: ac prædicandi Euangelij, & baptizandæ ritu Christiano gentis potestatem haud grauate concessit, eaque de re, publica edicta proposuit. Ac Bonzj etiam (quo de hominum genere supra demonstratum est) superstitionum Iaponicarum antistites, vel nouitatis gratia capti, vel suis opibus ac maiestate confisi: cum nihil ab ignotis præsertim externisque sibi metuerent, fauere tum quidem Xauerio videbantur. ergo Christiana paulatim sacra in urbem inducta. Pauli primum vxor & filia, tum propinqui & amici complures, eodem Paulo dies noctesque hortante, monente, docente, ad baptismum adducti. hosce deinceps alij subsequuti; quibus ad virtutem ac pietatem excolendis, operam Xauerius in primis impendebat assiduam. Decretum erat illi, simulatque aliquem eius lingue vsum nactus foret, Iaponis caput Meacum adire; & quo expeditior ad cæteros prædicatio esset, Regi primum ipsi vel Imperatori, quem vniuerso Iaponi præesse audierat, Euangelium afferre: sed Regis præcipue Cangoximani promissis ac precibus, & oblata rei bene gerendæ spe, diutius quam cogitarat in eadem urbe detentus est. Inter hæc, negotiatores Lusitani cum mercibus Firandum regni Figenfis appulerant. id vbi Cangoxime cognitum est, periniquo tulit animo Rex, vicinos dynastas insperatis augeri opibus, at se diuturna lucri aduentitij expectatione frustrari. Ex eo tempore sensim auersari Xauerium cæpit, & ab ipsius doctrina præceptisque refugere. Bonzj quoque, posteaquam Christianis institutis vitia sua reprehendi; Euangelij luce mendacia prodi, sanctissimis decretis conuelli nefaria dogmata; denique discipulos & sectatores ab se auocari animaduenterunt; immutata subito voluntate, Xauerium execrari, fictis criminibus ipsum & socios in inuidiam adducere; publice priuatimque maledictis lacerare atque poscindere; offensum iam Regis animum nouis in dies facibus instigare. neque ab incepto



## *Historiarum Indicarum*

desistere; quoad reuocato priore edicto, rursus poena capitā-  
li sancitum est, nequis omnino, relictis patrijs auitisque noua  
& peregrina sacra susciperet. Xauerus, æquitate animi ac  
summissione furentes lenire nequicquam conatus, multa-  
& graua perpeffus incommoda, Meacum quo pridem inten-  
derat, abire decreuit. Christianorum numerus in vrbe Can-  
goxima ad centum ferme peruenerat. Paruulum eum gregem,  
Paulo commendat. ipse, vertente anno, mœrentibus lugen-  
tibusque neophytis, & gratias immortales agentibus optimo  
patri, Firandum ad Lusitanos cum Cosmo Turriano & Ioan-  
ne Fernando progreditur. ibi vero, cum à Lusitanis ipsis in-  
genti gratulatione, tum in eorum gratiam ab Regulo perho-  
norifice acceptus est; &, quod optabat vnum, illico facta le-  
gis Euangelicæ promulgandæ potestas. iam linguæ paulo ma-  
iorem notitiam noui præcones erant nati. ergo, partim di-  
cendo, partim alijs, alijsque, prout res postulabat, periochis  
è codice recitandis, & super hæc, in oculis omnium innocen-  
ter & caste viuendo; plures paucis diebus Firandi, quam to-  
to anno Cangoximæ ad Christum adiungere. ijs Cosmi Tur-  
riani curæ fideique concreditis, Xauerus cum Fernando  
Meacum petens, circa Octobris initium, sauiente iam hye-  
me, Amangutium, leucas fere centum à Firando processit. ea-  
tum erat vrbs perampla (nam aliquoties dein ferro & flam-  
mis euerfa est) in Iaponis ferme umbilico sita, ac Regem ha-  
bebat longe lateque imperantem. Adeum Xauerus accitus  
Fernando comite accesfit. ille de vno cœli terræque condi-  
tore, de lapsu angelorum hominumque, de Redemptore ge-  
neris humani I E S V Christo Dei filio, de sempiternis penis  
& premijs, ex eo quem dixi libro multa expromenti Fernan-  
do, vnius horæ spatio mirum in modum attentas aures præ-  
buit: dein; vt sine honore, ita sine iniuria vtrunque dimisit.  
eadem ferme nostri quotidie bis ad circumfusam multitudi-  
nem per vicos & compita prædicabant, obsoleto ac peregri-  
no vestitu, nulla pompa vel apparatu verborum. Nihil initio  
tam nouum aut absurdum ad Amangutianorum aures oculos-  
que accidere potuit. ergo, non plebis tantum insanæ, sed e-  
tiam nobilium infesto clamore, sibilisque & cachinnis explo-  
si; & omni petulantia genere vexati sunt nullo prorsus opere  
pretio



pretio. Hæc per eos dies Amangutij gesta. Meacum inde a-  
beuntes, duorum fere mensium iter excepit difficile & aspe-  
rum, a latronibus atque piratis infessum; niue geluque, syl-  
uis ac saltibus; ad hæc, interueniente pelago vel æstuarijs im-  
peditum. Id iter ingressi humano præsidio nullo, difficile di-  
ctu est quam grauius, quam acerba ignotis regionibus terra ma-  
rique pertulerint, pedites ambulabant, & quidem in humeros  
elata sarcinula. in manicas oryza semitostæ indiderant bo-  
los (auelam vulgus appellat) eo cibo famem, aqua profluen-  
te sitim leuabant. Ignari viarum, & simul quo latronum in-  
sidias effugerent, indigenas equites citato gradu, nunquam  
talari deposita veste persequerentur excalceati, quod eo an-  
ni tempore torrentes amnesque occurrerent vado superandi  
non pauci. itaque partim antecedentium festinatione, pa-  
tim etiam assidua sarcinæ vectatione lassæ, ad hæc lubrica plerun-  
que via incerto ac fallente vestigio corruerant, pedibus inte-  
rim glaciei & algoris iniuria miserandum in modum intume-  
scentibus: ac noctu demum imbre perfusi, fame & algore con-  
fecti, sicubi tecto saltem agresti reciperentur, alia hospitalita-  
te nulla; præclare videlicet secum agi putabant. Nam in pa-  
gis quidem & oppidis, præter cætera vulgi ludibria, interdum  
etiam lapidibus petebantur. at vbi transmittendum esset ma-  
re, vix atque ægre tandem in naues admissi, pecudum instar in  
ipsam pene sentinam detrudi consueuerant. Per eiusmodi ve-  
xationes atque miseras cum ad urbem denique Meacum so-  
spites haud sine miraculo peruenissent; minime idoneum sa-  
tioni Euangelicæ tempus, cuncta bello flagrantia, surdas ad sa-  
lutaria monita & obstructas incolarum aures offendunt. Ad  
ipsum vero Imperatorem, quamquam adhibita diligentia co-  
natuque, adspirare non licuit. ergo, terræ natura, gentisque  
moribus in præsentia utcumque exploratis, per easdem diffi-  
cultates, iisdem itineribus, eodem ferme spatio temporis, A-  
mangutium reuertuntur. ibi, quod sese haud iniquum illis an-  
te præbuerat Rex, certum erat fixumque Xauerio, terram eam  
rursus omni arte moliri, curaque & labore, quoad eius fieri  
posset, sterilitatem soli maciemque peruincere. & quoniam  
experiendo cognorat, Iaponios, Bonziorum furore & ostensa  
sationi assuetos, plurimum externa moueri specie, & animi bona



## *Historiarum Indicarum*

ferme corporis habitu cultuque metiri; ad eorum mores, quantum sine peccato liceret, in praesentia conformare se se; & Christi causa non nihil ad illorum salutem extrinsecus mutuari in animum induxit. ergo, priusquam ad opus aggredieretur, Firandum accurrit. ibi, Lusitani Regis impensa videlicet, augustioribus vestimentis induitur; commendatitias ad Iaponios Reges litteras, quas ab India Praetore & Goano Episcopo sibi traditas, interim ibi reliquerat, sumit, nec non a Malacensi Praefecto munera Iaponijs ante id tempus ignota. In iis erat Lusitana vestis, vinumque pranobile; musica sambuca, & horologium ex iis, quae inaequali ponderum examine, plurimumque rotarum denticulis inter sese implicatis, lento motu ac perpetuo, temporum interualla distinguunt: quam Europae solertiae machinam gentes illae sine fine mirantur. Hisce rebus iniumenta impositis; ipse, praeter Ioannem Fernandum duobus tribusve Iaponiis comitatus, Amangutium redit: litteras & munera offert Regi: quibus ille magnopere delectatus, ac simul comitum numero admonitus, & noui habitus dignitate; caput cum consiliariis contulit, iisdemque approbantibus, maiore deinceps in honore Xauerium habuit. ac primum, auri argentiue non leui pondere munificentiam aduenae remunerari contendit: quae cum Xauerius obfirmato consilio cuncta reiecisset; altitudinem animi suspiciens Rex, vacuas Bonziorum aedes illi ad habitandum adsignat: dein publica per vicos edicta proponit, placere sibi, non Amangutij modo, verum etiam omnibus suae ditionis finibus regnisque, vnius Dei legem ac religionem declarari palam; eamque cuiuslibet amplecti liberum esse: legis eius ac religionis interpretes nulla ratione laedi, vel impediri. sub hac, Euangelici praedicones ad instituta munia quam acerrimo studio retulere sese. interdum, in areis triuivis conciones habebant; noctu, confluentibus ad se omnium ordinum, aetatum, sexus vtriusque mortalibus, aures ac responsa praebant. erat autem tanta frequentia celebritasque, vti coetum aedes ipsae non caperent: alij, quae in publico inaudissent; priuatim ac per otium auere nosse: alij etiam, animi causa, incomptam ac rudem peregrinorum atque hospitem irritare linguam, & cum effuso adstantium

cachinno



Cachinno de industria disputationem extrahere: alij, denique variis interrogationibus etiam atque etiam fatigare doctores novos. Huic tantæ curiositati cum ab Dei seruis, partim ex vetere historia, partim è physica ratione, partim è Theologorum decretis atque responsis identidem satisfaceret; illi, voluptatum illecebris irretiti videlicet, in stultitiæ tenebris, & cœno flagitiorum nihilominus hærebant. neque tamen idcirco Xauerus despondere animum: quin potius omnè in partem versare semet, captisque acriter ac perseueranter instare. Cum aliquot iam menses crudum aridumque nouale tractasset, ac, nullodum fructu, diuini verbi semina proiecisset; tandem è proscisso ac sæpius iterato solo, Christianæ fidei germen emicuit. Germinis eius origo fuit eiusmodi. Concionanti, vt solebat, in publica via Fernando, præteriens è plebe nescio quis, attracta præpingui saliuâ, repente in mediam inspuat faciem. ille, sine perturbatione vlla sputum linteolo abstergit: ac ne verbo quidem reddito, ceptam orationem eodem prorsus tenore vultuque proseguitur. id contemplatus ex auditoribus quidam haud imperitus rerum estimator (ex quo facile intelligas, ad permouendos ad virtutem animos, facta dictis quanto antecellant) cepit cogitare apud se; profecto nobilissimum atque adeo diuinum philosophiæ genus esse, quod homines ad tantam æquitatem animi constantiamque perduceret. dimissa dein concione, domum ad Fernandum venit; præcipua Christianæ fidei capita legesque probe cognoscit: postremo, certis precationibus, Mosisque decalogo, ac symbolo Apostolorum è catechismi formula memoriter haustis, Amangutianorum omnium primus, antea-ctæ vitæ detestatus peccata, sacro fonte renascitur. Hunc alij deinceps diuino impulsu imitati, quorum ad quingentos breui peruenit numerus; & quidè ita in proposito firmi stabilesque; vt per varias deinde clades, & bellica infortunia, & nefarias Bonziorum cōspiraciones, magistris ac pastoribus haud semel orbati, suis tamè ipsi moribus ac vitæ ratione, Christianā fidem & disciplinā in hoc vsque tēpus religiose coluerint. inter quæ circumactō iā āno, Lusitanorum alia naus portū Būgi tenuerat, quo nomine regnū Amāgutio distat leucas circiter quadraginta. ab iis de statu rerum Indicarum Xauerus cum litteras accepisset,



## *Historiarum Indicarum*

cepisset, cum alias ob causas eam sibi prouinciam repetendam existimabat; tum vero, uti rursus inde quocunque opus foret, supplementum è noua copia mitteret. simul, quoniam apud omnes circa nationes magnum nomen Sinarum, magnam auctoritatem compererat esse: primo quoque tempore Sinas ipsos Euangelij gratia adire cogitabat, haud absurda ratione cōiectans, si gentem illam Christo lucratus foret; eius lucri accessionem facili negotio postmodum vniuersos fore Iaponios.

§ Hæc eo moliente, cæteri quoque dispersi per Indiam socij minime segniter in suo quisque munere versabantur. Egregia in primis fuit opera Gasparis Berzei, quem Armuziam à Goa profectum, paulo ante docuimus. Is in Zelandia, seu Mattiacis Belgici Oceani populis, oppido Goufa, Francisco & Agnete parentibus, obscuro natus loco, à primis pueritiæ rudimentis Louanium ad studia grauiora se contulit. Inde per varios casus cum in Lusitaniam deuenisset, in societatem adscitus, ac diu multumque probatus, in expeditionem Indicam vna cum aliis octo deligitur. Conimbrica profectus Olisiponem anno seculi huius quadragesimo octauo, nauem Ioannis Mendozæ conscendit. socij adiuncti quatuor: totidem cum Antonio Gomezio in aliam nauem impositi. Ac primum omnium, à nauarcho eblanditus est Gaspar, uti quotidie publice tum ad plebem erudiendam catechismum exerceri, tum ad propitiandum cœleste numen catholico ritu litanias adhiberi permitteret. Mox ad vitia tollenda corrigendosque hominum mores paulatim aggressus est: rem in primis arduam atque difficilem. præter naualem quippe turbam, colluuiemque seruilem, epibata circiter quadringenti numerabantur, plerique scortis, aleæ, rixis, calumnijs adsueta. Ad horum sananda ingenia, Gaspar, exemplo priusquam verbo opus esse ratus, cunctis, uti æquum erat, ad omnem virtutem & caritatem præluere perrexit. Neque sane ampla defuit illi de Deo pariter ac de hominibus benemerendi materies. primum socij eius è maritima iactatione & nausea in morbum incidere. ijs dum accurate ministrat, & propalam coqui munere fungitur, ita despiciabilis initio visus, uti paranti ad focum cibos ac saragenti, procaces circum pueri, præter cæteras contumelias, appositam quoque ollam aut furto subducerent, aut per lasciuiam frangerent:



gerent: quidam etiam ab innocente vix colaphos pugnosque abstinerent. perspecta dein patientia & grauitate viri, paulatim contemptus in verecundiâ vertit: nec defuere, qui laboranti, per se perque suos opportune succurrerent. simul etiam sociis melius caput esse. operam ergo iis adiutoribus, ad verbum Dei prædicandum, prohibenda flagitia, curandos ægrotos, vetere iam societatis instituto, conuertit. ex quo, mirum dictu, quanta quam breui omnium vitæ mutatio consequuta sit. bene moratam institutamque familiam; non promiscuam seruorum, nautarum, militum, institorum turbam, contineri marino illo domicilio diceres. Primus ferme Præfectus Mendoza, Gasparis consuetudine & admiratione sese collegit: piisque priuatim exercitationibus ab eodem excultus, vltro deinde cum aliis quoque opportuna de Christo deque cœlestibus rebus habere colloquia; suos primum familiares, tum cæteros in officio continere; egenos & imbecilles quotidianis eleemosynis alere. Præfecti virtutem ac beneficentiam reliqui deinceps pro sua parte imitati: vnus etiam haud infimæ sortis negociator, Christianæ caritatis pulchritudine ac specie captus, contempta rerum humanarum inconstantia & vanitate, sese ad Gasparis ductum ac vitæ rationes applicuit. Inter eiusmodi occupationes Guineæ malacia primum, dein fauissimis procellis duabus circa Bonæ spei promontorium superatis, nemine (quod perrarum est) tantis incommodis, tantaque morborum lue prorsus amisso, ad Mosambicum nauis appellitur. Ibi optatissima dierum quindecim capta quies; terrestribus etiam diuersorijs è maritima iactatione resecti plerique. Gaspari tantum ac sociis, de aliorum magis quam de sua incolumitate sollicitis, integratus labor. lauta illis inquilinorum hospitia minime deerant; ac multi, vt iis ad valetudinem tuendam vterentur, instabant; sed Gaspar, Xauerij æmulator egregius, deportatis in publicum nosocomium ægrotis, eodem ipse quoque successit: ac refouendis eorum corporibus animisque (cum ad centum & viginti decumberent) pari cura ac diligentia totum sese rursus impendit. Per id ipsum tempus alia eiusdem classis naui, fratres Dominicani duo Mosambicum delati. horum quoque, in eo valetudinario, magna cum omnium approbatione caritas



## *Historiarum Indicarum*

tas ac virtus enituit. Goam deinde peruentum. Ibi Gaspar, nouo impetu capto, in omnes partes Christianæ adiuuandæ rei animum ac vires intendit. varijs quotidie locis ad multitudinem; in ipso Prætorio ad selectam nobilitatem procereſque verba faciebat: quanto cum fructu motuque, è noua emendatione morum, è voluntarijs diuitum ac delicatorem pœnis, è plurima peccatorum confessione, è frequenti restitutione pecuniarum apparuit. disputationes etiam de religione cum Brachmanis habebat interdum. Ex ijs primarius quidam saepe conuictus; denique cum vxore & sororis filio baptismum expetiit. Is baptismus octo ipsos dies tinnitu festo, symphonia, choreis, ingenti omnium ordinum studio celebratus: viæ vrbs, vario peristromate, ac virenti palma elegantem in modum ornatæ: neophyti magna tum Christianorum, tum etiam Brachmanarum frequētia in equis ad templum ducti; ibi ex aqua baptismatis, ab Episcopo ac Prætorē, honoris causa rite suscepti. Marito, Lucæ Salæ; vxori, Elisabethæ nomen impositum: adolescens Antonius appellatus. in hanc deinde familiam, ad ceteros ad Christum inuitandos, Prætor ipse, quod ita Lusitanum Regem velle non ignoraret, alia quoque propalam ornamenta & beneficia contulit. Hæc & eiusmodi multa Goæ Gaspar omni ope curabat. A Xauerio dein missus, vti dicebamus, Armuziam; in ipsa primum nauigatione pristinam cunctos adiuuandi consuetudinem tenuit: eaque re ipsa commotos è vectoribus aliquot Christianos fecit. Mascatum Arabiæ felicitis delatus; Europæos exsules, vel decoctores, qui tamquam ad asylum in ea perfugerant loca, quoad fas tulit, expiare, atque ad fidem officiumque reuocare conatus est. A Mascato prouectus Armuziam; in ipso portu, officij causa obuios habuit Proepiscopum, & sacerdotes ab ijs cum honesto comitatu ad arcis Lusitanæ præfectum deducitur. ibi cum inter se præfectus, & Proepiscopus de hospitalitate certarent; & Gasparem apud se retinere admodum cuperent; ille, gratijs vtrique actis, ad publicum videlicet nosocomium de more diuertit; eam velut sedem belli contra Sactanam & vitiorum monstra capturus. Hic, è Xauerij præceptis, quæ assidue cogitabat, suum ante omnia pectus acri custodia sepsit ac munijt. simul, optimatum voluntates sibi conciliare



ciliare agressus, breui perfecit humanitate, submissione, prudentia, vt omnium nemo illis acceptior esset, aut carior. Per hos maxime, de statu emporij, & generibus negotiorum, & moribus hominum diligenter cognouit. Deliberanti dein apud se, qua potissimum ex parte oppugnaret sceleris & nequitiae munimenta; arcem ipsam protinus aggredi visum est. ea ferme contemptu sacrorum, inscitia diuini pariter humaniq; iuris, & alta quadam futuri seculi obliuione constabat. nec mirum. multos quippe annos Christiani conuenæ & inquilini, magistris, ac monitoribus, parochisque caruerant: & qui nuper aduenerant clerici, quæ tum erant tempora, pecuniarum haud paulo magis quam animarum inhiabant lucris. ergo passim enata virgulta vepresque, omnem ab infelici tellure benigni syderis radium ac lumen arcebant. hinc teterrimarum, cæremoniarum, errorumque colluies; artes magicæ; diuinitio; sortes, concubitus incesti ac vagi; quodque haud minus detestere, fidelium cum infidelibus, Iudæis, Turcis, Arabibus infanda connubia, vt Christiana proles à matribus educata (proh nefas) in Mahometanos, & Hebraicos, & aliarum gentium ritus moresque transfirent. eam consuetudinem, Gaspar, admirabili spiritus vehementia, crebris concionibus, ac terribili cælestium irarum denunciatione discussit. Et auxerat opportune pauorem auditorum atque formidinem, terra per eos forte dies horrendis motibus intremiscens. Præterea Gaspar, ad sinceritatem fidei reuocandam, & prauæ religionis procul habenda contagia, nullo non die statis horis è Xauerij formula publice catechismum habebat. id vero in omnes partes vnice profuir. puerilis ætas, infima plebs, sexus vtriusque mancipia, Christianis præceptionibus ac mysterijs erudita. simul etiam quotidianæ singulorum vitæ custodes adhibiti, qui ad Gasparem cuncta deferrent: propositisque præmiis ac pœnis, pudici paulatim ac probi mores in vulgus inducti. eadem illa rudimenta legesque, serui mox heris, filij parentibus, fideles pueri equalibus Mahometanis, aliisque priuatim edebant; eosque omni arte ad Christum allicere nitentur. ac demum, sublati ibi quoque prophanis & lasciuicantionibus, castissimo versu ac salutaribus monitis dies ac noctes omnia personabant. Ita, religionis integritati,



## *Historiarum Indicarum*

gritati, non in præsens modo, sed in posterum quoque magna ex parte consultum. Erant præterea qui ferrum, & sulphur, vetitasque merces alias, Turcis ac Mahometanis inferrent, quod Pontificias diras, contra id facinus in cœna Domini cum horrendo carmine fundi solitas, vel proterve contemnerent, vel penitus ignorarent. docti quanto id piaculo fieret, à quæstu sacrilego destitire non pauci, & pro ea potestate quam habebat Gaspar, in gratiam cum Ecclesia restituti. Ab hisce victorijs, Christi miles, teterrimam aliam generis humani pestem aggreditur, avaritiam, & scœnebre malum: quo in genere tanta erat nonnullorum impudentia (qui se Christianos ferebant) vt aureorum vix decem iteratis per annum vsuris, integra semper sorte, seque familiamque turpiter alerent. ad hæc tollenda scelera, Gaspar, de avaritiæ peccato disputationes instituit ea subtilitate doctrinæ, tam veris grauibisque sententijs, tam incensis amore diuino verborum fulminibus, vt hoc etiam dæmonis castellum pæne à fundamentis frequenti verberatione conuulserit. Id, graui multorum pœnitentia, & euidenti morum ac vitæ mutatione declaratum est; qui prima luce, ne salutato quidem Deo, ad argentarias tabernas protinus itare adsueta, atque ibi nullo recti prauique discrimine res contrahere, pecunias huc illucque traicere, scœnus augere; iam, intima religione tacti, domo templum recta, inde forum adibant. ibi, stupentibus alienigenis pariter incolisque, tamquam in academia, de iure mutui, de legibus permutationum, de Christiani mercatoris officio, è Gasparis potissimum præceptis ac traditione quærebant. Neque labijs duntaxat ac vultu sese philosophia continuit. ad rem atque ad facta peruenit: & inexorabilibus ad eam diem claustris obseratas aperuit arcas. Igitur ex male parto restitutiones vel in duplum iustis dominis, aut, vbi ij non apparerent, in pios vsus; & super hæc eleemosynæ factæ cœmplures, atque ex iis, auri argenti que redactum, quod magno puellarum numero collocando, nosocomij laxandis angustijs, & multorum inopiæ leuandæ sat esset. opulenti præterea negotiatores, gehennæ metu perculsi, vltro suas omnes rationes ad Gasparis arbitrium contulere, parati, quicquid ab se fraudatum fuisset, non pecunia tantum, sed etiam, vbi satis

ea



ea non esset, corporibus luere. Per hunc modum, fraudibus, & rapinis obuiam itum est. Ingens præterea, ut in celeberrimo portu, amplisque diuitijs, erat Armuziæ luxus. ea quoque Satanae opera Gaspar aggressus, multorum excusit delicias, multos à scortis atque à nefario pellicatu diuulsit. inde ad lites dirimendas tollendasque inimicitias adiecit animum: monitisque & auctoritate viros aliquot honestos adduxit, uti datis inter se dextris, & venia offensionum petita, publice ad ipsas templi valuas, magna populi frequentia, in gratiam optimo exemplo redirent. Non eundem cum sicarijs (quorum erat ibi summa licentia) successum habuit res: Gasparis dicta palam aspernabantur, negantes, futura damna lucrare sibi esse tanti, ut præsentem fructum ac dulcedinem ultionis amitterent. Hoc perditorum hominum genus, itemque blasphemum, & seditiosum, & grassatores, egit cum Lusitano præfecto Gaspar, ut oppido pellerentur; sed propter multitudinem impetrari non potuit. Crescebat interim occupationum moles. quippe non vnius nationis alteriusve salutem Gaspar complexus erat animo, sed omnium prorsus, quotquot in eadem insula versarentur. quo pluribus ergo sufficeret, spatia temporis certa ratione dispensare coactus est. Dominicam feriam, itemque tertiam, quartam, & quintam, populo Christiano: secundam ethnicis, sextam Mahometanis; sabbatum Hebræis (quos harum quæque secta festos obseruabat dies) attribuit. Christianis, quod eorum potissimum gratia missus in ea loca fuisset, idcirco longe plurimum operæ tribuendum putabat. igitur & ægrotis in nosocomio, quoad liceret, sedulus aderat; & custodias adibat frequenter; catechesim vero itemque conciones, vel feruentissimo solis ardore (cum intra tectorum umbras immergi aquis incolæ sedent) habere pergebat tanto omnium ordinum ætatumque concursu, loca certatim occupantium, uti pæne ante lucem templum auditoribus oppleretur. accedebat domestica & quotidiana consuetudo multorum; ut, quod è superiore incassum egerat loco, priuatis colloquijs, & familiari conuictu ad exitum haud raro perduceret. Multo vero maximam temporis partem eximebat pœnitentiæ sacramentum, cui Gaspar non interdum solum instabat, sed etiam noctu: atque ita distinebatur interdum, uti ad necessariam corporis



## *Historiarum Indicarum*

corporis quietem, quantovis adhibito conatu, spatium horæ vix vnus eriperet. Auxit eam occupationem, publice per eos dies accepta clades. Munitum & opportunum castellum erat in Perfidis continente, Monaianum, Armuzianæ ditionis. id hosti repente proditum est. eo vehementius tum Regis, tum popularium animos inopinata res perculit. missus extemplo recuperandi causa Mahometanus præfectus cum quinque milibus Perficæ iuuentutis, additi ex fœdere, Lusitani circiter quadringenti. Pantaleon Sala præerat. Hosce, Gaspar, antequam ad bellum exirent, Christiano ritu ad confessionem conatus adducere, viginti vix persuasit, apud cæteros inania fuere monita: flagitijs non minus quam armis operti ad castra tendebant. Venienti dein ad se Pantaleoni salutandi causa, vereri se admodum dixit, ne graues neglecti numinis pœnas Lusitani propediem darent. Præfensioni respondit exitus. quippe, vt in statua peruentum est, tetra Lusitanam cohortem inuasit lethargi lues. breui periere ad quinquaginta. vulnerati præterea ab hoste circiter centum. inde cum alij deinceps atque alij caderent, ac veluti pecora passim inhumati iacerent; consternata fœdo spectaculo reliqua cohors, & ex conscientia delictorum, sempiterni exitij metu perterrita; conuulsis repente signis ægre Armuziam repetunt; Gasparem vnus omnes requirunt; vti se à peccatis absoluat, ac resipiscens exaudiat, obtestantur. Nec mora; in valetudinarium admissi, & in lectulis collocati plerique. Tum renouato ad omnem laborem conatu Gaspar in corporum simul & animorum curationem totus incumbere. acciti extemplo medici adiutoresque. Sacerdotes etiam aduocabantur; sed vulgo negarunt milites, vlli omnino se se, nisi Gaspari, arcana sui pectoris velle committere. quocirca ita distringebatur, vti vno eodemque tempore, huic peccata expromenti; aures: illi animam agenti, voces & hortamenta præberet. Cecidit perincommode, quod vi morbi emotis mente nonnullis, ad confessionem peragendam neque ratio, neque sermo constaret. in ijs quidam cum ferrum in se se repente strinxisset; clamore & concursu retentus, extorto gladio, in Gasparis fauces inuasit manibus: ac minimum abfuit, quin spiritu intercluso prefocaret insontem. per vim auulsus, paulo post exspirauit. in-

stinctu



finem mali dæmonis in eam rabiem actus creditur, tantam à Dei famulo sibi quotidie prædam eripi non ferentis. Inter hæc, sollicito Rege populoque, quod extraheretur bellum, & amissi castelli obsidio male procederet; supplicationes ad Beatæ Virginis ædiculam duo fere millia passuum ab vrbe, Gaspar indixit. insigni pietate concepta excalceati non semel ierre quamplurimi, cælestem opem ac pacem consono clamore poscentes. haud in irritum fusa obsecratio. Monaianum, vi & armis ad eam diem frustra oppugnatum; conditionibus demum, ac subita voluntatum inclinatione receptum est. ea res præter spem nuntiata, ingentem Gaspari apud omnes gratiam & gloriam peperit. eximia viri sanctimonix felix tribuebatur euentus. Accessere ad nominis celebritatem ac famam, in alio genere nonnulla miracula. Lusitanus erat prædiues, mammonæ laqueis valde irretitus. is Gasparem salutaria dantem monita, identidem respuebat, hoc etiam nomine infensus patri, quod suum negotiandi ac viuendi genus (vt est suspicax male conscia mens) publicis ab eo concionibus proprie perstringi putaret. cum huius pertinacia Gaspar interim officii & caritate certabat. ac plurima nequicquam expertus, ad extremum magis magisque pro illo se macerat, preces & obsecrationes instaurat, nouissima demum hæc remedia valere. propitiati Domini in obstinatum indulgentia singularis apparuit: quippe sera iam nocte, secundum quietem Lusitanus præsentem sibi videre visus est sacerdotem, pulcherrima forma conspicuum, suauissimo quodam odore fragrantem. tum alter adstans iacenti nescio quis, amica voce; quid, inquit, dubitas, cælesti huic medico, animi tui latebras & vlcera patefacere? nonne cernis quantus oris decor, quanta & quam augusta corporis totius habitusque dignitas sit? Hisce dictis erecto mirum in modum homini, & experiendi causa manus ad tactum admoventi, apparere Gaspar è vestigio desinit. eam scilicet frustrationem Lusitanus ægre admodum ferre. Tum alter ille, tristem ac mœrentem bono animo iubet esse, certam desiderati sacerdotis in proximo spondet copiam. quippe, vbi diluxerit, in regionisocomio publice sacris operaturum. hæc effatus, item euauit. Admiranda semini virtus fuit. lapideum viri pectus emoluit; vim lacrymarum expressit. madentibus



## *Historiarum Indicarum*

bus inde oculis ac genis euigilans, Gasparem è valetudinario precibus infimis domum accersit; perque summam obseruantiam, ac mistum gratulationi pudorem accepto, actæ ad eam diem vitæ, quantum reperere potuit memorando, noxas edisserit: eidem seque & sua cuncta permittit. mox tempestiuo dierum aliquot secessu, meditatione saluberrima vegetatus, cum alia Christianæ sanitatis minime obscura dedit signa; tum vero, quod in egentes, breui aureorum millia circiter quinque distribuit. Alium quendam, Gaspar, diu multumque obluctantem, ad euomendam animi sanie, plagasque nudandas tandem aliquando perduxerat. is, peracta confessione, dum circa mediam noctem è præscripto satisfacit; ecce tibi, tetris animalibus fœdisque monstris cubiculum repente completur. ab ijs circumuentus, ac varie petitus, obrigit primo; & conscius offensionum, incertus gratiæ, ne viuus in tartarum cum ipsis, vt aiunt, vestimentis illico raperetur, extimuit. dein, vbi se paululum ex pauore collegit, detractam è pariete facram imaginem arcte complexus, magno clamore diuinum implorat auxilium. Ad eas voces (mirum dictu) confestim atra illa & feralis turba discescit tanto cum tumultu strepituque, vti domus tota concuti & conuelli funditus videretur. Id probe expiati purgatiq; animi argumentum nonnulli duxere. certe magnatum sua, tum Gasparis laude, vir ille, haud paulo meliorem inde vitæ rationem instituit. Alius, cum aliquot iam annos in flagitiorum tenebris & cœno iaceret; in Christi lucem extrahi nullo modo se pariebatur; affirmans, mortem subitum potius, quam Gasparis vultum atque iudicium. Veritus deinde, ne, si diutius in eadem vrbe mansisset, ad id ipsum quod adeo horrebat, amicorum aut conuiuijs tandem adigeretur, aut precibus; mutare sedem, & in Indiam proficisci quamprimum decreuit. eo consilio vixdum conscenderat nauem, cum subita vi morbi, miser, ac simul panico quodam ita correptus est, vt cœlestes in suum caput minas vndique intentas putaret: quicquid increpuisset, se videlicet vnum peti sine dubio crederet. Hisce terroribus anxius, in terram exscendit: Gasparem aduocat: peccata fatetur: ac valetudine tum demum recepta, castigato vetere luxu nouum induit hominem. eodem improuisa mortis metu

per-



pertinaces alij multi ad Gasparis tribunal, arbitriumque pertracti. Atque horum, animi ferme: illorum, etiam corpora sanata diuinitus. Primatij viri filius, febris grauisima laborabat. eidem erat oculus diuturna tabe putridus, & sauo tumore diruptus. duplici malo multis adhibitis effectu nullo remedij; cum in humana ope nihil iam esset spei, mœrens pater Gasparem demisse obtestatur & obsecrat, vti pro salute carissimi filij tam periculose ægotantis, litare dignetur. Fecit ille: neque diutius dilatum è cœlo beneficium est. eo ipso quo salutarem hostiam obtulit die, non solum æquatis humoribus vniuersa febris abiit, sed etiam delapsis ex oculo maioribus squamis, plane restitutum est lumen. Tum parens, accito festine Gaspari, liberatum vtroque simul morbo iuuenem, vix præ lætitia sui compos ostendit: agitque gratias immortales, quod sibi pariter ac nato spiritum lucemque reddiderit. At Gaspar, modesto vultu, constantique sermone, Deiparę Virgini, cuius votium fuerat sacrum, tãtam virtutem, adeo insigne miraculum tribuit. Idem pro amico pene iam animam agente rogatus fecit: ille, sacro vixdum absoluto, conualuit. Mulier à dæmone propemodum obsessa, spectrisque horrificis agitata, in vltimum venerat vitę discrimen. Euocatus à marito Gaspar, vt afflicta & exsangui manus imponeret; per occupationes ipse tum quidem adire non potuit; cæterum schedulam, inscripto diui Ioannis Euangelio, pro se misit, quam pesti amoliendę mulier è collo suspenderet. id vbi factum, confestim leuata morbo, terroribusque soluta, surrexit. Præterea, cuiusdam acutissimus laterum dolor, pia Gasparis deprecatione sedatus est. Neque vero ad corporis morbos duntaxat leuandos, aut depellendos, valebant eius vota; sed etiam, vbi ad animi salutem id expediret, vltro accersendos augendosque. Centurio nobilis quidam, insigni contumacia & procacitate pene totius ciuitatis odia sibi conciuerat: ac proinde cum multis, vt fit, graues & apertas inimicitias exercebat. Is ad concordiam à Gaspare diu multumque sollicitatus irrito semper conatu, incertum cuius rei gratia ex vrbe secescit. regressus deinde, cum in eadem obstinatione perstaret; quam vellem (inquit Gaspar) ad flectendam istius mentis duritiem, diuina manu in corpus aliquid grauioris cruciatus immitti: nō



## *Historiarum Indicarum*

dum id planè optauerat, cum ferus ille, sæua correptus febris, ad Gasparem, vrgente religione se contulit. à quo per Pœnitentiæ sacramentum rite expiatus, cum in eius potestate sese futurum omnino affirmasset; apprehensum inermem ac supplicem, pater, ad petendam ab inimicis veniam offensionum tota vrbe circumagit: sane opportune: quippe, alij lapidibus, alij gladiis & ballistis instructi, variis locis inuisum caput ad necem operiebantur: quorum incensus dolor, & puniendi propositum, centurionis humilitate, & Gasparis auctoritate subito mitigatum est. Ita, quod ferreus miles, audacia & robore egre affectus foret, vti aduersariorum iras atque impetus frangeret, id morbo subactus & Gasparis hortatu, Christiana virtute ac submissione perfecit. Alium item superbum, & sanguinarium; truciq̃ ore minaces gerentem spiritus, aduersa præter opinionem valetudo prostrauerat. Vfus occasione Gaspar, ad hominem, si qua posset leniendum simul & expiandum, clementer accedit. mulcere iracundiam; bona concordia & pacis, discordia mala: perpetuum è mutuis certaminibus angorem ac sollicitudinem; Christianæ legis de reconciliatione vim ac necessitatem expromere. Ille, domita nondum asperitate sæuitiaq̃, patrem auersatus, ultro contumelias ingerit, Deumq̃ue lacelsit ipsum. abiret cum intempestiua sapientia: nullo pacto velle se inultum excedere: neque ipsius Christi gratiam existimationi ac dignitati præferre. hæc & alia, militatiter, impia verba iactanti, renidens amarum Gaspar; Ita ne? inquit. Atqui non ante crastinus occidet sol, quã tu plus quinques, & quidem frustra, sacerdotem inclames. nec vana cecinit. postera luce ante meridiem acri symptomate oppressus, posita repente ferocia, magnis vocibus Dei seruum ægrotus implorat. ac parum absuit, quin ad supplicium sempiternum, temeratus ac sordidus è vita discederet. Hæc & alia id genus, à Gaspare, cœlestis cuiusdam virtutis edita documenta. Præterea missi variis è nationibus ad eum desertores ac transfuge, nec non schismatici ventitabant Abassini, Armenij, Georgiani, & ex Europa non pauci. quos ille, per summã lenitatẽ ereptis opinionũ erroribus, solemni ritu piatos, restituebat Ecclesiæ. Ex his vnus, Ioannes nomine, in ipso conatu Gasparis adeundi, præclarum martyrij decus tulit. Germanus erat genere, in vrbe

Colonia



Colonia patre natus admodum locuplete; annumque iam decimum in oppido Turcarum Catifa, non longe ab Armuzianis finibus pro Mahometano sese gerebat, tormentarij pulveris artifex, atque ob id ipsum genti percarus. is, audito Gasparis nomine, rebusque his quæ Armuziæ gerebantur; ab impio ministerio ad famulatum Christi, si Gaspar adiuuaret, quâprimum redire constituit. Id quo sine arbitriis fieret, in atramenti librarij difficultate sulphureum diluit puluerem: ex eo diluto litteras ad Gasparem una eademque sententia, Latino, Belgico, & Franco sermone conscribit: vehementer optare se, modo apud Lusitanos tuto liceat commorari, & in idipsum à Gaspare fidem accipiat; Armuziam venire, & Christo Domino per sacramentum pœnitentiæ satisfacere. eo nuntio latus Gaspar extemplo rescribit; fidenter accedat, sibi ac Lusitanis aduentum ipsius gratissimum fore. Hęc epistola, incertum eius fraude qui perferendam acceperat, an alio quo casu, ab Catifano præfecto intercepta, Ioannis consilium prodidit. Confestim à Turcis de ipsius religione quæsitum. ille vero intrepide sese Christianum fateri, atque ad omnia tormenta necemque pro Christi nomine promptum ostendere. Inde furentibus Mahometanis, fœde laniatus atque dissectus, ad ultimum usque spiritum in veræ fidei confessione permansit. Caput abscissum, & prælongo infixum hastili, Turcæ in arcis mœnibus posuere. Haud ita multo post, Lusitana classis Armuziam tenuit. millia duo circiter hominum ea classe vehebantur. eius turbæ totius animorum fordes Gaspar eluit solus, quod sacerdotes cæteri per eos dies in morbum incidissent. inde placato Deo Lusitanus ardentior ad Catifanum littus accessit, ac repentina descensione oppidum cepit, atque diripuit. inter direptionem, Gasparis epistola apud Præfectum reperta. eo argumento de Ioannis nece cognitum est. refixum extemplo caput, Armuziamque accurate transmissum Gaspar cum psalmodia & laudatione perhonorifice condidit. Atque hæc ferme Dei seruus cum his qui vel Christi censebantur nomine, vel quoquo modo ad ius ac ditionem Ecclesiæ pertinebant. Cum Saracenis autem, & Arabibus, quique alij pseudoprophetam sequuntur, cum ex occasione alias, tum vero sexta, vti dictum est, feria maxime versabatur. Apud eos, contra quam in



## *Historiarum Indicarum*

Iapone Xauerio, magnam illi pepererat existimationem per-  
specta & voluntaria viri paupertas; & in tantis animi bonis,  
tantaque doctrina, tantus corporis neglectus, tanta externi  
cultus habitusque tenuitas. Gratiam vero conciliarat co-  
mitas, & mansuetudo, & super hæc, foeneratoribus Eu-  
ropæis per illum incussa religio, & exhaustis incolis pecu-  
niæ restitutæ. Augebat venerationem, constans apud omnes  
de eximia illius sanctitate, editisque miraculis rumor. ut  
eum Mahometani magnum Christianorum sacerdotem, atque  
adeo ipsum Ioannem Baptistam Zachariæ filium vulgo appel-  
larent. Ergo ab iis, patri, inter cætera, nouum etiam & inu-  
sitatum honoris genus illud habitum est. media nocte, vide-  
licet ob calores, illum non modo in maximum Mahometis  
templum (Coranum idest rem sacram Arabes de ipso Maho-  
meticæ legis nomine appellant) quo Christianis hominibus  
pedem intulisse capitale est; sed etiam in ipsius templi fasti-  
gium perduxere frequentes, magna luminum accensa vi, ma-  
num ipsius ac vestem subinde osculantes: neque abnuit ire  
Gaspar, quo gentis ritus ac superstitiones, refutandi gratia,  
certius propiusque cognosceret. Eadem fama permotus Ara-  
muziæ Rex ipse, diuino impulsu paulatim in studium Christia-  
næ religionis incubuit, atque in id ipsum viginti circiter mil-  
lia traxit è multitudine, itemque è nobilitate nonnullos: ne-  
que ita multo post ad se Gasparem accersit, intranti que, non  
assurrexit solum, sed etiam in suamet sella diu renitentem sede-  
re coegit. Ad colloquium, cæteris arbitris consulto remotis,  
vnus interpres adhibitus Garzias Penna Lusitanus, fidelis vir,  
& solers ingenio; Latinis pariter & Arabicis litteris eruditus.  
In eo congressu, cognita Regis voluntate, quominus inuisa  
proceribus foret, actum de coarguendis in publico cœtu &  
principum corona, vanitatis Mahometanæ fallaciis: dein con-  
dictum catechismo tempus, ac sacro baptismati. & Gaspar,  
collaudato Rege, lætissimus abiit. eam rem (neque enim  
celari diutius potuit) sarrapæ ægre admodum passi, blanditiis  
primum ac precibus tentant Regem: aspernanti, mox defe-  
ctionem, & arma, & iras Thomæ Persarum Regis magni de-  
nuntiant. Hæc comminationes, diuina tutela fretus & sub-  
sidio Lusitano, temnebat Rex. Cacizios insuper (quo nomi-  
ne



ne Mahometanæ superstitionis antistites vocant) ausos in regia vestibulo de auita religione tenenda vociferari, confestim abigi lapidibus iussit, atque perpetuo multauit exsilio. Hactenus constantiam & fortitudinem Rex præstitit miram: sed matris ad extremum, intestina bella, patriæ excidium, occasum regni omni arte miserantis, obtestationes & lacrymas diutius ferre non valuit. Regis exemplum cæteri extemplo secuti. Aliquot deinde interiectis diebus, vocato rursus ad se Gaspari plus etiam quam antea honoris tribuit Rex. ingredienti ad scalas occurrit, ac dextram insuper apprehensam nixus genibus exosculari contendit. dein tarditatis purgandæ causa, docuit quanto in periculo res versaretur. Si pergant de baptismo agere; domesticos tumultus ac seditiones, externa imminere bella. cedendum temporis, neque experientiam tanto discrimine vim. ubi primum atrox procella conciderit, & optata affulserit lux, se neque suis promissis, neque patris optimi caritati ac studio defuturum. Interea, quæ alioquin ad rei Christianæ dignitatem & incrementum attineant, quantum præsentis difficultates ac tempora patiuntur, ab se cuncta nihilominus expectet. Ad ea dicta Gaspar, magna nimirum spe delusus ingemuit; hortatusque Regem est; uti Deo, cui nihil arduum, fideret; eique totam rem ex animo commendaret. ipse item ab Rege digressus, contra nouas dæmonum & hominum fraudes, nouum è cælo auxilium petit: voluntarias pœnas, ieiunia, obsecrationes per se perque suos instaurat: supplicationes de more per urbem habendas curat. concinentes longo agmine incedebant pueri; validior ætas, quinquageni vel sexageni pariter, in sua terga flagris acerrime sæuiebant: omnibus locis implorabatur diuina clementia. Aduersus ea Cacizij vicissim inflati pœnitentia Regis & popularium, concitata plebe, supplicationes item obire, in ediam extendere, nouaculis cutem incidere, quam maximas manus in Coranum & reliqua fana cogere, Mahometis execrabile nomen, ex omni parte dissonis clamoribus inuocare. Tum Gaspar, facinus indignum ratus, in vrbe quæ Lusitano præsidio teneretur, Christo Mahometem opponi: cum veritate mendacium, fabulas & ludibria cum recta fide sanctisque mysteriis propemodum ex æquo contendere; per summum



## *Historiarum Indicarum.*

animi ardorem aliquot maioris formæ comparat Cruces; ac nulla vi, nullo armorum strepitu, prauia duntaxat psallentium puerorum imbelli turba, ad Coranam tendit intrepidus. res mira: Crucis virtute ac fulgore perstricti atque attoniti Mahometani repente diffugiunt. Gaspar in Corano palam victimæ mortis ac Satanæ defigit signa. Regis dein iussu fabris adhibitis, templi ianuæ cæmento & calce obstruuntur. Super hæc, grani edicto impiæ vociferationes insula tota prohibentur. tum vero satrapæ & antistites fremere; violatas religiones, & sacra deserta, cum Armuziano coram, cum cæteris Regibus, Persæque in primis, per litteras queri: cunctos ad arma atque ad vltionem accendere; postremo, sese urbem relicturos, & in perniciem vestigalium alio commercia auocatu minari. cum parum terrendo proficerent, ac nihilominus clausæ valuæ perstarent, multo breuiorem, & magis compendiarium ineunt viam. Europæos aliquot, professione duntaxat ac nomine Christianos, perque eos nouum arcis Lusitanæ præfectum grandi adoriuntur pecunia, vti Coranum denique patefieri, & celeberrimæ religionis altaria sibi reddi permittat. Præfectus, quietis videlicet otiiq; causa inclinato ad assentiendum animo, nihil tamen in consulto Gaspare ausus aggredi, patrem ad conuiuium inuitat. in eo conuiuium cū blande super ea re Gasparem appellare, & molli brachio negotium tractare cepisset, subito deliquio pane exanimatus, ceptum omisit. de cæteris qui rem nefariam vrgebant, alij alio leto paucis diebus absumpti. de templo in præsentia nihil impetratum. Rex cum aliquandiu Christi cultum agitaasset animo, improborum artificio ac scelere sensim infatuatus, denique sapientem cogitatione abiecit, ac regno cœlesti (quod nimium sepe fieri videmus) humanas opes, & fluxa commoda vite præsentis antetulit.

De populo tamen subinde fiebant aliqui Christiani. Sed Gaspar ipsa petebat capita; & legis peritos in certamine ac disputatione elicere nitebatur, vt Mahometica palam prauitate conuicta, gentem, si fieri posset, vniuersam ad Christum adiungeret. illi contra, tergiversari, congressum altercationemq; defugere, & quidem ipsius religionis obtentu, quod subdola falsi prophete sanctione vetari dicuntur, Mahometica dogmata ad examen ac trutinam reuocare, & in questionem villo pacto deducere. Hoc maxime prætextu



prætextu conatus Gasparis & prouocationes diu eludere. Ver-  
titi deinde, ne si pergerent abnuere pugnam; prædamnare se-  
met, & causæ diffidere viderentur; athletam denique produ-  
cunt, ætate prouectum, natione Persam, cum sobrieratis apud  
eos, tum vero doctrinæ fama præstantem: quippe non Ma-  
hometica duntaxat volumina, sed Aristotelem etiam lectita-  
rat, ac medicam insuper callebat artem, eratque in physicis  
apprime versatus. Is in medium adductus, Gaspari ante o-  
mnia sponsonem obtulit; in montem natiui salis (qualis in  
eo tractu multi consurgunt) squalidum, ac desertum, & o-  
mnis alimenti penitus inopem secederent ambo. vter diutius  
in eo monte inedia tolerasset, eius fides in Deum ac religio,  
rectior ac sanctior haberetur. Ad ea Gaspar, tentato, quod  
aiunt, Deo, nihil opus esse respondit: hominem à brutis ra-  
tione tantum & oratione secerni: verbis agerent prius: con-  
certatione verborum si decerni lis, atque ad liquidum contro-  
uersia perducere non posset; tum demum sponcione certarent;  
atque ad aspera quamlibet experimenta descenderent. Hi-  
sce auditis philosophus rubore statim, mox pallore suffundi:  
nolle se videri victum: nolle rursus infirmas ac friuolas theses  
in discrimen adducere. ad extremum, vincente pudorem me-  
tu, in aliud tempus dilata res est. Porro, hæc nequaquam in  
occulto agebantur. Inter cæteros aderant ipsius philosophi  
vixor, & filia, non vulgari indole & ingenio fœminæ, & insu-  
per, generis nobilitate insignes, è Zeidenfi familia, quam fe-  
runt ab ipso Mahomete originem ducere. hæ, perspecta pug-  
lis Christiani constantia, Mahometani formidine; profecto  
nihil syncerum ac solidum subesse patriis cæremoniis argute  
coniectant. dein afflata diuinitus, quando paterfamilias in  
amentia perstaret, priuatim ipsæmet saluti suæ prospiciunt; ba-  
ptismum à Gaspare seorsim petunt. ille fœminas illustres apud  
fidelem amicum & probum, catechismi causa in hospitio locat;  
ianuis quæ in publicum ferebant, diligenter occlusis. ea res ob  
illarum claritatem atrox admodum incolis visa, magnosque  
in vrbe animorum motus exciuit: sed partim Gasparis reue-  
rentia, partim Lusitanorum arce machinisque deterriti, di-  
uersorio vim afferre non audebant. Tum philosophus deside-  
rio ac dolore agitated, ad Gasparem adit; iniuriam dolenter  
expostulat;



## *Historiarum Indicarum*

expostulat; coniugem marito, parenti filiam reddi protinus æquum esse, Deos hominesque testatur. Gaspar contra, nihil iniuria factum dicere, foeminas ultro (& sapienter quidem) sibi consuluisse: ut Christo initiarentur, suppliciter exorasse: recta illarum studia deferi, sanctissima postulata repudiari nefas fuisse. Sub hæc, multis ultro citroque habitis verbis, novam conditionem philosopho Gaspar tulit; relictam paulo ante disputationem, ex condito repeterent; testes adessent; si victor euaderet Persa, foeminas domum abduceret cum bona pace: sin victus; vna cum illis ipse quoque Christum indueret. Eam conditionem admodum grauata Persa visus accipere: sed amor, & necessitudo, & præterea ratio dignitatis urgebat, dicitur disputationi dies. ea ubi affuit, in idem conclaue conueniunt. sponsonis iudices ac spectatores certaminis Proepiscopus ipse, & Penna interpres, itemque scriba publicus, qui dialogum ex fide mandaret litteris; nec non alij partis vtriusque viri graues adstabant: spectaculi autem eo maior fructus fuit, quod certantium vterque dialecticis artibus erat imbutus: ut non eminus inter imperitos tamquam velites, in irritum aut in diuersum tela ferrentur; sed ut inter statarios & exercitatos, collato pede, gladij mucronesque concurrerent. De natura Dei quæsitum in primis. quem solitarium, & generationis expertem, è Cerdonis & aliorum hæresi Mahometes affirmat. Hanc naturam vel maxime foecundam validis argumentis Gaspar ostendit: effecitque ratiocinando, uti Persa Deum trinum vnicumque, ex fidei orthodoxæ decreto concederet. Deinceps de Christo Dei filio sequutum problema, quem ex Dei quodam halitu; & è Virgine matre conceptum genitumque Mahometani eximium illi quidem prophetam agnoscunt; veruntamen Deum eundem, & pro generis humani salute mortuum, prorsus negant. At Gaspar, verum Deum pariter hominemque, duplici in vnam hypostasim coeunte natura, non solum è Spiritu sancto conceptum & natum è Virgine, sed etiam omnem Dei patris iram in perfidum ac rebelle genus humanum suo capite excepisse, d'raque supplicia, & ipsam in Cruce mortem sponte subiisse; rationibus, exemplis; oraculis docuit. Im, quæ Arabes de cœlesti beatitudine fabulantur, quâ in foeda sensuum voluptate ac t'ullatione constituunt;



stituunt; quæq; de immensis nescio quibus Angelorum corporibus ac ministerijs turpiter adstruunt, perleui momento cuncta Gaspar euerit. Denique, varie argumentando premendoque, paulatim aduersarium adduxit, vt Christianam religionem dignam esse quam prudentissimus quisque maxime foueret; Mahometicam nec sine stultitia suscipi, nec sine pertinacia defendi posse fateretur. Vbi ad hunc locum ventum est; nouo perfusus gaudio Gaspar, ad Persam: bene habet, inquit; non longe abes à regno Dei. dein cum instare pergeret, & clarius eandem confessionem exprimere; Persa confusus ac perturbatus, dæmone reprehensante resiliens, tam longe sese prolapsum ingemuit, ac sibi talia excidisse responsa. postremo, ne manus omnino dedisse videretur, ad veterem cantilenam confugit: domesticis negotiis impeditum, ne fidem falleret, subito se in arenam descendisse: certis insuper libris ad commentandum sibi opus esse, quo paratior instructiorque in pugnam rediret. vt proferretur dies, & ampliaretur iudicium, postulauit, inde furtim ex vrbe ad vicinum dynastam consultandi gratia fecesit. ab eo acriter obiurgatus, quod cum veteratore ac venefico (ita enim Gasparem appellabat) egisset; camelis in Persidis interiora transmissus est, neque postea redijt. Insignis ad Caciziorum dedecus & ignominiam, illa fuga & exilium fuit. vulgo, fractum & abiectum Persam latebras quassisse narrabant. Vxor interim eius, & filia; Christianis institutionibus eruditæ, diuisis in pauperes aureorum quatuor fere millibus, magno apparatu pompaque ad templum Christi adeunt. ibi summo omnium gentium ordinumque concursu, mira bonorum latitia, sacro fonte abluuntur. matronæ *MARIA*, virgini Catharina inditum nomen. hanc dein Gaspar Lusitano viro dedit in matrimonium. Earum præclara conuersio Mahometanos in diuersa distraxit. alij exemplo incitati, rectam fidem amplectebantur. alios contra, è tam secundo Christianæ rei progressu metus incessit, ne magia & præcantationibus ad peregrina & inuisa cogerentur sacra. ac proinde, antistitum admonitu, non modo vocem Gasparis ac vultus horrebant; sed etiam ad consuetum catechismi signum, oppositis illico manibus obturabant aures, quod ita persuasum haberent, in ipso quoque illius tintinnabulo ac sono, vim in-

esse



## *Historiarum Indicarum*

esse maleficam. Per idem tempus, modo præconum adesset copia, nouus in vicinas regiones aditus Euangelio patefcebatur. populi sunt felices Arabiæ, celeberrimis quatuor oppidis incolentes: Ammonitas quidam opinantur: vetustissimi generis: in ipsum vsque Loth originem referunt. Horum maiores, fama est mortalium primos à Mahomete in fraudem inductos. ij, rumore excitati, qui de Gasparis admiranda virtute ac doctrina longe lateque manauerat; communi consensu patrem ad se per litteras ac nuntios inuitarunt. magno studio se teneri veritatis & sapientiæ: ad sitientes aures accederet; non sine fructu verba facturum. ea res Gaspari mistum dolore gaudium attulit. sollicitam de officij ratione, deque æterna salute gentem in media apparere barbaria, magnopere lætabatur. obstructum sibi ad eos aditum, valde mœrebat. Optatum quippe Gaspari dudum fuerat: ad mortem ac supplicia pro Christi nomine subeunda, se se in medios Persas ac Turcas immittere, & Mahometanæ sectæ mendacia refutare palam: sed eo feruore comperto, Xanerius, publicæ magis rei quam Gasparis gloriæ consulens, in ipso discessu illum ex insula Armuzia, ad triennium, suo vel certe Goani Rectoris iniussu pedem efferre, vetuerat. Itaque Gaspar, quamquam eundi ac periclitandi percupidus, tamen obsequium sacrificio antiquius duxit: legatos, adhibita præparatione, baptismo lustrauit: quominus in eam regionem ipse in præsentia tenderet, causatus occupationes, per epistolam vniuersæ nationi suavit, idoneos interim ad se discipulos mitterent, atque in amore ac proposito veri cognoscendi perstarent. Hæc se se initia dabant expeditionis nouæ. necessario dilata, multis vt sit, difficultatibus interpositis deinde consenuit. At Gaspar à libero excursu, & ancipiti peregrinatione cohibitus, eo accuratius operam ac studium in omnes vnius Armuzianæ vineæ partes intendit. Inter alias nationes, vt dictum est, ethnici quoque simulacris dediti Armuziæ versabantur. In ijs aliquot erant Iogues, (de quibus ante commemorauimus) horrido in primis & aspero victu cultuque famam sanctimonix vulgo captare adueti. suburbanum habebant specum, ac delubrum: interdum ad emendicandam stipem, & imbuendas varijs erroribus hominum mentes prodibant: noctu sese in eam recipiebant latebram: statisque horis



fis ( adeo ex omni parte Christianas caremonias dæmon emu-  
lari non desinit ) dato signo ad certas primum commentatio-  
nes euigilabant; tum ad cælestes honores simulacro seu pago-  
di cuidam, vt vulgus Indicum vocat, habendos. vnus omni-  
bus præerat, insigni duritia & austeritate vitæ: neglecta sem-  
per barba & capillo; asperso cineribus corpore; oblitus pan-  
nis, ac seminudus; dira macie luridus. hisce alijsque id genus  
artibus in tantam sui admirationem adduxerat cunctos, vti  
qua pedes aqua lauisset, hanc Armuziæ Rex ipse religionis cau-  
sa potaret. Hunc præcipuo conatu Gaspar aggressus, paucis die-  
bus arcta sibi familiaritate deuinxit; & crebra cum eodem in-  
stituit de omni virtute, ac præsertim de continentia & de casti-  
tate colloquia. quibus ille paulatim in studium Christianæ re-  
ligionis adductus, moram trahebat nihilominus, & inter con-  
siliū mutandæ vitæ perplexus hærebat. Ita nutanti & anxio,  
suasit Gaspar, vti diebus triginta continuis, quina verbera vir-  
gæ, totidem Christi plagas recolendo susciperet: certamque sibi  
lucem à sole iustitiæ accuratis precibus imploraret. Fecit ille  
diligenter. ac demum nocte quadam diuinas laudes & bona  
reputanti apud sese, clara subito ad aures accidit vox: Quintu,  
quod tibi monstratur iter ingrederis? vna est ad salutem via,  
quam populus Christianus insistit. simul, vigilantem, magnificus  
nostratium sacrorum apparatus per speciem oblati: pretiosa  
Pontificum vestimenta: sumptuosa textilia: mitræ gemmis au-  
roque fulgentes: nitidissima lintea: nec non disposita in abacis  
vasa varij generis, auro argentoque cælata. His ille visis, ac moni-  
tis, & intimo sancti spiritus hortatu vehementer incensus, ad  
Christum sine vlla dubitatione transire constituit. Mane, vita-  
to Regis congressu, qui ad illum visendi causa, vti solebat, ac-  
cesserat, Gasparem ipse ultro conuenit; baptismum enixe pe-  
tiit. adeptus, noua innocentie stola & inclyto Pauli nomine  
decoratus est. Goam dein profectus, & in Europam classe trās-  
missus, iucundum aliquandiu spectaculum Regi Lusitano, ac  
popularibus præbuit. paranti postmodum è Lusitania Romam  
ipsam adire, interuenit mors. Cæterum Armuziæ sequen-  
ti rectoris auctoritatem Iogues alij, suaue Christi iugum, gra-  
ui & acerba dæmonum excussa tyrannide, subicere. insi-  
gnis ad veri Dei gloriam, & rectæ fidei propagationem.



## *Historiarum Indicarum*

ea conuersio fuit: atque ad multum exinde tempus in omnium ore ac sermone versata. Specum ac delubrum Gaspar solemniter expiatum, præalta ibi defixa Cruce, Deiparæ Virgini dedicauit. Idem Iudæos omni officio & caritate complexus, miram ab eorum plerisque gratiam iniit. inde sese comiter illorum synagogis & cætibus inferendo, quem frustra expectant liberatorem ac Regem aduenisse iamdudum, atque ad infinitam eius clementiam quamlibet noxijs ac perduellibus aditum perfugiumque patere, firmis argumentis ac testimonijs demonstrabat: uti ab inanibus umbris, & rancida superstitione ad nouam legem veritatis & gratiæ se se tandem aliquando transferrent; suadere & instare pergebat. duos præsertim magistros; quos vocant Rabinos, magna apud vāsanam gentem auctoritate, in certamen vocabat: ac parum abfuit, quin sapius conuictum vtrunque ad Ecclesiam aggregaret. quominus plane obsequerentur, nimia in vxores ac liberos indulgentia, & necessario male quæsitæ rei familiaris damno deterriti sunt. Hisce alijsque gestis rebus, celeberrimum in Oriente Gasparis nomen euasit. Vna res famulo Dei ad cumulum dignitatis & gloriæ defuit; occasio martyrij subeundi, quam ille palmam ardentem, ut dictum est, adamauerat. Felicius in eodem voto fuit Antonius Criminalis, quem à Xauerio Ecclesiæ Parauanæ præpositum fuisse docuimus. Is totam oram, ducenta amplius passuum millia, singulis mensibus ingenti labore nudis pedibus obire adsuetus; ad Remanacoris vada tum erudiendæ infudabat plebi. Vltimus in Septentrionem Christianorum locus erat ille: Narasingano seu Bisnageni regno finitimus, agri male pacati: atque ob id Lusitanorum aliquot præsidio tenebatur. In eodem littore nobilissimum idolorum fanum habent Brachmanæ; ij ab Lusitanis militibus per lasciuiam lacesiti, ac variis affecti contumelijs, ad proximos Narisingæ populos confugiunt, quos Badagas vocant. cū ijs acceptas à Lusitano queruntur iniurias: orant obsecrantque, ne patriæ religionis antistites, Deorum immortalium interpretes ac sacerdotes, peregrinis, & profanis, & desertis hominibus, derisui ac ludibrio diutius patiantur esse. Præsentissimum quemque spreti numinis vindicem ultoremque, maxima ab superis haud dubie laturum præmia. Hisce vocibus incitati



citati barbari, cerris de more significationibus iuventutem ad arma vocant: millia ferme sex momento conueniunt: ad Remanacorem agmine infesto contendunt. Haudquaquam anceps erat expeditio. Pagus, nullo aut perexiguo septus munimento, ad incursum patebat: incolæ minime feroces ingenio; &, super infirmam lenitatem, piscando natandoque magis quam bello aut armis exercitati. in Lusitanis tantum erat spes: qui tamen ipsi vix quadragenarium explebant numerum: & quidem per eos forte dies, cum ab alijs imparati rebus, tum à tormentario puluere, quo maxime malo territare vel pauci magna barbarorum examina & in fugam agere consueuerant. Nota hæc Narsingano: speculatores quippe ac delatores occulti non deerant. eo maiore fiducia & impetu ferebatur ad prædam. Aduentu hostium cognito (& prouecta iam erat dies) Antonius præfectum præsidij Ioannem Fernandum Corream ad pacem duris in rebus petendam, placandosque aliqua honesta ratione Badagas, nequicquam adhortatus; templum, vbi rem diuinam mane peregerat, rursus ingreditur; ibi tenellum gregem æterno pastori commendat. tum de ipsorum incolumitate sollicitus, ad portum accurrit. Miseranda ibi rerum facies. iam iamque adesse nuntiabatur hostis. inde alij protinus in anxia fugam arripere: alij domo raptim elatis quæ quisque poterat, occupare lintres, vel vbi in ijs locus non esset, ad ipsas in salo stantes adnare naues; alij, deficiente consilio, incerti quid agerent, hac illac errabundi cursare. Mulierum in primis triste spectaculum. hæc paruos complexæ liberos, opem à viris implorantes; cuncta lamentis gemitibusque complebant. Antonius, certatim offerentibus illi scapham Christianis; atque vt præsentem exitio subtraherent sese, etiam atque etiam obtestantibus; imbellem & opportunam iniuriæ turbam summam ope instat imponere. Inter hæc, Badagæ, nulla pacis mentione ad aures admissa, irarum & cupiditatis pleni, sine certamine irrumpunt: Lusitanos trepide molientes à terra, tellis eminus impetunt. lanceis multi; plerique sagittis, complures etiam, nuper illatis ad eos ferreis instructi fistulis aderant. ijs licet nondum ita perire vterentur, tamen haud in irritum plumbea tela mittebant. Icti Lusitani periere postmodum sex. Antonius, dum, suimet oblitus, pergit fidelis custos armento

consu-



## *Historiarum Indicarum*

consulere : comitem suum & interpretem , eximia probitate virum , occidi circa se videt . ad eius casum , illico manibus oculisque defixis in cœlum , procumbit in genua ; quod ille quadragies ferme cum iaculatorijs precibus quotidie faciebat . Inter eam supplicationem , ipse quoque mox impio ferro confossus , animam Deo reddidit . Abscissum caput , & madentem cruore subuculam , barbari ad ostentationem ex alto suspendunt . inde ad prædam versi , magnum fœminarum ac puerorum abducunt numerum ; atque ad gratias pro bene gesta re idolo agendas , cum læto cantu ac tripudijs abeunt . Beati martyris truncum , tenui cespite à superstitibus incolis in summa tellure coniectum , Lusitani deinceps altius effosa humo , cum lacrymis condidere . Vir fuit insigni morum sanctitate ; minime vulgari consilio & usu rerum ; cibi ac somni parcissimus ; patientia corporis animique mira ; ac multo plura spiritus Apostolici relicturus exempla , ni strenuum probatumque operarium , diuina bonitas , ad gloriosam laborum mercedem ex agro maturasset educere . Felicem eius exitum , cum cura exploratum atque compertum , socij a Xauerio eidem attributi , cum alij priuatim ad alios , tum communiter omnes ad Goanum Episcopum ex fide scripsere .

*Libri Quartidecimi finis.*





# HISTORIARVM

## INDICARVM,

### LIBER XV.



ALIS viri nece, ac neophytorum acerba vexatione commotis bonorum omnium animis, haud exigua spes aliunde rerum utique lætiorum affulfit. Maritimum est oppidum Tanor, leucas ultra Goam circiter octoginta, cis Calecutum ad quindecim. eius oppidi Rex è Brachmanarum ordine ac disciplina, cuiusmodi plerique Malabaricæ terræ sunt Reges; in Lusitanū nomen à pueritia valde propensus,

cum Cialensis arcis præfecto Ludouico Xiralupo (quam arcem à Nōnio Prætorē exstructam in limite Calecutano docuimus) amicitiam ac familiaritatem inierat. Idem, Vincentium Franciscanum, Goani Episcopi comitem; & Ioannem Soariū Cialensem antistitem, ventitantes ad se, libenter audiebat. horū præcipue stimulis discusso torpore, baptizatus à Soario, susce-

I ptus



## *Historiarum Indicarum*

ptus à Xiralupo, & Cosmo Annio Quæstore (qui tum forte Cocino rediens, Tanore salutandi eius causa descenderat) Ioannis maxime nomen in gratiam Lusitani Regis desumpsit. Paulo post, vxor quoque sacro fonte lustrata, itemque è Cialensis reguli prefectis vnus, & è Caimalibus seu dynastis alter. verum hæc in occulto fiebant, ne quis grauior popularium motus existeret; atque adeo Rex ipse Tanoris, trina fila, Brachmanicæ superstitionis insignia, palam è ceruice gestabat; cum tamen idem ipse, Vincentij patris munus, æneam icunculam Christi ad Crucem affixi, abditam foueret in sinu. sub hæc, neophytum Regem adstringendæ cum Lusitanis amicitie causa, incessit cupidus regiam ipsorum urbem vltro adeundi Goam; & familiariter cum Prætore & cum Episcopo colloquendi. id quo tutius faceret, litteras ad vtrumque dat; vetustum sibi hospitium esse cum Lusitano genere: nuper etiam, illorum sacra sibi & vxori suscepta. Valde se optare, si per eos liceat, ad maiorem percipiendum eius necessitudinis fructum, dextrasque iungendas, Goam venire. esse præterea, quæ cum vtroque communicari vehementer expediat. Eiusmodi litteris ad urbem allatis, aduentus illius fama extemplo vulgata nouo gaudio cunctos affecit. præclarum atque honorificum sibi ducebant, sub nominis Lusitani tutela præsidioq; latere quamplurimos; & Christianam religionem relictis patriis ritibus induisse haud ignobile in iis locis Regem: atque, vt cupiditati est ferme adiuncta credulitas, vulgo ita differebāt: Malabarici littoris incolas omnes, viri huius exemplo atque auctoritate, in Lusitanicam fidem breui esse venturos: simul, affuturo propediem hospiti, quod genus honoris habeatur, exquirunt. super eadem re Prætor ipse consilium aduocat. ei consilio interfuere delecti è nobilitate viri triginta: Quæstores regij tres: custos Franciscanorum; & Goanus Episcopus. Ambigebat Prætor, vtrum aduenientem Tanorium, qui apud suos nondum pro Christiano se gereret, neque Brachmanicas è collo deponeret lineas, Goæ pro Christiano accipi ac tractari oporteret. ea de re cum alia alij rogati censerent; negauit Episcopus, neophyto Regi, patrium in præsentia gestamē, aut vitio verti, aut fraudi esse debere. Iosephum quoq; ab Arimathia, quem iustum sacre æstentur litteræ: itemque Nicodemum, & Gamalielem, qua



qua fide, qua probitate viros & occultos Christi discipulos fuisse propter metum Iudæorum. eandem ob causam, ipsosmet Apostolos Christi, ante acceptam spiritus plenitudinem, ianuis clausis dies aliquot in eadem carnatione latuisse. iam vero, Diuum Sebastianum, bellatorem illum ducemque fortissimum, suscepta dudum Christiana religione, tamen Romano militari ornari, ut nulla re prorsus à cæteris dignosci posset, custodias dissimulanter obire, & martyribus animos addere solitum, quoad coram ipso Diocleriano demum aperiendi quis esset, quem coleret, cui dies noctesque seruiret, præclara sese dedit occasio. Similiter, huic etiam Regi tam pio, nondum maturis ad Christum publice profitendum rebus, cōcedendum aliquid spatij, dum Naires ac proceres vitandæ seditionis causa paulatim ab insita superstitione diuellat. suum esse cuiusque rei tempus. id expectandum utique sapienti. sepe, quæ patientia ac lenitate sanari negotia possint, peruicacia & festinatione corrumpi. Hæc, & in hanc sententiam alia dixit Episcopus, haud dubie beneuolentia in Regem, & quadam naturæ bonitate prouectus: nec satis animaduertens, quantum inter habitum nationis, & symbola religionis intersit. Vicit tamen auctoritas Pontificis, inque eius sententiam Prætor & reliqui frequentes iere. Confestim Ioannes Lupus cum octo biremibus, & idoneo comœatu, missus ad Regem aduehendum; in pîso Tanoris aditu anchoras iacit, deque suo appulsu facit eum per nuntios certiores. ille, sospitem gratulatus accessum, ad profectiōem extemplo se comparat. id ubi cognitum in vrbe, propinqui, & primores, ac præcipue Brachmanæ circumsistunt Regem; monent, orant, obsecrant, ne regnum sine causa deferat; ne caput suum peregrinæ & ignotæ committat genti: ne sese vetustissimis cæremoniis præditum augustumque, profana & impura contagione contamine. Ea monita precēsque obfirmato ad iter animo cum Ioannes aspernaretur; enimvero illi acrioribus remediis opus esse constituunt: facta conspiratione, custodibusque ad portas adhibitis, Regem in arcem includunt triplici circumdatam muro. neque tamen idcirco ille de sententia demoueri se est passus. nocte concubia, solus, reuincta capillis in ipso vertice, quam dicebamus, effigie Christi, cuius opem subinde implo-

II 2            rabat;



## *Historiarum Indicarum*

rabat; subitariam restem, præligato quod fors obtulerat adun-  
co cerui cornu, retinaculi causa in pinnas iacit: eoque admi-  
niculo in summum euadit. inde translato in partem alteram  
vinculo, suspensus manibus ad ima sese demittit. ita, septum  
vnum atque alterum felici ausu transgressus; in tertij descensu,  
quod altitudinem mœnium restis haud æquaret, ex interuallo  
defiliens, caput & alterum læsit crus. inde ad stationem Lusita-  
norum ægre progressus, in ascensu scaphæ, tumentibus aquis  
pæne submergitur. Hisce defunctus periculis, ad naues denique  
magna omnium gratulatione peruenit. Vixdum in Prætoriam  
erat acceptus, cum eius cognito discessu oppidani ad littus ac-  
currunt: supplices tendunt ad illum manus; eadem quæ paulo  
ante, cum lacrymis obtestantur. quos ille partim præfenti largi-  
tione, partim celeris redditus promissione solatus, familiaribus  
paucis adsumptis Goam ire perrexit. Propius ad insulam ac-  
cedenti, præfectus vrbs Franciscus Lima in ipso portus ore  
cum splendido comitatu, & fulgentibus vndique serico verfi-  
colore caturibus ac lembis, obuiam fit. Ad mutuū conspe-  
ctum, vtrinque tubæ tibixque, ac tympana perstreperunt. Con-  
suetæ dein salutatione accepta redditaque Rex ad impositam  
littori suburbanam Antonij Personæ villam, regio instructam  
apparatu, deducitur. ibi noctem exegit. Postera luce, Hispa-  
niensi decorus habitu & aureo torque, pari frequentia, nec si-  
ne horrissono tormentorum fragore ad urbem classe prouehi-  
tur. ipsum Prætorem in arcis mole præstolantem; paratos  
item ciues populumque; structam summa ratione pompam  
offendit. eius pompæ ordo traditur talis. Ad portam qua in-  
trandum erat, Lima præfectus in argentea lance clauis vrbs  
tenebat; hospiti Regi more maiorum offerendas, adstabant  
decuriones auratis baculis holosericam ostrinam attollentes  
ymbellam, fimbrijs è cocco retorto pendentibus. Viam quæ  
recta vocatur, & præter Sabaianas ades ad templum fert ma-  
ximum, probe purgatam, aqua conspersam, virentiq; stratum  
iunco, parietibus ex vtraque parte pretioso textili & varia pi-  
ctura nitentibus; clerici & sodalitia sacra cū infulis & insigni-  
bus religionum, longo agmine infederant. postremus omniū e-  
rat Episcopus, maioris formæ baiulans Crucē. Rex urbē ingres-  
sus, cum cætera latus gratulatione, tum in primis honore cla-  
uium;



uium; sub umbella cunctabundus incessit, adeo conferta occurfantium ac deducantium multitudine (cum interim è superioribus locis alij spectarent plurimi) vti à liſtoribus, vmbellam antecedenti honoris cauſa Prætori, magno labore ſubmoueretur. Vbi ad Epiſcopum acceſſit Rex, ſolemni ab eo precatione luſtratus, Crucem venerabundus amplectitur, pendentiſt Chriſti ſignum exoſculatur: dein templum intrat, ſuſiſque rite precibus, ad pridianum hoſpitiũ eques eodem ſtudio & comiratu reducitur. exceptus dein à Prætorẽ quã apparatiſſimis epulis, arcano colloquio tempus ac locum petit. conſeſſim vacua pars facta Prætorij. ad colloquium Epiſcopus, & nonnulli theologi nominatim adſciti, ac præter hoſce Lima vrbiſ Præfectus, & Franciſcus Aluarus à ſecretis, & regij quos dixi Quæſtores, & Gaſpar Nonnius interpres. Coram eo conſeſſu Rex omnem ſui de religione conſilij rationem expoſuit. Sibi, poſteaquam, ſingulari Dei beneficio caligine diſcuſſa, de tenebrarum profundo in lucem ſapientiæ ac veritatis emerſerit, nihil æque in votis fuiſſe, aut eſſe; atque vt populares ſuos non ſolum, ſed vicinos quoque Reges ac Principes Chriſto conciliet; cunctiſque de ſuo (quod aiunt) lumine lumen accendat. Verum lenitate opus eſſe: quæ niſi tempus ac ſpatium datum ſit, conſtare nõ poſſit; vſque adeo Malabaricam gentem ſuas amplecti ac fouere, alienas horrere atque auerſari leges ac cæremonias: adeo auitis erroribus ac ſuperſtitionibus captam atque implicatam teneri. interea ſibi Chriſtum eiſque præceptam penitus hære in medullis: eiſ rei Deum & conſcientiam teſtes inuocat. ſimul, ad certamina, vbi res tulerit, pro Chriſti nomine ſubeunda ſacroſancto Chriſmate confirmari ſe poſtulat. Ad ea Prætor, & Epiſcopus, collaudata viri pietate, cum experiendi gratia dicerent, ſatius videri ſibi, Regem, ad cæteros permouendos, Chriſtianum ſeſe fateri palam; & ope diuina præſidioque magis quam humana prudentia vel dexteritate confidere; multo plus vniuerſæ genti exemplo factiſque quam arte ac ſimulatione & occultis hortationibus protuturum; Rex magna rurſum pericula, magnos rerum motus obtendere. inter cætera incommoda, fratrem ſibi eſſe æmulum regni, præpotentiſt dynaſtæ vicinis opibus & fauore ſubnixum. haud ſine cauſa vereri ſe, ne ſi noua, & pere-



## *Historiarum Indicarum*

grina obtrudenda religione, populorum animi grauius offendantur, eorum alienationem ille suam occasionem putet. Lusitanis paululum modo expectare ne graue sit. Si vita suppetat; domesticas pariter & publicas res ita se Deo adiuuante cōponiturum, vt quæ nunc temporis causa corde tacitus premat, ea postmodum vultu, sermone, rebus denique ipsis tuto possit expromere. Aduersus hæc ultra tendere, neque Prætori, neque consiliarijs visum. ita, re infecta discessum est. seorsum dein super sacramento Confirmationis à Præторе consultus Episcopus, nequaquam negandum enixe petenti respondit; eodemque approbante Præторе, postridie ipsemet in priuato sacello, neophytum, paucis adhibitis testibus-ne rumor manaret, solemni ritu ad luctam spiritalem iniunxit. ab eo mysterio Rex nouis dein promissis optima spe tum Episcopum, tum cæteros omnes impleuit. Decem ferme dies Goæ in hospitio substitit. omnes hi dies Lusitano populo geniales ac festi fuere. è cunctis ædium sacrarum turribus campanum æs quam citatissimo pulsu dies noctesque perfonuit. Exhibiti ludi, taurorumque venatio; accessere armata saltationes & Indicæ, & Aegyptiacæ; mimi, sanniones, & petoristæ, quæque alia effusæ lætitiæ signa sunt: itemque ad Numidarum consuetudinem edita equestris pugnae simulacra; in quibus expeditosequites, uario distinctos ornatu, arundinum iaculis inter se decertare mos est. Inter quæ reuocatus domesticorum epistolis precibusque Rex, proficiscendi veniam petit. Multum illi à Præторе bombycinæ vestis, multum gossipinæ famulis in discessu donatum. omni genere honoris & officij cultus, multo quam ante Lusitanis amicior & obstrictior abiit. Hanc nos rei gestæ seriem cum ex alijs auctoribus minime spernendis, tum vero ex ipsiusmet Episcopi Goani litteris hausimus, ad Catharinam Lusitanæ Reginam datis. quibus nuntiis mirum in modum lætus Ioannes. Rex, Tanorij conuersione vna cum Antonij Criminalis exitu glorioso, non modo Lusitania tota prædicandam curauit, sed etiam Romæ Pontificatum ineunti Iulio III. per Alphonsum Alencastrium oratorem suum diligenter exposuit. quæ res, ingenti plausu, per eos ipsos dies resurgente Britannia quoque (perstitisset vtinam) bonorum ac fidelium vbique gaudia cumulauit. Sunt qui totam eā conuersionem,



uerfionem, captandæ Lusitanorum gratiæ, in tempus ab Rege barbaro fictam putent, eo maxime argumento, quod domum reuectus, promissa non præstitit. Mihi, circumspectis rebus omnibus, verisimilius videtur, metu potius quam perfidia neophytum à suscepto consilio destitisse: præsertim quod alioquin & ipse contractam cum Lusitanis amicitiam egregie coluit, & successor eius hodie sese præclare in eisdem animatum ostendit. Circa idem tempus, extorres patria dynastæ § alij duo, cum ad Lusitanam confugissent opem, tenera ætate vterque, ad Christum adiuncti, atque à Prætore Societati Iesv in disciplinam dati. Trichinamalo insulæ alter, quæ Ceilano adiacet; alter Maldiuus, quarum de regione ac natura supra docuimus, imperabat. Ac Trichinamalo quid postea contigerit, incertum. Maldiuanus, ducta in matrimonium nobili virgine Lusitana; exsul adhuc, & regno superstes, Cocini extremam ætatem degit inglorius. eius maximus natu filius, Franciscus nomine, præstanti indole & humanitate adolescens, nuq̃, cum in Lusitaniam ad Philippum Regem suis ac patrijs de rebus venisset; per noctem ignotus Olisipone, à sicarijs, contracta ex occurſu rixa, magno bonorum dolore peremptus est. Caterum inter eas quas dixi conuerſiones, confecta iam ætate Garzias Prætor, anno seculi huius vndequingagesimo supremum obierat diem; pacatam nactus quidem ille prouinciã, veruntamen de Lusitana re inter ipsam pacem egregie meritis. quippe imminutam varijs casibus classem, rostratis celsioribus ad quatuordecim cum cura suppleuerat. sulphurei pulueris in vrbe Goa instituerat officinas. Lusitanicæ ditionis oppida & propugnacula cunctis ad tolerandum bellum rebus instruxerat. inchoatam à Castrio Dientis arcis ædificationem, ex eius cõmentarijs ac destinatione promouerat: multas ab eodem ob negotia bellica relictas in suspensio lites & controuersias, attenta & æquabili iurisdictione deciderat. In Garziæ locum Georgius Capralius è regio codicillo suffectus. oppido Bazaino tum præerat: vir & bello strenuus, & pietatis laude præcellens. Hoc rerum Indicarum statu, Brasiliæ quoque syluæ ac dumeta paulatim interlucari ac § subigi cæpta. Societati Iesv id item onus impositum, cum id ipsum Franciscani iam ante fratres aliquot, Italici maxime



## *Historiarum Indicarum*

generis, forti magis animo quàm prospero euentu tentassent. Namque ante partam eius linguæ notitiam, vnus ex ijs in traiectu fluminis ignoti submersus, celebre illi ab se nomen dedit. Fratris flumen exinde appellatum. reliqui, subito coortis in aduenas Brasilijs interēpti. Succedere igitur è societate primi omniū sex; Ioannes Azpilcueta Nauarrus, Antonius Pireus, Leonardus Nonnius, Didacus Iacobus, & Vincētius Rhoterius Lusitani. Rector ijs additus itē Lusitanus, Emmanuel Nobrega præstāti virtute ac sapientia vir. Thomā sequebantur Sosa, qui primus omniū Prætor ea littora petijt. Brasiliā attigere ineūte Aprili mēse, anno post Christū natū 1549. cum ante duos circiter mēses Olisipone soluissent. Nauigatione sunt vfi admodū læta, vētisq; adeo secūdis atq; ferentibus, vti cœptis illorū adesse Deū, haud obscure appareret. Pauca tū Lusitanici generis erāt in ijs regionibus, ac vixdū inchoatæ coloniæ, seu præfecturæ antiquissima omniū, & ab Aequatore in meridiem prima, Itamaraca dicebatur, alterā Pernambucū, tertiā Illeos, quartā (Capralis quondā appulsu prænobilē) Portū securū; extremā à Sancto Vincentio nominauerant. ipsorum vero incolarum, nulli pagi, nulla oppida vrbesve. dispersis (vti supra dictum est) mapalibus habitabant, sedem pabuli ratione mutantes Nomadum in morem: iidemq; ab externis alieni commercijs, & infandis epulis adfueti, paucos aduenas & imperitos regionum, haud sine causa terrebant. Sosa comitesque ad villam quam vocant Veterem descensione facta, instructo agmine, Christianæ religionis insignia præferentes, puro & aperto loco præcella Crucis trophæa gratulabundi constituunt. Ibi mensis ferme vnus fuit mora, dum varijs artibus conciliantur animi barbarorum, & idoneus in vicino situs exquiritur nouæ vrbi condendæ, cui deinde Saluatoris nomen inditum est. Nec vani fuere conatus, & pax cum accolis inita, & spatium ædificationi designatum duobus circiter passuum millibus à Vetereuilla. inde Lusitanæ multitudini (aliquot exceptis, quibus priorem sedem mutare nō placuit) in exstructionem areæ diuiduntur. Patres, facta optione, locum domicilio delege-re, vbi MARIAE virginis adiutricis Templum hodie cernitur. id templum ab iisdem conditum est ingenti labore: siquidem populo domibus priuatim excitandis, & cingēda raptim vrbe



vrbe, dies noctesque occupato, aquari lignarique ipsimet, ac proximis è montibus materiam suis humeris baiulare cogebantur. Accedebat extrema propemodum egestas in ignoto incultoque solo; nulladum in eorum victum aut cultum ab Rege decreta pecunia. excalceati, ac seminudi, æstu & Sole torridi, quotidianum obibant opus. nec raro, plane omnibus defecti alimentis, cibaria ostiatim emendicabant euentu vario, quippe cum alii sibi quoque angustam esse domi rem dicerent; alii commoti misericordia, ex eo quod suppetebat liberaliter impertirent. eiusmodi inopia conflictatis, ad extremum Prætor modicum quid, eleemosynæ nomine ad tolerandam ex parte vitam adsignat, quoad reliquis deinde necessitatibus ab Lusitano Rege pro cætera ipsius munificentia ac pietate subuentum est. Inter eas tamen ærumnas, miserasque (si vltro suscepta pro Christi nomine incommoda nominibus hisce appellare fas est) adiuuandis quantum liceret, Lusitanorum animis, exemplo, verbo, sacramentis instabant. Sed non eo consilio tantum traiecerant pelagi, vti Europæis inquilinis, Christi notitia dudum imbutis, atque ab infantia ad numerum fidelium adscriptis, potissimum operam darent. Indigenarum illi salutem præcipua contemplatione spectabant, in cæcis opinionum tenebris, & in summa veri numinis ignoratione versantium. itaque, simulac popularis è Lusitania Sacerdos aduenit, qui curionis parochiæ munere fungi posset, concessis illi ædibus tanto sudore constructis; extra oppidum nouam in sedem loco edito commigrarunt, quem montem Caluarium ipsi dixere, circumfusus vndique barbarorum tuguriis; magno scilicet apertoque discrimine vitæ; sed sacra Deo & deuota iam capita, nihil pro salute hominum periculi recusabant. Atque hac maxime ratione Prætori ac cæteris, (quos tamen haud omnino relinquebant) satisfactum à patribus. Alia longe erat causa Vincentianæ coloniæ, quos exsules ferme, in vltimis finibus ab omni Christiano pastore disiunctos, atque ob id ipsum cœlesti carentes cibo, circumfrentibus barbaris, ipsa propemodum efferauerant loca. Ad hosce igitur omni studio recreandos refouendosque Nobrega ex ipsa suorum paucitate duos in præsentia destinauit: Leonardum Nonnium, & Didacum Iacobaum. ipse cum reliquis



## *Historiarum Indicarum*

reliquis ad Brasílios indidem cicurandos & erndiendos, incubuit. erat omnino laboriosa prouincia, & multis difficultatibus implicata. obstabat incititia linguæ, quamquam haud ita copiosæ nec variæ, tamen ab omni Europæo sermone plane abhorrentis. obstabant ingenia moresque incolarum: quod super quotidianas cædes, ac finitima bella, & inexpiabile vlciscendi certamen, dapesque diras; in crapulam quoque ac Venerem proiecti, magis in dies obtunderent aciem mentis; & flagitiornm cæno quicquid erat indolis bonæ, demergeret. Accedebat indomitum ac late patens malum, & quo valétius nihil aditum atque iter obsepserit Euangelio; veterum Christianorum, indigna tali nomine ac professione licentia, procacitasque, cum anxia cupiditate sordibusque coniuncta: vt eorum aduentus in barbarorum vicos, vitæque consuetudo, cum grauitè cunctos offenderet, tum ingentem nomini Christiano inuidiam infamiamque conflaret. Nec leue afferebat incommodum ipsa mobilitas gentis, & crebra, vt dicebamus, mutatio loci; vt sub ipsam interdum messem, fessis agricolis, & diuturnum laborem tædiumque spe largi prouentus de more solantibus, adultæ iam segetes repente apparere desinerent. Postremo deploranda erat hic etiam, in tam vastis terrarum spatijs tantula ac tam deserta operarum manus. Sed nequaquam idcirco fracti animis vel debilitati sunt patres, haud ignari videlicet, quam exiguo numero Apostoli quantas olim res Deo duce atque adiutore gessissent. & Christus idè, talium consiliorum parens fautorque, recentibus his quoque famulis ipso potissimum præside fretis, ac nihilominus pro sua parte satagentibus, aderat. Igitur incommodo linguæ obuiam itum initio nonnullorum ope ex ijs qui ante Sosæ aduentum ad villam Veterem agebant. ij primum adhibiti interpretes, vicem sermonis vtcunque supplebant. Dein, quo facilius procederet tota res, ac minus ipsi aliunde penderent patres ad Brasílicam linguam addiscendam cuncti pariter animum adiiciunt, acrique studio ac pia æmulatione perfectum haud ita magno temporis interuallo, vti essent ad confessions audiendas, & habendas conciones idonei. Azpilcueta præsertim in eo genere enituit laus; vt cognitis iam rebus que à Xauerio apud Indos fierent, vulgo Lusitani affirmarent, peculiare



culiare ac proprium munus decusque Nauarræ gentis ac nominis videri conuerſionem ethnicorum . Hoc instructi adiumento patres, doctrinæ Christianæ capita, certasque preces, vt assolet, Brasiliæ vertunt . dehinc vicos, & tuguria paulatim obire; modestia, comitate, beneficijs obligare sibi homines omnium ætatum: ac simul de rebus diuinis dicere per se ad populum incipiunt . Mirificos insolita prædicatorio motus animorum effecit in rudi tenebrisque inuoluta barbarie; satisque apparebat, cum alia, tum præsertim quæ de omnipotentia & infinitate Dei differebantur, ingenti cum admiratione æque à viris ac mulieribus accipi . Nostram etiam legendi scribendique consuetudinē ac peritiā, sine fine suspicere videbantur; cupereque sese in cultu ac religione nostris esse simillimos . verum quominus id re ipsa perficerent, inueterata morum peruersitate ac feritate retardabantur . eo acrius instare patres, vt eos humaniorem ad victum ritumque traducerent . Maximus fuit labor in cohibenda funesti ac feralis cibi consuetudine, quo Brasilius nullum palato gratius edulium norat . atque ob idipsum grauiā non semel adiere discrimina . Inter cætera illud memoratur facinus insigne . Captum in prælio ex hostibus quendam accolæ ad Caluarij montis radices attraxerant, ac diu pastum coactumque pinguescere, in epulas ingenti cum exultatione mactarant . ea re cognita, Christum suppliciter inuocant patres, hortati que inter se protinus aduolant; in tugurium irrepunt; protensum cadauer in ganeam præparantibus interueniunt: palam ac fidenter afferunt manus . Ac virorum quidem, quies ac silentium fuit, iniecto pudore, quod cum patribus nonnihil iam familiaritatis è vicinitate contraxerant . Non eadem fuit patientia foeminarum . vetulæ adstabant aliquot præcipua crudelitate, & hostis puniendi libidine . hæ sibi necopinato ereptam è faucibus prædam indigne ferentes, cum clamoribus & quiritationibus concurrere, iuuentutem ad vlciscendam adeo atrocem iniuriā excire . inde commoti nonnulli auferentibus aliquantulum resistere . sed mox vel ipsa repugnante natura, vel etiam diuinitus territi captum omittunt . ita, corpus ablatum patres in horto suo sepeliunt, aliquot cenotaphijs



## *Historiarum Indicarum*

taphiis ad fallendum appositis, si forte barbari noctu ad effodiendum atque asportandum accederent. Nec vana fuit coniectura. Facta manu per tenebras in hortum irrupere Brasiliij, pertentatisque sepulcris, ac demum inuento corpore ( tanta sagacitas fuit ) iam extraxerant brachium, cum excubantes in idipsum patres accurrunt, eademque rationis animique constantia nefarios conatus infringunt: ac, ne sapius certandum foret; ablata denuo membra intra urbem ipsam accurate defodiunt. exasperavit ea res vehementius animos gentis, muliebribus presertim incensæ facibus; ac parum absuit quin agmine facto repente urbem inuaderent. Patres quidem, iussu Prætoris intra mœnia remigrare coacti tantisper dum iræ mittercerent; aliud sibi hospitium condidere qua nunc collegij noui extruuntur ædes. Idem Prætor, qua erat pietate rerumque usu, iacta in eos crimina & voces vulgi repressit. Ipsorum culpa & rerum gerendarum auuiditate misceri cuncta, pacem turbare, ferocissimæ nationis arma irritari conquerebantur. At ille negabat euentum belli extimescendum, quod eorum causa conflatum foret. Deum quippe vel meliori affuturum causæ, vel sedatis tumultibus, è turbido ac tristi, serenum repente nitidumque diem haud dubie redditurum. Vera cecinit. mitigati præter spem animi barbarorum; & magno omnium gaudio redintegrata pax est. lentius inde cautiusque patres cum Brasiliis agere: non tam quod suo ipsi parcerent capiti, quam ne sermonem aut offensionem popularibus darent: monendo, precando, fœditatem rei demonstrando, non paucos à nefaria laniena ac popina tandem auulsere. ab alijs impetratum, vti ad eos, qui capti saginarentur, saltem sibi pateret aliquium. horum ergo, quando seruare corpora non dabatur, animis certe omni studio consulebant: Christiana edoctos mysteria, atque ad salutarem peccatorum detestationem adductos, priusquam raperentur ad necem, sacro lustrabant latice; dabantque operam, vti ex hostium ludibriis ac tererrima seruitute, ad cœlestia regna protinus euolarent: sed ne hac quidem ratione miseris diu prospicere licuit. Mali dæmonis artificio sibi persuaferant aiebantque barbari, intinctis eo baptisinate carnibus multum de pristina saporis gratia deperire. ac proinde immutata voluntate, ab illo religionis munere nostros



strōs acerbant. Itaque attenta consultatione demum eo decursum à patribus, vti neci destinatos, supremo die ad patibulum vsque prosequerentur, atque interea madenti sudario super aliquam corporis partem furtim expresso, adhibita formula sacramenti, iam iamque morituros dissimulanter abluerent. id aliquoties tentatum, ex animi sententia cessit. Per idem se re tempus Lusitanus quidam incolarum casis oberrans, incertum vnde orto iurgio, rixave, perimitur. Accendit ea res maiorem in modum animos Europæorum. nulla sargentis etiamtum vr̄bis habita ratione. vindicandam fremunt cædem, consulendum ipso initio incolumitati aduenarum; neque impunitate ac socordia diutius alendam gentis audaciam. hæc minitabundi & coram Prætorē, & inter se iactare. nec dubie ad arma itum foret; ni rem Christianam fouens Deus, barbarorum animos ad æquitatem repente flexisset. amicitia ac vinitatis iura, sanguini prætulere. deditus piaculum iræ noxius, &, inaudito apud eas nationes genere pœnæ, in os bombardæ propalam insertus, applicato ad spiraculum igne discerpitur. ea res per agros nuntiata, magnum Brasiliis terrorem incussit; simul etiam, vnius Lusitani casus, cæteros in præsentia nonnihil ab inconsulto ac temerario discursu cohibuit. inde patribus paulo expeditior Euangelij prædicatio cæpit esse. magnoq; ac fidenti animo sese multitudini subinde immiscentes, densam ignorantia nebulam, veritatis luce dispellere, opinionum portenta ac monstra fugare; magorum ac veneficorum (quibus derisui simul & quæstui captæ mendacijs & errore sunt mentes) præstigias atque fallacias aperire ac tollere nitentur. In ijs præcipua astutia veterator, summam sibi auctoritatem vbique pepererat; tamquam pro Aesculapio venditabat sese; ad ægrotos omnes illico aduocabatur. Hunc Nobrega data opera aggressus, rogat; qua tandem vi res tantas efficiat; illumne consulat Deum, qui totam hanc rerum vniuersitatem verbo condiderit, regiamque ac domicilium habet in cælo; an tartarei cacodæmonis consuetudine vtatur & opera. impudentissime arrogantissimeque respondit, se quoque Deum esse, & Deo prognatum; certum etiam hominem coram produxit, à quo grauiter laborante morbum ipse depulisset. illum præterea regnatorem cœli Deum, sibi esse amicissimum;



## *Historiarum Indicarum*

simum; ac sæpe inter nubes, tonitrua, ac fulmina ostendere sese: & alia eiusmodi multa, superbiam vanitatisque plenissima. Hanc Nobrega tantam audaciam impietatemque non ferens, aduocata concione institit singula hominis dicta firmis argumentis maxima vocis contentione refellere: convictumque tandem ac fractum, ad sententiam simul moresque mutandos adduxit; amice comiterque pollicitus, se pro illo apud verum Deum fore deprecatores. ac paulo post, cum se ipse initiandum sponte obtulisset, in catechumenorum adscriptus est numerus. is numerus pro multitudine reliqua oppido exiguus erat: ægreque admodum necessaria Christianæ sapientiæ præcepta & dogmata capiebant. post diuturnam institutionem, qui maxime idonei ad baptismum euasere, vitali fonte lustrati, cumque vnica vxore, cæteris dimissis, rite coniuncti sunt. ex ijs vnus, lætitia gestiens adiit patres: nutu gestuque significans & affirmans, proxima nocte se se apud superiores fuisse, incredibili gaudio & suauitate perfunctum. Cætera plebs à patrijs epulis, & ebrietate, & saltationibus impudicis, & multiplici coniugio abstrahi ac diuelli non poterant. neque in ijs colendis villo pacto respondebat operæ fructus. quodcirca socij, nequaquam vltra ferere super spinas, sed puram aggredi tellurem è veteri præcepto constituunt. Infantes primum quamplurimos in tutum recipere (si cui forte ante vsum rationis obeunda sit dies) & saluari summi Pastoris nota insignire festinant. patres dein matresque familias, precibus, promissis, blandimentis adducunt, vti puerilem ætatem ac sobolem, sibi in disciplinam dent. hosce postmodum ipsos, cibo & crepundijs paulatim illectos, omni arte mansuefaciunt. nec poenitendus fuit labor. siquidem & tradita facile accipiebant, & retenta fideliter, grandioribus natu, quotidianæ consuetudinis & linguæ beneficio per otium inculcabant; & suo ipsi exemplo sensim cæteros à nefarijs atque impuris moribus auertebant. Parentes interea (vt est etiam improbis ipsa per se virtus amabilis) filiorum obsequio, sobrietate, cultu, doctrina lætari, eosque vltro ad proficiendum accendere. ac tantus erat Christianæ institutionis amor, vt pijs catechismi carminibus, ac beatis vocibus IESU & MARIE, littora, campi, luci perstreperent. Neque ita multis interiectis diebus,



bus, Brasilijs centum maturi baptismo exstiterē. is baptis-  
mus quanto maximo licuit apparatu pompaque celebratus est per-  
acto Paschate, qui præcipue dies, vetere Ecclesiæ instituto,  
sacris eiusmodi sunt destinati. cæteros catechumenos ad se-  
ptingentos, dum amplius erudirentur, in aliud tempus, quam-  
quam ingemiscētes & impatientes moræ, differri placuit. Sub  
eiusmodi rerum initia, subito factum, uti neophyti pene om-  
nes in morbum alui, oculorumve, ac varios abscessus incide-  
rent. hæc magi videlicet ad baptismum inuidiose referre. Lau-  
tione illa tentari valetudinem; doctrina ac prædicatione, pe-  
stem ac perniciem populis importari calumniabantur. Sed  
ipsum mendacia & improbitatem, Dei beneficio reddita  
mox Brasilijs firmitas, aperte redarguit. ea recepta, instite-  
re cum alijs, monitu patrum, oratoria sacrasve ædes publice  
exstruere, quo ad conciones & catechismum vndique conue-  
nirent. duæ duobus locis magno Christianæ rei bono excita-  
tæ. Agitatum etiam à patribus (idque dein tempore proce-  
dente perfectum est) uti quod de Theseo iactat Græcia, spar-  
sos per tuguria indigenas, in pagos & oppida cogerent; agris  
colendis adsuēfacerent; eorumque cœtus legibus ac magistra-  
tibus temperarent. Circa idem fere tempus, quo Prætor in  
Brasiliam est missus, Conganis quoque Aethiopibus ab Rege  
Lusitano pari diligentia & caritate subuentum est. Alphonsus  
iam ante decesserat Rex, cuius de singulari virtute ac pietate  
initio demonstrauimus. Successor eius, Iacobus nomine,  
quamquam Christianis initiatus sacris, tamen ab illius viri ve-  
stigijs atque itineribus longe deflexerat. Hunc imitati popu-  
lares, ad patria vitia leui momento ruebant. nec multum erat  
in Europæis vel institoribus, vel etiam sacrorum ministris,  
auxilij, quippe tantum aberant à miseris Aethiopibus verbo  
aut exemplo iuuandis, ut ipsi potius constringendi vinculis,  
maloque ad officium cogendi viderentur. His rebus cognitis  
Ioannes Tertius, è Conimbrigenfi collegio quattuor viros in  
vineam illam, cæteris eandem sortem ardenter optantibus,  
impetrauit: Christophorum Riberum, Iacobum Diazium, Di-  
dacum Soueralium, queis Georgius Vafæus præerat. ij ab O-  
lisipone ad celebrem Sancti Thomæ insulam nauigarunt, ex  
qua facilis ad Littora Congi traiectus est. in ea insula feбри-  
bus



## *Historiarum Indicarum*

bus alijsque morbis acerbe vexati, necdum recuperata valetudine Pindam emporium Congani Regni transmittunt. Fororum aduentu audito Rex à leucis quinquaginta è proceribus duos obuiam misit. ab ijs in regiam ligneis equis de more perducti. rudis artificij tale commentum est. Cantherio seu tigno dodrantalis ferme crassitudinis, pedum octo longitudinis, bubulum corium ad fellæ amplitudinem intendunt. huic ephippio diuaticatis cruribus viator insidet, baiuli succollant duo, & vbi longius iter est, succedunt alij. huiusmodi caballis languidos adhuc patres in interiora prouectos, comiter accepit, in Ioannis videlicet gratiam, Rex, vna cum liberis & ciuitate ad Crucem extra mœnia positam honoris causa progressus. Tum illis adsignatur hospitium, cuiusmodi Aethiopum ædificia sunt, culmo paleisque contactum. Ibi Souerallius publice ludum aperuit. sexcentos admodum pueros labore maximo & litteris, & Christianis præceptionibus imbebat. Cæteri ad emendandam populi ac procerum vitam omni ope connixi primum, dein ad prædicandum ethnicis Evangelium operam contulere, nec sine fructu: quippe intra quintum mensem Riberus mille septingentos Aethiopas probe institutos, ad Christum adiunxit: Diazius quadringentos: Vassæus trecentos. idemq; Vassæus cum fido vno duntaxat interprete, viatico prorsus nullo in proximos pagos egressus, duomillia & septingentos baptismo expiauit: ac præter templa olim in vrbe Alphonsi beneficio condita, tria in finibus excitauit dicauitque; Saluatori vnum, MARIÆ edutrici alterum, tertium Diuo Ioanni Baptiste. ingrauescente dein morbo, domum redire coactus: ac reliqui item aduersa conflictati valetudine (siue id è grauitate cœli, siue ex insolentia deterioris cibi contingeret) à spiritalibus ministerijs ad necessariam corporum curationem haud sine magno ipsorum dolore traducti. Accesit ad prædicationem interrumpendam, Regis quoque alienus à studio religionis animus cum rei Christianæ, quæ ipsius auctoritate ac munificentia in primis egeret, segnitèr admodum ac maligne pro sua parte consuleret: atque inter cætera pessimi exempli delicta, ab improborum consuetudine, & à multiplici pellicatu auelli non posset. Haud paulo  
§ felicior, eadem tempestate, fidei processus erat in India. &  
Capralius



Capralius Prætor, tuendis ornandisque neophytis ethnicos ad Christum inuitabat. Consilio, auctoritate, ope, Dei seruis & Euangelij præconibus aderat. Præter hæc, attollentem sese denuo Zamorinum, exercitu mature coacto represit. Couletum, Tiracolum, Pananem Calecutanæ ditionis, vi cepit, facibusque subiectis incendit; agros vastauit; palmeta succidit; magnum numerum æque maioris ac minoris formæ nauium flammis absumpsit. ad extremum, oræ Malabaricæ procures, Calecutani socios ac fœderatos, Cocino militantes, intra Ciembem insulam deprehensos obsedit: reductisq; iam in arctum rebus, nuntius de Alphonfi Noroniæ successoris aduentu in castra perferatur. E Lusitania profectus, Ceilanum attigerat. ad eius rei famam dilapsi milites, Noroniæ visendi cupiditate. & Capralius ipse ad prouinciam illi tradendam, vix anno Præturæ circumacto, discessit; inde soluta præter opinionem obsidio. Interim ex ulterioribus Indis valde iniquos infestosq; Euangelio sese præbebant reguli Molucenses. ij cum denuo in Lusitanorum conspirassent cædem, patefactis insidiis oppressi, vires omnes atq; consilia ad neophytos ab Christi cultu absterrendos, Caciziorum instinctu verterunt. neq; ita difficile fuit, exacerbatos Europæorum iniuriis; flagitiis atq; peccatis offensos, necdum in veræ fidei ac solidæ virtutis amore fundatos, partim suadendo, partim insectando vexandoq; conuellere. Ergo, cum alij, tum vero qui Mauricas insulas incolebāt, quorū ingens in oppido Tolo erat numerus, Xauerij patrumq; auctoritatis atq; institutionis oblitto, rupto baptismi sacramento, propalam ab Ecclesia Christoq; desciscunt: ædē sacram euerrūt: Cruces & sanctorum signa succidunt: Lusitano Rege contempto; Geilolij tyranni imperio ac ditioni sese subiiciunt. Neq; impune tanta illis impietas celsit. primū ager, totius regionis antea ferocissimus, mutata subito natura, squalidus atq; effœtus euasit: cōditę in horrea fruges, dira tæbe prorsus exesæ: dulce aque, salugine atq; amarore cōtracto, noxię redditę: fame dein ac pestilētia multi omniū etatū ordinūq; mortales absūpti. ac reliqui nihilominus in obstinatione p̄sistere. satisq; cōperto, sibi nouū à Lusitanis imminere bellū, cōtra oī arte parare sese; aditus alios muris, alios vallo fossaq; & opibus obiectis obstruere; milites ac tormēta clā ab Geilolia submissa locis idoneis collocare. Inde cum se aduersus omnem



## *Historiarum Indicarum*

externam vim sat superque tutos putarent, ac deterrimus quisque ferocissime loqueretur; Lusitani parua, vt solent, manu, magnæ rei molem aggressi, cum auxiliaribus manipulis aliquot superueniunt: missisque è classe internuntijs, blando ac benigno sermone desertores ad sanitatem reuocare conantur. se non armis aut multitudine fretos, aut sanguinis audios accessisse; verum salutis ipsorum studio adductos, & omnipotentis Dei præsidio atque ope subnixos: quem illi si pergant spernere, neque eos admissi facinoris poenitentia capiat; maiore in dies mercede lenfuros, quam graui piaculo datam Christo fidem, & initam cum Lusitano Rege amicitiam, ac diuina pariter & humana foedera violarint. Aduersus ea cum inflato ac pertinaci animo respondissent barbaris, iam ab ignoto & externo mercatore insultatum indigenis; non vltra ferendam impotentis dominatus acerbicatem; sibi quoque auxilia, machinasque, ac bellica tormenta suppetere; denique se Christianos nullo pacto futuros; continuo in amentes efferatosque euiden-  
tior quam vnquam alias vindicta coelestis apparuit. circa meridiem obscuratus repente sol. densas hinc tenebras cum pauidi ac tremebundi palparent; ecce tibi rursus, vicini montis è vertice, cum horrendo mugitu crebrisque tonitribus, qualia maioribus tormentis eduntur, sordidum ac tetrum erumpit incendium; tantaque cineris, pumicumque, & ambustorum ligne lapidum vis, vti propugnacula & muri coronas æquarer. accessit terrarum motus ingens, quo arbores auulsæ radicitus & inuersæ, tecta omnia diruta præter vnum templo nuper euerso contiguum. quin, proxima quoque palus, oppleta saxis & improuisa congerie, late restagnans, multos mortales vna cum brutis animantibus obruit. neque horas paucas, vt ante, sed ipsos tres dies noctesque tartarei camini ardor ac sæuitia tenuit. Post triduum steterè flammæ, & caligo discussa: facilique ac plano iam aditu Lusitani procul è nauibus omnia contemplati, descendunt. ac defensoribus aut exitio sublati, aut meru dilapsis, iterum nullo certamine cuncta peruadunt. Arma dein illata Gellolio is duodeuiginti iam annos cuiusdam insulæ, septem à Ternate leucas, arce sese tenebat, partim situ manuque partim etiā æneis munita ballistis, quas ille Christianis, interposita hospitij fide captis, ac subinde mactatis ademerat: ea Lusitani



fitani arce tertium intra mensem Bernardini Sofæ confilio ac virtute potiti sunt. ipse tyrannus, cum viuis in potestatem venisset, memor flagitiorum ac scelerum, sibi met mortem veneno consciuit. in eius locum filius ab Sofa cæterisq; suffectus. His cognitis rebus confestim illuc ab Ternate Ioannes Beira § transmisit. territos incolas palatosq;, suavi oratione ac familiari vultu contraxit: monitosq; per eam defectionem quanto quamq; nefario se se obstrinxissent crimine; docuit nihilominus, modo facti peniteret, nō esse cur de venia desperarēt: quippe nullum excogitari posse delictū, diuinæ bonitati atq; clementiæ par. Multiplici malo emollita iam & subacta erat gentis duritia. hoc altius amantissimi patris monita penetrarūt. ergo ubi sat magno acriq; dolore compunctos, & priora consilia cum gemitu detestantes, ac sibi met ipsis iratos animaduertit; bono ac fidenti animo iubet esse: tū solemni ritu per sacram confessionem expiatis, Ecclesiæ sacrosanctæ, Christoq; salutis humanæ parenti restituit. Inde noua rerū omniū facies. pariter hominibus recta mens, laticibus dulcor, telluri fecunditas redijt: luctus, mœror, atq; formido, in gratiarū actiones, hymnos, latitiamq; conuersa: deniq; inaudito miraculo, noxij quoq; mures, qui fata per id tēpus in perniciē gentis eroserant; aque lustralis, adspergine protinus ethnicorū in arua compulsi, tātō quidem eorū dāno, vti vulgo cū Christianis iniuriā expostularent: mox etiā tantis ac tā varijs permoti prodigijs, gregatim ad Beirā baptismi gratia confluerent. ijs, quod pater solus cūctis ministrare nō posset, socios à Ternate accersijt primū: dein, cū ne ij quidē sufficerēt, magistratū rogatu in Indiā ad subsidia petenda profectus est. Interea Gaspar intra insulæ Armuzæ fines exacto ferme triēnio, Goā superiorū accitu reuertit, Iaponios inde Sinasq;, si per eosdē superiores liceret, tū etiā Scythas, vt ex ea parte immēso circuitu Romā ipsam adiret, vasto & celestibus flāmis ardēti agitās animo. Verū in digressu ab Armuzianis, haudquaquā ei leue negotiū fuit. Nō enim precibus duntaxat, lacrymisve, vti mos est, ne se desereret, sūmi pariter infmiq; tēdebāt; amica parabatur ei vis: positeq; locis opportunis insidię. quas ille frustratus, celeri lēbo ad Lusitanā peruenit classem, capta & direpta Catifa Canarinos ad portus eo ipso tēpore nauigātē. ibi magno militū ac naualis turbę gaudio in vnā ē



## *Historiarum Indicarum*

rostratis acceptus, ad Bazainum applicuit. A Bazaino, Antonij Laurerij Franciscani inuitatu, ad salutandos in vicino Christianos excurrit, ab eodem Antonio per Euangelium genitos. Multa, in eo tractu, priscae artis & magnificentie monumenta visuntur. in ijs Canarini fanum quod appellant, vna cum ædibus priuatorum multis, itemque vijs & angiportibus, nec non cister-nis ad centum, è solido ac viuo lapide ferramentis excisum. aliud item ex vna petra fanum elephantis vocatur, multis insigne simulacris, ac duobus præcipue colossis ingentibus, terna-queis capita, totidem pedes manusq; . eiusdem operis tēplum aliud incerto titulo, Antonius rite expiatum, Christo dicaue-rat. in templum id Gaspar obuio Christianorum agmine, præ-cinentibus tubis, effusa cum lætitia exceptus, rem diuinam peregit, grauiq; & efficaci oratione animatis ad fidē officium-que neophytis, Tanaham inde, Ciaulumque, postremo Goam cunctis optatissimus appulit. At Xauerius, ex Iapone Indiam, ex India retro Sinarum littora petiturus, primum Christianos in digressu confirmat. Cosmum Turrianum, & Ioannem Fer-nandum, Amangutiano præficit gregi. ipse in Bungum, quo Lu-fitanorum appulsam audierat nauem, recta contendit. Rex erat Bungi tum adolescens, & cœcis errorum tenebris inuolu-tus. artamen cognito quanta Xauerij esset virtus, quāta etiam apud Lusitanos auctoritas, ( quorum ille, vt plerique eius tra-ctus dynastæ, commercium ac societatem expetebat ) adue-nienti patri sese valde humanum & honorificum præbuit: a-beunti, comitem è suis familiaribus cum epistola & donis ad Indiæ Prætorem dedit. idem, cæteris è Societate, qui in Ia-ponem postea missi sunt, eandem humanitatem ac beneuo-lentiam præstitit; proprium in suo regno domicilium adsigna-uit; aditum ad Regum finitimorum familiaritatem gratiamq; litteris ac nuntijs munijt: quin etiam, in maximo rerum sua-rum discrimine, inter grauissimas bellorum ac seditionum pro-cellas, eorum saluti & incolumitati præcipua fide curaq; con-suluit; ac duodecimo demum post Xauerij profectioem anno, Christiana sacra suscipiens, quæ ad id vsque tempus me-tu seuerioris disciplinæ fuerat auersatus, de tanti patris nomi-ne Franciscum appellari se voluit. nouissime vero, ad Gre-gorium XIII. Pontif. Max. legatos è regia stirpe, venerationis & ob-



& obsequij nomine destinavit: qui Olisiponem ipsius ferme triennij spatio, perquam ancipiti nauigatione deuecti, & à Philippo Catholico Rege in primis munifice comiterque tractati, bonam Hispaniæ & Italiæ partem, vt inaudito post omnium seculorum memoriam, ita gratisimo cunctis principibus populisque spectaculi genere peragrarunt. Cæterum Xauerius, præter Bungensem, de quo dicebamus, Regis internuntium, ex ipso etiam fidelium numero viros duos egregie cordatos assumpsit, Matthæum, & Bernardum, ad urbem usque Romam Iaponice indolis exempli causa mittendos. quorum alterum Goæ mors abstulit, alter, quo intenderat, cursu feliciore peruenit, & ab Ignatio in Societatem acceptus, quo in vulgus obscurior, eo per otium attentior, exquisitas Ecclesiæ Romanæ cæremonias, religionesque, & sacrorum apparatus est contemplatus; celeberrima sanctæ vrbis templa insigni cum animi fructu, ac pietatis incremento non semel obiit; patriam deinde repetens, multa Iaponijs narraturus; in Lusitania letali correptus morbo, Conimbrigæ supremum vitæ actum haud sine plausu peregit. Hisce ergo comitibus à Bungo Xauerius Nouembri mense anni quinquagesimi primi, paucis diebus peruenit ad Sinarum insulam Sanctianum, quo cõmeabant per ea tempora Lusitani, leucas ab vrbe Cantone triginta. ibi inter alios opportune reditum ad Indos parantem Didacum Pereriam offendit, nauarchum experientem, & industrium, & Sinarum vtcunque littoribus adfuetum. Cum hoc sua pater de introitu aggrediendo consilia contulit. Aptius nihil vtrique visum, quam ab Lusitano Rege ad Regem Sinarum, amicitia, & societatis ineundæ cum litteris ac donis orator. quam rem infeliciter olim quorundam culpa tentatam, mitigatis ipsa die Sinarum animis, modo temeritas abesset ac fraus, multo iam nunc melius cessuram, haud inani coniectura sperabant. in huius porro noui legati comitatu posse Christi nuntios in ipsa mediterranea dissimulanter induci, qui vel aliquam linguæ consuetudinem, vel interpretes certe nacti fidos, magno deinde animo, diuina subnixi ope se mentem Euangelij facerent. Cum ea maxime ratio probaretur; legationem sibi (ni Prætor abnuat) Pereria ipse deposcit: cætera, nempe Xauerius. Hac mente profectos ab



## *Historiarum Indicarum*

Sanctiano, atrox procella è regione Cincei portus inuasit, auul-  
samque repente scapham, & in ea duos è nautico ministerio  
Mahometanos, ex omnium oculis abstulit. Furebat ventus :  
aquarum insani montes vndique minabantur exitium : nau-  
tæ maioribus demissis antennis, modico tantum velo tempe-  
statis vim subterfugere nitebantur : memoriam scaphæ, pro-  
pior metus ac terror cunctis excusserat. Xauerio tantum ea  
insidebat cura. neque id, euadendi consilio si naufragium in-  
cideret ; sed miserum illud animarum par ab sempiterno inte-  
ritu vindicandi, nimirum diuinitus concepta spe, si reciperen-  
tur, Christianos aliquando futuros. Hoc ille studio accensus,  
quamquam alieno tum tempore, intentos gnbernaculo nau-  
clerum ac præfectum aggreditur. diu renitentem vtrunque  
monitis, obtestatione, auctoritate peruincit, vti dolones de-  
mitti protinus imperent. ægre id exsequuti prorætæ, mox,  
cum ne sic quidem è summo speculantibus appareret scapha;  
pelago sæuiente vela rursus expediunt. Tum, inuictò carita-  
tis ardore ad proram aduolat pater : iniectis antennæ mani-  
bus, haud intermissa ad Deum prece, paululum adhuc moræ  
per summam contentionem extorquet : puerum iubet, dispi-  
ciendi causa, denuo rudentes ascendere. Cum hæc maxime  
fierent, ecce subito aduentans præter omnium opinionem sca-  
pha conspicitur. Protinus clamore sublato contracti dolones :  
atque ad eam exspectandam, cursumque facilius inhibendum,  
obliqua oneraria contra maris impetum sistitur. appropin-  
quanti dein eminus injici funem Xauerius vetat, affirmans ad  
ipsum naus latus recta accessuram esse per se : neque aliter fa-  
ctum. per medios fluctus facili admota remigio, tandiu stetit,  
dum tenacius religaretur ad puppim. lenitum interea pelagus.  
Mahometani è tanto periculo sospites, instante Xauerio cate-  
risque, ad Christum extemplo conuersi. cuncta prorsus vti  
prædixerat, euenere. scilicet magnitudine rei primo defixi  
omnium animi : noua dein perfusi lætitia, diuinam clemen-  
tiam gratulantes agnoscunt : ac prospero demum cursu Mala-  
cam deferuntur incolumes. ibi solita celebritate pater acce-  
ptus, non diu substitit. inspectis tantum & confirmatis in ope-  
re focijs, ex ea vrbe Cocinum, Cocino Goam deuenit Februa-  
rio mense, anno seculi huius quinquagesimo secundo, quatuor



non totis mensibus è Iapone illuc vsque consumptis . eius ad-  
uentus , quo diutius ac longius abfuerat , eo maiorem vniuer-  
sæ ciuitati lætitiā attulit . ipse , à descensu . primum omnium ,  
publica nosocomia , & sacra cœnobîa religiosorum inuisit ; dein  
ad collegium diuertit . Ibi Gasparem ac locios perquam sua-  
uiter amplexatus , reliquum vnum esse cognoscit , qui dudum  
in lecto decumberet . is è diuturno ac letali morbo desperatus  
à cæteris , nunquam tamen spem abiecerat ipse , modo Xau-  
erius ante supremum adesset diem . neque mendax fuit fiducia .  
vti valetudinarium ingressus pater , iacentem grato sermone ac  
salutatione vtî solebat , impertiit ; impositisque capiti mani-  
bus , consueta in eam rem ex Euangelio effatus est verba ; illico  
leuationem sensit ægrotus , mox etiam vires omnino recepit .  
Obnitente dein rursus amicorum turba , nihilominus in matu-  
randam profectiōem intentus , Episcopo Prætorique suas & 8.  
Pereriæ cogitationes aperuit . laudabiles vtrique visæ . & Præ-  
tor haud grauate principem legationis Pereriam declarauit , ei-  
demque conciliandę fidei litteras ad Regem Sinarum , nomi-  
ne Lusitani Regis attribuit . Cæteris ornamentis donisque  
regalibus Pereria suomet sumptu magnifice legationem in-  
struxit . Xauerius interea , Indicę prouincię res , ne quid per ip-  
sius absentiam caperent detrimenti , accurate ordinabat . Ante  
omnia Gasparem , Paulo Camerte piis aliis muneribus occu-  
pato , quamquam inuitum , & comitandi per asperrima quæque  
patris cupiditate flagrantem , Goano collegio cæterisque præ-  
posuit . Ad Bazaini culturam Melchiorem Nonnium ; ad Ta-  
nahę , Consaluū Rhoterigium ; ad Cocini , Franciscum Henri-  
cum , in Piscarium littus Aloysium Mendium ( qui deinde  
propter Christum ibidem à Barbaris iugulatus est ) ad Sancti  
Thomę coloniam , Ioannem Lupium abire iussit . in Lusita-  
niam vero , atque inde Romam ad demonstrandum Ioanni pri-  
mum Regi , tum Ignatio Indicę prouincię statum , & petenda ab  
vtroque supplementa , Andreā Fernandum cum Bernardo  
Iaponio , vtî paulo ante diximus , destinauit . In Iaponensem  
denique vineam , Cosmo Turriano , & Ioanni Fernando sub-  
sidiarios designauit Balthasarem Gagum , Petrum Alcaceuam ,  
Eduardum Syluium . hosce Malacam vsque secum ducebat .  
Hisce aliisque rebus , tum è domestica disciplina , tum è pu-  
blica



## *Historiarum Indicarum*

blica utilitate compositis; inter pias deducentium lacrymas  
faustasque preces, & certantia vota discessit x v. Kal. Maij,  
tertio circiter mense quam è Iapone redierat. Periculosa in  
primis ea quoque nauigatio fuit. secundo prouectos flatu,  
adeo subita ac fœda tempestas inuasit, vti neque nautarum co-  
natus artesve, neque vasorum onerumque iactura, superandis  
fluctibus, & naui regendæ sufficerent. Inde, cum exsangues  
metu, humescentibus virorum etiam alioqui fortium oculis,  
relictas alij coniuges liberosque, alij tetrum & informe genus  
leti miserarentur; ingenti animo pater in medium prodiens,  
pauorem atque formidinem singulis demere; excitare iacen-  
tis; certo vultu ac sermone haud dubiam Dei benignitate sa-  
lutem omnibus polliceri. Castellum dein onerariæ scandit  
intrepidus. reliquiariam thecam è collo sibimet detrahit: li-  
neaque suspensam, vnius triniq; Dei nominibus fideliter in-  
uocatis, mari mergit; ac rursus ad cœlestium pacem exposcen-  
dam, sub tabulata succedit. Haud ita in longum extenderat  
preces: cum è dira procella, turbidoque ac fulminante cœlo,  
optata lux primum, mox plena tranquillitas rediit. Hinc re-  
creati Lusitanicum se defunctos iam periculis crederent, aper-  
te monuit Dei seruus, haud leuius adhuc superesse discrimen.  
neque falsa prædixit. in breuia syrtesque paulo post illata ca-  
rina, cum aliquandiu ipsa inarasset vada; vectoribus pariter ac  
nautis nouo horrore intrementibus, eodem deprecatore in-  
altum euasit. Malacam deinde peruentum. ex ea vibre pater  
Balthasarem Gagum eiusq; consortes in-Iaponem sine cuncta-  
tione transmisit. ipse cum Pereria sese ad reliquum itineris  
conficiendum parabat. Beno iam loco videbatur esse res.  
quippe non modico nauigationis emento iam spatio: & ora-  
tore cæterisque ad suas cuiusque partes rite obeundas accen-  
sis: cum repente, vnde minime oportuerat, grauitum Chri-  
stianæ rei damno, tum bonorum dolore discussa tota legatio  
est. Præfectus eo tempore Malacam obtinebat, haud satis  
æquo in Pereriæ dignitatem animo, ac proinde coloniæ infre-  
quentiam causatus, acceptasque clades, & imminens ab Aceno  
bellum; nauem legati, legatumve ipsum, è portu excedere ve-  
tuit. Neque, obfirmatam illius mentem, aut amicorum horta-  
menta, aut Pereriæ obtestationes, aut Prætoris decretum ac lit-  
teræ,



teræ, aut Xauerij expostulatio, causæque bonitas, & Pontificia ipsa cum coelestibus diris minisque diplomata, flectere valuerunt. denique, quantam in eo negotio diligentiam & alacritatem, vel certa cum impensa periculoque præstiterat designatus orator, tam se alter hic, nobilissimæ legationi actionique infestum aduersarium præbuit. Neque vero, in hac etiam vita, (ne quis indormire Deum rebus humanis putet) debita meritis vtriusque stipendia defuere: siquidem Præfectum execrantibus quacunque incedebat viris fœminisque, elephantiaca primum inuasit lues: deinde, haud vno crimine, sed peculatus præsertim ac rapinarum accersitus, magistratu deiectus, catenis onustus, in Lusitaniam Regis iussu transiectus est. ibi cognita causa, damnatus, redactis in fiscum bonis; ad hæc, morbo in dies ingrauescente, quod reliquum vitæ fuit, per summam, & animi ægritudinem, & corporis fœditatem, egens, infamis, ab omnibus contemptus exegit. Contra, Pereria, egregij studij conatusque non modo præclarum ex optimi cuiusque commendatione, atque adeo ex ipsa conscientia fructum, sed etiam splendida & opima postmodum à munificentissimo Rege præmia retulit. Xauerius autem, quam §  
tanta præsidio ac spe subito destitutus; haud tamen idcirco despondit animum, neque consilium saluberrimæ expeditionis abiecit. Solatus Pereriam, atque ad obliuiscendam iniuriam, & condonandas Christo inimicitias adhortatus, itinere cepto perrexit ipse cum vno è Societate Alexio Ferreria, externisque pueris duobus, quorum alter alienigena Sinensem linguam penitus ignorabat; alter, cui nomen Antonius à Sancta fide, genere Sina, in Goano diui Pauli seminario à primis educatus annis, pertenuem retinebat patriæ linguæ notitiam. Hoc tantulo comitatu Sanctianum reuectus pater, ante omnia in littore temporariam ædiculam ex obuia materia raptim exstruxit. ibi rem diuinam quotidie facere, & Lusitanos negociatores omni officio adiuuare, vti solebat, instituit. simul, è Sinis qui ad eam insulam commercij causa ventitabant, peritum interpretem sibi parauit, qui tamen postea iniuncto iudicij pœnarumque metu, fefellit fidem. ab aliis, de gentis quotidie moribus, legibus, institutis, diligenter querebat, nec non de ratione insinuandi se in eas vrbes, hominumque colloquia. quam  
illi



## *Historiarum Indicarum*

illi rationem, cum sine euidenti capitis discrimine propter seuerissima interposita edicta iniri negarent posse; tamen Xauerius, ex ijs, quæ de Sinarum indole ingenioque subinde audiebat, acriore in dies accendebatur studio, tam docilem, tam politam alioqui nationem è gentili caligine ac tenebris eruedi: ac modo Euangelium afferre miseris quoquomodo liceret; omnes cruciatus ac mortem cum eorum salute non solù æquo, sed etiam libenti paciscebatur animo. Huic patris voluntati studiisque maxime Lusitani obfistebant, tum ipsius caritate, quem diligebant omnes ac reueriebantur vnice; tum vero nimia quadam sollicitudine, & anxia cura fortunarum suarum; graui scilicet pauore concepto, ne vetitos intra fines publica nulla fide subito deprehensus Europæus aduena sacerdosque, non ipse tantum acerbissimas illico daret pœnas, verum etiam denuo in Lusitanum omne nomen, regionum satellitum furorem atque iras accenderet. atque ob id ipsum crudelitatis eorum cum vetera documenta promebant, tum etiam recens in Lusitanos aliquot edita, qui tempestate in littus eiekti; comprehensi confestim ab incolis, teterrimo etiamtum carcere tenerentur. quod si naufragis & eiektitijs euenisset; quid tandem illi futurum, qui se se, prudens volensque, nullis cuiusquam opibus vel commendatione fultus, intra illorum præsidia & septa non dubitasset includere? Deinde, vt maxime cuncta experiri libitum foret, quam tandem facultatem habitura esset res? calcaturumne cum comitibus æquora? an, centum fere millia passuum (quantum interesset spatij) trabe vel tabula traiekturos? nam portitoris quidem, & nauicularij nullam omnino fore copiam. Lusitanos, omni appulsu continentis arceri. Sinis, capitale esse, quemquam externum iniussu Præfectorum inferre. quod si quis adductus pretio, suam in id operam quamuis occulte detulisset; verendum tamen, ne pernumerata mercede, receptum cum inermi socio puerisque peregrinum, vel in deserta quapiam insula per scelus exponeret; vel breuiore facinoris compendio, nequid indicij emanare posset, in altum è naui proijceret. Cum hæc ad terrorem à Lusitanis haud absurde proponerentur; nunquam tamen Xauerius de sententia potuit demoueri: tantum, quod ad ipsorum incolumitatem ac mercimonia pertineret, omnem illis dempsit



dempfit timorem ; per sancte pollicitus , non ante se quo tendebat iturum , quam confectis ipsi negotijs ab Sanctiano soluisent . cæterum à transmissione in id tempus præparanda nō destitit , aliquandiu nullo successu , quippe Sinæ institores , ad quos erat necessario confugiendum , appellati ea de re , vulgo negabant . ad extremum tamen pecunia euctus est vnus . huic cum Xauerio in hæc pacta conuenit . Sina lembum , occultandæ rei gratia excluso omni alio remige , nauta , vectore , suis duntaxat filijs famulisque ad iter in diem certam instrueret . transuectum in suburbia Cantonis patrem , ad tres quatuorve dies clam haberet apud se ; tum intempesta nocte cum sarcinula & libris ad portam vrbs nemine cōscio destitueret ; vnde perductus ( quod extemplo videlicet erat futurum ) ad tribunalia , quicquid liberet ibi de religione , alijsve de rebus , periculo suo palam explicaret . Xauerius vicissim , cuius opera transuectus fuisset prorsus haberet occultum : eidemq ; nauili nomine daret piperis quod ducentorum paulo amplius aureorum efficeret summam . id piper Xauerio Lusitani , quando eum ab incepto reuocare nequiuertant , in idipsum pro amicitia fuerant elargiti . ea pactiōne transacta pater interea omnis tormenti patientiam assidue meditari : martyrij palmam cum animarum salute coniunctam dies noctesque sibi proponere : conditum profectiōni tempus per summam cupiditatem expectare . Inter hæc abeuntibus paulatim Lusitanis , aduersa valetudine laborantem Ferreriam , ne sibi in tam ancipiti re impedimento foret , in Indiã tēpestiue remisertat . mox ipse quoque in febrem incidit : qua dies aliquot acerbe vexatus , cum onerariæ in salo iactationem ægre admodum ferret ; in casam inde sese recepit apertam , ventoque ac frigori peruiam , ex ijs quas ad extremam littoris oram , Lusitani ab Sinis ædificatione prohibiti , è paleis ac ramalibus momento excitare , atque in discessu disturbare consueuerant . Ibi quinto ab discessu die , dum Sinam ex composito portitorem expectat , nauarchis iam Lusitanis præter vnum cunctis ex eo loco profectis ; cum ad refocillandas vires nihil omnino suppeteret , in summa rerum omnium egestate , germanus Christi in morte pariter & in vita discipulus , accensa diuino amore iacula è psalmis ferme petita subinde in cœlum emittens , **I E S V M Q V E , ac**  
**M A R I A M**



## *Historiarum Indicarum*

MARIAM suauiter inuocans; è corpore ex quo iam pridem eminebat, excescit 1 v. Nonas Decembris, anno Christi nati (nam de ipsius quidem ætate nil traditur) supra sesquimillesimum quinquagesimo secundo: Indicæ vero suæ peregrinationis, vndecimo. Ea de re serius moniti Lusitani mœrentes accurrunt: mirantur habitum quiescenti quam mortuo propiorum: compositos artus; decoram faciem; ipsa deniq; pietatem adhuc spirantia lineamenta. dein rati id quod erat, indignum ac nefas, tanti sacerdotis corpus, tamque de Lusitano vel in primis genere benemeriti, nullo exsequiarum honore, desertis in locis & barbaro solo relinquere; cum ipsis vestimentis in arcam inclusum, viua operiunt calce; quo celerius exesis acrimonia carnibus, nuda secum ossa deportent: ipsam dein arcam deserto & squalido quodam in eius insulæ colle defodiunt. post dies aliquot confectis negotijs ad sepulcrum vniuersi conueniunt; corpus diligenter inspiciunt attrectantque. non modo integrum, solidumque, & aspectu iucundum inueniunt, sed etiam, quo magis obstupuerè, suauiter admodum fragrans. læti suam de viri sanctitate opinionem comprobare diuinitus, in eadem viuæ calcis arca reconditum, venerabundi omnes in nauem imponunt. Inde Malacam deueniunt, prodeuntibus obuiam cum solemnī pompa oppidanis, excipitur, & sua impensa funus procurante Didaco Pereria, qui nondum abierat, in ædem Beatæ Virginis, vbi Collegium est hodie Societatis, defertur. iam tertius à morte agebatur mensis. arcam sacerdotes & amici rursus aperiunt: nihilominus incorruptum extrahunt mirabundi, ac Lusitanico more (haud dubio Dei nutu, quo liquidius postea de admirabili integritate constaret) terræ ipsi mandant nullo capsæ tabulæve munimine, puluino duntaxat ceruici subiecto, & oblecta sudario facie. quinque ipsos menses cum in eo tumultu iacuisset, è socijs quidam missus ad Xauerium inuestigandum ab Goa superuenit (quem nos deinde Romæ hæc eadem ab alijs anteperscripta memorantem audiuius) is auiditate ac studio explorandi cernendique oculis quæ ferebat fama, sarcophagum detegit. mirum dictu: puluinem ac sudarium purpureo cruore tinctum offendit, dum funeris administri terram superingerunt inculcantque inter sepeliendum expresso. cæterum corpus



pus totum planè illæsum, & eadem quæ ferebatur odoris suauitate: quin etiam (quod super omne miraculum fuit) vestimenta ipsa, crepidasque, & extimum linteum, adeo recenti specie, vt illo ipso Melchior Nonnius in Iapone deinde, quemadmodum Diui Pauli eremitæ palmea quondam tunica Diuus Antonius, ita ad celeberrimas quasque gratulationes & cæremonias vti consueuerit. clara profecto ac testata sancti patris virginitate ac sanctimonia (quamquam aliis quoque argumentis ante iam nota) quando neque calcis viuæ caustica vis, neque telluris humor ac situs, defuncti carnes aut amictum vlla ex parte labefactare valuerūt. Quo indignius visum omnibus, vltra in defosso haberi corpus tanto tamque honorifico Dei munere custoditum. In iis Didacus Peteria, inemor amicitiae ac meritorum, elegantiore materia formaque arcā aliam damasceno serico subsuendam, aureo textili desuper obtegendam curauit. in eam translatum corpus idoneo loco ad vsque tempus Indicæ nauigationis est habitum. quo ipso tempore Indiam repetens Cosmi Turriani missu Petrus Alcaceua, Malacā ex Iapone delatus, impositum in onerariam sacrum thesaurum vna cum altero de quo dicebam socio asportat, præsens vtique nauigantibus ac salutare præsidium: si quidem nauim, diffracto gubernaculo, vadis impactam aliquoties, præsentī illius ope, cuius uehebant exuuias, hand dubie seruata fuisse cum alijs, tum nauarchus ipse testatus est. idemq̃ actuario Goam celeri cursu præueniens; rem totam patribus nuntiauit. ex iis quatuor cum totidē à catechesi pueris, biremi regia, tardius nauiganti onerarię ad Baticalam occurrunt, arcam denuo referant sextodecimo iam ab obitu mense; & que incorruptum corpus ac vestimenta, gaudio simul ac stupore attoniti apprehendunt. Arca iterum clausa in biremem eo quem dixi ornatu deponitur. nauæ sublati vndeque vexillis tormenta festo cum reboatu displodunt. eo die sub vespērā à Baticala ad Goā biremis rediit. arca noctem vnā in ædícula Deiparæ Virginis custoditur, passibus ab vrbe mille quingentis. postridie mane confestim Prætor ac procures, Canonicorum ac Misericordię sodalitia, ingens præterea oppidanorum vis, & Diui Pauli collegium omne, corpori extra portas obuiam prodit. reliqua multitudo ad spectaculum effusa, parietes, fenestras, plateas,

ita



## *Historiarum Indicarum*

ita compleuerat , vt in reditu summoueri vix posset . cum cereis candidati nonaginta præibant pueri , sequebantur clerus , & magistratus , ac nobilium ordines : quacunque pium incedebat agmen , multa erant passim odoramenta disposita . feretri latus vtrunque thuribula ex argento affabre facta cingebant : Diui Pauli templum quo inferebatur , cum per eos ipsos dies hebdomadæ sacrosanctæ agerentur solemnia , nihilominus albo peristromate conuestitum : cuncta sobriam ad hilaritatem lætitiâque composita . Hoc maxime modo corpus acceptum , & statim in Diui Pauli sacello , tectum vti erat , magna cum veneratione repositum est . ibi , quominus tertium aperto iam loculo palam ostenderetur , efflagitantibus pariter summis infimisque negari non potuit : veruntamen ad introspectendum obiecti cancelli ; ne applicuisse rosaria , impresuisse oscula virgineis carnibus , semel iterumque palpasset non satis habentes ; insuper ( quod apparebat futurum ) in frustra , & præsegmina , cæterasque reliquias inuolarent . in eo sacello tres amplius dies ac noctes habitum summo ac perpetuo omnium ætatum , nationum , ordinumque concursu . neque interea ab vno quopiam è superiore loco pater est laudatus , vt assolet . pro laudatore populus fuit . alij quippe reconditam viri doctrinam , & sapientiam , ac dicendi vim copiamque : alij prudentiam , vsumque rerum , & longinquas peregrinationes ac plurimas ; alij comitatem ac mansuetudinem , & sine fastu vel arrogantia grauitatem , sine indignitate summisionem , sine furo pudorem atque modestiam ; alij castimoniam insignem ; & voluntariam paupertatem ; & longa ieiunia vigilasque ; alij subleuatas egentium angustias ; orbis educationem ac disciplinam ; viduarum ac virginum pudicitiam egregie custoditam ; curatos per summam patientiam ac sedulitatem ægrotos ; diremptas plurimorum inimicitias ; alij verissimas prædictiones atque miracula ; ( multo videlicet plura quam quæ nos alio properantes attigimus ) ac partim Christianorum greges à perduto vitæ genere ad meliorem frugem , partim ethnicorum ab Satanæ seruitute ad Christi fidem obsequiumque traductos ; horumque tutelæ , commodis ;




modis ; ornamentis omni ratione consultum ; alii denique magnitudinem animi in rebus arduis capeffendis, constan-  
tiam in promouendis , & , quod super omnia mirandum ,  
adeo salubri temperamento mistam actione contemplatio-  
nem ; vt cum vtrunque coleret propemodum ex æquo ,  
neutra tamen officeret alteri : hæc, inquam, & alia pro suo  
quisque sensu lacrymantes in cœlum efferre . Interea exa-  
cto ferme quatrduo , cum satis iam in aperto fuisse vide-  
retur , ab socijs arca iuxta maximam aram loco certo re-  
ponitur , & claustro munitur . Huic tantæ gratulationi  
Gaspar adesse non potuit , ad æterna , vti sperandum est ,  
gaudia paucos ante menses euectus . Is Indicæ prouinciæ  
administratiõne suscepta, publice priuatimque multa præ-  
clare instituit , quorum hodieque vsus cum vberrimo per-  
seuerat animarum fructu . dumque in domesticam pariter  
disciplinam , & communem Ecclesiarum vtilitatem inten-  
tus , affecto iam corpusculo acerbius grauiusque quam fer-  
re posset imperitat ; inter concionandi ardorem & con-  
tentionem defectus repente viribus , intra pulpitem con-  
cidit . collecto dein spiritu domum regressus , acrique cor-  
reptus febris , mox inter sodalium caros amplexus ani-  
mam efflauit xv . Kalend . Nouembris , anno seculi huius-  
sce quinquagesimo tertio . elatus est magno ciuitatis luctu ,  
quam sibi suisque vniuersam excellenti caritate officiisque  
deuinxerat . Sub hæc , ab Iaponijs dynastis litteræ ad Præ-  
torem allatæ . fœdus & amicitiam vltro petebant : ac siue  
id ex animo , siue gratiæ causa , nuntios Euangelij , & sa-  
pientiæ Christianæ magistros . ea re permotus , vti æquum  
erat , successor Gasparis Melchior Nonnius Lusitanus , com-  
mendata vicarijs citeriore prouincia , cum socijs aliquot  
Iaponem petere intendit . Ingens dudum in ijs locis e-  
rat perturbatio rerum omnium . Amangutij Regem inter ac  
populares atrox ac periculosum exstiterat bellum , nec nisi  
Regis & filiorum interitu restincta seditio . in Bungi quo-  
que Regem , aliquot principum coniuratio eruperat . ij ,  
commisso demum prælio victi casique . otii deinde non-  
nihil ab armis fuit . patres ad prædicationem & consueta  
munia rediere . ac Deus item signis atque miraculis adiu-  
uabat.



## *Historiarum Indicarum*

† uabat. ægroti debilesque lustrali ut plurimum aqua sanati: ex  
infectis diuturna possessione corporibus, Dei verbo fu-  
gata dæmonia. hæc & alia minime deerant Euange-  
lii firmamenta: sed nondum idcirco notabilis  
fiebatur ad rectam fidem accessio. Pauperes  
ferme, & inferiorum ordinum ho-  
mines, colla saluari subdebant  
iugo. contumax etiam-  
tum, & fastidiosa, ve-  
runtamen ma-  
nus olim  
data-  
ra nobilitas, à Christiana hu-  
militate, ac mansuetudi-  
ne, egentiumque ac  
vulgi consortio  
valde abhor-  
rebat.

*Libri Quintidecimi Finis.*







# HISTORIARVM

## INDICARVM,

### LIBER XVI.



INTER hosce tam varios dubiosque rei Christianæ successus, repentinum & graue apud Ceilanos quoque bellū exarsit. Columbano Regi, qui Cottam pariter insignem obtinebat urbē, tres erāt sororis filij, ad quos, de more gentis, hereditas pertinebat. ij, expetiturum ab insita dominandi libidine regnum, senecta auunculi detineri ægre ferentes, facta coniuratione Regē interimunt. inde ita inter se opes & imperiū partiuntur, vti natu maximus, nomine Pareā Pandar, ius populis è regali solio diceret; minimus, cui Madunio nomen (medio paucos intra dies extincto) militaribus copijs cum stipendio ac potestate præesset. Ac primo quidem concordibus inter se animis agere visi: mox (vt est omnis dominationis male fida societas) capitales inter vtrumque dissensiones exortæ. Queri Madunius, non pro dignitate meritisque

LI

tractari



## *Historiarum Indicarum*

tractari se, quippe qui præcipuo periculo & audacia nefariam vim ac sceleratas manus auunculo, cæteris hortantibus, attulisset; magisque sese in dies à Pareæ consuetudine rationibusque alienum ostendere. at ille, nouis quotidie sese caputque suum præliis aduersus fraternas insidias impietatemque munire. inter cætera, cum Lusitano Rege per supplices litteras egit obtinuitque, ut nepotem ex filia, contra consuetudinem, excluso Madunio, in regni successionem iusque adoptaret. Eo acriore incensus ira Madunius, exercitu coacto apertum fratri bellum inferre, Cottanos euastare fines, ad oppidum castra mouere non dubitat. Rex item, ne contra latronem ac perduellem, aggere mœnibusque potius, quam armis ac virtute sese tutari videretur; male auspicato eductis extra oppidum copiis, idoneo confidet loco: erat in eius castris auxiliaria Lusitanorum cohors. ex ijs gregarius quidam (temere, an à Madunio corruptus, incertum) plumbeo missili, sine metu suis obuersantem Regem interficit. Tum procures in urbem extemplo sese recipiunt; nepotemque Pareæ, regis communi consensu decoratum insignibus, in auita collocant sede. mox, diffusi adolescentis ætati, ac popularium animis, instante præfertim ac minitante Madunio, nouum ab Noronia Prætoris subsidium petunt. Ille sine mora instruit classem: impositisque Lusitanorum millibus admodum tribus, ipsemet eam expeditionem obire constituit. prætendebatur bello, vetus cum Columbano foedus, & pia pueri pæne circumuenti defensio. sed arcana suberat profectiois illecebra, quod à quibusdam pro certo accepisset Prætor, auri argenti que thesaurum in urbe Columbo repertum, quo si potitus foret; & Lusitanum crebra erogatione exinanitum ærarium opportune suppleri, & se suosque facili negotio ditari posse consideret. Hac mente confilioque profectus, incolumi classe Columbum deferitur, leucas ab urbe Goa ducentas. descensione facta, primum omnium in thesauri perscrutationem toto pectore incubuit: & exacerbatis peracri quæstione oppidanis, adeo ut non pauci ad hostem subinde transirent; ingenti labore miseriaque tandem eruit quod aureorum centum millium summam expleret, quantum in classem belli que apparatus insumperat. Inter hæc Madunius contractis undique copiis intra Ceitauacæ urbem, à  
Colum-



Columbo nouem introrsus leucas, intēta cura sese munire per-  
gebat. Promotis eo signis Prætor haud magna mole urbem ex-  
pugnat: direptamque, ferro & flammis excindit: de Madunij  
exitu nihil traditur. inde, firmato pupilli regno, quam inuen-  
ta pecunia latior clariorque, Goam sospes reuertit. Ab Goa, §  
renouato impetu, Ciembem insulam petit, receptaculum la-  
tronum Malabarium, in Cocinensis Regis damna perniciem-  
que imminentium. hanc frustra nuper à Caprali circumfessam,  
ipse haud incruenta victoria tandem cepit; Malabaribus par-  
tim cēsis, partim in seruitutem abductis. Circa idem tempus, §  
auide cupienti Solimano Turcarum tyranno, occupandæ Ar-  
muziæ vicinique tractus oblata denuo spes, Mahometanis in-  
quilinis odio Lusitanorum per clandestinos idētidem nuntios  
litterasque sollicitantibus. ea si obtinuisset loca, perbreui in  
Cambaiam & Indiam transitu, Lusitanos quæstuosissimi com-  
mercij fructibus, & iniusta longinqui maris possessione, facil-  
lime depulsurum. Eiusmodi stimulis incitatus Turca, cupidus  
præsertim delendæ ignominia ad Dium priore bello susceptę:  
Peribecum vnum è Præfectis, qui ad Mecam agebat, classem  
ab Suezio propere iubet accersere; & Adeni claustra quam oc-  
cultissime præteruectum, Arabiæ Felicis quicquid Lusitano-  
rum custodia teneretur, necnon Armuzianos fines, repentino  
aduentu (si res patiatur) inuadere; cum eo tamen, vti ad col-  
ligendam clementiæ famam, incolarum animos benigna ora-  
tione ac promissis alliceret prius, quam incendijs, cædibus, po-  
pulatione vexaret. Ille, triremibus quinque & viginti, onera-  
riis duabus extemplo deductis ornatisque, celeritate vsus &  
secunda nauigatione, Mascatum applicuit. Lusitani sexagin-  
ta, duce Ioanne Olisiponenfi eam arcem obtinebant. ii, vel su-  
bito clasfis appulsu perterriti, vel à com meatibus imparati;  
Peribeco saluis corporibus & libertate deditiōem faciunt:  
eiusque mox deditiōis luere piaculum; à barbaro contra pa-  
ctiōis fidem, & Solimani mandata male mulctati, & in custo-  
diam & vincla coniecti. Eius rei fama pauidis illico nuntiis  
Armuziam allata, cum in maius, vt fit, cuncta certatim auge-  
rent; ita occæcauit animos omnium; vti amentes repentino  
terrore Mahometani pariter & Christiani diffugerint. Rex  
cum proceribus in tuta iam sese receperat loca. cūes & inqui-



## *Historiarum Indicarum*

lini, partim arripitis quæ carissima habebant, partim etiam præ  
formidine ac festinatione relictis; auios alij montes, alij proxi  
mas insulas petunt. duo tum ad Armuziam è Societate I e s y  
agebant patres: eorum alter, ad nauandam in extremo disci  
mine Lusitanis operam, sese cum iis in arcem inclusit; alter,  
neophytos, ne mortis metu à Christo deficerent, corrogatis in  
alimenta pecunijs, ad Mogastanem continentis oppidū ingenti  
labore traiecit; eumq; ibi gregem ad vsque transitum illius  
tempestatis cum fide curaq; tutatus est. At Peribecus obuio ne  
mine prouectus, vacuum hominibus, gaza refertam urbem, ad  
Turumbacum ab arce procul ingreditur: aduersus Lusitanorū  
eruptiones militem idoneo loco disponit: dein cæteris diripiē  
di oppidi signum dat. Pauca tum erant emporia Armuziano  
diuitijs comparanda: vsq; adeo multi omniū ferme nationum  
institores, varias illuc primæ notæ merces opesq; congefserāt.  
Ergo tantum pretiosa vestis, gemmarum, & vnionum, auriq;  
& argenti exhaustum; quantum alioquin expedita ad iter fa  
ciendum aliquot nauigia capere potuerunt. exposita dein ad  
arcem oppugnandam & apte locata muralia tormenta. queis  
Peribecus præcipue insectum sibi vnum è propugnaculis tanta  
pilarum vi sine intermissione quassauit; vti solutis iuncturis  
bona pars muri prociderit. adeoque certis ictibus pares globi  
in aduersa tormetorum ora contorti, vt nostris amplius ex eo  
loco iaculandi facultatem eriperent; neq; inter verberationem  
omnino quisquam ostendere sese pro pinnis auderet. Ea edita  
strage haud tamen ad subeundum, cōferendasq; manus Turcæ  
animus fuit; siue ad asportandam festinaret prædam, seu præsi  
dij magnitudine territus, quod Lusitanos bellatores amplius  
octingentos omnibus rebus ad sustinendā vel oppugnationem  
vel obsidionem instructos, arce contineri non dubie comperis  
set. Ostentata igitur in speciem, dein omissa pugna, Queixomē  
insulam, quo multos ex urbe confugisse audierat, protinus pe  
tijt: oppressisq; ac varie cruciatis, quicquid secū asportauerāt  
fortunarū extorsit. inde grauē spolijs classē ad Bazorā urbē, q̄ in  
intimo est Persico sinu Turcicę ditionis, applicuit. ibi recogni  
te manubię, & è molesta iactatione refectus miles. At Goā vt  
primū circūfideri ab Turcis Armuzianos allarū est; Prætor, quā  
ta maxima potuit classe exercituq; coacto, Diū sine mora pces  
sit.



fit. inde, ne præfidiis Indiam nudaret; cum parte copiarum Antonium Noroniã iubet Armuziam pergere. Profectus, desertam direptamq; urbem; itemque solutam dudum arcis obsidionem inuenit. intento dein reuocandis habitatoribus, triremes duas è freto in altum egredi nuntiatur. Peribecus, Mecam ante hyemem rediturus, pretiosissimis vtramque rebus onustam, nocte per summum silentium à Bazora soluerat, reliquis deinceps pari silentio sequuturis. Ad harum conspectum Antonius confestim anchoralibus præcisis, abeuntem latronem insequitur. at ille, antecapto iam spatio, per summam & remigum contentionem, & nautarum industriam, vix tamem atque ægre instantium ab tergo Lusitanorum effugit manus. Inde mœrens tam paruo sibi momento elapsus hostem Antonius Armuziam reuertit; aditaque Regis iussu arcis præfectura, classem, vti mandauerat Prætor, Didaco Noronię tradidit. Eius ope ac præsentia dum fauces freti, vicinamque oram attente percursat; profugi maris accolę in patrias reuocati sedes; incluseque intra sinum hostes, capto haud semel impetu cum ex angustis erumpere conati essent, onerariis duabus amissis præclare cohibiti, quoad vrgente demum hyeme Turca Bazoram, Noronia Goam in hyberna concessit. neque iis dum exactis, Prætor, cui puniendę Turcarum audacię cura viuebat in pectore, Fernandum filium cum magno nauium ac militum numero ad easdem obsidendas fauces mature transmisit. is celeri cursu in Arabię conspectum delatus; speculatoriis nauigiis quoque uersum dimissis, cognoscit partem triremium, cæteris ex interuallo sequentibus, cursum ad fauces intendere. continuo classiarios ad demendum nomini Lusitano dedecus, atque ad vlciscendas fratrum ac sociorum iniurias cohortatus ad Rosalgatū promontorium dirigi proras iubet. inde oram legēs, circa Mascatum obuias triremes habuit octo: eæ, vitandi congressus causa cum littus propemodum singulę abraderent, Fernandus è cellarum numero tres rostratas, castellorum instar, vltro in arenam inflatis velis inferre non dubitat. inde transitu alueis ac missilibus intercluso, habiliores ad cursum dromones & expedita nauigia quæ remis agerentur, egregio milite instructa, in hostes immittit. ij, desperatis iam rebus, cum iactura triremium sese in terram parantes eiicere;



## *Historiarum Indicarum*

oppressi celeritate nostrarum nauium trucidantur : ac nullo  
pæne certamine triremes abductæ, cæteris Turcis è longinquo  
spectantibus, qui suorum casu perterriti, ac Mecam ne si lice-  
ret quidem tanta accepta clade redire non ausi, longiore ambi-  
tu in Cambaiæ fines ad Cindiscanem regulum perfugere. is, in  
fidem acceptos ac supplices, repetente dein Lusitano, ita ser-  
uauit ; vt in eius gratiam triremes ad vnam omnes membra-  
tim dissolutas, ad nauigandum prorsus inutiles fecerit. Eam  
satisfactionem Prætor Lusitanus accepit. Fernandum interim  
haud leui parta victoria, quominus sincero gaudio frueretur,  
cura de illis in breuia rostratis angebat : ne infixæ penitus e-  
uelli non possent. verû postquam pleniore accedente æstu pau-  
latim alleuari cœptæ ; iamq; salo prorsus liberæ atque agiles  
innabant ; tum vero plausus & clamor militum ac nautarum  
exortus : velisq; in Orientem datis, Goam incolumes ingenti  
§ omnium gaudio peruenerunt. At Peribeco, cum duabus  
quas dixi trirenibus prospera nauigatione Mecam reuecto,  
male partis opibus diutius frui non licuit. Solimani iussu, cum  
rei gestæ seriem postea didicisset ; execrandæ rapacitatis at-  
que perfidiæ pœnas capite abscisso persoluit. Per idem ferè  
tempus, periclitanti Parauanæ Ecclesiæ priuato consilio ac vir-  
tute subuentum. Indi ci maris oram, præsertim quæ ad Cori-  
promontorium vergit, distractis tum in diuersa Lusitanis viri-  
bus, Malabares Turcis immitti, latrocinij & incursionibus  
infestam nomini Christiano reddiderant ; nauibus ad viginti,  
anni vix spatio interceptis. iidem oppidum Punicale, oppu-  
gnantibus ab terra Mahometanis, admota ipsi classe vi cepe-  
rant, Henrico Henticio è Societate I. E. S. V. necnon præfecto  
præsidij Lusitani cum vxore ac liberis & quinquaginta militi-  
bus in custodiam datis : quodq; multo erat detestabilius,  
§ Parauanos aliosq; neophytos ad quinquaginta millia varijs  
artibus ab Christo abducere nitebantur. Eius rei Cocinum  
multiplex iam fama peruenerat : itemq; per litteras Parauæ  
Christiani tam duris in rebus opem ab ea ciuitate precibus in-  
fimis implorabant. ac demum, instanti minaciter hosti vt Chri-  
stiana defererent sacra, consensu responderant, nisi intra quin-  
tum diem subsidium à Lusitanis venisset ; tum se de religione  
deliberaturos. Interim Cocini cognito sociorum extremo  
discri-



discrimine; ingens incesſerat dolor, quod erario exhausto, & absente magna parte iuuentutis ac nauium, publice Parauis opitulandi nulla esset facultas. Inde cum vulgo mœsti perplexiq̃ue, casum vicinæ Ecclesiæ miserantes, hærent, Aegidius Fernandus Caruallius in communi causa præcipuam Christianis operam nauare constituit, eximia pietate pariter ac fortitudine vir; quam nuper in obsidione Malacensi nobilitauerat. Is contracta vndique pecunia, & omni pæne domestico instrumento in idipsum oppignerato; quamuis tum è crure altero laboraret; biremes quatuor, manciuam vnam (actuarij genus id est) confestim omnibus ad bellum rebus ornauit. multis deinde cum lacrymis per sacram confessionem expiatus, cœlestiq̃ue refectus cibo, in hostes duxit intrepidus: eosq̃ue ad Calecarem vicum assecutus; vno I E S V nomine fidenter inuocato, renouatis quæ iam consensuisse videbantur militiæ Lusitanæ miraculis, rostratas minores duodecim, lenunculos, quos vocant cialatones, amplius quadraginta, momento fudit fugauitq̃ue: in terram dein egressus, Mahometanorum ædificijs ignem iniecit: Henricumq̃ue grauiâ & acerba multa perpennum, cum reliqua Lusitanorum manu è vinculis eripuit. Sub idipsum fere tempus quo aduersum Christi fideles Malabarica grassabatur impietas, (ex quo facile diuini consilij ac destinationis appareat altitudo) ex eadem natione gloriosum Euangelio testimonium perhibebant Malabares adolescentuli sex circiter & triginta, ab nono ætatis anno ad septimum vsque decimum. hosce, Lusitana qua vehebantur naui, circa Arabiam à Turcis excepta, cum à Christo ad Mahometem traducere summa ope barbari conarentur; postquam alternis blâditia minaq̃ue nil proderant; ad verbera cruciatusq̃ue descendunt. Adduntur ad cæteram immanitatem stillæ adipis igne liquati, ea tormenta multasq̃ue præterea iniurias, putrorum virtus fidesq̃ue vicit egregie. Turcæ obstupefacti constantia, ab ijs vltra vexandis tandem abstinere. At Caruallius, præter insignem apud Indos gloriam, ab Lusitanis quoque, & ab ipso in primis Noronia debitum tantæ virtuti, & caritati præconium tulit: dumq̃ue digna talibus factis exquiruntur præmia; interim è regio fisco quicquid in eam expeditionem insumpserat, benigne repensum. Eodem Noronia Prætore, cum aliâ



## *Historiarum Indicarum*

tum duo præsertim horrenda fuere naufragia. Emmanuel Sosa, cognomento Sepulveda, qui Dienſi (vtri memoratum est) præfuerat olim arci, vir opulentus ac splendidus, ducta in matrimonium Eleonora Garziæ Salæ tum Prætoris filia, tactus desiderio patriæ; pressam diuitius rostratam excelsam Cocini conscendit. sequebatur vxor, ac parui liberi; & Pantaleon Sala, & nobiles aliquot; & præter nautas, famulorum etiam ac mancipiorum turba: in vniuersum capita ferme sexcenta. Ianuarii mensis initium, Lusitaniam ex illa petentibus ora, statum soluendi tempus. ventorum id vices, ac dudum explorata nauigandi ratio postulat. Sosa cum cæteris, quod impeditior ad Coulanum coemptio fuerat; non nisi Februario mense profectus; circiter Idus Aprilis Castrarium littus aperuit. Inde leni flatu prouectis, circa Bonæ spei promontorium vehemens ab occasu obstitit ventus, idque cum fulgetris, & cœli fragore, tetraque ac minaci nubium vi. Tum inhorrescens mare paulatim attolli, maioresque in singula momenta ciere fluctus. Cum in aduersum obnitendi, remigio destitutis, nulla esset ratio; paulisper addubitatum à nautis, vtrum demissis antennis, in salo transitum tempestatis expectarēt. verum Oceanus magis magisque sæuiente perterriti; simul propter anni tempus abiecta superandi promontorii spe; retro in Indiam pari consensu vela dare constituunt. Sed ne id quidem è voto successit, adeo violenti ac repentini flatus ab Oriente, diuersisque coorti plagis, quassatæ iam nauis in perniciem conspirauerant. Horum impetu vela primum discissa: malus deinde, mox gubernaculum frustra fluctus euitante magistro, diffringitur. præterea costis immodica iactatione conuulsis, multo plus accipiebatur vnde, quam vt exhauriri aut egeri summa turbæ naualis contentione & industria posset. Neque, præcipitata leuandæ naui bona onerum pars, auertebat exitium. per hunc modum spoliati armamentis; obuersante perpetua mortis imagine, dies aliquot in alto iactati, postremo vrgentibus à meridie ventis, certum ad naufragium ad terram appelluntur. neque erat in malis potius quicquam, ni viuentes videntesque hauriri profundo, vel in cæca vada syrtesque adigi mallent. ad reliquum ergo missum iactæ ab vtraque parte anchoræ, dum scaphis, quæ vna supererat salus, in continentem euaderent. Sosa ante  
alios



alios cum vxore filiisque, & primariis aliquot, raptim elata pecunia gemmisque, transuecti haud sine ingenti periculo: vsque adeo immanes toto littore moles aquarum illisu reciproco frangebantur. neque idem effugium ceteræ multitudini patuit; scaphis, post vnum alterumve traiectum, in dorсуosa breuia impactis & comminutis. Eodem fere temporis articulo anchorarius funis in Austrum obuersus, quamquam valido nexu & crassitudine, rumpitur. Tum qui remanserant, diuulsa nauis latera, & vasto dehiscentem hiatu alueum conspicati, erumpentia ex imo dolia, sarcinas, capsasve corripunt; seque, incertam ad spem, qua cuique proximum est, in mare demittunt. Miserando hinc spectaculo, immistos fluitanti gazæ mortales, & naualia instrumenta passim agi ferrique cerneret. Periere ab ipso statim deiectu, Lusitani circiter quadraginta; ex alijs nationibus, ad septuaginta: reliqui haud semel operti fluctibus, ac turgido spumantiq; æstu in diuersa raptati, ad hæc, scriniorum incussu liuidi, aut clauorum squamarumque ictu cruenti (tantus amor est lucis) tandem semianimes in sicco vestigia posuere. Vixdum euaserant; cum in conspectu omnium, vacua hominibus carina subsidit; & arenis illata, duas primum, dein quatuor in partes, ad extremum in minutissima frusta disiliit. hæc maxime clades ad vltimam pæne rerum desperationem Lusitanos adduxit. quippe, consilium fuerat, è reliquijs naufragij subitarium dromonem intentis vestibibus ad cursum aptare; atque vbi licuisset, cum delectis retro Sofalam aut Mosambicum opis petendæ causa transmittere. Eam quoque sibi facultatem ereptam videbant, cum è discerpto nauigio laceroque, vix vlla fragmenta cubiti mensuram excederent. Paulatim dein, quæque supernatauerant, quæque obruta fuerant, pæne cuncta cum cadaueribus in littus eiecta: ipsæ quoque demum anchoræ, hastæque, & minora tormenta, quamquam hæc quidem prorsus inutilia; sulphureo omni corrupto puluere, neque vilo conficiendi apparatu. Inter hæc autumnus abierat: &, quod ab æquatore in meridiem gradus vnum & triginta distat regio; refouendæ turbæ, frigore, inedia, vulneribusque torpenti, Sofa complures excitarat ignes. tum ex aliquot oryzæ semicorruptæ modijs, ac falsamentis, quæ tempestatis iniuriæ superfuerant, cibaria in singulos



## *Historiarum Indicarum*

singulos parce diuisa : quod squalida circum arena , ac nullum esset cum incolis , fera & inhospita natione , commercium . dulces tantum in proximo scaturigines emicabant . atque ob id , connexis in orbem scrinijs , aduolutoque saxorum pondere , uti securas exigent noctes , loco munimenta circumdata ; & quatuor in partes , ut assolet , vigiliæ distributæ , quas in tempesta nocte haud semel circuibat Sofa ; neque vllum , in tali calamitate , boni & ciuis & præfecti omittebat officium . Tredecim ferme dies curationi corporum dati . mox de summa rei deliberatum , quid agerent , quo se conferrent . nemini dubium fuit , quin oram tenentes , ad flumen contenderent , cui Laurentius Marchesius olim ab Sancto Spiritu nomen indiderat : eodemque Lusitani ab Sofala & Mosambico mercimonij causa commeabant . id flumen à statuis in Orientem aberat leucas centum & octoginta . Ab hoc decreto , Sofa , quâquam præcipua in clade , tamen cæteros ipse vultu ac sermone confirmat : ne asperis in rebus desponderent animos . qui se pelago committant ; ijs famem , sitim , iacturas , ærumnas , omnia incommoda esse debere proposita . quæ si contingant , non ita mox cadendum , quasi ea nunquam euentura existimarint . ad hæc , pro suis quisque delictis æterna supplicia meriti ; breuia ac temporaria non inuiti persoluant . Simul , eo infortunio , non quid perdiderint cogitandum , sed quod euaserint . amisisse multa : sed perire vna cum ijs quæ amiserant , potuisse . monuit insuper , ut inter efferas destituti gentes , nullum deinceps nisi in coniunctione & concordia præsidium collocarent . nemo seorsum ; omnes in commune consulerent . nihil neque dispersis , & vagis tutum , neque conglobatis & consentientibus noxium fore . postremo precatus est cunctos ; in ratione itineris , Eleonoræ & filiorum vel ætati vel sexui parcerent ; seque validi & robusti ad infirmorum vires attemperare ne grauarentur . Ad ea succlamatum , duceret quo vellet , & quo modo . se ab eius auctoritate arbitrioque non recessuros . Per hunc modum corporibus & animis utcumque firmatis ; hoc maxime ordine capessunt iter . Præcedebat Sofa cum vxore virilis animi foemina , liberisque propter ætatem securis . & Andrea Vaso naus magistro ( is præcellum Crucis vexillum ferebat ) & Lusitanis alijs octoginta , seruis præterea centum . hi puerulos



los tergo per vices ; Eleonoram informi pilento gestabant . se-  
quebantur cum ancillis & imbelli turba nautici . agmen infau-  
stum Pantaleon & reliqui cum mancipijs Lusitani cogebant .  
Modicis inde itineribus , per infesta Castrum incursionibus , &  
noxijs animantibus loca progressos : inuiæ rupes , excedentia  
in nubes iuga , despectu horrendo conualles , cœnosæ voragi-  
nes , inflata imbribus hybernis flumina excipiunt . ijs dum su-  
perandis , humilia procul vada , clementesque montium ascen-  
sus ac descensus inquirunt ; littoralis spatij triginta non am-  
plius leucas , crebro ipsi ambitu flexuque , cæcis ad hæc erro-  
ribus , in centum prorsus extendunt . Mensis inter hæc volui-  
tur . simul , extrema quoque inopia , consumptis iam omnibus  
alimentis , conflictari cæpti . Sustinebant famem primo con-  
chylia , putresque cetorum artus , & alia maris eiectionamenta ,  
dein , vbi à littore abscesserant , syluestria poma baccæve : tum  
tenerrima frondium ; postremo bestiarum cadauera & ossa quæ-  
libet igne tosta ; pellesque mollitæ . Nec leuius torquebat si-  
tis : cum oppido pauci , nec nisi magna præsentis pecuniæ mer-  
cede , aquandi causa de via decederent , insidiantium ex oc-  
culto latronum impetus , atque leonum etiam ac tigrum igno-  
ta cubilia metuentes . enormia inde aquæ pretia : vti octo in-  
terdum aureis hemina constaret . Inter quæ subinde aliqui las-  
situdine , inedia , siccitate confecti , deploratis viribus , Aethio-  
pi diro , belluisque , & alitibus præda restabant , suprema ad  
suos mandata dantes antecedentibus : quorum in animis , vt  
fit , diuturni terrores & proprium cuiusque malum , omnem  
pæne miserationem ac sensum alienæ calamitatis exstinxerāt .  
Sosam tamen , cari aliquot relictæ , supra modum angebant .  
vixoris vero quotidiani labores miseriæque propemodum emo-  
uerant mente : quamuis illa quidem sese marito infatigabilem  
corpore pariter animoque præstaret comitē ; ac baiulorum de-  
stitutæ ministerio , dudum suis ipsa pedibus ambularet addens  
cæteris animos ; & in partem oneris , teneræ proli subleuande  
succedens . Quarto mense ad annum Sancti Spiritus peruen-  
tum ab insciis . causa latendi fuit , quod auditæ conceptæque  
animo magnitudini haud quaquam respondebat flumen ( quip-  
pe tribus alueis ea regione decurrens , in exitu iungitur ) & i-  
donei ad percontandum explorandumque interpretes deerant :  
siquidem



## *Historiarum Indicarum*

siquidem Aethiopicis ex alia longe regione mancipijs quæ habebant in comitatu; nondum erat cum ijs populis tanta societas linguæ, uti per illos possent, quæ vellent, probe cognoscere. Percommode cecidit, quod regulus ea tenebat loca, miti admodum præter aliorum consuetudinem ingenio vir, beneque in Lusitanos animatus, quod illi placidum & æquum paulo ante commercium cum ipso Laurentio Marchesio & Antonio Calderia fuisset. Is, peramanter acceptum Sosam & reliquos, apud se, dum aliquis ab Sosa institor appareret, omni arte retinere conatus est, partim ab insita humanitate, partim etiam proprii commodi gratia, quod finitimis implicitus bellis, tempestivo firmoque sibi auxilio diuinitus oblatam hanc putaret manum. ac proinde, post multa benigni vultus inuitamenta, denique gestu, nutibus, & incerta vocum significatione denuntiat, haud procul abesse inde potentiores se Regem, impium, & rapinæ adsuetum: si pergant; præcipitis consilij pœnas datuos. Nec preces nec monita profuere. quo liberalius habebatur Sosa, eo magis fraudem suspicatus, porro abire contendit, nauculisque ab eodem regulo impetratis fluvium trajicit. Quinto die ad medium amnis brachium processere, leucas iam à naufragio trecentas emensi; è quingentis comitibus ad centum & viginti variis cladibus redacti non amplius. id quoque brachium, conductis pretio lintribus, imminantium ignari transmittunt. maiore dein usu linguæ, per interpretes haud dubie cognitum, id esse flumen quod tanto iam diu labore quæsisent: & eiusdem habitus albos homines illuc nauibus itare consueisse. non longe à mari is locus aberat. falsi ex eo latices: neque ullam dulcis aquæ venam circum apparere constabat. ad hæc, solum plane incultum ac sterile. cum ibi Lusitani, malis victi, sub noctem necessario confedisent; postridie aduentantes Aethiops ferme ducentos adspiciunt. ac primo adesse prælium rati, arma quæ male iam sustinebant, expediunt: reliquias virium ad repellendos fugandosque latrones intendunt. dein, postquam pacatus appropinquabat Aethiops; ac, qui nam, & unde profugi, blande quærebat; sumpta fiducia, infortunii summam, & exhaustos labores, per interpretem exponunt. cibaria tantum, neque ea gratuita iure gentium petunt: ferramenta genti expetita conciliando



ciliando commercio proferunt. Haud spernenda crescendi occasio barbaris visa. tantum de re ex tuto aggredienda solliciti, ac toti è fraude mendacioque conflati, respondent, nihil esse com meatus in promptu: haud ita distare oppidum: eo si accesserint, hospitaliter ac benigne cunctos ab Rege tractatum iri. Suadebat requiem vltima lassitudo, & inuentus agnitusque tandem exoptati fluij terminus: vesana insuper fames vrgebata ac sitis. age sane. ducibus iisdem ad oppidum tendunt. iamque successuros, per viatorem ingressu prohibet Rex. dense arbores in vicino adsignate, quarum vmbra sese vtcunque reficerent. sex ibi dierum fuit mora: clauos ferme reuulsos è naufragij tabulis, cum carnibus nutrituque alio permutabant: sitim leuabat in proximo fons. contracta inde cum incolis nonnulla consuetudine, perniciosam in spem hospitij Sosa paulatim inductus, mercatoris cuiuspiam aduentum ab Sosa, si liceat, ibidem operiri constituit. id ipsum Aethiopes cum valde hortarentur; ex iis missi ad Regem, qui Sosa interim, & coniugi, cæterisque pro instituta societate paulo commodius diuersorium peterent. Ille, popularium haud absimilis, omnibusque artibus ad fallendū instructus, iubet Sosa renuntiari; se suosque optimo esse in aduenas & calamitosos animo: sed quominus eos adhuc intra oppidū admiserit, duabus maxime causis retardatum. altera, quod magna tum annonæ penuria, vno omnes loco sustentari non possent: altera, quod ferro succinctos, & vario genere telorū, incolæ seminudi, ac sudibus tantū adfuerit, maiorē in modū extimescerent. Si animū inducant Lusitani, ad pacatæ mansionis fidem, arma interim apud se custodienda sine dolo deponere; se domi suę præfectum primoresque benigne habiturum; reliquos, circumfusus oppido vicis fida in hospitia diuisurum. Dura omnino postulata visa concilio. sed recusantibus, extrema necessitas & egestas instabat. ergo nemine præter vnā Eleonoram dissuadente palam; Sosa qui amice monenti atque inuitanti regulo priori abrogauerat fidem; repudiatis Eleonoræ precibus monitisque, se ac sua demum omnia infidioso huic præpostera credulitate permittit. cohors reliqua ducis auctoritatem sequi non dubitat. tradita extemplo arma præmittuntur ad Regem: Sosa cum vxore, liberisque, & fidelibus aliis ferme viginti subsequitur. ceteros quinos vel senos re-

gij



## *Historiarum Indicarum*

gij præfecti varia in loca diducunt. necdum ad inhospitales  
peruenerant casas, cum destitutos ac diremptos ab ope mutua;  
non peculio tantum, si quid abditum gerebant, sed vestimentis  
etiam quamquam attritis ac laceris exuunt; eaque nocte ma-  
lignè admodum pastos, mane fustibus conuitiisque per sum-  
mam perfidiam & immanitatem testis ac vicis exturbant. Rex,  
gemmis, auroque, & argento, & quod pretiosi reliquum So-  
sæ & familiaribus fuerat, auidissime rapto, corporibus tantum  
ac vestimentis abstinuit; domoque cunctos item exigit, insu-  
per increpans, clementia adductum se non pro meritis tractas-  
se vagos piratas, & communes humani generis inimicos. Tum  
demum sensere Sosa comitesque, quam stulte sese inermes  
§ ignotæ ac barbaræ fidei credidissent. Neque hic finis mise-  
riarum fuit. nanque dum inopes consilij, solutis ordinibus,  
nullo rectore, nullo signifero, passim incerto errant gradu;  
noua repente Aethiopum manus, præacutis armata sudibus,  
in Sosæ manipulum inuadit: ipsumque & cæteros vtriusque se-  
xus nullo discrimine vestibus nudat, obnoxios, & contra ne hi-  
scere quidem audentes. adeo ablatis armis ceciderant animi.  
Eleonora tantum, generis memor, ac pudoris ad vltimum  
retinens; obniti acriter, pugnis quin etiam colaphisque bar-  
baros vltro ad necem irritare: quo ad mariti denique hortatu,  
& deficientibus iam plane viribus, abstinit. nec mora: detra-  
ctæ direptæque vestes; metu ac pudore confusis qui ex infeli-  
ci comitatu restabant, atque ab tanta rerum indignitate  
auertentibus oculos. tum vero, castæ matronæ tristior omni  
morte lux visa: defodit arenis è vestigio sese: quæ superemi-  
nent, soluto raptim fusoque obteggit crine. mox ad Andream  
„ paucosque superstites, voce suprema: Vos quidem, inquit,  
„ duci vestro fidem egregiam præstitistis, optimi viri. nil vltra  
„ opus est. ite, vobisque ipsi tandem aliquando consulite. ac,  
„ si quem patriis olim finibus reddi contingat; renuntiate quo  
„ loci mea me maritumque delicta perduxerint. Mœstum inde  
„ silentium immobilis tenuit. cara tantum intuenti pignora, iu-  
ges riui lacrymarum denso cum gemitu profluebant. Sosæ  
item, altus mœror ac dolor vocem incluserat. cumque defixo  
in terram obtutu, aliquandiu attonito ac stupenti similis ad-  
stitisset; paterna demum extimulante cura, proximam in syl-  
uam



uam quærendo qualicunque nutrimento secedit. inde regressus, Elennoram triduo ieiunio fletuque pæne consumptam, & filioli alterum prorsus extinctum offendit, eumque suis ipse manibus terræ mandauit. Postridie eodem pabulandi functus officio, coniugem vna cum filio exanimem reperit, & lamentabili circum vociferatione complorantes ancillas. Hisce confestim summotis, in dextram iacentis manum aliquandiu reclinato capite incubuit; dein, iisdem adiuantibus ancillis, cadauer vtrumque sepeliit, nihil vnquam effatus. postremo sese iterum abdit in syluas. ibi laniatum à feris putant, nunquam deinde comparuit. Hunc exitum, iuter paucas miseranda Sosæ peregrinatio terra marique fortita, cum seculi huiusce tertius & quinquagesimus ageretur annus. reliqui ad centum, foedo agmine, rerum omnium inopes, diu errabundi, variis casibus ad sex & viginti redacto numero, cum pro captiuis haberentur, denique ab nauiculario Lusitano, qui eboris mercandi causa regionem eam à Mosambico petierat; festiis in capita quaternis redempti. in iis Pantaleon fuit: qui ante hoc biennium, exacta iam ætate, verum præualens viribus, Olisipone subito nervorum stupore apoplecticus obiit. Ceterum tanta Sosæ calamitas longe lateque vulgata misericordiam hominum ciuit: cupiditatem & audaciam non immiuit. Anno quippe insequenti, nauarchi alij quinque Lusitaniam versus Cocino soluere. Fernandus Aluarus Capralis cunctis præerat. ex iis nauibus, vna tantum Olisiponem post varia discrimina tenuit. aliarum incerti euentus, Prætoria excepta, cui à Sancto Benedicto erat nomen. Hæc quantum patebat constipatis ad summum oneribus, vix vt nautico ministerio spatia superessent; in medio cursu aduersis ventis & fluctibus labefacta; cum deploratam duceret sentinam, ipsa item circa Bonæ spei promontorium ad littus quod appellant Natale, vi tempestatis allisa dirumpitur. inter enatandum perire ad ducentos. cæteri ferme debilitati ac semianimes, deserto in littore corpora prostrauere. Mesquita Pereftrellius, qui cladi superfuit, ac totam accurate descripsit; varios insolitosque addit terrores. ingruente procella, cacodæmonum choreas in sublimi visas. ab infortunio dum se miseri ad viam parant, silentio noctis nautica errantium ibidem animarum.

exaudita



## *Historiarum Indicarum*

exaudita celeumara. cæterum hi naufragi iisdem ferme quibus priores itineribus casibusque, illuue obfiti, macie enecti, cum à trecentis amplius, ad tres circiter & viginti rediisset summa, redempti pariter à Lusitanis negotiatoribus; miseriarum & patientiæ documentum, ad Sofalam atque ad Mosambicum egerrime peruenere. Sub idem tempus, Alphonso Noronã, cum circiter quadriennium prouinciam administrasset; successor aduenit Petrus Mascarenhas idem, qui Xauerium olim ex vrbe Roma in Lusitaniam adduxerat. Is, qua erat in Deum pietate, bonis maiorem in modum approbantibus, ante omnia ad euellendos ethnicos ritus ac superstitiones, quarum adhuc erant in vrbe Goã multæ reliquæ, studium & cogitationes intendit. simul neophytorum libertati, commodis, immunitatibus, è Regis decreto cum fide curaque consuluit. Idem sollicitantibus iterum ab Idalcanis odio Mahometanis proceribus, ac præsertim Inele Maluco, Mealem, qui Goã dudum in libera custodia tenebatur, cum equitum peditumque presidio in finibus Decani regni, Ponda constituit. Goam dein regressus; vixdum anno vertente Prætura; morbo decessit. Huic è regio chirographo rite suffectus è prima nobilitate Franciscus Barretus. Hoc Prætore, Mealem à Ponda Inel Malucus cum duobus equitum millibus in Decaniæ terræ interiora perduxit. Ab rerum nouarum cupidis, quique sauo tyranni seruitio premebantur, ad mitem ingenio virum, ac iustum regni hæredem concursus illico fieri cæptus. neque se Idalcan aduersus ea segniter comparabat. inter cætera, diffusus popularium voluntati, magnas firmasque copias è Narsingano regno haud leui mercede conducebat, ac postremo signis collatis, haud dubie victor euasit. Meales ad Nizamalucum è fuga se contulit. Goã inde repetiit. ibi reliquam exegit ætatem. Prætor interea firmando imperio intentus, Ciaulanam arcem, vicino subiectam & obnoxiam colli, in eum ipsum collem transferre statuerat. coacta ergo in id classe, cum fabris alioque apparatu Ciaulum petit. Non latuit ea res Nizamalucum. is, ne geminum pro vno iugum acciperet, armato milite prior locum insedit. neque Prætori tentanda res visa per vim. dissimulato consilio, & renouata cum Nizamaluco amicitia; ad lustrandam Borealem



lem plagam de more perrexit: nullaque memorabili gesta res; Goam ante hyemales motus reuertit. Sub hac Idalcan victis perduellibus ferox; in Canarinum limitem præfectos cum exercitu misit. ij excelsis tumulis castra posuere. præterfluebat amnis incerto gurgite, præcipitibus vtrinque ripis. ex hisce munimentis Mahometani crebra excursione terrestres ab Goa commeatus arcebant. Aduersus eos Prætor ex insula peditum tribus ferè millibus, & paucis equitum turmis in continentem traductis, cis flumen è regione hostium in ipsa valle confedit. Mahometani interim è superiore loco incendiarias bolides, & varij generis tela torquere. Prætor, conserendæ cominus pugnæ audus, quod ponti materia deesset, transitum ex omni parte circumspicere. postquam dubias voragines, & cuncta vndique prærupta cernebat; admotis acriter equo calcaribus, vti erat cataphractus, qua in arctum coibat flumen, immani saltu transmisit: ac tanta fuit incitatio, vti disruptis ephippijs propemodum ex equo delaberetur. idem ausi ducis exemplo quidam, protinus in terram effusi, & ruentibus super eos equis obruti. cæteræ copiæ, simulatque trans amnem conspectus est Prætor, qualicunque demum reperto vado, per æqua per iniqua traieciunt: ardentesque animis, in hostem aduerso cliuo succedunt. Non tulere impetum Indi. vixdum inito certamine, queis nullum in fuga dedecus, terga vertere. neque per aspera & confragosa euadentibus Prætor diutius institit. Missi dein vltro citroque legatis; & ex vtriusque gentis commodo redintegrata pax est. Nec minori felicitate per id ferè tempus in Brasilia quoque compositi bellorum tumultus: cum orto Lusitanos inter & Saluatoris accolæ iurgio, ab Ioanne Rege Brasilijs defecissent. Sequuta dein quies. perque eam tranquillitatem liberior excursus Euangelio patuit. Thomæ Sosæ prætori iam ante successerat Eduardus Acoſta: & peropportune cum eo insignes aduenerant è Societate IESV viri Ludouicus Grana, Blasius Laurentius, Gregorius Serranus, Ioannes Consalvus genere Lusitani, Antonius Blascus Castellanus, & qui prouinciam hodie regit, Iosephus Anchieta Cantaber. Hisce adiutoribus institutæ aliquot locis Ecclesiæ, atque in pago præsertim, cui Piratininga nomen: vagique Brasilijs, quo commodius erudiri possent,



## *Historiarum Indicarum*

paulatim in vicos aut oppida contributi . atque hic etiam miraculis nonnunquam Deus prædicationi adstruebat fidem . inter cætera illud insigne referunt . Bello inter Piratiningæ incolas & finitimas gentes exorto ; cum in aciem exissent Piratiningani ; necopinata multitudine hostilium copiarum exterriti fluctuabant . Erat in exercitu virilis animi fœmina , paulo ante sacro lustrata baptismo . Hæc , perculos metu conspicata viros , magno animo hortatur , vt signo Crucis , Christiano more se muniant , ac prælium sine dubitatione committant . Factum vt monuerat ; ac dempto pauore tantus repente ardor atque fiducia cunctis iniecta ; vt alacres ac celsi pugnam inierint ; magnaque edita strage , hostem in fugam auerterint intacti omnes , duobus tantum exceptis qui salutaria piæ mulieris præcepta contempserant . sagittis ambo confixi : alter postmodum occubuit . Sub hæc , ad auri venas inuestigandas Lusitani milites cum fabris in mediterranea Prætoris iussu profecti . eorum animis Azpilcueta pastor adiunctus . ij per multos errores , varijs , vt assolet , conflictati miserijs & ærumnis , denique ad Saluatoris urbem rediere nullo tantæ operæ pretio . At Azpilcueta è summis laboribus ac lassitudine morbum contraxit , quo sensim absumptus , magnum Brasilijs pariter ac Lusitanis desiderium sui reliquit . Interea exciti fama rerum quæ à patribus gerebantur Carigij & Ibiragiati populi Americæ interioris , dociles mitesque natura , Christianæ religionis præstantiam adamauerant , Castellanis præsertim hortantibus , qui ad Paragaium annum ( is ex Argenteo defluit ) sedes habebant . Nec dubitauere Carigij amplius ducenti , aliquot Hispanis admistis , audiendi Euangelij ac baptismi petendi causa , Brasiliam versus à sexcentis passuum millibus iter periculosum ignotumque capeffere . horum piæ voluntati breuiore compendio satisfactum . siquidem à Tupinaquinis diræ immanitatis gente intercepti ac trucidati , labes criminum suo protinus cruore expiarunt , tanta beatitudinis æternæ concepta fiducia , vt inter ipsam necem percussores in hæc affarentur verba : Vos quidem arbitrati vestro , carnifices , fluxa hæc & olida membra concidite . animas certe non prohibebitis , quominus ad suum hodie conditorem ascendât . Per hunc modum mactati plerique ; alijs vincla indita ; vnus è Castel-



è Castellanis duntaxat elapsus, cum ad Sancti Vincentij coloniam peruenisset, cuncta patribus ex ordine retulit. Missus ex templo ad Tupinaquinos haud sine aperto vitæ discrimine Petrus Correa, linguæ Brasiliæ (vt supra diximus) bene peritus; trucis ac sanguinariæ gentis ferociâ blando sermone permulsit, ac duos qui supererant, exemptos è custodia Castellanos in Brasiliam perduxit incolumes. Cæterum ipse Carigiorum indole magnopere delectatus, illam sibi prouinciam à Nobrega depoposcit. additus illi comes è Societate Ioannes Sosa Lusitanus, eximia sobrietate ac patientia vir: præfinito spatio temporis, intra quod spatium redirent. Haud otiosa vel irrita fuit legatio. Ingenti labore totum illud iter emensi, verbo & exemplo magnos in Carigia terra motus animorum fecere; non plebe tantum, sed primoribus quoque à patria vanitate magis in dies ad studium Christianæ veritatis accensis. Ab eo munere dum ad socios euocandos Brasiliam repetunt anno seculi huius quinquagesimo quarto, sub ipsum natalem Domini diem, quem Nobrega peregrinationis terminum dixerat; præclara vtrique tanti sudoris atque operis præmia diuinitus persoluta. Vetus quidam erat Castellanos interpres, quem paulo ante Correa captum à Brasilijs, & in epulas de more saginatum, ex eorum faucibus eripuerat. magna huic erat cum Carigijs consuetudo, & auctoritas, varijs artibus & mira calliditate quæsitæ. Ab eius impuro conuictu quod Correa, tollendæ publicæ offensionis causa, concubinam auulserat; ira percitus ille, & immemor acceptæ salutis; insimulare Corream & Sosam apud Carigos institit, & in summum odium adducere, quasi cum hoste vicino in eorum perniciem conspirassent. Inde suspectos vulgo & inuisos, ethnici aliquot in itinere adorti, Brasilijs primum duos qui cum ijs ambulant, dein Sosam nixum illico genibus, & in preces effusum, sagittis eminus impetentes interimunt. postremo in Corream ipsum arcus intendunt. is, aliquot iam acceptis vulneribus, cum eos placido nihilominus vultu ac sermone lenire conaretur; contra illi pro verbis spicula redderent; flexis item ipse genibus, baculo abiecto, manus oculosq; tollit in cælum, peccatisq; hostium ingemiscens, inter supremam deprecationem densatis ictibus expirauit. Sunt qui factum eiusmodi in dede-



## *Historiarum Indicarum*

cus & infamiam trahant gentis vniuersæ, argumento probabi-  
i. sed mihi certis auctoribus compertum, clementi alioquin,  
vt supra diximus, ingenio viros, impij veteratoris dolo, &  
proditionis falso metu compullos ad facinus. Certe, cū hæc scri-  
beremus, de instituendo inter eos publico liberalium artium  
gymnasio à patribus agebatur. & vineam hanc, vt in primis fru-  
ctuosam, Correa Sosaque præcipua sibi cura colendam sumple-  
rant. quorum ille ante Societatis aduentum, Brasiliici nomi-  
nis terra marique acerrimus insectator, postquam à patribus  
doctus est quanto id piaculo fieret: nouis beneficijs veteres in-  
iurias obliterare, totumque se se Brasiliorum saluti è patrum  
disciplina dicare constituit: præclare secum actum iri putans, si  
in ea gente ad Christum adducenda vitam sibi ponere conti-  
gisset: ac proinde fideliter ac vigilanter admodum versatus in  
opere; quinto initæ Societatis anno voti compos effectus est.  
alter, ab olla & culina, quo in ministerio socijs aliquandiu de-  
seruierat, ad gloriosam pariter ipse coronam ascitus, nouum  
patribus fratribusque solidæ virtutis ac summisionis certamē  
iniecit. Cum hæc in Brasilia fierent, Ioannes Rex dignam ip-  
sius virtute ac pietate suscepit actionem; Abasini Regis ac  
regni ad catholicam fidem, atque ad auctoritatem Sanctæ Ro-  
manæ Ecclesiæ tandem aliquando adiungendi. nam etsi ab Da-  
uide legatus, de quo supra cōmemoratum est, Clementi VII.  
venerationem obsequiumque detulerat; tamen, in tanto loco-  
rum ac temporum interuallo, ad ingenium deinde redierat A-  
basina gens. quippe cuius in animis hærebant Dioscori, & Eu-  
tichetis penitus infixæ mendacia; & ab adulterino Alexandriæ  
præsule nihilominus iuris diuini responsa, ritusque sacrorum,  
& publicæ ac priuatae cæremoniæ petebantur. quapropter vix  
superesse videbatur salutis ratio, si ab Romano ipso Pontifice  
legitimus & recte sentiens Patriarcha ad eos pascendos regē-  
dosque populos mitteretur, & cum eo, spectata morum inno-  
centia & sanitate doctrinæ theologi, qui concionibus, collo-  
quijs, & frequenti disputatione, deceptis è mentibus letalium  
opinionum atque superstitionum fibras euellerent. Cuius rei  
perficiendæ hoc maiorem in spem venerat Ioannes, quod Clau-  
dius Rex, cui Gamma pridem suppetias tulerat, optime sese  
in Latinos Francosve (vt appellant ipsi) animatum, & recon-  
ciliationis



ciliationis cupidum ostendisset. Rebus igitur cum Iulio iij, mox cum Paulo iv. diu multumque agitatis, ad consilium adhibito in primis Ignatio Lolola; tandem in id munus delecti è Societate Iæ s V tredecim viri, sanctimonix non minus quam eruditionis laude præstantes: ii que variis è nationibus. accessere ex eadem Societate probi aliquot vitæ quotidianæ adiutores. Neque vili, tam arduam in expeditionem, tamque laboriosum iter atque longinquum, alacritas defuit. tantum ab honorum vocabulis & insignibus cuncti & suo ipsi iudicio, & Societatis instituto valde abhorrebant. ac proinde nominatim appellati ea de re quidam, præcise negauerant. Eo dignior quæ extolleretur, tanta humilitas visa. ac ne tergiversationi ultra esset locus; ab summo Pontifice pro imperio coactus ad Patriarchatum euehitur Ioannes Nonnius Barretus Lusitanus, qui nuper in Africa redimendis iuuandisque captiuis insignem operam summa cum prudentiæ & caritatis laude nauauerat: alterius Nonnij germanus frater, qui tum Indicam Ignatij nomine Societatem regebat. Huic, Episcopali dignitate coadiutores, vt appellant, iidemque si quid ei grauius accidisset, successores pro potestate insuper adiuncti duo, Melchior Carnerius item Lusitanus, & Andreas Ouiedus Castellanus, qui collegio Societatis Neapolitano tū præerat, mirus & corporis domitor, & gloriæ humanæ contemptor. illum antistitis Niceni, hunc, Hierapolitani titulo decorauit Pontifex. Neque in quopiam eorum hæere potuit cupiditatis aut ambitionis vlla suspicio: cum & inuitos tanta onera subiisse constaret; & per hosce dignitatis gradus, non ad opes, aut vitæ commoda, sed, vti declarauit euentus, ad vltimam egestatem, & erumnas, & quotidiana capitis pericula tenderent. Magnam vero expectationem delectus ille conciuuit. & cum de successu rerum variæ, vt fit, pro suo quisque sensu loquerentur homines; tamen huic tantæ actam nouæ actioni vulgo fauebant. Ignatius vero in eandem, non solum opi diuinæ implorandæ assiduis per se perque socios votis & supplicationibus excubabat; sed etiam, fessa iam ætate viribusque, suum ipse nomen operamque (modo fulgor ac species honoris abesset) summo Pontifici sponte detulerat. cumque eius ætati, & valerudini, maximis præterea occupationibus parceretur; accurata me-



## *Historiarum Indicarum*

„ ditatione ad Claudium Regem scripsit litteras hoc exem-  
„ plo: Domine mi in Domino nostro I E S V Christo: Gra-  
„ tia tuæ Celsitudini, & salus & affluentia donorum spiri-  
„ tualium, à Domino nostro I E S V Christo. Serenissimus  
„ Portugaliæ Rex, pro ea sollicitudine ac zelo, quem illi  
„ Deus creator noster ac dominus dedit gloriæ sancti sui no-  
„ minis, & salutis animarum, quæ vnigeniti eius filij pre-  
„ tioso sanguine & vita redemptæ sunt; non semel ostendit  
„ mihi per litteras, pergratum sibi fore, si è religiosis no-  
„ stræ minimæ Societatis, quam vocant I E S V, duodecim  
„ viros designarem, è quibus ille Patriarcham vnum, duos  
„ coadiutores pariter & successores eligeret. ijsdemque à Sum-  
„ mo Christi Domini nostri Vicario suppliciter peteret au-  
„ ctoritatem & ius, quo iure ad suas quisque partes rite o-  
„ beundas ipsi cum sacerdotibus alijs in tuæ Celsitudinis re-  
„ gna transmitti possent. Ego, pro eximijs inter cæteros Chri-  
„ stianos principes, eiusdem Serenissimi Regis Portugaliæ me-  
„ ritis erga Societatem nostram vniuersam, nostraque vicissim  
„ omnium in illum observantia & pietate, feci quod iusserat:  
„ consultoque sequutus numerum qui Christi Domini nostri,  
„ Apostolorumque eius collegium referret; præter ipsum Pa-  
„ triarcham, sacerdotes duodecim supplementi ac velut semi-  
„ narij causa, è corpore nostro cunctos excerpfi: qui ad su-  
„ bleuandas iuuandasque animas, tuæ Celsitudinis imperio  
„ ac ditioni subiectas, sese vitamque suam in omnem labo-  
„ rem atque discrimen offerrent. Atque hoc libentius parui,  
„ quod præcipua quadam alacritate sentio me sociosq; meos  
„ omnes ferri ad obsequium & cultum Celsitudinis tuæ, haud  
„ immerito, quippe quæ inter tôt circumfusas vndique natio-  
„ nes infidelium & hostium nominis Christiani, vestigijs ma-  
„ iorum suorum insistens, ad conseruandam ac promouen-  
„ dam Christi Domini ac Dei nostri religionem & gloriam  
„ diligenter incumbit. Quam ipsam ob causam optandum  
„ fuerat, vt ad hæc tam recta tuæ Celsitudinis studia cona-  
„ tusque, subsidium accederet spiritualium patrum, quibus &  
„ legitima potestas ab hoc Sanctæ Sedis Apostolicæ fastigio  
„ deriuata; & fidei Christianæ pura & sincera doctrina suppe-  
„ teret. quæ nimirum duæ sunt clauæ illæ regni cœlorum, quas  
„ Christus



» Christus Dominus noster Sancto Petro, & omnibus qui deinceps in eius erant solio sessuri, promisit prius, de in ipsa re tradidit. Promisit tantummodo, cum ad eum dixit (vt legimus apud Diuum Matthæum Euangelistam) Ego dico tibi quia tu es Petrus, & super hanc petram ædificabo Ecclesiam meam; & tibi dabo clauēs regni cœlorum; & quicquid ligaueris super terram, erit ligatum & in cœlis: & quicquid solueris super terram, erit solutum & in cœlis. Tradidit, ac promissa pertrauit; cum post resurrectionem, antequam in cœlum ascenderet, sciscitatus ex eo ter (quemadmodum affirmat Diuus Ioannes Euangelista) Simon Bariona diligis me plus his? subiunxit in singula responsa: Pasce oues meas: committens illi non partem aliquam ouium suarum, sed totum prorsus gregem, vniuersa cum plenitudine potestatis, ad alendos vitali Christianæ religionis paulo cunctos vbique fideles, eosdemque ad cœlestia sempiternæ beatitudinis pascua perducendi. Ac cæteris quidem Apostolis, auctoritatem Christus Dominus noster impertijt delegatam, ac veluti extra ordinem: at Sancto Petro eiusque successoribus, ordinariam dedit ac plenam; vti ab hoc summo Pastore, tamquam à fonte, reliqui animarum pastores peterent, eidemque acceptum ferrent, quicquid omnino iuris ad suum quisque munus ac regimen obtinerent: quod olim adumbrasse per Esaiam videtur Dominus, cum de Eliachim loquens Pontifice Maximo; Et dabo, inquit, clauem domus David super humerum eius; & aperiet, & non erit qui claudat; & claudet, & non erit qui aperiat. quo videlicet typo figuratus est Petrus, eiusque successores, quibus datam integram potestatem declarant clauēs, consuetum vtrique symbolum & insigne pleni atque absoluti dominiij. Quæ cum ita sint; Celstudo tua gratias debet ingentes Domino Deo nostro, quod ipsa regnante potissimum, dignatus fuerit istis nationibus mittere veros animarum pastores, qui à Summo pendant Pastore ac Vicario quem reliquit in terris IESVS Christus Dominus noster; & quantamcunque habent potestatem, quæ sane per ampla est, hanc ab eodem illo Vicario totam acceperint. Nec sine causa, patri auctore tuæ Celstutinis displicebat sumi ab vrbe Alexandria Patriarcham. quippe, sicuti diuulsum à corpore membrum, neque motum, neque sen-



## *Historiarum Indicarum*

um, neque omnino vitam à corpore accipit suo; ita Aegyptius Patriarcha, siue ille Alexandria, seu Memphis degat, cum schismaticus sit ac disiunctus ab hac sacrosancta Sede Apostolica, & ab Ecclesia totius capite Pontifice summo; videlicet vitam gratiæ, & pastorem auctoritatem, nec sibi recipit ipse, nec alteri cuiquam valet legitimam impertire. Ecclesia namque Catholica, vna tantum est in orbe terrarum: neque fieri potest ut alia Romano Pontifici, alia pareat Alexandrino. Vti sponsus eius Christus vnus est, sic sponsa illius vnica, de qua Salomon ait in Canticis ex persona Christi Domini nostri; Vna est columba mea: & Oseas propheta: Congregabuntur filij Israel, & filij Iuda pariter, & ponent sibi caput vnum. & in eandem sententiam multo deinde post Sanctus Ioannes, Fiet, inquit, vnum ouile, & vnus pastor. Vna erat, quemadmodum in Genesi legimus, arca Noe; extra quam nulla omnino salus. vnum tabernaculum quod fabricatus est Moyses. vnum Hierosolymæ templum à Salomone conditum, quò in templo sacrificare & adorare oportebat. vna cuius staretur iudicio, Synagoga. Hæc nimirum omnia Ecclesiam denotabant, quæ vna est item; extra quam nihil boni: etenim qui cum eius corpore coniunctus non fuerit, nempe nullam à Christo capite recipiet influxum gratiæ viuificantis animam, ac preparantis ad felicitatem æternam: Huiusce vnitatis declarandæ causa, contra quosdam hæreticos in Symbolo canitur: Credo vnâ Sanctam Catholicam & Apostolicam Ecclesiam: damnatusque à sacris Conciliis error est, priuatas Ecclesias, seu Alexandrinam, Constantinopolitanam, aut similes dari, quæ communi omni capiti subiunctæ non sint Pontifici Romano, ex quo perpetua serie ab Sancto vsque Petro ( qui Christi Domini iussu, vti à Diuo Marcello martyre traditum est; Romanam elegit sedem, eamque suo cruore sancivit) perducti Romani Pontifices; Vicarij Christi citra controuersiam à tot ac tanta sanctitate doctoribus Latinis, Græcis, omniumque nationum habiti; ab sanctis Anachoretis, Episcopis, & alijs confessoribus adorati; tot signis atque miraculis, tot denique martyrum qui in hac fide & vniione Sanctæ Romanæ Ecclesiæ vitam profudere, testimonio comprobati sunt. Merito igitur, consentienti Episcoporum omnium voce qui ad Chalcedonensem conuenerant Synodum.



Synodum, Papæ Leoni pariter acclamatum, Sanctissimus,  
Apostolicus, Vniuersalis. Et in Constantiensi damnata est  
hæresis negantium super omnes & singulas omnium terrarum  
Ecclesias, Primatum Romani Pontificis eminere. Ad quas  
tam disertas firmasque patrum sanctiones atque decreta, Con-  
cilij quoque Florentini, quod sub Eugenio IV. præter alias  
nationes, à Grecis etiam, Armeniis, & Iacobitis tanto stu-  
dio celebratum est; in hæc verba accessit auctoritas: Defini-  
mus, Sanctam Apostolicam Sedem, & Pontificem Romanum,  
in vniuersum orbem tenere primatum, ac successorem esse Pe-  
tri, & verum Christi Vicarium, totiusque Ecclesiæ caput, &  
omnium Christianorum patrem & doctorem existere: & ipsi  
in Beato Petro, pascendi, regendi, gubernandi vniuersalem  
Ecclesiam, à Domino Iesv Christo potestatem plenam esse  
traditum. Iure igitur Serenissimus Rex David, tuæ Celsitudi-  
nis genitor, misso ad obsequium Romano Pontifici deferen-  
dum legato, sanctam hanc Sedem omnium matrem ac princi-  
pem agnouit. cumque alia multa & præclara ipsius pariter &  
tuæ Celsitudinis acta numerentur; tum duo hæc eiusmodi sunt,  
vt eorum præstantiam nulla vnquam obsecratura videatur o-  
bluio: ac proinde ab omnibus qui sub isto viuunt imperio,  
immortales auctori bonorum omnium Deo debentur gratiæ  
pro tam singulari in eos beneficio, vestra duorum opera, in-  
dustria, virtute collato: cum alter omnium primus se in illius  
potestate qui Christi vices gerit in terris, perpetuo fore pro-  
fessus sit; alter item primus dictum ab eodem Christi vicario  
Patriarcham, verum ac legitimum Sacrosanctæ Sedis huiusce  
filium in sua regna perduxerit. Etenim si in magni cuiusdam  
beneficij loco habendum est, vt profecto est, infitos esse cor-  
pori mystico Ecclesiæ Catholicæ quod à Spiritu Sancto vi-  
uificatur ac regitur, quam, teste Euangelista, idem Spiri-  
tus docet omnem veritatem; si eximium est munus, lucem  
sanæ doctrinæ intueri, & Ecclesiæ fundamentis insistere,  
quam Apostolus Paulus ad Timotheum scribens domum Dei,  
columnam & firmamentum veritatis appellat; cui se promi-  
sit in æternum affore Christus Dominus, inquit, Ecce ego  
vobiscum sum vsque ad consummationem seculi, vt legi-  
mus apud Matthæum Euangelistam; est sane cur sine fine gra-  
tulentur



## *Historiarum Indicarum*

» tulentur istæ nationes Deo Domino & conditori nostro, cu-  
» ius prouidentia, per tuam parentisq̃ue tui Celsitudinem tan-  
» to illos bono dignata est. præsertim cum iure sperandum sit,  
» ex hac ipsa conciliatione consensuq̃ue, fore, Christo Domino  
» moderante, vt cum spiritualibus temporaria quoque incre-  
» menta, non sine amplificatione imperij tui, & hostium abie-  
» ctione proueniant. Sacerdotes qui mittuntur isthuc, omnes  
» quidem, sed præcipue Patriarcha, coadiutoresq̃ue, & succes-  
» sores eius duo, spectata admodum virtute sunt, & nostra in  
» Societate probati per omnia: ac propter illustrem caritatem,  
» & exquisitam rectamq̃ue doctrinam ad hoc tanti momenti o-  
» pus adsciti. neque vero illis animus in idipsum aut alacritas  
» deest, haud leui concepta fiducia, labores suos, ad Christi  
» Domini gloriam, tuæ Celsitudinis rem, animarum auxilium,  
» pari cum operæ pretio collocandi. Humanæ quippe salutis  
» amor, illos, & Christi Domini aliqua saltem ex parte imitan-  
» di exstimulat studium; qui cruciatus ac necem subiit volens  
» ac libens, vt mortales ab æterna calamitate redimeret: aitq̃;  
» per Euangelistam: Ego sum pastor bonus: bonus pastor ani-  
» mam suam dat pro ouibus suis. hoc exemplo incitati Patriar-  
» cha & cæteri parati veniunt, non verbo duntaxat, consilioq̃;  
» & spiritualibus adiumentis; sed ipsa morte, si res ferat, peri-  
» clitantibus animis opitulari. tua Celsitudo quo interiorum il-  
» los ad consuetudinem ac familiaritatem admiserit; eo maio-  
» rem, vt spero, capiet in Domino voluptatem. Iam vero, quod  
» pertinet ad fidem ac pondus eorum quæ ab ipsis vel publice  
» vel priuatim exponentur, non ignorat Celsitudo tua, omnium  
» ( quatenus rite legati sunt ) sed Patriarchæ præcipue dictis, A-  
» postolicæ fidei pondus & auctoritatem inesse: ac perinde illis  
» & Ecclesiæ credi oportere; cuius ab ipsis interpretanda sunt  
» verba & sententiæ. Et quoniam Christi fideles cunctos Eccle-  
» siæ firmiter assentiri, eiusq̃ue decretis obtemperare, & si quid  
» existat ambiguum aut obscurum, eandem consulere necesse  
» est; non dubito quin tua excellens pietas probitasq̃ue publi-  
» co edicto curatura sit in suis regnis, vt omnes omnium ordi-  
» num homines tum Patriarchæ ipsos tum eorum quos ille sibi  
» substituet; dicta, præcepta, responsa citra vllam dubitatio-  
» nem sequantur. Contat ex Deuteronomio, de controuersijs  
» omnibus



„ omnibus ac nodis ad Synagogam Ecclesiæ prænuntiam refer-  
„ ri solitum : hinc illa quoque Christi Domini verba : super ca-  
„ thedram Moysi federunt Scribæ & Pharisei . idipsum in pro-  
„ uerbijs docet sapientia Salomonis, cum ait: Ne dimittas præ-  
„ cepta matris tuæ ( ea est Ecclesia ) & alibi: Ne transgrediaris  
„ terminos quos posuerunt patres tui. ij sunt eiusdem antistites.  
„ Denique tantum Ecclesiæ suæ tribui ac deferri vult Christus  
„ Dominus; vt per sanctum Euangelistam Lucam aperte denun-  
„ tiet: Qui vos audit, me audit: qui vos spernit, me spernit. &  
„ per Sanctum Matthæum: Si Ecclesiam non audierit: sit tibi si-  
„ cut ethnicus & publicanus. Ex quo apparet, ne aures qui-  
„ dem præbendas ijs, qui alienum quippiam à sensu & interpre-  
„ tatione catholicæ Ecclesiæ attulerint; Sancto quoque Paulo  
„ in epistola ad Galatas idipsum præmonente, cum ait: Si aliud  
„ vobis angelus de cœlo euangelizauerit, præter id quod euan-  
„ gelizauimus vobis, anathema sit. ad summam, hoc idem San-  
„ cti doctores, Conciliorum Canones, fidelium omnium con-  
„ sensus & consuetudo plane demonstrant. Ac vicissim Patriar-  
„ chæ ac sociis pariter omnibus certum est fixumque, tuam Cel-  
„ situdinem assiduo cultu, submissione, atque etiam quoad fas  
„ piumque ferat, indulgentia prosequi. Nos vero quotquot in  
„ hisce terris è minima nostra Societate retinemur, tua Celsitu-  
„ do ad omne obsequium in Domino paratissimos habeat. No-  
„ stris quidem certe precibus & sacrificijs, vt iam instituimus,  
„ Deo supplicare pergemus, vti Regiam Celsitudinem tuam, re-  
„ gnumque istud amplissimum in Sancto Christi famulatu con-  
„ seruet: detque illi ita transire per bona temporalia, vt non a-  
„ mittat æterna. Idem ipse Deus ac Dominus noster, omnibus  
„ nobis ad sanctissimam ipsius voluntatem & clare cernendam,  
„ & rite exsequendam, perpetuum lumen ac vires pro sua infini-  
„ ta bonitate suppeditet. Romæ vij. Kalen. Martias M.D. LV.  
Hæ litteræ, quas ad Claudium, vt dixi, perferret, Ioanni Pa-  
triarchæ designato, cum Pontificijs diplomatibus, & sacro  
pallio de more transmissæ. Legationem totam Ioannes Rex  
pro sua consuetudine perquam liberaliter instruebat, orato-  
rem insuper declarauerat è suis familiaribus primarium virum  
Fernandum Sosam, qui Patriarcham honoris causa in Abas-  
siam vsque deduceret. Accedebant regalis opulentia dona,  
intextæ



## *Historiarum Indicarum*

intextæ auro argentoque vestes, & sacrorum instrumenta magnifica. Dum hæc parantur; mature ab Goa Regis iussu profectus ad Claudium Iacobus Diazius, qui aduentum Patriarchæ & comitum nuntiaret: eisque aditum in ea loca muniret. Vna missus à Prætore Consalvus Rhoterigius (de quo supra memorauimus) egregie pius & eruditus è collegio Societaris Goano sacerdos. huic mandatum (nondum explorato ad liquidum sensu Abassini Regis) vti rem totam probe cognosceret; conceptosque ab eo bonæ mentis igniculos, interim accurate foueret, excitaretque. Simul, superstitibus è Christophori Gammæ clade Lusitanis, quorum plerique in ijs terris matrimonio sese illigauerant, spiritualem opem ac solatium afferret. Sapienter id prouisum ac prætentatum, exitus docuit. Biremibus duabus, vnus mensis navigatione, ad Arquicum Abassinæ ditionis expositi ambo, in regia statua (quæ subinde principi mutare mos est) terrestri aliquot dierum itinere peruenierunt. Biduo post admissi ad colloquium: & Lusitani Regis epistola publice recitatur, in qua erat: Quod sese Claudius, aut ac parentis exemplo, rectæ in Deum fidei, & catholice communionis cupidum ostendisset; gratis finum id omnibus Christi cultoribus, ac sibi præsertim accidisse. atque ob id se missurum anno proximo certum è sua familia virum, & cum eo perspecta morum innocentia, & doctrinæ synceritate patres, qui optimis eius studijs toto pectore deseruirent. Sub hæc & alia in eam sententiam, è Lusitanis adstantibus Abassinæ linguæ peritis cognita, Rex veluti oppressus, obducto vultu, sermone confuso, perplexa quædam & incerta respondit. ingenij mobilitate, vel improborum suasu immutatum haud dubie cerneret. Modeste post hæc interrogatus, quid ita super ea re litteras ad Ioannem ultro dedisset; reiecta in librarium aut interpretem culpa, se quidem fraterna in Lusitanum Regem voluntate esse ac fore subiunxit; cæterum nihil sibi minus in mentem venisse, quam vt iccirco à maiorum institutis, ac tot seculorum spatio corroborata religione deficeret. Attamen Rhoterigius, ope fretus diuina, captatisque temporibus, Claudium omni ratione ad sanitatem reuocare conatus; miram in eo & primoribus regni, Conciliorum, & Ecclesiasticæ historiæ, ac diuini & humani iuris inscitiam deprehendit.



idt. Neque tamen astus aberat . callide vel in primis ipse Rex agere; occupationes modo simulare; modo longis, & alienis, & non inuenientibus exitum sermonibus de industria tempus extrahere . in angusto comprehensus, palam eludere; pleraque inficiari; interdum etiam infimi sacerdotis qua sortem, qua confidentiam acerba perstringere: At Rhoterigius; cum & malignos aditus & iniquiorem in dies coram disputandi conditionem animaduertisset; librum subseciuis interim operis ab se confectum, & Chaldaice utcumque redditum, obtulit Regi . quo libro, confutatis Abassinae gentis erroribus, Ecclesiae Romanae summum inter omnes Ecclesias culmen ac potestatem aperte monstrabat . Aduersus hunc librum dum Claudius petita è variis cœnobiorum bibliothecis volumina dies noctesque perlustrat, neque tamen extricat quicquam; Latini sacerdotis nomen, & insignis in eo cuiusdam sapientiae famam toto pæne regno vulgavit imprudens . ac ni caute suppressus liber fuisset, magnos proculdubio concursus ad Ecclesiae Romanae gremium apparebat futuros. auxit rumorem Abuna ( sic enim Aegyptios Antistites vocant) nuper in eas regiones Alexandria missus . hunc Rex certaminis causa cum Rhoterigio committere cupiit, atque etiam ut scriptis Rhoterigij responderet hortatus est . At ille, rugosa fronte, superciliis adductis, nullum, ait, sibi cum hereticis commercium sermonis esse: neque se illuc altercandi cum peregrinis, sed cleri ordinandi gratia destinatum . quin religionem ultro inculsit Regi, quod impia scripta legere esset ausus: idque ne in posterum faceret, minaciter vetuit. Inter eiusmodi frustrationes ac moras sextus effluxerat mensis. cumque iam tempus reuersionis instaret, Rhoterigius, per Sacramenta expiatis, & confirmatis in officio Lusitanorum animis, ab Rege veniam abeundi cum Diazio petit; ac simul obsecrant, missis ambagibus promat, quid super aduentu Patriarchæ & comitum referri imperet Goam . ille, quod ad patrum aduentum attineret, Mazuæ præsto fore dixit è suis, qui descendentes exciperet, atque ad se cum fide curaque perduceret . ubi coram eos audisset; tum se, quid facto opus esset, deliberaturum. Simul, auri decem uncias Rhoterigio in viaticum erogari iubet. ille, accepta voluntate, pecunias reii-  
cit.



## *Historiarum Indicarum*

cit . Goam dein repetentes, circa Zeilanam oram subita coor-  
ta procella euerso nauigio prope demersit . saluti fuit, supplici  
ter inuocatum Beatæ Virginis auxilium. eius præsentī ope, de-  
speratis iam rebus, nullo nautarum ministerio suam in sedem  
carina rediit . ita fluctus exhausti . votiua dein casus effigies  
Goæ in eiusdem Dei matris templo suspensa . Per eosdem fere  
§ dies quibus in Aethiopiam Rhoterigius erat profectus ; è  
Lusitania præmissi, dum grauiora Patriarcham negotia mo-  
rantur , ex eius comitatu decem ; ac varias, vt sit, in naues  
impositi, Mosambicum incolumes deuenere . A Mosambico  
dum vastum præcidunt Oceanum, abducta ab cæterorum cõ-  
spectu oneraria vna, in syrtim per tenebras noctis impingitur.  
neque tumidum erat mare, & paruo interuallo, breuia, igno-  
tam ad insulam exigui admodum ambitus pertinebant. Eo tu-  
tius, dirupto alueo nautæ vectores quæ, trecenta circiter capi-  
ta in terram effusi . verum squalidus, & ab omni humano cul-  
tu desertus erat locus . & è commeatu nautico modicum quid  
vini, & cibaria eaquæ ferme vitiata supererant : vt ni propere  
subueniretur, vltima necessitas ac dira fames instaret . extem-  
plo nauarchus opis petendæ gratia scapham cum eximijs viris  
triginta conscendit, & leucarum quingentarum, vt nautæ sup-  
putant, spatium emensus, haud sine miraculo Goam applicuit.  
mox, è naufragij reliquijs raptim concinnato nauigio, quin-  
quaginta ferme alij subsequuti . remansere ad ducentos. in iis  
è patrum numero tres . Consalius, Paschalius, & Alphonsus  
Lupius . hi ab antecedentibus liberaliter inuitati ; præcipuam  
conditionem in communi discrimine recusarunt ; afflictamquæ  
turbam & inopem, suis quoque officijs ac præsentia destitui,  
quo erant caritatis ardore, passi non sunt . Eorum periculo  
cognito Prætor Barretus confestim cum duabus celocibus eū-  
dem nauarchum, & nauclerij ordinis præfectum, quem guber-  
natorem maximum appellant, ad naufragos quærendos ac de-  
portandos abire iussit . irritus fuit labor . & ingenti, vt dixi-  
mus, interuallo distabant ; & insula quo minor, eo ad inuesti-  
gandum obscurior . Ergo non ante inuenti, quam inedia ad  
vnum omnes absumpti sunt . Eius rei nuntius Goam allatus,  
mœrore ciuitatem impleuit . Socij tres æterno virtutis & ca-  
ritatis præconio celebrati, quod oblato ad salutem exitu, suis  
tamen



tamen ipsi capitibus aliena solatia prætulissent. Anno insequenti, Ioannes Patriarcha, Andreas Episcopus, & Ioannes Mesquita, oratore Sosa inter nauigandum extincto, Goam deuehuntur incolumes. Ibi cognito Claudium, contra opinionem & famam, in veterum erroribus & impia secessione perstare; digna consultatione res visa. Adhibiti præter lectissimos è Societate patres, Ecclesiæ quoque Goanæ viri primarij. Ac Patriarcha quidem, quamquam asperis ac periculosis in rebus, tamen sese in omnem aleam Christi causa paratum ostendere. cæteris nequaquam è Sedis Apostolicæ dignitate visum, eo loco fastigioque personam, tot tantisque Pontificis Romani decretis ac iudicijs inclytam; seiunctæ à Catholico cœtu genti præbere ad ludibrium & contumeliam os. Verum, ne prædamnata & abiecta repente per metum vel ignauiam tantæ expectationis apparatusque legatio, & si quid sanari experiendo posset, omissum vlla ex parte videretur; Andream Episcopum duobus tribusve cum sociis Abassiam adire, quæque Rhoterigius incassum egerat, pari fide, maiore auctoritate rursus aggredi placuit: & prout sese res darent, per litteras Patriarchæ Ioanni suadere vel dissuadere prouinciam. Ille, tam præclaram de Christo benemerendi & exercendæ patientiæ occasionem arripuit libens. Cum Emmanuele Fernando sacerdote, & paucis præterea comitibus in Abassiam profectus; nihilo quam Rhoterigius faciliorem aut equiorem expertus est Regem. Maior dein illis oblata omnis virtutis explicandæ materies. Paucis namque post eorum aduentum diebus, Claudio à perduellibus acie victo ac perempto successit Adamas frater, olim desertor fidei Christianæ, vir immanis ac ferus, & Apostolicæ Sedis hostis acerrimus. is, victum Andream, in castra bellumque raptauit; comites, probris & contumeliis; Abassinos quotquot catholicæ veritati fauere visi sunt, vario genere pœnarum affecit. atque ipse demum à Turcis, quorum arma rebelles in regnum asciuerant, ingenti clade fusus fugatusque est. & ab iisdem, Andreas ac socii primo capti crudeliterque direpti, postmodum igne in hospitium iniecto viui pæne combusti; denique tanta premi rerum omnium inopia cepti sunt: uti ad vitam tolerandam, ne à pusillo quem supra dixi, Catholicorum abscederent grege, bobus

&



## *Historiarum Indicarum*

& aratro quæsitis, terram suis ipsi manibus colerent. Atque inter hæc difficultates & incommoda quotidiana, caritatis & obedientiæ gloria clarus Andreas, diuexato miris modis & fatigato corpusculo tandem excessit. Per hunc modum de aggregandis ad Catholicorum numerum Abasinis elusæ bonorum spes. At Patriarcha Ioannes, Albuquerque Goano Episcopo vita functo, cum ad illius Ecclesiæ gubernacula vocaretur; nunquam, ut eam reciperet procurationem adduci potuit. Suum ipse quin potius apicem, quoad liceret, ad Societatis normam & instituta submittebat; perpetuam abstinentiæ, religionis, industriæ laudem ad ultimum usque spiritum æquali tenore perduxit. Melchior, Nicenus Episcopus, pari moderatione cum se pæne in ordinem redegisset; in Thomæos Christianos ex consuetudine Societatis excurrens, Nestorianum pseudoeписcopum, inficientem praua doctrina populorum animos, egregie confutauit ac fregit; aliisque deinceps viro forti dignis actionibus cum iniquorum simultates & odia subliisset; directa in eius caput sagitta, pileoque decusso, prope modum interfectus; in Sinas denique iussu Romani Pontificis abiit. ibi ad Amacanum hodie Lasitanorum emporium, ætatis iam exactæ reliquias, propagandæ fidei, & Christianorum animis rite curandis infumit. ceteri Patriarchæ focii varias ad functiones de more destinati, vitam in suo quisque munere posuere. insignem inter eos perhibent Antonium Quadrium Lusitanum, qui vniuersæ dein prouinciæ quatuordecim annos magna cum sanctitatis & prudentiæ laude præfuit. Verum circa irritæ expeditionis initia; neque leuioris momenti aliam, neque meliore successu tentauit Boniferrus ex familia Franciscana sacerdos, natione Gallus, minime vulgari vel doctrina, vel sanctimonia vir. Is; rei Christianæ studio incensus cum in Indiam peruenisset, audita Pegusiani regni amplitudine, vitiis & superstitionibus incolarum, eam sibi præcipue gentem omni ope subleuandam, ac fidei rudimentis imbuendam suscepit. Igitur Goa profectus ad Diui Thomæ coloniam, ex bua frequens in littora Pegusiana traiectus est; cum eius coloniæ Vicario, & Alphonso Cypriano, & ceteris Lusitanis amicitiam iniit. iisdemque adiutoribus in onerariam admissus, diffi-  
cili admodum ac periculosa nauigatione ad emporiū cui no-  
men



men Cosmi, deuehitur. Prorsus ignotæ paulo ante Corree aduentum de quo supra diximus, nostris hominibus eæ gentes fuerant. ipsius dein Corree & comitū relatu, multa de illarum diuitijs moribusque cōperta. Bōferri postea litteris de origine Pegusiorum præter fabulosas quasdam opiniones acceptū, stirpem eos ab Iudæis exfulibus ducere, qui ab Salomone damnati ad Offiranas aurifodinas, ea loca primi tenuerint. Fertilissimus vero ager, & exspatiantibus late campis, alendo pecori bonus, & affluens omni varietate rerum est. quippe, alueo nauigabili, & flexuoso discursu piscosi amnes intermeant. è quibus vnus è Ciamaiio lacu centum & quinquaginta leucarum decurrit spatio; atque ad instar Nili statis incrementis in triginta circiter leucas exundans, præpingui ac feraci limo rigat arua felicia. Accedunt ad opulentiam, crebra introrsum æstuarua, facili commercio gentium exterrarum, ac mira quidlibet importandi exportandique copia & facultate. Cæterum ignara Dei, & in omnem libidinem scelusque proiecta gens est, ac miserandis opinionum erroribus inuoluta: è quibus nonnulla hoc etiam loco attigisse operæ pretium fuerit: vt ex ea comparatione, Christiani, cum sua clarius agnoscant bona; tum ad eadem alijs impertienda vehementius inardescant. Iam primum, qui apud eam barbariem sapientes habentur; infinitos perpetua serie ac successione mundos ab omni æternitate constituunt. innumerabiles item deos: quorum aliquot in singulis mundis variante numero deinceps existant. qui nunc voluitur, hunc deos quinque habiturum affirmant, quorum quatuor iam abierint. postremum hunc ante bis mille & nonaginta nouem annos aiunt è vita migrasse; nunc sine deo sunt. post multorum annorum curricula venturum alium exspectant: eo quoque demortuo mundum hunc ingenti conflagraturum incendio; vti mox reparetur, succedatque moles noua, suos item deos ac proprios habitura. in deorum autem cœtum homines referuntur, ea tamen lege, si prius in aquatiles, terrestresque, & aerias omnium generum animantes varia transmutatione migrauerint. Qui ex hac vita decedunt, ijs triplicem fingunt sedem; Naxac, is tormentorum est locus; & Scuum, delicijs ac Paradiso Mahometano persimilem: & Nibam, quæ vox, omnis essentia priuationem, & vlti-



## *Historiarum Indicarum*

num corporis & animi interitum notat . duobus in prioribus animæ tandiu detinentur , atque inde repetitis nascendi vicibus in mundum toties redeunt ; quoad in Nibam admitti , hoc est prorsus ad nihilum redigi denique mereantur . Hæc & id genus alia Pegusiani dogmatis elementa sunt ; exstantque multa de hoc genere toto conscripta volumina . Ex iis principiis , & eiusmodi vanitate , quam prauus numinum cultus , quam absurda cæremoniæ , quæ portenta opinionum , quæ vitiorum sequantur monstra , non expers doctrinæ , vel rerum imperitus facile quiuis existimauerit . Accedit ad cumulum malorum , quod hæc tenebras circumsepsit dæmon , vt solet , summa difficultate luminis inferendi . siquidem ipsius artificio plane persuasum ac penitus infixum habent Pegusij , cuiuslibet alterius , quamquam ex ipso demissæ cœlo doctrinæ vel sectæ , decretis aut placitis , aures , nedum assensum , absque inexpiabili scelere præberi non posse . Bomferrus , in Cosmi de quo dicebamus emporio , tribus ferme annis , inter hæc exploranda mysteria , linguamque ediscendam , ingenti labore miseriaque consumptis ( ita tamen vt adiuuandis per id ipsum tempus Europæis mercatoribus operam daret ) sermones demum de Christiana religione ferere pedetentim aggredditur . Vnius æterni trinique Dei providentiam : vniuersitatis huiusce molitionem ex nihilo ; primi hominis crimen in posteros homines letali contagione transfusum ; necessitatem satisfactionis infinitæ ; quam præter Deum præstare cum posset nemo ; Deus ipse , redimendi generis humani gratia factus homo , volens prudensque pro sua immensa bonitate subierit ; ad hunc humanæ salutis auctorem , quotquot sese per fidem , & imitationem , & caritatem adiunxerint ; hisce omnibus inenarrabilia quedam & sempiterna esse in cœlo præmia constituta : qui secus ; hisce in tartaro item exquisitissima in omnem æternitatem parata supplicia : ad vtram quisque pertineat classem , extremo voluentium seculorum die , cum animæ vita functæ , rursus corpora induerint , Deum ipsum iudicem in celeberrimo superum inferumque conuentu lata sententia planum esse facturum . Hæc igitur , & alia rectæ fidei capita , cum per occasionem exponere , Dei famulus , multisque partim exemplis , partim rationibus affirmare



affirmare tentasset; mirum quam obduratos obfirmatosq; contra omnem veritatem animos incolarum offenderit. alij, vt fabulas ac deliramenta ridere: alij, vt pestes & piacula prorsus abominanda respuere. neque multum ab vltimo exitio aberat ignotus præco, si nouam ab omni memoria disciplinam ac religionem potro inculcare institisset. Ergo non sine causa veritus, ne super discrimen capitis, & quotidianas ærumnas, oleū quoque & operam perderet; amicorum suasu, re infecta, retro vnde venerat in Indiam reuertit. Per eosdem fere dies atrox  
Cocini facinus editum. in capsa, quæ piorum collationibus in maximo vrbis templo prostabat, nefarie schedulæ à custodibus repertæ, cum horrendis in Christum salutis humanæ parentem maledictis ac iurgiis. Lacerabatur simul è Societate Consaluus Sylueria, qui ad Manomotapam Aethiopiæ deinde Christi causa peremptus est, ac tum in eadem vrbe conciones habebat vir nobilis genere, sed virtute & eruditione multo nobilior. Huius tam sacrilegæ, tamque infandæ audaciæ crimen haud obscuro indicio hæsit in falsis è circumcissione fratribus, qua ex facie aliqui ex Europa subinde, pretio à limenarchis aut nauium magistris furtim admissi, mercatorum habitu in Indiam peruehuntur. ibi cum Aegyptiis ferme Iudeis) quorum in iis locis numerus ingens) aliarumque nationum, & sectarum hominibus, in Christiani deinde nominis damna perniciemque conspirant. Eo eo, de inducenda in illas regiones sacra Inquisitione agi cæptum ab Rege: quæ hodie per idoneos probatosque iuris diuini consultos iudicia Goæ magno rei Christianæ bono exercentur. Interea Melchior Nonnius, ab Goa per varios ancipitesque admodum casus ad Sinarum littora primum, inde, redemptis è custodia Lusitanis quorum ante meminimus, in Iaponios biennij amplius nauigatione perfertur. comiterque & benigne exceptus ab Rege Bungi, Cosmum Turrianum nec opinato ibidem offendit, qui ab euerfa excisaque iterum per intestinas ciuium discordias rabiemque Amangutio vrbe, sese in ea loca receperat. Cedri- nas ædes eleganti opere, itemque aream templo condendo, necnon annuæ pecuniæ modicum quid patribus adsignauerat Rex: eius areæ pars cœmeterio è Christiana consuetudine dedicata: pars altera in vsum valetudinarij publici ita diuisa bi-  
Nn 2      fariam.



## *Historiarum Indicarum*

fariam : vti elephantiaci, quorum est in iis terris magna multitudo, seorsum ab ceteris ægrotis haberi, curarique possent. Id opus, quo magis nouum insolitumque, eo maiore approbatione celebratum ab incolis; multiq̃ue inde, sed vt antea plebeij ferme ad Christum accedebant. At Melchior, haud ignarus, ad excitandos ad virtutem, pietatemque populorum animos, quantum sit in principis exemplo momenti; Regem ipsum variis rationibus ad verum Dei cultum conabatur adducere: successu tum quidem minime læto: quod neque dum tumultus plane quieuerant; & Rex è Ienxuana heresi, quæ negat spiritum esse vllum, aut omnino quicquam præter ea quæ sensu percipimus; à voluptatibus, quæis dudum adsueuerat, ad Christianæ disciplinæ seueritatem traduci se nullo pacto sinebat. Egit cum eo Melchior, vti cum aliquot saltem Bonziis præcipua sapientiæ fama, coram ipso regniq̃ue proceribus disputationem ac certamen haberi de religione permetteret: ne id quidem impetratum. Inde cum exiguam in præsentia cerneret proficiendi spem; Cosmo cum sociis ibidem relicto, ad suum ipse prouinciale munus reuertit in Indiam. Sextus & quinquagesimus tum seculi huius agebatur annus. eo ipso tempore Ignatius Loiola Romæ, non tam ætate confectus, quàm ieiuniis, vigiliisque, & super omnia desiderio Christi, decesserat. Huic, cum aliis in prouinciis, ( ipsas enim duodecim ab se Dei munere constitutas reliquit ) tum in India præsertim, solemni ritu, & exquisitis cæremoniis parentatum est. tametsi minime deerant qui tam illustri sanctitate viri patrocinium implorandum potius, quam fundendas pro eo preces haud absurde affirmarent. Certe ab illius excessu ( vti optimum patrem in cælo suorum cæptis adesse coniiceres ) per omnes fundatæ ab eo Societatis ordines, recens quædam ad pios labores alacritas, nouus mentium ardor, vigorque diffus: & Indicus ager, culturæ & sationibus vberiore quam antea prouentu respondit. annis quippe proximis quatuor. Gog duntaxat, præter incertam summam eorum qui à Franciscanis & Dominicanis abluti sunt, baptizati ab Societate Iesv mille primum & octoginta; mox mille nongenti sexdecim; dein tria millia ducenti sexaginta; demum incremento notabili duodecim millia septingenti quadraginta duo. In iis  
regia



regia virgo fuit, adulta iam ætate, Mealis filia, ob generis claritatem Regi Mahometano cuidam in matrimonium destinata. hæc, tempestiuus nobilium sceminarum adhortationibus, itemque psalmis, & catechesi, & supplicationibus quæ per urbem haberi consueuerant, studio Christianæ religionis incensa, dum Prætor Barretus tota de re Mealem docet, ac furem ira placare contendit; matris ancillarumque pertinaces & impias eluctata manus ad paratum in platea vehiculum, adiuuante Prætoris, sese proripuit. inde cum honestissimo comitatu ad spectatæ virtutis ac pudicitie matronam perlata, Didaci Pereris coniugem, adhibito scriba publico testibusque, Christianam sponte se fieri velle professâ, post aliquot dies in D. Pauli templo ab ipso Aethiopiæ Patriarcha vitalibus aquis abluitur, & sacro MARIÆ nomine decoratur, tanta ciuitatis vniuersæ lætitia tantoque concursu; vt Prætor ipse, qua erat pietate, virga ad submouendam turbam arrepta, lictoris munere fungeretur. eidem virgini cum à primoribus Lusitanis priuatim, tum à Prætoris data publice munera; & annui redditus aureorum circiter octingentorum è fisco regio in alimenta decreti. Iam ex ipsis quoque Regibus Molucarum, is qui Bactianum obtinebat insulam, quamquam acriter obnitente sacero Ternatensi, tamen constanti animo se se ad Christum applicuit; abolitaque Mahometana superstitione, ac fanis euerfis, defixas haud vno loco præaltas Cruces adorari à popularibus iussit. Ac Soloris quoque Rex (quæ salubris admodum ora, gradus octo cum quadrantibus tribus ab Aequatore in meridiem sita, leucas distat à Malaca trecentas (cum familia, regniq; proceribus ab Lusitano quodam institore baptismum accepit. patres deinde à Malaca per litteras inuitatos cū propter paucitatem non impetrasset, fratris filium Regem designatum, cui Laurentio nomen, apprime bona iuuenem indole, Malacâ ipse transmisit: nimirum vt ibi per otium expolitus, ad suos dein erudiendos reuerteretur in patriam. Hæc Solorani. Ac multæ insuper eius plagæ nationes cū Euangelij nomē perueni accepisset fama, miram cupiditatem Christianæ religionis exarserat. Quibus vt Ioânes Rex propter multitudinem atq; distantiam cunctis opitulari non posset; Indicos quod certe neophytos nouis decretis ornare beneficiis atq; muneribus



## *Historiarum Indicarum.*

ribus augere pergebat. is audita Petri Mascarenæ morte, cum præclare intelligeret ad amplificationem rei Christianæ plurimum interesse, cuiusmodi moribus ingenioque Prætor Indiam regeret; circumspectis omnibus Lusitani primoribus regni, præfectum cubiculi Constantinum Brigantiæ Ducis fratrem, in idipsum delegerat munus: qui provinciam illam adeo sancte ac prudenter postmodum obtinuit, uti deinceps ituris eo magistratibus, officij exemplum ac norma unus ipse proponi consueverit. Iam in id quoque Ioannes acriter animum & cogitationes intenderat, uti Francisco Xaverio pro sanctitate viri, & immortalibus in Ecclesiam Christi promeritis, cœlestes more maiorum honores à Pontifice Romano decernerentur. Atque idcirco per litteras Indiæ Prætori mandaratur, uti quæcunq; per Xaverium Deus miracula perpetrasset, vere atque accurate indagata colligeret: cuius nos inquisitionis autographum exemplar cum testimonijs publicis priuatisque apud Conimbrigense Collegium nuper inspeximus. Hæc meditantem ac molientem, neque sera, neque inexpectata Ioan-  
nem abstulit mors, cum ætatis annum, viribus dudum affectis, ageret quintum & quinquagesimum: vir plane magnus, & venerabilis, ac præter cæteras laudes æterno præconio celebrandus, quod  
imperij moderatione, cultuque bonarum artium, & studio religionis amplificandæ, formam speciemq; benefici,  
& mitis, ac vere  
Christiani  
Regis expresserit,

*Historiarum Indicarum Finis.*



















10414<sup>c</sup>  

---

5.00

H589  
M187h



